


Diospan Tsain



New Testament in Sharanahua (PE:mcd:Sharanahua)

# Diospan Tsain

## New Testament in Sharanahua (PE:mcd:Sharanahua)

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 25 Nov 2022 from source files dated 29 Jan 2022  
8402923d-fd05-5a85-a7ae-203f04ecb375

## Contents

Mateo . . . . .	1
Marcos . . . . .	72
Lucas . . . . .	113
Juan . . . . .	187
Hechos . . . . .	237
Romanos . . . . .	297
1 Corintios . . . . .	327
2 Corintios . . . . .	362
Gálatas . . . . .	383
Efesios . . . . .	395
Filipenses . . . . .	407
Colosenses . . . . .	415
1 Tesalonicenses . . . . .	423
2 Tesalonicenses . . . . .	429
1 Timoteo . . . . .	433
2 Timoteo . . . . .	443
Tito . . . . .	450
Filemón . . . . .	454
Hebreos . . . . .	456
Santiago . . . . .	484
1 Pedro . . . . .	493
2 Pedro . . . . .	503
1 Juan . . . . .	509
2 Juan . . . . .	516
3 Juan . . . . .	517
Judas . . . . .	518
Apocalipsis . . . . .	521

## Mateo Jesushuunoa Cununi

*Jesucristo ahuun shunifo*

*Lc 3.23-38*

<sup>1</sup> Un mato Jesucristohuunoa tsain shara tapimai. Ahuun shunifoan aton anufo un mato yoiqui tau huai. Ahuun shuni David yafi Abraham.

<sup>2</sup> Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

<sup>3</sup> Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

<sup>4</sup> Aram facu Aminadab ini.

Aminadab facu Naasón ini.

Naasón facu Salmón ini.

<sup>5</sup> Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

<sup>6</sup> Isaí facu David ini. Nan David Israelifoan aton niaifocoin ipaoni.

David facu Salomón ini. Salomón ahuafin Uriaspan ahuin ipaoniquin.

<sup>7</sup> Salomón facu Roboam ini.

Roboam facu Abías ini.

Abías facu Asa ini.

<sup>8</sup> Asa facu Josafat ini.

Josafat facu Joram ini.

Joram facu Uzías ini.

<sup>9</sup> Uzías facu Jotam ini.

Jotam facu Acaz ini.

Acaz facu Ezequías ini.

<sup>10</sup> Ezequías facu Manasés ini.

Manasés facu Amón ini.

Amón facu Josías ini.

<sup>11</sup> Josías facu Jeconías yafi ahuun yorafo ini.

Nantianri Babilonia anoa niaifoan ahuun ranushumuafu nichini Israelifo rutushon atirifi ahuun mai ano ihuushonafuano ahuun oinmatifo huanon. <sup>12</sup> Chipofin Babilonia anoashu futsafori cainni.

Jeconías facu Salatiel ini.

Salatiel facu Zorobabel ini.

<sup>13</sup> Zorobabel facu Abiud ini.

Abiud facu Eliaquim ini.

Eliaquim facu Azor ini.

<sup>14</sup> Azor facu Sadoc ini.

Sadoc facu Aquim ini.

Aquim facu Eliud ini.

<sup>15</sup> Eliud facu Eleazar ini.

Eleazar facu Matán ini.

Matán facu Jacob ini.

<sup>16</sup> Jacob facu José ini.

José ahuin María nan Jesús ahua ini. Jesús Upa Diosin catonni nocon Numamisi inon. Nan non Cristoran huamisi. <sup>17</sup> Abraham ahuun funafo catorce ahuun unutani David ini. David ahuun funafori catorce ahuun

unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

*Jesús cainni*

*Lc 2.1-7*

<sup>18</sup> Jesucristo cainfin iscaniquin. José María yoini, —Non fiananon, —ishon. Ascafia fiananfotaima María man facu nanua ini. José ayamafian Diosin Yoshin Sharapan nanumana. <sup>19</sup> Ascashon José Dios tanasharacoinshon ahuun chain ahuin rafini huacasmaquin yorafoan ointaifi yoicasmani. <sup>20</sup> Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihuu. Nan facu nanuafin Diosin Yoshin Sharapan nanuamaquin. <sup>21</sup> Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini. <sup>22</sup> Diosinhuunshon inon pacoai yoimisifoan cununifo cuscan man aquin. <sup>23</sup> Nanfoan cunuquin isca huani,

“Nicapon. Ainfo funuoma tsoa afu iyamafiamisi facu nanushquin. Caianno furonafacu iishquin. Ahuun anufin Emanuel (Onicoinnin tsainman Diosin nofu icaran) ishquiquin,”

ishon Dioshuunshon inon pacoai yoimisi cununi.

<sup>24</sup> Ascaino José moinachahuatan nan Diosin oinmatinin afu nai muran imisi yoia cuscan María fiini. <sup>25</sup> Fiiflashocai afu ipaonima furun caiyain chain. Ascashu furun caincun José anuqui Jesusran huani.

## 2

*Nocofunu tapicoianfo fari oaiquirinoashu Jesús oinpai funifo*

<sup>1</sup> Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunoa tapicoianfo fari oaiquirinoashu fucani Jerusalén ano noconifo. <sup>2</sup> Ascano nococashon ato yocanifo, —Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oquin. Min nocon niaiforan ishon oinpai non oaran, —ishon ato yocanifo.

<sup>3</sup> Ascaifoan nicai Herodes ahuun ointi fucashriscatani. Jerusalén anoa yoraforifi Herodes icai cuscan arifi muunifo. <sup>4</sup> Ascacun ahuun yorafohuunshon Diosin cufimisifoan niaiffo yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani. <sup>5</sup> Ascaiton cumacaquin, —Belén Judea murannoashu cainshquin, —nannori Diosinhuunshon inon pacoai yoimisifoan cunuquin isca huani.

<sup>6</sup> “Belén anoafoan ua nicasharacahuun. Maton mai Judea muran. Maton pushu ichapayamafiano nannoashu niaifo uhua-pacoin cainshquin. Uhuun yora Israelifoan aton cushumisi iishquiran,”

icashu cununi.

<sup>7</sup> Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man

fishi oinquin tau huaquin? —ishon ato yocaiton. Tapimanifo ahuutian-main oinqui tau huafoquin. <sup>8</sup>Ascashon aton yoini, —Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahuun noicanon, —ishon Herodes ato yoini.

<sup>9-10</sup> Ascano niaifon ato yonoa cuscan nican fishifohuunoa tapi-coianfo fonifo. Focaquin oianfo fishi fari oaiquirinoashu oaiton oin-cani unimacoinnifo. Ascatan muufocaquin oianfo facu raca manaon nituni. <sup>11</sup> Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, —Minfin fasi sharastacoquin. Min nocon Ifo, —ishon yoinifo. Ascacatan aton mao fupucashon ahuara chicoin inancoinnifo. Oro inanfain ahuun ininti shara inanfain ininti sharacapa futsa ahuun anu mirra nanri inannifo. <sup>12</sup> Ascashu nanno oshayoafon aton namapan Diosin ato yoiquin isca huani, —Afanan Herodes ari foyamacahuun. Fai futsan mato mai ari fotacahuun, —ishon Diosin ato yoini. Ascacuai Jerusalén ano fonifoma.

*José futan María furun Belén anoshon Egipto ano ichoquinifo*

<sup>13</sup> Man fishihuunoa tapicoianfo atomaquinoashu foafono Diospan oinmatinin afu nai muran imisi José ahuun namapan yoiquin isca huani, —Funinaca huahuun. Nan facu yafi ahua Egipto ano iy-oriscatahuun. Ascashu nanri iyohuu nan un mia afanan yoiaitian. Nan Herodes facu funaiqui rutushquin, —ishon Diospan oinmatinin José yoini. <sup>14</sup> Asca huaino moinacahuatan facu ahua futan yamu Egipto ano ichoquinifo. <sup>15</sup> Ascashu nanno iyopaonifo nan Herodes naitian. Ascacun Diosihuunshon inonpacoai yoimisiton cunushoni isca huaquin,

“Unfin uhuun facu Egipto anoa afanan yoimanicain,”

ishon yoini cuscacoin man aquin.

*Herodes ahuun ranushumuafu yononi facumishtifo rutunonfo*

<sup>16</sup> Ascano fishihuunoa tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunoa tapicoianfoan yoirafo man fari rafu caano fishi oinquin tau huafo. Ascacun Herodes ranushumuafu yononi, —Belén anorafo yafi a chaima icafoan aton furonanfacufo fari rafu yafu non yomumishti rutuqui cuyotacahuun, —ishon ato yononi. <sup>17-18</sup> Ascano

“Ato nicafo Ramá anoashu uaicani aton facuhuunoaashu uaiyanan shorarascaifon nicacaquin. Aton ointi main huamapaicaquin, ‘Uaiyamacahuun,’ ato huafiainfono aton facu manocani unupainifomaran,”

ishon Jeremías Diosihuunshon inonpacoai yoishomisiton cununi cusca-coin man aequi.

<sup>19</sup> Ascashu man Herodes naano Diosin oinmatinin afu nai muran icaton José ahuun namapan yoiqui isca huani, <sup>20</sup> —Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani. <sup>21</sup> Ascaino moinacahuatan José ahua yafi furun Israeli mai ano afanan ato iyoni. <sup>22</sup> Caaquin nica Herodes man naano ahuun facu Arquelao Judea murannoa niaifo nicai José musuni. Ascaiton Diosin oinmati afu nai muran imisiton afanan ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. <sup>23</sup> Ascashu

Nazaret pushurasi muran fonifo. Diosihuunshon inon pacoai yoimisi-ton nannori cunuquin isca huani,  
 “Cristofin Nazarenon ishquiquin,”  
 ishon cununi.

### 3

*Nan ato unu muran iquimamisi Juan tsoa istaipama ano ipaoni  
 Mr 1.1-8; Lc 3.1-9, 15-17; Jn 1.19-28*

<sup>1</sup> Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. <sup>2</sup> Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashon Diosin tsain nicacoincahuun. Samamashta Diosin mato yonoshqui oiquin, —ishon Juanpan oi ashcafinin ato yoini.

<sup>3</sup> Nan Isaías Diosihuunshon inon pacoai cuscan yoimisi ipaoni. Nanton Juanhuunooa yoini isca huaquin,

“Tsoan istaipamashon Diosin yonoa cuscan oi ashcafinin yoiquin isca huanonpacoan, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’ ”

ishon Isaías Juanhuunooa cununi.

<sup>4</sup> Ascano camello inapan ahuun rani sahuuti huashon Juanpan sahuua ini. Ascashon yoina fichin aqui nanushumuni. Ascatan ocutsuru pifain afuchi fona ayani. <sup>5</sup> Ascano Jerusalén anoafó yafi unu Jordán ano icafo non Judea muran icafori ahuun tsain nicapaicani aqui funifo. <sup>6</sup> Ascashon aton chaca shatupaicaquin yoiainfoan Juanpan unu Jordán muran ato iquimapacuni afanan ipaoni cuscan huatama ismanonfo.

<sup>7</sup> Ascaino Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin, —Manfin rono paupaton facu cuscaracoinfoquin. Icoinra huayamaifoan Diosin atoqui sinaquin ato omitsiscapanonfo. Ascan manfin omitsiscapanacafo muran focasmafi-aqui maton chaca man shatupaima. <sup>8</sup> Ascacun chaca shatucoincashon Diosin mato yoiá cuscan nicacoincahuun. Man ipaoni cuscari afanan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

<sup>9</sup> Ascashon maton nomuran shinanquin isca huayamacahuun, “Nonfin Abraham funafo non ahuun caiforiquin. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunooa toquirifo Abraham ahuun funafo oni huatiroquin. <sup>10</sup> Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquin.

<sup>11</sup> Ascacun un mato unu muran iquimapacua maton chaca shatucoinshon natian Diosin tanasharashon man ismanon. Ascafa futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuaa chacafo ahuunshon shatuashu a cuscara shara man inon. Ascan uncai a cuscarama. Un ahuaa shara huahuu rafanancai un ahuun oinmatima. Ascatahama uhuun ramapaiyamainoricaí un ahuun

oinmati icuanama. <sup>12</sup> Ascano naantorifi chipo a icoinra huafo yafi a nicacasmaifo ato pashcanan huaashquin. Nan icoinra huafoasi a icari ato ihuicoinshquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscai unupacunacafo-maran, —ishon Juanpan nan Fariseofo yafi Saduceofo yoini.

*Jesús unu muran iquimani*

*Mr 1.9-11; Lc 3.21-22*

<sup>13</sup> Ascaino Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanon. <sup>14</sup> Ascashu aqui nocoaiton Juanpan Jesús yoini, —Uacaiarocon mian acafin shara icuanaquin, —huiton. <sup>15</sup> Jesús cumani, —Upa Diosin noco yonoa cuscan fusti nantifi non aca shara itiro. Ascan natian ua iquimahuu, —huiton. —Ascan min ua yoiyai cuscan un mia unu muran iquimairan, —ishon Juanpan yoini. <sup>16</sup> Asca huatan Jesús unu muran iquimana cainna cahuan mapuinifoanni. Ascatapaiyaino Dios ica ariashu nai fupuini. Nai fupuicaino Diospan Yoshin Shara ruhui cuscara Jesusqui fotopacu cahuani. <sup>17</sup> Ascano nanno niafoan nai murannoa Upa Diosin ahuan oi nicanifo yoiquin isca huiton, —Nan uhuun Facu un catoan. Un fasi ahuan noi. Un fasi aqui unimacoinran, —ishon Apa Diosin yoini.

## 4

*Yoshin chacanun Jesús chaca huamapaini*

*Mr 1.12-13; Lc 4.1-13*

<sup>1</sup> Ascano Jesús Diosin Yoshin Sharapan tosa istaipama ano iyoni. Nannoshon nan yoshin chaca Satanás cuarenta oshatan chaca huamapaifainni. <sup>2</sup> Nan cuarenta oshatan piqui tununi. Ascashu fasi fonaincoinni. <sup>3</sup> Ascaino nan yora chaca huamapaimisi aqui nocoshon yoini isca huaquin, —Min Diospan facumainquin na toquirifo misi onihuhuu, —ishon Satanás yoiaiton. <sup>4</sup> Jesús cumani, —Noncai misi fustihuunoashu ipatiroma. Diosin tsain fusti non yopacoin. Nan noco yoiya cuscan fustihuunoashu non isharatiroquin, —huiton.

<sup>5</sup> Nicaquin Satanás Jesús Jerusalén pushurasi shara Diosin ahuan yorafofu imisi ano iyoni. Nan Israelifoan aton Diosfu tsainti pushu pumancaya cuyacoin iyoshon yoiquin, <sup>6</sup> —Minmain Diospan facuquin nuriashu pacucaintahuun. Diosin tsain mihuunoa cununi isca huaquin,

“Diosifin ahuan oinmatifo afu nai muran icafo yonoiquin min pacuaiton mia cushunonfo. Min tauri toquirifoquin runtonma mia achinonfo,”

nannorifi Diosin tsain mihuunoa cununiquin, —ishon Satanás yoiaiton. <sup>7</sup> Afanan Jesús cumani, —Ascacia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran, —Jesús huani.

<sup>8</sup> Ascaiton afanan Satanás Jesús machi cuyamamaquin iyoshon nan manifoti sharashtacoin oinmani. <sup>9</sup> Ascashon yoini, —Oinpon Mian ratoconun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin, —ishon yoiaiton. <sup>10</sup> Afanan Jesús cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain



nocon Ifocun,” ishon cununi. Ascan umaquinoashu cariscatahuun Satanás,—ishon Jesús yoini.

<sup>11</sup> Asca huaino Satanás Jesusmaquinoashu caino Diosin ahuun oinmatifo afu nai muran icafo aqúi fotonifo pimashcaquin.

*Jesús Galilea anoshon ato tapimaquin tau huani*

*Mr 1.14-15; Lc 4.14-15*

<sup>12</sup> Ascashu nan Juan ranushumuafoan cunu muran iquimanafo nicatan Jesús Galilea ano nasoni. <sup>13</sup> Nan Nazaret anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. <sup>14-16</sup> Jesús nanno inon pacoai cuscan nan Isaías inon pacoai yoimisiton ahuunoa cunuquin isca huani,

“Zabulonfo yafi Neftalifo Galilea ian ano icafo. Nanno aton mai.

Unu Jordán ocuma futsa. Nannori Dios icoira huamafo atofu icafo. Ascashu nanfo faquish muran ica shinantsafo. Ascafia samamashta oianfo shafariscatani cafiscashqui. Nanscarifiai numamisimaisi omitsiscapanacafo muran focuanafo. Ascacun Cristo atoqui nocorisca ato numashquiran,”

icashu atohuunoa cununi.

<sup>17</sup> Nannoshon Jesús ato yosiquin tau huaquin isca huani,—Nocon Ifo Diosin matoqui samamashta nocoyoi. Ascacun maton chaca shatucahuun. Chaca huatamarocon Diosin tsain nicacoincahuun,—ishon Jesús ato yoini.

*Jesús rafu non rafuri nushumisifo ato cunani afu fononfo*

*Mr 1.16-20; Lc 5.1-11*

<sup>18</sup> Ascano ato yoitan Jesús ianmanhuan cusumun cani. Caquin Simón chipocu Andrés futan nushutinin nushuaifoan ato ointoshini. Nan Simón ahuun anu futsa Pedro. Nan rafutafin nushumisicoín inifoquin. <sup>19</sup> Ascaiton ato yoiquin,—Ufu fucahuun. Manfin nushumisicoínquin. Man shiman ichaparasi nushutinin fia cuscan natian man uqui yora ichapa ihuushqui un aton Ifo inon,—ishon Jesús ato yoini. <sup>20</sup> Ascaino nushuti huafaicani afu fonifo.

<sup>21</sup> Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquis-hon nushuti icushaifoan atori yoini,—Ufu fucahuun,—ato huaino.

<sup>22</sup> Samamashta apa shasho naqui nichifainifocani afu fonifo.

*Jesús yorahunrasi ato yosini*

*Lc 6.17-19*

<sup>23</sup> Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfaini,—Itisharacahuun. Úpa Diosin mato iquishquin oiran,—ishon ato yoifoafaini. Ascashon pau futsa futsa-tapafoan icafoan ato caya huamani. <sup>24</sup> Ascaiton Siria mai anoafaoanri ahuunoa nicacashon isinicaifo aqúi ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofori caya huamafain yoratisho charishi futsuari caya huamapaoni. Nantifi ato caya huamapacuni. <sup>25</sup> Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

## 5

*Jesús machi anoshon ato yosini*

*Lc 6.20-23*

<sup>1-2</sup>Yorahuanrasi aqúi fuaifoan oin Jesús mapufaintan machi pochinin tsaoni. Nanno tsaono ahuunshon tapiafo a shinain caiton noco yosiquin isca huani.

<sup>3</sup>—Tsoa futsan aton nomuran shinanquin isca huai, “Ufcái un ishara tiroma. Un Dios yopacoinran,” icaiton

Diosin ato unimamashquin. Ascashu uhuun Upa Diosin niaifo ano afu ipatirofoquin.

<sup>4</sup>Ascan tsoara futsa uaiquin omitsiscafishu chipo unimatiro.

Diosin atohuun ramapaiquin aton ointi main huamatiro.

<sup>5</sup>Cacapaimisi itamarocon futsa ahua huamisima. Mato ahuun nomuran shinanquin isca huai, “Ufi apaiyai cuscan atama Diosin ua amapaiyai cuscan fusti un atiroran,” ishon shinanfainaiton Diosin ato unimatiro.

Nan cuscarafo Diosin yoiyotiani cuscan ato inanshquin. Diosin icano arifi afu inonfo. Ascashu nantifi ahuunari atonari iishquin.

<sup>6</sup>Ascan nan ratoranfo Diosifu ipaiquin ahuun tsain tapipaiquin finaifo a cuscara shara iishcaquin.

Nan cuscarafoan fuchipaiyaifo cuscan Dios ato imatiro a cuscara shara inonfo.

<sup>7</sup>Ascan nan futsafohuun ramapaiquin ato shara huaiton Diosin man tapia.

Ascacun nanrifi ahuun ramapaiqui a shara huashopacunaca arifi unimanon.

<sup>8</sup>Ascan nan Dios fusti tanasharashu ahuun nomuran shinansharamisi. Nan cuscarafoan chipo Dios ointirofo. Ascaiton Diosin ato ointi unimamashquin.

<sup>9</sup>Ascan tsoan nan noicasmatanainfoan ato raunan huaino afanan rau huantanano.

Nan cuscarafo Diosin yoiquin, isca huaqui, “Min uhuun facuran,” ishon ato yoiaino fasi unimacoinshcáni.

<sup>10</sup>Tsoa Diosin yonoa cuscan aiton futsafoan omitsisca huafiainfoan tunua.

Nan cuscarafo Diosin ato unimamashquin. Ascashon nan Diosin niaifo icariafo nanfori atona iishquin.

<sup>11-12</sup>Ascan futsafoan uhuunshon mato roaquin omitsiscamafain matohuunoa chani futsa futsatapafo yoifiaifoanno shinanchacayamacahuun. Mato omitsisca huaifo cuscan mato shunifori nan Diosin tsain yoisimisifo omitsisca huapaonifo. Ascan man uhuunoashu omitsiscafishu Upa Diosiqui man nocoaitian fasi sharacoin mato imashquin man afu ipashanon. Ascacun unimacahuun.

*Jesús icoinra huafo sao yafi shafa cuscara*

*Mr 9.50; Lc 14.34-35*

<sup>13</sup>Ascan manfin nan nuno mai anoa sao cuscaraquin. Nami saomua shara payocotiroma. Nanscarifiai yora chacafo muran ishon marifi man ato shinanmasharatiro chaca huanonfoma. Ascan nami saomuamacai shara itiroma. Paismacoin itiro. Ascafia afanan nami shara iyamainoricaí saori shara itiroma. Afanancai ahuashta itiroma. Nanscara non

potatiro puamanonfo. Nanscarifiai afanan man ua tanasharayamain-ocai matohuunshon tsoan ato chaca shatutiroma isharashquin. Man ua tanasharayamashu man funocointiro.

<sup>14</sup> Ascafia manfin nan manifoti ato chasha cuscaraquin. Machi cuya mamaquinoa pushurasi fasi chaicushon shafacafi ointirofo. Onucal atiroma. Nanscarifi aquin man ua tanasharaino mato oinquin matohuunshon ua icoinra huatirofo shafacafi iishcaquin. <sup>15</sup> Nanscarifi aquin tsoancai faquishiano oinpaifiaquin lamparina tapa camaqui otashon cutipan fupomisima. Ascatamarocon otashon tapa camaqui huatiro shafacafi tsaocun pushu muran iquicaquin oinsharanonfo. <sup>16</sup> Ascacun nantifi yorafo shara huacoincahuun. Man ato shara huai cuscan oinquin shinantirofo isca huaquin, “Diospan yorafoan fasi noco shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitiro isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

<sup>17</sup> Isca huaquin man shinan raza, “Moisés Diosin yononi cuscan cunushoni yafi Diosin tsain yoimisi futsafoan cununi cuscani nanfo Jesús noco nicamapaima. Nanfo noco potamapairan,” ishon raza man shinan. Anori shinanyamacahuun. Uncai Moisés yafi Diosin tsain yoimisi futsafoan cununi cuscan potapaiquimarocon man cununifo cuscan un huamashquin un oa. <sup>18</sup> Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacoai cununshoni cuscan nantifi fustishtacai cuyopacunacama aqi tau huani cuscan.

<sup>19</sup> Ascan tsoa Diosin yononi cuscan fustishta potashu non futsafori potamashu Dios icano aacai ahuama itiro. Ascafiaquin tsoan Diosin tsain nicasharafainquin futsafori Diosin tsain shafacafi yosicun nan Upa Diosin icano niaifo patashari itirofoquin. <sup>20</sup> Ascano nan Fariseofo non Judiofo aton niaifofo futsafoanri, “Nonfin fasi shara imisiran,” ifianmisishacaquin Diosin yononi cuscan tanacoianfoma. Diosin yononi cuscan huacoinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

—*Sinayamacahuun, —ishon Jesús ato yosini*

*Lc 12.57-59*

<sup>21</sup> Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro matori copiquiri namatirofo,” ishon Moisés nocon shunifo yononi. <sup>22</sup> Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofo ari iyotiro a onaintimanonfo. Ascafia tsoan futsa chaca huai isca huaquin, “Minfin mapo chacaquin. Min nisoncoianran,” huaiton Diosin a omitsiscapanacafo muran nan chi muran potatiro anoashu capashononma.

<sup>23-24</sup> Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinancun. Afanan

Dios cufitamarocon iquisi nan futsa min chaca huaa ano catahuun. Aqúi nocoshon yoisharahuu mia rauhuanon. Asca huano afanan min nasotiro Upa Dios cufishquin.

<sup>25</sup> Man futsa nifishon matoquí nocoaiton isca huaquin, “Min ua nifian cuscacái mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoatima rufoto aroshararisca huahuun. Asca huaiyamaiton mato niaifo ano iyotiro. Nocoshon ni-aifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro. <sup>26</sup> Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqúi man Dios chaca huamisiquin. Oatima arorisca huahuu mato omitsiscahuapanonma.

—*Maton ahuinma oincaquin chotapaiyamacahuun, —Jesús ato huani*

<sup>27</sup> Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi. <sup>28</sup> Aafin iconquin. Ascarifi un mato yoirifi huai. Tsoa ainfo ahuun ahuinma oinquin ahuun nomuran shinain, “Un nan ainfo chotapainonran,” ishon nannori shinanquin a chotacoin shinantsai. <sup>29</sup> Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin. <sup>30</sup> Nanscarifiai min mumiorishon min mucuman min ahuara min chaca huaiton, min mushtua shara icuana. Man mumafiashu omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin.

*Nocofunu yafi ainfo ununantirofohuunoa Jesús ato yosini*

*Mt 19.9; Mr 10.11-12; Lc 16.18*

<sup>31</sup> Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un natian mia unuiran,’ ishon cunushotiro.” <sup>32</sup> Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafiaiton unuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iquí shinantsai. Funumain afi unucun. Ascafia nan funun ahuin unua nan ainfo nocofunun fiquin aarifi chaca huai. Asca huaquin nan ahuun ahuinma fu iquí shinantsa huai.

—*Man yoitiani cuscan acahuun, —ishon Jesús ato yoini*

<sup>33</sup> Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. <sup>34</sup> Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroran,” ishon afanan anori yoiyamacahuun. “Un mia yoia cuscan un acunma nantifi nai muranshon ua nicatiro Upa Diosin ua onaintimatiroran,” ishon afanan anori yoiyamacahuun. Diosin nai muran ica. Ascan anori yoiyamacahuun.

<sup>35</sup> “Un mia yoia cuscan un acunma nuno mai anoa ua onaintimatiroan,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroan,” ishon afanan anori yoiyamacahuun. Nan pushurasi Jerusalén nocon niaifocoin Diosina. <sup>36</sup> “Uhuun mapon un shinain cuscan un mia acunma ua onaintimatiroan,” ishon yoiyamacahuun. Maton shinanhuunshon maton fo fiso iyamarai osho imatiroma. <sup>37</sup> Ascan maton yora ahuaa yoipai ato yoihuu isca huaquin, “Un mia yoia cuscan iconcoin,” iyamarai “Nan iconmaran,” ishon ato yoicahuun. “Un mia acunma ahuaa ua onaintimatiroan,” ishon anori yoiyamacahuun. Na yoshin chaca Satanasfin chanimisicoinquin. Ahuunshon yora anori yoitiro.

*Tsoamain futsa copitiro Jesús ato tapimani*

*Lc 6.29-30*

<sup>38</sup> Ascan nocon shuni Moisés afanan tsain futsa nocon shunifo yononi cuscari man man nicamisi yoiquin isca huanicun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahuan furo tsucamatiro. Ascan mia sutuquin min shuta fusti tucucun niaifoan copiquiri ahuan shuta fusti tucuntiroan,” ishon Moisés yononi. <sup>39</sup> Nocon shunifo nannori yonofianicun un mato tsain futsa yoiaiton ua nicacahuun. Tsoan mato chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

<sup>40</sup> Futsan mia niaifo ano iyocun min camisa mia fiainton min sahuuti cushtopari inahuun. <sup>41</sup> Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshocahuun,” ishon mato yonoaiton shinantaquima kilometro rafu foshohuun. <sup>42</sup> Tsoanran mato ahuaa yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inancayocahuun. Fishcotama.

*—Mato noicasmafiaifoan atohuun noicahuun, —ishon Jesús ato yoini*

*Lc 6.27-28, 32-36*

<sup>43</sup> “Ascashon naan maton yorafohuun noicoicahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi. <sup>44</sup> Nannori yoifianifo un mato yoiquin isca huai, Naan mato noicasmafiaifoan atohuun noicoicahuun. Tsoan mato omitsisca huairi Dios cuffishocahuun. <sup>45</sup> Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaifori shara huacahuun. Asca huaifin marifi man Diospan facucoinfoshon futsafori man ato ismatiro.

<sup>46</sup> A matohuun noiaifosi copiquirifi man atohuun noiainoacai aacai ahuaa. Yora chacaforifi ascarifiaifoanno. Man ascainocai Dios mato yoima man shara huanan ishon. <sup>47</sup> Maton yorafo fustisi man tsain shara yoiaino aacai ahuaa. Yora Dios iconra huaamafori nanscarifiaifoanno. Man ascainocai Diosin mato yoima “Man shara huanan,” ishon. <sup>48</sup> Ascano maton Upa Diosin nai muranshon nantifi yorafo noia

cuscan marifi nansca huacahuun. Upa Diosin shinansharamisi cuscan marifi shinansharacahuun.

## 6

—*Ahuuomafo atohuun ramapaiquin inanhuun, —Jesús ato huani*

<sup>1</sup> Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinansharanonforan,” ishon anori man shinancai Upa Diosin matoqui unimaima. Mato ahua inainma. <sup>2-4</sup> Nan paramisifo cuscara iyamacahuun. Nanfoan atohuunoo yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoo shinanmapai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofiaino Upa Diosincai atohuunoo tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tosa futsa oinyamaino man ahuuoma inanquin Upa Diosin oin matoqui unimai mato ashosharatiro.

*Jesús afu rafuafo yosini ahuuuscashomain Upa Dios cufitirofoquin*  
*Lc 11.2-4*

<sup>5</sup> Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannofo atohuunoo shinansharamapaicani. Ascaifoan oinquin futsafoan atohuunoo shinansharatirofia Diosincai atohuunoo shinansharatiroma. Ascashocai ato ahuashta inansharashquima.

<sup>6</sup> Ascacun marifi ato cuscara iyamacahuun. Man Dios cufiaitian tosa yamaino Upa cuficahuun. Ascafiacun Upa fustiton mato ointiro. Ascashu matoqui unimacoinquin man yopai cuscan mato inansharashquin. <sup>7</sup> Man cufiaitianri nan tsain fustisi yoiriamacahuun. Nan icoinra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoirialton ua Upa Diosin nicatoran,” ishon shinanmisifo. Asca huafiainfoancai Diosin ascaran tsain nicapaima. <sup>8</sup> Ascacun marifi ato cuscara iyamacahuun. Man Upa Dios yocataima man yopai cuscan man tapiquin.

<sup>9</sup> Ascashon cufinquin isca huacahuun,  
“Nocon Upa nai murannoaton min fasi sharacoin.

Nantififain mihuunoo yoisharapainon.

<sup>10</sup> Min apaiyai cuscan min ica

nai muranshon samamashta arisca huamisifo.

Nanscarifi nuno manifesti anaoafoan huanonfo cuscan nanscacoinrifi nuno mai ano anonfo.

Manifotiton aton niaifo iishquin mia ifoannonfo.

<sup>11</sup> Shafatifi nocon tushu non yopai cuscan noco inanhuun.

<sup>12</sup> Nan noco chaca huaifoan

non ato rauhua cuscan huafain

nocon chacaforti noco rauhuashohuun, Upan.

<sup>13</sup> Satanás yoshin chacapan noco chaca huamapaifaiton nocoqui cumatima huahuu.

Nansca huaquin,”

ishon cuficahuun ato huani.

<sup>14</sup> Ascacun futsafoan mato chaca huafiacun ato rauhuacahuun. Ascacufin maton Upa Diosin nai muranshon man aqui chaca huaa cuscari rau huatiroquin. <sup>15</sup> Ascafia futsafoan mato chaca huaa cuscan man ato rau huayamaiton manrifi chaca huacun Uparicai mato rauhuashoima.

*Piqui tunumisifohuunoa Jesús ato yosini*

<sup>16</sup> Ascano tsain futsari un mato yoi man tapinon. Man piqui tunuaitian nan paramisifoan amisifo cuscan huayamacahuun. Nanfoan aton fuso chocayamafain puusimisifoma piqui tunucani. Dioshuunoa shinan-tama atohuunorocon yorafo shinanmapaicani. Yorafoan atohuunoa shinanqui isca huanonfo, “¡Oincapon! Naton fuso Dios shinanquin piqui tunui puusiquimaran,” ishon. Ascashon atohuunoa shinansharafoanno unimacani. Ascafiafoanno Dioscai atoqui unimaqui ato ahuara in-ainma. Ascacun marifi ato cuscara iyamacahuun. <sup>17-18</sup> Ascatarocon man piqui tunuaitian fuchoquimucain foshti isharashon Dios shinanc-ahuun. Man ascaitocai futsafoan mato oinfiaquin tsoan tapitiroma man piqui tunufaiton. Ascafia Diosin fustichifin tapitiroquin. Ascashon nan icari man nocoaitian mato ahuara sharashta inanshquin.

—*Upa Dios icanoa ahuara sharacoinfo mato mucushotiroran, —ishon Jesús ato yosini*

*Lc 12.33-34*

<sup>19</sup> Ascan nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomutsori maton pushu muran iquishon nantifi maton mafo onuntiro. Ascaino marifi man funocoin. <sup>20</sup> Ascatarocon Dios fu rafufafaincahuun mato amapaiyai cuscan ashquin. Man asca huaiton Dios nan icanoshon mato ahuara sharacoinfo mucushoni. Nanfocai chacanapacunacama. Tsitsa iquiyamacai yomutsoricai iquitiroma maton onunshquin. <sup>21</sup> Ascan man mafo fusti shinanfainquifin nan fusti man noicain. Ascan man Diosihuunoa fustisi shinanfainquin nanrifi man yonoshosharatiro ahuun noicoin-quin. Ascashu man afu isharapacusharatiro.

*Nocon furo nan lamparina cuscarahuunoa Jesús ato yosini*

*Lc 11.34-36*

<sup>22</sup> Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu shara non oinsharatiro. Ascashon nocon caya cushusharatiro non ahuuscanonma. Nanscarifiai mato nomuranshon man shinansharai man isharacointiro. <sup>23</sup> Ascafia nocon furo chacanocai non oinsharatiroma. Faquishcoin itiro. Nanscarifiai nocon nomuranshon non shinanchacaicain non isharatiroma. Ascacun oinfain. Man Dios shinain isharafishu chipo Upa Diosin ahuun tsain man cachiquiri huashucaí afanan man isharacointiro. Ascashu nan faquish muran ica shinantsain man funocointiro.

*Dios yafi pui*

*Lc 16.13*

<sup>24</sup> Ascan oinmatinincái ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiro. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Dios yonoshopaiquicai man pui noitiro ma maton ifo inon.

—*Upa Diosin ahuun facufo cushushararan, —ishon Jesús ato yoini*

*Lc 12.22-31*

<sup>25</sup> Afanan un mato yoisharanon. Isca huaqui shinanyamacahuun, “Non ahua pitama nonricai ahua ayaimaran,” ishon shinanchacayamacahuun. Ahuaricai non sahuuimaran iyamacahuun. Non ahua pifain non sahuuatocai noco imasharatiroma. <sup>26</sup> Shinancapon. Nan puiyafocai ahua fanayamafain ahua chintumisifoma ahuaricai fotsuyamafain ahuamafofiacun Diosin ato pimamisi. Nanscarifi aquin Diosin matohuun noiquin nan puiyafocai aca finonmafain mato cushushara. <sup>27</sup> Ascacun shinanchacayamacahuun. Non shinanchacatocai shafa fusti noco nimayotiroma.

<sup>28</sup> Ascashon shinanquiri isca huayamacahuun, “¡Ohuashta! Raniamun un sahuuti fii nan sahuushqui,” ishon shinanyamacahuun. ¡Shinancapon! Charofocai yonoyamafain sahuuti icushumisifoma. <sup>29</sup> Ascagama sharamishticoin foaifafo. Nocon shuni niaifo Salomón sahuuti sharashtacoin sahuuifiapaonicai nan charo sharashtacoinfo cuscarama. <sup>30</sup> Diosin charo sharashtacoinfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahuumashquin. Ascafia mancai icoinra huasharacoinnama.

<sup>31</sup> Ascacun shinanquin isca huayamacahuun, “¡Ohuashta! Unmun ahua piquin uhuun tushuyamaino. ¿Unmun ahua ayaicai? Unricai ahua sahuuimaran,” ishon shinanchacayamacahuun. <sup>32</sup> Ascan nannori nan icoinra huamafoan shinanchacamisifo. Ahuara pifain sahuupaiyafocai fustisi shinanmisifo. Ascan maton Upa Diosin tapiquin man yopai cuscan. Ascacun mato inanshquin. <sup>33</sup> Ascacun Diosicairocon shinanchahuun. Mato yonomapaiyai cuscan nan fusti shinanfafaicahuun. A cuscara shara ipaicaahuun. Nancai shinanquin tau huafafaincahuun. Man ascaiton ahua futsa man yopai cuscan Upa Diosin mato inanshquin. <sup>34</sup> Ascacun shinanchacaqui isca huayamacahuun. “¡Ohuashta! Uncai tapiama funamanri ahua chaca finoainno raca un tunuima,” ishon anori shinantama shinanquirocon isca huafafaincahuun, “Upa Diosin shafatifi ua cushusharamisi cuscan funamanriri ua cushusharairan,” ishon shinanfafaicahuun.

## 7

*Futsafohuunoa shinanchacayamacahuun*

*Lc 6.37-38, 41-42*

<sup>1-2</sup> Futsafohuun shinanchacaqui yoiquin isca huayamacahuun. “Nanton chaca huai cuscan onaintimaponran,” ishon futsafohuunoa yoiyamacahuun. Man ascara yoiaiton Diosin mato onaintimai. <sup>3</sup> ¿Ascacun ahuuscai yora ahua pasnanshta fuostamua man futsupaiyain marifi sapa uhuapa fuostamufashocai man muima? Nanscarifai min chaca huairan futsa huafiaquin mancaifin fasi finacaiquin. <sup>4-5</sup> Ascashon man yoiqui isca huai, “Uhuun yorashtan, un min furo murannoa ahua pasnanshta un mia futsunon,” man huamisi. Ascaflashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aqui futsafoan ato chaca man shatumpaiyafocai marifi man chaca huai. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro.



<sup>6</sup> Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapaifiaiton nan pitama nocorocon mocotiro. Nanscarifi aquin ratoranfoan man ato tsain shara Dioshuunoa yoipaifiaiton nicacasmaquin mato chaca huatirofo. Ascacun ascarafu ato yoiyamacahuun. Man yoisharapaifiaiton Diosin tsain potatirofoquin.

*Dios yocafain funafain cunahuu*

*Lc 11.9-13*

<sup>7</sup> Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cuffafaincahuun man cuffiai cuscan mato inanon. <sup>8</sup> Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cuffriaiton ashoshquin. <sup>9</sup> ¿Ascan maton facun mato yoa yocaiton man toquiri inantromun? Ma. Mancai maton facu asca huatiroma. <sup>10</sup> ¿Maton facuri mato shiman yocaiton man rono inantromun? Ma. Mancai maton facu asca huatiroma. <sup>11</sup> Ascacun tapicahuun. Man chaca huamisifiashon maton facufo man inansharamisi. Man ascaiton maton Upa Diosin nai murannoaton man yocai cuscan finacaia mato inansharashquin. <sup>12</sup> Man futsafo matohuunoa shara huamapaiyai cuscan nanscarifi huaqui futsafori shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

*Caincaiti atsoshta*

*Lc 13.24*

<sup>13</sup> Ascashon tsain futsari un mato yoinon. Nannofin fai rafuquin. Nan fai tohuaica uhuapaton yorahuanrasi ahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapaton catama fai atsoshta tanacahuun. <sup>14</sup> Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofofia ahuun unutaqui Dios ari nocoshcani nipasharashcaquin.

*Ihui ahuun fimihuunshon non onantiro*

*Lc 6.43-44*

<sup>15</sup> Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisifoquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafofiashu ato nomuran nan masharo pofu cuscarafuquin. Ascacun ato nicayamaahuun. <sup>16</sup> Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuuncai uva foaicun non tuscutiroma. Nanhuafaquisihuunricai shopa foaicun non tuscutiroma. <sup>17</sup> Ascafia ihui sharano ahuun fimiri shara itiro. Ihui chacano ahuun fimiri chaca itiro. <sup>18</sup> Nanscarifiai ihui sharacai ahuun fimi chaca itiroma. Ihui chacanocai ahuun fimi shara itiroma. <sup>19</sup> Ascacun ihuin ahuun fimi sharamacun ifoan rurashon coatirofo. <sup>20</sup> Ascacun fimi chaca iyamarai sharacun onantirofo ahuu cuscaromain ihuquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

*Atificai Upa Dios icano iquitirofoma*

*Lc 13.25-27*

<sup>21</sup> Ascano atirifiton ua Ifo huafiashucaí uhuun Upa Diosin ato amapaiyai cuscan amisifoma. Nan cuscarafó Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo afu nipashcaquin. <sup>22</sup> Ascacun Upa Diosin nantifi icoinra huamafo onaintimaitian nantianri yora ichapaton ua yoiqui isca huashcani, “Ifoshta, shinarhuun. Non min anuhuunshon non yorafo mihuunoa tapimamisi. Min anuhuunshonri yoshin chacafo non futsafomaquinoa potamisi. Min anuhuunshonri tsoan atiroma cuscan non huapaoni. ¿Iconmamun, Ifon?” ishon yoishquicani. <sup>23</sup> Ascaifóan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotacahuun,” un ato huashquin.

*Futsan pushu mutsisipa huaino futsan pushu mutsisipama huatiro*  
Mr 1.22; Lc 6.47-49

<sup>24</sup> Ascacun un mato tapimai un mato yoimisi cuscacoin aashucaí man funopacunacama. Nanscarafó nan pushu mutsisipa huamua cuscarafó. Pushu huaquin ahuun quishi mai tuiqui noco. <sup>25</sup> Ascano fasi oi ichapa fucain faitahuan pushu naman foannaino fuhuanri nocofiquicai pushu mutsisipa paon huaquima. Nanscarifiai nan uhuun tsain nicacoianfo nan un yoia cuscan acani. Ascashu ahuara ahuuscarafiainocai umaqui itirofoma. <sup>26-27</sup> Ascafia pushu futsa mai puhuuqui fuquinishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuuhuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aima. Aatocai shinansharama. Ascashu ahuun unutaqui arifi nantifi funoshqui omitsiscairan, —ishon Jesús ato yoini.

<sup>28-29</sup> Jesús tsainqui anaitiano yorahuanrasi anoshon nicacanashu yoinannifo, —¡Aira! ¡Nicacapon! Ahuun tsain sharacoin. ¿Ahuuscashon anori noco yositromun? Ahuun tsain shara iquina. Nocon tapimamisi-foan Moisés cununi cuscan noco yosimisi cuscan aacai anori noco yositamarocon niaifo tapia cuscan noco yosiaran, —ishon yoinannifo.

## 8

*Jesús nocofunu yoratisho rashquishi futsua caya huani*  
Mr 1.40-45; Lc 5.12-16

<sup>1</sup> Ascatan Jesús ato yoiquin anaititan machi tunanmanri tusuriqui cainaiton yorafoan mufainifo. <sup>2</sup> Jesús caino nocofunun ahuun yoratishton ranimamishti rashquishi futsua Jesusqui nocoshon ratoconun mai chachipacufoan yoini isca huaquin, —Ifon, ua caya huapaiquifn mian cayahuatiroquin, —huaiton. <sup>3</sup> Jesús aqui mupishon yoini, —Icon un mia caya huai. Ascan natianfin min cayaiquin, —huaino a rashquishi futsua cayariscatani. <sup>4</sup> Cayacun Jesús yoini isca huaquin, —Un mia caya huaa cuscan tsoa yoiyamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

*Romano ranushumua niaifoan ahuun oinmati Jesús caya huani*

*Lc 7.1-10*

<sup>5</sup> Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai. <sup>6</sup> Aquí nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton. <sup>7</sup> Jesús cumani, —Un canonqui cayahuashquin, —ishon yoiaiton. <sup>8</sup> —Ifon, uncai ahuama. Min nocofunu tosa cuscaramacoin. Uhuun pushu muran capaiyamaquin. Min tsainmansi uhuun oinmati ua cayahuashohuun. <sup>9</sup> Ascan uarifi uhuun niaifoan ua yonomisi. Ascacun urifi ranushumuafu un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahuamamishti huatiroquin. Ascacun min tsainmansi yoihuu uhuun oinmati cayanon, —ishon yoini.

<sup>10</sup> Ascaiton nicai Jesús afu foaifo yoini, —¡Aira! Nicacapon. Israelimafishon naton ua yoiái cuscacai tosa futsan ua icoinra huacoinmisima. Israeli anoafonanraicai ua icoinra huacoinmisifoma. <sup>11</sup> Ascacun un mato shafacafi yoi. Mani futsafori anoshon nan Dios icoinra huafoti nocon shunifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin. <sup>12</sup> Ascafia atirifi nocon caifon Israelifo Diosin ahuun yorafo ato imapaifiacai tosan icoinra huafoma. Ascacanashucaí Dios icano nocotirofoma. Ascacun Diosin ato faquish muran potashquin. Nannoashu uaiqui omitsiscapanacaforan, —ishon Jesús ato yoini.

<sup>13</sup> Ascashon Jesús Romanon ranushumua niaifo yoini, —Min ua icoinra huaino min oinmati man caya. Ascan natian min pushu ano catahuun, —ishon yoini. Jesús yoiaitian ahuun oinmati cayariscatani.

*Pedro ahuun raisi yoshafu Jesús caya huani*

*Mr 1.29-31; Lc 4.38-39*

<sup>14</sup> Asca huatan Jesús Pedro pushu ano cani. Nanno caquin oian Pedronun ahuun raisi yoshafu fasi yonacoin oshati camaquí raca ini. <sup>15</sup> Ascaiton Jesús yoshafu ahuun mucuquí mupiaiño ahuun yona matsiriscatanaino funinaca huan nan isinincoma ointsacai Jesús pimashquin tushu huani.

*Jesús yora ichapa caya huamani*

*Mr 1.32-34; Lc 4.40-41*

<sup>16</sup> Ascaino man fari caino isinincai futsa futsatapafo yorafo aquí ihuunifo ato cayahuamapacunon. Atirifi yoshin chacafo atohuun nuufafaina Jesús ahuun tsainmansi atomaquinao potano caya sharanonfo. <sup>17</sup> Jesús nantifi ato caya huani cuscan nannori ahuunoa Diosin tsain yoimisi Isaías inon pacocai cuscan cunuquí isca huani, —Cristofin ahuara isin futsafoan noco isininmai cuscan noco caya huaquin. Nocon isinfori nocomaquinao potaran, —ishon Isaías cununi cuscan Jesús huani.

*Jesús tanasharapaiyifo*

*Lc 9.57-62*

<sup>18</sup> Ascashon Jesús oian yorahuanrasi aquí fuaifoan afu rafuafo yoini, —Non ian ocuma futsa fonon focahuun, —ato huaino. <sup>19</sup> Nantianri

Moisés yononi cuscan tapimamisi aqui cashon yoiquin isca huani, — Tapimamisiton, min raquira caino urifi un mifu cahuacacainon, — huaiton. <sup>20</sup> Jesús cumaquin, —Marifi quiniyaquin. Puiyafari naayafofi-ano uncai pushu yama, —ishon yoini. <sup>21</sup> Ascaiton a tanamisi nocofunu futsan Jesús yoiquin isca huani, —Ifon, natian un mifu capaifiai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon, —huaiton. <sup>22</sup>—Ascaquima ua tanahuun. Ua ifoamafofin nan yora naa cuscarafuquin. Ascashon nanfoan ato yora naacun mai huatirofo. Ascan minfin natian ua tanaicain, —ishon Jesús cumani.

*Jesús fuuhuan yafi ian fuchomanhuan nishma huani*  
*Mr 4.35-41; Lc 8.22-25*

<sup>23</sup> Asca huatan Jesús shasho naqui nanuano norifi afu rafuafo non afu nanucaini. <sup>24</sup> Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani. <sup>25</sup> Ascaiton non moinni. —Moihuu, Ifon, noco numashqui. Man non asai futsuicai, —ishon non yoini. <sup>26</sup> Ascaino moinacahuan noco yoini —¿Ahuuscai man ratuain? Man ua icoinra huasharashucai man ratucuanama, —ishon noco yoini. Ascatan fuuhuan yafi ian fuchomanhuan yoiqui isca huani, —Fuun nishmahuu, —huafain, —Fuchomanhuan nishmahuu —huaino fuu yafi ian fuchoai nishmafaini. Ascatan ianmanhuan pusiquima racani. <sup>27</sup> Ascaiton oin non yoinanni, —Ahuu cuscara nocofunushonmun nocon Ifoan isca huaiquin. Fuuhuan yafi ian nan yoiyai cuscan man nishma huaquin, —icashu non yoinanni.

*Gadara mai anoa nocofunu rafuhuun yoshin chaca nuua ini*  
*Mr 5.1-20; Lc 8.26-39*

<sup>28</sup> Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucuin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. <sup>29</sup> Jesús fuchicatan oi ashcafinin yoinifo, —Minfin Diospan facuquin. ¿Min noco ahuusca huapai oamun? Min noco omitsisca huaitian icataiyamafiano min noco omitsisca huai oamun, —ishon Jesús yoinifo.

<sup>30</sup> Ascaino nantianri ato chaimashon yahua inafuan piinifo. <sup>31</sup> Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarasihuun noco nichipun, —huaifoan. <sup>32</sup> Ascaiton —Yahuafohuun fotacahuun, —Jesús ato huaino. Nan nocofunu rafumaquinoashu yoshin chacafo yahuafo muran fonifo. Ascaino yahuahuanrasi ian muran maocofainni asai futsunifo. <sup>33</sup> Ascaifoan oinfaincaini yahua cushumisifo ichonifo pushufoti anoafa ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfafainifo. <sup>34</sup> Nicacani nantifi nan pushufoti ano icafo Jesusqui funifo. Ascashon yoinifo, —Nuno noco mai anoashu catapun, —huanifo.

## 9

*Jesús nocofunu funitiroma caya huani**Mr 2.1-12; Lc 5.17-26*

<sup>1</sup> Ascatan Jesús shasho naqui nanucaini ian mahuan pocufaini ahuun pushurasi ano noconi. <sup>2</sup> Asca caini pushu muran iquicun rafu non rafuri nocofunufoan aton caifo isinincai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquin isinincai yoiqui isca huani, —Uhuun yorashta, ratuyamahuu. Natian mun mia chaca soashona, —huaiton.

<sup>3</sup> Nicacani Moisés cununi cuscan tapimamisifoan aton nomuranshon shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un Diosiran,” noco huamapai, —ishon aton nomuranshon shinanchacani.

<sup>4</sup> Ascaifoan onanshon Jesús ato yoiquin isca huani, —¿Ahuuscai maton nomuranshon man amaqiri shinanchacaimun? <sup>5-6</sup> Unfi Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino. <sup>7</sup> Funinaca huatan ahuun pushu ano can. <sup>8</sup> Ascaiton oincani nantifi mustaiaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincai Jesús ahuun tsainmansi caya huafain ahuun chacari soashonaran, —ishon yoinifo.

*Jesús Mateo cunani**Mr 2.13-17; Lc 5.27-32*

<sup>9</sup> Nansacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fianti pushun facu muran un tsoa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Ua asca huaino un afu can.

<sup>10</sup> Ascashon Jesús uhuun pushu muranshon un pimani. Yorafori no fu can. Niaifo pui fishomisi futsafo non icoinra huamafo futsafoan atohuunoa shinanchacamisifo yafi non afu rafuafori can. Ascashon nanfoan no futan piinifo. <sup>11</sup> Ascaiton oincaquin Fariseofoan Jesús fu rafumisifo yoini, —¿Ahuuscai maton tapimamisi Jesús nan niaifo pui fishomisifo non chaca futsafo futan piimun? —huanifo.

<sup>12-13</sup> Ascaifoan nicaquin Jesús ato cumani, —A isinincaifoma cayahuamamitsamisi yopacanima. Ascan nan isinincaifoti fasi cayahuamamitsamisi yopacani. Ascari fi aquin, “Uncai ahua chaca huamisima. Un Numamisi yopaimaran,” icaifocai un aton chaca soashotiroma. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatarocon man futsafohuun ramapaiyai nancaifin un fasi fuchipaiquin,” ishon Diospan tsain cununi. —Jesús ato huani.

*Piqui tunuaihuunoa**Mr 2.18-22; Lc 5.33-39*

<sup>14</sup> Ascashon ato yoiaino Juan fu rafumisifo aqui fucashon yocanifo. — ¿Ahuuscái Fariseofo futan non piqui tunumisifiano mifu rafuafoan piqui tunumisimamun? —ishon Jesús yocaifoan. <sup>15</sup> Ato cumani, —Nocofunu fu ainfo fianainnoricaí unimai fusicaquin tsoan piqui tunutiroma. Nanno funu anocai ahuun yorafoan piqui tunutirofoma. Ascafia funu amaqui rutuafoano shinancaquin piqui tunutirofo.

<sup>16</sup> Sahuuti shunicoin fashnucun poto funapan icushumufia ustuuashu fasi chacanai finatiro. Tsoancai afanan ascara icushpaitiroma. Nanscarifiai un mato tsain funa shara yosia cuscan nicacoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquire huacointiro. Ascashu funa cuscara shara iishquin.

<sup>17</sup> Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa chacanai cuyofotiro. Nanscarifiai maton shuncaifoan mato yosimisi cuscan yafi un mato yosiai cuscaí nan rafu ositirofoma. Un mato yosiain cuscacoin nannori Diosin tsain shara. Ascafia mato shunifoan mato yosimisifo cuscaí anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicaí man shinansharatiroma. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai, —ishon Jesús yoini.

*Jairo shotocofacu caya huafain ainfoan Jesús sahuuti muunni cayashquin*

*Mr 5.21-43; Lc 8.40-56*

<sup>18</sup> Ascashu Jesús tsaincaí muran Israelifoan ichananti pushu anoa aton niaifo Jesusqui noconi. Nocoshon ratoconun mai chachishon yoiqui isca huani, —Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, —ishon niaifoan Jesús yoini. <sup>19</sup> Asca huaino Jesús niaifo fu caino non acho non afu cani.

<sup>20</sup> Nannori ainfon imi imitiani doce fari man aqui cafiano nusu yamacai. Jesús caiton nan ainfoan acachorishori ahuun sahuuti muunni. <sup>21</sup> Mun ataima ahuun nomuran shinanqui isca huani, —Un ahuun sahuuti muuanshu un cayatiroati, —ishon shinanni. <sup>22</sup> Ascashon muuaiton Jesús ifiacucahuatan ainfo fuchishon yoini —Achishtan, ratuyamahuu. Min ua icoinra huashufin min caya sharaquin, —ishon yoiaino ahuun imi nusuriscatani. Ascaiton mua man caya sharacoin ini.

<sup>23</sup> Asca huatan Jesús niaifoan pushu muran iquicaiquin nica yorafoan aton shainti manuaifoanno futsafo shorarascacani. Fasi achacoin uaicani. <sup>24</sup> Ascaifoan Jesús ato yoini, —Chifi caintacahuun. Na facucaí naama. Oshafinquin, —ato huaiton osanifo. <sup>25</sup> Ato caimatan shotocofacu mutsoinifoannaino samamashta funinaca huani. <sup>26</sup> Ascano Jesús shotocofacu man naafiacun funia nicacani pushufoti chanifoanfainifo.

*Jesús fusho rafu cayahuani*

<sup>27</sup> Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocoahuun ramapaihuu, —oi ashcafinin cunarianifo. <sup>28</sup> Asca huaifono Jesús pushu futsan

muran iquicun fusho rafuri afu iquinifo. Iquiafoan Jesús ato yocani, —¿Un mató caya huanon man icoinra huaimun? —huaiton. —Ai, Ifon, non mia icoinra huai, —huaifoan. <sup>29</sup> Aton furo munquin yoini, —Ua icoinra huashufin man cayaquin, —ato huani. <sup>30</sup> Asca huaino oinsharariscatani. Oinsharaifoan Jesús ato yoisharaqin —Ua nicacaquin. Un mato cayahua tsoa yoiyamacahuun, —ishon yoini. <sup>31</sup> Anori yoifiacun nan rafutan nantifi nanno icafo atoqui chaninifo.

*Jesús nocofunun tsaintiroma caya huani*

<sup>32</sup> Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. <sup>33</sup> Jesús yoshin chaca amaquinoa potano nocofunu tsainon. Nanno icafo mustairitan yoinannifo, —¡Aira! ¡Oincapon! Nocon mai nan Israeli anoshon Jesús rama aca cuscan tsoa oinmisimaran, —icanashu yoinannifo. <sup>34</sup> Asca huafiainfoan Fariseofoan yoinifo, —Nanton yoshin chacafo aton niaifohuunshon yoshin chacafo potatiroran, —ishon yoinifo.

*Jesús yorafohuun ramapai*

<sup>35</sup> Ascaiton Jesús pushurasifoti nanno Judiofo icano cahuacacaini. Judiofoan ichananti pushu muranshonfin Jesús ato Diosin tsain shara yoiquin isca huani, —Itisharacahuun. Diosin nuno maton niaifo ipairan, —ishon ato yoifoanfaini. Pau futsa futsatapafo caya huani. <sup>36</sup> Yorahuanrasi aquí fuainfoan oin atohuun ramapai. Aton nomuran omitsiscaifoan. Ascan Jesús shinanquin isca huani, —Chashohuan cushumisioma nanscarifiai na yorafo cushumisiomaforan, —ishon shinnanniquin. <sup>37-38</sup> Ascashon non afu rafuafo noco yoini, —Yora ichapafoan uhuunua nicayamafiano ichapamaton ua yonoshocani uhuunua ato yoishcaquin nanfu nipashquin. Ascashon fasi Upa Dios cuficahuun ahuun yonoshomisifo catonquin uhuunua ato yoinonforan, —ishon Jesús ato yoini.

## 10

*Jesús doce nocofunufu catonni afu rafunonfo*

*Mr 3.13-19; Lc 6.12-16*

<sup>1</sup> Ascatan afu rafuafo noco cunani, —Uqui fucahuun, —noco huaino. Aquí fuaifoan noco yononi ahuuscashomain yorafo ahuunshon cayahuamafain yorafohuun yoshin chaca nuucun atomaquinoa potatiroquin. Ascashon pau isi futsa futsatapaforimain ahuuscashon caya huatirofoquin. <sup>2-4</sup> Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeopan facu. Futsafoan Felipe non Bartolomé un Mateo non Tomás non Santiago Alfeopan facu non Simón futsari nanton ahuun caifo futsafo futan Romanonfo potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofosi Jesús noco catonni non ahuun rafumisi inon non ahuunshon tsain tapishquin.

*Jesús afu rafuafo doce nichini Dios niaifo icainomain ahuu cuscara iishquicain ishon ato tapimanonfo*

*Mr 6.7-13; Lc 9.1-6*

<sup>5</sup> Noco catonshon Jesús noco yonoquin isca huani, —Nan noco caifomafao aton mai ano foyamacain Samaritanon icafo anorifi foyamacahuun. <sup>6</sup> Ari fotamarocon nocon caifo Israelifo muransi fotacahuun. Nanfofin chashoan funoa cuscarafuquin. <sup>7</sup> Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun. <sup>8</sup> Ascashon isinincaifori uhuun curushuunshon ato cayahuamafain man yora nafiacun funimafain yora nami rashquishi futsuafo ato cayahuamafain yoshin chacafo yorafohuun nuucun nanfori uhuunshon atomaquinoa potacahuun. Diosin mato cashman ahuun curush inan cusca huafain futsaforifi caya huasho ato ahua yocayamacahuun.

<sup>9-10</sup> Ascashon focaquin mato ahua foyamacahuun. Pui foyamafain mato sahuuti yafi saporiti foyamafain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

<sup>11</sup> Ascan nan man pushurasi ano nocoaitian nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfaincahuun nan man caitian. <sup>12</sup> Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun. <sup>13</sup> Ascasho nan pushu ifo futan ahuun yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

<sup>14</sup> Ascan rato pushu futsa iyamarai pushurasi anofoanari mato nicacasmaifoan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmaifain Diosirifi nicacasmaifo cuscan. <sup>15</sup> Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmaifori natian ato onaintimaquin finacoinshquin.

*Diospan tsain ato yoiifoan nicacasmacaqui ato omitsisca huanifo*

<sup>16</sup> Chashoanfo masharonun pipaitiro. Nanscarifiai nan icoinra huamafaoan mato chaca huapaitirofo. Ascafia nanfo muran un mato nichí. Ascacun nan rono onanya cuscara marifi icahuun. Ruhuincái ahua shinanchacamisima cuscan marifi nanscarifi isharacahuun.

<sup>17</sup> Ascacun oinfain. Nan yora chacafo masharo pofu cuscarafu mato achimatirofo. Ascano achicashon aton niaifofo ano mato iyotirofo. Asca huashon aton ichananti pushu muranshon mato ihuin futsa coshamatirofo. <sup>18</sup> Ascashori niaifofo ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro. <sup>19</sup> Ascatan mato achifafo shinanchacayamacahuun ahuuscashomain man ato cumasharaicai. Ascashon niaifofoan ointaifi mato yocaifoanno nantianri Upa Diosin mato shinanmani man ato cumasharanon. <sup>20</sup> Man ato yoiatiancai mafi man ato yoima. Maton Upa Diosifin aficoín yoi cafisca huaiquin ahuun Yoshin Sharapan man ato yoipai cuscan mato huashoi.

<sup>21</sup> Ascano nantianri nocofunufaoan ahuun yora afu nanuafu achimacani niaifofoan ato rutumanon. Apafoanri aton facufo achimacani



ato rutunonfo. Nanscarifi huaquin facufoan aton apa yafi ahua nica-casmacaquin ato achimani niaifofoan ato rutunonfo. <sup>22</sup> Ascasho nantifi yorafoan man ua icoinra huacun uhuunshon mato noicasmacani. Ascun omitsiscafiaquin man ua potama nan man naitian uhuun tsain tanasharashu Upa Dios fu man ipasharaiqui. <sup>23</sup> Ascun pushurasi futsa anoshon mato omitsisca huaifoanno pushurasi futsa ano ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

<sup>24-25</sup> Ascano ahuunshon tapiafoancai ato tapimamisi finontiroma. Oinmatifoanricai ato ifo finontirofoma. Ascashu marifi man ua cus-cara iishqui. Ua chaca huamisifo cuscan matorifi nansca huashceni. Nanfoan ua noicasmacaquin ua yoimisifo isca huaquin, “Minfin yoshin chacafoan ato niaifoquin,” ishon ua yoimisifo. Un mato ifofiacun ua asca huamisifo. Ascun matocafin asca huaquin finacaicaniquin.

*Tsoaquimain man ratutiroquin*

*Lc 12.2-7*

<sup>26</sup> Ascacun mato omitsisca huafiaifoanno atoqui ratuyamacahuun. Nanfoan ahuarashta onupaifiamisi nantifi Diosin ato puashoshquin. Ahuarari fomanpaimisifo nanfori ato puashoshquin. <sup>27</sup> Ahuara un mato fusti yoimisi nanfo nantifi yorafo cayacafi ato yoisharacahuun. <sup>28</sup> Ascasho mato rutupaifiaifoanno ratuyamacahuun. Mato rutufi-atirofocai maton yoshin tsoan ahuusca huatiroma. Ascacun atoqui ratucaquimarocun Dios fustiqui musucahuun. Nantofin noco rutufain noco yoshin omitsiscapanacafo muran potatiroquin. <sup>29</sup> Ascano tsitsipio rafu inanmitsashon toro fustishtaraca fitiro. Ascafia mato Upa Diosin asca huapayamaquicai fustishta namatiroma. <sup>30</sup> Diosin nantifi tapicoian. Nocon foori tanan huani. <sup>31</sup> Ascashon Upa Diosin tsitsipio-shinanmisi cuscan fasi mimacai mato shinanfafainiquin. Ascacun ratuyamacahuun. Matocafin tsitsipio aca finonmafain Diosin mato-huun noiquin. Cushushon mima huaquin mato cushusharamisiquin.

*Yorafoan ointaifi, —Jesús uhuun Iforan, —huaa*

*Lc 12.8-9*

<sup>32</sup> Ascano yorafoan ointaifi, “Jesús uhuun Iforan,” ishon ato yoiafin uhuun Upa Dios nai muran icanoshori ahuun ointaifi, “Naafin uhuun yoraquin,” ishon un yoishquin. <sup>33</sup> Ascafia tsoan yorafoan ointaifi, “Jesús uhuun Ifomaran,” ishon yoia. Nantocai ua icoinra huamisima. Nanscarifi huaquin uhuun Upa Diosin nai muranshon ahuun ointaifiri “Nacai uhuun yoramaran,” ishon un yoishqui.

*Jeshuunoacai yorafoan anorisi shinanfoma*

*Lc 12.51-53; 14.26-27*

<sup>34</sup> Man shinanmun nantifi manifoti anofo uhuunoashu unimanonfo un oni. Ma. Ascaramafiqui. Un mato yoiai cuscacai tsoan nannorifosi shinananima. Asca nan ua icoinra huafoan sharafosi shinainfoanno nan ua icoinra huamafoan ahuaara chaca futsafosi shinanani.

<sup>35</sup> Ascashon apa ua icoinra huaino furumun ua icoinra huashuma apaqui sinatiro. Ahuanri ua icoinra huaino ainfacun ua icoinra huashuma ahuaku sinatiro. Ahuun yayan ua icoinra huaino ahuun raru ua icoinra huashuma ahuun yayaqui sinatiro. Un nai muran-noashu matoqui oyamanicai tsoa ascacuanafoma. <sup>36</sup> Nanscarifi aquicai

tsoan nannorifosi uhuunoa shinancanima. Ascano tsoan ua iconra huacun ahuun yoracoinfoan nan noicasmatrofo.

<sup>37</sup> Ascan tsoan ua finonmafain apa yafi ahua noiashucaí uhuun yora itiroma. Nanscarifiai tsoan furu yafi ainfacu ua finonmafain noiashucaí uhuun yora itiroma. <sup>38</sup> Ascan unfin mato ihui coyan iquinanquin nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmaicai uhuun yora itiroma. <sup>39</sup> Ascashon tsoan shinanqui isca huai, “Un Jesús tanaiton raca ua omitsisca huacanicati,” ishon shinanqui uhuun tsain cachiquiri huashu nanscara yorafo naashu omitsiscapanacafo. Asca tsoa uhuunoashu omitsiscafiaqui ua potama nanscara yorafori naashu ufu isharapacunacafo.

*Ahuara shara noco Diosin inain cuscan*  
*Mr 9.41*

<sup>40</sup> Ascano ratoranfoan mato nicafain mato shara huaifo. Nanfoanfin nan uacoin shara huai cafisca mato huacaniquin. Nanscarifi aquin tsoan nan un yoiai cuscan nicacoin yafi nan ua nichini uhuun Upa Dios nicacoin cafisca huaiquin. <sup>41</sup> Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huari inansharashquin. Ascashon nan Dios tanamisi yora shara futsan ahuun tsain nicas-harafain shara huacun, Diosin nan a tanamisi inanshara cuscan huaqui nan shara huarifi inansharashqui. <sup>42</sup> Ascano tsoan ua rama iconra huashon ua tanaiton futsan a shara huaqui unu matsi ayamacun. Ascacun Diosin arifi a futsa shara huaa. Ahuara shara inanshquiain cuscacai funotiomaran, —ishon Jesús noco yoini.

## 11

*Nan Juanpan ato unu muran iquimapacumisiton a tanamisifo Jesusqui nichini*

*Lc 7.18-35*

<sup>1</sup> Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. <sup>2-3</sup> Ascano nantianri Juanpan nan unu muran ato iquimapacuni ranushumuafaoan unu muran iquimanifo. Nan muranshon Jesús acai cuscan nicaquin ahuunoa fasi tapisharapaiqui. Nan unu muranshon a tanamisifo nichini Jesús yocanonfo. Ascano nan Juanpan ato yonoa cuscan focashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

<sup>4</sup> Ascaiton Jesús ato cumaquin isca huani, —Nan man nica cuscan yafi man oian cuscari Juan tapimatacahuun. <sup>5</sup> Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratiso coyo cuscara tocoi futsuafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin. <sup>6</sup> Ascan tsoan ua iconra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun, —ishon Jesús ato yoini.

<sup>7</sup> Ascatan man foafono Juanhuunoa Jesús nanno niafo ato yoini, — ¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focufocu acai cuscarama. Nanscarifiai man man tapia Juancai nocofunui ointi ranainyama. <sup>8</sup> ¿Ascacun ahuuscai Juan oinpai man fonimun? ¿Man shinanmun a nocofunui sahuuti sharacapa sahuucun oin foi man foni? Ma. Juanpacai sahuuti sharacapacoin sahuumisima. Niaifofaanfin aton pushu muranshon sahuuti sharash-tacoin sahuutirofoquin. <sup>9</sup> ¿Ascacun ahuuscai oinpai man fonimun? Man shinanra Diosin tsain yoimisi Juan oincai man cani. Ascafia nan icon. Juanpan Diosin tsain yoimisifa nanton yoimisi cuscacai tsoa futsafoan anori yoimisima. <sup>10</sup> Ascacun nanhuunoa Diosin tsain cununi isca huaquin,

“Min nai ariashu mai ano fotoataima iquisi uhuun tsain yoimisi un nichiqui tau huai. Mihuunoa ato yoiano itisharashon mia nicanonfo,”

ishon cununi. <sup>11</sup> Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara yoyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanoafoan Juan finoanfo. <sup>12</sup> Nan Juanpan ato unu muran iquimapacunitian natianri yorafo Dios icano fasi iquipaicoincani. Ascashon shinanqui isca huafo, “Diosin niaifoa ahuun yora urifi un ipai afu nipashquin. Ascacucacai ahuashtaton ua nitun huatiroma un ahuun yora icaiton,” ishon shinancani. <sup>13</sup> Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascacun natian Juanrifi man matoqui noco ahuunoi mato yoishquin. <sup>14</sup> Nanfoan cununifo cuscan iconra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascacun nanfin Juanquin. <sup>15</sup> Manmain ua nicatiroquin ua nicacahuun. Uhuun tsain maton nomuran nanushcaquin.

<sup>16</sup> Ascashon natian niyoafo ahuu cuscarafomainquin un mato yoi man tapinon. Nanfofin nan facu cashumisifo cuscarafokuin. Facufo cashucaquin afu facu futsafo oi ashcafnin cunatirofo. Nanscarifiai nanfofin nanscarafokuin. <sup>17</sup> Nan facu cashumisifoan yoitirofo isca huaquin, “Man non shainti manufiainocai monopaicanima. Fanainca omitsiscati cuscara non fanaifiainocai man uaipaimaran,” ishon nan facu cashumisifoan yoitirofo. <sup>18-19</sup> Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunoa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunoi yoiqui isca huamisifo, “¡Cuu! Jesús pitsicoin fasi ichapari ayatiroan huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin ishara-coianquin shinansharafain huaifin,” ishon nannori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan, —ishon Jesús ato yoini.

*Pushurasi anoafo nicayosmashunifo**Lc 10.13-15*

<sup>20-21</sup> Ascano ato yoiqui anaititan Jesús nan pushurasi anoafo ato yoiqui isca huani, —¡Ohua! Man Corazín anoafo yafi Betsaida anoafoan man chipo fasi omitsiscai. Tsoan oinyomisima cuscara shara un mato ismafiano mancai chaca shatupaima. Ascan nan Tiro anoafo yafi Sidón anofori un mato isma cuscan un ato ismaiton nanfoan aton chaca shatucuanafu. Ascasho yoicuanafu isca huaqui “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafu. <sup>22</sup> Ascafia Diosin nantifi icoinra huamafo onaintimaitian nan Tiro anoafo yafi Sidón anoafori onaintimafiaquicai mato onaintimaquin finai cuscan ato huaima.

<sup>23</sup> ¿Ascan man Capernaum anoafoan man shinanmun man nai muran Dios ari foicai? Ma. Omitsiscapanacafo muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anoafo un ato ismaiton aton chaca shatu cuanifo. Tsoaricai cuyocuanama. Nantianri aton pushurasi icuana. <sup>24</sup> Un mato yoi. Diosin nantifi icoinra huamafo onaintimaitian nan Sodoma anoafori onaintimafiaquicai mato onaintimaquin finai cuscan, —ishon Jesús noco yoini.

*Uqui fucahuun. Un mato ointi fiananan huashonon man afanan shinanchacanonma**Lc 10.21-22*

<sup>25</sup> Ascano ato yoiqui asca huatan Jesús apa cufini, —Upa Diosin, min fasi sharacoin. Nantifi nai murannoafu futan mai anoafoan aton Ifofin minquin. Ascano nan mapo sharayafu yafi cunu tapiafocai min tsain shara min ato tapimanama. Ascafia nan cunu tapiamafishon un ato isma cuscan un ato yoiai cuscan ua icoinra huafo. Nanfofin min ato tapimanaquin. <sup>26</sup> Icon, Upan, minfin nanscara fuchipaiiqui, —ishon apa yoini.

<sup>27</sup> Ascashon Jesús afanan ato yoiquin isca huani, —Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunoa onanmanai cuscan nanfoanri Upa Diosin onantirofoquin.

<sup>28-29</sup> Ascacun uqui fucahuun ua tapishashcaquin. Unmain ahuu cuscarquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscacai curushma. Nanricai ahua ihuuma. Ascacun maton nomuran ihuucuin mui uqui fucahuun un maton ointi fiananan huashonon man afanan shinanchacanonma.

<sup>30</sup> Ascano uqui oshon man mutiro un mato curush yonomaima. Ascatararocon ua tanasharacoinyashu mato ointi fiananan huashon man isharacointiroran, —ishon Jesús ato yoini.

**12***Jesús fu rafumisifoan tunutitian trigo fimi mutusnifo**Mr 2.23-28; Lc 6.1-5*

<sup>1</sup> Ascatan Israelifoan aton tunutitian Jesús yafi afu rafumisifo mau mamaquin focaquin trigo mutuscashon fonaincoinaquin piyaifoan.

<sup>2</sup> Oincaquin Fariseofoan Jesús yoinifo, —¿Ahuuscai nocon shuni Moisés

yononi cuscaai minhuunshon tapimisifoan nicapaicanimamun? Tunutitian trigo mutuscaniran, —huaifoan.

<sup>3</sup> Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun? <sup>4</sup> Dios fu tsainti pushu muran iquicaishon amurannoa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquin David afu rafuafo futan pini.

<sup>5</sup> ¿Ascashon Moisés cununi cuscan man man oinmisimun? Cuniqui isca huani, “Dios fu tsainti pushu muranshon tunutitian ahuun tsain yoimisifoan yonotirofo. Nanfoan yonofiaquicai ahua chaca huacanimaran,” ishon Moisés cununi. <sup>6</sup> Ascatan un mato yoi. Dios fu tsainti pushu fasi sharashtafia uncaifin fasi shara finacaiquin. <sup>7</sup> Upa Diosin yoini cuscan cununi isca huaquin, “Man ua inafu rutushomisi un maton chaca soashonon. Nan sharafia man futsafohuun ramapaiquin man ato shara huai. Nancaifin fasi shara finacaiquin. Nan fusti un fasi fuchipairan,” ishon yoini. Ascacun nan tapicoishocai man ufu rafumisifoahuunoa yoicuanama, “Nanfoan chaca huaforan,” ishon. Afoantsi ahua chaca huacun. <sup>8</sup> Uafin uhuun Upa Diosin catonniquin. Ascacufin urusu fusti un yoitiro ahuamain tunutitian man huatiroquin, —ishon Jesús ato yoini.

*Nocofunu mucu musufiquia*

*Mr 3.1-6; Lc 6.6-11*

<sup>9-10</sup> Ascatan Jesús Israelifoan aton ichananti pushu muran iquini. Nanno iquishon ato yosiaino nantianri nocofunu musufiquiaton arifi nicani. Ascano nan Fariseofoan Jesushuunoa ahuara chaca yoipaicaquin nan yocanifo. —¿Nocon shuni Moisés yononi cuscamun tunutitian non yora caya huatiro iyamarai non caya huamatiromanmun? —ishon yocaifoan. <sup>11</sup> Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascata ma manrocon ihuiriscatiro. <sup>12</sup> Nanscarifi huaquin fasi noicoinquin nocofunuhuunoa tunutitianfiacun non shinantiro. Moiséscai noco yononima tunutitian non yora cayahuanonma, —ishon ato cumani.

<sup>13</sup> Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini. <sup>14</sup> Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

*Upa Diosin ahuun facucoin catonni ahuun oinmati cuscara inon*

<sup>15</sup> Jesús tapitan a rutupaiyaifoanno anoashu cani. Yorahuanrasiton mufainifo. Ratomain isinincai nanfo cayahuamani. <sup>16</sup> Ato cayahuatan ato yoini, —Uhuunoa tsoa yoiyamahuu, —ato huani. <sup>17</sup> Nannori ato yoi Isaiás cununi cuscan icocoin inon. <sup>18</sup> Isaiasin Diosin tsain cununi isca huaquin,

“¡Oincapon! Naquian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. <sup>19</sup> Acai

yora futsa fu fochishmanantanainma. Tsain isininpaton yoishquima. <sup>20</sup> Nan yora omitsiscái afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisinonfo. <sup>21</sup> Nantifi manifoti ahuunoa nicaquin isca huacani shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,”

Isaías cununiquin.

—*Satanashuunshon Jesús yoshin chacafu potairan, —ishon yoinifo*  
*Mr 3.20-30; Lc 11.14-23; 12.10*

<sup>22</sup> Ascatan nocofunu fusho icain tsaintiroma. Ahuun nuunshon yoshin chacanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani. <sup>23</sup> Ascaiton oincani mustaia ricatan afiranan yoinancaquin yoinifo, —Jesús ahua mamishti shara huatiro. Asca nan naraca David ahuun funa. Nan Upa Diosin catonni, —ishon yoinifo.

<sup>24</sup> Ascaifoan nicaquin Fariseofoan yoinifo, —Ma. Atocai Upa Dioshuunshon yoshin chaca potama. Yoshin chacafu aton niaifo Satanashuunshon yoshin chaca yorafohuunoa potatiroan, —ishon yoinifo. <sup>25</sup> Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfaincaini pashcanantirofo afanancai tsoa anosi itiro. <sup>26</sup> Nanscarifiai Satanás niaifoan afu yoshin chacafu potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma. <sup>27</sup> Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafoan yoshin chacafu atomaquinoari potafomun? Ascacun nanfohuunshon man tapitiro man uhuunoa amaquri shinanchacai cuscan. <sup>28</sup> Un Diospan Yoshin Sharahuunshon yoshin chacafu atomaquinoa potaino maton Numamisi Diosin catonni cuscan matoqui noco.

<sup>29</sup> Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiro. Ascafiaino finoncaia aqui nocoshon achifain munushquin ahuun mafufo cuyonfiatocai ahuusca huatiroma.

<sup>30</sup> Tsoan unfu rafupaiquima ua nicasmai. Tsoan uhuun tsain nicasmaifin ua noicasmaiquin. <sup>31</sup> Ascano un mato icon yoiquin. Ratoran ahua chaca huai Diosqui Upa Diosin rau huashotiro. Ascanfia ratoranton yoia isca huaquin, “Nanton aca cuscan Satanashuunshon acaran,” huafishu Diospan Yoshin Sharahuunshon aca. Nanton Diospan Yoshin Sharahuunoa tsain chaca huaa. Asca huacun Upa Diosin ahuun chaca rau huanacama. Ahuun chaca ahuun nuupacunaca. <sup>32</sup> Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

*Fimi fana ahuun fimihuunshon non onantiro*

*Lc 6.43-45*

<sup>33</sup> Ascano shinancapon. Fimi fana naman non orosharaino fana foaisharatiro. Ascashu ahuun fimirifi sharacoin itiro. Ascan non fana naman oroamaçai fana foaisharatiroma. Ascashu ahuun fimiri chacacoin itiro. Fimi fana ahuun fimihuunshon non onantiro ahuu cuscaramainquin. <sup>34-35</sup> Nanscarifiai nocofunu sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nannoricoin non yoitiro. Ascan manfin nan rono paupaton facu cuscarafuquin. Ascacun ahuuscashotsi chacacoinfiashon man ahuara shara yoitiro.

<sup>36</sup> Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisimaquin. Nantianri ahuashta shinantama yoimisifo cuscan ato puashoshquin. <sup>37</sup> Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai mato omitsiscapanacafo muran mato potairan, —ishon Jesús ato yoini.

—*Tsoan atiroma cuscan noco ismahuu non mia icoinra huanon, —ishon yora chacafoan Jesús yoinifo*

*Mr 8.12; Lc 11.29-32*

<sup>38</sup> Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoinra huanon, —ishon yoiaifoan.

<sup>39</sup> Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscacoin un chipo mato ismaiton nan fusti man oinshquin. <sup>40</sup> Jonás shimanoan shaqui muran osha rafu non fusti iyonni cuscan. Nanscarifiai un Diospan Facu mai muran osha rafu non fusti un iyoshqui. <sup>41</sup> Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra huamisimaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoinra huani. Asca man manfin Diospan furucoin nicafishocai maton chaca man shatumisimaran,” ishon mato yoishquin. Nan icon un Jonás finonfiacucai man ua nicapaimisima.

<sup>42</sup> Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafu ato niaifo ipaoniton matohuunoa yoiquin isca huashquin, “Salomón tapicoian cuscaçai tsoan futsan tapipaonima. Ascacun ahuun tsain nicapaicoin un aquí chaicunoashu cani. Ascan mancai nan Diospan Furun nicapaima. Ascatamarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoifiacun mancai ua nicapaima.

*Yoshin chaca afanan yoraqui nasotiro*

*Lc 11.24-26*

43-44 Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascafia fuchia-macaiqui yoshin chacanun afanan shinanqui isca huani, “Unfin nan nocofunuhuun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. <sup>45</sup> Ascacun nan yoshin chacanun afu yoshin chacafo siete ato ihuuni nan fasi chaca finacai fo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainai foanno nan nocofunu fasi mimacai chacacoin ini. Manmain aqui rananri focun. Nanscarifiai maton shunifoan chaca huafiapaonifo mancaifin fasi chaca huaquin finacoianquin, —ishon Jesús ato yoini.

*Jesús ahua yafi ahuun ushtofu*

*Mr 3.31-35; Lc 8.19-21*

<sup>46</sup> Ascatan Jesús yorahuanrasi yoi tsaincai muran ahua yafi chipocufu noconi. Ascano aqui iquishon ahua yoipaifiacaquin chifishon man-anifo. <sup>47</sup> Ascaiton futsan yoini, —Min uhua futan ushto rananun chifi nishon mia ahua yoipai fuaforan, —ishon yoiaton. <sup>48</sup> Jesús cumani, —Un mato tapimai ratofomain uhuun uhuafo yafi uhuun ushtofuquin, —ishon yoini. <sup>49</sup> A tanamisifo oinyacuquin ato yoini, —Nafon uhuun uhua cuscarafu yafi uhuun ushto cuscarafuquin. <sup>50</sup> Nan uhuun Upa Dios nai ari icaton ato amapaiyai cuscan huaifo nanfofin uhuun ushtofu yafi uhuun chicofo non uhuun uhuafoquin, —ishon Jesús ato yoini.

## 13

*Fimi ushu saacaihuunoa cuscara ato Jesús yosini tapinonfo*

*Mr 4.1-9; Lc 8.4-8*

<sup>1</sup> Ascatan nan shafatari Jesús pushu murannoashu cai ian cusumun tsaoni. <sup>2</sup> Ascaino aqui yorahuanrasi funifo ahuun tsain nicapai cani. Ascaino shasho muran nanuinacahuan ahuun cusha camaqui tsaoshon ato yoini. <sup>3</sup> Ascashon ahua futsahuunoa cuscara ato yoini ato tapimashquin. Yoini isca huani, —Nocofunun ahuun noshati muranno fimi ushu fishon ahuun mau mamaqui saani. <sup>4</sup> Saacano ushufo fai nushmancayan pacua puiyafu piinifo. <sup>5</sup> Ascaino ushu ranan toquiri camaqui pacua mai ichapamashta anoashu samamashta ushu foaica. <sup>6</sup> Fari tsacacui yositimahuaino man naa. Ahuun taporicai chai foama ini. Ascashu fanafo nai cuyoa. <sup>7</sup> Ascaino ushu rananri tasha murannoashu foaifashucau ushu futsa foaisharanima. <sup>8</sup> Ushu rananri mai shara ano saaca nan mai sharanoashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. <sup>9</sup> Ascaino manmain ua nicatiroquin ua nicacahuun uhuun tsainri maton nomuran nanucoincahuun, —ato huani.

*Ahuuscaquimun futsafu yoiflashon Jesús afu rafuafosi shafacafi ato tapimaniquin*

*Mr 4.10-12; Lc 8.9-10*

<sup>10</sup> Ascaino non afu rafua aqui fucashon yocanon, —¿Ahuuscacai shafacafi ato yoitama ahuaahuunoa cuscara min yorafu ato tapimashquinmun? —ishon non yocani. <sup>11</sup> Jesús ato cumani, —Ahuuscashomain Upa Diosin



ahuun yorafo iquiniquin mato fusti tapimai. Ascan nafocai ato tapimaima. <sup>12</sup> Ascan tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapifiashon Diosin nicasharayamafain nan yoia cuscan aima nanfin funoshquiquin. <sup>13</sup> Ascacun nan yorafo un ahuara futsahuunoa cuscara un ato tapimashquin oinfiacashon tapinonfoma. Nicafiaquiri tapinonfoma. <sup>14</sup> Nannori Isaías nan Diosin tsain yoimisi ipaoniton atohuunoa inon pacoai yoiqui isca huani,

“Man nicafafafiaquicai Diosin ato yoiai cuscan tapinacafoma.

<sup>15</sup> Nan yorafoan aton ointi curushcoinyashu nicayosmashunifo. Diosin tsain man nicamisifiashu nan nicama cuscarafo. Uhuun yonoshara oinfiacani nan futsoi cafiscafo. Ascashon un ato isma cuscan oianfoma. Ascayamacanashu uqui fucua-nafo un ato chaca soashonon uhuun yora sharafo iishcaqui,”

ishon Diosin yoini cuscan Isaiasin cununi.

<sup>16</sup> Ascafia nannori Isaías cunufiani mancai ascarama. Ascatarocon un mato oinmana cuscan man icoinra huafain un mato yoia cuscan man nicacoinmisi. Ascashu maton nomuran man unimacoinna. <sup>17</sup> Un mato icon yoi. Man oian cuscaai uhuun Upa Diosin ahuun tsain yoimisifo futan a tanamisi futsafoanri fasi oinpaifiaquicai tsoan oinpaonima. Un mato yoimisi cuscan fasi nicapaifiaquin tsoan nicapaonima.

*Fimi ushu saamisihuunoa yoifiashon shafacafi afu rafuafu tapimani*

*Mr 4.13-20; Lc 8.11-15*

<sup>18</sup> Nan fimi ushu saamisihuunoa un ato yoia cuscan natian shafacafi un mato tapimai. Ascacun ua nicasharacahuun tapisharashquin. <sup>19</sup> Ascan nan Dios ahuun yorafo iquinaai cuscan nicafiashon tapiama. Nanfofin nan ushufo fai ano pacua cuscarafquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiantiro afanan afohuunoa shinanonfoma. <sup>20-21</sup> Ascano futsafoanri Diosin tsain nicaquin tau huai unimacoinyofiashu samamashta ahuun tsain cachiquiri huaa. Ascan nanfofin nan ushufo toquiri camaqui pacua cuscarafquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafoma. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo. <sup>22</sup> Ascan ushu futsafo moshafomuran pacuashu foaisharatiroma. Nanscarifiai futsafoan Diospan tsain nicafiashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoa shinantiroma. Ascaquicai Diosin ato amapaiyai cuscan futsafo shara huatiroma. <sup>23</sup> Ascafiquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafain tapicanashu nan yoia cuscan aafu. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatiroran, —ishon Jesús ato yoini.

<sup>24</sup> Afanan Jesús ato tsain futsa yoini tapinonfo. Isca huaqui, — Diosin nantifi iquinano nanscarifi aquin nocofunun ushu sharafo fana. <sup>25</sup> Fana sharafiashu ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa. <sup>26</sup> Chipofin nan ushu shara foaicaino tashafori foaini. <sup>27</sup> Ascano aqui fucashon mau ifo ahuun oinmatifoan

yoinifo, “¿Ifon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

<sup>28</sup> “Noco noicasmamison acaran,” huaiton. “¿Ascan nan tashafo non tsucaí fotiromun?” huaifoan. <sup>29</sup> “Ma. Man tasha tsucaino nan fana sharafori tsucapayamafiaquin man afori tsucatiro. <sup>30</sup> Nanscanonquin. Chitunmisitian tashafo yafi fana sharafori foaitiro. Nantian un mau yonomisifo yoishquin isca huaquin, ‘Iquisi nan tashafo tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’ ” mau ifoan yoiaran, —ishon Jesús ato yoini.

*Mostaza ushuhuunoa Jesús ato yoini*

*Mr 4.30-32; Lc 13.18-19*

<sup>31-32</sup> Ascasho Jesús mostaza ushuhuunoa ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puifafo ahuun tushpahuu tsaotiro. Nanscarifiai Diosin ahuun yorafo iquisi fustirasi ifiashu chipo paratama caitioran, —ishon ato yoini.

*Jesús misi farashatihuunoa ato yoini nanhuunshon Diosin nantifi yorafo iquinai cuscan tapinonfo*

*Lc 13.20-21*

<sup>33</sup> Ascan Jesús ahuara futsa ato yoini Diosin nantifi yora iquinai cuscan tapinonfo. Afanan ato yoiqui isca huani, —Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya oshon camisonano farashinitiro. Nanscarifiai Diospan yorafoan nan icoinra huamafo muranshon nantifi ato shara huatiro, —ishon ato yoini.

*Jesús ato yoiái cuscan ahuara futsa tapinonfo*

*Mr 4.33-34*

<sup>34</sup> Ascatan ahuarahuunoa yoiqui Jesús ato yoini tapinonfo. <sup>35</sup> Nannori Diosin tsain yoimisiton nan Jesús yoinon pacoai cuscan cunuqui isca huani,

“Un ato ahuara futsahuunoa ato yoi ato tapimashquin. Upa Diosin nantifi onihuani chain tsoan ascara nicayomisima cuscarafu un ato yoishquiran,”

ishon yoini cuscacoin man aa.

*Trigo yafi faasi foaitirohuunoa Jesús shafacafi ato tapimani*

<sup>36</sup> Ascatan yorahuanrasi anoashu cai pushu muran iquini. Ascano non afu rafuafu aqi caashon non yocani, —Ifon, min trigo muran faasi foaitirohuunoa yoiái cuscacai non tapimani. Shafacafi noco yoihuu non tapisharanon, —ishon non yocani.

<sup>37</sup> Ascaiton noco cumani, —Diosifi ua nichiniquin. Un nan ushu fanamisi shara cuscara inon. <sup>38</sup> Nan maufin nantifi manifotihuunoaquin. Ascan nan ushu sharafofin Diospan yorafohuunoaquin. Ascan faasifin icoinra huamafona nan yoshin chaca ahuun yorafoquin. <sup>39</sup> Ascan nan mau ifo noicasmamisi nanfin Satanasquin. Ascan nan fana fiaifotianhuunoaifi nan manifoti cuyotirohuunoaquin. Nan fana fimisfofin Diospan oinmatifo afu nai muran icafo.

<sup>40</sup> Nan faasi mushashon coafo cuscan huaquin. Nan manifoti cuyoitian. <sup>41</sup> Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcashani. <sup>42</sup> Ascashon nan omitsiscapanacafoti chi urumanhuan muran ato potano nannoashu fasi uaicani omitsiscacoinshceni. <sup>43</sup> Ascaino nantianri Diospan yora shara icoinra huafoti aton Upa Dios icanoashu fari chasha cuscarafoti. Ascacun manmain ua nicatiroquin ua nicacahuun. Uhuun tsain maton nomuran nanucoincahuun.

*Ahuara sharashta onuahuuono cuscarafin ato yoini*

<sup>44</sup> Nocofunu mai futsa ano caa. Nannoa ahuaara sharashta paratama ahuun pui nuua fuchia. Ascan fuchishon nannori afanan onua. Ascashu fasi unimacoinquin nan aya cuscati inanmitsashon nannoa mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

*Perla funoahuuono Jesús ato ahuafo futsa tapimani*

<sup>45-46</sup> Diosin ahuun yorafo ahua cuscaromainquin afanan un mato yoiqui isca huai. Mafo inanmitsamisi cahuancaicani macush cuscara perla oshopa sharashtafo funafoanfainni. Ascashon man futsa ano a fuchia ahuun pui paratama nuua fuchishon nan aya cuscati inanmitsashon ahuun rafanan nan perla fii ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

*Nushutihuuono Jesús ato yoini ahuafo futsa ato tapimashquin*

<sup>47-48</sup> Ascano nushumisiton ahuun nushuti uhuapa pochishon shiman futsa futsatapafo fiini. Ahuun nushutininhuan shiman fospiano unuhuan cusmun cashon nini funi. Ascashon nan shiman chacafo nushuti murannoa tsucashon potani. Ascanshon nan piti sharafosi shihuati muran nanuni. <sup>49</sup> Nanscarifiai manifoti cuyoitian Diospan oinmatifo afu nai muran icafo nococashon nan chacafo yafi sharafo pashcanan huashceni. <sup>50</sup> Ascashon nan chacafo chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

<sup>51</sup> Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoia cuscan nantifi man non tapiaran, —non huaiton.

<sup>52</sup>—Ratoran futsafoan Moisés yononi cuscan tapimamisifo nan Diosin ahuun yorafo iquinai cuscan tapiafo. Ascan nanfofin nan mafo inanmitsamisi cuscarafoti. Mafo inanmitsamisiton yorafo nan yopaifo cuscan inantiro. Ahuaara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafohuuono tapimanai cuscan huafain marifi man futsafo tapimatiroran, —ishon noco yoini.

*Jesús afanan Nazaret ano cani*

*Mr 6.1-6; Lc 4.16-30*

<sup>53-54</sup> Ascano noco yoia cuscan ahuaara futsa tapinonfo anaititan Jesús nan pushconi pushurasi ano nasoni. Ascatan Israelifoan aton ichananti pushu muran iquishon ato yoiatit ahuun tsain nicacani mustairicatan yoinifo, —¿Ahuuscai na nocofunon fasi tapi sharacoianmun? Tsoan atiroma cuscan huapaiquifin atiroquin. ¿Tsoanco Jesús ascara tapimanamun? <sup>55</sup> Nanfin ihui sapa yonomisiton ahuun facuquin. Ahuun

ahuan Maria. Ahuun ushtofori Santiago yafi José non Simón non Judas.  
<sup>56</sup> Ahuun poifori no fu imisifo. Man nonfin Jesús onanquin. Aacai  
 ahua. ¿Ascan ahuuscashomun ahua mamishti huatiroquin? —icashu  
 yoinannifo. <sup>57</sup> Ascashon nannori ahua noa shinanchacaquicai tsoan  
 icoinra huapainima.

Ascaiton Jesús ato yoiqui isca huani, —Nantifi mai anoshon Diosin  
 tsain yoimisiton yoiai cuscan nicapaitirofo. Ascafia nan cainni anoshon  
 fusticai tsoan nicapaitiromaran, —ishon ato yoini.

<sup>58</sup> Ascano nannoshon icoinra huaiyamaifoan tsoan atiroma cuscan  
 fustirasi huani.

## 14

*Juanpan yorafo unu muran iquimapacutan nani cuscan*  
*Mr 6.14-29; Lc 9.7-9*

<sup>1-2</sup> Ascano nantian Herodes nan Galilea mai anoa ato niaifoan Je-  
 sushuunua nicaquin ahua oinmatifo yoini isca huaquin, —Nanfin  
 Juanqui. Un tushtumayamua afanan man funia. Ascashofin Diospan  
 curushuunshon tsoan atiroma cuscan huafafainiquin, —ishon ato yoini.

<sup>3-4</sup> Herodes Juan rutumanataima yoiqui isca huani, —Niaifo Herodes,  
 min ushto Felipe ahua huin min fia. Ascaquicai min shara huama.  
 Nocon shuni Moisés Diosin tsain cunuqui isca huani, “Futsan ahua min  
 fitiromaran,” ishon Moisés cununiran, —ishon Juanpan Herodes yoini.  
 Ascaiton nicai Herodes fasi sinacoinquin ahua ranushumuafo yononi  
 Juan achishon cunu muran iquimanonfo. <sup>5</sup> Ascashon Herodes Juan ru-  
 ruriscapaifiaquicai funa rutunima yorafoanmain Juan fuchipaiyaifoan-  
 fin. Ascashon nanfoanri yoinifo, —Juanfin Diospan tsain yoimisiquin,  
 —ishon ahua yoinifo. Ascacun Herodes shinanquin isca huani, —Un  
 Juan rutucun ua yorafoan asca huatirofan, —ishon shinanni. Yorafoqui  
 ratuquin Herodes Juan cunu muran iquimafishocai funa rutunima.

<sup>6-7</sup> Ascano Herodes cainnitian yorafo ichananni fuusishcaquin. As-  
 cashu ichananfoanno Herodías ahua facu shomaya arusu aton ointaifi  
 mononi. Nan Herodías Herodes ahua ushto ahua ini. Ascashu  
 shomaya monoaino Herodes fasi unimacoinquin yoini, —¡Aicho! Min  
 monoai cuscan un fasi miqui unimai. Ahuarashta fipaiquin ua yoihuu  
 un mia inanon. Diosin tapia un mia icon yoiaiton min fipaiyai cuscan  
 un mia inantirofan, —ishon yoini.

<sup>8</sup> Ascashon cashon shomayaton ahua yoini. Ascacun nan ahua  
 yoia cuscan nasocura niaifo Herodes yoini, —Juan nan yorafo unu  
 muran iquimapacumisi tushtuhuu. Purato naratashon ahua mapo ua  
 inahuun, —huaino. <sup>9</sup> Niaifon Herodes puusinima. Puusitama ahua  
 nomuran shinanqui isca huani, —¡Ohua! Un Juan tushtumapaima.  
 Ascafia yorafoan un shomaya yoia cuscan man nicafo. Ascacun un  
 asca huapaiyamafiaqui un aquicairan, —ishon shinanni. <sup>10</sup> Ascashon  
 niaifoan ahua ranushumua yononi, —Juan tushtushon ahua mapo  
 ua fushotahuun, —huani. <sup>11</sup> Ascaino cashon ranushumuaton Juan  
 tushtushon ahua mapo purato naratashon funi. Fushon niaifo inancun  
 nan niaifoanri shomaya inanni. Ascano shomayaton arifi ahua inanni.  
<sup>12</sup> Ascashon afu rafumisifoan Juan nicacani focashon ahua caya mai  
 huanifo. Ascatan focanashu Jesusqui chaninifo.

*Jesús cinco mil nocofunufu pimani*

*Mr 6.30-44; Lc 9.10-17; Jn 6.1-14*

<sup>13</sup> Ascashon Herodes Juan tushtuma nicai Jesús shashon tsoa icama ano cani. Jesús caa nicacani pushufoti anoashu yorahuanrasiton naman mufainifo. <sup>14</sup> Ascashu nocoquin Jesús oian yorahuanrasi oin atohuun ramapaini. Nannoshori isinincai futsafo ato cayahuapacuni.

<sup>15</sup> Ascano man fari caino non afu rafuafo aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

<sup>16</sup> Ascaiton noco cumani, —Ma. Noncai ato nichima. Mafirocon ato piimacahuun, —noco huaiton. <sup>17</sup> —Nonfin nuno misi siete yafi shiman rafu ayaquin, —ishon non yoini. <sup>18</sup> Ascaiton, —Ua fishotacahuun, —noco huani. <sup>19</sup> Ascashon yorahuanrasi yoini, —Nanno faasi camaqui tsocahuun, —ato huani. Ascatan shiman rafu yafi misi mucu fustiti tsomashon nai ari foisinifoantan Apa Dios cufinquin, —¡Aicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya oishon noco inanni non ato pashcanan huapanon. <sup>20</sup> Ascashon picani mayancoinnifo. A picaquin tushu huafo non afu rafumisifoan doce shihuati fospi huani. <sup>21</sup> Nan piaifo cinco mil nocofunufuosi ini. Ainfofo yafi facufocai non tanan huanima. Asca nanfoanri ato futan piinifo.

*Jesús unu fumancayan cani*

*Mr 6.45-52; Jn 6.16-21*

<sup>22</sup> Ascashon ato pimaquin anaititan Jesús noco yoiquin isca huani, —Shashon rufufo oquiri pocui focahuun. Un na yorafo ato nichiyonon, —ishon noco yoini. <sup>23</sup> Ascashon man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini. <sup>24</sup> Ascatan afu rafuafo shasho caino ian nushmancayan nocoqui fuuhuan noconi. Ascashu ian fuchoquin noco catima huani.

<sup>25</sup> Ascashu man faquishiaino non oian Jesús ian fumancayan nocoqui ofiaitocai non onannima. <sup>26</sup> Onanshma ratucoin non fiisini. “Yoshiran,” icashu non fiiscaiton. <sup>27</sup> —Unqui. Ratuyamacahuun, —ishon Jesús noco yoini.

<sup>28</sup> Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton. <sup>29-30</sup> —Ohuu, —Jesús huaino Pedro shasho naquinoashu fotopacucahuan ian fumancayan Jesús ari caafiain oian fuunhuaquin ian fuchoaiton oin ratui iquipacucahuanqui yoini, —Ifon, ua ari mutsoinifoanhuun, —Pedronun huani.

<sup>31</sup> Ascaiton Jesús samamashta mutsoinifoanquin yoini, —Miancai ua icoinra huacoinnama. Ahuscaquimun mian icoinra huamaquin, —ishon Jesús yoini.

<sup>32</sup> Ascantan nan rafu shasho muran nanuinifoanafono fuu nishmapacufoanni. <sup>33</sup> Ascano non shasho murannofo fasi aqui unimacoinquin non yoini, —Iconfinquin min Diospan Facu, —ishon non yoini.

*Genesaret anoshon Jesús isinincaifo ato caya huapacuni*

*Mr 6.53-56*

<sup>34</sup> Ascatan ian pocufaini Genesaret ano non noconi. <sup>35</sup> Ascashu non nocoaiton nannofoan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui

ihuunifo. <sup>36</sup> Ascano fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatan ahuu sahuuti muuncanashu cayapacunifo.

## 15

### *Nocofunun ahuaara chaca huatiro cuscan*

#### *Mr 7.1-23*

<sup>1</sup> Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo. <sup>2</sup> Fucashon yoinifo, —¿Ahuuscaimun nocon shunifoan piataifoma muchoquimupaonifo cuscacai mifu rafuafoan asca huapaicanimaran? —ishon yoiainfo. <sup>3</sup> Jesús arifi ato yocani, —Ascan ahuuscai marifi maton fuyamisi fustisi man tanapaiyain. Ascashofin Diosin yononi cuscan huatamarocon nan maton shunifoan amaquiri yosimisifo cuscan marifi man nansca huamisiquin. <sup>4</sup> Ascacun Upa Diosin yonoqui isca huani, “Maton upa yafi uhua nicasharafain ato shara huacahuun. Ascan tsoan apa iyamarai ahuaqui tsain chaca huacun ato rutumacahuun,” ishon yononi. <sup>5-6</sup> Nannori yononifianicun manfin noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios inan. Ascacun un mia ahuaara inanpaifiaquicai un mia inainmaran,’ ” ishon yoiquicai mato upa yafi uhua man afanan ahua inantiromaran, ishon man fasi ato amaquiri yoimisi. Anori yoiquicai Diosin yononi cuscacoin man aima. Ascaquifin nan mato fuyamisi fusti man tanaqui. <sup>7</sup> Ascashufin man paramitsamisifoquin. Nan Diosin tsain yoimisi Isaías inon pacoai cuscan icocoinquin matohuunoa yoiqui isca huani,

<sup>8</sup> “Nan yorafoan uhuunoa yoisharamisifiashocai aton nomurashon ua shinancoianfoma. <sup>9</sup> Ipaitsi ichananshu fanaincai ua cuficani. Yorafo tapimamisifo cuscacai Diosin tsaincoinma. Nanfoan aton nomuran shinainfo cuscan futsafori yosimisiforan,”

—ishon Isaías cununi.

<sup>10</sup> Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiainfo cuscan tapisharashcaquin. <sup>11</sup> Ahuarafo non piatocai noco ointi chaca huatiroma. Nocofununfin ahuan nomurashon nan shinain cuscan yafi nan yoiainfo cuscan chaca huatiroquin, —ishon ato yoini.

<sup>12</sup> Ascaino non afu rafuafo aqui cashon non yocani; —¿Ifon, man min tapiamun nan rama min Fariseofo yoiainfo cuscan nicacani sinacanian? —ishon non yoini. <sup>13</sup> Ascaiton noco yoiqui isca huani, —Mau ifoancai ahuaara chacafo fanatiroma. Ascataka afin foaicun tucashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuan tsain tapimanon. Ascacun nanfo chipo omitsiscapanacafo muran ato potashquin. <sup>14</sup> Ascacun nanfo shinanyamacahuun. Fushocai afu fusho raqui iyotiroma. Iyopai afu shato muran pacutiro. Nanscarifiai Fariseofoancai Diosin tsain tapishoma futsafo yositiroma atofu funotiro. Ascashu Dios ari tsoa nocopacunacafomaran, —ishon ato yoini.

<sup>15</sup> Ascaiton Pedronun yoini, —Min ato yoia cuscan shafacafi noco tapimahuun, —ishon yoini.

<sup>16</sup> Ascaiton Jesús noco yoiqui isca huani, —¿Ascan marifimun man nicasharama? <sup>17</sup> ¿Man tapiamamun ahuaa man piacai mato shaqui muran nituima? Ascataa manrocon aya poitiro. Ascan nantocai mato chaca huamatiroma. <sup>18</sup> Ascashon mato nomuran man shinanchacai cuscan huafain yoiashuri man chacacoin itiro. <sup>19</sup> Ascano aton nomuranahon ahuaa chaca shinanfo cuscan nansacoin huatirofo. Shinanchacafain rutumitsamisi icain aton ahuinma fu nocofunifo icaifoanno ainfori nanscarifiaifoanno. Ascashon ahuarari onufain futsahuunoo ahuaa chaca yoiqui parafain roanmitsamisi itirofo. <sup>20</sup> Nan chacafoanfin yorafo chaca imatiroquin. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

*Ainfoo patasharinoaton Cananea anoaton Jesús icoinra huani*

*Mr 7.24-30*

<sup>21</sup> Ascacaini Jesús nocofu anoashu cai nan pushurasi Tiro ano yafi Sidón ano cani. <sup>22</sup> Nannoashu Cananea ano ainfo Jesusqui noconi. Nocoshon yoini, —Ifon, minfin David ahuan funaquin. Uhuun ramapaihuu. Uhuun facu ainfoshta fasi omitsisca. Yoshin chaca ahuan nuushon omitsisca huamisi. Uhuun facu ua caya huashopun, —ishon yoiriani. <sup>23</sup> Ascaiton nicafiaquicai Jesús cumanima. Ascaiton non afu rafuafoan yoini, —Ifon, na ainfoan mia yocariaquin noco fucash huaiquin nichihuun, —ishon non yoini. <sup>24</sup> Ascashon Jesús ainfo yoini, —Uhuun Upa Diosin ua Israel ano fusti nichini. Nanfomain nan chashoanun facu funoa cusarafocun. Ascan uacai caifo futsa ano nichinima, —huaiton.

<sup>25</sup> Nicaiyainfo Jesús naman ratoconun mai chachipacufoan yoini, —Ifon, uhuun facushta ua cayahuashopun, —huani. <sup>26</sup> Ascaiton Jesús afanan cumani, —Apacai ahuan facufoan tushu pashnafo inantiroma. Ascaracai sharama. Nanscarifi aqui Upa Diosin ua yonoa cuscan un Israelifo fusti un shara huashonon. Ascacucai un caifo futsa ano catiroma ato shara huashoshquin. Un asca huaino nan Israelifo funotiro, —ishon yoiaiton. <sup>27</sup> Ainfoanri yoini. —Icon, Ifon. Ascafia ahuaa piqui tushu huafo sapa camaquinoashu potomishti pacuaiton pashnafoan pitirofo. Nanscarifi aqui Upa Diosin mia Israelifo ano nichini min ato shara huashonon. Ascafia mani futsafori miqui nocoifoan nanfori min ato caya huatiro. Ascashon min ato shara huashoainocai Israelifori funotiromaran, —ishon yoiaiton. <sup>28</sup> —Min ua fasi icoinra huacoinna. Ascacun min ua yoca cuscan un mia ashoiran, —ishon Jesús nan ainfo yoini. Asca huatanaino ainfo ahuan facu cayariscatani.

*Jesús yora ichapa isinincaifo ato caya huapacuni*

<sup>29</sup> Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni. <sup>30</sup> Ascano yorahuanrasi aqui funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo nipaqui ranainfo ihuufain fushofo ihuufain ahuan caya mumamafo ihuufain tsaintiromafo ihuufain isinincai futsafori Jesusqui ihuunifo. Ascacun nantifi Jesús ato cayapacuni. <sup>31</sup> Ascashon ato caya huaa oincani mustairicatan yorafo ari ranan yoinancaquin yoinifo, —Noncai iscara oinyomisima. Tsaintiromafo natian tsaincani. Ahuan caya mumamafori natian man niisharafo.

Nipaiqui ranainfori natian niisharatirofo. Jesusfin ahuamamishti hutiroquin. Israelifoa nocon Dios fasi sharacoinran, —ishon yoinifo.

*Jesús cuatro mil nocofunufu pimani*

*Mr 8.1-10*

<sup>32</sup> Ascatan non afu rafuafo noco cunashon Jesús noco yoiqui isca huani, —Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan, —ishon noco yoini. <sup>33</sup> Ascaiton non cumani, —Nuno tsoa icamanocai non tushu fuchitiroma na yorahuanrasi pimashquin, —ishon non yoiaiton. <sup>34</sup> Noco yocani, —¿Ahuuti misi man ayamun? —noco huaiton. —Siete non shiman ranananri non ayaran, —ishon non yoini.

<sup>35</sup> Ascaiton Jesús yorafo yoiqui isca huani, —Nanno tsaocahuun, —ato huani. <sup>36</sup> Ascatan ato yoia cuscan tsoafoanno Jesús misi siete non shiman rananri finifoantan Apa Dios cufini, —¡Aicho! Upan, mihuunshon un ato pimai. Min fasi sharacoinquin, —huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. <sup>37</sup> Ascashon nantifiton picani mayancoinnifo. Ascano man piqui tushu huafo siete shihuati non fospi huani. <sup>38</sup> Ascan nan piaifo cuatro mil nocofunufoosi ini. Ainfofo yafi facufocai non tanan huanima. Ascfia nanfoanri ato futan piinifo. <sup>39</sup> Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no caní.

## 16

*Fariseofo futan Saduceofoan Jesús yocanifo, —Tsoan atiroma cuscan noco ismahuu, —huanifo*

*Mr 8.11-13; Lc 12.54-56*

<sup>1</sup> Ascashu Magadán ano man non nocoano Fariseofo yafi Saduceofofori Jesusqui funifo. Ascano fucashon yocanifo. —Minmain Diospan facucoinqin nan Diosin nai aria icahuunshon tsoa atiroma cuscan noco ismahuu non mia icoinra huanon, —ishon yoinifo. Ahuunoa ahuaara chaca ato niaifofu yoipaicaquin. <sup>2</sup> Ascaifoan Jesús ato cumani, —Manfin yoiquin isca huamisiquin, “Man fari caino imi poshnan. Ascan funamanrifi nai shara itiroquin,” ishon man yoimisi. <sup>3</sup> Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuuscaiquin. Ascan ahuuscaquitsi Diosin mato yoiai cuscan man icoinra huapaima. Natian ahuaara ahuuscarai cuscacai man tapiama. <sup>4</sup> Man ua icoinra huayamafain chacafashon man ua yocai. Ascfia tsoan atiroma cuscan un Diosihuunshon huatirofiacai un mato ismaima. Man oinpaifaiton. Nan Diosin Jonás ani cuscan nan fusti man chipo oinshquiran, —ishon Jesús ato yoini. Ascatan atomaquinoashu caní.

*Fariseofoan yositirofo cuscahuunoa*

*Mr 8.14-21*

<sup>5</sup> Ascano man ian pocufaini cashon non shinanni, —Non tushu ointaquimacuranaran, —ishon non yoini. <sup>6</sup> Non ascaiton onanshon Jesús noco yoini, —Oinfain. Fariseofo futan Saduceofoan aton misi farashati cuscara fiyamacahuun, —ishon noco yoiaiton. <sup>7</sup> Nicai nofi ranan non



yoinanni, —¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, —icashu non yoinanni.

<sup>8</sup> Ascano nan non yoiái cuscan onanshon Jesús noco yoini, —¿Ahuuscaquimun tushuhuunonasi man yoicai? Mancai ua icoinra huaa sharacoiantaima. <sup>9</sup> Ascashon mancai tapisharataima. ¿Un mucu fustiti misihuunshon cinco mil nocofunugo un pimaita nan man shinainmamun? ¿Ahuuti shihuati fospia tushuita man ointiaquimamun? <sup>10</sup> ¿Nan siete misihuunshori un cuatro mil yorafo pimaita nanri man man ointi-aquimanamun? ¿Ahuuti shihuati fospia tushuitamun man ointiaquimamun? <sup>11</sup> ¿Ascán ahuuscai un mato tushucoinhuunoa yoyiamafaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaífo cuscahuunoa un mato yoiqui, —ishon noco yoini. <sup>12</sup> Ascashon Jesús noco yoiái cuscan nicaquin non tapini tushucoinhuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

*Pedronun, —Jesús Diospan facuran, —huani*  
*Mr 8.27-30; Lc 9.18-21*

<sup>13</sup> Ascatan Jesús no fu mai futsari cani. Nan mai ahuun anu Cesarea Filipino. Nanno nocoshon Jesús noco yoini, —Unfin Diospan Facufiashu un nocofunugin, —ishon yoitan afanan noco yocani, —¿Yorafoan shinanmun un tsoaquin? —ishon noco yocaiton. <sup>14</sup> Non cumaquin isca huani, —Futsafoan yoiáfin min Juanquin. Nan yorafo unu muran iquimacumisi, ishon yoiáifoanno futsafoanri yoiquifin min Eliasquin. Ascano futsafoanri yoiáfo minfin Jeremiasqui. Ascán futsafoanri yoiáfo minfin nocon shunicaífo Diosin tsain yoimisi futsa afanan funiaquin, —ishon noco yoiáiton. <sup>15</sup> Afanan noco yocani, —¿Asca marifi man shinanmun un tsoaquin? —noco huaiton. <sup>16</sup> Ascaiton Pedronun cumani, —Minfin Cristoquin. Nan Diosin nipanacaton mia catonni min ahuun facuran, —ishon yoaiton. <sup>17</sup> Ascaiton Jesús cumani, —Simón, minfin Jonás ahuun facuquin. Diosin mia noiquin mia shara huaa. Rato nocofununcái mia tapimanama un Diospan facu. Uhuun Upa Diosin nan nai muran icaton mia tapimana.

<sup>18</sup> Un mia afanan yoi. Minfin Pedroquin, —ishon Jesús yoini. Ascán Pedrofin Israeli tsainman toquirininhuan. Tsoan putsiquitiroma. Ascasho Jesús afanan yoiqui isca huani, —Min yoiái cuscahuunshon futsafoan aarifi icoinra huashquicani. Ascaífoan uhuun yorafo un ato imashquin. Yoshin chacafoan aaton curush huahuunshon ato namapaífiacuí ato shatuyamafain aato finontiroma. <sup>19</sup> Tsoan shafi ya fupoti fuputiro yorafo pushu muran iquimashquin. Nanscarifi aquin un mia yonoi uhuunshon min yorafo uhuunoa yoitiro uhuun yorafo inonfo. Ascashu uhuun Upa icano iquitirofo. Min yorafo yosiaí cuscan tsoa nicacasmái uhuun yora itiro Upa Dios fu ipashcaquin. Nannori Diosin yoini. Ascán min yorafo yosiaí cuscan tsoa icoinra huai uhuun yora itiro Upa Dios fu ipashquin. Nannori Upa Diosin yoini. Ascacun un mia yonoi min futsafo tapimatiro Upa Dios icano iquinonfo. Un mia shafi inain cafisca huai min ato fupushotiro iquishu afu ipanonfo. Ascashon tsoan min yoiái cuscan icoinra huayamashocái iquitiro Upa Dios fu ipashquin. Ascán tsoan min yoiái cuscan icoinra huacoinnashu afu ipashquin, —ishon

Jesús Pedro yoini. <sup>20</sup> Ascatan non afu rafuafo futsafori noco yoiqui isca huani, —Unfin Cristoquin tsoa yoyamacahuun, —noco huani.

—*Unfin chipo naashquicai*, —*ishon Jesús ato yoini*

*Mr 8.31–9.1; Lc 9.22–27*

<sup>21</sup> Ascatan nantian yafi nan achiaifotian Jesús noco shafacafi yoiqui isca huayofafainpaoni, —Un Jerusalén ano cai. Nannoshon nocon ni-aifofoan ua omitsisca huafain ua ato rutumafiafo osha rafu non fustitan un afanan funishquiran, —ishon noco yoini. <sup>22</sup> Ascaiton Pedronun Jesús mutsofaitan yoini, —Ifon, ascayamahuu. Miacai tsoan rutupacunacama, —huaiton.

<sup>23</sup> Jesús ifiacucahuan Pedro yoini, —Satanás catahuun. Min ua amaquri shinanchacamapai. Upa Diosin shinain cuscacai shinantama nan nocofunufaoan shinainfo cuscan min shinanran, —ishon Jesús yoini.

<sup>24</sup> Ascatan non afu rafua futsafori noco yoiqui isca huani, —Tsoan ua tanapaisharaquicai afi apaiyai cuscan huatiroma. Ascata ma nan un yoiái cuscacoin huatiro. Ascashon shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiaifoanno un tanaqui unupacunacamaran,” ishon man shinantiro. <sup>25</sup> Ascan tsoan shinanqui isca huai, “¡Ohua! Un Jesús tanaiton raza ua omitsisca huacanicati,” ishon shinanquin uhuun tsain cachiquiri huua. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharapacunacafoquin. <sup>26</sup> Ascan ratoran futsa nantifi manifi anoafo ahua fia ahuunacoin ifiashu amaquri naino nantifi ahuunafu funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiroma. Ahuaracai Dios inantiroma afu ipashqui.

<sup>27</sup> Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafoan aton niaifocoin iishquin. Ascashu nan yorafoan acafo cuscan un ato inanpacushquin. Nan shara huamisifo un ato inansharafain un ato unimamashquin. Ascan nan chaca huamisiforicaí un ato ahua inansharashquima. <sup>28</sup> Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

## 17

*Jesús fianananriscatani*

*Mr 9.2–13; Lc 9.28–36*

<sup>1</sup> Ascano man seis osha finontan Jesús Pedro non Juan non Santiagori machi cuya pochininshon ato iyoni. <sup>2</sup> Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini. <sup>3</sup> Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. <sup>4</sup> Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotiroman, —ishon yoini.

<sup>5</sup> Ascashu Jesús fu tsaincaino coin osho sharacoin atoqui cuyopacuni. Ascaino coin muranno oi nicanifo yoiqui isca huaiton, —Nanfin

uhuun Facuquin. Un fasi ahuun noi. Nanfin un catoanquin. Un aqui unimacoin. Ascacun a nicacoincahuun, —ishon Upa Diosin yoini. <sup>6</sup> Ascaiton nicacani fasi ratucoincani fuopacufoannifo. <sup>7</sup> Ascaifoan Jesús ato pumanqui yoini, —Funicahuun. Ratucaquima, —ishon ato yoini. <sup>8</sup> Ascaiton foisinifoanquin oianfo Jesús fusti nia ini.

<sup>9</sup> Ascatan machi pochinnoashu fotoshon Jesús ato yoiqui isca huani, —Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, —ishon ato yoini.

<sup>10</sup> Ascaiton nicacaquin afu rafuafo yocanifo, —¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisiforan? —huaifoan. <sup>11</sup> Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo. <sup>12</sup> Ascan man ofiacuai tsoan onannima. Nan chaca huapaiyaifo cuscan fusti nan chaca huanifo. Nanscarifi aquin ua omitsisca huashaniran, —ishon Jesús ato yoini. <sup>13</sup> Ascaiton nicacani afu rafuafoan shinantani nan Juan yorafo unu muran iquimapacumisihu-unoa ato yoi ai cuscan tapinifo.

*Jesús furonanfacuhuunoa yoshin chaca nuua caya huani*  
*Mr 9.14-29; Lc 9.37-43*

<sup>14</sup> Ascatan machi anoashu fotocuranaino yorahuanrasi aqui noconifo. Ascaino nannoshon nocofunun ratoconun mai chachipacufoan Jesús yoini, <sup>15</sup> —Ifon, uhuun facuhuun ramapaihuu. Yoshin chaca ahuun nuushon fasi omitsiscamai. Chii muran potafain unu muranri potatiro. <sup>16</sup> Uhuun facu mifu rafuafo ano un iyofiacai tsoan caya huama, —ishon yoi aiton. <sup>17</sup> Ascaiton Jesús non afu rafuafo noco yoini, —¡Ohua! Mancai ua icoinra huacoinnama. Man fasi amaquri shinanmisi. ¿Ahuutia un matofu icamun man ua nicayamacaiyai? —ishon noco yoini. Ascatan facun ahuun apa yoini, —Min facu ua ihuushonhuun, —huani. <sup>18</sup> Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

<sup>19</sup> Ascatan non afu rafuafosi Jesús fu tsaintan non yocani, —¿Ahuuscaimun norifi non yoshin chaca facumaquino potamaquin? —ishon non yocaiton. <sup>20</sup> Noco afanan yoini. —Manfin ichapama ua icoinra huaaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nanscarifiai man ua ichapama icoinra huaquin tau huatiro. Ascan chipo uhuun tsain maton nomuran nanucoishon man ua fasi icoinra huaqui finacointiro. Ascashon man machi yoitiro shucucaitahuun man huaino shucucaini futsa ano catio. Ascaino ua icoinra huacoinshon nan man apaiyai cuscacoin man huatiroquin. <sup>21</sup> Ascan man Upa Dios cufiyanan piqui tunuyamashocai nan na cuscara yoshin chaca man potatiromaran, —ishon Jesús noco yoini.

*Jesús nashquiai cuscan afanan yoi futsani*  
*Mr 9.30-32; Lc 9.43-45*

<sup>22-23</sup> Ascatan Galilea ano nocofu caquin afanan Jesús noco yoiquin isca huani, —Un mato yoimisi cuscan afanan un mato yoi. Futsan ua ato

achimashquin ua rutunonfo. Ascafia osha rafu non fustitan un afanan mai murannoashu funishquiran, —ishon Jesús noco yoini. Ascaiton nicaquin non fasi shinancoinni nocon nomuran noconi.

*Israelifoaan pui inantiro cuscan Dios fu tsainti pushu cushusharanonfo*

<sup>24</sup> Ascatan nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoaan Pedro yocanifo. —Man min tapia nocon caifoaan faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascán mato Ifo Jesús arifi man inanmisimun? —ishon Pedro yocaifoaan.

<sup>25</sup> Pedronun ato cumani, —Aifain. Naanfin inanmisiquin, —ishon ato yoini. Ascashu Jesús man pushu muran iguiano Pedro arifi iquini. Ascaiton Jesús Pedro yoini. —¿Maifoti anoa niaifoaanmun ahuun caifocoin pui fiapai iyamarai mai futsa ariafo yocaiqui? ¿Pedro, asca min raquiri shinainmun? —ishon Jesús Pedro yocaiton. <sup>26</sup> —Mai futsa ariafo fiantiroran, —ishon Pedronun cumani. <sup>27</sup> Ascaiton yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsainti pushu murannoa pui fimisifo nocohuunshon ato inanshquin, —ishon Jesús yoini.

## 18

*Ratotocaimun Dios icari fasi finoncoianquin*

*Mr 9.33-37; Lc 9.46-48*

<sup>1</sup> Ascaiton non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.

<sup>2</sup> Jesús facu cunani, —Facushta, nuri ohuu, —huaino ocun ato nastui nimani. <sup>3</sup> Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascayamacai Dios icari man noconacama. <sup>4</sup> Ascacun na facu apa yafi ahua nicaifain icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin. <sup>5</sup> Asca ratoran futsan uhuunshon facufo shara huafin nan uari shara huai cafisca huai.

*Futsafoan noco chaca huaquinaino fasi musucoin*

*Mr 9.42-48; Lc 17.1-2*

<sup>6</sup> Ascafia ratoranfoan ua icoinra huafuna futsan chaca huamai nacaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. <sup>7</sup> Ascano nan icoinra huamafoan futsafo chaca huamamisi. Ascafia nanfo-caifin fasi omitsiscacoinshcaniquin. Ascashon mato chaca huampaifaifancani. Ascafia nan futsa chaca huamafoaifin fasi omitsiscacoinshcaniquin. <sup>8</sup> Ascano mato mucuman man chaca huacun mushatumushon potacahuun afanan chaca huashquima. Man raquiracaquin chaca huashon mato tau shatuhuu potashquin afanan chaca huashquima. Man mumamafishu Dios icano caafin sharacaiqui. Mumafishu man omitsiscapanacafo muran cacuana. Nanno chii urumanhuan matsinacama. <sup>9</sup> Nanscarifiai ahuara oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascán niyoashu furo rafuya

man omitsiscapanacafo muran cacai sharama. Nanno chii urumanhuan matsinacama.

*Chashoan fusti funoahuunoa Jesús ato ahuaara futsa tapimani*

*Lc 15.3-7*

<sup>10</sup> Facufohuunoa isca huaqui shinanyamacahuun, “Na facucaí ahua-  
maran,” ishon atohuunoa shinanyamacahuun. Un mato cayacafi yoi  
Upa Diosin ahuun oinmatifoan facufo cushusharafafainmisifo. Nan  
oinmatifori Upa Dios fu ifafaincani. <sup>11</sup> Ascacun nantifi yora funoafu  
numayoifin un oaquin. Ascashon un aton chaca soashona isharapa-  
cushanonfo un oni.

<sup>12</sup> Ascano un mato yoinon. Ratoran futsa cien chashoan ayafiano  
fustishta amaqui funoano atirifi nan noventa y nueve faasi fununun  
potayofaintio a fusti funoa funayoicaquin nan fuchiaitian. ¿Ascán man  
ahuu cuscara shinantirumun? <sup>13</sup> Ascashu noventa y nueve ahuun  
chashoanfoqui unimafiaicai nan funoa fusti fuchiaquicaifin fasi unimai  
finacoinquin. <sup>14</sup> Nanscarifiai maton Upa Dios nan nai muran icatocai  
nan ua rama icoinra huafo fustishta funopaima.

—*Ahuuscashumain Diospan yora rafu raunantirofoquin, —ishon Jesús  
ato yoini*

*Lc 17.3*

<sup>15</sup> Ascacun tsain futsari un mato yoi. Ua icoinra huaa futsan mia chaca  
huacun aqui cashon mia chaca huaa cuscan nan fusti yoihuu. Min yoiái  
cuscan nicashquin yoinon, “Ai. Mian yoiái cuscan icon. Un mia chaca  
huaa. Ascacun ua rau huapun,” ishon yoitiro. Ascaquifin mihuunoashu  
afanan Diosqui nasoaquin afanan mifu rafushquin. <sup>16</sup> Asca min yoiái  
cuscan mia nicasamaiton icoinra huaa fusti iyamarai rafu iyohuu nan  
nocofunun yoiái cuscan nicaquin arifi icoinra huanonfo. <sup>17</sup> Ascafia nan  
rafuri nicapayamaiton icoinra huafo ichanainfotian nannoshon nantifi  
tapimahuu. Asca nan ichananfori nicasamaiton nanfoan yoitirofo,  
“Aacai afanan Diospan yoracoin cuscaraman,” ishon.

<sup>18</sup> Ascacun un mato icon yoi. Ahuara man nunoshon yoiái cuscan arifi  
Dios nan icanoshon nannori yoi. Nanscarifiai man ahuaara nunoshon  
yoiyamaino arifi Dios nan icarishon yoitiroma. <sup>19</sup> Afanan un mato  
yoi. Man rafu nuno mai ano ichananshon nannori rafu shinanqui  
man ahuaara yocaiton nan uhuun Upa Dios nai muran icaton mato  
ashoshqui. <sup>20</sup> Ascashu rafu iyamarai rafu non fusti yora ua icoinra  
huashu ichanainfoanno urifi un atofu ichanainran, —ishon Jesús noco  
yoini.

<sup>21</sup> Ascaiton Pedronun yocani —¿Ifon, futsan ua chaca huafafainait-  
omun un rau huaquin ahuoti huatiroquin? ¿Siete un rau huaquin  
huatirumun? —huaiton. <sup>22</sup> Jesús cumani, —Ma. Siete huaquima. Nan  
mia chaca huafafainaiti min rau huatiroran, —ishon yoini.

*Oinmatinin futsa rau huapainimahuunshon ato yoini*

<sup>23</sup> —Ascacun un mato yoiái cuscan nanfohuunshon man tapitiro  
ahuu cuscaramain Diosin ahuun yorafo iquifain ato yonotiroquin. Isca  
huaquin mato tapimai. Niaifoan ahuun oinmatifo cunani nan nifiafo  
cuscan inanonfo. <sup>24</sup> Ascano nan oinmati futsan ahuun niaifo fasi  
ichapacoin millones nificun aqui ihuunifo. <sup>25</sup> Nan nifian cuscaí ahua  
inantiro inima. Ascacun ahuun niaifoan yoiqui isca huani, “Min ua

ahua inantiroma. Ascacun un mia niaifo futsa inain min ahuun yononmati inon. Nanton mihuun rafanan ua pui inanon. Ascacun un mia inanfain min ahuin yafi min facufo non min mafofori nantifi min aya cuscan un inanmitsai ahuun rafanan min ua nifian cuscan fiishquin,” ishon niaifoan yoiaiton. <sup>26</sup> Nicaquin oinmatinin ahuun ratoconun mai chachishon yoiqui isca huani, “Ifon, uhuun ramapaihuu. Funayamapun. Un mia nifian cuscafin un mia chipo nantifi inainqui,” ishon yoini. <sup>27</sup> Asca huaiton nicai niaifo ahuun ramapaiquin yoini, “Afanan ratuyamahuu. Natian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

<sup>28-29</sup> Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascafiacun aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamapun. Un mia inanon,” huani. <sup>30</sup> Asca huafaiatocai futsa manapainima. Ascataka futsanrocon cunu muran iquimani nan nifian cuscan inaintian amuran iyonon. <sup>31</sup> Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoqui chaninifo. <sup>32</sup> Ascano focashon yoiainfoan nicaquin niaifoan ahuun oinmati cunashon yoini, “Minfin fasi chacacoinquin. Mian fasi ichapacoin nififlashon min yoiqui isca huaa, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. <sup>33</sup> Ascacun un mihuun ramapaia cuscan nanscarifi aqui mifu oinmati futsa min ahuun ramapaia shara icuana. Ascatarocon min ahuun ramapaiamaran,” ishon niaifoan yoini. <sup>34</sup> Ascashu fasi sinacoinquin niaifoan oinmati cunu muran iquimafain fasi onaintimashqui. Ascashon ahuun oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato huani.

<sup>35</sup> Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran, —ishon Jesús noco yoini.

## 19

*Nocofunu yafi ainfo ununantirofohuunoa Jesús ato yosini*

*Mr 10.1-12; Lc 16.18*

<sup>1</sup> Ascano tsainqui anaititan Jesús nocofu Galilea anoashu Judea mai unu Jordán ocuma futsa cani. <sup>2</sup> Ascaiton yorahuanrasiton mufaincun nannoshon nan isinincalfoti ato caya huani.

<sup>3</sup> Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunun ahuin unupaiquin unutiromun? ¿Nocofunun ahuin ahuuscarashta aiton unutiromun? — ishon yocaifoan.

<sup>4</sup> Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. <sup>5-6</sup> Ascano Diosin yoiqui isca huani, “Ascacun nocofunun ainfo fiaino apa yafi ahuamaqui pashcashu ahuin fu itiro. Ascashu nan fusti shinantsa

ashcaquin,” ishon cununiquin. Ascacun Diosin ato fianan huaa cuscan afanan tsoa pashcanantiromaran, —ishon ato yoiaiton.

<sup>7</sup> Yocanifo, —¿Nan iconfiacun asca ahuuscaquimun Moisés yonoquin isca huaniquin? “Tsoan ahuin unupaquin iguisi cunushoquin isca huatiro, ‘Un afanan mia fipaima. Mun mia unuiran,’ ” ishon Moisés cununiran, —huaifoan. <sup>8</sup> Afanan ato cumani, —Manfin nan maton shunifo cuscaraquin. Nanfoanri Dios nicacasmaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascafiacai Diosin tau huaqui anori yononima. <sup>9</sup> Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini. <sup>10</sup> Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

<sup>11</sup> Jesús noco cumani, —Un yoiai cuscacai atirifi yorafoan tapitirofoma. Nan Diosin ato shinanmanafoansifin tapitirofoquin. <sup>12</sup> Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itirofoma. Ascan futsafoan atirifi chaca huatiro ainfo fu inonfoma. Ascano atirificaiyainfo fu fiananfoma Dios yonosharashoquin. Ascacun tsoa ahuionma itiromainquin nan un mato yoiai cuscan nicacahuun, —ishon Jesús ato yoini.

*Jesús apa Dioshuunshon facufo shara huani*

*Mr 10.13-16; Lc 18.15-17*

<sup>13</sup> Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiafoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoiaiton. <sup>14</sup> Jesús noco yoini, —Ato nitun huayamacahuun uqui funonofu. Uhuun Upa Dios niaifo icariafofin nan facumishti cuscaraforiquin, —ishon yoini. <sup>15</sup> Ascashon facufo manmanpacutan Jesús cani.

*Pushcohuai mafo ichapaya Jesús fu tsainni*

*Mr 10.17-31; Lc 18.18-30*

<sup>16</sup> Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. <sup>17</sup> Jesús cumani, —¿Ahuuscaquimun mian yocaiquin ahua shara huanoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nicacoinfain nan yoia cuscacoin min huatiroran, —huaiton. <sup>18</sup> —¿Rato noco yononicaimun un nicacoinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoiyamahuu. <sup>19</sup> Upa yafi uhua nicasharafain ato shara huahuu. Nan mifiri min noiai cuscan futsafohuunri noihuu, —ishon yoaiton. <sup>20</sup> —Nantifi min ua yoiai cuscan mun nanscacin huaa. ¿Ascan ahua futsamun un ahuusca huatiroquin ahuunoashu isharashquin? —huaiton.

<sup>21</sup> Afanan yoini, —Min Dios cuscara shara ipaiqui nantifi min aya cuscan inanmitsashon ahuun rafanan pui fihuu ahuuomafo ato inanshquin. Min ascaifin Upa Diosin nai muranshon mia ahua sharacoin mucushoniquin. Asca huatan ua tanasharahuu, —ishon Jesús yoini.

<sup>22</sup> Asca huaiton nicai nan pushcohuai puusinima. Mafo ichapayashu ahuun mafofo inanmitsacasmai. Ascatan Jesusmaquinoashu cani. <sup>23</sup> Ascashu man caano Jesús noco yoiqui isca huani, —Un mato icon yoi. Yora mafo ichapaya fustirasi uhuun Upa Dios niaifo ari nocopaifiacani nocotirofoma. Nanfoan aton mafo ichapa shinanquicai tsoan Dios shinantiroma. <sup>24</sup> Ascacun afanan un mato yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin, —ishon noco yoini.

<sup>25</sup> Ascaiton nicacaquin non afu rafuafo mustairitan non yoini. —¿Ascán tsoa Dios fu nipatiromun? —ishon non yocaiton. <sup>26</sup> Jesús nocoqui fusoacukahuan noco cumani, —Nocofunucái afiri numatiroma. Diosin fustitofin yorafo numatiroquin. Nantofin ahuamamishti huatiroquin. Nocofunufuan atiroma cuscan nan Diosin huatiroman, —ishon noco yocaiton. <sup>27</sup> Pedronun yoini, —Ifon, nonfin nocon ahuarafonantifi yafinocon yorafo non pota furani mifuoquin. ¿Ascán Diosimun noco ahua inainquin? —ishon yocaiton.

<sup>28</sup> Afanan Jesús noco yoiqui isca huani, —Un mato icon yoi. Un chipo nantifi manifesti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. <sup>29</sup> Ascata tsoan uhuunshon ahuun pushu yafi ahuun yorafo potafain apa potafain ahuari potafain ahuun facufo yafi ahuun mairi potashon ua tana-paisharai. Nanscara yorafin uqui nocoaitian fasi paratama fiishquiquin. Ascashu ufu ipanaca. <sup>30</sup> Ascafia yora ichaparasi niyoashu nan niaifo cuscarafo. Ascán naashucái afanan tsoa ahua ishquima. Nanscarifiai atirifi niyoashu nan ahua shinantisafo. Ascafia naashu u futan futsafori iquishcani.

## 20

### *Mau yonomisifohuunoa ahua futsa Jesús ato tapimani*

<sup>1</sup> Ascán ahua cuscarain Upa Diosin ahuun yorafo iquinai cuscaroquin afanan un mato tapimai isca huai. Mau ifoan funamanrishta nocofunufonai cani ahuun mau uhuapa ano yonoi fononfo. <sup>2</sup> Ascán ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascán sharamun?” ato huaiton. “Ai. Sharafinquin,” huanifo. Ascáshon ahuun mau ari ato nichini.

<sup>3</sup> Ascán man fari cuyainano mau ifoan caaquin oian plaza ano nocofunufonai ini tsoa yonoima. <sup>4</sup> Ascáiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. <sup>5</sup> Ascán mau ifo afanan fari masafinin racano caaquin oian atirifi nocofunufonai ahuushta huatama niafo oinquin. Ato yoini, “Uhuun mau ari fotacahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini. <sup>6</sup> Ascán man yatai fari nii manaon caano mau ifoan afanan caaquin atirifi fuchini yonocanima niafoan. Ascáiton ato yocani, “¿Ahuuscáimun nan shafatisho yonotama man niaquin?” ishon ato yocaiton. <sup>7</sup> Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.



<sup>8</sup> Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,” ishon yononi. <sup>9</sup> Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. <sup>10</sup> Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascan nonfin paratama yonoaquin. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscari ato inanqui huani. <sup>11</sup> Ascashon ato yonohuunshon ato inainton fiicani mau ifoqui tsain chaca huacani afi ranan yoinancaquin yoinifo. <sup>12</sup> “Ascan nonfin nan shafatishon yonoaquin. Fari isicoïn muran. Ascan man fari caino chipo fuafo min ato inan cuscan huaquin nocorifi min inainran,” ishon yoiaifoan. <sup>13</sup> Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascan manmun u futan shara huama man shafa fusti yonoaihuunoa? Man manfin ‘Shararan’ huaaquin. <sup>14</sup> Ascan naquian min pui fihuu min pushu ano catashquin. Ascan nan fari man nii manaon caano yonoafo nan un mia inain cuscan nanfari un ato inansharapai. <sup>15</sup> Nan un ato inanpaiyai cuscan un ato inantiro. Nanmain uhuun puicufin. ¿Ascan ahuuscaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

<sup>16</sup> Ascan nanscarifiai Upa Diosin nan icoinra huaqui tau huafo ato shara huua cuscan huaquin nan chipo icoinra huafori nanscarifi ato shara huairan, —ishon Jesús ato yoini.

*Naashquiai cuscahuunoa afanan Jesús yoi futsani*

*Mr 10.32-34; Lc 18.31-34*

<sup>17</sup> Ascashu Jesús Jerusalén ano caquin doce non afu rafuafo noco fusti futsano iyoni nannonshon noco yoiquin isca huani, <sup>18</sup> —Non Jerusalén ano canon. Nannonshon futsan ua ato achimai nan nocon niaifofu futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani. <sup>19</sup> Ascashon caifo futsafori ua inancani nanfoan ua cashu mutsama huafain fichi cunouqui tuchiaon ua coshacani. Ascatan ihui coyan iquinanqui ua mastacani un nanon. Ua asca huafiafo osha rafu non fustitan Upa Diosin afanan ua funimairan, —ishon noco yoini.

*Juan futan Santiago ahuan yocani cuscan*

*Mr 10.35-45*

<sup>20</sup> Ascano Zebedeo ahuun facu rafu Juan yafi Santiago ahuan ato Jesusqui iyoni. Ascatan aqui nocoshon ahuan Jesús ratoconun mai chachishoni. Ahuara futsa yocapaiquin. <sup>21</sup> Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantififain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuun tsaoti ano min tsaoitian uhuun facu rafutan mia naqui huashu tsaononfo, —ishon yoiaiton. <sup>22</sup> —Man ua yocai cuscacai man tapiama. ¿Un omitsiscashquiai cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. <sup>23</sup> Ato cumani, —Icon marifi man omitsiscai. Ascafia uncai yoitiroa tsoanmain ua naqui huashu tsaocai. Uhuun Upa Diosin fustitofin tapiaquin. Nan catoanfosi ufu nanno tsaotiroran, —ishon ato yoini.

<sup>24</sup> Ascaiton nicali non afu rafuafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicali. <sup>25</sup> Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifofoan ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashoriska huatiroran,” ishon curushcai ato yoimisifo. <sup>26</sup> Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. <sup>27</sup> Ascatan man futsan futsafori finonpaiyaino ahuun yononmati man itiro. <sup>28</sup> Nanscarifiai futsa ua ashononcai un oama. Ascatamarocon un futsafo ashoyoi ua oa. Ascadari un atohuunoashu naashquin un oni afanan Satanás ato ifon inonma, —ishon noco yoini.

*Jesús fusho rafu caya huani*

*Mr 10.46-52; Lc 18.35-43*

<sup>29</sup> Ascatan non Jericó anoashu caiton yorahuanrasifain noco mufainifo. <sup>30</sup> Ascaino nannori fai cusumun fusho rafu tsafofo ini. Jesús fain caiton nicaquin nan rafutan cunanifo isca huaquin, —Ifon, minfin David ahuun funaquin. Nocoahuun ramapaipun, —ishon cunanifo. <sup>31</sup> Ascaifoan yorahuanrasifain ato asca huanifo afanan tsainonfoma. Ato asca huafainfoanno oi ashcafinin afanan cunanifo, —Ifon, minfin David ahuun funaquin. Nocoahuun ramapaipun, —huariaifoanno. <sup>32</sup> Jesús nituacucahuan ato cunashon yocani, —¿Un mato ahua ahuusca huashotromun? —ishon ato yocaiton. <sup>33</sup> —Ifon, non fasi oinpaicoin, —huaifoan. <sup>34</sup> Jesús atohuun ramapaiquin aton furo muainno cariscatan oinsharanifo. Ascashon nan rafutari Jesús mufainifo.

## 21

*Jesús Jerusalén ano cani*

*Mr 11.1-11; Lc 19.28-40; Jn 12.12-19*

<sup>1</sup> Ascatan non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. <sup>2</sup> Ato nichiataima ato yoiqui isca huani, —Nan pushurasi ano fotacahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun. <sup>3</sup> Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato natorisca huairan,” ishon ato yoitacahuun, —Jesús ato huani.

<sup>4</sup> Jesús acai cuscan huaquin nannori ahuunoa Diosin tsain yoimisiton cununi. <sup>5</sup> Ascano cunuquin isca huani,

“Jerusalén anofo yoihuu isca huaquin, ‘Oincapon. Mato niaifocoin matoqui oi. Nan burropan facu camaqui tsaoshu matoqui oi. Nancai nocofunu ahuaton curafiapaitama shara fustisi oitsii huafain fusti yoitiroran,’ ”

ishon Diosin tsain yoimisiton ahuunoa cununi.

<sup>6</sup> Ascatan nan rafutan Jesús ato yoia cuscacoin huashonifo. <sup>7</sup> Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafonno acamaqui Jesús tsainacahuani.

<sup>8</sup> Ascatan caiton yorahuanrasifoan fai naman cayan afufori aton camisafo fucashonifo. Ascaino atirifiton shupa shatushon nan caifufori

nichinifo. <sup>9</sup> Ascano nan yorahuanrasi afufori foaifo futan acachori foaifoan nantiffain oi ashcafinin yoinifo.

*¡Aicho! David nocon niaifo ipaoniton ahuun funa nocoqui oi. Nanfin Dioshuunoashu nocoqui oiquin. Ascacun Upa Diosin nan shara huahuu, ishon yoinifo.*

<sup>10</sup> Ascashu Jesús Jerusalén ano caiton nicacani nantifi yorafo mustairicatan afi ranan yocanonannifo, —¿Tsoamun naaquin? —icashu.

<sup>11</sup> Ascaifoan nan Jesús fu foafoan yoinifo, —Nanfin Jesusquin. Diosin tsain yoimisi. Nanrifi pushurasi Nazaret nan Galilea anoaquin, —ishon yoinifo.

*Jesús Dios fu tsainti pushu muranshon ahuaara chacafu potani  
Mr 11.15-19; Lc 19.45-48; Jn 2.13-22*

<sup>12</sup> Asca huatan Jesús Israelifoan Dios fu tsainti pushu muran iquitoshiquin oian amurannoashu ahuaara inanmitsashon pui fiaifoan oinquin nan sapa acamaquishon pui fiaifo finifoan arasaquin futsani. Ascashon nan ruhui inanmitsaifoan aton tsaotiri finifoan potaquin futsani. <sup>13</sup> Ascashon Jesús ato yoini, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufiani nan yomutsofoan ichananti cuscara man huapairan, —ishon ato yoini.

<sup>14</sup> Ascaino fushofo yafi nipaiqui ranainfo Dios fu tsainti pushu muran Jesusqui funifo. Ascacun ato caya huani. <sup>15</sup> Ascaiton nan Dios fu tsainti pushu muranshon unimacaquin facufoan oi ashcafinin yoinifo, —¡Aicho! Nan David ahuun funa Jesús fasi shara. Ascacun nan shara huahuun, Upa Diosin, —ishon yoinifo. Tsoan atiroma cuscan huaquin Jesús ato shara huashomisi ascaifoan nicai Israelifoan niaifofo yafi Moisés tsain tapimamisifo sinacoinnifo. <sup>16</sup> Ascashon nanfoan Jesús yoinifo, —¿Nan facufoan yoiainfo cuscan min nicaimamun? —ishon yocaifoan ato cumani, —Aifain. Munfin nicaiquin. ¿Ascan marifi nan Diosin tsain cununi cuscan man man nicamisimun? Cunuqui isca huani,

“Mihuunshon facufoan mihuunoa tsain shara yoicaniran,” —ishon cununi.

<sup>17</sup> Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

*Fana higuera fimiya macaiyaiton Jesús ahuun tsainmansi namani  
Mr 11.12-14, 20-26*

<sup>18</sup> Iyoconaino Jesús Jerusalén ano cai fonaincoinni. <sup>19</sup> Ascashu caquin oian fai cusunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanacai min fiminacamaran, —ishon yoini. Yoiquin asca huaino fana tsasisiriscatani.

<sup>20</sup> Ascaiton oin non afu rafufo non mustairini. Ascashon non yoini, —¿Ahuuscashumun nan fana tsasisiscaquin? —ishon non Jesús yocaiton.

<sup>21</sup> Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoinshon un fana tsasi huaa cuscan marifi man nansarifi huatiro. Ascashon machiri man yoitiro, “Tsucucaí. Unuhuan muran pacuhuu,” man huaino unuhuan muran pacuriscatiro. <sup>22</sup> Ascacun man icoinra huacoinshon ahuarashta man Upa Dios yocaiton mato ashotiroran, —ishon Jesús noco yoini.

*Jesús noco yonotiro**Mr 11.27-33; Lc 20.1-8*

<sup>23</sup> Asca huatan Jesús Israelifoa aton Dios fu tsainti pushu muran iquishon ato yoiaino Israelifoa aton niaiffo aqui funifo. Aquí fucashon yocanifo, —¿Min acai cuscan tsoan mia yonoamun? —ishon yocaifoan. <sup>24-25</sup> Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoa asca huanimun? ¿Diosin iyamarai nocofunufaoan yononifomun? Man ua cumasharaiton urifi un mato cumatiroran, —ishon ato yoiaiton. Nicacani afranan yoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huatiro. <sup>26</sup> Ascan Juan nocofunufaoan nichiniran non huaino yorafo nocoqui sinatirofo. Nantifi yorafoanmain yoimisifo “Juanpan Diosin tsain yoimisiran,” ishon. Ascacun noco asca huatiroforan, —icashu niaiffo yoinannifo atoqui musucani. <sup>27</sup> Ascashon Jesús yoinifo, —Noncai tapiama tsoanmain Juan yonoaquin, —ishon yoiaiffoan. Jesús afiri ato yoini, —Urificai un mato yoima tsoanmain ua yonoa un ahuafo huaquin, —ishon Jesús ato yoini.

*Pushco rafuhuunoa ahuafo futsa ato yoini*

<sup>28</sup> Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton. <sup>29-30</sup> Furumun cumani, “Ma, upa, un yonoicaimara,” huafishu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Ai, upa. Mun yonoicairan,” huafishuca canima. <sup>31</sup> ¿Ascan rato ahuun facu rafu nan apa yoia cuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoinra huacanashu nanfo Diosin nantifi iquinai ano iqui tautirofo. Ascan mancai ari iquitiroma. <sup>32</sup> Juanpan mato yoisharapaoni isca huaquin, “Man chaca huamisi cuscan shatufain natian Dios shinancahuun,” ishon mato yoipaoni. Ascafiacai man icoinra huanima. Nan niaifo pui fishomisifo futan ainfo furomafoanri icoinra huaiffoan oinfiaquicai maton chaca shatuyamafain man icoinra huamisisaran, —ishon Jesús ato yoini.

*Mau yonomisi chacafohuunoa ahuafo futsa ato yoini**Mr 12.1-12; Lc 20.9-19*

<sup>33</sup> —Nicacahuun un afanan ahuafo futsahuunoa un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuini ahuun fimi fana ahuatan chaca huanonma. Asca huatan mai quini huashon amuran uva huashon ahuun tau puama puama anifo ahuun fimi unu fiishcaquin. Ascashon toquiri cuyacoin masoni anoshon ahuun yonomatiniin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. <sup>34</sup> Ascashu man fimi ano mau ifoan ahuun oinmati futsafo mau ano nichini ahuun fimi fishononfo. <sup>35</sup> Ascano nocofoan fimi cushumisifoan ato achicashon futsa sutufain futsa rutucoinfain futsari toquirinin tsacaqui futsanifo. <sup>36</sup> Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascafia nanfori ato chaca huanifo. <sup>37</sup> Ascashon mau ifoan shinanni, “Uhuun facucain

un nichicuraca nicatirofoati,” ishon ahuun unutaqui furucoin nichini.  
<sup>38</sup> Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo. <sup>39</sup> Ascatan furu iquicuranaiton achicashon mau tsumun sharafoshon rutunifo.

<sup>40</sup> ¿Ascan mau ifo oshon nan fimi cushumisifo ato ahuusca huashquimun? —ishon ato yocaiton. <sup>41</sup> Cumanifo, —Nan yora chacafu rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimicun cashcu futsa mau ifo inanonfo, —ishon yoiainfoan.

<sup>42</sup> Jesús afanan ato yoiqui isca huani, —¿Diosin tsain cununi cuscan man man oinmisimamun? Isca huaquin cununi,

“Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fiini nanhuunoashu pushu mutsisipa inon.” Nanscarifiai niaifofoan Diospan facuhuunoa isca huaqui yoishquicani, “Nacai ahuama. Sharamaran,” ishon yoiqui potashcani. Ascafia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

<sup>43</sup> Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo. <sup>44</sup> Unfin nan pushu quishi cuscaraqui. Futsafoan uhuunoa cayacafi tapimana cuscan icoinra huayamashu funocoinshceni. Un atoqui sinaqui omitsiscapanacafo muran un ato potashquin, —ishon Jesús ato yoini.

<sup>45</sup> Ascaiton nicacani Israelifoan aton niaifofo futan Fariseofoan tapinifo atohuunoa Jesús yoiaiton. Nanfoan icoinra huafoahuunoa ato yoini. <sup>46</sup> Ascano ahuun yoinannifo, —¿Ahuuscashomain non Jesús ato achimanan ranushumaton rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuunoa yoinifo. Ascacun na yorafoan yoiainfo cuscan tapinifo niaifofo yafi Fariseofoan yorafoqui musucaquin Jesús achimatai inifoma.

## 22

*Nocofunu yafi ainfo fianantirohuunoa ahuaara futsa ato yoini*

*Lc 14.15-24*

<sup>1-2</sup> Afanan Jesús ato yoiqui ahuaara futsa ato tapimanon isca huani, —Upa Diosin niaifoan ahuun yorafo iquinaimain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin.

<sup>3</sup> Ascano man itisharashon ahuun oinmatifo nichini nan ato chani huaifo ato ihuitanonfo. Ascafiacai tsoan opainima. Fucasmarocon anifo. <sup>4</sup> Ascatan afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoa sharari un rutuaqui pii funonfo.’ Nannori ato yoitacahuun,” ato huani.

<sup>5</sup> Ascano focashon ato yoiainfo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. <sup>6</sup> Ascan atiri nanno nituafoan niaifoan ahuun oinmatifo achicashon ato sutufain

atirifi ato rutucoinnifo. <sup>7</sup> Ascano ahuun oinmatifohuunoa nicai niaifo fasi sinacoinquin ahuun ranushumuafu nichini a rutumitsamisifo ato rutuqui cuyofain aton pushufo coanonfo.

<sup>8</sup> Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafu. Asca huashucaí afanan futirofoma. <sup>9</sup> Ascacun nan fai uhuapafu nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini. <sup>10</sup> Ato asca huaino focashon nan fai uhuapafu anoa ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fai pushu muran yorahuanrasi fospicoinnifo.

<sup>11</sup> Ascatan niaifo pushu muran iquini nantifi fuafo ato oinpai. Ascashon oian nantiffain sahuuti shara sahuuafu ini. Niaifoan ahuun facu ainfo fiaino sahuuti funa sharacoin ato sahumani. Ascafiaquin oian nocofunu futsan sahuuti shuni sahuua niaifoan fuchini. <sup>12</sup> Fuchishon yoiquí isca huani, “Ahuuscai sahuuti sharacoin un ato sahumana cuscan min sahuuamamun. ¿Ahuuscai ascara min iquiamun?” ishon yocafiainocai nan nocofunu pusinima. <sup>13</sup> Ascaiton niaifoan ahuun oinmatifo yononi, “Nan nocofunu munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

<sup>14</sup> Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustirasi ato catoin nan icoinra huafosi afu ipashanonfo, —ishon Jesús ato yoini.

*Niaifofoan aton caiffo pui yocamisifohuunoa*

*Mr 12.13-17; Lc 20.20-26*

<sup>15</sup> Ascatan Jesús ato yoiái cuscan nicacani Fariseofo Dios fu tsainti pushu murannoashu chifi focanashu yoinannifo, —Non Jesús ahuaara yocanon. Noco amaquri cumaquin chaca huaiton non cunu muran iquimanon, —icashu ahuun yoinannifo. <sup>16</sup> Ascashon Herodes ahuun tanamisifo yafi atohuunshon tapimisifori Jesusqui nichinifo cucun huaquin yocatanonfo. Ascano focashon yocahui isca huanifo, —Tapimamisiton, man non tapian min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincai ahuaara yoipai ranomisimari. Nan min noco yoiái cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro. <sup>17</sup> Ascacufin min shinain cuscan noco tapimahuu. ¿Nan Romanonfoan aton niaifo Cesari pui inanfo cuscan norifi non inantiromun? —huaifoan. <sup>18</sup> Nan fuparamitsamisifoan cucun huaquin yoiáifo cuscan onanshon Jesús ato yoini, —Fuparamitsamisifoan manfin ua amaquri cumamapaiquin ranushumuafu uoan achicashon ua cunu muran iquimanonfo, —ishon ato yoitan. <sup>19</sup> —Toro ua ismacahuun. Nan man ahuunshon niaifo inanmisi, —ato huaiton. Toro fushonifo. <sup>20</sup> Ascashon Jesús ato yocani, —¿Tsoa ointsa torohuun nuamun? ¿Tsoan ahuun anuri nuamun? —ishon ato yocaiton. <sup>21</sup> —Niaifo Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yoiáiton.

<sup>22</sup> Nicacani fasi mustairicatan yoinifo, —Jesús yoiai cuscaai tsoan tafitromaran, —icashu afi ranan yoinannifo. Ascatan amaquinoashu pashcafaifi fonifo.

*Yora naashu afanan funitirofohuunoo yocanifo*

*Mr 12.18-27; Lc 20.27-40*

<sup>23</sup> Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucai afanan funinacamaran, —ishon yoinifo. <sup>24</sup> Ascana nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi. <sup>25</sup> Un mia yoinon. Siete nanupacuafohuunoo. Nanfo nocofu iyopaonifo. Aton iyoacoin ahuinyain tauni. Ascafiashon a futan facu acashma nani. Ascano chipocuton ahuun facahua fiini. <sup>26</sup> Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascapacutan amaqui nai cuyonifo. A qui facu ayamacaicani. <sup>27</sup> Ascatan ahuun unutani ainfori naani. Facu nanuyamacai. <sup>28</sup> ¿Ascana ratotocaimun nai muranshon nan yorafo naashu funiaifotian fiishquiquin nan fusti fipashquin amaqui nai cuyoafo? —ishon yocai foan.

<sup>29</sup> Jesús ato cumani, —Man man funoo. Mancai Diosin tsain tapiamafain ahuun yonoricai man tapiama. Ascashofin amaquiri man ua yoiiquin. <sup>30</sup> Naacanashu funiafocai Dios icari nocotan afanan fiananacafoma. Nantifi Diospan oinmatifo afu nai muran icafo cuscara iishquicani. <sup>31</sup> ¿Ascacun yora naashu funishquiaifohuunoo Diosicoinin mato cunushoni cuscan man man oinmisimun? <sup>32</sup> Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

<sup>33</sup> Jesús Saduceofo yoiai cuscan nicacani mustairicatan yoinifo, —¿Ahuuscashomun iscara tsain noco yoiiquin? Tsain sharacoin iquinaran, —ishon yoinifo.

*Diosin yononi cuscan nantifi sharaflashu nan fusti shara finacai*

*Mr 12.28-34*

<sup>34</sup> Ascano Jesús Saduceofo tsain shatumana nicacani Fariseofo afanan a qui funifo yocai fucani. <sup>35</sup> Ascacun Moisés yononi cuscan tapicoian futsan Jesús amaquiri cumamapaiquin yocani, <sup>36</sup> —¿Tapimamisiton, Moisés Diosin yonoo cuscan cununi. Ascana nan ratocaimun fasi shara finaciaquin? —ishon yocai foan. <sup>37</sup> Jesús cumaqui isca huani,

“Nocon Ifo Dios noi qui fasi mato ointi muranshon noifain fasi mato nomuranshori noifain mato shinanfo yashon fasi noihuu,”

ishon Moisés cununi. <sup>38</sup> —Nan yononicaifi fasi shara finaciaquin. <sup>39</sup> Futsari nanscaracuana yonoqui isca huani,

“Nan mifiri min musu huamui cuscarifi aquin mia chaima icafori noi huu.”

<sup>40</sup> Nantifi Moisés yononi cuscan yafi Diosin tsain yoimisifoan yosipaonifo nan Diosin yononi rafuhuunoo cununifo. Dios yafi futsafo

noicoingquifin nantifi Diosin yononi cuscacoin man aiqin, —ishon Jesús ato yoini.

*Tsoancaimun Cristo ahuun shuni ipaoniquin*

*Mr 12.35-37; Lc 20.41-44*

<sup>41</sup> Ascashu Fariseofo afu ichananfoan Jesús ato yocani, <sup>42</sup> —¿Nan Diosin catonni Cristohuunoo ahuu cuscara man shinanmun? ¿Tsoan funacaimun? —ishon ato yocaiton. —David ahuun funaran, —huaifoan. <sup>43</sup> Ato yoini —¿Asca ahuuscai David Diospan Yoshin Sharahuunshon nan Diosin catonni yoiqiu isca huanimun?

<sup>44</sup> “Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’ ”

ishon Diosin yoini cuscan David cununi. <sup>45</sup> ¿Criston David Ifono ahuuscashucon ahuun funa itiromun? —ishon Jesús ato yoiaiton. <sup>46</sup> Nicaquicai tsoan ahuashta cumatiro inima. Ascashu nantifi puusini-foma. Ascan anantiancai tsoan afanan Jesús ahuashta yocanima. Ato cayacafi cumaiton nicacanasu aqui ranonifo.

## 23

*Fariseofo futan Moisés cununi cuscan tapimamisifoan chaca huamisifo cuscan Jesús yoini*

*Mr 12.38-40; Lc 11.37-54; 20.45-47*

<sup>1</sup> Asca huatan Jesús afu rafuafo yafi nanno niafo yoini, <sup>2</sup> —Moisés cununi cuscan tapimamisifo futan Fariseofoan Moisés yononi cuscan mato tapimacani. <sup>3</sup> Ascan mato tapimanaifo cuscan huacahuun. Ascashiashon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cuscacoin acanima. <sup>4</sup> Mato ahuara ihuucoin papimafiashocai aton mucuman ahuashta mupaicanima. Nanscarifiai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi finonmafain mato huamacani. Ascano marifi apaifiaquicai man atiroma. Ascashu maton nomuran man omitsiscafiaitocai matohuun ramapaicanima. Mato yonomisifo cuscacai aafi acanima. <sup>5</sup> Ascashon nanfoan acaifo cuscan futsafoan yoiqiu isca huacani, “Nanfofin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuufo. <sup>6</sup> Ascatan picani ichananshu nan niaifoan ahuun tsaoti ano tsafo nantififain ato oinonfo. Nanscarifiai aton ichananti pushu anori shafacafi tsaotiofo. <sup>7</sup> Ascashu nan yora ichaparasi anori fopaicani atohuunoo yoisharanonfo. Nanscafin apaicaniqui. “Tapimamisiton,” ato huaifoan nicapaicani.

<sup>8</sup> Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin. <sup>9</sup> Ascashori toa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro. <sup>10</sup> Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro. <sup>11</sup> Ascatarin nan man ratoran futsa niaifo ipaiyaiifi nantifiton ato oinmati itiroquin <sup>12</sup> Tsoan nantifi finonpaifafaini naanfin Diosin ismashquiquin acai ahuama. Ascan



tsoa futsafoan aton oinmati cuscarashon ato shara huafafainai nanfin Upa Diosin chipo niaifocoin imashquiquin, —ishon Jesús ato yoini.

<sup>13</sup> Ato asca huatan Jesús Moisés cununi cuscan tapimamisifo yafi Fariseofori yoiqui isca huani, —¡Ohua! Moisés cununi cuscan tapimamisifo futan Fariseofoan ua nicasharacahuun. Manfin fuparamitamisicoinfoquin. Upa Dios icano man yorafo iquimapaiiaquicai man ato iquimatiroma. Ascashu marificai man iquitiroma. Iquipaiiafoan man ato catima huaa. Ascacun Diosin mato fasi onaintimaquin finacoinshquin. <sup>14</sup> Ascashon man futsafo matohuunoa shinansharamapaifiai man fasi chacacoinfo. Ainfo tatuomafori parashon man pushu ato fian. Ascatan fasi chaicoinri man cufiriatiro matohuunoa shinansharanonfo. Ascafia manfin fasi fuparamitsamisicoinfoquin.

<sup>15</sup> Ascashu man foanfafaitsia man shinain cuscan yorafori shinanmashquin. Ascaqui fusti fuchishon man icoinra huaa cuscan nanrifi man icoinra huama mato cuscara inon. Ascashon man futsa mato cuscara imano fasi chaca finaciaia iiquin. Manfin fasi chacacoinfoquin. ¡Ohuashta! Nanrifi matofu omitsiscapanacafo muran cai.

<sup>16</sup> ¡Ohua! Ascacun Diosin mato fasi onaintimai. Manfin nan fusho cuscarafofishon man futsafo tapimapaiqui ahuuscashomain Dios tanatirofoquin. Ascan ato tapimapaiiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhuunshon un mia yoia cuscan un mia ashonon,’ huafishon chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoa orohuunshon un mia ashoiran futsa huashon. Nanscacoïn huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi. <sup>17</sup> Asca nan icon. Manfin nan fushon futsa iyopaiyai cuscarafokin. Maton mapo curushcain. Mancai ahua tapiama. ¿Ascan rato shara finacaiamun Dios fu tsainti pushu murannoa oro iyamarai Dios fu tsainti pushucoin? Nan Dios fu tsainti pushuanofin Dios itiroquin. Ascan nancaifin shara finaciaiaquin.

<sup>18</sup> Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huafishon chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhunshon un mia yoia cuscan un mia ashoiran,’ futsa huashon nanscacoïn huashocahuun. Ascan nan min yoia cuscan huashoyamaino ahuara chaca finontiroran,” ishon man yoimisi. <sup>19</sup> Manfin nan fusho cuscarafokin. Mancai cayacafi shinantiroma. ¿Ascan ratocaimun shara finaciaiaquin? Nan cufiti camaqui ahuara man inan iyamarai nan cufiticoïn. Man cufiahuunshon ina man coashonaino Diosin matoqui unimatiro. Ascafia nan cufiticaifin fasi shara finaciaiaquin. <sup>20</sup> Ascashon Dios fu tsainti pushu murannoa cufitihuunshon futsa man yoiquifin nan cufiti camaqui ahuara man inan nancain yoi cafisca man huaiquin. <sup>21</sup> Nanscarafi aqui tsoan Dios fu tsainti pushuhuunshon futsa ahuara yoiquifin nan Diosicoïn yoi cafisca huaiquin. Nan muranmain Diosicun. <sup>22</sup> Nanscarifi aqui tsoan Dios ica muranhuunshon futsa ahuara yoiquifin nan Diospan tsaotihuunshon yafi nan Dioscoïnhuunshon man yoi cafisca huaiquin.

<sup>23</sup> ¡Ohua! Moisés yononi cuscan tapimamisifo futan Fariseofoan manfin fuparamitsamisicoinfoquin. Ascacun Upa Diosin mato fasi on-

aintimashqui. Moisés yononi cuscan nantifi mato fanafo atirifi man Dios inanmisi. Man asca huafiaquicai ahua shara finacai man huamisima. Ascashucal man futsafohuun ramapaiyamacain atori man shara huacoianmisima. Mato yorafoan ahua chaca finonfiacun man ato shara huatamarocon man ato potamisi. Ascan man futsafohuun ramapaicai ato shara huafain ahua ahuuscarafiaino man ato potayamaino Diosin matoqui unimatiro. Ahua futsafo Moisés yononi cuscan man huamisi cuscan man shara. Ascafia ahua shara finaciarocon huacahuun. <sup>24</sup> Ascafia manfin nan fusho cuscarafuquin. Fushocai oinsharatiroma yora iyoshqui. Nanscarifiai marificai man cayacafi shinantiro ma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa camello shuai cafisca huai. Asca huaquifin ahuafoan yora imasharatiroma man shinanfainiquin. Ascashiashon yorafo ahua yopacoiainfo cuscaicai man ato ashomisima.

<sup>25</sup> ¡Ohua! Ascashufin man fuparamitsamisicoinfoquin. Maton cucho yafi purato fumancayan choca sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustimisi. Ahua fipaiqui futsa chaca huashon man fianmisi. Futsafo yopai cuscan atohuunoa shinantamarocon mafi man fipaiyai cuscan fusti man shinanfaini. <sup>26</sup> Fariseofoan mancai cayacafi shinansharamisima. Ascacun iquisi mato nomuran cayacafi shinansharacahuun isharashcaquin. Man ascaiton nantifiton ointirofo man yora sharacun.

<sup>27</sup> ¡Ohuashta! Ascashufin man fuparamitsamisicoinfoquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuan fupoti toquirininhuan raishamisifo oshopa sharashta inon. <sup>28</sup> Nanscarifiai futsafoan mato oinqui shinantirofo man yora shara ointa man sharayamafiadun. Manfin fuparamitsamisicoinfoquin. Mato nomuranshon ahua chacacoinfo man shinanmisi. <sup>29</sup> ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinfoquin. Ascacufin Diosin mato onaintimaquin finacoinfoquin. Ascashon manfin mato shuni Dios tsain yoimisifo mai huanifo ano man ahua toquiri onihuamisiqui ato shinanshquin. Ascashori mai fo manaon man charofo huamisi. <sup>30</sup> Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi. <sup>31</sup> Ascan nan man yoia cuscan icon. Maton shunifo rutumistsamisifoan. Marifi man ato cuscaracoin. <sup>32</sup> Nanfoan ato chaca huafafainqui ato rutunifo. Ascan marifi man ato cuscarquin na Diosin matoqui nichiarifi man rutushqui.

<sup>33</sup> Ascashu manfin rono cuscarafuquin. Rono paupaton facu cuscarafu. Diosin yoini cuscan nan omitsiscapanacafo muran marifi man iquishcani. Tsoancai mato nitun huatiroma. Marifi nanno man catio. <sup>34</sup> Ascacun un afanan Diosin tsain yoimisifo yafi Diosin tsainhuunshon cayacafi shinansharamisifo non ahuan tsain tapimamisifori un matoqui nichishqui. Nanforifi man ato rutushquin. Futsan ihui coyan iquinanqui man mastashquin nanon. Ascashon atirifi maton ichananti pushu muranshon man fichi cunoqui tuchiaton man coshashquin. Ascaquin

man ato omitsisca huai nan pushufoti cafoquin man ato omitsisca huafoicaiquin. <sup>35</sup> Ascashofin nantifi Dios iconra huafoi rutunifoqui. Nan Abel shara rutuqui tau huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaquin. Ascacun Diosin atohuunshon mato omitsisca huaqui finacoin. <sup>36</sup> Ascacun un mato icon yoi. Nantifi Diospan yorafo chaca huapaonifo cuscan natian man niyoano atohuunshon mato omitsisca huaqui finacoin.

*Jerusalén anoashu Jesús yorafohuunoashu uaini*

*Lc 13.34-35*

<sup>37</sup> ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya cushupaifia mancafin ua nicacasmamisiquin. Manricai uqui fumisima un mato cushunon. <sup>38</sup> Ascan natiancai tsoan mato cushuima. Diosiricai afanan mato cushuima. <sup>39</sup> Ascacuai man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini ahuunoa.

## 24

*Jesús yoini Dios fu tsainti pushu paoinsiquiran ishon*

*Mr 13.1-2; Lc 21.5-6*

<sup>1</sup> Ascatan Jesús Dios fu tsainti pushu murannoashu caiton non afu rafuafoan yoini, —Ifon, oinpon. Nocon Dios fu tsainti pushu fasi sharashtacoinran, —non huaiton. <sup>2</sup> Noco cumani, —Ai. Nan icon. Natian Dios fu tsainti pushu toquiri putsamuashu cunuacua sharashtacoin. Ascafiashu nan man oiain chipo paoincanocai afanan rato toquirishta tushushquima, putsamushquima. Nantifi paoinquin cuyocoinshiquiran, —ishon Jesús noco yoini.

*Nan cuyoaitian ahuarafo iishquiai cuscan*

*Mr 13.3-23; Lc 21.7-24; 17.22-24*

<sup>3</sup> Ascatan machi Olivo ano mapufaintan Jesús tsaoni tsoa futsa anomano non afu rafuafoan yocaqui isca huani, —¿Nan min yoiain cuscan ahuutian ishquimun? ¿Ahuuscashomun non tapitiroquin nantifi cuyoaitian min afanan oshquiai? Noco yoihuu, —non huaiton.

<sup>4</sup> Jesús noco cumani, —Oinfain mato paranonfoma. <sup>5</sup> Yora ichapafaon “Un Cristoran,” ishon mato parapaishcani. Ascashon yora ichapafori parashcani. <sup>6</sup> Ascaino mani futsafo ya futsafo rutunainfoan man nicashquin. Ascara nicacani ratuyamacahuun. Un mato yoimisi cuscan nanscacoquin aiquin. Ascafia nantifi cuyoaitian icataima. <sup>7</sup> Mai futsa ariafo fu futsafo ya rutunainfoanno mani futsafori mani futsafo ya rutunanshquicani. Ascaino mai futsafoanri yora tushuomafo icaifoanno. Mai futsafo ari fasi mai nayanaiyaishquin. <sup>8</sup> Nanscaifin omitsisca taushcaniquin. Ascafia chipo fasi finacai omitsiscashcani.

<sup>9</sup> Ascano mato achicashon omitsisca huaquin mato rutushcani. Uhuunshon manifotiton mato noicasmashcani. <sup>10</sup> Ascaino nantianri atirifi yorafoan ua cachiquiri huashquicani afanancai tsoan ua

icoinra huashquicanima. Nanfo afiranan achinantananshcani noincasmatanancani. <sup>11</sup> Ascaino nan fuparamitsamisifoan yoiqui isca huashcani, “Unfin Diospan tsain yoimisiquin,” ishon mato yoishcani. Afocai Diosin tsain yoimisiyamafashon yora ichapafo ato icoinra huamashcani. <sup>12</sup> Ascaifoanno fasi yora chaca huaquin finacoinshcani. Ascashocai afanan atirifi yorafoan Diosi noishcanima. <sup>13</sup> Ascafia nan omitsisca huafiaifoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. <sup>14</sup> Ascano nan tsain shara Diosin nantifi yorafo iquinai cuscan manifoti uhuun tsain yoimisifoan yoiaitian un afanan oshquin.

<sup>15-16</sup> Ascacun Daniel nan Diosin tsain yoimisiton inon pacoai cuscan cunuqui isca huani,

“Dios fu tsainti pushu muran ahuara fasi chacacoinfo futsafoan huanonpacoiran,”

ishon cununi. Ascacun nan tapicahuun. Daniel cununi cuscaicoi aiton oin nan Judea ano icafoan machi ari ichoriscatacahuun. <sup>17</sup> Ascan tsoa pushu fomancayan niashucal afanan ahuun pushu muran iquitiroa ahuara fiishquin. Ascataca ichoriscatacahuun. <sup>18</sup> Nanscarifiai tsoacai mau ano yonofiai afanan ahuun pushu ano nasotiroa ahuun sahuuti fiishquin. <sup>19</sup> Ascacun ohua ainfo nan facu nanuafu yafi aton facu yomumishti chocho acaifo omitsiscaashcani. <sup>20</sup> Ascacun Upa Dios cuficahuun nan omitsiscaitian oipacutian yafi tunutitianri ascanonma. Ascan nantian ascayamaino man ichoima. <sup>21</sup> Nan omitsiscaitiancai tsoan ascara oinyomisima cuscara fasi yorafo omitsiscal finacoinshcani. Diosin yora onihuaquin tau huani chaincai tsoa omitsiscal ascayomisima. Ascashucal tsoari afanan omitsiscal ascanacama. <sup>22</sup> Ascashu nan omitsiscaifotian nantifi yorafo cuyocuashquin. Diosin ahuun yorafo nan catoanfo atohuun ramapaiqui omitsiscaifotian ato shatumariscashquin. <sup>23-25</sup> Ascacun ua nicasharacahuun. Omitsiscaifotiancai icataima iquisi un mato yoiyoi. Nan omitsiscaifotianri nan fuparamitsamisifo fucani. Fucashon yoiqui isca huacani, “Un Cristoran,” ishon yoi yamarai “Un Diospan tsain yoimisan,” ishon nanfoan yoishcani. Ascashon nanfoanri Satanashuunshon tsoan atiroa cuscara mato ismaquin mato parapaishcani. Ascan Diosin nan catoanfo ato cushuyamaino nanfoanri nan fuparamitsamisifo icoinra huaacuana. Ascaino nantian mato yoishcani, “¡Oincapon! Nanfin nocon Cristoqui,” ishon yoi iyamarai, “Nanno chaimashta Cristo nocoqui oaran,” ishon yoiaifoan ato icoinra huayamacahuun.

<sup>26</sup> Ascashon nanfoanri yoicani, “Cristo tsoan istaipama ano nocoaran,” ishon mato yoiaifoanno ari foyamacahuun. Nanscarifi aquin mato yoishcani, “Criston nan pushu cunu muran iquiaran,” ishon mato yoiaifoan ato icoinra huayamacahuun. <sup>27</sup> Uficoi un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani. <sup>28</sup> Ahuara naa nanno cotocotofu nocoriscatiro. Nanscarifiai un nocoaitian ua tanamisifo uqui furiscashcani.

*Diospan facu nasoaitian  
Mr 13.24-37; Lc 21.25-28*

<sup>29</sup> Ascashu nan omitsiscaifo cuscan anaitiano fari afanan chashaya-mafain oshuricai afanan chashashquima faquishicoin iishquin. Ascaino fishifori nai ariashu pacui futsushquin. Nantifi nai murannoafori nayanaiyaishquin. <sup>30</sup> Ascashon ahuarafo nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui fotoaiton oincani manifoti nan icoinra hua-mafo fasi ratucani uaishcani. Uhuun curushhuunoashu un fotoaiton oincani. <sup>31</sup> Ascaino nantianri uhuun oinmatifo ufu nai muran icafo un nichishquin aton manuti fasi curushcai chaan chaan acaino uhuun yorafo manifoti anofo yafi nai murannoafori uqui fushcani.

<sup>32</sup> Ascacun un mato fana huiguerahuunoa ahuara futsa yoinon. Ua nicasharacahuun. Huiguera pui risquisi futsuaiton man tapitiro faritian itiro cuscan. <sup>33</sup> Nanscarifiai nan un mato yoiai cuscacoin aiton tapic-ahuun mun oti chaima nanscacoïn aiquin. <sup>34</sup> Ascacun un mato icon yoi. Ahuarafo un mato yoiai cuscacoin aiton nataishoma oinyocani. <sup>35</sup> Ascaino nai yafi mai cuyoshquin. Uhuun tsain cayacafi iconcain fiananacai apanacama. Un mato yoiai cuscacoin aashquin.

<sup>36</sup> Ascafia ahuutiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiaquin. <sup>37</sup> Noco shuni Noé niyoano inifo cuscacoinrifiai afanan un oaitian nanscarifi ashcani. <sup>38</sup> Ascaino nantianri tsoan Dios shinantama pii sharafain ayafain fianansharacainoifanno. Fai tahuan noconi. Nanscasi ariaiifanno Noé ahuun shashohuan muran iquini. <sup>39</sup> Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoïnrifi aashcaini un afanan oaitian. Ua shinantama afa apaiyaifo cuscasi huariaiifanno. <sup>40</sup> Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafo muran caashquin. <sup>41</sup> Nanscarifiai yainfon rafu nanincani. Futsa uari cai yamariscatanaino futsa nitushquin omitsiscapashquin.

<sup>42</sup> Ascacun itisharacahuun. Un maton ifofiacucui marifi man tapiama ahuutiamain un afanan matoqui oshquicain. Un mato yoimisi cuscan nanscacoïn acahuun. <sup>43</sup> Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. <sup>44</sup> Nanscarifiai marifi itisharacahuun. "Iscaino nocon Ifo oimaran," ishon shinanyamacahuun. Ahuuscara atanaino un matoqui nocoriscaiquin.

*Oinmati rafu futsa ifoan yonoai cuscacoin aino futsa nan yonoai cusca-  
cain aima*

*Lc 12.41-48*

<sup>45</sup> Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patashari yoitiro isca huaquin, "Uhuun oinmati futsafo ato tushu shafatifi inanhuun. Nanticoïn rafu ato pashcananshara huahuun. Ascashon ua ato cushusharashohuun," huafaini catiro. <sup>46</sup> Ascatan niaifocoin afanan nocoshon oian ahuun niaifo patashari nan yoia cuscacoin aano fasi aqui unimacointiro. Ascashon naan shara huatiro. <sup>47</sup> Ascacun un mato icon yoi. Nan niaifoan ahuun oinmati yoi, "¡Aicho! Natian nantifi uhuunafomian cushusharashotiroran," ishon yoitiro. <sup>48</sup> Ascafia niaifo patashari

chacapan ahuun nomuran shinanquin isca huatiro, “Uhuun ifo funa nasoimaran,” ishon shinanquin. <sup>49</sup> Oinmati futsafo nantifi sutuqui futsatiro. Ascashon shafatifi nan paunmisifo ya pauncain monocai. <sup>50</sup> Ascashon shinantiro isca huaquin, “Natiancai uhuun niaifo oimaran,” ifiaino samamashta nocoriscatiro. <sup>51</sup> Ascashon niaifoan nan niaifo patashari fasi onaintimai. Asca huatan ahuun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascan nannoashu uaiqui omitsiscapanaca.

## 25

*Diez shomayafohuunoa Jesús ato yoini ahuara futsa ato tapimashquin*

<sup>1</sup> Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiai manafo atofu fuusishcaquin. Ascafia nan nocofunun ahuun ahuin ficashu nasoatimacai tsoa afi ranan fuusi tauafoma. Nan diez shomayafoan iquisi lamparina foafo. Nocofunu manai focani. <sup>2</sup> Nan mucu fustiti shomayafain tsoancai cayacafi shinansharayamafain itisharafoma. Asca nan mucu fustiti futsafoan shinansharafain iquisi itisharafo. <sup>3</sup> Nan shinansharaimafoancai aton lamparina fofiaquin tsoan kerosene foama. <sup>4</sup> Ascafia nan shinansharafain itisharafoan aton lamparina fofain iquisi keroseneri foafo. <sup>5</sup> Ascafia nan nocofunun ahuun ahuin fiaicai funa nocoyamaino nan shomayafoan manariacani fasi oshapaicoincani oshafo. <sup>6</sup> Ascashu oshafoanno futsan yamu nacucahuanaino oi ashcafinin ato cuna, “Nan ainfo fiicaitan man oiquin. Moinifoancahuun. Non ihui sharanon,” ato huaa. <sup>7</sup> Ascaino shomayafo moifoan aton lamparinafo otaqui futsafo. <sup>8</sup> Ascashon nan mucu fustiti shinansharaimafoan nan itisharafo yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan. <sup>9</sup> Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotocahuun fiishcaquin,” ato huanifo. <sup>10</sup> Ascaino kerosene fii focani foaifoanno nan ahuun ahuin fiai nocotan iquicainaino nan shomaya itisharafo afu pushu muran iquiafo fuusishcaquin. Ascashon caincaiti fupoafo.

<sup>11</sup> Ascaino chipo shomaya futsafo nococashon yoiafo, “Ifon. Noco fupushohuun non iquinon,” huaifoan. <sup>12</sup> “Un mato fupushotiroma. Icon un mato yoi. Uncai mato oinmisima,” ishon ato yoini. <sup>13</sup> Nanscarifiai ahuutiaran un afanan matoqui oshquicain tsoan tapiama. Ascacun itisharacahuun.

*Puihuunoa yoiqui Jesús ahuara futsa ato tapimani*

*Lc 19.11-27*

<sup>14</sup> Afanan un mato ahuara futsahuunoa yoi. Nocofunu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. <sup>15</sup> Ascashon ahuun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiafo cuscan ato inanpacua. Ascan ato inantan mai futsari cani. <sup>16</sup> Niaifoan caquin nan cinco mil inan cuscahuunshon samamashta ahuarafo fiashu afanan inanmitsashon ahuun rafanan cinco mil fia. Asca huaquin diez mil man fia. <sup>17</sup> Nanscarifi aqui nan pui dos mil fiaton afanan dos mil fia. <sup>18</sup> Ascan

nan oinmati mil pui fusti fiaton funocasmaquin mai poquishon amuran ahuun niaifo pui huashoan.

<sup>19</sup> Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuutimain fishoafuquin ato yocashquin. <sup>20</sup> Ascano nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. <sup>21</sup> Ascaiton ahuun niaifoan yoini, “¡Aicho! Mian fasi shara huaa. Un mia yoia cuscacon min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>22</sup> Ascano nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni. <sup>23</sup> Ascaiton nanrifi ahuun niaifoan yoini, “¡Aicho! Mian fasi shara huaa. Un mia yoia cuscacon min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>24</sup> Ascan nan mil pui inanniton arifi yoiqui isca huani, “Niaifo, mun tapian mincai tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran. <sup>25</sup> Ascacun un ratuqui min ua inan cuscahuunshon ahuarafa fipaifiai un funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

<sup>26</sup> Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un futsafo shinainmaquin? ¿Uaraca futsafoan yonoshonaiton un ato ahua inanma? <sup>27</sup> ¿Ascannannori shinanfiaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon paratamari un fiucanaran,” ishon niaifoan yoini.

<sup>28</sup> Ascashon ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. <sup>29</sup> Ascano nan ua icoinra huacoinnafin un fasi paratamacoin inainquin. Ascan nan ua icoinra huama ichapama aya cuscan futsan fiain. <sup>30</sup> Ascacun nan oinmati ahua tapiama chaca faquish muran potacahuun. Nannoashu fasi omitsiscasai fasi uainon,” ishon niaifoan yoini.

*Cuyoaitian Jesús yoishquin ratofomain afu ipatiro iyamarai omitsiscapanacafo muran focaniquin*

<sup>31</sup> Ascacun un mato afanan yoi. Unfi Dios ariashu mai ano fotoniquin. Ascashu un afanan oaitian nantififain aton niaifocoin un iishqui. Un Diospan Facucoincun nantififain ua oinshcani. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafa iyamarai ahuun yorafomaquin. <sup>32</sup> Ascashu nantifi maniftofi uqui fushcani. Chashoan cushumisiton ahuun chashoanfo yafi nan chashoan ointsafu aton anu cabra aton ichanan huai. Nan chashoanfosi tiri futsa huafain nan cabrafori tiri futsa huai. <sup>33</sup> Ascashon ahuun mumihuuri chashoanfo huafain ahuun mushquiuhuuri cabrafo huai. Nanscarifiai ua tanamisifo un tiri futsa huafain nan ua icoinra

huamafo un tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

<sup>34</sup> Ascatan un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai onihuatian matohuunoa shinanquin isca huani, ‘Un icano un ato iquimanonpacoí uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

<sup>35</sup> “Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocoaiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’ <sup>36</sup> Un sahuutiromacuri man ua sahuuti sahumani. Un isinincaitori man ua cushusharamisi. Ua cunu muran iquimanafoanno man ua oin camisiran,” ishon ua tanamisifo un yoishqui.

<sup>37</sup> Ascacun ua tanamisisharafo uhuun Upa Diosin aton chaca soashona. Nanfoan ua cumacaquin isca huashcani, “¿Ifon, ahuutian non mia oinmisimun min fonaincaiton non mia pimafain min nomiaitori non mia ayamamisi? <sup>38</sup> ¿Ahuutianritsi min nocoqui nocoaiton non mia oinyamafiamisishaquin non mia nocon pushu muran iquimafain min sahuutiromacuri non mia sahuuti sahumamisi? <sup>39</sup> ¿Ascan ahuutianritsi mia cunu muran iquimanafoan non mia oincani?” ishon ua yoishcani.

<sup>40</sup> Ascaifoan un aton niaifoan un ato yoiqui isca huashquin, “Uhuun yorafo nan ua icoinra huafo futsafoan atohuunoa yoiqui isca huamisi ‘Nancai ahuamaran,’ ishon man yoimisi. Asca nan uhuun yora ahua-mafishu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

<sup>41-43</sup> Ascashon nan ua icoinra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfiatocai man ua pimamisima. Un nomiaitoricai man ua ahuaara ayamamisima. Un matoqui nocofiatocai ua oinyamafiamisishaquin man ua pimayamafain un sahuutiromafiari man ua sahumamisima. Un isinincaitoricai man ua cushumisima. Ua cunu muran iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumahuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

<sup>44</sup> Nan ua icoinra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutiamun min nocoqui nocofiaton oinyamafiamisishaquin non mia cushusharayamafain min sahuutiromacun non mia sahumamisima? ¿Ahuutianritsi min isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

<sup>45</sup> Ascaiton un ato cumaquin isca huashquin, “Un mato icon yoinon. Nan ua icoinra hua futsafo man yoimisi isca huaquin, ‘Nancai ahuamaran,’ ishon atohuunoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

<sup>46</sup> Un ato nannori yoiaino umaquinoashu omitsiscapanacafo muran foshcani. Ascaino nan ua icoinra huafo uhuun Upa Diosin aton chaca



soashonafo un icano ufu foshceni ufu ipashcaquin, —ishon Jesús ato yoini.

## 26

*Jesús rutushcaquin afi ranan yoinannifo*

*Mr 14.1-2; Lc 22.1-2; Jn 11.45-53*

<sup>1</sup> Ascano noco yoiqui anaititan Jesús afanan afu rafuafofi tsain futsa noco yoiqui isca huani, <sup>2</sup> —Man man tapian nocon fusiti shafa man nococuana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiaquicai nocon shunifoan aton furun iyoafofo finonmani ato rutuquima.] Nan non shinanmisi nocon fusiti osha rafutan iqui. Ascan nantianri ua ato achimacani ua mastanonfo, —ishon Jesús noco yoini.

<sup>3</sup> Ascan nantianri nocon yorafohuunshon Dios cufimisi niaifofu futan Moisés cununi cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifocoin ini. <sup>4</sup> Ascashu ichanancashon shinannifo, —¿Ahuuscashomain non Jesús achinoanti rutushquin? —ishon ahuaa chanishtahuunshon rutupaicaquin. <sup>5</sup> Ascacun yoinifo, —Fusitiancai non achitiroa yorafo fasi mucacani nocoqui sinatiroforan, —icashu yoinannifo.

*Ainfoan Jesusqui ininti ocani*

*Mr 14.3-9; Jn 12.1-8*

<sup>6</sup> Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. <sup>7</sup> Jesús nannoshon noco futan piaino ainfo ininti tsomashu oni aquí ocashquin. Nan moticanun ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

<sup>8</sup> Ocaiton oin non afu rafuafo ainfoqui non sinacoinqui yoini, —¿Ahuuscaimun nan ininti fasi paratamacoin ahuun pui nuua na ainfoan ocaiqui? <sup>9</sup> Nan ininti ocatama inanmitsashon ahuun rafanan pui fishon nan yora ahuuomafo inanshara icuanaran, —icashu non yoinanni.

<sup>10</sup> Ascaiton non yoiai cuscan Jesús onanshon noco yoini, —¿Ahuuscaimun na ainfoqui man tsain chipuicain? Uafin nanton fasi shara huaquin. <sup>11</sup> Manfin yora ahuuomafo fu ipanacaquin. Ratoran shafatan man ato ahuaa shara huashotiro. Ascafia uncai nuno mai ano matofu ipanacama. <sup>12</sup> Ascan nan ainfoanfin uqui ininti ocaquin. Nan yora maiamamaquin ininti ocamisifo cuscan un natayamafiaiton na ainfoan ua shinanquin uqui ininti oca. Uhuun caya iquisi itishara huapai ua mai huashquiaifo cuscan. <sup>13</sup> Ascacun un mato icon yoi. Nan tsain shara uhuunoa manifotiton yoishceni. Nan ainfoan ua rama aca cuscari yoishceni. Ascashon ua shara huaa cuscan ahuuonoa shinanpacushcaniran, —ishon Jesús noco yoini.

*Judaspan Jesús ato achimani*

*Mr 14.10-11; Lc 22.3-6*

<sup>14</sup> Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifofu ano cani. <sup>15</sup> Ascacaini cashon ato yoiqui isca huani, —¿Un mato Jesús achimacun

ahuuti pui man ua inantiromun? —ishon ato yocaiton. Cumanifo, — Non mia treinta toro oshopafo inantiroran, —ishon yoinifo. Asca huatan inannifo. <sup>16</sup> Ascano nantian Judaspan ahuun nomuran shinanqui tau huani, —¿Ahuuscashomain un ato Jesús achimanoanti? —ishon shinanriani.

*Ahuun unutaqui Jesús afu rafumisifo futan pini*

*Mr 14.12-25; Lc 22.7-23; Jn 13.21-30; 1Co 11.23-26*

<sup>17</sup> Ascano noco fusiti shafan man nocoano nan shafa misi farashati maisi non pimisi. Nantian non afu rafuafo Jesusqui cashon non yocani, —Ifo, na shafan nocon fuusititan. Nan nocon shunifoan ato facu iyoafofo Diospan nai oinmati finonmani ato rutuquima nan non shinanmisi. ¿Ascan rani min noco nichipaimun non mia itishara huashonon non futan anoshon piishquin? —ishon non yocani.

<sup>18</sup> Jesús noco cumani, —Jerusalén ano fotacahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain fomaqui isca huaa, ‘Un naitian man nocoti chaimashtaqui. Nocon fusititan non min pushu muranshon piiran,’ ishon noco Jesús yoiaran,” —ishon yoitacahuun noco huani. <sup>19</sup> Ascashu nan noco yoia cuscacoin huaquin cunu muran non itishara huani. Nannoshori chashoanun facu non pichani piishquin.

<sup>20</sup> Man fari caino non afu rafuafoya Jesús sapa ano tsaoni. <sup>21</sup> Nannoshon non piaiton Jesús noco yoini, —Un mato icon yoi. Nan ratoran futsan man ua ato achimairan, —noco huaiton. <sup>22</sup> Nicaí non pusinima. Ascashon non yocani, —¿Umun, Ifon? —ishon nantifiton non yocapacuni.

<sup>23</sup> Ascaiton noco yoini, —Nan man ufutan taso murannoa misi pocotan piaitofin man ua ato achimaiquin. <sup>24</sup> Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesús noco yoiaiton.

<sup>25</sup> Nicaquin Judas, nan ato achimaiton Jesús yocani, —¿Umun, Ifon? —huaiton. —Aifain. Minfiqui, —huani.

<sup>26</sup> Ascashon piaifoanno Jesús misi finifoantan iguisi apa Diosin cufiyoni —¡Aicho! Upa, min noco cushusharafafainiran, —huatan noco yoini, —Na uhuun caya cuscara. Pichuun, —ishon torupacushon nocoti inanni.

<sup>27</sup> Ascashon cucho finifoan afanan Apa cufini, —¡Aicho! Upa, min noco cushushararan, —huatan cuchoqui fimi unu manuta noco inanqui yoini. —Nantiffain na ayacacahuun, —noco huani. <sup>28</sup> Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafo Diosin potapacunonma. <sup>29</sup> Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, —noco huani.

<sup>30</sup> Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non cani.

—Pedro min futsafo, “Un Jesús oinmisimaran,” ishon min yoiran, — Jesús huani

*Mr 14.26-31; Lc 22.31-34; Jn 13.36-38*

<sup>31</sup> Ascashon afanan noco yoini, —Na yamutafin nantififain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain. Ascaino chashoanfo ichoi futsucaniran,”

icashu cununi. Nanscarifiai ua rutuaifoanno na yamutan man uhu-unoashu ratufaini ichoicai. <sup>32</sup> Ascafia un funiashu Galilea ano un cai tauicai. Ascano man uqui chipo nocoicashquiran, —ishon Jesús noco yoiaiton.

<sup>33</sup> Pedronun Jesús cumani, —Nantifiton mia potafiaifoannocai un mia potaimaran, —huaiton. <sup>34</sup> Jesús Pedro yoini, —Un mia icon yoi Pedro. Tacara cuoatama min ato yoiqui “Uncai Jesús oinmisimaran,” ishon min ato yoiqui rafunon fusti huairan, —huaiton. <sup>35</sup> —Ma, Ifo. Un mifu nafiaquicai un ato yoinacama un mia oinmisimaran, —ishon Pedronun yoini. Ascaiton norifi nantifiton non nannori yoini.

*Jesús Getsemaní anoshon apa cufini*

*Mr 14.32-42; Lc 22.39-46*

<sup>36</sup> Ascatan ihuifo mapoano ahuun anu Getsemaní nanno Jesús no fu cashion noco yoini, —Nuno tsaocahuun. Uhuun Upa un cufiyotanon, —noco yoini. <sup>37</sup> Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscai tauai cuscan shinain fasi ahuun nomuran isicoinni. <sup>38</sup> Ascashon ato yoini, —Un fasi omitsiscai cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, —ishon ato yoini.

<sup>39</sup> Ato asca huatan chaimashta caashu fuopacucahuan Apa Dios cufini, —Upa un omitsiscai cuscan mian numatiromainquin ua numahuu. Ascafiashon un apaiyai cuscan huaquima nan min apaiyai cuscan fusti ua huahuu, —huani.

<sup>40</sup> Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomamun? <sup>41</sup> Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapaifiaquicai Diospan curushyamainocai man atiro-  
maran, —ishon Jesús ato yoini.

<sup>42</sup> Ato asca huatan afanan apa Dios cuficaicani. Cashion apa yoini, —Upa, min ahudara futsa yorafo numashqui atiro-  
mamaingquin nan min apaiyai cuscan huahuu. Unfi man itisharaqui atohuunoashu omitsiscacaini naashqui, —ishon Jesús apa cufini.

<sup>43</sup> Ascashu afanan atoqui oquin oian afu rafuafo afi oshafo ini. Fasi osha murancoianfo. <sup>44</sup> Ascaino afanan ato anoashu cashion apa Dios cufini. Nan cufia cuscacoin afanan nannori cufini.

<sup>45</sup> Ascatan afanan oquin oian afi oshafo ini. Ascaiton ato yoini, —¿Manmun afi moiyama? Natianfin nan chaca huamisifoan ua ato achimai fucaniquin. <sup>46</sup> Funicahuun. Non canon. Nan nocofunun ua ato achimai man oiquin, —ato huani.

*Jesús achinifo*

*Mr 14.43-50; Lc 22.47-53; Jn 18.2-11*

<sup>47</sup> Ascaino nan Judas Jesús fu rafumisi futsan oaino a yorahuanrasi nopu yafi coshatifo tsomacashu funifo. Nocon yorafohuunshon Dios cufimisi niaifofoan futan Dios fu tsainti pushu niaifo patasharifoan ato yonoo funifo. <sup>48</sup> Nan Judaspan yorafo iquisi yoiqui isca huani, —Un Jesús

tamoqui tsoacaiton tapicahuun nanfin Jesusquin achicahuun, —ato huani. <sup>49</sup> Ato yoiqui asca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

<sup>50</sup> Jesús cumani, —Uhuun yoran, nan mian apaiyai cuscan ua huahuu. Nanscayoi min oaquin, —huani. Ascaiton nan Judas fu fuafoan Jesús achinifo niaifofo ano iyoshcaquin. <sup>51</sup> Ascaiton Jesús fu rafua futsan nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>52</sup> Ascaiton Jesús yoini, —Unuhuu. Min nopu ahuun ona muran huahuun. Nan nopun yora rutuafin arifi nopun natiroquin. <sup>53</sup> Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. <sup>54</sup> Ascan uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahuuscashumun Diosin tsain uhuunoa cununi cuscan un yorafohuunoaashu natiromaquin? Ascan uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

<sup>55</sup> Ascaino nantianri Jesús achipaiyaifoan ato yoini, —¿Unmun yora popu cuscaracun man ua nopu yafi coshatifo yashon achi fua? Shafatifi un Dios fu tsainti pushu muranshon un mato yoifiaitocai man ua achipaiti huama. <sup>56</sup> Ascafia nan man ua acai cuscan Diosin tsain yomisi-foan uhuunoa cununifo cuscan nanscacoïn man ua huairan, —ishon Jesús ato yoini. Ascaino non afu rafuafo nantifi non amaqui ichoni.

*Jesús niaifofoan ointaifi iyonifo*

*Mr 14.53-65; Lc 22.54-55, 63-71; Jn 18.12-14, 19-24*

<sup>57</sup> Ascaino achicashon nocon yorafohuunshon Dios cufimisi niaifocoinin ahuun pushu ano iyonifo. Nan niaifoan ahuun anu Caifás. Nannori niaifofo ichanannifo. <sup>58</sup> Ascaino Pedro acachori cani. Acachori cafiái fishtatama cani. Dios fu tsainti pushu cushumisifoya Pedro niaifoan umainti ano tsaoni Jesusmain ahuusca huacaniquin ishon oinpai.

<sup>59</sup> Nannoshon niaifofoan shinanpainifo, —¿Nonmun raquiri huatiroquin Jesús ahuara chaca huaran ishon rutushquin? Ahuacai ahuusca huaiton non nicayomisima non rutuai, —icananshu nocon niaifofo afi ranan yoinannifo. <sup>60-61</sup> Yora ichapafoan, —Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaifofoancai Jesushuunoa ahuara chaca iconcain nicanifoma rutushcaquin. Ascashon futsafoan Jesushuunoa tsain chaca huaquin anaitiafoanno chipo nocofunu rafutan niaifofoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafoan aca cuscan unfi choquiatiroquin. Ascashon osha rafu non fusti finontan un afanan futsa huatiro. Uncai tsofutan atiroma. Urus fustifin un atiroquin,” Jesús iquitaran, —ishon nan rafutan yoinifo. <sup>62</sup> Ascaino yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafo cuscan icon iyamarai iconmamun? —ishon yocaino. <sup>63</sup> Jesús puusinima. Ascaiton afanan yoini, —Diosin nan nipamisi ahuun anuhuunshon ua yoihuu. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihuu, —ishon yocaiton.

<sup>64</sup> Jesús cumani, —Nan mian yoiaí cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin.

Uhuun Upa Diosin niaifo fu un icun. Urifimain un afu niaifocoianshu. Ascacun un nai ariashu coinfo camaqui oaiton man ua oinshquiran, —ishon Jesús ato yoini.

<sup>65</sup> Ascaiton nicai nocon yorafohuunshon Dios cufimisi niaifocoin, —Un Diospan Fururan, —Jesús icaiton nicai fasi sinacoinni. Ascacun ahuun sahuuti fashnuqui yoini, —Noncai afanan yorafoan Jesusqui tsain chaca huai yopaima. Manmain nofocoin ahuun tsain chaca nicayamaifin, “Un Diospan fururan,” iquifin Dios chaca huaquin. <sup>66</sup> ¿Ascacun man ahuusca Jesús huapaimun? —ishon aton niaifocoinin ato yocaiton. Nantiffain, —A rutucahuun, —huanifo.

<sup>67</sup> Asca huatan ahuun fusoqui cumo michofain sutufain futsan tapasni. Ascashon cashu mutsama huacaquin. <sup>68</sup> Yoinifo, —Min Cristomainquin min nantifi tapicoian. Asca tsoan mia acamainquin noco yoihuu, —ishon cashu mutsama huanifo.

—*Un Jesús oinmisimaran, —ishon Pedronun yoini*

*Mr 14.66-72; Lc 22.56-62; Jn 18.15-18, 25-27*

<sup>69</sup> Ascaino Pedro pushu umainti caashu tsaoni. Ascano nocohuunshon Dios cufimisi niaifocoin ahuun oinmati shomayatton Pedro fuchishon yoini, —Jesús Nazaret anoa fu mirifi min afu oquin, —huaiton. <sup>70</sup> —Ma. Mian yoiyai cuscaicai un tapiamafinquin, —Pedronun aton ointaifi huani.

<sup>71</sup> Asca huafaini caincaiti ano caacun nannoshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiaiton.

<sup>72</sup> Afanan Pedronun yoini, —Ma. Min yoiyai cuscafin Diosin tapiaquin uncai na nocofunu oinmisimaran, —ishon yoini.

<sup>73</sup> Sama racatan afu niafoan Pedro yoinifo, —Icon. Minfin mirifi Galilea anoquin. Min tsainhuunshon non mia onanran, —ishon yoiiafoan.

<sup>74</sup> Afanan ato yoini, —Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascain uncai na nocofunu Jesús oinmisimaran, —ishon Pedronun afanan ato yoini. Ascaino samamashta tacara cuoni.

<sup>75</sup> Tacara cuoaino Jesús yoiyai cuscan Pedronun shinantani. —Pedron un mia yoi. Na yamutan tacara cuoatama min ato yoiqui rafu non fusti huai, “Un Jesús oinmisimaran,” —ishon Jesús yoiyai cuscan shinantani chifi caashu Pedro fasi uaini.

## 27

*Pilato ano Jesús iyonifo*

*Mr 15.1; Lc 23.1-2; Jn 18.28-32*

<sup>1</sup> Ascaino funamanrishta nocon niaifocoin shinanpainifo, —Ahuuscashomain non Jesús rutumatiroquin, —icashu yoinannifo.

<sup>2</sup> Ascatan munushcashion nan Romanon niaifocoin ahuun anu Pilato ano Jesús iyonifo.

*Judas nani cuscan*

<sup>3</sup> Asca huashon Judaspan Jesús rutuaifocoin nicaquin fasi shinanni. —¡Ohua! Un Jesús ato achimanama shara icuanaran, —ishon shinanni. Ascashu nocon yorafohuunshon Dios cufimisi niaifocoin yafi Dios fu tsainti pushu niaifocoin ano cani treinta toro paratamacoin ahuun pui nuua ato

nasoin cai. Ascacainicashon ato yoini. <sup>4</sup>—Unfin chaca huaquin. Jesuscai ahua chaca huayamafiamisicun un ato parashon achimanaran, —ishon ato yoiaton. Cumanifo, —Ahuuscaquitsi min noco anori yoiyoa. Noncai ascara tapipaima. Mififin min shinanquin, —huaifoan. <sup>5</sup>Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

<sup>6</sup> Asca huatan Judas cai cachiori niaiffoan nan torofo topinifo. Ascashi niaiffo afi ranan yoinannifo, —Nocon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma. <sup>7</sup> Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo. <sup>8</sup> Ascasho nan mai anunifo —Imi maiiran, —huanifo. Natianri nannori yoirafo. <sup>9-10</sup> Ascano nan Diosin tsain yoimisi Jeremías inon pacoai cununi cuscan natian man nanscacoin huaafo. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achimashocun,’ ishon yoirafo. Nan torofohuunshon cuti huamiton ahuun mai fiafo. Uhuun Ifoan ua yononi cuscan un cuti huamiton ahuun mai fia. Nanscarifi aqui nanfoanrifi aton torofohuunshon cuti huamiton ahuun mai fiaforan,”

ishon Jeremías cununi.

*Pilato ano Jesús iyonifo*

*Mr 15.2-5; Lc 23.3-5; Jn 18.33-38*

<sup>11</sup> Ascashu Romanon niaifoan ahuun anu Pilato fu Jesús nia ini. Nan niaifoan Jesús yocani, —¿Minmun Judiofoan niaifocoin? —ishon yocaiton. —Nan min ua yoiat cuscafin unquin, —Jesús huani. <sup>12</sup> Ascashon nocon yorafohuunshon Dios cufimisi niaiffo yafi Dios fu tsainti pushu niaiffoanri Jesús ahua chaca huamisiran huafiaifoannocai puusinima. <sup>13</sup> Ascaiton Pilato yoini, —¿Yoraofoan mia chaca huaifo cuscan min nicaimamun? ¿Min ato cumapaimamun? —ishon yoini. <sup>14</sup> Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilaton ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

*Niaifoan ato yononi Jesús rutunonfo*

*Mr 15.6-20; Lc 23.13-25; Jn 18.38-19.16*

<sup>15</sup> Nan fusititan faritifi a cunu muran iquiafo fusti caimaquin Pilato ato yocapaoni. —¿Ratocai man caimapaimun? —ishon yoraofo yocapaoni. <sup>16</sup> Nantianri cunu muran iquia nocofunu fasi pofu rutumit-samisi. Ahuun anu Barrabás ini. <sup>17-18</sup> Jesús ahua chaca huaiyamafiacun. A icai cuscan apaicaquin nocon niaiffo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. <sup>19</sup> Ato yocatan tsaoshon manani cumaifoan nicapaiquin. Ascaino ahuinin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huaquin. Ahusca huayamahuu. Uhuun namapan un oian ahua chaca huayamafiashu omitsiscaiton oin urifi uhuun nomuran ahuunoashu

un omitsiscacoinna. Ascacun ahuusca huayamahuu, —ishon Pilato ahuinin cunushoni.

<sup>20</sup> Ascafiacun nocon yorafohuunshon Dios cufimisi niaifofo yafi Dios fu tsainti pushu cushumisifoan nanno ichananfo ato yosiquin isca huanifo, —Jesús noco cainmashotamarocon Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

<sup>21</sup> Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. <sup>22</sup> —¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

<sup>23</sup> Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascacia fasi curushcain yoirianifo, —Mastahuun, nariscanon, —huanifo.

<sup>24</sup> Ascaiton Pilato oian tsoan nicapaitama fasirocon mucai finaifoan. Masu fitan aton ointaifi muchoquimuni. Muchoqueimutan ato yoini, —¡Oincapon! Uhuun nuama. Un Jesús cainmapaifianocai man cainmapaima. Manrocon fasi rutupai. Ascan matohuunfi nuuaquin, —ishon ato yoiaiton. <sup>25</sup> Nantiffain cumanifo, —Nanscanon. A nai nocohuun nuunonquin. Nocon facufohuunri nuunon, —ishon yoinifo.

<sup>26</sup> Ascaifoan nicaquin Pilato Barrabás ato cainmashoni. Ascashon ahuun ranushumuafu yononcun fichi cunoqui tuchiaton Jesús coshaqui futsanifo. Asca huashon mastanonfo iyonifo. <sup>27</sup> Nan ranushumuafon Jesús iyoafo anofin niaifoan ahuun pushu iniquin. Ascano nan niaifo cushumisifoan ranushumuafu chifinoafo cunani Jesús oin funonfo. <sup>28</sup> Ascashon ahuun sahuuti shorifain futsa shonan sahuumanifo. <sup>29</sup> Ascatan mosha chainipafo maiti huashon maimafain poquiti ahuun mumihuuri tsoamashon ratoconun mai chachishon yoinifo, —¡Aicho! Minfin Judiofoan aton niaifoquin, —ishon cashu mutsama huanifo. <sup>30</sup> Ascashon aqui cumo michofain ahuun poquiti fiantan ahuun coshapacunifo. <sup>31</sup> Ascashofin cashu mutsama huacatan nan sahuuti shonan pucashon ahuun sahuuticoín afanan sahuumanifo. Asca huatan mastai focaquin iyonifo.

*Jesús ihui coyan iquinanqui mastanifo*

*Mr 15.21-32; Lc 23.26-43; Jn 19.17-27*

<sup>32</sup> Focani nan nocofunu Simonqui noconifo. Nan Simonfin Cirene anoashu cainniquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo. <sup>33</sup> Gólgota ano fonifo. Gólgota yoia mapo shao. <sup>34</sup> Nanno nococashon Jesús fimi unu pau tashipia osia ayamapaiyaifoan muutacai Jesús apainima. <sup>35</sup> Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqi tau huani. Ascashon cuyonfianifo. <sup>36</sup> Asca huatan tsocashon a Jesús mastafa foisnifo.

<sup>37</sup> Ascano man ihui coyan iquinanqui mastacashon amanaonri cununifo isca huaquin,

**NAN JESUSFIN ISRAELIFOAN ATON NIAIFOCOINQUIN**

ishon cununifo. Nannori Jesús icaran ishon mastanifo. <sup>38</sup> Ascashon yomutso rafuri mastanifo. Ocuma futsa futsafain ocuma futsa futsa anifo. <sup>39-40</sup> Ascashon camacaquin isca huanifo, —¡Cuu! Minfin yoimisiquin nocon Dios fu tsainti pushu min choquiacaí. Ascatan osha rafu non fustitan min afanan futsa huairan min imisi. Mifin numatan ihui coyan iquinanmaquinoashu fotohuu. Min Diospan facumainquin, —ishon roanifo.

<sup>41</sup> Nannori nocon yorafohuunshon Dios cufimisi niaifofo yafi Dios fu tsainti pushu cushumisifo futan Moisés cununi cuscan tapimamisifoan Jesusqui cashumutsamanifo. <sup>42</sup> Ascashon yoinifo, —Nanton futsafo numafiatiroshaquin aficai numatiroma. Ascan minmain Israelifoan aton niaifoquin ihui coyan iquinanmaquinoashu fotohuu. Min ascaiton oinquifin non mia icoinra huaicain, —ishon roanifo. <sup>43</sup> Ascasho niaifofoan nanno niafo ato yoinifo isca huaquin, —Jesús noco yoimisi, “Unfin Diospan facuqui,” ishon noco yoimisi. Nantofin Dios icoinra huamisiquin. Ascan Upa Diosin a fuchipaiquifin numatiroquin, —ishon aquí tsain chaca huanifo. <sup>44</sup> Ascano afu masta rafutan aquí tsain chaca huacaqui roanifo.

*Jesús nani cuscan*

*Mr 15.33-41; Lc 23.44-49; Jn 19.28-30*

<sup>45</sup> Ascano fari masafinin racafiashu nan maitio faquishpacucahuani. Ascashu man fari caino afanan shafani. <sup>46</sup> Ascaino nantianri Jesús fasi oi ashafinin apa cunani, —¿Elí, Elí lema sabactani? —nan yoipai, —¿Uhuun Diosin, Uhuun Diosin, ahuuscai mian potamun? —huani.

<sup>47</sup> Jesús ascaiton yorafoan mapo cashion nicacaquin yoinifo, —Nicacapon. Elías cunaiton, —huanifo. <sup>48</sup> Ascaino futsa ichoni fimi unu focash muran mishan nanupacuofoantan faca tahua shatun mishan tunhuuinifoan Jesús inanpaiquin. <sup>49</sup> Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

<sup>50</sup> Ascano Jesús fasi fiisinacahuani. Fiisinacahuatan naani.

<sup>51</sup> Ascashu Jesús natapaiyaino a Judiofoan Dios fu tsainti pushu murannoa pano puta pochimua aficoín fashnupacucahuani. Nanscatapaiyaino mai nayanaiyainquin. Toquirininhuanfo torufafaini. <sup>52-53</sup> Ascaino nan Diospan yorafo naacun mahua quini muran mai huanifo. Nan toquirinin huafo fupucui futsuaino Diosin afanan ato nimaní. Ascashu Jesús funiaitian nanfori nan mahua quini murannoashu Jerusalén muran iquinifo. Ascaiton nanao yora ichapafoan oinnifo.

<sup>54</sup> Ascaino ranushumua niaifo yafi a futan Jesús cushuafoan mai naiyanaiyaicaino ahua futsafori ahuascaiton oincani fasi ratucoincaquin yoinifo, —Iconfinquin. Nanfin Diospan facuquin, —ishon yoinifo.

<sup>55-56</sup> Ascaiton nannoshon ainfo ichapafoan chaicushon oinnifo. Nan María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfainmisifoan nan apaiyaifo cuscan ato huashomisifo.

*Jesús mai huani*

*Mr 15.42-47; Lc 23.50-56; Jn 19.38-42*

<sup>57</sup> Ascatan man fari caino nocofunu ahuashta yopatanaima ahuun anu José nan Arimatea anoashu cainni. Nantorifi Jesús tanamisi sharacoin



ini. <sup>58</sup> Nan José niaifo Pilato ano cashon yoiquin isca huani, —Niaifon, un Jesús toquirininhuan quini muran mai huapai. Un mia yocayoaran, —ishon yoini. Ascaiton, —Jesús ahuun caya José inancahuun, —ishon Pilato yononi. <sup>59</sup> Ascaiton José Jesús ahuun caya pano oshopa shara-coinchi raconi. <sup>60</sup> Racoshon toquirininhuan quini muran Jesús mai huani. A murancai tsoa maiyomisima muran mai huani. Ascashon toquirininhuanun fupofaini cani. <sup>61</sup> Nannoshori María Magdalena futan María futsan tsaoshon oinnifo.

*Ranushumuafoan nan mahua quini ano cushunifo*

<sup>62</sup> Iyoconaino tunutitian yorafohuunshon Dios cufimisi niaifofu yafi Fariseofu Pilatoqui fonifo. <sup>63</sup> Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitironan,” imisi. <sup>64</sup> Ascacun min ranushumuafo a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocafin fasi chani finacointirofoquin, —huaifoan. <sup>65</sup> Pilato ato yoini, —Manfin mato Dios fu tsainti pushu murannoa maton ranushumuafo a toquirininhuan quini ano ato nichicahuun cushutanonfo, —ishon ato yoini. <sup>66</sup> Ascaiton a toquirininhuan quini ano ranushumuafo nichinifo. Nanfoan toquirininhuan sapa tocoro fuposhon ahudara tuipaton tanyacunifo. Ranushumuafo nanno nichifurani funifo nannoshon cushunonfo.

## 28

*Jesús funini cuscan*

*Mr 16.1-8; Lc 24.1-12; Jn 20.1-10*

<sup>1</sup> Ascano Israelifon noco tunutitian nan Domingo anaitia iyoconaino nan maia ano oin focani fonifo. <sup>2</sup> Ascaino nantianri mai fasi curushcain nayanaiyalcaino nocon Ifo Diosin ahuun oinmati afu icafo nai ariashu ftoni. Fototan toquirininhuan fuputan acamaqui tsaoni. <sup>3</sup> Ascaino ahuun fuso fasi chashacoinni. Naan canan façaica ointsa. Ahuun sahuutiri fasi oshopa yoa rama furoa ointsa. <sup>4</sup> Ascaiton oincani ranushumuafo fasi ratui tari taricani aton ratupasi nayonifo. Nan naa shinantsa anifo.

<sup>5-6</sup> Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafaitafo natian nunoma. Mato yoimisi cuscan man funia. Oin fucapon quini muran. Nan racaitano. <sup>7</sup> Ascashon afu rafuafo ato yoiriscatacahuun, “Jesús naafaitashaqui man funiaquin. Galilea ano cai tauicai anoshon mato manashqui. Nannoshon man ointiro.” Un mato yoiyai cuscan ato yoiriscatacahuun, —ishon Diosin nai oinmatinin ainfo rafu yoini.

<sup>8</sup> Ascaiton nicatan nan ainfo rafu toquirininhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. <sup>9</sup> Ichoaifoanno Jesús atoqui niriscatani. Ascashon, —Mun moyaran, —ishon ato yoini. Ascaiton nan ainfo rafutan taicopacufoantan, —Min nocon Iforan —huaifoan. <sup>10</sup> —Ratuyamacahuun. Ascatarocon uhuun ushtofu ua yoishotacahuun Galilea ano fononfo. Nannoshon ua oinshcaquin, —ishon ato Jesús yoini.

*Ranushumuafoan yorafu chani huani cuscan*

<sup>11</sup> Ascatan ainfofo Jesús anoashu foaifoanno ranushumuafori yorafo-huunshon Dios cufimisi niaifofogui nan oianfo cuscan atogui chaninifo. <sup>12</sup> Ascaiton nicacani niaifofoi ichanancashon shinannifo, —Nonmun ahuusca huaicai, —ishon. Ascashon ranushumuafo yoinifo, —Non mato yoiyai cuscan nannoricoinrifi futsafo yoicahuun non mato pui ichapa inanon. <sup>13</sup> Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun. <sup>14</sup> Ascaiton niaifocoinin nicaquin Jesús ahuun caya anoma nicai raquirira icaiton non yoisharaicanon mato ahuusca huanonma, —ishon niaifofofaan ranushumuafo yoinifo. <sup>15</sup> Ascashon ato pui inanfoanno focashon nan niaifofofaan ato yoirafo cuscan nannoricoin ato yoinifo. Ascaiton nan maifoti anoafu futan Israelifofaan nicanifo. Ascano nantian icoinra huanifo ranushumuafoan ato yoirafo cuscan nicacaquin.

*Jesús ahuun unutaqui a rafuafo yononi cuscan*

*Mr 16.14-18; Lc 24.36-49; Jn 20.19-23*

<sup>16</sup> Ascashu non afu rafuafo once nan Jesús noco yoia cuscan machi Galilea ano non cani. <sup>17</sup> Ascashon oinquin non yoini, —¡Aicho! Min nocon Ifo Jesús. Non mia fasi noiran, —ishon non yoini. Ascafiatocai futsafoan icoinra huacuanima. <sup>18</sup> Ascano nocoqui chaimashta oshon noco yoini, —Uhuun Upa ua yonoa nantifi nai ariafo yafi mai anoafori un yononon. <sup>19</sup> Ascacun manifoti anoafu yoifoanfafaftacahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin. <sup>20</sup> Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, —ishon noco Jesús yoini. Nanti.

## Marcos Jesushuunoa Cununi

*Juan yorafo unu muran iquimamisi tsoa istaipama ini*

*Mt 3.1-12; Lc 3.1-9, 15-17; Jn 1.19-28*

<sup>1</sup> Natian tsain shara Jesucristo Diospan Furunhuunoa un mato cunushoni man tapinon. Nuno mai ano niyoashu ini cuscan un mato tapimai.

<sup>2</sup> Cainyataima fari ichapa inonpacoai cuscan ahuunoa nocon shuni Isaías cununi. Chipa inaca cuscan yoiyomisi. Upa Diosin Furun yoiyoni cuscan Isaías aqui cununi isca huaquin,

“Upashtan, min yorafoan mia onantaima uhuun tsain yoimisi un atoqui nichicain mihuunoa ato yoinon. Itisharanonfo mia nicashquin,”

ishon Upa Diosin Furun yoini cuscan aqui cununi. <sup>3</sup> Diosin tsain yoimisi-huunoari cununi.

“Tsoan istaipamashon ahuun yorafo yoishquin isca huaquin, ‘Nocon Ifo oshquiquin. Itisharacahuun. Maton chaca shatucoincahuun isharashcaquin,’ atofin ato yoishquiquin,”

ishon Juan cainyataima fari ichapa inaca cuscan Isaías ahuunoa cunushoni. <sup>4</sup> Ascan cununi cuscacoin aa. Tsoan istaipamanoashu Judea mai ano Juan oni. Ascano aqui furifurinifo. Furifuriaifoa ato yoiquin isca huani, —Maton chaca shatucoincahuun. Man ascaiton Upa Diosin maton chaca rau huanon afanan shinanshquinma. Asca huatan maton chaca shatucoinshon futsafori ismashcaquin un mato unu muran iquimanon, —ishon Juanpan ato yoini. <sup>5</sup> Ascano Jerusalén anoafu yafi Judea anoashuri aqui funifo. Ahuun tsain nicapai funifo. Fucashon atiriffoan aton chaca yoiaiton Juanpan ato unu Jordán naquishon iquimatan cainmapacuniquin.

<sup>6</sup> Camello inapan rani ahuun camisa huashon Juanpan sahuua ini. Ascashon yoinaton fichi aqui nanushumuni. Ascashori ocutsuru pifain afuchi fona ayani. <sup>7</sup> Ascano isca huaquin yoini, —Nocofunu futsan samamashta mato tapimai oshquin. Ua fasi finoncaia. Ahuamamishti huatiro. Uncai asca huatiroma. Un ahwara shara huahuu rafanancai un ahuun oinmatima. Uhuun ramapayamainocai un ahuun oinmati icuanama. <sup>8</sup> Un mato unu muran iquimatan cainmanaquin maton chaca shatushon man Dios tanasharanon ascashon man ato oinmanon. Atofin ahuun Yoshin Shara matoya rafumapacuiquin, —ishon Juanpan ato yoini.

*Juanpan Jesús unu muran iquimani*

*Mt 3.13-17; Lc 3.21-22*

<sup>9</sup> Ascano Jesús Galilea anoashu unu Jordán ano cani. Nannoshon Juanpan unu muran iquimatan cainmani. <sup>10</sup> Ascatapayaino naicoín finoinnifoantan Upa Dios icariashu nai fupuini. Nai fupuicaino Diospan Yoshin Shara ruhin cuscara Jesusqui fotopacucahuanaiton oinnifo. <sup>11</sup> Fotoaino nai murannoa Upan Diosin ahuun oi nicanifo isca huaiton, —Minfin uhuun Facuquin. Un mihuun fasi noicoín. Un miqui fasi unimacoinran, —ishon Apa Diosin yoini.

*Satanasin Jesús chaca huamapairiani*

*Mt 4.1-11; Lc 4.1-13*

<sup>12</sup> Ascano tsoan istaipamashon ano Diosin Yoshin Sharapan Jesús iyoni. <sup>13</sup> Anocai tsoa icai inima. Yoinafosi nanno icai ini. Nannoshon Satanás cuarenta oshatan chaca huamapairiani. Ascatan amaquinoashu caino Upa Diosin ahuun oinmatifo afu icafo Jesusqui fotonifo cushush-caquin.

*Galilea anoshon Jesús ato yosiquin tau huaniquin*

*Mt 4.12-17; Lc 4.14-15*

<sup>14</sup> Ascano Juan ranushumuafoan cunu muran iquimanano Jesús Galilea ano nasocaini Diospan tsain shara yorafo yoishquin. <sup>15</sup> Ato yoiqui isca huani, —Nocon Ifo Diosin matoqui oshquiquin. Maton chaca shatucahuun. Chaca huaquima Diosin tsain shara icoinra huacahuun, —ishon Jesús ato yoini.

*Jesús afu rafumisi rafu non rafuri catonquin tau huani*

*Mt 4.18-22; Lc 5.1-11*

<sup>16</sup> Ato yoitan ianmanhuan Galilea cusumun cani. Caquin Simón chipocun Andrés futan nushutinin nushuaifoan ointoshini. Nan rafutanfin nushumisi inifoquin. <sup>17</sup> Ascaiton, —U fu fucahuun. Manfin nushumisicoquin. Man shiman ichaparasi nushutinin fia cuscan natian uhuunshon man uquin yora ichapa ihuushqui aton Ifo un inon, —ishon Jesús ato yoini. <sup>18</sup> Ascaino nushuti huafaini afu fonifo.

<sup>19</sup> Jesús chaimashta catan Zebedeo facu rafu fuchini. Nan nanu rafutan Santiago futan Juanpan shasho naquishon nushuti icushnifoquin. <sup>20</sup> Ato fuchishon, —Un fu fucahuun, —ato huani. Ascaino samamashta apa yafi ahuun oinmatifo shasho naqui nichifaini focani afu fonifoquin.

*Jesús yoshin chaca nocofunumaquinoa potani*

*Lc 4.31-37*

<sup>21</sup> Ascano Capernaum mai ano fonifo. Judiofoan aton tunutitian ichananti pushu muran atofu ichanannifo. Ichananfoan Jesús ato yosiniquin. <sup>22</sup> Ascaiton nicacani —¡Aira! Nicacapon. Tsoancai anori noco yosimisima. ¿Ahuuscashon nunori noco yosisharaimun? Ahuun tsain sharacoin nanua. Moisés cununi cuscan nocon tapimamisifoan anori noco yositamarocon niaifoan tapicoian cuscara noco yosiaran, —ishon yoinifo.

<sup>23</sup> Ascano nannoa ichananti pushu murannoa nocofunu yoshin chacanun ahuun nuushon fiisimani. <sup>24</sup> Fiisimaino, Jesús fuchini. Fuchishon yoiquin, —¿Ahuuscain min noco fucash huai oamun, Jesús Nazaret anoaton? ¿Min noco omitsiscapanacafo muran min noco potai oamun? Man non mia onan. Diosin mia catonni. Mincai chaca huamisima, —ishon yoshin chacapan yoini.

<sup>25</sup> Ascaiton, —Tsainyamahuu. Amaquinoashu catahuun, —ishon Jesús yoshin chaca curushcain nichini. <sup>26</sup> Ascainofin yoshin chacapan nocofunu fasi musta mustaimatan amaquinoashu fiisicaini cani. <sup>27</sup> Ascaiton oincani, —¡Aira! Jesús fasi ahuamamishti huacointiro. Is-caracai ahuashta non oinyomisima. ¿Ahuuscashomun ahuun tsainman yoshin chacapan nicascamafaiton nan yoia cuscacoin huaquin? —icashu yoinannifoquin. <sup>28</sup> Ascatan chanifoanfainifo Jesús aca cuscan ahuunoa Galilea anoafu yoifoanfainifo.

*Simón ahuun raisi yoshafo Jesús caya huamani*

*Mt 8.14-15; Lc 4.38-39*

<sup>29</sup> Ascacaini Judiofoan ichananti pushu murannoashu Santiago yafi Juan fu focani Simón futan Andrés pushu ano noconifo. <sup>30</sup> Nanno Simón ahuun raisi yoshafo fasi yonaiton Jesús tapimanifo. <sup>31</sup> Ascano Jesús mutsoinifoannaino funinaca huani. Funinaca huatan yona matsiriscatan nan yoshafoan ato pimashquin pichacufaini.

*Jesús yora ichapa caya huamani*

*Mt 8.16-17; Lc 4.40-41*

<sup>32</sup> Ascatan man fari caino isinincai futsa futsatapafo yafi yoshin chacafo atohuun nuufafaina yorafoan Jesusqui ihuunifo ato cayahuamapacunon. <sup>33</sup> Nan pushurasi anoashu Jesusqui funifo. <sup>34</sup> Isinincai futsa futsatapafo ato cayahuamapacuano. A yoshin chacafo atohuun nuufafaina atomaquinoa potani. Jesús Diospan facun yoshin chacafoan onainfoan —Tsainyamacahuun, —ato huani.

*Jesús ichananti pushu muranshon Apa tsain ato yoini*

*Lc 4.42-44*

<sup>35</sup> Ascatan shafacuaino pushu murannoashu Apa Dios cuficai tsoan istaipama cani. <sup>36</sup> Caano Simón non afu rafuafoan Jesús funai focani fonifo. <sup>37</sup> Fuchicashon, —Nantifi yorafoan mia funairan, —huainifo.

<sup>38</sup> —Pushurasi futsafo ano non canon un atori Upa Diosin tsain yoinon. Ascacun uhuun Upa Dios ariashu nuno un oaquin, —Jesús ato huaniquin. <sup>39</sup> Ascashu nantishon Galilea ano cahuacacaini Israelifoan aton ichananti pushu muranshon Diosin tsain ato yoini. Nan yoshin chaca atohuun nuuafu atomaquinoa potaniquin.

*Jesús nocofunu nami rashquishi futsua caya huamani*

*Mt 8.1-4; Lc 5.12-16*

<sup>40</sup> Ascatan nocofunu futsa yoratishon ranimamishti rashquishi futsua Jesusqui nocoshon. Ratoconun mai chachishon yoini, —Ua caya huapaiquifin mian caya huatiroquin, —huaiton. <sup>41</sup> Ahuun ramapaiquifin ahuun mucuman ramanni, —Ai Un mia caya huai. Ascan natianfin min caiyaicain, —huainofin. <sup>42</sup> A rashquishi futsua cayariscani. <sup>43-44</sup> Cayacun yoini, —Un mia caya huaa tsoa yoiyoyamahuu. Nocon caifohuunshon Dios cufimisi a ismatahuun. Moisés mato yononi cuscan chashoanun facu a inanhuun mia rutushonon. Min chaca soafain min caya ato oinmashquin. Ascano tapinonfo Moisés noco yononi cuscan min aiton, —ishon Jesús yoifia. <sup>45</sup> Nicatamarocon samamashta ato yoifoanfaini, —¡Oincapon! Jesús ua caya huashara, —ishon ato yoifoanfaini. Ascaiton nicacani yorahuanrasi Jesusqui fupaifacani Jesús iquitiroma ini. Ascano tsoan istaipama caano pushurasiti aqui cuyo funifo.

## 2

*Jesús nocofunu charishi futsua caya huani*

*Mt 9.1-8; Lc 5.17-26*

<sup>1</sup> Ascano osha ranantan afanan funifo. Capernaum ano nasofuracani. Nanno pushu muran iquicun nicanifo. <sup>2</sup> Nicacani yorahuanrasi aqui funifo ato Diosin tsain yoinon. Pushu fospicoianno tsoa futsa afanan iquitiroma ini. Umaintiri yora ichapacoin yuruicafono afanan

tsoa iquitiroma ini. <sup>3</sup> Ascano nocofunu rafu non rafuriton aton yora charishi futsua shuhua naratashon ihuunifo Jesús caya huamanon. <sup>4</sup> Iquimapaiifiacaquin yorahuanrasi pushu fospiano iquimanifoma. Ascashon pushu fomancayan tapa tsucashon Jesús nia naman fotomacacufoannifo. Nanno yorahuanrasi nastui shuhua ya ratapacufoannifo. <sup>5</sup> Jesús oian nan nocofunu yoratishon charishi futsua ahuun yorafoan fasi icoinra huaifoan. Oinquin a yoratishon charishi futsua yoini, —Uhuun yorashta, mun mia chaca soashona, —huani.

<sup>6</sup> Ascano Moisés cununi cuscan tapimamisifo nanno tsoafo ini. Aton nomuran shinancani, <sup>7</sup> —¡Ajaa! ¿Ahuuscain na nocofunun anori yoimun? Diosin fustitofin chaca soatiroquin. Nocofin fuparaniquin. “Un Diosiran,” ishon. Anori yoiquifin “Upa Diosin chaca huaiquin,” —ishon aton nomuran shinannifo.

<sup>8</sup> Ascaifoan shinainfo cuscan Jesús onanshon ato isca huani, —¿Ahuuscaquimun maton nomuran amaquiri man shinaincain? <sup>9-10</sup> Unfin Cristoquin un yorafo aton chaca soashotiroquin. Un chaca soafain un ahuamamishti huatiro un mato oinmanicain. Upa Diosin ua catoan. Ahuunshonfin un yorafo aton chaca soashotiroquin, —ishon ato yoini. Asca huatan nocofunu yoratishon charishi futsua yoini, <sup>11</sup> —Min pushu ano min shuhua ya funicaitahuun, —huani. <sup>12</sup> Asca huatanaino nanno icafoti aton ointaifi funinaca huantan ahuun shuhua chishtofaini cani. Ascacainaiton oincani nantifi yoinain futsunifo, —¡Aira! Diosin ahuamamishti huatiroquin. Noncai iscara oinyomisima. Diosin sharaquin, —icashu yoinannifoquin.

—*Uqui ohuu. Ua tanamisi ishquin, —Jesús Mateo huani*

*Mt 9.9-13; Lc 5.27-32*

<sup>13</sup> Jesús nansacaini afanan ian cusumunri caino yorahuanrasi afanan aquí funifo. Ascano ato yosini. <sup>14</sup> Ian cusumun cahuanquin Alfeopan facu ahuun anu Mateo Jesús oinni. Nanton niaifo pui fishofafainmisi. Pushu facu muran tsoafo ini. Ascaiton Jesús a yoiquin, —Uqui ohuu. Ua tanamisi ishquin, —huani. Asca huaino funinaca huatan afu cani.

<sup>15</sup> Ascaino Mateon Jesús yafi afu rafumisifo ya ahuun pushu ano iyonni ato pimashquin. Niaifo pui fishofafainmisifo non Moisés cununi cuscan tapificashon tanapainifoma Jesús fu foanfainmisifo ahuun tsain nicapaicani. Afori Mateon pushu muran iquinifo ato futan pishcaquin.

<sup>16</sup> Ascano Moisés cununi cuscan tapimamisifo nanfofin Fariseofo iniquin. Oincaquin Jesús tanamisifo yoini, —¿Ahuuscain Jesús na niaifo pui fishomisifo yafi Moisés tsain tapimafiacashon tanapainifoma futan piimun? —huanifo.

<sup>17</sup> Ascaifoan nicaquin Jesús ato cumani, —A isinincaifoma caya huamamitsamisi yopacanima. Ascan nan isinincaifoti fasi caya huamamitsamisi yopacoincani. Ascarifi aquin, “Uncai ahua chaca huamamitsamaran,” icaifoan un aton chaca soashotiroma. Ascan, “Unfin fasi chaca huamisiquin. Un imisi cuscan un afanan apaimaran,” icaiton un ato yoitiro, “Uqui fucahuun. Un maton chaca soashotiroran,” —ishon Jesús ato yoini.

*Piqui tunumisifohuunoa Jesús yocanifo*

*Mt 9.14-17; Lc 5.33-39*

<sup>18</sup> Ascano iyoco futsaino nan Juanhuunshon tanamisifo non Fariseofoan piqui tununifoquin. Ascaiton futsafoan Jesús yocanifo, —¿Ahuuscain

Juanhuunshon tapimisifo futan Fariseofoanri piqui tunufiaino minhuunshon tapimisifoancai piqui tunucanimamun? —ishon yocaifoan.

<sup>19</sup> Jesús ato cumani, —Yora unimaifoancai chaca shinancanima. Ascacucaí piqui tunutirofoma. Funun ato chani huafoanricai piqui tunutirofoma. Fununmain ato fucunfin. Ascaino unimacaquin. <sup>20</sup> Ascafiaino funu chipo atomaqui cano shinancaquin piqui tunutiroforan, —ishon Jesús ato yoini.

<sup>21</sup> Tsain futsari ato yoini isca huaquin, —Camisa shunishta fashnucun funa potonun icushumua potó funa chopi futsuashu camisa fasi uhuai finacointiro. Tsoancai afanan ascara icushpaitiroma. Nanscarifi aqui un mato tsain funa yosian cuscan nicacoinshon man apaoni cuscan man afanan apaitiroma. Tsoan ua tanacoinshocai apaoni cuscan huatiroma. Ascashu funa cuscara shara itiro. <sup>22</sup> Nanscarifi aqui tsoancai fichi tutso shuni muran vino funa a muran manutiroma. Toshacainaino fichi tutso chacanatiro. Vinori cuyofotiro. Nanscarifi aquin maton shunicaifoan mato yosimisi cuscan yafi un mato yoiai cuscan nan rafucaí ositiroma. Un mato yosiain cuscacoin nannori. Diosin tsain shara. Ascan maton shunicaifoan yosia cuscacai anorima. Anori tanashucaí Diosin mato imapaiyai cuscan man atiroma. Nan rafu osishon nicapaiquicai man shinansharatiroma. Vino funa fichi tutso funa muran manua shara itiro. Nanscarifi aquin ratoranfoan apaoni cuscan unutan un ato tsain funa yosiain cuscan fusti tanacointirofo Diosin ato funa shara imatiroan, —ishon Jesús ato yoini.

*Tunutitianhuunoa Jesús ato yosini*

*Mt 12.1-8; Lc 6.1-5*

<sup>23</sup> Ascatan Israelifoan aton tunutitian Jesús yafi ahuunshon tapimisifo mau mapai fucaquin trigo mutuscashon fonicoincaquin piainfoan. <sup>24</sup> Fariseofoan oincaquin Jesús yoinifo, —¡Oincapon! ¿Ahuuscain nocon shuni Moisés yononi cuscacai man aima? Tunutitian trigo man mutuscانran, —huaifoan.

<sup>25</sup> Ascaiton Jesús ato cumaquin, —¿Davidhuunoa cununi cuscan man oinmisimamun? ¿Fonainquin nocon shuni David afu rafuafo futan ani cuscan man nicamisimamun? Nicacapon un mato yoinon. <sup>26</sup> Abiatar nocon yorafohuunshon Dios cufimisi niaifocoin ini. Nantianri David yafi afu rafuafo Diosin tsain cufiti pushu muran iquinifo. Iquicatan amurannoa misifo ato piquini fasi fonicoinquin. Tushu futsa yamaino, misifofin nan nocon yorafohuunshon Dios cufimisi niaifocoinnaasi ini. Tsoa futsan pitiroma. Nannori yonofiani fasi fonicoinquin David pini. Ascashon afu rafuafori pimani.

<sup>27</sup> Ascan un mato yoinon. Upa Diosincai nunori shinannima. Isca huaquin, “Un tunutitian yonoyonon. Chipó un yorafo onihuai tunutitian yonononfomaran,” ishón anori shinannima. Ascátama Upa Diosin yorafo shara huapaiquin Moisés yoini isca huaquin, “Ato yonohuun semanantifi shafa fusti yonononfoma. Tunuyononfo ua shinancaquin,” ishón Upa Diosin yoini. <sup>28</sup> Ascacun un yoitiro ahuuscain tunutitian man atiroquin. Uafin Upa Diosin catonniquin, —ishón ato yoini.

### 3

*Jesús tunutitian nocofunu musufimua cayahuani*

*Mt 12.9-14; Lc 6.6-11*

1-2 Ascatan tunuti futsaino Jesús Israelifoan aton ichananti pushu muran iquini. Iquicun Fariseofo yafi Moisés cunu tapimamisifoanri Jesús aasi oinnifo ahuuscashomain nocofunu musufimua tunutitian caya huaicain. Ahuunoa ahuara chaca yoipaicaquin. <sup>3</sup> Ascan Jesús a nocofunu musufimua yoini. —Aton ointaifi nuno nihuu, —huani. <sup>4</sup> Ascaino nocofunun ato nishoni, —Un mato yocain man ua cumatiro-mainquin. ¿Raquiri Moisés tsain noco yonoamun? ¿Tunutitian non ahuaa huatiromun? ¿Nonraca sharatiro? ¿Nonraca chacatiro? ¿Tunutitian non yora cayahuatiromun? ¿Yora isinin icai oamun non cayahuaimun? Non caya huamama natiro. Noco huun nutiro. ¿Non rutua shinantsain? ¿Ascamin shara? —ishon ato yocani. Ascafiaino puusinifoma.

<sup>5</sup> Ascatan sinaquin ato oiancutan ahuun nomuran fasi shinain, — ¡Ohuashta! ¿Ahuuscashon aton nomuran shinanchacamisifomun? Ua icoinra huacatama, —ishon shinanni. Ascashon a nocofunu musufimua yoini, —Min mucu mushan huahuun, —huaino. Yonoa cuscan mushaniquin. Ascashu ahuun mucu huma sharacoin iriscatani. <sup>6</sup> Ascaino Fariseofo amaquinoashu Herodes ahuun yorafo ano fonifo, — ¿Ahuuscashomain non Jesús achimanain rutunonfo? —icashu yoinannifo.

*Jesús fu yorahuanrasi ian cusumun fonifo*

<sup>7-8</sup> Ascatan Jesús yafi afu rafumisifori nannoashu ianmanhuan Galilea ano fonifo. Foaifoanno yorahuanrasi Jesusqui funifo. Galilea anoashu fuaifo Judea anoashu fuaino Jerusalén anoashu fuaino Idumea anoashu fuaino unu Jordán chaimashta icaforti fuaino Tiro yafi Sidón anoashuri aqui funifo. <sup>9-10</sup> Yora ichapa caya huamamisi tapicanashu isinincaifo ichaparasi aqui funifo. —Norifi non Jesusqui mupiasu non cayatiroran, —icashon shinannifo. Jesús oinquin afu rafuafo yoini, — Ua shasho fushocahuun. Ipaishoma un yopaicai. Yorahuanrasiton ua yuruatiroquin, —Jesús huani. <sup>11</sup> Yora yoshin chacafo atohuun nuafu Jesús fuchicatan fuopacufuannifo. Ascashon yoinifo, —Minfin Diospan facuquin, —huaifoan. <sup>12</sup> —Tsainyamacahuun. Un Diospan facuqui tsoa yoiyamacahuun, —ato curushcai huaniquin.

*Jesús afu rafuafo tanamisifo doce catoan*

*Mt 10.1-4; Lc 6.12-16*

<sup>13</sup> Ascatan Jesús machi mapufaitan afu rafuafo cunani, —Uqui fuchahuun, —ato huani. <sup>14</sup> Aquí fuafoan doce catonshon ato yoini, —Man uhuun yonomisifo itiro ufu rafufafaincahuun. Un mato nichicai man yorafo Upa Diosin tsain ato yoinon. <sup>15</sup> Un mato yonoshqui uhuunshon yoshin chacafo futsafuhoon nuucun atomaquinoa man potatiroran, —ishon ato yoini. <sup>16</sup> Nan doce Jesús catonni afoan aton anufo un mato tapimanon. Futsan Simonfiacun ahuun anu futsan Jesús tuqui huani Perdo. <sup>17</sup> Futsafo Zebedeo facu rafa Santiago yafi Juan. Aton anu tuqui huani Moanurquisi, onicoinnin tsainmanfin nocofunufu curushcain nan turuica cuscara. <sup>18</sup> Futsanfoan aton anu Andrés non Felipe non Bartolomé non Mateo non Tomás non Alfeopan facu Santiago non Tadeo non Simón futsan nanton fasi Diosin tsain tanasharacoinpaiyaino. <sup>19</sup> Futsan ahuun anu Judas Iscariote nanton Jesús potashon ato achimani.

*Jesús yafi Satanás*

*Mt 12.22-32; Lc 11.14-23; 12.10*



<sup>20</sup> Ascatan Jesús yafi afu rafuafo pushu muran iquinifo. Iquiano yorahunrasi a nicapaicani aqui funifo. Ascano ato yosiaino a futan afu rafuafoan ahua piinifoma. <sup>21</sup> Ascano ato yosifaiquin, yosifaiquin huaiton. —¡Uru! Jesúsfin nison cuscaracoquin, —icashu ahun yoinannifo. Acaifoan nicai ahun yorafo funifo. Ihuipaicani.

<sup>22</sup> Asca Moisés tsain tapimamisifori Jerusalén anoashu nicapai aqui funifo, Ascashon yoicaquin —Jesusfin Satanashuunshon ahuarafu huaiquin. Satanás yoshin chacafoan aton niaifo. Ahuunshon noco-funumaquinoa yoshin chacafo potairan, —ishon yoinifo.

<sup>23</sup> Ascano Jesús ato cunani. Ato ahua futsafohuunoa yoishquin ato tapimanon. Yoini isca huaquin, —¿Ahuuscashumain Satanás afiri potatiroquin? <sup>24</sup> Caifofo afi ranan rutunain cuyotirofo. <sup>25</sup> Yorafori afi ranan rutunain cuyotirofo. <sup>26</sup> Nanscarifi aqui Satanás afin ahun yoshin chacafo potaino arifi funotiro. Asca huaino ahun yono chaca-natiro arifi cuyotiro. <sup>27</sup> Shinacapon. Noco-funu mutsisipacoinin ahun pushu cushuanocai tsoa iquitiroma ahun mafo onunshquin. Ascafi-aino rufofo achifain munushushon ahun mafo onutiro, —ishon Jesús ato yoini. <sup>28-30</sup> —Jesuscai Diospan Yoshin Sharahuunshon yorafo caya huamama yoshin chacahuunshon ato caya huamaran, —ishon yoinifo. Ascafiaino Jesús ato yoini, —Icon un mato yoinon. Ua nicacahuun. Ratoran futsan futsafo tsain chaca huafain Diosquiri chaca huacun Upa Diosin nantifi chaca huua cuscan rau huashotiro. Ascafia tsoan Dios nicacasmaiton yoiquin isca huatiro, “Naton aca cuscan Satanashuunshon acaran,” huafiaino Diospan Yoshin Sharahuunshon atiro. Nanton Diospan Yoshin Sharahuunoa tsain chaca huacun Upa Diosin ahun chaca rau huanacama. Chaca huua cuscan ahun nuupacunacaran, —ishon Jesús ato yoini.

*Jesús ahua yafi ahun chipocufo*  
Mt 12.46-50; Lc 8.19-21

<sup>31</sup> Ascano Jesús icano ahua yafi chipocufo noconifo. Pushu fospiaifono chifishon niafo futsa amuran nichini a yoinonfo. <sup>32</sup> Yorahunrasiton cufuacunifo. Ascano futsan yoini, —Min uhuan futan ushto rananun chifi nishon mia ahua yoipai fuaforan, —ishon yoiaiton. <sup>33</sup> —Un mato tapimai ratofomain uhuun uhua yafi uhuun ushtofuquin, —ishon ato yoini. <sup>34</sup> Ascano cufuacufoannaifoan ato oiancufainquin, —Nafu uhuun uhua cuscarafu yafi uhuun ushto cuscarafuquin. <sup>35</sup> Uhuun Upa Diosin ato amapaiyai cuscan afofin uhuun ushtofu cuscara non uhuun chicofu cuscarafu non uhuun uhua cuscarafuquin, —ishon Jesús ato yoini.

## 4

*Ushu saamisihuunoa Jesús ato ahua futsa yosini*  
Mt 13.1-9; Lc 8.4-8

<sup>1</sup> Ascano iyoco futsaino ian cusumunshon Jesús ato yosiaiton nicacani yorahunrasi funifo. Fuaifono shashon naqui nanupacucahuan cushan camaqui tsaoshon ato yoini. Ascaino ian cusumun maponifo ahun tsain nicacani. <sup>2</sup> Ahun tsainman ato ichapa yosini isca huaquin, <sup>3</sup> —Uhuun yoramishtichin ua nicasharacahuun un mato yoinon. Noco-funun ahun noshati murannoa fimi ushu fishon ahun mau mamaqui. <sup>4</sup> Saacano ushufo fai nushmancayan pacua puiyafuquin piinifo. <sup>5</sup> Ushu

rananri toquiri camaqui pacua maima ano pacuni. Samamashta ushu foaicano <sup>6</sup> farin tsacaqui yositima huani.

Ascano nani. Ahuun tapo chaimashta foanno fanafo nai cuyoni. Tsasi futsuni. <sup>7</sup> Ushu rananri tasha murannoashu foaisharanima. Ascatari fiminima. <sup>8</sup> Ascan ushu rananri mai shara ano saaca. Foaisharashu fimini. Futsa foasharashu treinta ahuun fimi icaino ushu futsa sesenta ahuun fimi icaino futsa cien ahuun fimi ini, —ishon yosini.

<sup>9</sup> Ascano Jesús ato yoiquin, —Man pafiqui yaquin ua nicasharacahuun, —ato huani.

*Jesús yorahuanrasi yoini cuscan chipo afu rafuafo shafacafi yosini*  
*Mt 13.10-17; Lc 8.9-10*

<sup>10</sup> Ascano chipo yorafo amaquinoashu fonifo. Foafono afu rafuafo doce fucashon yocanifo, —Ifon, min rama fimi ushu saamisihuunoa ahua noco tapimashquin non tapisharamaquin. Noco shafacafi yosihuu, —huaifoan. <sup>11</sup> Asca huaifoan Jesús ato cumani, —Upa Diosin a icanoshon ahuun yorafo iquinai cuscan un mato fusti shafacafi tapimai. Ascashon futsafo ahuafo cuscarahuunshon fustisi un ato yoiquin. <sup>12</sup> Nicasharaifoan Upa Diosin aton chaca soashocuana ato rau huashquin. Ascan oinfiaquicai tapitirofoma. Nicafiaquicai tapitirofoma. Tapicashon aton chaca shatucuanafu Diosin tsain icoinra huashquin. Ascaiton un aton chaca soashocuana, —ishon ato yoini.

*Jesús ushu saamisihuunoa ato tapimasharani*  
*Mt 13.18-23; Lc 8.11-15*

<sup>13</sup> —¿Nanfo un saamisihuunoa ahua futsa ato tapima cuscan man nicayamaiton ahuscashomun man tsain futsafori nicatiroquin? <sup>14</sup> Nicasharacahuun un mato tapimanon. Nan ushu saamisi Diosin tsain yomisi cuscara. <sup>15</sup> Ushufu fai nushmancayan pacua puiyafu samamashta piinifo. Nanscarifiai Diosin tsain yoimisiton aton nomuran nanupaifiai aton nomuran fai curush cuscaracoin. Ascan Satanás ato tsain futsa yoiquin afanan Diosin tsain nicanonfoma ahuun ointi muran funomana.

<sup>16-17</sup> Ascan futsafoan aton ointi toquiri cuscara. Ushu toquiri camaqui pacuni anoashu ahuun tapo chaimashta foanno samamashta fanafo nai cuyoni. Tsasi futsuni. Nanscarifiai futsafoan Diosin tsain tau huaquin nicaiyoi unimacoinfashon samamashta ahuun tsain cachiquiri huatirofo. Diosin tsain nicafiacatan aton nomuran nanucoianfoma. Ascan ahua chaca finonshon iyamarai omitsicaifoanno afanan Diosin tsain nicapaitirofoma. Dios afanan tanapaitirofoma. <sup>18-19</sup> Ascan un mato yoiyai cuscan ushu futsa tasha muran foaicashu foaisharanima. Nanscarifiai futsafoan Diosin tsain nicafiyai chipo ahua futsa chaca shinanquin. Shinanchacafain pui ichapa noifain, “Un pui ichapayashuraca un ishariatiroatin,” ishon amaquri shinanquin. Diosin tsain afanan shinainma. Ascano Diosin tsain nicafiaquin ahua futsa shinaintocai ahua Dios ashotiroma.

<sup>20</sup> Ascanfiaquin ushu futsafoan mai shara ano saacano foaiquin yosishu man fimi ichapa ya. Nanscarifiai futsafoan Diosin tsain nicaicoinpaquin ahuun tsain aton nomuran nanucointiro. Futsan ahuun tsain nanusharaino Diosin yoini cuscacoin atiro. Futsanri ahuun tsain nicacoinquin finacointiro. Futsanri fasi mima huacointirotan, —ishon Jesús ato yosiniquin.

*Jesús lamparinahuunoa yoi cafiscani**Lc 8.16-18*

<sup>21</sup> Ascano afanan ahuaara futsan ato yosiquin isca huani, —Tsoancai faquishiaino oinpaiquin lamparina otashon cutipan fupotiro. Tsoanricai oshati nanman huatiroma. Ascata tapa camaqui huatirofo shafacafi oinsharanonfo. Nanscarifiai Diosin nocon imapaiyai cuscan apaquicai non ahuan tsain casho muran iyamarai raniran futsa non onutiroma. Ascata shafacafi oinsharatiro Diosin yoia cuscan huafain. <sup>22</sup> Ascashon non shinanmisi cuscan noco nantifi Diosin puashoshquin. Tsoancai afanan ahuarashta fomantiroma. Diosin nantifi yorafoti aton ointaifi puashoyoshquin. <sup>23</sup> Man pafiqui yaquin ua nicasharacahuun.

<sup>24</sup> Ascacun oinfain. Uhuun tsain nicasharacahuun. Amaquiri nicayamacahuun. Un mato yoia cuscan aashquin. Ascaquin man fasi uhuun tsain tapicointiro. <sup>25</sup> Asca tsoan uhuun tsain nicasharai ahuan nomuran nanucoiainno Upa Diosin mima huacoinquin tapimashquin. Ascan tsoan uhuun tsain nicaifai un yoia cuscan aiyamashu nan cuscarafonantifi funocani. Upa Diosin funomanano ahuashtayacanimaran, —ishon Jesús ato yoini.

*Jesús ushuhuunoa yoicoin cafiscani*

<sup>26</sup> Ascatan afanan ahuaara futsan ato yosini. —Ahuu cuscaramain Upa Diosin nantifi iquinaquin un mato yoicain. Nocofunun ahuan mau ano ushufo fana. <sup>27</sup> Shafatifi non yamutifiri nan ushufo foaicaino yosishara. Ascan mau ifoancai nan ushufo foaimatiroma shafatan yafi yamuri afi yositiroquin. Ahuuscashumain afin foaitiroquin non tapiama. <sup>28</sup> Mai muran ushu foanno iquisi ahuan tapo foaitiro. Ascashu chipo shuqui fimi ya itiro. Ahuan unutani shuqui choshitiro.

<sup>29</sup> Ascan shuqui choshiano mau ifoan shuqui samamashta chituntiro. Nanscarifiai tsoa icoinra huamafoan icoinra huacani itisharacani samamashta Diosin mai ano nocotiro nantifi iquishquin, —ishon Jesús ato yoini.

*Jesús ihui mostaza ushuhuunoa yoicoin cafisca huani**Mt 13.31-32; Lc 13.18-19*

<sup>30</sup> Ascatan afanan Jesús ato yoiquin isca huani, —¿Ahuuscashomain un mato yositiroquin Diosin ahuan yorafoti yonofain iquinaquin? ¿Rato tsain futsacaimun un mato yosicain man tapinon ahuu cuscaramain Upa Diosin nantifi iquinaquin? Ua nicacahuun. <sup>31</sup> Mostaza ushu uhuapamashta. <sup>32</sup> Ascacia yosiashu fasi uhuapacoin itiro. Rato ihuicai mostazatioma. Ahuan tushpafari fasi uhuapacoin. Ahuan tushpahuu puiya futsa futsatapafo tsaotiro. Nanno mostaza ahuan puifoon ahuan tushpafo ihuaquin futsa fari tsacanoma. Nanscarifiai Diosin icoinra huaafo tau huaquin ichapamaton nicayotirofo. Chipofasi ichapafain tanacointirofo Diosqui nocosharashcaquin, —ishon Jesús ato yoini.

*Jesús tsain futsahuunoa ato ahuarafoyosini**Mt 13.34-35*

<sup>33</sup> Ascatai tsain futsahuunoa ichapa ato yoini ato tapimanon. Afohuunshon ato Diosin tsain tapimani. Tapitirofo cuscan ato tapimani. <sup>34</sup> Ahuarafoto yosipaini tsain futsahuunoa nanfotisi ato yoini. Ascacia chipo afu rafumisifo atotisi tsain futsahuunoa shafacafi ato yosini.

*Nihuu yafi ian fuchomanhuanri Jesús ahuun tsainmanshi nishma huani  
Mt 8.23-27; Lc 8.22-25*

<sup>35</sup> Ascatan man fari caino Jesús afu rafuafo yoini, —Ianmanhuan oquiri non fonon, —ato huani. <sup>36</sup> Ascaino yorafomaquishon afu rafumisifoan Jesús ianmanhuan oquiri iyonifo. Chipo atrifiton mufainifo. <sup>37</sup> Shashon pocuaifono atoqui fuuhuan noconi. Fuchomanhuaino unu fospini. <sup>38</sup> Ascaino Jesús shasho tsispacamaquinoashu oshano afu rafumisifoan moinnifo. —Nocon tapimamisiton moihuu. ¿Min noco shinainmamun? Man non asai futsuicai, —ishon moinnifo.

<sup>39</sup> Asca huaifoanno moinacahuatan ninacahuan fuu nishma huani. —Fuun nishmahuu. Fuchomanhuan pusiyaamahuu, —Jesús huani. Asca huaino fuun nishmafainaino ian pusiquima racani. <sup>40</sup> Afu rafuafo yoiquin isca huani, —¿Ahuuscain man ratu ain? Un ahuamamishti huatiro mancai icoinra huataimacai, —ato huani.

<sup>41</sup> Ascaino aton nomuran fasi shinancani, —¿Aira! ¿Ahuu cuscara nocofunushonmun nocon Ifon? Na fuuhuan yafi ian fuchomanhuan nan yoiai cuscan huaaquin. Man nishma hua, —icashu afu rafuafo yoinannifo.

## 5

*Nocofunu yoshin chacafo ahuun nuucun Jesús caya huani  
Mt 8.28-34; Lc 8.26-39*

<sup>1</sup> Ascano ianmanhuan pocufainifo. Gerasafoan aton mai ano fonifo. <sup>2</sup> Nocotan Jesús mapufaini. Ascaino nocofunu yoshin chaca ahuun nua aqui noconi. Mahua quini muran naafo mai huapaonifo murannoashu aqui noconi. <sup>3-4</sup> Nan nocofunu mahua quini muran ipaoni. Yorafoan cunopan munushfain onushfain huafiafo cuno tusaqui futsani. Tsoan afanan achitiroma munushfain onushushquin. <sup>5</sup> Yamutifi yafi shafat- ifiri mahua quinifo muran icain machi ano cahuacacaipaoni. Nannoashu toquirinin afiri tsacai futsuni fiisiyanan.

<sup>6</sup> Jesús chaicunoa fuchitan aqui ichoni. Ichotan fuopacucahuatan. <sup>7-8</sup> Ascano Jesús yoini, —Minfin yoshin chacacoinquin. Na nocofunumaquinoashu catahuun, —huaiton. —¿Mian ahuusca huapaimun, Jesús? Diosin nai muran icaton ahuun Facufin minquin. Diosinhuunshon yoihoo min ua omitsisca huamashquima. Yoipun, —nocofunun yoshin chaca ahuun nuaton yoini.

<sup>9</sup> Ascaino amaquinoashu cataima Jesús yocani, —¿Min ahuunumun? —ishon yocaiton. Yoshin chacanun cumani, —Uhuun anufin ichapaquin. Urus fusticai na nocofunu muran un icama. Un fu yoshin chaca ichaparasi amuran ica. <sup>10</sup> Mai futsa ano noco nichiyamapun, —huariani.

<sup>11-12</sup> Na machi mananunshon yahua inafoan picaniquin. —Ato muran noco nichipun, —yoshin chacafoan huaifoan. <sup>13</sup> —Yahuafo muran fotacahuun, —Jesús ato huani. Asca huatanaino nocofunumaquinoashu dos mil yahuafo muran fonifo. Yahuafohuun nuui focani. Ascaino nantifi yahuaahuanfo ian muran maocofainni. Ascashu asai futsunifo.

<sup>14</sup> Ascaifoan oinfainceni yahuaahuanfo cushumisifo ichonifo. Pushurasi ari chani focani. Pasohuatofori chaninifo. Ascaiton nicacani yorahuanrasi yahua asai futsua oinpaicani funifo. <sup>15</sup> Fucaquin oianfo Jesús yafi nocofunu ahuun yoshin chacafo a muran imisi tsaoa ini man amaquinoa Jesús yoshin chacafo potano. Afanan

imisi cuscan chitoria inima. Man sahuuti sahuua. Afananricai nison inima. Shinansharacoinni. Ascaiton oincani ratucoinnifo. <sup>16</sup> Ascashon atirifoqui chaninifo nan oianfo cuscan huafain chaniaifoan. <sup>17</sup> Nicacaquin Jesús isca huanifo, —Nocon mai anoashu catapun, —huanifo.

<sup>18</sup> Asca huaifono Jesús shashon nanucaini cani. Nanuataima, —Uari iyoicapun. Un mifu capaica, —a yoshin chaca amaquinoa potaton huaiton. <sup>19</sup> —Ma. Min pushu ano cashon min yorafo yoitahuun. Upa Diosin mia ashoan cuscan huafain minhuun ramapaia cuscan ato yoitahuun, —huani. <sup>20</sup> Asca huaino cashon Jesús aca cuscan mucu rafuti pushurasi ano yoifoanfaini. Ascaiton nicacani, —¡Aira! ¡Nicacapon! Tsoan anori nicayomisimaran, —icanashu nantifi yoinannifo.

*Jairo ahuun ainfacu naafiacun Jesús funinini non ainfoan Jesús ahuun sahuuti muuanshu cayani*

*Mt 9.18-26; Lc 8.40-56*

<sup>21</sup> Ascatan Jesús fu afu rafuafo afanan ian mahuan pocufurannaino yorahuanrasi cusumun aqui noconi. <sup>22</sup> Ascaifono Judiofoan ichananti pushu anoa aton niaifo ahuun anu Jairo Jesús fuchitan fuoshopacuc-ahuaquin yoini, <sup>23</sup> —Uhuun facushta isinin ishoinquin. Uhuun pushu ano ufu capun. Uhuun facushta ua maiatashoshquin cayanon, —huani. <sup>24</sup> Ascatan cani. Ascaino yorahuanrasi afu fonifo. Focani fasi yuruinfainifo. <sup>25</sup> Nannori ainfo imi imitiani atofu cani. Doce fari man aqui caano nusuyamacai. <sup>26</sup> Doctor rasi ano cata cataquin nantifi ahuun pui ato inanquin anaitini. Ascafiashu cayatamarocon finacoinni.

<sup>27</sup> Ascano Jesushuunoa yoiaifoan nicaquin ainfoan acachorishon ahuun sahuuti muunniquin cayashquin. <sup>28</sup> —Un ahuun sahuuti muuanshuraca un cayatiroati, —ishon ahuun nomuran shinanni. <sup>29</sup> Ascatan aqui mupiashu imi shatariscatani. Afanan isinin inima.

<sup>30</sup> Ascano Jesús ahuunoashu ainfo cayano yorahuanrasi muran ifiacucahuan ato yocani, —¿Tsoan ua muamun? —ishon ato yocani. <sup>31</sup> Ascaiton cumanifo, —¿Min oianmamun yorahuanrasiton mia yuruacafo? ¿Ahuuscaquimun min noco yocaicain? —a fu rafumisifoan huanifo. <sup>32</sup> Ascaifono Jesús ato oiancuni, —¿Tsoan ua muamun? —ini tapipai. <sup>33</sup> Ascaino ainfo man caya huua tapiashu ratui fuopacucahuaquin. Nantifi ahuunoa imisi cuscan yafi ramashta acai cuscari yoiniquin. <sup>34</sup> Nicaquin yoini, —Achishtan, mian icoinra huashu min cayaquin. Ratuyamahuu. Min ointi muran unimahuu. Min afanan omitsiscaimacai. Min pushu ano casharatahuun, —ishon Jesús ainfo yoini.

<sup>35</sup> Jesús tsaincaino Jairo pushu anoashu futsanfo aqui fucashon yoinifo, —Min facu man naaquin. Non ahuusca huatiromaquin. Nocon tapimamisi afanan catima huayamahuu, —ishon futsanfoan Jairo yoinifo.

<sup>36</sup> Jesús Jairo yoini, —Aton tsain nicayamahuu. Ratuquima. Ua fusti icoinra huahuu, —ishon Jesús yoini.

<sup>37</sup> Ascano Jesús yorahuanrasi nichitan, —Pedro non Juan non Santiago non atiri ufu fucahuun, —ato huani. <sup>38</sup> Ascatan Jairo pushu ano nocoquin nica amurannoashu uaicani shorarascanifo manocani. Ascaiton Jesús oinni. <sup>39</sup> Ointan pushu muran iquicaitan, —¿Ahuuscaim shorarascainmun? Na facuca naamafinquin. Oshafinquin, —ato huani. <sup>40</sup> Ascaiton osanifo. Osaifoan ato chifi caimatan apa yafi ahuu

non afu rafuafo rafu non fusti cunu futsa muran ato iyoni. Nanno shoto-cofacu doce fari aqui caa. Raca ini. <sup>41</sup> Jesús shotocofacu mutsoinifoan yoiquin, “*Talita, cum.*” Onicoinnin tsainmanfin “*Facushtan, funinaca huanhuun,*” huaino. <sup>42</sup> Samamashta funinaca huanaino apa yafi ahua mustairinifo. Ascatan, —¡Aira! Nocon facushta afanan man funia. Oian-maquicai non icoinra huacuanamaran, —icashu yoinannifo. <sup>43</sup>—Maton facu man naacoinfiacun un funimana tsoan yoitama piimacahuun, — Jesús apa yafi ahua yoini.

## 6

*Nazaret anoafoancai Jesús pushconi anoshon icoinra huanifoma*  
*Mt 13.53-58; Lc 4.16-30*

<sup>1</sup> Ascatan Jesús afu rafumisifo ya anoashu pushurasi ano nasonifo. Nannoashu Jesús pushconi. <sup>2</sup> Ascano Israelifoan aton tunutitian Jesús aton ichananti pushu muran iquishon ato yosiaiton. Nicacani, —¡Aira! ¡Nicacapon! ¿Ahuuscain na nocofunun fasi tapicoín sharamun? Tsoan oinyomisima cuscara huapaiquifin ahumamishiti huatiroquin. ¿Tsoan-con Jesús ascara yosiamun? <sup>3</sup> Nanfin ihui yonomisiquin. María facu. Chipocufo Santiago non José non Judas non Simón. Ahuun poifori nuno no fu imisifo. Nonfin Jesús onanquin. Acai ahua. ¿Ahuuscashomun ahumamishiti huatiroquin? —icashu yoinannifo. Nannori shinancashon aqui shinanchacanifo. Acai cuscarocon huacani. Afanan Jesús nicapainifoma.

<sup>4</sup> Ascano Jesús ato yoini isca huaquin, —Nan maitio Diosin tsain yoimisi nicatirofo. Ahuunoa yoisharamisifo. Nan cainni anofo non ahuun yorafoancai nanfoansicai nicapaicanimaran, —ishon ato yoini. <sup>5</sup> Ascano isinin icaifo fustirasi manmanshon ato cayahuamani. Futsafori cayahuamapaifiaquin icoinra huayamaifoan anima. Diosihuunshon toa futsan atiroma cuscan ato ashopaifiaquin anima. <sup>6</sup> —¡Aira! Ahuuscain ua oinfiamisishaquin ua icoinra huapaicanimaran, —ishon Jesús shinanni. Ascaiton pushurasiti Israelifo icano cahuancacaini ato Diosin tsain shara yosin.

*Jesús afu rafuafo doce ato nichini*

*Mt 10.5-15; Lc 9.1-6*

<sup>7</sup> Ascatan afu rafuafo doce cunani, —Uqui fucahuun, —ato huaino. Aquí fuafoan ahuunshon yoshin chacafo yorafohuun nuucun atom-aquinoa potanon. Ascashon ato rafurasisi nichini yorafo caya huanonfo.

<sup>8-9</sup> Ato nichiataima ato yonoquin isca huani, —Maton tushu foyamafain maton forusari foyamafain puin foyamafain maton sapató nan man sahuua fusti fofain maton sahuuti nan man tsahuua fusti ya fotacahuun. Poquiti fusti ya fotacahuun. <sup>10</sup> Pushurasi muran nocotan nan pushu fusti muransi oshacahuun. <sup>11</sup> Pushu futsan icanoafoan yafi pushurasi muran icanoafori mato iquimapaiyamaino iquiyamacahuun. Mato nicacasmaifoan maton sapató potapota sacaquin. Asca huaquin man oinmatiro mato nicacasmaifo. Ascan Diosin tsainri nicacasmaicaniran, —ishon Jesús ato yoini.

<sup>12</sup> Ascano ato yoiquin anaitiano pushurasiti anofo ato yoifoan-fafainifo. —Maton chaca shatucahuun Diosin tsain nicasharacahuun, —ato huaifoan. <sup>13</sup> Yoshin chacafo yorafohuun nuucun atomaquinoa

potanifo. Isinincaifori shuniyashon fumanfain Upa Dios cufishonifo Jesushuunshon caya huafoanfainifo.

*Juanpan nan yorafo unu muran iquimapacumisi nani cuscan*  
Mt 14.1-12; Lc 9.7-9

<sup>14-16</sup> Ascatan Jesús ahuamamishti atiro cuscan nantifi yora nicacani. Ahuunoa yoifoanfaini. Atirififoan yoinifo, —Jesusfin Juanquin nan ato unu muran iquimamisiquin. Afanan man funia. Ascacufin tsoan atiro ma cuscan Jesús Diosinhuunshon ahuamamishti huatiroran, —icashon atirifiton yoinifo. Atirifoanri yoiquin, —Jesusfin Eliasquin, —huanifo. Atirifiton yoini, —Jesús Diosin tsain yoimisiquin. Nocon caifo Diosin tsain nocon shunifoan yoini cuscan Jesusri nansacoin huaquin yoiaran, —ishon yoinifo. Ascano niaifon Herodes afo nicashon yoini, —Naanfin Juanquin. Mun tushtufiati afanan funiaran, —ishon yoini.

<sup>17-18</sup> Juan Herodes rutuataima yoini, —Niaifon Herodes, min ushto Felipe ahuin, Herodias, min fian. Ascan mincai shara huama. Nocon shuni Moisés noco Diosin tsain cunushoni cuscan isca huani, “Futsan ahuin min fitiromaran,” ishon Moisés cununiran, —ishon Juanpan Herodes yoini. Anori nicacasmaquin ahuun ranushumuafon yononi Juan achishon cunu muran iquimanon. <sup>19</sup> Herodespan ahuin Herodiasin nicani Juanpan ahuunoa yoiaiton nicai aqui fasi sinai. Rutumariscapaifiaquicai ahuun funu Herodes, —Ma. Mincai Juan rutumatromaran, —ishon yoini. <sup>20</sup> Juan nocofunu shara Dios tanasharamisi niaifon Herodes tapishon cushusharani.

<sup>21</sup> Funun cushusharafiaino ahuinin ahuuscashoma Juan rutupaini. Funun cainnitian Juan rututiro punin shararan. Isca huaquin. Cainnitian ahuun niaifofo patashari non ranushumua niaifofo non niaifofo Galilea mai anoafori ichanannifo fuusishoshcaquin. <sup>22</sup> Piaifon Herodes ahuin Herodiaspan facu shomaya arusu mononi. Herodes yafi a futan piaifoan oincani fasi unimanifo. Ascano niaifoan yoini, —¡Aicho! Min monoaiton oin un fasi unimai. Ahuarashta fipaiquin ua yoihuu un mia inanon. <sup>23</sup> Diosin tapia un mia icon yoiaiton min fipaiyai cuscan ua yoihuu un mia inanon, —ishon yoini.

<sup>24</sup> Nicatan shomayaton ahua yoini. —¿Un niaifo ahua yocaimun? —ahua huaaiton, —“Juan tushtumahuu. Ahuun mapo ua inanshquin,” niaifon yoi tahuun, —ishon yononi. <sup>25</sup> Ascano shomaya niaifoqui nasoni. —Juan tushtuhuu. Purato naratashon ahuun mapo ua inanshquin. Natian ua ashoriscahuun, —huani.

<sup>26</sup> Nicai niaifon puusinima. Juan fasi shinain. Ahuun nomuran shinanquin isca huani, —¡Ohua! Un asca huapaima. Ascafia yorafoan un shomaya yoia cuscan nicacashon un asca huapaiyamafiaqui un aqui cairan, —ishon shinanni. <sup>27</sup> Ascaiton futsa yononi, —Juan tushtushon ahuun mapo ua fishotahuun, —niaifoan ranushumua yononi. Ascano cai cunu muran iquishon Juan tushtushoni. <sup>28</sup> Tushtushon purato naratashon funi. Fushon shomaya inanni. Ascano shomayaton ahua inanni. <sup>29</sup> Asca huano Juanhuunshon tanamisifoan nicacatan focashon ahuun caya mai huanifo.

*Jesús cinco mil nocofunifo ato pimani*  
Mt 14.13-21; Lc 9.10-17; Jn 6.1-14

<sup>30</sup> Ascano Jesusqui afu rafuafo afanan naso furanifo. Acafo cuscan yafi ato yosia cuscari Jesús tapimashcaquin. <sup>31</sup> Ascaifono yorahuanrasi Jesusqui furi furinifo. Ascaquin ato pitimacoin huanifo. Afu rafumisifo yafi ato yoini, —Tsoa icama ano non fonon focahuun. Anoshon non tunuyonon, —ato huani. <sup>32</sup> Ascano shashohuanun tosa icama ano fonifo. <sup>33-34</sup> Ascaiton yorafoan ato oinnifo. Ascatan Jesús yafi afu rafuafo nocoataima ian cusumunri yorahuanrasi atoqui fuainfoan oin Jesús atohuun ramapaini. Ascashon Jesús shinanquin isca huani, —Chashohuanfo cushumisioma nanscarifiai na yorafo cushumi-siomaforan, —ishon shinanniquin. Ascashon ato ichapa yosini.

<sup>35</sup> Ascano man fari caino afu rafuafoan yoinifo, —Nuno pushu yafi tushu yamai. Na yorafo nichihuun. Man fari caiquin. <sup>36</sup> Fonaincaniquin pushurasi ari yafi pushu patashari ato nichihuun anoshon tushu huanonfo, —ishon Jesús yoinifo.

<sup>37</sup> —Mafin ato piimacahuun, —ato hwaiton. —Noncai ahua ato pimatiroma. Nocofunun oshu ranan yonoahuunshon ahuun rafanan fishon nan yorafo pimashquin. ¿Nantimun non atohuunshon potaicaí? —huaifoan. <sup>38</sup> —¿Ahuuti misi man ayamun? Oinyocahuun, —Jesús ato huaino. Oinshon yoinifo, —Misi mucu fustiti yafi shiman rafusi non ayaran, —huaifoan.

<sup>39-40</sup> Nicatan Jesús ato yononi isca huaquin, —Ato yoicahuun futsano cincuenta tsaohuaifono futsa anori cien tsaononfo, —ato huani. Ascano yorafo faasi camaqui tsaocunifo. Ato yonoa cuscan tsaoshoacunifo. <sup>41</sup> Ascaino nan shiman rafu yafi misi mucu fustiti tsoomashon nai ari foisinifoantan Apa Dios cufini, —¡Aicho! Upan, mihuunshon un ato pimaicain. Min fasi sharacoincun, —huatan. Misi torupacutan shiman rafu ya oshon ahuunshon tapimisifo ato pashcanan huapani. <sup>42</sup> Ascaino picani mayacoinnifo. <sup>43</sup> A misi yafi shiman tushu huafo afu rafuafoan doce shihuati fospí huani. <sup>44</sup> Ascano cinco mil nocofunufufoan piinifo.

*Jesús ian fumancayan cani*  
Mt 14.22-27; Jn 6.16-21

<sup>45</sup> Ascano ato pimaquin anaititan Jesús afu rafuafo yoini, —Shashon rufofo oquiri pushurasi Betsaida ano pocui focahuun. Un na yorafo nichiyonon, —ato huani. <sup>46</sup> Ato nichitan arus fusti machi mamaqui caashu Apa Dios fu tsainni.

<sup>47</sup> Man fari caino afu rafuafo ian nushmancayan shashon nocoafono arusu ian cusumunshon Apa cufiyoni. <sup>48-50</sup> Ato oian ian nushmancayashon fuun huaquin ato catima huani. Man faquishiaiño Jesús ian fumancayan atoqui cani. Ato finonquin rashquini. Ascaitocai onannifoma. Onanshma ratucani. —Yoshin shafain, —fiisinifo. Ascaiton —Unquin. Ratuyamacahuun, —ato huani. <sup>51</sup> Ascatan shasho muran atoqui nanuinacahuani. Nanuano fuu nishmapacufufoanni. Ascaiton afu rafuafoan, —¡Aira! ¿Ahuuscashocon Jesús isca huaimun? —huanifo. <sup>52</sup> Tapiyonifoma Jesús Diospan facu ahuaamamishti huatirofia-cun cinco mil nocofunufufoan piimaiton oinfiaitashacaquin Jesús onanyonifoma. Diospan facufiacun aton nomuran tapiyonifoma.

*Genesaret anoshon Jesús isinin icaifo caya huani*  
Mt 14.34-36



<sup>53</sup> Ascatan ian pocufainifo Genesaret cusumunri nocoshon. Nanno shasho nushanifo. <sup>54</sup> Ascatan mapuinifoannaifoan nannoafoan samamashta Jesús onannifo. <sup>55</sup> Onantan ichonifo pushurasifo patashari chani focani. Isinin imisifo shuhua naratashon Jesusqui ihuunifo. <sup>56</sup> Nantiocushon isinin icaifo aqui ihuunifo. —Uhuun yora isinin icaiton min sahuuti cupanan mia munpaicani. Ato yoipun anonfo cayashcaquiran, —ishon yoinifo. Ahuun sahuuti muuncanashu cayapacunifo.

## 7

*Ahuarafoan noco nomuran chaca huamatiro cuscan*

*Mt 15.1-20*

<sup>1</sup> Ascano Fariseofo yafi Moisés tsain tapimamisifori Jerusalén anoashu Jesusqui fucashon. <sup>2</sup> Oianfo Jesús fu rafumisifo piataifoma muchoquimupaonifiacashon aton shunifoan yononi cuscacai anifoma. <sup>3</sup> Israelifo aton shunifoan piataifoma aton fuuyamisi cuscan muchoquimupaoni. Ascan aton shunifoan apaonifo cuscan Fariseofo yafi nantifi Israelifoan nansca huamisifo. <sup>4</sup> Tushu inanmistsamisifo anoashu aton pushu ano nococashon aton shunifoan apaoni cuscan atorifi piataifoma muchoquimunifo. Aton shunifoan ahuafo futsa fuuyamisi cuscan nanfoanri nanscari apaonifo. Aton shunifoan cuchofo non aqui unu manutifo non paninrafori chocamisi cuscan nanscara fuuya huanifo.

<sup>5</sup> Ascano nanfoan Jesús yocani, —Ahuuscaquimun nocon shunifoan piataifoma muchocomushoma pipaonifo cuscacai mifu rafuafoan asca huacanima, —ishon yocainfoan. <sup>6</sup> Ato cumani, —Isaías nan Diosin tsain yoimisiton iconcoin inaca cuscan matohuunoa yoini. Manfin fuparapaimisifoquin. Matohuunoa yoini isca huaquin,

“Nan yorafoan uhuunoa yoisharafiacaquin aton nomuran ua shinancoianfoma. <sup>7</sup> Ipaitsi ichananshu fanaincani ua cufiyanan. A yorafo tapimapaiyai cuscacai uhuun tsainma. Nanfoan aton nomuran afi shinain cuscan aton yorafo yoicaniran,”

ishon Isaías Diosin tsain cununi. <sup>8</sup> Diosin yononi cuscan atama maton shunifoan amaquiri shinanmisifo cuscan marifi man ascamisi. <sup>9</sup> Maton fuyamisi fusti man tanapai. Ascacuai Diosin mato yononi cuscan afanan man shinainma. <sup>10</sup> Nocon shuni Moisés yononi isca huaquin,

“Maton upa yafi uhua nicasharafain ato shara huacahuun. Tsoan apa iyamarai ahua tsain chaca huai ato rutumacahuun,”

ishon yoini. <sup>11</sup> Anori cunufiani man ato yoiquin, “Maton upa yafi uhua man yoitiro isca huaquin, ‘Upa futan uhuashtan un mato inanpaisharafiaqui un Dios inainran,’ ” man imisi. <sup>12</sup> Anori yoitacai Diosin yononi cuscan man ato yosima. “Maton upa yafi uhua cushusharacahuun,” mato huafiani mancai anori ato shinanmapaima. <sup>13</sup> Ascashon Diosin tsain man ato tapimatamarocon maton shunifoan yonopaoni cuscan nan fusti man ato tapimapai. Asca huaquin Diosin tsainmaquin man ato imai. Nanscara chaca futsafori man huamisan, —ishon Jesús ato yoini.

<sup>14</sup> Ato yoitan afanan Jesús yorahuanrasi cunani ato ahuafo futsa yoishquin. —Uqui fucahuun un mato yoinon. Ua nicasharafain

tapisharacahuun. <sup>15-16</sup> Ahuarafo non piatocai nocon nomuran chaca huatiroma. Ascataka maton nomuran shinansharashoma ahuaara man chaca huatiroquin, —ishon Jesús ato yoini.

<sup>17</sup> Ascatan yorahunrasi anoashu cai pushu muran iquiano a rafuafo aqui funifo yocain fucani, —Min yorafo min tapima cuscan nocori shafacafi yoihuu non tapinon, —huaifoan. <sup>18</sup> —¿Ahuuscaquimun marifi man tapisharataimacain? ¿Man tapiamamun ahuaara non piatocai nocon nomuran noco shinanchacamatiroma? <sup>19</sup> Maton nomurancai tushu nitiroma. Maton shaqui muranfin itiroquin. Chipo man aya poitioran. Nantifi tushu sharafo non pisharatiroquin, —ishon ato tapimani.

<sup>20</sup> —Maton nomuran man shinanchaca cuscan man yoitiro. Nanfohuunoa shinanquin man chaca huatiro. <sup>21</sup> Yorafoan aton nomuran ahuaara shinanchaca cuscan huatirofo. Isca huaquin, shinanchacafain nocofunu yafi ainfo chaca huatanantirofoquin yomutso icain rutumit-sapaimisi icain aton ahuinma chotafain aton funumari chotamafain <sup>22</sup> Futsana fianpaifain chaca futsa futsatapafo huafain paramitsamisi icain rafipaitama ahuaara chacafo huafain man ahuarayafishu ahuun unimatama futsa fuchipaifain futsaqui tsain chaca huafain cacapaimisi icain Diosin tsain nicacasmamisi. <sup>23</sup> Na chacafo aton nomuranshon shinainfo cuscan ato chaca huamashquiran, —ishon ato yoini.

*Ainfun mani futsa fustiton Jesús icoinra huani*

*Mt 15.21-28*

<sup>24</sup> Ascatan Jesús nannoashu pushurasi ahuun anu Tiro chaimashata caani. Caashu pushu futsa muran iquini tsoa tapimapaia. Ascafiaiton samamashta nanno icafoan nicanifo pushu muran icun. <sup>25-26</sup> Ascano ainfocai Israeli anoa shafa inima Sirofenicia anoa ini. Nan ainfoan nicaní Jesús oaiton. Ascatan aqui iquicaini nan yoshin chaca ainfacuun nuucun. Jesús cufini, —Ifon, uhuun facu shotocofacushta fasi omitsiscái. Yoshin chaca ahuun nuua. Na yoshin chaca amaquinoa ua potashohuun. Uhuun facushta ua cayahuashopun, —ishon yoiriani.

<sup>27</sup> Ascaino Jesús yoini, —Uhuun yorafo un ato tau huamanon. Tsoancai facufo aton tushu fiantan pashnafo potatiroma, —huaiton.

<sup>28</sup> —Ai, Ifon. Mian yoia cuscan icon. Ascafia facufoan piqui tushu huafo sapa camaquinoashu potomishti pacuaiton pashnafoan pitirofo. Nanscarifi huaquin min yorafo min caya huamayotirofiashon nocori min caya huamatiro. Min nocori caya huainocai min caifori funotiro-maran, —ishon cumaiton.

<sup>29</sup> —¡Aicho! Mian cumasharaquin. Natian min pushu ano min catiro. Yoshin chaca min facumaquinoashu man caaquin, —ishon Jesús yoini.

<sup>30</sup> Ascano ahuun pushu ano nocoshon oian ahuun facu shara racaini man amaqui yoshin chaca caano.

*Nocofunun tsaintiroma icain nicatiroma Jesús caya huani*

<sup>31</sup> Ascano Jesús Tiro anoashu cai Sidón finonfaini ianmanhuan Galilea cusumunri cani. Cai pushurasi anofo aton anu Decápolis ano noconi.

<sup>32</sup> Nannoa yorafoan nocofunu tsaintiroma icain nicatiroma aqui ihuunifo. —Nocon yoran nicatiromacoin noco manmanshohuun, —ishon yoinifo.

<sup>33</sup> Ascaiton Jesús nocofunu nicatiroma atomaqui chaimashata iyoni. Iyoshon ahuun mutotinin ahuun pachu rafu munni. Ascashon cumo michotan ahuun mutotinin ana munni. <sup>34</sup> Ascashon nai ari foisinifoantan

fasi shacaitan yoini, “*Efata,*” Onicoinnin tsainmanfin: “*Cayasharahuu,*” huani. <sup>35</sup> Ascano nocofunon nicasharariscani. Tsain cayacafi shara ato yoini. Afanan ahuun ana curushma.

<sup>36</sup> Ascano Jesús yorahuanrasi yoini, —Un nocofunu nicitiroma caya huama cuscan tsoa yoiyamacahuun, —ato huafia nantifiton yorafo chanifoanfainifo. <sup>37</sup> —¡Aira! Jesús acai cuscai tsoan oinyomisima. Ahuamamishti huatiroquin. Nantifi yoinifo cuscan fasi sharacoinquin. Yoran nicitiroma caya huamafain tsaintiromafori caya huamaran, —ishon yoinifo.

## 8

### *Jesús cuatro mil yorafo pimani*

*Mt 15.32-39*

<sup>1</sup> Ascatan nantianri afanan yorahuanrasi Jesusqui funifo. Ahuun tsain nicacaquin ahua piinifoma. Ascano afu rafuafo cunani ato yoishquin. <sup>2</sup> —Un nan yorafohuun ramapai. U fu rafu non fusti oshatan nuno icafo. Natian aton tushu man cuyoa. Ahuashta pitirofoma. <sup>3</sup> Atirifi chaicunoashu nuno fuafo. Ascacun un aton pushu ano nichicain fasi fonaincaini napuitirofo tacayomancani, —ato huaiton.

<sup>4</sup> —Nuno tsoa icamano non tushu fuchitiroma nan yorahuanrasi pimashquin, —huaifoan. <sup>5</sup> —¿Ahuuti misi man ayamun? —ishon yocaiton. —Siete non ayaran, —huanifo.

<sup>6</sup> Anori yoiainfoan Jesús nan yorahuanrasi yoini, —Nuno tsaocahuun, —ato huani. Tsaoafono Jesús misi siete tsomashon Apa Dios cufiyoni, —¡Aicho! Upan, minhuunshon un ato pimaicain. Min fasi sharacoincun, —huatan. Misi torupacutan afu rafuafo inanni. Inanno yorahuanrasi pashcananpacunifo. <sup>7</sup> Shiman uhuapamamishti fuchishon Jesús inanfoanno Apa Dios afanan aicho huatan shimanri torupacutan afu rafuafo inanni. Inanno yorahuanrasi pashcananpacunifo. <sup>8</sup> Ascashon picani mayacoinnifo. Ascashon a tushu huaafo siete shihuati fospicoian ini. <sup>9</sup> Cuatro mil yora icuanafo nanno inifo. Piafona Jesús aton pushu ari ato nichini. <sup>10</sup> Nanucainicai a fu rafuafo fu mai futsa ahuun anu Dalmanuta ari cani.

—*Yorafoan atiroma cuscan noco ismahuu, —Fariseofoan Jesús huanifo*  
*Mt 16.1-4; Lc 12.54-56*

<sup>11</sup> Nocoafono Fariseofo Jesusqui funifo yocain fucani. Fochishmanantanpai funifo. —Minmain Diospan facucocoinquin Diosin nai ariashu icahuunshon tsoan atiroma cuscan noco ismahuu non mia icoinra huanon, —ishon yocacaquin chaca huanifo. <sup>12</sup> Ascaino Jesús fasi shacaini. Ascashon ato yoini, —Ahuuscain tsoa futsan atiroma cuscara man oinpaifafainiquin. Un mato icon yoi. Diosin fustiton atiro cuscai un mato ismaimaran, —ishon ato yoini. <sup>13</sup> Asca huatan ato anoashu afanan shasho nanucaiquin ian pocufaini cani.

### *Fariseofoan amaquiri yoinifo*

*Mt 16.5-12*

<sup>14</sup> Ascano ian pocufain cashon afu rafuafoan yoini, —¡Ohua! Non ointiaquima. Non tushu fuamaran, —huanifo. Ascashon misi fustishta shasho muranno fuchinifo. <sup>15</sup> —Oinfain Fariseofo yafi niaifo Herodes aton misi faranshati piyamacahuun, —Jesús ato huani. <sup>16</sup> Nicacani yoinannifo, —Ahuuscain Jesús noco yoiain Fariseofo non Herodes aton

misi faranshati piyamacahuun. Non tushu fucunma anori noco yoiran, —icashu yoinannifo.

<sup>17</sup> Yoiaifo cuscan Jesús onanshon ato yoini, —¿Ahuuscaquimun tushuhu-  
 unoa man yoinaincain? Mancai ua tapisharataima. Maton ointi muran  
 curushcain uacai man icoinra huataima. <sup>18-19</sup> Man oinfiakin man  
 tapiama. Nicafiacuicai man nicacoianma. ¿Un mucu fustiti misihu-  
 shon cinco mil nocofunufu pimaita ahuuti shihuati misi fospicoinya-  
 main tushuitaquin? —ishon ato yocani. —Ascano doceran, —huanifo.  
<sup>20</sup> —Un siete misifo un cuatro mil yora pimaita. ¿Ahuuti shihuati misi  
 fospicoinyamain tushuitaquin? —ishon ato yocaiton. —Sieteran —  
 huanifo. <sup>21</sup> —¿Ascan ahuuscain man tapiataimamun? —ato huani.

*Jesús Betsaida anoa nocofunu fushocoin caya huani*

<sup>22</sup> Ascano Betsaida ano noconifo. Nannofo nocofunu fushocoin Je-  
 susqui ihuunifo. Ihuunshon yoinifo, —Ifon, nocon yora fushocoin noco  
 caya huashopun, —huanifo. <sup>23</sup> Ascano Jesús fusho mutsoinifoantan  
 pushurasi pasoato iyoni. Nannoshon ahuun furoqui cumo michotan  
 ayashon furo muunni. Ascashon yocani, —¿Min oinsharaimun? —ishon  
 yocaiton.

<sup>24</sup> Foisinifoantan, —Ai. Un yorafo oin. Matacain. Ihui foro cahuanai  
 ointsa, —ishon cumaiton.

<sup>25</sup> Afanan furo munni. Ascano oinsharacoinni. Man cayahuamacoian.  
 Shafacaficoin nantifi oinsharani. <sup>26</sup> —Pushufo ari cayamahuu. Min  
 pushu ano cayacafi catahuun, —ishon Jesús yoini.

*—Jesús, minfin Cristo Diospan Facuquin, —Pedronun huani*  
*Mt 16.13-20; Lc 9.18-21*

<sup>27</sup> Ascatan Jesús yafi afu rafuafu anoashu focani Cesarea de Filipo  
 pasoato pushurasifo ano fonifo. Foaifoan Jesús ato yocani, —¿Yorafoan  
 man shinanmun un tsoaquin? —ishon ato yocaiton. <sup>28</sup> Cumanifo, —  
 Futsafoan yoiafin min Juanquin. Nan ato unu muran iquimapacumisi.  
 Asca futsafoanri yoiafofin minfin Eliasquin. Asca futsafoanri yoiafin  
 minfin nocon shunicaifoan Diosin tsain yoimisiquin. Man min afanan  
 funiaran, —huaifoan.

<sup>29</sup> —¿Anori uhuunoa shinanfiafonomun manri shinanmun un  
 tsoaquin? —huaiton. Ascaiton Pedronun cumaquin, —Minfin  
 Cristoquin. Upa Diosin mia catonni nocoqui nichishquiran, —ishon  
 yoiaiton. <sup>30</sup> —Un Cristoqui toa yoiyamacahuun, —ato huani.

*—Chipo ua rutushcaniran, —ishon Jesús ato yoini*  
*Mt 16.21-28; Lc 9.22-27*

<sup>31</sup> Ascatan ato yoiquin tau huani, —Nocon caifoan Dios fu tsainti pushu  
 cushumisifo non Moisés cununi cuscan tapimamisifo non yorafohuun-  
 shon Dios cufimisi niaifofoan ua omitsisca huashcaniquin. Nan nocon  
 niaifofoan ua nicacasmacaquin ua rutumashcani. Ua rutumafiafo osha  
 rafu non fusti finontan un afanan funishquiran, —ishon ato tapimani.  
<sup>32</sup> Anori shafacafi icaiton Pedronun Jesús pashaquifain yoini, —Ifon,  
 ascaiyamahuu. Miacai rutupacunacafoma, —huaiton.

<sup>33</sup> Jesús tapacucahuan afu rafuafo oinyoni. Ascatan afanan ifiacucahuan, —Satanás uhuunoashu catahuun. Upa Diosin ahuun nomuran shinain cuscacai min shinainmacai. Anori min shinantama nocofunufoan shinain cuscan nannori min shinainran, —ishon Jesús Pedro yoini.

<sup>34</sup> Asca huatan yorahuanrasi yafi afu rafuafori cunani, —Uqui fucahuun un mato yoinon. Tsoan ua tanapaisharaquicai afin apaiyai cuscan huatiroma. Un yoiyai cuscafin nicatiroquin. Tsoan ua tanapaiquin isca huatiro, “Ua rutufianfoannocai un uhuun Ifo potapacunacama. Ahuunshon ua rutufiainfoanno un tanapacunacaran,” ishon yoitiro.

<sup>35</sup> Ascan tsoan yoiquin isca huai, “¡Ohua! Un Jesús tanaino uaraca rutucaniquin,” ishon yoitan. Ascashon uhuun tsain cachiquiri nan cuscara yora naashu omitsiscapanaca. Ascan tsoan uhuun tsain futsafo yoiainfin uhuunoashu rutushquiquin. Nan cuscara yora uhuunoashu naashu unfu isharapacunaca.

<sup>36</sup> Ratoranfo manifoannati ahuunacoinfiano naanocai afanan ahuunacoin itiro. Nantifi funocointiro. Niyoshon Diosin tsain tanatama imisishaquin. Ahuun nomuran omitsiscatiro. <sup>37</sup> Ahuun yoshin nipanoncai ahua inantiroma. <sup>38</sup> Yorafoan fasi chaca huamisifo. Upa Diosin tsain cachiquiri huaafo. Tsoan uhuun rafipaiquin uhuunoa yoicasmái uhuun tsainhuunoi yoicasmái quin. Chipó un uhuun Upa Diosinhuunashu un nai murannoashu mai ano un fotoaino uhuun Upa cuscaracoin un chasha curannaino uhuun Upan oinmati afu ica sharafori ufu fotoshcianiquin. Fotoshon nan uhuun rafiaifofin ua Ifo huapaicanima. Uhuun tsainri yoicasmacani unrifi un atohuun rafitiro. Afocai “Uhuun yoraran,” un huanacama —ishon Jesús ato yoini.

## 9

<sup>1</sup> Afanan ato yoiquin isca huani, —Icon un mato yoinon. Man futsan nuno ufu niaton nayoshoma Diosin ahuamamishti atiro cuscan man oincain. A icano ahuu cuscaramainquin man oincain, —ishon ato Jesús yoini.

*Jesús ahuun yora mumacoin ahuun sahuutifoya fianananriscatanaino chashatani*

*Mt 17.1-13; Lc 9.28-36*

<sup>2-3</sup> Asca huatan seis osha finontan Jesús Pedro non Santiago non Juanri machi cuya pochinin iyoní. Nanfo fusti nanno ini. Nannoashu aton ointaifi Jesús ahuun caya mumacoin sahuutifoya fianananriscatanaino ahuun sahuuti oshopacoin chashacoinni yoa rama furoamua ointsa iriscatani. Tsoacai sahuuti ya ascatiroma. <sup>4</sup> Ascaino Moisés yafi Elías nitariscatan Jesús fu tsainnifo.

<sup>5</sup> Ascaiton Pedron yoini, —Tapimamisiton, nuno non isharatiro. Non pushu facu rafu non fusti mato huashotiro. Mina futsa non Moisésna futsa non Elisna futsa. Santiago futan Juanpan non mato ashotiroran, —ishon Pedron yoini. <sup>6</sup> Raquirira huapaifiacani ratuconnifo.

<sup>7</sup> Ascatanaino naicoin atogui cuyopacuni. Naicoin murannoa ahuun oi nicanifo, —Nanfin uhuun Facuquin. Un ahuun noi. A nicacoincahuun, —Upa Diosin huani.

<sup>8</sup> Asca huatan nan rafu non fusti samamashta oinnifo Moisés yafi Elías yamariscatani Jesús fusti atofu nia ini.

<sup>9</sup> Ascano machi cuya pochinnnoashu fotoshon Jesús ato yoini, —Man rama oian cuscan tsoashta yoiyoyamacahuun. Nan naashu un afanan funiano rama man oian cuscan man yorafo yoitiroquin, —ishon ato yoini. <sup>10</sup> Ato yoia cuscan tsoa futsa yoiyonifoma. Tapiamafiashu yoinan-nifo, —Ahuacon Jesús noco yoiamun naashu afanan funishquiran. Noco huaa cuscan non tapiamaran, —icashu yoinannifo.

<sup>11</sup> Ascatan Jesús yocanifo, —¿Ahuuscaquimun Moisés tsain tapimamisi-foan yoimisiquin isca huaquin? “Nocon Numamisi Cristo Diosin catonni nocoqui oataima Elías rufobo nocoqui oshquiran,” —ishon noco yoinifo. <sup>12-13</sup> —Icon. Elías rucun oitautiro. Oshon nantifi isharamapai aton chaca shatunonfo. Ascafia tsoan onannima. Juanfiacun tsoan onannima. Nan chaca huapaiyai cuscan chaca huanifo. Nannori ahuunoa cununi cuscan. Nanscarifi aquin unfin Dios ariashu un nocofunucuin cainfian-icun ua omitsiscamacani. Nannori Diosin tsain yoimisifoan uhuunoa cununiforan, —ishon ato yoini.

*Jesús furonanfacu ahuun yoshin chaca nua caya huani*  
Mt 17.14-21; Lc 9.37-43

<sup>14</sup> Ascatan machi tununman fotocatan yorahuanrasi nastui Jesús fu rafumisifo yafi Moisés tsain tapimamisifo fu fochishmanantanannifo. <sup>15</sup> Ascano yorafoan Jesús fuchishon, —¡Oincapon! Jesús afanan oi. Tsoa futsacai a cuscarama. Ahuamamishti huatiroran, —icashu yoinannifo. Yoitan aqui ichonifo. <sup>16</sup> —¿Ahuuscain Moisés tsain tapimamisifo fu man fochishmanantanainmun? —ishon ato yocani. <sup>17</sup> Ato yocaiton nocofunu futsa cumani, —Tapimamisiton, uhuun furonanfacushta un mia ihuushona. Yoshin chaca ahuun nuucun tsaintiroma. <sup>18</sup> Achitan mipuani ahuun ashfapan facoshurasi atsispomumisi. Shucurushui futsutan charishi futsua. Uhuun facushta mifu rafuafu ano un ihuufia ua tsoa caya huamashotiromaran, —ishon nocofunun Jesús yoini. <sup>19</sup> Ascaiton Jesús, —¡Ohua! Mancai ua icoinra huaima. Man fasi amaquiri shinanmisi. ¿Ahuutia un matofu ipamun ua man nicayamacaiquin? —Jesús ato huani. —Min facu ua ihuushonhuun, —Jesús apa huani. <sup>20</sup> Ihuuafono yoshin chacanun furonanfacu musta mustaimani. Ascatan taramuacucaini facosh atsispomutan pacuni.

<sup>21</sup> Ascashon Jesús apa yocani, —¿Ahuutiamun iscamisiquin? —ishon yocaiton. —Nan facuaitian tauniran, —huani. <sup>22</sup> —Yoshin chacanun uhuun facu chi muran potafain unu muran man potamisi rutupaiquin. Min uhuun facu ua caya huashotiromainquin nocohuun ramapaihuu, —huaiton. <sup>23</sup> —¿Ahuuscain mian anori huaimun? Tsoan ua icoinra huacoian un ato ahuamamishti ashotiro, —Jesús huaiton.

<sup>24</sup> —Un mia icoinra huai. Ua paratama icoinra huamahuu, —ishon apa yoiaiton.

<sup>25</sup> Ascano yorahuanrasi oinpai atoqui ichonifo Jesús yoshin chaca curushcain yoini, —Minfin yoshin chacaquin. Nan facu min pastomafain tsaintiroma. Amaquinoashu catahuun. Mincai afanan a muran ipanacamaran, —ishon Jesús yoshin chaca curushcain yoini.

<sup>26</sup> Asca huaino yoshin fiiscaini cani. Facu musta mustaimafaini amurannoashu cani. Ascaino oianfo furonanfacu naa shinantsacun yoinifo, —Man facu naaran, —ishon yoinifo. <sup>27</sup> Ascafia Jesús furonanfacu mutsoinifoannaino funininacahuani.

<sup>28</sup> Ascashu Jesús pushu muran iquini. Iquiano afu rafuafo aqui funifo. Ascashon yocanifo, —¿Ahuuscashomun nofi non yoshin chaca facumaquinoa potatiromaquin? —huaifoan. <sup>29</sup> —Na cuscara yoshin chaca man Upa Diosin cufinyamaquicai man potatiromaran, —ishon Jesús ato yoini.

*Afanan Jesús ato yoini, —Ua rutushquicaniran, —ishon yoini*  
*Mt 17.22-23; Lc 9.43-45*

<sup>30-31</sup> Ascatan anoashu Jesús yafi afu rafuafo Galilea mai finon-faini. Nantian afu rafuafo tapimani. Ascashon tsoa futsan tapimay-opainima. Ato yoini, —Un mato yoimisi cuscan un Dios ariashu mai ano fotoní nocofunucuin cainshquin. Ascafiacun futsan ua achimashquin ua rutunofu. Ua rutufiafo osha rafu non fusti finontan un afanan mai murannoashu funishquiran, —ishon Jesús ato yoini. <sup>32</sup> Ato yoifiaiton tapinifoma. Ratucaquin tsoancai afanan yocanima.

*¿Ratocaimun fasi shara finacoianquin?*  
*Mt 18.1-5; Lc 9.46-48*

<sup>33</sup> Ascatan Capernaum ano noconifo. Pushu muran iquicashon Jesús afu rafumisifo yocani, —¿Ahuuscái fai anoashu man fochishmanantainmun? —ishon ato yocaino. <sup>34</sup> Fuaifoan yocani, Ratocaimun fasi shara finacaiquin fochishmanantananashu rafinifo tsoancai Jesús cumanima. Puusinifoma.

<sup>35</sup> Puusiyamaifoan Jesús ato onanni. Ascashon tsaoshon ato yoini, —Nicasharacahuun un mato cayacafi yoinon. Tsoan ahuun yorafo fasi finonpaiquin nantifi yorafo aton oinmati itiroran, —ishon ato yoiniquin.

<sup>36</sup> Ascatan aton ointaifi ato nushmancayan facu nichipacufoanni. Ascatan chishito inifoantan ato yoini. <sup>37</sup> —Tsoan uhuunshon facu cushusharaifin nanscarifi ua huaiquin. Nanscarifiai tsoan ua shara huaquin uhuun Upa Diosiri nanscari huairan, —ishon ato yoini.

*Tsoan noco chaca huapaitama noco shara huai*  
*Mt 10.42; Lc 9.49-50*

<sup>38</sup> Ascano Juanpan Jesús yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun non yoiquin isca huai, “Mincai no fu rafumisima. Asca min yoshin chaca yorafomaquinoa potatiromaran,” ishon non yoiaran, —ishon Juanpan Jesús yoini.

<sup>39</sup> Ascaiton Jesús cumani, —Na nocofunu shutiyamacahuun. Tsoancai uhuun anuhuunshon ahuamamishti yorafoan atiroma cuscan huaitocai uhuunoari tsain chaca huatiroma. <sup>40</sup> Tsoan noco nicacasmaquima noco futan aqui. <sup>41</sup> Un mato icon yoi. Tsoan ahuun nomuran matohuunoa shinanquin isca huaiquin, “Afin Cristo ahuun yoraquin. Ascacun un shara huairan,” ishon yoitirofo man nomiaiton mato unu ayamatiro. Mato ascara shara huacun Diosin inanpaiyai cuscan funotiroma.

*Futsafoan noco chaca huamatiro*  
*Mt 18.6-9; Lc 17.1-2*

<sup>42</sup> Ua rama futsa icoinra huafiacun futsan chaca huamaiton nancairocofin toquiri uhuapa tuhumashon unuhuan noa muran potanon.

<sup>43-44</sup> Asca huatan min mucuman ahuaara chaca huai mifiri min mushatumua shara icuana. Mucu rafuya omitsiscapanacafo muran catama

mucu fusti ya Upa ari min nocotiro nipashquin. Nan shara. Omit-siscapanacafo muran a chicai nocanacama. Nanscasi apanaca. Acai sharama.

<sup>45-46</sup> Nanscarifi aquin min tau rafu yashon min raquiria capai ahuaara chaca huapai mifiri oshatumua shara icuana. Min tau rafu ya omitsis-capanacafo muran catama min tau fusti ya Upa ari nocotiro nipashquin. Nanscara shara itiro.

<sup>47-48</sup> Nanscarifi aquin ahuaara chaca oinquin min ahuaara chaca huaiton mifiri min futsucumua shara icuana. Min furo rafu ya omitsis-capanacafo muran catama min furo fusti ya Upa ari min nocotiro nipashquin. Nanscarafin shara itiro. Nan chi uru muran caashu fasi min omitsiscacointiroquin. Nanscasi apanaca. Nan chiicai nocanacama. <sup>49</sup> Tsoancai anori capanacama.

<sup>50</sup> Ascan sao fasi shara itiro. Nami saomua funa payocotiroma. Ascan saomui chacano nami payocotiro. Nanscarifiai tsoa ufu rafushocai chaca huatiroma. Futsafori ua icoinra huamatiro. Ascafiaino tsoa ufu rafuyamaino afanan chacacoin itiro. Ua futsafori afanan icoinra huamatiroma. Ascacun ufu rafupacucahuun. Fochishmanantanacaquima. Isharacahuun, —ishon Jesús ato yoini.

## 10

*Funu yafi ahuin ununainhuunoa Jesús ato tapimani*

*Mt 19.1-12; Lc 16.18*

<sup>1</sup> Ascatan anoashu a rafuafo afu Judea mai nan unu Jordán ocuma futsa fonifo. Ascano afanan yorahuanrasi aqiu funifo. Amisi cuscan afanan Jesús ato yosinon.

<sup>2</sup> Ascano Fariseofo Jesusqui funifo. Aqiu fucashon amaqiri cumama-painifo. Fuparapaicaquin. Ascashon yocacaquin, —¿Nocon shunifoan Diosin tsain cununi cuscan nocofunun ahuin unupaiquin unutiromun? —ishon yocaifoan.

<sup>3</sup> —¿Moisés ato yononi cuscan raquiri yoiamun? —huaiton.

<sup>4</sup> —Moisés cunuquin isca huani, “Tsoan ahuin unupaiquin acataima cunushotiro isca huaquin, ‘Un afanan mia fipaima. Munfin mia un-uicain,’ ishon yoitiro.” Anori Moisés ato yononiran, —huaifoan.

<sup>5</sup> —Maton shunifo mato cuscarari. Nanfo Diosin yonoquin tau huani cuscan nicacasmacani. Ascashon Moisés tsain futsan yononi cuscan maton shunifo cunushoni. <sup>6</sup> Ascafiaino Diosin nocofunu yafi ainfon onihuashocai anori shinannima. Ato onihuaquin tau huani funu yafi ahuin potananonfoma. <sup>7</sup> Ascano Diosin yoini isca huaquin, “Ascan nocofunun ainfo fiashu apa yafi ahuaamaqui pashcatiro. Oshati fusti muran afu iishquin. <sup>8</sup> Ascashu ano rafu niishcaquin. Fusti ica shinantsa aashquin. Afanan rafuma.” <sup>9</sup> Ascacufin Diosin ato cumanan huaa afanan tsoa pashcanantromaran, —ishon Jesús ato yoini.

<sup>10</sup> Ascano afanan pushu muran iquiano a rafuafoan Jesús yocani — Min rama yorafo yosia cuscan nocori yoihuu, —huanifo. <sup>11</sup> Ascaiton ato cumani isca huaquin, —Ratoran futsan ahuin unuquin futsa fiishquin chaca huai ahuin ahuinma fu iquin. <sup>12</sup> Nanscarifi aquin ainfoan funu unutan futsa fiishquin arifi chaca huaiquin funuma fu iquin, —ishon Jesús ato cumani.



*Jesús facumishtifo yoisharapacuni*

*Mt 19.13-15; Lc 18.15-17*

<sup>13</sup> Ascano yorafoan aton facumishti Jesusqui ihuunifo ato manmanpacuquin Upa Dios cufinon. Ascaifoon oinquin Jesús fu rafuafoan yoinifo isca huaquin, —Maton facufo ihuutan nocon Ifo fucash huayamacahuun, —ishon yoinifo. <sup>14</sup> Anori huafiaifono nicatama Jesús atoqui unimatama yoini, —Asca huayamacahuun. Facufo uqui funonfo. Ato nitun huayamacahuun. Uhuun Upa Diosin niaifo icanori facumishti cuscaraforiquin. Facufoan ua icoinra huacoinnafo. Nai muran Uhuun Upa icano nanscarifi aafuquin, —ishon ato yoini. <sup>15</sup> —Un mato icon yoiquin. Facufoan ua icoinra huamisi cuscan tsoan nanscarifi aquin ua icoinra huashuma uhuun Upa niaifo icano afu ipanacamaran, —ishon Jesús ato yoini. <sup>16</sup> Ato yoiquin facufo shatsaomushon manmanpacuquin, —Upa Diosin, na facumishti shara huahuu, —ato huapani.

*Nocofunu mafo ichapaya ahuashta yopaima ini*

*Mt 19.16-30; Lc 18.18-30*

<sup>17</sup> Ascano nocofunu aqui ichotoshini. Ichotoshitan ratoconun mai chachishon yoini, —Tapimamisiton, minfin sharacoinquin. ¿Unmun ahuuscatiroquin Dios fu ipashquin? —ishon yocaiton.

<sup>18</sup> —Ahuuscaquimun mian “sharacoinran” huaicai. Fusticoifin sharaquin. Nanfin a Diosiquin. <sup>19</sup> Diosin yononi cuscan min tapian. Isca huaquin noco yoini, “Futsa rutuyamacahuun. Maton ahuinma fu iyamacahuun. Ascanori maton funumafuri iyamacahuun. Ahuara onuyamacahuun. Chaniri yoiyamacahuun. Fuparayamacahuun. Maton upa yafi uhua nicasharafain ato shara huacahuun,” —ishon Jesús yoini. <sup>20</sup> Ascaiton cumani, —Tapimamisiton. Nantifi nan Diosin yononi cuscan facushon un nicainifoanna, —huaiton.

<sup>21</sup> Jesús oianan noiquin. Yoini isca huaquin, —Fustiricai min nicataima. Nantifi min ahuara ya cuscan inanmitsatahuun ahuun rafanan pui fiishon ahuuomafo inanshquin. Min asca huaiton Upa Diosin nai muranshon mia ahuara sharacoin mucushoshquin. Asca huatan ua tanahuun, —huaiton.

<sup>22</sup> Nicai nocofunu puusinima. Mafo ichapayashu ahuun mafofo inamitsacasmai puusinima. Ascatan Jesusmaquinoashu cani.

<sup>23</sup> Caiton oinquin tanatan ifiacucahuun afu rafuafo yoini, —Yora mafo ichapaya Uhuun Upa Dios niaifo ari atirifi nocotiroma. Aton mafo ichapa potacasmacaquin Diosiquiri shinanpaicanimaran, —ishon ato yoiaiton.

<sup>24</sup> Nicacani afu rafumisifoan ahuun tsain tapipainifo. Ascano Jesús afanan ato yoini, —Uhuun facumishtichin, iconcoin mafo ichapayafu Dios icano fustirasi nocotirofo. Dios shinantama aton mafo fusti shinanfo. <sup>25</sup> Ina uhuapa camellocai acoya shoi muran finontiroma. Mimacaifin nocofunu mafo ichapa ya Diosin niaifo ari fustirasi nocotiro, —ishon yoiaiton. <sup>26</sup> Nicacani ahuun tsain fasi tapipaicani yoinannifo, —¡Aira! ¿Mafo ichapa ya Dios fu ipatiromainquin tsoa futsamun Dios fu ipatiroquin? —icashu yoinannifo.

<sup>27</sup> Jesús atoqui fusoacucahuan yoini, —Nocofunufocai afinri numatiroma. Diosin fustitofin yorafo numatiroquin. Diosifin ahua-mamishti huatiroquin. Nocofunfoan atiroma cuscan Diosin huatiroquin, —huaiton.

28 Nicaquin Pedro yoini, —Ifon, nonfin nocon mafo yafi nocon yorafa nantifi nocona non pota furanaquin mia tanayoquin, —huaiton.

29 —Un mato iconquin yoi. Tsoan ahuun pushu potafain ahuun ochifo potafain ahuun ushtofu potafain ahuun poifo potafain ahu potafain apa potafain ahuun facufo potafain ahuun mauri potafurashon ua tanapaisharatiro uhuun tsain shara futsafo yoishquin. 30 Nanscarafoan niyocashon Diosin ato fumimacoin inain. Pushufo non ochifo non poifo non ahuafo non facufo non maufori ato inain. Ato inansharafiaino ahuunoashu nantianri omitsiscashquin. Ascatan chipo Upa Dios fu ipasharashcani. 31 Ascfia yora ichapa natian isharacoinfiashu naashu funocoincani. Nanscarifiai atirifi natian ahuama shinantsa. Afo naashu Upa Dios fu ipasharashcaniran, —ishon ato yoini.

*Afanan Jesús ato yoini, —Ua rutushquicaniquin, —ishon yoini*

*Mt 20.17-19; Lc 18.31-34*

32 Ascano Jerusalén ano fonifo Jesús rucun caiton afu rafumisi-foan mufainifo. —¡Ohuashta! Ahuuscaín nocon Ifo Jesús Jerusalén ano caimun. Nanno musucoinran, —icashu yoinannifo. Futsafoanri mufainifo. Nanfari ratucoinnifo. Ascano Jesús fu rafumisifo doce futsa chaimashta ano atotisi iyoni atofu tsainshquin. Ahuara ahuus-carashquin fiaiton ato yoini isca huaquin, 33 —Ua nicacahuun. Non Jerusalén ano canon. Nannoa futsan ua achimashquin nocon yorafohu-unshon Dios cufimisi niaifofu yashon Moisés tsain tapimamisifoan ua tsain chaca huashcani. “Jesús ato fasi chaca huamisi. A rutucahuun,” icashu uhuun yoinanshon. Mani futsafoan ua iyoshcani ua rutunonfo. 34 Nanfo uqui cashupaicain uqui paran nashquicani uqui cumo michofain ua fichi cunoquin tuchiaton ua coshashcani. Ua asca huacatan ua ihui coyán iquinanqui mastashcani un nanon. Ascfia osha rafu non fusti finontan Upa Diosin ua afanan funimashquiran, —ishon Jesús ato yoini.

*Santiago futan Juanpan Jesús yocanifo cuscan*

*Mt 20.20-28*

35 Ascano Zebedeo facu rafutan Santiago futan Juanpan oinomashta Jesús yoinifo, —Tapimamisiton, non mia yocain cuscan noco ashopun, —huanifo.

36 —¿Ahuá man ua yocapaimun un mato ashonon? —huaiton.

37 —Nantifiton niaifo min iqui nocori min icano niaifo patashari noco imahuu. Min yorafa yonoaitian min tsaono non mifu tsaonon. Nocori catonhuun, —huaifoan.

38 —Ua man yocan cuscaí man tapiama. ¿Un omitsiscashquian cuscan manrifi man omitsiscatiromun? —Jesús ato huani.

39 Ascaiton cumanifo, —Ai. Nonfin itiroquin, —huaifoan. —Icon. Un omitsiscái cuscan marifi man omitsiscaicain. 40 Ascfia tsoanmain ua naqui huashu tsaotirofoqui uncai tsoa yoitiroa. Uhuun Upa Diosin fustiton tapia. Nan Upa Diosin catoan fosi nanno tsaotiroforan, —ishon ato cumani.

41 Santiago futan Juanpan ato finonpaiyaiton Jesús naqui huashu tsaopainifo afu rafumisi diez futsafoan nicacashu atoqui sinanifo. 42 Ascano Jesús ato yoini, —Uqui fucahuun un mato yoinon. Yora futsafo nocon caifoma aton niaifofoan ato curushcain yonofainmisifo. Aton niaifo patasharifoanri ato yoimisi isca huaquin, “Nonfin mato

ifoquin. Non mato yoiai cuscan man noco ashorisca huatiroran,” ishon yoimisifo. <sup>43</sup> Asca huafiamisifo mancai ato cuscara itiro. Nan man ratoran futsa niaifo ipai maton oinmati itiro. Maton shara huafafainmisi itiro.

<sup>44</sup> Ascatai nan man futsan finonpai maton oinmati itiro. Shinanqui isca huamisitiro, “Un futsafo shara huapai. Man yopa cuscan un ato ashopairan,” ishon anori yoitirofo. <sup>45</sup> Urifi anori shinan. Un Upa Diosin ariashu mai ano ftoni urifi nocofunucuin cainshquin. Un Diospan facufiacun ua man amanon un oama. Ascatamarocon un futsafo ato ashomisi. Un yora ichapari un atohuunoashu nashoshquin Satanás afanan aton ifon inonma un oaqun, —ishon Jesús ato yoini.

*Nocofunu fusho ahuun anu Bartimeo Jesús caya huani oinsharanon*  
*Mt 20.29-34; Lc 18.35-43*

<sup>46</sup> Ascatan Jericó pushurasi ano noconifo. Nannoashu Jesús fu rafuafo non yorahuanrasi fonifo. Timeopan facu fushon ahuun anu Bartimeo fai cusumunri tsaoa ini ahuara ato yocashquin. <sup>47</sup> Jesús nan pushurasi Nazaret pushconi fain caiton nicai oi ashcafinin cunani, —Jesús, minfin David funaquin. Uhuun ramapaihuu, —huani.

<sup>48</sup> Ascaiton yora ichapafoan yoinifo, —Tsainyamahuu, —curushcain huanifo. Anori huafaiinfono fasi curushcain oi ashcafinin afanan cunani, —Minfin David funaquin. Uhuun ramapaihuu, —huaiton.

<sup>49</sup> Nicai Jesús nituacucahuani. Nituacucahuan, —Yoihuu uqui onon, —ato huani. Yorafoan yoinifo, —Natian min unimatiro. Funihu. Jesús mia cunaquin, —ishon yoiaifono. <sup>50</sup> Nicaquin ahuun camisa potatan funiriscatan Jesusqui oni. <sup>51</sup> —Un mia ahua ahuusca huashotiro-mun ua yoipaiquin ua yoihuu, —Jesús huani. Ascaiton cumani, —Tapimamisiton, un oinpai. Afanan un fusho ipaima, —huaiton.

<sup>52</sup> —Mian icoinra huashu min cayaquin. Casharatahuun, —Jesús huani. Catan oinsharani. Ascashon fai Jesús mufaini.

## 11

*Jesús Jerusalén pushurasi ano nocotoshiniquin*  
*Mt 21.1-11; Lc 19.28-40; Jn 12.12-19*

<sup>1</sup> Ascatan Jesús fu focani Jerusalén chaima noconifo. Nannori chaima pushurasi futsan ahuun anu Betfagé. Nan pushurasi rafu machi cuya ahuun anu Olivo ano inifo. Noco cuatan Jesús afu rafuafo rafu ano ato nichini. <sup>2</sup> Ato yoini, —Nan pushurasi chaima sharaqui fotacahuun. Nocoshon man inapan facu nushua man oincai. Tsoacai na burro camaqui caiyomisima. Tupushon nuri ua ihuunshotacahuun. <sup>3</sup> Ascan ratoran futsan mato yocaiton, “¿Ahuuscaquin man muropan facu man iyoimun?” ishon mato yocaiton. “Nocon Ifo yopaiton non iyoshoni cairan,” ishon ato yoicahuun, —Jesús ato yoini.

<sup>4-5</sup> Ato nichian focatan pushu caicainti ano muropan facu nushua fuchitoshinifo. Man tupuaifoan nannoa niafoan ato yocani, —¿Ahuuscaquin man burro cahuashara tupuimun? —huaifoan. <sup>6</sup> Jesús ato yoia cuscan cumacaquin, —Nocon Ifo yopaiton non tupuyoaran, —huanifo. Ascaiton, —Iyotacahuun, —ato huani. <sup>7</sup> Ascano Jesús ano ihuushontan camisa muropan catu camaqui fucashonifo. Fucashonafanno acamaqui Jesús tsaoinachuani. <sup>8</sup> Jerusalén ano caino yorahuanrasifoan fai naman cayan afoforin aton camisafo fucanifo. Futsafoan shupa

shatushon nan cai fufori nichiacunifo. <sup>9-10</sup> Ascan nan yorahuanrasi afofori yafi acachori foaifoan nantififain oi ashcafinin curushcai yoinifo, *¡Aicho! Noco numai oiquin. Upa Diosin Jesusqui unimai. Ascan nocon Ifon Dioshuunoashu nocoqui oa. Nocon shuni David nantifi yorafoan aton niaifo cuscara. Arifi nocon niaifo ishquin oa. ¡Aicho! Nocon niaifo shara nantifi iquinaran*

ishon oi ashcafinin yoinifo.

<sup>11</sup> Ascatan Jesús Jerusalén ano nocotan Dios fu tsainti pushu muran iquitoshini. Amuran nantifi ato oian. Man yataino. Afu rafumisifo doce fu Betania ano fonifo nanno oshashquin.

*Fana higuera Jesús tsasi huani*

*Mt 21.18-19*

<sup>12</sup> Iyoconaino Betania anoashu Jerusalén ano fonainquin naso curanquin. <sup>13</sup> Oian chaima fana ahuun anu higuera nia fuchini. Fuchishon ahuun fimi apaiquin oian ahuun puifosi. Fimiama ini. Fimitiataima. <sup>14</sup> Ascaiton yoini, —Afanan min fimimaran, —ishon Jesús yoini. Yoiai cuscan a rafuafoan nicanifo.

*Jesús Dios fu tsainti pushu murannoashu inanmitsaifoan ato potani*

*Mt 21.12-17; Lc 19.45-48; Jn 2.13-22*

<sup>15</sup> Ascano afanan Jerusalén anoashu cai Jesús Israelifoan Dios fu tsainti pushu muran iquitoshini. Iquitoshiquin oian ahuafoa a murannoashu inanmitsaifoan. Fuchitan ato chifi cainmaquin futsani. Pui fiainfoan aton acamaquishon pui fitiri finifoan arasacaquin futsani. A ruhui inanmitsaifori aton tsotiri finifoan arasacaquin futsani. <sup>16</sup> —Na Dios fu tsainti pushu murannoashucaí non ahuafoa inanmitsatiromaran, —ishon tsain curushcain ato yononi. <sup>17</sup> Ato tapimaquin yoini,

—Diospan tsainhuunoa isca huaquin cununi. “Uhuun tsainti pushu muranшон nantifi manifoti iquitiro ua cufishcaquin,” ishon cunufianicun yomutsofoan ichananti cuscara man huapairan, —ishon ato yoini.

<sup>18</sup> Ascan Israelifoan aton yorafohuunshon Dios cufimisi niaiffo non Moisés cununi cuscan tapimamisifo Jesús yoiaiton nicacaquin rutupainifo. Ascaiton futsafoan Jesús yoiai cuscan nicapaicoinnifo. Ahuun tsain nicai, —¡Airai! Ascaran tsain shara tsoan nicayomisimaran, —icashu yoinannifo. Ascano aton niaiffo Jesúsqui ratunifo. Rutupaifi-quicai tapinifoma ahuuscashomain rututirofoquin.

<sup>19</sup> Ascatan man fari caino Jesús yafi a rafuafo Jerusalén murannoashu patashari fonifo.

*Fana higuera tsasi futsua*

*Mt 21.20-22*

<sup>20</sup> Ascano iyoco futsaino afanan nasoquin fana higuera fuchitoshinifo. Man tsasi futsua. Ahuun tapofori man naa. <sup>21</sup> Oinquin Jesús higuera yoita cuscan Pedronun shinanquin yoini, —Tapimamisiton, oinpon. Na fana higuera min yoitan cuscan man tsasiaran, —ishon yoiaiton.

<sup>22</sup> —Upa Dios icoinra huacahuun. <sup>23</sup> Un mato icon yoinon. Maton nomuran man icoinra huacoinshon na machi man isca huatiro, “Tsu-cucain. Unuhuan muran pacuhuu,” man huaino man yoia cuscan asca huariscatiro. <sup>24</sup> Ascacun un afanan mato yoinon. Man icoinra huacoinshon ahuarashta man yocaiton Upa Diosin mato inantiro. Matonna inon. <sup>25-26</sup> Ascano man Upa Dios cufipaiquin iquisi futsan mia chaca

huaa cuscan rau huayohuun. Man ascaiton Upa Diosiri maton chaca rauhuatiro. Ascan man Upa Dios nai murannoa man cufiai cuscan mato ashotiroran, —ishon Jesús ato yoini.

—¿Tsoanmun mia yonoaquin? —ishon niaiffoan Jesús yocani  
Mt 21.23-27; Lc 20.1-8

<sup>27</sup> Ascano afanan Jerusalén ano nococatan Jesús Israeliffoan aton Dios fu tsainti pushu muran caino. Yorahuunshon Dios cufimisi yafi Moisés cununi cuscan tapimamisifo fu Dios fu tsainti pushu cushumisifo aqui funifo. <sup>28</sup> Aquí fucashon yocanifo, —¿Min acai cuscan tsoan mia yonoamun? Min inanmitsamisifo nocon ichananti pushu muranshon min ato pota. ¿Tsoan mia yonoamun min ato asca huaa? —ishon yocaifoan.

<sup>29-30</sup> —Urifi un mato ahuara yocain. ¿Juanpan yorafo unu muran iquimapacuniquin tsoan yonocumun? ¿Diosin yonoyamaraquin noco-funufao yonoafomun huani? Man ua cumasharaiton urifi un mato cumasharatiroquin, —ishon yoiaiton.

<sup>31</sup> Jesús yoia cuscan nicacani yoinanannifo. —Diosin Juan nichiaran non huaiton Jesús noco yoishquin, “¿Ascan ahuuscaquin man Juan icoinra huamamun?” ishon noco yoitiro. <sup>32</sup> Ascafia Juan noco-funufao nichini Diosincai nichinima ishon yoiaiton yorafo nocoqui sinatirofo. “Juanpan Diosin tsain yoimisiran,” ishon yoiaiton noco asca huatiroran, —icashu niaiffo yoinannifo.

<sup>33</sup> Ascashon yoinifo, —Tsoanmain Juan yonoaquin noncai tapiama. Non mia yoipanan, —ishon Jesús huaiffoan. —Ascarifitan un acai cuscmain tsoan ua yonoaquin uncai mato yoima, —ato huani.

## 12

*Ahuarafo yoiai cuscarahuunshon Jesús ato yosini*  
Mt 21.33-46; Lc 20.9-19

<sup>1</sup> Ascano nantianri Jesús ahuarrafo cuscarahuunoa ato yosini. Isca huaquin, —Nocofunu futsan ahuun mau ano fimi ahuun anu uva fanani. Ascashon fimicun aqui toquiri cunuacuni ahuaton chaca huanonma. Mai quini huashon prensa mafishtamani. Ascashonri toquiri cushuti cuscara cuya masoa anoshon cushusharashquin. Anaitishon mau yonomisifo iffoan ato inanyoa ahuun mau cushusharanonfo. Ato inanyotan mai futsa ano cayoni. <sup>2</sup> Fimiatian ahuun oinmati futsan ahuun mau ano nichini fimi atirifi fishonon.

<sup>3</sup> Nocoaiton mau cushuafoan achinifo. Achicashon sutunifo. Ascanshon fimi inanyamaiffoanno oinmati ahuun ifo ano nasoni. <sup>4</sup> Ascano mau iffoan ahuun oinmati futsa atoqui nichifain arifi mapo sutunifo. Fasi chaca huacaquin namaquirashquinifo. <sup>5</sup> Ascano mau iffoan ahuun oinmati futsa atoqui nichini. A rutunifo. Ichapa nichian futsa sutufain futsa rutucoinnifo.

<sup>6</sup> Ahuun unutani Furun fusti tushuni. Nan Furun fasi noifiaquin ahuun unutaquin atoqui nichini. “Uhuun facucoinfin nicacoinshcaniquin,” ishon mau iffoan yoini.

<sup>7</sup> Ascashori shinanfiaquin ahuun facucoin nichini. Ascano caiton mau cushumisifoan fuchinifo. Fuchishon yoinifo, “¡Oincapon! Mau iffoan ahuun furun oi. Apana na mau. Ascan ahuun facuna chipo iishquin. Ascacun non rutunoncahuun nocona mau inon,” ishon yoinifo. <sup>8</sup> Ascatan

furun igui curannaiton achicashon rutunifo. Rutushon mau tsisumun sharafoshon ratanifo.

<sup>9</sup> ¿Ahuamun man shinaincain? Mau ifoanfin tapiaquin ato rutumaquin cuyoai. Futsafo inanshquin cushunonfo. <sup>10</sup> ¿Diosin tsain yoini cuscan man oinmisimamun? Ascashon yoiquin isca huani,

“Pushu yonomisifoan toquiri quishi shara oincaquin yoinifo, ‘Nacai sharamafinquin,’ ishon potafo. Man potafiafoan pushu ifoan catonni nan toquiri quishihuunoashu pushu nisharanon. Nanscarifi aquin Diospan Furunhuunoa ni-aifofoan yoimisifo, ‘Nancai ahuamaran,’ ishon man potafo. Ascafiacun Upa Diosin catonni ahuun yorafoti ahuunoashu nipanonfo. <sup>11</sup> Ascan Diosin aca cuscan oinshon non yoitiro, ‘¡Aicho! ¡Diosin ahuun Furunhuunshon aca cuscan fasi shara-coinran!’ ishon non yoitiran,”

—ishon Jesús ato huani.

<sup>12</sup> Nicacani Israelifoan aton niaifofo fasi sinanifo. Jesús atohuunoa yoiyai tapicanashu Jesús achipaifiacani yorafoqui ratunifo achinifoma. Asca huatan amaquinoashu fonifoquin.

*Niaifofoan noco inanmamai cuscahuunoa Jesús ato yosini*

*Mt 22.15-22; Lc 20.20-26*

<sup>13</sup> Ascatan chipo ichanancashon yoinifo, —Non Jesús ahuara yocanon noco amaquiri cumaimancai. Noco cumaquin chaca huaiton non cunu muran iquimanon, —ishon yoinifo. Asca huacatan Herodes niaifo ahuun tanamisifo non Fariseofo aton tanamisifori Jesusqui nichinifo a yocanonfo. <sup>14</sup> Aquin nococashon yocanifo,

—Tapimamisiton, man non tapian min iconcoin fusti min noco yoifafainmisi. Upa Diosin noco amapaiyai cuscan nannori min noco cayacafi yosimisiquin. Min ahuara yoipaicain min ranoima. Nan min noco yoiyai min cayacafi yoi. Ahuashta min fomainma. Min yora ahuuoma yoia cuscan nanscarifi huaquin min niaifofo yoitiro. Nan rafu min ato Diosin tsain iconcoin yoi. Ascacufin noco tapimasharahuu. ¿Romanonfoan aton niaifo Cesari nocon pui noco yoca cuscan non inantiro iyamarai non inantiromamun? Noco tapimahuu, —huaifoan.

<sup>15</sup> Ascashon Jesús onanni nan fuparamitsapaimisifo. —¿Ahuuscain ua amaquiri cumamapaicanimun? Uhuunoa ahuara chaca niaifofo man yoipaicain ua cunu muran iquimanonfo. Man toro inanmisi ahuunshon ahuara finon. Futsan ua fishoriscahuun un oinon, —huaiton. <sup>16</sup> Toro fushoan. —¿Tsoa ointsamain torohuun nuaquin? Tsoan ahuun anu nutamun, —ishon ato yocaiton. “Niaifon Cesarinnaran,” huaifoan.

<sup>17</sup> —Ascan Cesarina inancahuun. Diosinna Dios inancahuun, —ishon ato yoini.

Nicacani mustairinifo, —¡Aira! Ahuun tsain tsoancai tafitiromaran, —icashu yoinannifo.

*—¿Yora naa afanan funiashu ahuuscatiromun? —ishon Jesús yocanifo*

*Mt 22.23-33; Lc 20.27-40*

<sup>18</sup> Ascatan nan shafatari Saduceofo aqui funifo. Nanfori Israelifo. Shinanquin isca huani, —Yora naashu afanan funipacunacamaran, —ishon yoinifo. Nanfoan yocapaicani Jesusqui funifo.

<sup>19</sup> —Tapimamisiton, Moisés noco cunushoni isca huaquin, “Nan ratoran iyoa naano ahuun ahuin facuoma imisino chipocuton fishon a

futan facu ashquin,” ishon cununi. <sup>20</sup> Ascano siete nanupacuafohuunoa non mia yoinon. No fu iyopaonifo. Aton iyoacai ahuinyain tauni. Ascafiashon a futan facu acashma nani. <sup>21</sup> Ascano chipocu futsan arifi ahuun ochin ahuin fini. Ascashu arifi a futan facu acashma naani. Ascaino chipocuton futsan arifi ahuun ochin ahuin fini. Arifi a futan facu acashma nani. <sup>22</sup> Ascapacutan amaqusi nai cuyonifo. Aqui facu ayamacai. Ascadari ahuun unutanai ainfo nani facu nanuyamacain. <sup>23</sup> ¿Funiaitian nai arishon rato futsacaimun fiicaiquin? —ishon yocaifoan.

<sup>24</sup> Ascan Jesús ato cumani, —Mancai Diosin tsain tapiama. Ahuun yonori man tapiama. Ascashofin man ua amaqiri yoiacquin. <sup>25</sup> Yora naashucaí funiafo Dios ari nocotan afanan fiananpacunacafoma. Nantifi Diospan oinmatifo afu icafo cuscarafosi iishcaniquin. <sup>26</sup> Ascan yora naashu funishquiaifohuunoa Diosin mato yoini. ¿Yoiacai cuscan Moisés mato cunushoni man oinmisimamun? Diosin fana urumanhuan muranshon ahuun oi nica cuscan mato cunushoni isca huaquin, “Upa Diosin chofo urumanhuan muran ua yoiquin, ‘Unfi Abraham non Isaac non Jacob afoan un aton Diosiquin,’ ” ishon Moisés yoini. Nan rafu non fusti yamashtafiacanashu natian Dios fu niafo. <sup>27</sup> Nayofianishaquin natian niafo. Diosin noco tapima nantifi niafo. Nocon yoshin cuyopacunacama. Ascan manfin amaqiri shinanmisiquin, —ishon Jesús ato yoini.

*Diosin yonoa cuscan futsa fasi shara finacaiian*  
Mt 22.34-40

<sup>28</sup> Ascatan Jesús fu Saduceofo yoinanannifo cuscan Moisés tsain tapimamisiton nicani. Nicaquin ahuun nomuran shinanni, —Jesús ato cayacafi shara cumaran, —ishon shinanni. Ascashon arifi Jesús yocani, —¿Diosin yononi cuscan aafu Moisés cunushoni ratofomain fasi shara finacaiquin? —ishon yocaiton.

<sup>29</sup> —Israelifoan, nicasharacahuun. “Nocon Ifo Diosin fusti nocon Ifoquin. Futsan yamai. <sup>30</sup> Nocon Ifo Dios maton ointi muranshon noifain maton nomuranshonri noifain man shinansharai cuscan ahuun noifain fasi mutiscain maton Ifon Dios noicahuun,” ishon Moisés cununi. <sup>31</sup> Futsari nannoricoin yononi isca huaquin, “Nan mifiri min musu huamuai cuscarifi aquin mia chaima icafori noihuu.” Nan rafu Diosin mato yononi cuscan fasi shara finacaiianran, —ishon Jesús ato yoiaiton.

<sup>32</sup> —Tapimamisiton, mian cayacafi shara cuma. Icon min yoiacai Dios fusti. Tsoa futsacai Diosima. <sup>33</sup> Noncai Dios ahuashta inantiroma ahuun rafanan nocohuun noinon. Min yoiacai cuscan fusti shara. Ascacun non nocon Ifo Dios nocon ointi muranshon noifain nocon shinansharayashon noifain non fasi mutiscain nocon Ifo Dios noi nofiri non musu huamuai cuscarifi aquin non nocon chaima ica noiano. Ascaran fasi shara finacaiianran, —ishon yoini.

<sup>34</sup> Jesús nicashon cumasharani. Ascashon yoini, —Natian Upa Diosin ahuun yorafo imapaiyai cuscan mirifi min tapicuana afu nipashquin, —ishon Jesús yoini. Ascaiton nicacani puusinifoma. Afanancai tsoanshta Jesús ahua yocanima. Nantian yafi nan Jesús naitian afanan tsoan ahuashta yocanima. Ato cayacafi cumaiton nicacani tsoan cumanima aqui ranonifo.

*—¿Tsoamun Cristoquin? —huanifo*  
Mt 22.41-46; Lc 20.41-44

<sup>35</sup> Ascatan Jesús Israelifoan aton Dios fu tsainti pushu muranшон ato yosianan yocani, —¿Ahuuscain Moisés tsain tapimamisifoan yoimisi isca huaquin? “Criston David ahuun funaran,” ishon yoini. <sup>36</sup> Diospan Yoshin Sharanun David ahuun nomuran shinanmana cuscan yoini,

“Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’ ”

ishon Diosin yoini cuscan David cununi. <sup>37</sup> ¿Criston David Ifono ahuuscashucon ahuun funa itiromun? —Jesús ato huani. Yorahuanrasi Jesús yoiai cuscan nicacani fasi unimanifo.

—*Moisés cununi cuscan tapimamisifoan chaca huaforan, —ishon Jesús ato yoini*

*Mt 23.1-36; Lc 11.37-54; 20.45-47*

<sup>38</sup> Ascano nicatoshinifo Jesús ato yoiaiton, —¡Oinfain! A Moisés cununi cuscan tapimamisifoan saya chainipafo sahuushon ato oinmafoan-fafaincaini. Fasi tapicoianforan ato huamapaicaini. Yora ichaparasi ano foanscanifo “Sharacoinforan,” ato huamapaicaini. Fasi cacapaimisifo. <sup>39</sup> Ichananti pushu muran iquitan shafacafi tsaonifo. “Noco oinonfo, non tsaotiroran,” ishon shinannifo. Ichananshon piyainfoannori shafacafi tsaopainifo. <sup>40</sup> Ainfo funuomafo, “Non mia shara huairan,” huafliashon paranifo. Aton ahuarafonushcaquin. Fuparacaquin. Fasi chaicoi cu-firianifo atoqui oinanpaiquin. Dioshuunshoncai cuficoinnifoma. Nanscarafon Upa Diosin ato fasi onaintimacoinquin, —ishon Jesús ato yoini.

*Ainfomaqui man funu naa ahuomashtacun Dios inansharani*

*Lc 21.1-4*

<sup>41</sup> Yoitan fuhuunina cahua Jesús oinni Dios fu tsainti pushu muranшон yorahuanrasiton pui nanuti muran nanuiniyaifoanno. Yora mafo ichapayatton atirifoan paratama pui nanuti muran nanunifo. <sup>42</sup> Ascano ainfomaqui funu naano ahuomashtaton toro chimashta rafusi pui nanuti muran nanuni.

<sup>43</sup> Oinquin Jesús fu rafumisifo cunashon yoini. —¡Oincapon! Un mato iconquin yoinon. Na ainfo funuoma ahuomashtafliashon yora futsan inan cuscan aafin paratama nanua cuscara. <sup>44</sup> Ascano mafo ichapayafon inanfiacaquin ichapa tushu huanifo. Ascafia nan ainfoan nantifi ahuun pui nanuqui cuyoni. Inanqui anaititan. Afanancai ahuaunshon ahuun tushu fitiromaran, —ishon Jesús ato yoini.

## 13

—*Dios fu tsainti pushu paon ishquinran, —ishon Jesús ato yoini*

*Mt 24.1-2; Lc 21.5-6*

<sup>1</sup> Ascano Jesús Dios fu tsainti pushu murannoashu caiton afu rafumisifo futsan yoini, —Ifon, oinpon. Nocon Dios fu tsainti pushu fasi sharashtacoin. Toquiri cunu putsamuashu cunuacua uhuapacoin fasi sharashtaran, —ishon yoiaiton. <sup>2</sup> —¡Ai! ¡Oincapon! Natian Dios fu tsainti pushu toquiri putsamuashu cunuacua sharashtacoin. Ascafiahu na man oiain chipo paon ishquin. Afanancai toquirifo putsamua ishquima. Ratoshtacain putsamua tushuimaran, —ishon Jesús ato yoini.



*Jesús oti chaima ahuarafu ahuuscarashquiai cuscan ato yoini*

*Mt 24.3-28; Lc 21.7-24; 17.22-24*

<sup>3</sup> Ascano machi ahuun anu Olivo ano mapufaintan Jesús tsaoni nanno ishon Dios fu tsainti pushu ointiro ini. Tsoa futsacai ano inima Pedro non Santiago non Juan non Andrés non afo aquí funifo. <sup>4</sup> —¿Nan min yoiai cuscan ahutian ishquimun? ¿Ahuuscashomun non tapitiroquin? ¿Icataima non ahua ointromun tapishquin? Noco tapimahuu, — huaifoan.

<sup>5</sup> —Oinfain mato paranonfoma. <sup>6</sup> Yora ichapafaan. “Un Cristoran,” ishon mato parapaishcani. Ascashon ichapafori parashcani. <sup>7</sup> Mani futsafo ya futsafo rutunainfoan man nicashquin. Icataimari anori man nicaiyoicai. Anori nicai ratuyamacahuun. Un mato yoimisi cuscan nansacoin aiquin. Ascafia Jerusalén cuyoataima. <sup>8</sup> Mai futsan fu yorafu mai futsari ya rutunainfono mai futsafo anori fasi mai naiyanaiyaishqui icaifono mai futsanoafori yora tushuomafo icaino. Nanscai taushcani. Ascafiafashu chipo omitsiscai finacaishcani.

<sup>9</sup> Ascan itisharacahuun. Mato achishon mato niaifofaan maton ichananti pushu muranshon mato fasi coshashcaniquin. Niaifofaan aton ointaifi mato iquimashcani. Mato asca huacani. Uhuunshon man ato yoishquin. <sup>10</sup> Ahuun unutanani nan omitsiscacoinshquiai cuscan icataima uhuun tsain shara uhuunoa atirifiton nicataicanima. Uhuun tsain shara manifotiton nicacoiainfono un afanan ooshquin. Nantianri ua icoinra huaafo afanan omitsiscashquima.

<sup>11</sup> Ascano chipo mato achimashquin matohuunoa tsain chaca yoishcaquin. Nantianri, “¿Raquiri non huaimun?” ishon shinanyamacahuun. Nan nocoaiton un mato tapimashquin man cumasharanon. Mafincai man cumaima. Diospan Yoshin Sharahuunshon ahuun tsain maton nomuran nanumashquin man niaifofa cayacafi cumasharanon.

<sup>12</sup> Nantianri iyoaton chipocuqui tsain chaca huashquin achinonfo rutushcaquin. Nanscarifi aquí chipocuton ahuun ochiqui tsain chaca huashquin achinonfo rutushcaquin. Nanscarifiai facufoan aton apa yafi ahua afanan nicacasmashcani niaifofa yoishcani ato rutunonfo.

<sup>13</sup> Uhuunshon mato noicasmacani man ua tanasharaiton, manifotifoon mato noicasmashcani. Ascashon mato omitsiscahuafiaifainfoanno tsoan uhuunoashu omitsiscafiaquin tunucoin uhuun tsain tanasharaqui un-upacunacama. Nanfo un cushusharatiro uhuun Upa Dios icano nipasharanon.

<sup>14</sup> Ascacun Diosin ahuun yorafu fu imisi ano futsafoan ahuaa fasi chaca huai. Nan un mato yoiai cuscan tapicahuun. Nanfo oin man ratoran futsa Judea mai anoashu machi ano ichotacahuun. <sup>15</sup> Tsoan pushu osa futsa niashu afanan pushu muran iquiyotiroma ahuaa fipai. <sup>16</sup> Tsoan aton mau ano yonoi afanan pushu ano nasoyotiroma ahuun sahuuti fipai. <sup>17</sup> ¡Ohua! Ainfon facu nanuafo yafi aton facu yomumishtifo omitsiscaashcani.

<sup>18-19</sup> Natian yorafu omitsiscai cuscan tsoan ascara oinyomisima. Fasi finacaia yora omitsiscaiquin. Diosin yora tau huaquin onihuani chain cai tsoan ascaran omitsiscai oinyomisima. Tsoaricai afanan ascai omitsiscanacama. Ascan Upa Dios cuficahuun oipacutian ascanonma. <sup>20</sup> Nan omitsiscatifotian yorafoti cuyocuanani. Diosin yonoyamaino nan yorafoti cuyocuanafu. Ahuun yorafu nan catoanfo atohuun ramapaiqui omitsiscaitian shaturiscamashquin.

21-23 Ua nicasharacahuun. Omitsiscashquaiitian nocoatama un mato yoiyoi. Man omitsiscaitian fuparapaimitsamisifocoin matoqui oshon. Mato yoitiro isca huaquin, “Unfin Cristoquin,” ishon mato yoyimaraquin, “Unfin Diospan tsain yoimisiquin,” ishon mato yoishcani. Satanashuunshon yora atiroma cuscan mato ismai. Mato parapaishcaquin. Diosin nan catoanfo cushuyamaino atorifi nan fuparapaimitsamisifo icoinra huacuana. Ascano nantian tsoan mato yoiquin isca huai, “¡Oincapon! Naafin nocon Cristoquin. Cristo nocoqui oaran,” ishon yoiiafoan ato icoinra huayamacahuun.

*Jesús nan Diospan Furun afanan mai ano fotoshquin*

*Mt 24.29-35, 42, 44; Lc 21.25-36*

24-25 Ascan nan omitsiscai cuyocoiainno fari faquishcoin ishquin oshuri faquishcoin icaino fishifo nai ariashu pacui futsushquin. Nantifi nai murannofo naiyanaiyainqui futsushquin. <sup>26</sup> Nantianri un nai ariashu fuufoya camaqui mai ano fotoaino uhuun Upa Diosin ahuun yonohuunoashu un afanan matoqui fotoshquin. Nantififain ua oinshcani unfin Diospan facuquin. Un oaino fasi chashapacucahuanshquin. <sup>27</sup> Nantianri uhuun oinmatifo ufu nai muran icafo un nichishquin uhuun yorafo manifoti uqui ihuunonfo.

<sup>28</sup> Ascatan nii ohuamisifohuunoa ahuara un mato tapimanon. Ua nicasharacahuun. Casho pui risquisi futsuaiton man tapitiro faritian. <sup>29</sup> Nanscarifiai nanfo un mato yoiyai cuscaín futsuaiton man onantiro mun oti chaima nuno mai anoa niaifocoin iishquin. <sup>30</sup> Un mato icon yoi. Ahuarafo un mato yoiya cuscan a mai anoafan naiyocashoma oinshcaniquin. <sup>31</sup> Nocon nai yafi mai cuyoai cuscan fianananain futsuin. Uhuun tsain ascatarocon cayacaficoin. Iconcoin. Uhuun tsain un mato yoiyai cuscan nanscacoín aiquin. Fianannanpacunacama.

*Ahuutiaran Jesús afanan nai murannoashu mai ano fotoi tsoancai tapiama*

<sup>32</sup> Ascafia ahuutiaran un nai murannoashu afanan fotoicain tsoancai tapiama. Diosin oinmati afu nai muran icafoanricai tapiafoma. Urifi un Upa Diosin facufiashocai un tapiama. Nan uhuun Upa Diosin fustitofin tapiaquin. <sup>33</sup> Un afanan oaitian tsoan tapiama. Ascacufin oinfain. Itisharacahuun. <sup>34</sup> Shinancapon. Nocofunu mai futsa ari caquin iguisi ahuun oinmatifo yoitiro, “Un mato yoiyai cuscan uhuun pushu cushusharacahuun. Yonosharacahuun. Futsan uhuun pushu anoshon cushutiro un afanan nasoaitian un oinnon,” ishon ato yoitiro. <sup>35</sup> Nanscarifiai marifi itisharacahuun. Ahuutiaran un afanan matoqui nasoshquin tsoan tapiama. Fari caino iyamarai yamu nacucahuaino iyamarai tacaranun acaino iyamarai shafaino un nocoriscatiro. <sup>36</sup> Oinfain. Un nocoaitian oshacaquima ua yonosharashocahuun. <sup>37</sup> Un mato yoiyai cuscan un nantifi yorafo yoi, “Itisharacahuun,” —ishon Jesús ato yoini.

## 14

*—Ahuuscashomai non Jesús rututiroquin, —ishon shinannifo*

*Mt 26.1-5; Lc 22.1-2; Jn 11.45-53*

1-2 Ascano Jesús ato yoini natianri fusiti shafa nococuanaino. Nannoshon misi farashati maisi piinifo. [Nan fusiti Israelifoon Egipto mai

anoashu fonifo shinantacani. Nantianri Egipciofoan aton facu furo-nanfacu iyoafofosi Diosin namaquin cuyoiquin. Israelifo ato muran ipaonificanashu Egipciofoan aton facufo namafiaquin Israelifoan aton facufo finonmani.

Ascan faritifi ichanancashon Upa Diosin aton shunifoan aton facufo finonmani nanonfoma shinantacani. Ascan nan fuusiti anumisifo nocon shunifoan aton facufo finonmaniran.] Nantianri nocon yorafohu-unshon Dios cufimisi niaiffoan Moisés cununi cuscan tapimamisifo futan ichanancashon isca huaquin yoinifo, —¿Ahuuscashomun non Jesús rutumatiroquin? ¿Ahua chacamain ahuunoa non yoiqui rutumashquin? Natian fusimuainocai non achimatiroma. Yorafo fasi sinacani mutatirofo, —icashu yoinannifo. Jesús onushta rutumapaicani.

*Ainfoan ahuun ininti paratamacoin pui nuua Jesusqui ocani*  
Mt 26.6-13; Jn 12.1-8

<sup>3</sup> Ascano Jesús Betania ano cani. Cai Simón pushu muran iquini. Nan Simón nami rashquishi futsua ini. Nannoshon Jesús Simón aca-maquishon piti ano tsaocun ainfoan toquiri moti tsomashu otan aqui ocashquin. Nan toquiri ahuun anu alabastro moti huamua. A muran ininti fospí huani. Ininti ahuun anu nardo fasi pui nua. Ascano ainfoan motica fuputan Jesús ahuun mapoqui ininti ocani. <sup>4</sup> Atirifoan oincani sinanifo, —¿Ahuuscainmun na ainfoan ininti paratamacoin ahuun pui nuua potaquin? <sup>5</sup> Nan ininti inanmitsashon ahuun rafanan pui ichapa fishon yora ahuuomafo inanshara icuanaran, —ishon yoinifo. Yoicatan ainfoqui curushcain tsainnifo.

<sup>6</sup> —¿Ahuuscain na ainfoqui man tsain chipuain? Fucash huayamac-ahuun. Ua fasi shara huaquin. <sup>7</sup> Yora ahuuomafo matofu ipanacafo. Ratoran shafatan man ato shara huashotiro. Ascafia un nuno matofu ipanacama man ua shara huanon. <sup>8</sup> Na ainfoan nan oiainshta ua shara huua. Yora maiaquin ininti ocamisifo cuscan un nataiyamafiaiton na ainfoan ua shinanquin uqui ininti ocayoa. Ua ashquiai cuscan uqui ocaquin tau huua. <sup>9</sup> Un mato icon yoinon. Na tsain shara uhuunoa man-ifoti yoishcaquin. Nantianri na ainfoan ua aca cuscari ato yoishcaquin. Ascatan ua shara huua cuscan ahuunoiari shinanpacushcaquin, —ishon Jesús ato yoini.

*Judas yoini, —Un mato Jesús achimairan, —ato huani*  
Mt 26.14-16; Lc 22.3-6

<sup>10</sup> Ascano Jesús ato yoiquin afu rafumisifo doce futsan nan Judas Iscariote nocon yorahuunshon Dios cufimisi niaiffo ano cani Jesús ato achimashquin. <sup>11</sup> Nicacani niaiffo fasi unimanifo. —¡Aicho! Min noco Jesús achimaicai. Ascacun ahuun rafanan non mia pui inain-ran, —huanifo. Asca huaifono nannoshon Judaspan shinanquin tau huainifoanni, —¿Ahuuscashomain un Jesús ato achimanoain? —ishon shinainyofafaini.

*Jesús ahuun unutaqui afu rafumisifo futan pini*  
Mt 26.17-29; Lc 22.7-23; Jn 13.21-30; 1Co 11.23-26

<sup>12</sup> Ascano shinantani Israelifoan aton fuusitian nocoaino misi farashati maisi pimisifotian. Nantianri chashoanun facu piinifo. Nan chashoan facu faritifi rutupaonifo Diosin aton shunifo cushuni shinanonfo. Ascano Jesús fu rafumisifo aqui fucashon yocanifo,

—Ifon, Diosin nai oinmati nan afu imisiton nocon shunifoan aton facu iyoafofosi finonmani aton rutuquima. Non faritifi ichananmisi anori shinanshquin. Afanan natian non atiroquin. ¿Ascan rato pushu muran non mia itishara huashoimun nannoshon mi futan chashoanun facu piishquin? —ishon yocaifoan.

<sup>13</sup> —Pushurasi ano fotacahuun. Nannoa nocofunun unu tutsaomushon fuiton fuchishcaquin. Aqi nocoashu afu fotacahuun. <sup>14</sup> Nan iquiai ano afu iquifainshon pushu ifo yocacaquin, “Nocon tapimamison mia yocan, ‘¿Rato cunu muranshon ufu rafumisifo futan non chashoanun facu piimun?’ ” <sup>15</sup> Man yocaiton mato cunu uhuapa fomancayan ismaiquin. Nan cunu muranfin nan non yopaiti mato ismaiqui. Nannoshon noco ati shara huashotacahuun, —Jesús afu rafumisi rafu yononi.

<sup>16</sup> Ascano nan rafu pushurasi ano fonifoquin. Pushurasi ano focashon Jesús ato yoia cuscan nanscacoainton oinnifo. Ascashon chashoanun facu pichanshonifo.

<sup>17</sup> Man fari caino Jesús yafi afu rafuafo doce pushu ano noconifo. <sup>18</sup> Fomancayan focashon acamaquishon piti ano tsaoshon piaifoan Jesús ato yoini, —Icon un mato yoinon. Nuno u futan piai futsan ua achimaiquin, —ato huaiton.

<sup>19</sup> Nicacaquin aton ointi noconifo. Fasi shinannifo. Ascashu puusini-foma. —Ifon, uncai mia ashquimaran, —ishon nantiffain yocapacunifo. <sup>20</sup> —Nan man nocofunu doce u futan piai futsan uqui yonoafin ua achishcaniquin. <sup>21</sup> Unfin Diosin ariashu nuno mai ano fotoniquin. Un nocofunucuin cainshquin. Diosin tsain uhuunoa inon pacoai cununi cuscan un nai cai. Ascafia na nocofunun ua ato achimashufin arifi omitsiscapanacaquin. Caianmafin shara icuanaquin, —ishon Jesús ato yoini.

<sup>22</sup> Piainfoanno Jesús misi finifoantan iquisi apa Dios cufiyoni, —Upan, aicho, min noco shara huafafaini, —huani. Apa asca huatan afu rafumisifo yoiqui isca huani, —Na uhuun cayan cuscara. Picahuun, —ishon. Misi torupacushon atoti inancuniquin.

<sup>23</sup> Ascatan Apa Dios afanan cufinquin, —¡Aicho! Upan, min noco shara huaquin, —huani. Cuchori finifoantan aqui fimi unu fuatan ato inancuniquin. Ascaiton nantiffain ayapacunifo.

<sup>24</sup> Ascashon ato yoiquin, —Naafin uhuun imi cuscaraquin. Uhuun imi foiquin mun nai. Nantifi yorafoan chaca huamisifoanno un atohu-unoashu nai cai. Un ascaino yora ichapafo Diosin ato potapacunacama. Un ato nashoincai aton chaca soashoshquin. <sup>25</sup> Un mato icon yoi. Un nunoshon afanan mato futan un ayaima. Mun nai ari cai. Nan uhuun Upa Dios niaifocuin ica anoshon un afanan ayashquinran, —ishon ato yoini.

—“Uncai Jesús oinmisimaran,” min ato huashquicain, —ishon Jesús Pedro yoini

*Mt 26.30-35; Lc 22.1-34; Jn 13.36-38*

<sup>26</sup> Ascano ahuun tsain yoiqui anaititan Diosin tsain fanainnifo. Anaititan machi Olivos ano fonifo.

<sup>27</sup> Ascatan Jesús tsain futsan ato yoini, —Nantiffain man ua potafainicaiquin. Diosin tsain cununi isca huaquin, “Unfin chashoanfo cushumisi

un rutuicai. Ascano chashoanfo ichoi futsuiqui,” ishon cununi. Nan-scarifiai ua rutuaifoanno man uhuunoashu ratufaini foi ichoshquin. <sup>28</sup> Ascan a funiano Galilea ano man uqui nocoli foshquiran, —ishon Jesús ato yoini. <sup>29</sup> Ascaiton Pedronun Jesús cumani, —Nantifiton mia potafiaifoannocai un mia potanacamaran, —ishon yoiaiton.

<sup>30</sup> —Pedron, un mia icon yoicain. Na yamutan tacara cuoi rafuamano min ato yoiqui rafu non fusti huaicai, “Un Jesús oinmisimaran,” —ishon min ato yoicain. <sup>31</sup> —Ma, Ifon. Un mifu natirocai un ato yoinacama un mia oinmisimaran, —ishon Pedronun yoini. Nantifiton afu rafumisi-foan nannori yoinifo.

*Jesús Getsemaní anoshon Apa Dios cufini*

*Mt 26.36-46; Lc 22.39-46*

<sup>32</sup> Ascano nanno ihuifo mapoa ano ahuun anu Getsemaní ano Jesús afu rafumisifo ya cani. Jesús ato yoiquin, —Nuno tsaoshon ua manacahuun. Uhuun Upa fu un tsainyotanon, —ishon ato yoini. <sup>33</sup> Ascano Pedro non Santiago non Juan non afo ato iyoni. Fasi shinanquin ahuun nomuran omitsiscái tauai. <sup>34</sup> Ato yoiquin, —Unfin fasi oimitsiscái. Uhuun nomuran un fasi shinain. Mun muucoin un nai cuscan. Nunoshon ua manayocahuun. Un futan oinyocahuun, —ato huani. <sup>35-36</sup> Ato yoitan chaimashta catan fuopacucahuan Apa Dios fu tsainni. —Uhuun Upashtan, ua rutushcaini. Un omitsiscái cuscan mian numatiromainquin ua numahuu. Ascafiashton un apaiyai cuscan huaquima. Min apaiyai cuscan ua huahuu, —huani.

<sup>37</sup> Ascatan Apa fu tsainqui anaititan afanan atoqui oni. Oquin ato oian man oshafo ini, —¿Pedron, min oshamun? ¿Min u futan Dios cufimamun? <sup>38</sup> Oshaquima. Dios fu tsainhuun Satanás mato chaca huamapaiyai cuscan anonma. Maton nomuran Diosin mato imapaiyai cuscan marifi nanscasi huapafiaquicai mafin man atiromaquin, —ishon Jesús Pedro yoini.

<sup>39</sup> Ascashu afanan Apa fu tsainqui cai chaimashta cani. Apa cufian cuscan nannori afanan cufini. <sup>40</sup> Ascashon afanan atoqui nasoquin oian afanan afu rafuafo oshafo ini. Fasi oshapan noicani moipaiquin ranan-nifo. Raquirimain Jesús ato yoicai tapinifoma. Ascan puusinifoma.

<sup>41</sup> Ascaino afanan atomaqui chaimashta cashon Apa Dios cufitani nasoquin oian afanan man oshafo ini. Ascaiton ato yoini, —¿Man man afanan oshamun? Nanscanon. Man oshatiro. Ascafiashu man afanan natian oshatiroma. Natianfin man ua achi fucaniquin. Na nocofunun ua yora chacafo achimani oiquin. <sup>42</sup> Funicahuun. Non canon. Na nocofunun ua noicasmaifo ua ato achimani oiquin, —ato huani.

*Jesús achinifo*

*Mt 26.47-56; Lc 22.47-53; Jn 18.2-11*

<sup>43</sup> Ascano Judas nan Jesús fu rafumisi futsan aqui oni. Yorarasi Judas fu nopy yafi coshati tsomacashu funifo. Israelifoan aton yorafohu-unshon Dios cufimisi niaifofo non Moisés tsain tapimamisifo ato yonoa funifo. <sup>44</sup> Judaspan yorafo Jesús achimashquin yoini, —Un Jesús tsoacaiton tapicahuun nanfin Jesusquin. Achiti sharaqui. Achicatan niaifofo ano iyocahuun, —ato huani. <sup>45</sup> Asca huatan samamashta nocoshon tsoaqui. Tsoatan, “Tapimamisiton,” ishon yoini. <sup>46</sup> Ascano nan Judas fu fuafoan Jesús achinifo. Achicashon niaifofo ano iyoshquin. <sup>47</sup> Ascaino

Jesús chaimashta futsan nicun. Nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>48</sup> Ascaiton Jesús ato yoini, —¿Man shinan un yomutsocunmun coshatifo ya nopu ya man ua achipai fua? <sup>49</sup> Shafatifi un Dios fu tsainti pushu muranshon un mato yosifaitocai man ua achiyoti huama. Natian man ua acai cuscan Diosin tsain uhuunua cununi cuscacoin man ua huairan, —ishon Jesús ato yoini. <sup>50</sup> Ascaino afu rafumisifoan potafaini amaqui ichonifo.

<sup>51-52</sup> Ascano pushcoai man Jesús mufainaiton achiaifoanno ahuun piracomua shorifaini chitoria ichoni.

*Israeli aton niaifofoan Jesús yocanifo, —¿Min ahua chaca huamisimun? —ishon yocani*

*Mt 26.57-68; Lc 22.54-55, 63-71; Jn 18.12-14, 19-24*

<sup>53</sup> Ascano achicashon Israelifoan yorafohuunshon Dios cufimisi aton niaifocoinin pushu ano Jesús iyonifo. Nanno nan niaifofo non Moisés cununi cuscan tapimamisifo ichanannifo. <sup>54</sup> Ascaino Pedro ato cachiori chaima cani. Nocon yorafohuunshon Dios cufimisi niaifocoin ahuun pushu unmainti ranushumuafo yooaino Pedrori atofu yooni.

<sup>55</sup> —¿Nonmun raquiri huatiroquin Jesús ahua chaca huaran ishon rutushquin? Ahuacai ahuusca huua non nicayomisima non rutuai, —icashu Israelifoan aton niaifo yoinannifo. Nanno pushu muran nantifi Israelifoan aton niaifofo ichanannifo. <sup>56</sup> Yora ichapafoan, —Jesús chaca huaran, —ishon yoifiacaquin nannorisi shinannifoma. Paracaquin.

<sup>57</sup> Yoiti huaquin anaitiafono nocofunu futsafoan niaifofoan aton ointaifi Jesusqui tsain chaca huanifo. Chanicani. <sup>58</sup> —Non nicaino na nocofunu icsaita, “Nocon Dios fu tsainti pushu yorafoan acafo. Un choqui ashquin. Ascashofin osha rafu non fusti finontan un afanan futsa huashquicain. Unfin un atiroquin. Tsoan nocofunun u futan aquima. Urus fustifin un ashquicai,” ishon Jesús yoitaran, —ishon yoinifo. <sup>59</sup> Yoifiacaquin tsoan anorisi yoinifoma.

<sup>60</sup> Ascano nocon yorafohuunshon Dios cufimisi niaifocoinin aton ointaifi Jesús yocani, —¿Miqui tsain chaca huaafo cuscan icon iyamarai iconmamun? ¿Min ato cumaimamun? —ishon yocaino. <sup>61</sup> Jesús puusinima. Ascaiton afanan yoini, —¿Diosin sharapan mia catonnimun min ahuun facu inon? ¿Icon min ahuun facucocoinmun? —ishon niaifocoinin yocani.

<sup>62</sup> —Mian yoiai cuscafin unquin. Upa Diosin ahuaamishti huatiro. Chipu man ua oinshquicai uhuun Upa niaifo fu un icaiton. Urifimain afu niaifocoianshufin. Un nai ariashu nai coin camaqui un oaiton man ua oinshquicai. Un mai ano fotoshquinran, —ishon Jesús ato yoini.

<sup>63-64</sup> Nicatan Israelifoan aton niaifocoin Jesusqui fasi sinaquin. —Man man nica Jesús fasi chaca huua. “Un Diospan facuran,” icaiton man man nica. Ascano non tsain futsa yopaima a onaintimashqui. ¿Na nocofunun non ahuusca huaimun? —ishon niaifoan ato yoini. Ascashon nantififain, —Diosquiri chaca huaquin nanonquin, —ishon yoinifo. <sup>65</sup> Asca huatan ahuun fusoqui cumo michofain funushfain sutunifo. Sutucashon cashu huanifo, —Min Cristomainquin min nantifi tapicoian. Ascan tsoan mia sutuamainquin noco yoihuu, —ishon cashu mutsama huanifo. Ascatan ranushumuafoanri Jesús fasi coshanifo.

*Pedro, —Uncai Jesús oinmisimaran, —ato huani*

*Mt 26.69-75; Lc 22.56-62; Jn 18.15-18, 25-27*

<sup>66</sup> Ascainofin Pedron nocon yorafohuunshon Dios cufimisi niaifocoinin pushu umaiti ano atofu yooaiton niaifoon ahuun oinmati shomayaton Pedro fuchiniquin. <sup>67</sup> Fuchishon yoini, —Na nocofunufin Jesús Nazaret anoa min afu rafumisiquin, —huani.

<sup>68</sup> —Ma. Mian yoiai cuscacai un tapiamaquin, —Pedronun shomaya huani. Yoiqui asca huatan shoi caincaiti ano caani.

<sup>69</sup> Ascashon nan oinmati shomayaton Pedro fuchia afu niafo yoini, —Na nocofununfin arifi Jesús fu rafumisiquin, —huaiton. <sup>70</sup> —Ma. Uncai Jesús fu rafumisimaran, —ishon Pedronun yoini. Samaracatan Pedron fu niafoan yoinifo, —Icon. Mirifi min Galilea mai anoashu oa. Ascan minfin Jesús fu rafumisiquin, —ishon yoinifo.

<sup>71</sup> —Un mato paratiroma. Un chanicun ua Diosin chii uru muran potatiroquin. Diosin tapiafin un mato iconcain yoiaquin. Uncai na nocofunu Jesús oinmisimaran, —ishon Pedro ato yoini.

<sup>72</sup> Ascaino samamashta afanan tacara cuoni. Cuoino Jesús yoia cuscaicin Pedronun shinantani. —Pedro, un mia yoi. Na yamutan tacara cuoi rafuamano min ato yoiqui rafu non fusti huaicain, “Un Jesús oinmisimaquin,” —ishon Jesús yoia cuscan Pedronun shinantani. Ascashu fasi uaini.

## 15

*Pilato ano Jesús iyonifo*

*Mt 27.1-2, 11-14; Lc 23.1-5; Jn 18.28-38*

<sup>1</sup> Ascano shafa acuaino nocon yorahuunshon Dios cufimisi niaifofo yafi Moisés cununi cuscan tapimamisifo Dios fu tsainti pushu cushumisifo fu ichanancashon shinanpainifo, —¿Ahuuscashomain non Jesús rutumaicai? Nan Pilato Romanonfoan aton niaifon ahuun mai arishon nocoqui nichini nocon niaifo inon. Non Pilato ano Jesús iyoicanon, —icashu yoinannifo. Ascatan munushcashon Pilato ano iyonifo.

<sup>2</sup> —¿Minmain Israelifoon aton niaifocoinquin? —ishon Pilaton Jesús yocani. —Aifain. Nan min ua yocain cuscafin unquin, —Jesús huani.

<sup>3</sup> Ascano nocon yorahuunshon Dios cufimisi niaifofoan Jesusqui tsain chaca huanifo. <sup>4</sup> Ascashon Pilaton yoini, —¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini.

<sup>5</sup> Asca huaino puusinima. AQUI tsain chaca huafiaifono puusinima. Ascaino Pilaton ahuun nomuran shinanquin, —¡Air! ¿Ahuuscain ato cumapaimamun? —ishon shinanniquin.

*Pilaton ato Jesús inanni rutunonfo*

*Mt 27.15-31; Lc 23.13-25; Jn 18.38-19.16*

<sup>6</sup> Ascatan aton fuusititian faritifi cunu muran iquiafo fusti ato caimpaoni. —¿Ratocai man caimaimamun? —ishon Pilato fuusititian ato faritifi yocapaoni. <sup>7</sup> Nantianri nocofunu Barrabás cunu muran ini. Nanton yorafo shinanchacamani. —Romanonfoan aton niaifofo non potanon, —ato huani. Fasi ato mucumati huapaoni. Asca yora ichapafanon Romanon niaifo potapainifo. Nantianri Barrabás yora rutuni. Ascaiton ranushumuafono cunu muran iquimanifo. <sup>8</sup> Ascatan man Jesús achiafono Israelifoon Pilato yoicaquin, —Min noco faritifi fuusititian

ashopaoni cuscan afanan noco huashohuun. Afanan cunu muran iquia futsan noco caimashohuun, —huanifo.

<sup>9-10</sup> —Jesuscai ahua chaca huamisima. Ato ashoan cuscacai Israelifo aton niaifofoan atiroma. Ascacufin Israeli niaifofo Jesusqui sinacaniran, —ishon Pilato ahuun nomuran shinanniquin. Ascashon ato yoini, —¿Maton niaifo Jesús man caimapaimun? Un mato caimashonon, —ishon ato yocafishon. <sup>11</sup> Israelifoan aton niaifofo nannosi ichanannifo ato shinanchacamapaicani. —“Jesús noco caimashotama Barrabás noco caimashohuun,” ishon Pilato yoicahuun, —ishon niaifofoan yorafo yononi.

<sup>12</sup> Nannori, —Israelifoan, man yoimisi Jesús maton niaifo. ¿Ascacufin un Barrabás caimashomun un Jesús ahusca huaicai? —ishon ato yocani.

<sup>13</sup> Nantifishon, —Ihui coyán iquinanqui mastahuun, —ishon oi ashcafinin yononifo.

<sup>14</sup> —Ahuuscacufin. ¿Ahuamun chaca huaquin? —ishon yocani. Ato yocafiaiton fasi curushcain, —Ihui coyán iquinanqui mastahuun nariscanon, —huarianifo.

<sup>15</sup> Sinaifoan oinquin Pilato ato rau huapaiquin Barrabás caimaniquin. Ascashon ato yonoa fichi cunoqui tuchiaiton Jesús coshaquin futsanifo. Ascatan mastashcaquin iyonifo.

### *Ranushumuafoan Jesús cashu mutsama huanifo*

<sup>16</sup> Ranushumua Romanonfoanfin Jesús iyonifoquin. Niaifoan ahuun pushu chaimashta. Nannofin ranushumuafoan aton pushurasi iniquin. Nanno iyonifo. Ascashon niaifo cushumisifo ranushumuafoan ato chifi cunanifo oin funonfo. <sup>17</sup> Ascashon ahuun sahuuti pucanifo. Pucatan futsa shonan sahumanifo. Ascatari mosha chainipafo maiti huashon maimanifo. <sup>18-19</sup> Ascashon yoicaquin, —¡Aicho! Minfin Israelifoan aton niaifoquin, —icashu aqui cashupainifo. Asca huacatan ratoconun mai chachishonifo. Aqui cashupaiqui poquti ahuun mapo cosharianifo. Ascatan aqui cumo michonifo. <sup>20</sup> Ascashon aqui paranaquin cashushonifo. Cashushoncatanfin sahuuti shonan pucashon ahuun sahuuticoin afanan sahumanifo. Ascashon ihui coyán iquinanqui mastai focaquin iyonifoquin.

### *Jesús mastanifo cuscan*

*Mt 27.32-44; Lc 23.26-43; Jn 19.17-27*

<sup>21</sup> Jesús iyocaquin oianfo pushurasi patasharifo nocofunu Simón oaiton fuchishon ato finonfoanpaiyaiton ranushumuafoan achishon yoini, —Minfin ahuun ihui coyán iquinan foicaicain —ishon ranushumuafoan iyamafaini. Nan Simón Cirene mai anoashu oa iniquin. Ahuun facu rafu Alejandro yafi Rufo. <sup>22</sup> Gólgota ano Jesús iyonifo. Gólgota onicoinnin tsainmanfin mapo shao. <sup>23</sup> Nanno nococashon fimi unu paun tashipia osia Jesús ayamapaiyaifoan ayanima. <sup>24</sup> Ascatan Jesús ihui coyán iquinanqui mastanifo. Mastacatan ahuun sahuuti fianshcaquin. Toquiri tocoro rafu ya cashuqui potapacunifo. Nan finonmanaton ahuun sahuuti fiqui tau huani. Asca huapatan cuyonfianifo.

<sup>25</sup> Man fari nai pochinin racano mastanifoquin. <sup>26</sup> Man mastacashon amanaonri ihui coyán iquinanqui cununifo isca huaquin,

ISRAELIFOAN ATON NIAIFOCINQUIN



ishon amanaonri cununi. <sup>27</sup> Ascashon yomutso rafuri mastanifo. Ocuma futsa futsafain ocuma futsa anifoquin. <sup>28</sup> Nannori ahuunoa cunuyoni cuscan, —Shinanfo arifi chaca shafai, —ishon Diosin tsain inonpacoai cuscacoin aquin cununiquin. <sup>29-30</sup> Ascashon camacaquin, —¡Cuu! Minfin yoimisiquin nocon Dios fu tsainti pushu min choquiagai. Ascatanfi osha rafu non fusti finontan min afanan futsa huairan min ica. Iconmainquin mifiri numatan fotohuu. Ihui coyan iquinanmaquinoashu fotohuu, —ishon roanifo.

<sup>31</sup> Ascano nanscarifiai nocon yorafohuunshon Dios cufimisi niaifofo yafi Moisés cununi cuscan tapimamisifoan aqui cashupai yoinannifo, —Nanton futsafosi numafiatiroshaquicai aficai numatiroma. <sup>32</sup> Iconmainquin aafin Criston Diospan Furun Israelifoan nocon niaifoashu ihui coyan iquinanhuunoashu fotoaiton non oiniquifin non icoinra huaicai, —icashu yoinannifo. Ascashon afu ihui coyan iquinanqui masta rafutari aqui tsain chaca huaquin roanifo.

### *Jesús nani cuscan*

*Mt 27.45-56; Lc 23.44-49; Jn 19.28-30*

<sup>33</sup> Ascatan fari masafinin racano nan maitio faquishpacucahuani. Ascashu man fari caino afanan shafani. <sup>34</sup> Nantianri Jesús oi ashcafinin apa cunani, —*Eloi, Eloi, ¿lema sabactani?* —oinicoinin tsain manfin, —*¿Uhuun Diosin, uhuun Diosin, ahuuscain mian potamun?* —huani.

<sup>35</sup> Yorafaoan mapo casho Jesús nicacaquin, —Nicacapon. Elías cunaiton, —huanifo.

<sup>36</sup> Ascainofin nocofunu futsan ichoniquin. Fimi unu focash muran nashan nanushon fiicai ichotan fitani oshon faca tahua shatun tuhuunifoantan Jesús inanpaiyaiton yoini, —Non oinyonon. Elías oshomain fotomaicai. Non oinyonon, —ishon cashu mutsama huanifo.

<sup>37</sup> Ascainofin Jesús fasi fiisinacahuaniquin. Fiisina cahuatanfin naaniquin.

<sup>38</sup> Nanscatapaiyaino Israelifoan aton Dios fu tsainti pushu murannoa pano putan pochimua afincoin fashnupacu cahuaniquin. <sup>39</sup> Ascaiton, —Iconfinquin na nocofunufin Diospan Furunquin, —ishon ranushumua niaifoan Jesús naa cuscan oinshon yoini.

<sup>40</sup> Nannoshori ainfofoan chai mapo casho oinnifo. Futsan María Magdalena non María futsan Santiago non José aton ahua non Salomé. <sup>41</sup> Nan rafu non fusti ainfofo futsafoanri chai mapo casho oinnifo. Galilea anoashu Jesús fu foanfainmisifo cushusharashcaquin. Ainfofo futsafoanri Jerusalén ano afu funifo. Ato furi nanno nia ini.

### *Jesús mai huanifo cuscan*

*Mt 27.57-61; Lc 23.50-56; Jn 19.38-42*

<sup>42-43</sup> Ascatan sabado fainaca shafatan Israelifoan nan shafan anunifo, —Itisharati shafaran, —ishon anunifo. Nan itisharati shafatan man fari caino nocofunu José ratutama Pilato niaifo ano cani. Nan José arifi Israelifoan aton niaifo futsan. Arimatea mai anoa ini. Nanton manamisi Cristo Diosin catoanton aton niaifo inon. Nanscacaini cashon José Pilato yoini, —Niaifon, un Jesús ahuun caya ihui coyan iquinanmaquinoashu fotomapai mahua quini muran mai huai cashquin. Un mia yocai oa, —ishon yoini. <sup>44</sup> Pilaton nicatan, —¡Aira! *¿Ahuuscain Jesús samamashta naamun?* —ishon shinanni. Ascashon ranushumua cunani yocashquin,

—¿Iconmun man Jesús naamun? —ishon yocaiton. —Ai, man naaran, —ishon ranushumuaton cumani. <sup>45</sup> Ascaiton nicaquin, —Jesús ahuun caya Josén fotomatiro mahua quini muran mai huashquin, —ishon Pilaton ranushumua yononi. <sup>46</sup> Ascatan José pano oshopa sharacoin fiini. Fiitan a mastafoto ihui coyan iquinanmaquinoa Jesús ahuun caya fotomapacufoan ahuun yoratishton nan pano oshopa sharacoinchi raconi. Racoshon toquiri mahua quini muran mai huani. Mai huashon toquirininhuanun fuponifo. <sup>47</sup> Mai huaifono María Magdalena futan María futsan José futsan ahuan nannoshon oinnifo.

## 16

*Jesús maiashu funini cuscan*

*Mt 28.1-10; Lc 24.1-12; Jn 20.1-10*

<sup>1</sup> Ascano Israelifoan aton tunutitian cuyoano María Magdalena non María futsan Santiago ahuan non Salomé non afoan ininti sharashta finifo Jesús ahuun cayaqui ocashcaquin. <sup>2-3</sup> Ascano iyoconaino nan Domingoai shafatan funamarishta ainfo rafu non fusti Jesús mai ano fonifo yoinanfonifo, —¿Nocomain tsoa toquirininhuan quini fupushonan? —icashu ainfo rafu non fusti yoinannifo.

<sup>4</sup> Nococaquin oianfo quini ahuun fupoita toquirininhuan toromahuan man fupucuaini. <sup>5</sup> Ascaino iquifainpaiquin oianfo nocon mumicayahuri man ointiaca quini muran tsaoan ini. Sahuuti osho sharashta sahuuashu. Fuchitan mustai irinifo.

<sup>6</sup> Ascaiton ato yoini, —Ratuyamacahuun. Man Jesús funicainaquin. Man funai Jesúscai nunoma. Mastafaitafo man funiaquin. Na quini muran raca iquitano. Oin fucapon. <sup>7</sup> Afu rafumisifo yoitacahuun. Pedrori yoifain. “Jesús Galilea ano caiyoi tauicaquin. Anoshon mato manai. Mato yoimisi cuscan nannoa man ointiroran,” ishon man ointiaca Upa Diosin atoqui nichiaton, —ato yoini.

<sup>8</sup> Nicafaini nan ainfo rafu non fusti mahua quini murannoashu ichonifo. Ichoainfoancai icoinra huaquin rashquinifoma. Ratufaini focaquin rama oianfo cuscan tsoa yoinifoma.

*Jesús María Magdalena oinmaquin tau huani*

*Jn 20.11-18*

<sup>9</sup> Ascano Jesús Domingo funamanrishta funini. Funiashu María Magdalenaqui nocoi tauni. Jesús naataima Mariamaquinoa yoshin chaca siete potani. <sup>10</sup> Jesús oian cuscan afu rafuafo ano cani ato tapimashquin. Atoqui nocoshon oian Jesús shinancani uainifo. <sup>11</sup> —Un rama Jesús oian. Man funiaran, —ishon María ato yoifiaiton nicacaquin tsoan icoinra huanima.

*Jesús afu rafumisifo rafu oinmani*

*Lc 24.13-35*

<sup>12</sup> Ascano ahuun tanamisi rafu fai foaifoanno Jesús atoqui niriscatani. Ascaitocai onannifoma. <sup>13</sup> Onancanashu afu rafumisi futsafo ano fonifo ato tapimashquin. —Non Jesús oianran, —ishon ato yoifiaifoon tsoan atori icoinra huanima.

*Jesús afu rafumisifo once yononi cuscan*

*Mt 28.16-20; Lc 24.36-49; Jn 20.19-23*

<sup>14</sup> Ascatan chipo piyainfoanno Jesús atogui nocoriscatani. Ascashon ato yoini, —¿Ahuuscain un afanan funia man icoinra huamamun? Futsanfoan ua oinshon mato yoifiaiton man ato icoinra huamaran, —ishon afu rafumisifo once yoini.

<sup>15</sup> Ascano ato yoiquin, —Mun funia. Atohuunoashu naiyofiahu un afanan funia aton chaca soashoshquin ufu nipanonfo. Manifoti ato yoitacahuun. <sup>16</sup> Ratoran futsanfoan uhuun tsain shara icoinra huatan unu muran iquimamuashu ufu Upa Dios icano nipatiroquin. Asafia ratoran futsafoan nan tsain shara uhuunoa icoinra huayamashu ahuun chaca ahuun nupacunaca. Ascashufin omitsiscapanaca muran fotirofoquin. <sup>17</sup> Ascano ratoran ua icoinra huashon uhuunshon yoshin chaca futsamaquinoa potafain tsain shara tsoan nicayomisima cuscara yoifain <sup>18</sup> rono paupan tsomashu yotucuyamarain rao paupan ayashu ahuuscayamacain isinin imisifo manmanshon caya huamashquiran, —ishon Jesús ato yoini.

*Jesús nai muran Apa ari cani*

*Lc 24.50-53*

<sup>19</sup> Ato yoitan Upa Diosin atomaquishon nocon Ifo Jesús nai muran ihuini afu niaifocoin inon. <sup>20</sup> Ascatan afu rafumisifo maitio foan-fafaincaquin Jesushuunoa ato yoiaifono, nocon Ifon atofu yononi ahua-mamishti ahuunshon huanonfo. Ascano nocon Ifoan tsainhuunoa ato yoini cuscan icoinra huanifo. Nanti.

## Lucas Jesushuunoa Cununi

*Lucaspan tau huaquin ahuun tsain cununi cuscan*

1-2 Teófilo un mia cunu fomai futsafoan Jesucristohuunoa cunuafo cuscan mirifi min icoinra huacoinnon. Jesús acaiton oinmisifo cuscan yafi ahuun tsain yoimisifoan noco yoinifo cuscan nannori futsafoan aqui cununifo. <sup>3</sup> Ascano urifi un nantifi yocapacuni Jesushuunoa aqui cunushquin. Nan caini cuscan huafain nan ahumamishti huayopaon-ishaquin apa ari nai muran naso caini cani. Ascacun afu rafuafo un ato yoca urifi tapisharashqui. Ascashon cayacafi cunushon mia fomashquin. <sup>4</sup> Ascacun uhuun cunuhuunshon mia futsafoan yosiainfo cuscan min icoinra huacointiro.

*Diosin nai oinmatinin nan Juan yorafo unu muran iquimapacumisi caiantaima ahuun apa tapimayoni*

<sup>5</sup> Ascacun natian un nica cuscan un mia yoinon. Herodes Judea anoa niaifoatian nantianri Zacarías nocofunu shara nanno ini. Naanfin Aarón ahuun funaquin. Ascashu nannoa ahuun caifohuunshon Dios cufimisi ipaoni. Aarón ahuun funafo shoco ranan. Nan shoco futsafoan aton niaifo Abías. Nanrifi Zacarías ahuun niaifo ini. Nan Zacarías ahuin Isabel arifi Aarón funa. <sup>6</sup> Ascashon nan rafutan Diosin tsain cununi cuscan nicasharacoinpaonifo. Nantifi Diosin yononi cuscan tanasharamisifo. Nan rafutan tanasharaifoan Diosin oinpaoni. Ascacuai tsoan ato ahuashta rafatiro ipaonima. <sup>7</sup> Ascafiashu facuoma rafu. Zacarías anifo icaino ahuinri yoshafo toosma ini.

<sup>8</sup> Ascano Abías ahuun shocofo nan ahuun yorafohuunshon Dios cufimisifo ato yoini isca huaquin, —Manfin natian siete oshatan Dios cufiti pushu muranshon man yonoshoncai, —ishon ato yoini. Ascano nannori Zacarías atofu ini. <sup>9</sup> Nantianri Zacarías catonni Dios fu tsainti pushu muran iquishon ininti shara coanon. Nan ininti ahuun anu incienso. Nanscara cufimisifoan aton fuyamisi ipaoni. <sup>10</sup> Nan incienso fiin cuscara coaino yora ichapafo cufiti pushu umainti ano nishon Dios cufishcaquin.

<sup>11</sup> Ascashon Dios cufiti camaqui incienso coa ahuun mumihuuri Diospan oinmati afu nai muran ica Zacariasqui niriscatani. <sup>12</sup> Ascaino Zacarías mustairitan fasi ratucoinni. <sup>13</sup> Ascafiaiton Diosin oinmatinin afu nai muran icaton yoini isca huaquin, —Ratuyamahuu, Zacarías. Min cufiainton Diosin man mia nica. Min ahuin Isabel chipo furonanfacu nanushquin. Ascan caincun min anuquin Juanran min huashquin. <sup>14</sup> Ascashu min fasi aqui unimasharacoinshquin. Ascaino yorafori fasi aqui unimacoinshquin caiano. <sup>15</sup> Ascano Upa Diosirifi aqui unimashquin. Nocofunu fasi sharacoin iishquin. Ascashocai ahuaara pau ayapacunacama. Fimi unu pau ayayamafain ayati futsa pauri ayashquima. Caiyaintian Diosin Yoshin sharapan nan iquishquin. <sup>16</sup> Nan nocofunuaition ahuun caifo Israelifo Diosin tsain shara ato yoishquin ato chaca shatunonfo. Ascano aton Ifo Diosiqui nasononfo.

<sup>17</sup> Ascashu nan Juan Elías ipaoni cuscara arifi iishquin. Elías Dioshuunshon ahuun yorafo cayacafi icocoin tapimapaoni cuscan nanscarifi

aqui Juanpan ahuun yorafo arifi ato tapimashquin. Ascano ahuun tsainhuunoashu ato apafu yafi aton facufu afanan noinanshcani. Ascashu nan Diosin tsain nicacasmamisifoan arifi aton chaca shatucashon Dios icoinra huafain shinansharashcani. Ascacun Juanhuunoashu ahuun caifofu itisharashcani Diospan furun atoqui nocoaitian a nicasharashcaniran, —ishon yoiaiton.

<sup>18</sup> Nicaquin Zacarías cumani, —¿Ahuuscashomun min yoiai cuscan un icoinra huatiroquin? Unfi anifocoinquin. Uhuun ahuinrifi yoshafocoin, —huaiton.

<sup>19</sup> Afanan cumaquin, —Unfi Gabrielquin. Un Dios fu imisi. Ascacun nanton ua nichian un ahuun tsain shara mia yoinon. <sup>20</sup> Ascan un mia yoiai cuscaai mian icoinra huaima. Ascan natiancai min afanan tsainyoima nan min facu caiyaintian. Un mia yoiai cuscafin nan apaiyaintian Diosin huaashquiquin, —ishon Diosin nai oinmatinin yoini.

<sup>21</sup> Ascaino yorafoan Dios fu tsainti pushu umaintishon cufinquin anaiticatan Zacarías mananifo. Ascafiaino Zacarías atoqui funa caimaino yoinifo, —¿Ahuuscain Dios cufiti pushu murannoashu Zacarías saman huaimun? —icashu yoinannifo. <sup>22</sup> Ascariaifoanno atoqui cainfishocai ato tsainquinima. A pucutiroma muuquin ahuun mucupan ato yoi fustini. Ascaiton onannifo Dios fu tsainti pushu muranshon Zacarías namapan cuscara oianran, icashu ahuun yoinannifo.

<sup>23</sup> Ascashu yorafohuunshon Dios cufimisifo ato yono anaiticatan Dios cufiti pushu murannoashu fonifo. Ascaino Zacarías arifi ahuun pushu ano cani. <sup>24</sup> Ascashon chipo ahuinin facu nanuni. Ascashucaai ahuun pushu murannoashu mucu fustiti oshu raqui caipainima. <sup>25</sup> Ascashon Isabel shinanquin isca huani, —¡Aicho! Diosihuunshon uhuun funun ua facu nanumana. Diosin ua ashoan. Afin ua nanumapaiyaintian ua facu nanumana. Uhuun ramapaiquin. Asca natiancai afanan uhuunoa yorafoan yoitiroa isca huaquin, “Nacai facuyanacamaran,” ishocai yoitirofomaran, —ishon shinanni.

*Jesús cainshquiai cuscan Diosin nai oinmatinin yoini*

<sup>26-27</sup> Ascano seis oshu Isabelqui man caano Diosin nai oinmati Gabriel Mariaqui nirisatani. Nan María funuoma ini. José fu fiananfotaima afu iyopaquinima. Tsoaricai afu imisima. Ascan José ahuun shunifin David iniquin. Nan Israelifoan ato niaifo ipaoni. Ascacun Diosin ahuun oinmati afu nai muran icaton yoini isca huaquin, —Galilea mai Nazaret pushurasi muran Mariaqui catahuun, —ishon ahuun oinmati Gabriel nichini. <sup>28</sup> Ascano aqui nocoshon yoini, —Un miqui oa. Diosin oian min fasi sharacoincun. Mia fasi noicoin. Nocon Ifo mifu icaran, —ishon yoini.

<sup>29</sup> Ascaiton nicaquin María ahuun nomuran shinanpaini, —¿Raquiri ua yoipaimun? —ishon shinanni. <sup>30</sup> Ascaiton afanan cumani, —Maria, ratuyamahuu. Diosin mihuun noifain miqui unimasharai. <sup>31</sup> Ascan minfin natian furonanfacu nanuicai. Ascashu caincun min anuquin Jesusran, huaashquin. <sup>32</sup> Ascano caianshu niaifocoin iishquin. Diosin nai murannoaton ahuun shuni David niaifo ipaoni cuscan arifi apahuunoashu niaifocoin iishquin. <sup>33</sup> Ascashu naanfin Israelifoan aton niaifo unupacunacamaran, —ishon Gabriel yoiaiton.

<sup>34</sup> Afanan María cumani, —Uncai funuyamafinquin. Uacai tsoan tanamisima. ¿Ascan ahuuscashomun un facu nanutiroquin? —huaiton.

<sup>35</sup> Diosin oinmatinin afu nai muran icaton afanan María cumani, — Diosin ahuun Yoshin Sharapan miqui oshon mia facu nanumashquin. Nanto ahuun curushhuunshon ahuamamishti huatiro. Nanhuunshon mia facu nanumashquin. Ascan nan facu cainshquiaifin shara fustisi imisiquin. Ahuashtacai chaca huamisima. Naanfi Diospan facuquin. <sup>36</sup> Min yaya yoshafoancai facu nanumisima. Ascan toosmaran huafiamisifo natian man facu nanua seis oshu man aqui caa. <sup>37</sup> “Ascacun ahuacai Diosin aquimaracai,” non huatiroma. Nantofi ahuamamishti huatiroquin, —ishon yoini.

<sup>38</sup> Ascaiton afanan María cumani, —Unfin uhuun Ifoan oinmatiquin. Affin nan apaiyai cuscan ua huatiroquin. Nan mian yoiai cuscan ua huanonquin, —ishon María yoiaino amaquinoashu yamariscatani.

*Marían Isabel oin cai cani*

<sup>39</sup> Ascano man shafa ranan finontan María ahuun yaya ano cai fasi coshi cani nocoriscapai. Nan Judea muran pushurasi ano machihuan-rasifo ini. <sup>40</sup> Nocotan Zacarías ahuun pushu muran iquitoshiquin ahuun yayan Isabel yoini, —Yayan, un mia oinyoiran, —huani. <sup>41</sup> Ascaiton nicai Isabel ahuun shaqui muranshon ahuun facun potapotani. Asca huaino Diosin Yoshin Sharapan ahuun nomuran shinansharamani.

<sup>42</sup> Ascaino oi ashcafinin Isabel ahuun raru María yoini isca huaquin, —¡Aicho! Rato ainfo futsacai mia acai cuscan Diosin catoanma. Fasi mia shara huacoinna. Min facu chipo cainyano Apa Diosin aqui unimacoinqui a cushusharashquin. <sup>43</sup> Ascan un ahuara shara huaa rafanancai Diosin ua shara huama. Ascashon uhuun Ifoan ahuun ahua uqui nichian ua oinyonon. <sup>44</sup> Ascano min tsain nicai unimaqui uhuun shaqui muranshon uhuun facun ua potapotaca. <sup>45</sup> Upa Diosin nan min ishquiai cuscan mia iqusi tapimaiton nantifi ahuun tsain min icoinra huaa. Ascacun Diosin mia unimamaran, —ishon Isabel ahuun raru María yoini.

<sup>46</sup> Ascaiton María arifi ahuun yayan yoini,  
“Uhuun nomuranshon un shinanqui isca huaa,

‘Ifon min sharacoin. Tsoa futsacai mia cuscara sharama.

<sup>47</sup> Min uhuun Numamisi

Diosiran icashu uhuun nomuran un fasi unimacoinna.

<sup>48</sup> Ascashu un ahuun oinmati.

Un ahuamafiacyun uhuun ramapaiquin ua oinfafainni.

Ascacun ua Diosin shara huaa cuscan yorafoan uhuunoa yoipacuna-  
nacafo.

<sup>49</sup> Diosin ahuamamishti huamisiton ua ahuara sharashtacoin ashoan.

Aafin shara fustisiquin.

<sup>50</sup> Ascan ratoran futsan Dioshuunoa nicaquin ahuunoa shinan-  
sharafafainai.

Nan cuscara yorafohuun Diosin ramapaipacunaca.

<sup>51</sup> Diosin ahuun shinanpan ahuamamishti huamisi.

Ascashon nan cacapaimisifoan aton nomuran shinanchacamisifo  
cuscan Diosin ato shatumafain atori onaintimai.

<sup>52</sup> Ascatan niaifofori Diosin ato shatumana afanan niaifo inonfoma.

Ascashon nan ahuamafo ato shinansharamana nanfoan tapinonfo  
ahuun facufocashon.

<sup>53</sup> Ratoran futsa ahuuomafo foni cuscarafo fasi Diosihuunoa tapipai  
tanasharashcaquin.

Nanscarafo Diosin ato cushusharatiro.

Ascashon ahuara yopai cuscan ato inansharafain a tanasharaifoanri ato unimamashquin.

Ascashon ahuara ichapa ayafofiashu Diosihuunoa shinanyamaifo copiquirifi ato ahuara inainma.

Man mafo ichapayafiashu ato nomuran shinansharayamafain tsoa unimamisima.

<sup>54-55</sup> Ascafiaifoanno nocon caiffo Israelifofin Diospan oinmatifoquin.

Ascashon non ahuara acai cuscan noco ashomisi.

Nonfin noco shuni Abraham ahuun funafoquin.

Ascacun nocohuun ramapaipacunaca.

Nannori Upa Diosin nocon shunifo yoiyotianiran, ”

ishon María yoini.

<sup>56</sup> Ascashu oshu rafu non fusti ahuun yayan Isabel fu iyoni. Ascatan María ahuun pushu ano nasoni.

*Nan yorafo unu muran iquimapacumisi Juan caini cuscan*

<sup>57</sup> Ascashu Isabel ahuun facu caiyaintian furonanfacu cainni.

<sup>58</sup> Ascaiton a chaima icafo futan ahuun yorafoan nicanifo nocon Ifo Isabelhuun ramapaiqui facu cainmashara. Ascashu afu unimacoinnifo.

<sup>59-60</sup> Ascatan ocho osha finontan Zacarías pushu ano ahuun yorafo funifo facushta ahuun foshqui rupa shatuni fucani. Ascashon apa anuquiri Zacariasran huapaifiaifoan ahua Isabel yoini, —Ma. Anoricai ahuun anu iquima. Juan ishquiran, —ishon ahuan yoiaiton.

<sup>61</sup> Cumanifo, —Ma. Rato min yorafoan ahuun anucal Juanmaran, —ishon yoinifo.

<sup>62</sup> Ascashon Zacariasrifi yocanifo ato mucumansi raquinimain ahuun facun anucal. Ascafiaifoan tsaintiroma muuqui ahuun mucumansi mutoacufaini ahuun anu tapipaifiaifoan. <sup>63</sup> Ato papio yocain mucu mushan mushaini. Ascaiton inanfo cunutan ato ismaiton oianfo Juan ini. Ascara oincani mustairitan, —Icon ahuun anu Juan ishquiran, —ishon shinannifo. <sup>64</sup> Ascano ahuun facun anu cunutapai Zacarías afanan tsainnacahuani. Ascashon Dioshuunoa shara yoini. <sup>65</sup> A chaima icafo futan Judea muran machi ichapa ano icafoan nicacaquin Diosin aca cuscan fasi sharacoin. —Noncai ascara nicayomisimaran, —icashon Zacarías yafi ahuin Isabel non aton facu Juanhuunoa yoiquin futsanifo. <sup>66</sup> Ascashon nan nicafoan yoinifo, —¿Ahuu cuscaramun nan facu iishquiquin? Man non oian facufiacun Diosin Yoshin Sharapan iquinaiton, —icashu yoinannifo.

*Zacarías fanainni cuscan*

<sup>67</sup> Ascano facu ahuun apa Zacarías Diosin Yoshin Sharapan iquinaiton inon pacoai cuscan yoini isca huaquin,

<sup>68</sup> “Uhuun caifo Israelifoan nocon Diosin fasi sharacoin.

Nocoqui oa noco numashqui.

<sup>69</sup> Diosin nocon Numamisi nan ahuamamishti huamisi nocoqui nichian.

Noco shunifoan aton niaifo David ipaoni.

Nanton ahuun funa nocoqui nichian noco niaifocoin ipashanon.

<sup>70</sup> Nannori ahuun tsain inon pacoai yoisisharafaohuunshon Diosin yoiyoni.

<sup>71</sup> Ascashon yoiquin isca huani, ‘Un mato cushui.

Nan mato noicasmamisifoan afanan mato ahuusca huanonfoma.

Ascacun un mato Numamisi matoqui nichiran,' ishon Diosin inon pacoai yoimisifohuunshon noco yoini.

<sup>72-75</sup> Ascashu noco shunifohuun Diosin ramapaipaoni.

Abraham yoiyoni cuscacai Diosin ointi aquimanama.

Yoiquin isca huani, 'Un min funafo numashqui ato noिकासmaifoan ato ahuusca huanonma.

Ascano ratutama ua yonoshopacutirofoquin,' ishon Diosin yoiyoni. Nocon Ifoan yoiyotiani cuscacoin man noco ashoin non isharacoincain non ahuun tsain tanapacushanon,"

ishon Zacarias yoini. <sup>76</sup> Ascashon ahuun facu yomushtafiacun push-coashu ishquiai cuscan yoiqui isca huani,

"Uhuun facushtan, 'Mirifi min Diosin tsain yoishomisiran,' mia huaashquicani.

Diosin nai murannoaton ahuun Yoshin Sharahuunshon ishquiai cuscan min ato yoifoanfafaquin isca huashquin.

'Nocon Ifo oshquiquin itisharacahuun.

Maton chacari shatucahuun a nocoaiton nicasharashcaquin.

<sup>77-79</sup> Diosin fasi nocoahuun ramapaiqui

nocon Ifohuunshon noco chaca soashona non afu ipashanon,'

ishon noco caifo min ato yoishquin.

Nii muran faquishiainoai non oinsharatiroma.

Chashamatimaisicai non fai tanasharatiroma nocosharapaiquin.

Nanscarifiai nocon Ifo oataimano tsoan Diosin fai tapiataima.

Shafaino fari otiro afanan faquish inonma.

Nanscarifiai nocon Ifo nai murannoashu oataima nan faquish cuscara.

Asafia nan nocoqui oaitian nan chashamati cuscara shara iishquin.

Ascashon Diospan fai noco oinmashquin

ahuunoashu non Dios fu rafunon.

Nonricai nai afanan ratutiroma.

Naashumain non Upa Dios fu ipasharatiroma.

Non nicuri noco cushusharafain nocon ointi fucash huanonma non isharashquin,"

ishon Diosin Yoshin Sharahuunshon Zacarias yoini.

<sup>80</sup> Ascashu nan Juan facu pushcocoin sharani. Ascashon shara fustisi tanapaiquin ahuun nomuran Diosin tsain shara nanucoinni. Tsoa istaipama anori iyopaoni ahuun caifo nan Israelifo Diosin tsain yoiquin tau huaitian.

## 2

### *Jesús cainni cuscan*

#### *Mt 1.18-25*

<sup>1</sup> Nan Juan caiyaintianri Romanonfoan aton niaifoan ahuun anu Cesar Augusto. Nanton ahuun yorafo yononi maitio ato tanan huashon aton anufo cununonfo ahuuti yoramainquin tapipaiquin. <sup>2</sup> Nantianri Siria anofoan ato niaifo ahuun anu Cirenio ini. Ascan nan Cirenio niaifoaitian ato tanan huaquin tau huani. <sup>3</sup> Ascano nantifi focanashu aton mai anoashu cununifo.

<sup>4</sup> Ascacun José yafi María Nazaret pushurasi Galilea murannoashu focani Belén pushurasi Judea mai ano noconifo. Nan Belén David ahuun mai ini. José David ahuun funa. Ascacun arifi Belén ano cani.

<sup>5</sup> María fu aton anu cunui focani fonifo. Ascashu man yoinanfo ini



afu fiananshquin. Ascafia nantianri man facu nanua ini. <sup>6</sup> Belén ano nocoaitian facu cainti sunuin ini. <sup>7</sup> Nannoashu furonanfacu caianshu facuyai tauni. Nantifi pushu fospifafainano tsoan ato iquimapaiyaino inafaoan pimisifo pushu facushta murannoashu furun cainni. Caincun ahuun rashutinin rashuni. Ascashon inafaoan piafo muran furun ratani.

*Diosin nai oinmatifo yafi chashoan cushumisifo*

<sup>8</sup> Nan Belén chaimashon chashohuan cushumisifoan nan yamutari aton inafao faasi funununshon cushushinifo. <sup>9</sup> Ascaino atoqui nocon Ifoan ahuun oinmati afu nai muran icafo fotoi chashapacucahuani. Faasi funununnoafo Diosihuunshon ato chashariscatani. Ascaino nan chashoanfo cushumisifo fasi ratui futsunifo. <sup>10</sup> Ascaifaoan ato yoini, —Ratuyamacahuun. Un mato tsain fasi sharacoin yoiyoaquin. Nicaí man unimaino manifoti anoafori unimanonfo. <sup>11</sup> Na yamutafin Belén nan mato shuni David cainni anoashuri maton Numamisi cain huanquin. Naanfin Upa Diosin atoqui nichiaquin. Nan maton caifaoan manamisifo. Nanrifi maton Ifoquin. <sup>12</sup> Ascacun un mato yoi ahuuscashomain man fuchitiroquin. Nan facu ahuun rashutinin rashucaí inafaoan pimisifo muran racacun man fuchitiroquin, —ishon Diosin nai oinmatinin ato yoini.

<sup>13</sup> Ato yoiqui unutupaiyaino samamashta atirifi Diosin oinmati afu nai muran ica atoqui cuyopacunifo. Ascashon Diosihuunoa yoisharacaquin isca huanifo.

<sup>14</sup> *“Diosin fasi shara. Nai murancoin ica. Atirifoqui Diosin unimai. Nafao aton nomuran unimasharacanian,”*

icashon yoinifo.

<sup>15</sup> Ato yoiqui anaiticatan atomaquinoashu Diosin oinmatifo nai muran fonifo. Ascaino nan chashoan cushumisifoan yoinifo, —Non Belén ano canon. Nocon Ifoan noco yoia cuscan non oin fonon, —icanashu yoinannifo.

<sup>16</sup> Ascashu ichocaquin María yafi José fuchitoshiquin oianfo facu inapan pimisifo muran fasi toca racai ini. <sup>17</sup> Ascatan nan facu oianfo cuscan huafain ato yoifaoanfainifo. <sup>18</sup> Ascan nan chashohuan cushumisifoan ato yoiaifaoan nicacaquin yoinifo, —¡Aira! ¿Ahuuscashomun ascara shara noco yoiafoquin? —inifo. <sup>19</sup> Ascacun María ahuun nomuran fasi shinanpaoni nan nicafain oian cuscan. Ascashori, —¡Aicho! Diosin noco shara huashoanran, —ishon shinanpaoni. <sup>20</sup> Ascashu nan chashohuan cushumisifo ato yoifaoanfaintacani aton inafao ano naso furacashon yoinifo isca huaquin, —¡Aicho! Dios fasi shara. Nan noco yoia cuscan huafain nanscaracoin man non oianran, —icashu yoinannifo.

*Dios fu tsainti pushu muranshon apa futan ahuan aton facu Jesús Dios inannifo*

<sup>21</sup> Jesús cainta ocho oshatan nan facun ahuun foshqui rupa shatuni. Nantianri anuquin Jesusran huani. Nannori María facu nanuataima Diospan oinmatinin afu nai muran icaton yoiquin tau huani.

<sup>22</sup> Moisés Israelifo yononi isca huaquin, —Maton ahuin facu caianshu cuarenta oshatan Dios fu tsainti pushu muran iquiyotiromaran, —ishon ato yononi. Ascacun María futan José aton facu man cuarenta oshatan Jerusalén ano iyonifo. Dios fu tsainti pushu muranshon apa Dios inanshcaquin. Ascano Dios fu tsainti pushu muran iquicashon yoinifo

isca huaquin, —Upa Diosin nocon facu non mia ihuushona mia in-ainyoshquin mia yonoshopacushanon, —ishon yoinifo. <sup>23</sup> Ascacun nan-nori nocon Ifoan yononi isca huaquin, —Nan furonanfacu cain tauafo nocon Ifo Diosina. Ascashon afi amapaiyai cuscan ato huapashanon, —ishon cununi. <sup>24</sup> Nantianri José yafi María Diosin yononi cuscaín ruhui rafu iyamarai ruhui cuscara rafu foni nan ahuun caifohuunshon Dios cufimisi María inanni a rutushonon. Ahuun chaca soapaiyaiton Diosin ashonon. Ascashon a tanasharafain ismanon.

<sup>25</sup> Ascun nantianri Jerusalén anoa nocofunun shara ahuun anu Simeón. Diosin Yoshin Sharapan iquina. Nanton Dios tanasharashon cufifafainpaoni. Ascashon nan Diosin catoan Israelifoan aton Numamisi manafafainpaoni. <sup>26</sup> Ascacun Diosin Yoshin Sharapan ahuun nomuran yoini, —Min naataishoma nan Diosin catoan maton Ifo Cristo min oinshquiran, —ishon yoini. <sup>27</sup> Ascashon Diosin Yoshin Sharapan shinanmani cuscan Israelifoan Dios fu tsainti pushu muran iquini. Ascaino José yafi María arifi aton facuya iquifainnifo. Diospan tsain yononi cuscan aton facu huashoshcaquin iquinifo. <sup>28</sup> Ascano Simeón atoqui otan yoini, —¡Aicho! —ianan facu chishtoinifoanni. Ascatan Dios yoisharaquin isca huani,

<sup>29-30</sup> “Ifon, min nantifi tapicoian.

Mian yoiyotiani cuscan mun oian. ¡Aicho!

Natian unimacaini un nai manmain min facu nan nocon Numamisi mun oianmashu.

<sup>31</sup> Nantifi manifotiton aton Numamisi min nocoqui nichian.

<sup>32</sup> Ascacun nocon caifomafoan mia onanyamafiamisishaquin min facuhuunshon mia onanshquicani.

Ascacia nonfin min yora Israelifoquin non tapicoinshquin na facuhuunoashu Diosin nocohuun ramapaiyaiton.

Ascano ahuunshon min noco yoiyotiani cuscan noco huashoshquiran,” ishon Simeón yoini.

<sup>33</sup> Ascaiton nicacaquin José futan Maríaan aton nomuranshon shinanquin isca huanifo, —¡Aira! Noncai iscara nicayomisimaran, —ishon shinannifo. <sup>34-35</sup> Ascashon Simeón Diospan Yoshin Sharahuunshon ahua María yoisharaquin isca huani, —Min facu nan nocon caifo Israelifo atirifoan nicacasmacanasu omitsiscapanacafo. Ascun min facu nica-casmaifoanno min fasi shinanshquin. Ascacia nocon caifo atirifoan min facu icoinra huacanashu fasi unimacoinshceni. Ahuunshon yora ichapafain aton nomuranshon shinainfo cuscan puashcaniran, —ishon Simeón yoini.

<sup>36</sup> Nannori ainfoan ahuun anu Ana, Fanuel facu. Nanton arifi Dioshuunshon inon pacoai cuscan yoipaoni. Nanrifi Aser ahuun caifo ini. Siete fari funun fipaoni. Ascafishu amaqi funu naniano man Ana yoshafoshta ini. <sup>37</sup> Ascashucaí ochenta cuatro fari funuya. Nantianri Dios fu tsainti pushu muranshon Dios cufinquin piqui tunufafainpaoni. Nan muransi ipaoni ahuun Ifoan amapaiyai cuscan aashquin. <sup>38</sup> Ascano José yafi María Simeón fu tsaincaifoanno nantianari atoqui Ana oni. Oshon facu fuchitoshiquin yoini, —¡Aichoran! Upa Diosin, natian min facu min nocoqui nichian nocon Numamisi ipashanon, —ishon yoini. Ascashon nan facu oian cuscan Jerusalén anofo nan manamisifo Anapan yoiqui isca huani, —Mun nocon Numamisi oincoian. Man nocoaran, —ishon ato yoipacuni.

*Nazaret ano naso furanifo*

<sup>39</sup> Ascano José fu María Diosin tsain yononi cuscaín aton mai Nazaret ano nasonifo. Nan Nazaret Galilea muran. <sup>40</sup> Nannoashu facu mutsisi-pacoin yosini. Shafatifi ahuamamishti tapicoínfaini. Diosin ahuun noiquin shara fusti huamafainni.

*Facushtafishu Jesús Dios fu tsainti pushu muran iquini*

<sup>41</sup> Ascano nan faritifi Jesús apa yafi ahua Jerusalén ano fopaonifo. Diosin nai oinmatinín aton shunifoan furonanfacu iyoafosi ato finon-mashoni shinantacani. <sup>42</sup> Jesús man doce fari aquí caano apa futan ahuan nan imisifo cuscan fuusin focaquin iyonifo. <sup>43</sup> Ascashu man fuusi anaiticatan María yafi José aton pushu ano naso furanaifoanno. Jerusalén ano nan facu Jesús atomaquí nitufiaitocai apa futan ahuan tapinifoma. <sup>44</sup> Ascano atofu cai shafain icashon. Man shafa fusti fofaicatan ifiacucahua oian yamaiton. Funacufaincaquin ahua futan apa ahuun yorafo yafi afu rafafo yocanifo, —¿Man Jesús oianmamun? —ato huaifoan. —Ma. Noncai oianmafinquin, —huaifoanno. <sup>45</sup> Afanan nasofaincaini fonifo Jerusalén ano funai focani.

<sup>46</sup> Ascano focashon rafu non fusti oshatan funacaquin Israelifoan Dios fu tsainti pushu muranshon. Moisés cununi cuscan tapimamisifo ya tsaoshon yoiaifo cuscan nicaquin ato yocariaiton apa futan ahuan fuchinifo. <sup>47</sup> Ascaiton nicacaquin yoinifo, —Nicapon. ¿Ahuuscashomun na furonanfacu ato cayacafi cumasharaiquin? Fasi tapisharacoian, —ishon nan nicafo cuscan afi ranan yoinannifo. <sup>48</sup> Ascano ahua futan apan fuchicashon yoinifo, —Oinpon. Nocon facu iyoafofo nastui tsoa. ¿Ahuuscaimun noco facu icuscaiquin? —huanifo.

Ascashon ahuan cunani, —Cocan, ¿Ahuuscái upa yafi min noco funamanain? ¿Min tapiamamun upa futan un mia funai? Non fasi ratua, —huiton.

<sup>49</sup> Jesús ahua cumani, —¿Uhuan, ahuusca huaashquin man ua funaiquin? Man tapiamamun nuno uhuun Upa cufiti pushu muran un iquia ahuun tsain nicasharashquin, —huani.

<sup>50</sup> Furumun yoiai cuscaí ahua futan apa tapinifoma.

<sup>51</sup> Ascashu ahua yafi apa fu Nazaret ano nasoni. Ascashon nantifi apa futan ahuan yonoaifo cuscan yafi yoiaifo cuscan nicacoinni. Ascatan furunmun yoia cuscan ahuan ahuun nomuran shinanfaini. <sup>52</sup> Ascashu Jesús pushcosharacoinni. Diosin ahuun shinanpan shinanmasharamaino mapo sharayacoin ini. Ascacun Apa Diosin ahuunoa shinan-sharaquin yoini isca huaquin, —Uhuun facun Jesús fasi sharacoin. Un ahuun noicoinran, —ishon yoini. Yorafoan arifi Jesushuunoa nannorisi shinannifo.

### 3

*Nan ato unu muran iquimamisi Juan tsoa istapamashon ani*  
Mt 3.1-12; Mr 1.1-8; Jn 1.19-28

<sup>1</sup> Nantianri Tiberio Romanonfoan aton niaifocoin ini. Quince fari niaifoyoni. Nantifiton aton niaifocoin. Ascano rafu non rafuri niaifo patasharinao nannori afu ipaonifo. Futsan ahuun anu Poncio Pilato nan Judea mai anofoan aton niaifo. Galilea mai anofoan aton niaifo Herodes ipaoni. Chipocu Felipe Iturea yafi Traconite anofoan aton niaifo ipaoni. Abilinia anofoan aton niaifo Lisanas ipaoni. <sup>2-3</sup> Nantianri

Anás yafi Caifás ahuun caifohuunshon Israelifo Dios cufimisi aton niaifo rafu ipaonifo. Ascaifono Juan tsoa istapamashon icamanoshon Diosin yononi. —Min caifo yoitahuun isca huaquin, “Maton chaca shatucahuun. Man chaca shinain cuscan afanan shinanyamacahuun. Diosin mato yoia cuscan nicacahuun. Man ascaiton Diosin mato chaca rau huashotiro. Ascacun un mato unu muran iquimacutiro maton chaca shatushon man ismanon.” Anori ato yoitahuun, —ishon Diosin Juan yononi. Ascacun Diosin yoini cuscan Juanpan unu Jordán cusumunshon ato yoiriani. <sup>4</sup>Nannori Juanhuunoa Isaías inon pacoai cuscan yoimisiton cunuquin isca huani,

“Tsoashta icamanoshon Diosin yononi cuscan oi ashcafinin yoiquin isca huanonpacoí, ‘Nocon Ifo nocoqui samamashta ooshqui. Ascacun itisharacahuun. <sup>5</sup>Un tsoa cuscaramaran iyamacahuun. Ascatamarocon uncai ahuama. Uhuun numamisi un yopacoinran,’ icahuun. Ahuara onushon afanan nasocahuun. Cayacafi isharashcaquin. Man ipaoni cuscan afanan ayamacahuun. Nantifi mato chaca potacahuun nocon Ifo fusti tanasharashcaquin. <sup>6</sup>Nan Diosin cotoan nocon Numamisi oaiton nantifiton oinshquicaniran,”

ishon Isaías cununi.

<sup>7</sup>Ascano yorahuanrasi Juanqui funifo ato unu muran iquimacacunanon. Ascashon ato yoiquin isca huani, —Manfin rono paupaton facu cuscaracoinfoquin. Icoinra huayamaifoa Diosin atoqui sinaqui amaquishon ato potano omitsiscapanacafo. Ascan manfin nanscarafokin. Omitsiscapanacafo muran focasmafiacuicai maton chaca man shatupaima. <sup>8</sup>Ascacia chaca shatucocashon Diosin mato yoia cuscan nicacocahuun. Man ipaoni cuscari afanan ayamacahuun. Man ascaiton yorafoan ointirofo afanan chaca huapaitama Dios fusti man tanasharaiton. Maton nomuran shinanquin isca huayamacahuun, “Nonfin Abraham funafo non ahuun caiforiquin iyamacahuun. Diosin Abraham yoyotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuaipaiquifin na unu cusumunnoa toquirifo Abraham ahuun funafo oni huatiroquin. <sup>9</sup>Fana fimi sharayamaiton ifoan ahuun tapo nantifi ruratinin shatuquin cuyoshon chii muran potatiro coi futsunon. Nanscarifiai nantianri Diosin man itishara chaca shatutama man isharayamacaiyaiton mato omitsiscamacacushquiran, —ishon Juanpan ato yoiaiton.

<sup>10</sup>Nicacaquin cumanifo, —¡Ohua! ¿Nonmun ahuuscaicain? —huaiton

<sup>11</sup>Ascan Juanpan yoiquin isca huani, —Nan sahuuti rafuyaton futsa ahuuomacocinun inancahuun. Nanscarifi aquin nan tushuyaton a futsa tushuomacun inancahuun, —icaiton nicacani.

<sup>12</sup>Niaifo pui fishomisifori aqui fucashon yocanifo, —¿Tapimamisiton, nonmun ahuuscacitiroquin unu muran iquimamushquin? —huaifoan.

<sup>13</sup>Ato cumani, —Afanan maton niaifoa yonoamati finonmafain pui fiyamacahuun, —huaiton.

<sup>14</sup>Ascaino atirifi ranushumuafoaanri yocanifo, —¿Ascainon nonmun norifi ahuuscacitiroquin? —huaifoan atori yoiquin isca huani, —Pui fianpaiquin ato asca huayamacahuun. Pofuyamacahuun. Man tapiflashon

yora futsan ayamafiacun, “Nanto acaran,” ishon maton niaifo yoiyamacahuun. Nan mato niaifohan mato inantisiya unimacahuun. Tsain chipuyamacahuun, —ishon ato yoini.

<sup>15</sup> Ascaiton nan Cristo manamisifoan Juan nicacani ato nomuranshon shinannifo, —Nanracafin Cristoquin. Nan Diosin catonni, —ishon shinannifo. <sup>16</sup> Ascaifohan Juanpan ato cumani, —Uncai Cristoma. Unfin mato unu muran iquimapacuaquin. Ascan nantofin ahuun Yoshin Shara matoya rafumapacui oiquin. Ahuun shinansharapan maton nomuran shinanmanon. Ascashu matofu rafuano nantifi ahudara chacafo ahuunshon shatuashu a cuscara shara ishcaquin. Naanfin Diosin catoanquin. Nantofin ua fasi finoncoian. Ahuamamishti huatiro. Ahuashta chaca huayomisima. Uncai ascarama. Un ahudara shara huahuu rafanancai un ahuun oinmatima. Uhuun ramapaiyamainoricaian un ahuun oinmati icuanama. <sup>17</sup> Ascan natian man itishara a icoinra huafo yafi a nicacasmamisifo ato pashcanan huashquin. Ascashon nan icari nan icoinra huafosi ihuicoishquin afu isharpacunonfo. Asca nan nicacasmamisifo chii urumanhuan muran ato potai anoashu omitsiscaian unupacunacafomaran, —ishon Juanpan ato yoini.

<sup>18</sup> Ascashon tsain futsafori ato yoiriani aton nomuran nanumapaiquin chaca shatunonfo. —Nocon Ifo Cristo nocoqui oi noco numashqui, —ishon ato yoini. <sup>19-20</sup> Ascashon Juanpan nan niaifo Herodes yoiqui isca huani, —Usho ahuin fianfain ahudara chacaforti min huaran, —ishon yoini. Asca huaiton nicaquin Herodes Juan cunu muran iquimani. Ahudara chacafo huafiamisishaquin Juan iquimaquicaifin fasi chaca huaquin finacoinnquin.

*Juanpan Jesús unu muran iquimani*

*Mt 3.13-17; Mr 1.9-11*

<sup>21-22</sup> Juan cunu muran iquiataima yorafo unu muran iquimapacuni nantianri Juanpan Jesusrifi unu muran iquimani. Asca huatan cainmainifoannaino Jesús Apa Dios cufini. Ascaino nai murannoashu ruhui cuscara Diospan Yoshin Shara nai ariashu aqui fotopacucahuani. Fotoaino nai muranno oi nicani yoiquin isca huaiton, —Min uhuun Facucun fasi un mihuu noicoian. Un miqui unimacoinran, —ishon Apa Diosin yoini.

*Jesucristo ahuun shunifo*

*Mt 1.1-17*

<sup>23</sup> Jesús treinta fariatian tau huaquin yorafo yosini. Ascano yorafoan shinancaquin Jesús José ahuun facuran, huafiainfonocai ahuun facucoin inima.

José ahuun apa Elí ini.

<sup>24</sup> Elí ahuun apa Matat.

Matat ahuun apa Leví.

Leví ahuun apa Melqui.

Melqui ahuun apa Jana.

Jana apa José.

<sup>25</sup> José ahuun apa Matat.

Matat ahuun apa Amós.

Amós ahuun apa Nahúm.

Nahúm ahuun apa Esli.

Esli ahuun apa Nagai.

26 Nagai ahuun apa Maat.  
Maat ahuun apa Matatías.  
Matatías ahuun apa Semei.  
Semei ahuun apa Josec.  
Josec ahuun apa Judá.  
27 Judá ahuun apa Joanán.  
Joanán ahuun apa Resa.  
Resa ahuun apa Zorobabel.  
Zorobabel ahuun apa Salatiel.  
Salatiel ahuun apa Neri.  
28 Neri ahuun apa Melqui.  
Melqui ahuun apa Adi.  
Adi ahuun apa Cosam.  
Cosam ahuun apa Elmadam.  
Elmadam ahuun apa Er.  
29 Er ahuun apa Josué.  
Josué ahuun apa Eliezer.  
Eliezer ahuun apa Jorim.  
Jorim ahuun apa Matat.  
30 Matat ahuun apa Leví.  
Leví ahuun apa Simeón.  
Simeón ahuun apa Judá.  
Judá ahuun apa José.  
José ahuun apa Jonam.  
Jonam ahuun apa Eliaquim.  
31 Eliaquim ahuun apa Melea.  
Melea ahuun apa Mena.  
Mena ahuun apa Matata.  
Matata ahuun apa Natán.  
32 Natán ahuun apa David.  
David ahuun apa Isaí.  
Isaí ahuun apa Obed.  
Obed ahuun apa Booz.  
Booz ahuun apa Sala.  
Sala ahuun apa Naasón.  
33 Naasón ahuun apa Aminadab.  
Aminadab ahuun apa Admin.  
Admin ahuun apa Arni.  
Arni ahuun apa Esrom.  
Esrom ahuun apa Fares.  
Fares ahuun apa Judá.  
34 Judá ahuun apa Jacob.  
Jacob ahuun apa Isaac.  
Isaac ahuun apa Abraham.  
Abraham ahuun apa Taré.  
Taré ahuun apa Nacor.  
35 Nacor ahuun apa Serug.  
Serug ahuun apa Ragau.  
Ragau ahuun apa Peleg.  
Peleg ahuun apa Heber.

Heber ahuun apa Sala.

<sup>36</sup> Sala ahuun apa Cainán.

Cainán ahuun apa Arfaxad.

Arfaxad ahuun apa Sem.

Sem ahuun apa Noé.

Noé ahuun apa Lamec.

<sup>37</sup> Lamec ahuun apa Matusalén.

Matusalén ahuun apa Enoc.

Enoc ahuun apa Jared.

Jared ahuun apa Mahalaleel.

Mahalaleel ahuun apa Cainán.

<sup>38</sup> Cainán ahuun apa Enós.

Enós ahuun apa Set.

Set ahuun apa Adan.

Nan Adán ahuun apa Dios. Nan Adán Diosin onihuani.

## 4

*Yoshin chacanun Jesús chaca huamapaini*

*Mt 4.1-11; Mr 1.12-13*

<sup>1</sup> Ascano Jesús unu Jordán anoashu nasoni. Ascashon Diosin Yoshin Sharapan iquinaino tsoanshta icamano cani. <sup>2</sup> Nannoashu cuarenta oshatan nannoshon Satanás nan yoshin chacapan chaca huamapaipaoni. Ascano nantianri ahuashta pia inima. Ascashu fasi fonicoinni.

<sup>3</sup> Ascaiton Satanás yoini, —Min Diospan Facumainquin na toquirifo misi onihuahuu, —huaiton.

<sup>4</sup> Jesús cumaquin, —Uhuun Upa Diosin tsainhuunoa cununi isca huaquin, “Noncai misi fustihuunoashu ipatiroma. Diosin noco yoi ai cuscan nan fusti non fasi yopacoinran,” —ishon yoiaiton.

<sup>5</sup> Satanás Jesús nai sumunmun iyoshon arishon manifoti ismariscatani. <sup>6-7</sup> —Oinpon. Ua ifoafain mian yonoshonaitofin nan min oiainfo un mia inantiroquin. Ascashu nantifi manifoti sharastacoinfoan aton niaifo min itiro. Nantifi na maifotifi uhuuna. Ascacufin un tsoara inanpaiquin un inantiroquin ahuuna inon, —ishon yoiaiton.

<sup>8</sup> Jesús cumani, —Ascacia Diosin tsainhuunoa cununi isca huaquin, “Maton Ifo Dios fustifin man ratoconun mai chachishotiroquin. Nan fustimain noco ifocun. Ascashon non yoitirori ‘Min uhuun Ifocun. Un mia fasi noicoiran,’ ishon non yoitiroran,” —huaiton.

<sup>9</sup> Jerusalén ano Jesús iyoni. Nannoshon Dios fu tsainti pushu pumancaya cuyacoin iyoshon yoiquin isca huani, —Minmain Diospan facuquin nuriashu pacucaintahuun. Diosin tsain mihuunoa cunushoni cuscan aquin.

<sup>10</sup> “Nantofin ahuun oinmatifo afu nai muran icafo yonoaino mia cushuiquin min ahuuscanonma. <sup>11</sup> Min pacuaiton mia achicani. Min toquirifoqui pacui rutunonma. Ahuuscatama,” nannorifi Diospan tsain cununiquin, —ishon Satanás yoiaiton.

<sup>12</sup> Afanan Jesús cumani, —Ascacia Diospan tsain cununiri isca huaquin, “Ahuara musunicoinquin shinanyamahuu uatsi Diosin cushuiquin,” cununiran, —ishon Jesús yoini.

<sup>13</sup> Jesús chaca huamapairiashu caaquin Satanás shinanni, —Un chipo afanan Jesús chaca huamayoshquiran, —ishon shinanni.

*Jesús Galilea anoshon ato tapimaquin tau huani*  
Mt 4.12-17; Mr 1.14-15

<sup>14</sup> Ascatan Jesús Galilea ano nasoni. Diosin Yoshin Sharapan a iquinaino ahuunoa nicanifo. Galilea ano icafoan nicaifoanno a chaima icafoanri nicanifo. <sup>15</sup> Israelifoan aton ichananti pushufo muranshon ato yosifoanfainaiton oincani fasi aquí unimacoinnifo, Ascashon, —Na nocofunun sharacoinran, —ishon yoinifo.

*Jesús afanan Nazaret ano cani*  
Mt 13.53-58; Mr 6.1-6

<sup>16</sup> Ascacaini cai nan pushconi Nazaret ano cani. Nannoashu Israeli-foan aton tunutitian nan imisi cuscan ato ichananti pushu muran iquis- hon ninacahuan Diosin tsain Jesús ato yoini. <sup>17</sup> Nan Isaías Diosin tsain yoimisiton cununi cuscan Jesús inainfoan fupoacufaoan nan yoipaiyaino fuchitan ato yoiqui isca huani.

<sup>18</sup> “Diospan Yoshin Shara ufu ishon ua catoan. Ascashon ua nichian un ahuuomafo tsain shara yoifain nan cunu muran iqui cafiscafo un ato caimanon. Ascashon fushofori un caya huai oinsharanonfo. Omitsiscaifori un numai afanan omitsiscatama isharanonfo. <sup>19</sup> A mia nicasharaifo ato yoihuu isca huaquin, Natian Upa Diosin unimayanan mato shara huafain mato numashquiran,”

ua huaran ishon Isaías cununi cuscan Jesús ato yoini.

<sup>20</sup> Ascashon ato Diosin tsain yoiqui anaititan ahuun libro fupoacufaoan nocofunu futsa inantan tsaopacucahuani. Ascaiton nantifiton oinquin futsanifo.

<sup>21</sup> Ascaiton ato yoiqui isca huani, —Na rama un mato yoiái cuscan uhuunoa Isaías cununi cuscacoin natian man aaran —ishon Jesús ato yoini.

<sup>22</sup> Ascaiton nicacani mustairicatan yoinifo, —Ahuun tsain fasi shara- coin. ¿Nocofunu sharacoinflashon ahuuscashon iscara tsain shara noco yoimun ahuamafiashon? Naanmun José ahuun facu, —ishon yoinifo.

<sup>23</sup> Ascaifoan Jesús ato yoini, —Noco shunifoan yoini cuscan marifi raca man ua yoiqui isca huapai, “Min caya huamitsamisimainqui min futsafo caya huaa cuscan mifiri caya huamuhuu,” ishon raca man ua yoipai. Ascashon man raca ua yoipai isca huaquin, “Man non nica min Capernaum anoshon tsoan atiroma cuscan min ato huashoan. Ascan nuno min pushconi anoshori noco nanscarifi huashohuun,” ishon raca man ua yoipaiqui. <sup>24</sup> Ascacun un mato icon yoi. Diosin tsain yoimisiton cainni anoshon tsoancai nicapaima. <sup>25</sup> Un mato cayacafi yoi. Nocon shuni Elías niyopaonitian nocon mai Israeli ano ainfon funu amaqi naa funuomafo ichapa ini. Nantianri fari rafu non fusti nushmancayan oi funima. Ascano tushu yamacoin ipaoni. <sup>26</sup> Ascafia Upa Diosicai noco shuni Elías nocon caifo funuomafo ano nichinima. Ascatarocon Sarepta mai anoa funuomaqui nichini pimanon. Nan pushurasi Sidón chaimashta. <sup>27</sup> Nan Israel anori yora ichapa isinincani cooyo cuscara tocoi futsuafiafocai nocon shuni Diosin tsain yoimisi Eliseocai nocon caifoyo caya huatama. Nan Siria mai anoa fusticoín caya huani. Nancai



Israeli inimaran, —ishon Jesús ato yoini. <sup>28</sup> Ascano ato caifo caya hu-  
atama caifo futsa fusti caya huani nicacani fasi Jesusqui sinacoincaquin.  
<sup>29</sup> Achicashon Nazaret pasoato iyonifo. Nanno mahua cuyacoin anoshon  
potapaicaquin. <sup>30</sup> Asafia potapaifiaquicai tsoan anima. Jesusrocon ato  
rahuin yocofaini atomaquinoashu cafiaitocai tsoan puusanima.

*Nannori nocofunu yoshin chaca ahuun nua icai ini*

*Mr 1.21-28*

<sup>31</sup> Ascashu Jesús Capernaum mai ano cani. Nan Capernaum Galilea  
muran ini. Nannoshon Israelifo tunutitian ato yoini. <sup>32</sup> Ascaiton nica-  
cani, —Nicacapon. Ahuun tsain sharacoin. ¿Ahuuscashucon iscara tsain  
noco yoimun? Ahuun tsain niaifohan tsain cuscararan, —ishon yoinifo.

<sup>33</sup> Ascaino Judiofoan ichananti pushu muranshon nocofunu yoshin  
chacanun ahuun nuushon fiisimani. <sup>34</sup> Asca huatan nan yoshin chaca-  
nun Jesús yoini, —Minfin Jesús Nazaret anoaquin. ¿Min noco fucash huai  
oamun? Noncai mi futan ahua huatiroma. ¿Omitsiscapanacafo muranri  
min noco potai oamun? Unfin mia onanquin. ¡Ohua! Noncai mia ahuusca  
huatiroma. Miamain Diosin catoancun, —ishon yoshin chacanun yoini.

<sup>35</sup> Ascaiton, —Tsainyamahuu. Nocofunumaquinoashu catahuun, —  
ishon yoshin chaca Jesús curushcain nichini. Asca huaiton nan yoshin  
chacapan nocofunu mipuafain potafaini amaquinoashu yoshin chaca  
cafiaquicai ahuusca huanima. <sup>36</sup> Ascaiton oincani mustairicatan afi  
ranan yoinancaquin yoinifo, —Jesús fasi ahuamamishti huatiro. Is-  
caracai ahuashta non oinyomisima. ¿Ahuuscashomun ahuun tsainmansa  
curushcai yoshin chacafo atomaquinoa potaquin? —icashu yoinannifo.

<sup>37</sup> Ascatan nan Jesús aca cuscahuunoa yorafo yoifohanfainifo.

*Simón Pedronun ahuun raisi yoshafo Jesús caya huani*

*Mt 8.14-15; Mr 1.29-31*

<sup>38</sup> Ascacaini Israelifoan ichananti pushu murannoashu cai Pedro  
pushu muran noconi. Nanno Pedro ahuun raisi yoshafo fasi yonai  
omitsiscacoinnaiton Jesús yoishonifo, —Na isinincai cayahuapun, —  
huaifoanno. <sup>39</sup> Amananon ota catipacucahuan yoini, —Ahuun yona  
matsiriscahuun, —huaino samamashtacoin a yonai matsiriscatani. As-  
cano funinacahuan nan isinincama ointsa sharacain ato pimashquin  
pichacufaini.

*Isinincaifo ichapa Jesús ato caya huamapacuni*

*Mt 8.16-17; Mr 1.32-34*

<sup>40</sup> Ascano man fari caino isinincai futsa futsatapapo yorafoan aqui ihu-  
unifo ato cayahuamapacunon. Ascacun ahuun mucuman ato raman-  
pacuaino cayai futsunifo. <sup>41</sup> Atirifi yoshin chacafo atohuun nuufafaina  
Jesús atomaquinoa potaino fiisifainfainquin yoinifo, —Minfin Diospan  
Facuquin, —ishon yoshin chacafoan Jesús yoinifo. Ascaiton Jesús cu-  
rushcain ato asca huani, —Tsainyamacahuun. Uarifi anuyamacahuun,  
—ato huaino manmain tapiafoanfin a Diosin catonnicun.

*Ichananti pushu muranshon Jesús ato yoini*

*Mr 1.35-39*

<sup>42</sup> Ascashu shafacuaino Jesús Apa Dios cuficai tsoan istaipama  
ano cani. Ascacun yorafoan funaquin fuchicashon yoinifo, —  
Nocomaquinoashu afanan cayamapun. Nuno no fu ipun, —huaifoan.

<sup>43</sup> Jesús ato cumani, —Un nan pushurasi futsafo muranri uhuun Upa

Diosin tsain shara un ato yoifoanfafaion ua nichini. Ahuu cuscaramain uhuun Upa Diosin niaifoan ahuun yorafo iquinai cuscaraqui. Un nansanon ua nichini un ato tapimanon, —huani. <sup>44</sup> Ascashon Judea maitio Israelifoan ichananti pushu muranshon ato Diosin tsain yoiriani.

## 5

*Jesushuunshon tsoan atiroma cuscan shiman finifo*

*Mt 4.18-22; Mr 1.16-20*

<sup>1</sup> Shafa futsaino Jesús ianmanhuan Genesaret cusumun ini. Ascaino yorahuanrasi aqui funifo. Diospan tsain nicai fucani. <sup>2</sup> Nan chaimanoa shasho rafu rutica Jesús fuchini. Ifofoan aton nushuti chocaifono. <sup>3</sup> Ascatan nan futsa muran Jesús nanuinacahuani. Nan shasho Simonna ini. Ascashon nan yoini, —Ua onanshta shasho putsiquishohuun. Un anoshon ato yosinon, —ishon yoini. Ascatan shasho cusha camaqui tsaoinacahuan ato yosini. <sup>4</sup> Ato yoiquin anaittan Jesús Simón yoini, —Simón, noa ano focashon mato nushuti potacahuun shimanfo fiishcaquin, —huani.

<sup>5</sup> Ascaiton Simón cumani, —Tapimamisiton, non nushushifiaquicai shiman fustishta non fiishiamo. Non fasi yonoshina. Ascafia min noco yoi ai cuscan natian non huaicai, —ishon Simón yoini.

<sup>6</sup> Ascashon aton nushutininhuan pochinifo. Pochishon muafo shimanfoan nushutininhuan fospicoinshon fashnuqui rashquini. <sup>7</sup> Ascaiton a shasho futsa murannofo atirifo cunaquin ato mushananni ato futan inamashcaquin. Ascaino furiscatan ato muran nanuinifoan rananfaitan shasho muran nanunifo. Ascashon shimanrasi shashohuan rafu fospicoinni. Unu cufirisicoinni shashohuan rafu shimanfoya iqui cuani.

<sup>8-10</sup> Nan Simón Pedro futan nushumisi rafu Santiago yafi Juan Zebedeo facu rafu inifo. Nan rafu non fustifain nushumisicoinfo. Ascaiton ato futan nushumisi futsafoanri shasho rafu fospicoian oincani mustairicatan yoinifo. —¡Oincapon! ¿Ahuuscashomun shiman ichaparasi fiafoquin? —icashu atoqui yoinannifo. Ascaiton oin Pedronun shasho naquishon Jesús ratoconun mai chachishon yoini, —¡Ohua! Ifon ufin nocofunu chacaquin. Asca minfin sharacoinquin. Chaca yafi sharacai ositiroma. Ascacun umaquinoashu catapun, —Pedronun huaiton. Jesús cumaquin, —Ratuyamahuu. Min shafatifi nushumisifiashon natian min uhuun Yoshin Sharahuunshon uqui yorafo ihuushqui ua icoinra huanonfo, —ishon Jesús Pedro yoini.

<sup>11</sup> Nicacatan aton shasho rafu cusumun corafainnifo. Ascashon nantifi aton ahuarafoya ato yorafori potafaini Jesús fu fonifo.

*Nocofunu yoratisho rashquishi futsua Jesús caya huani*

*Mt 8.1-4; Mr 1.40-45*

<sup>12</sup> Shafa futsaino Jesús pushurasi ano ini. Nannoshon nocofunu ahuun yoratishon ranimamishti rashquishi futsuaton cahuanquin Jesús fuchitan fuopacacahuan yoini, —Ifon, ua caya huapaiquifin mian caya huatiroquin, —huaiton.

<sup>13</sup> Jesús aqui mupishon yoini, —Icon un mia caya huapai. Asca natianfin min cayaicain, —huaino. A rashquishi futsua cayariscatani.

<sup>14</sup> Cayacun Jesús yoini isca huaquin, —Un mia cayahua cuscan tsoa

yoyamahuu. Noco caifo ahuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscan min aiton, —ishon Jesús yoini.

<sup>15</sup> Asca huafiaino ahuunoa nantifi yoifoanfaini. Ascaiton nicacانشu Jesusqui funifo ato caya huamapacunon. <sup>16</sup> Ascacaini cashon tsoan icamanoshon Apa Dios cufin capaoni.

*Nocofunu afi cayamacai ahuari afi huatiroma Jesús caya huani*

*Mt 9.1-8; Mr 2.1-12*

<sup>17</sup> Shafa futsaino Jesús ato yosini Fariseofo yafi Moisés yononi cuscan tapimamisifori nanno tsaocunifo. Ascaino pushurasiti Galilea anoafu yafi Judea mai anoafu non Jerusalén anoashuri aqui funifo. Diosin curushhuunshon Jesús isinincaifo nannoshon ato caya huapacuni. <sup>18-19</sup> Ascaino nocofunu afi raqui cayamacai afiri ahua huatiroma ahuun yorafoan Jesús shinanmaqui shuhua naratashon iquimapaifi-afu yorahuanrasi fospicoian ini. Ascano foman caya ina cashon tapa tsucashon Jesús nia naman yora huanrasi nastui shuhua ya ratapacufuannifo. <sup>20</sup> Ascaiton Jesús oian ahuun yorafoan fasi icoinra huaifoan oinquin Jesús a isinincai yoiquin isca huani, —Uhuun yorashtan, natian mun mia chaca soashona, —huaiton.

<sup>21</sup> Nicacani Fariseofo yafi Moisés yononi cuscan tapimamisifoan yoinifo, —¡Ajaa! ¿Na nocofunumun tsoaquin? Fasi Dios chaca huai. Natocai chaca soatiroma. Diosin fustitofin chaca soatiroquin. Ascan naton noco parapai. “Un Diosiran” noco huamapai, —ishon aton nomuranshon shinanchacanifo.

<sup>22</sup> Ascaifoan onanshon Jesús ato yoiquin isca huani, —¿Ahuuscaquimun mato nomuranshon man amaquri shinanchacaiquin? <sup>23-24</sup> Unfin Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquimun un caya huaiquin. Ascacun un mato ismai Upa Diosin ua catoan. Ahuunshofin un chaca soafain yorafo un caya huacointiroquin, —ishon ato yoini. Ascatan a nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

<sup>25</sup> Funinaca huantan ahuun shuhua papifaiquin yoifoni, —¡Aicho! Min ua caya huaa sharaquin. Fasi Dios sharacoin, —huani. <sup>26</sup> Ascaiton oincani nantifi mustairicatan yoiquin isca huanifo, —Dios tsoa cuscarama. Fasi sharacoin. Non oinyomisima cuscara non oianran, —ishon yoinifo.

*Jesús Leví cunani*

*Mt 9.9-13; Mr 2.13-17*

<sup>27</sup> Nansacaini caaquin Jesús oian Roma anoa niaifo pui fishomisi tsoa ini. Nan nocofunun ahuun anu Leví. Ascaiton Jesús yoini, —U fu cahuun, —huaino. <sup>28</sup> Funina cahuatan nantifi potafaini afu cani. <sup>29</sup> Ascashu afu cai ahuun pushu ano nocoquin Leví Jesús yoini, —Nuno uhuun pushu muran iqui ohuu. Uhuun yorafo yoimanashu un ato futan mia fuusishonon, —huani. Ascaino yorahuanrasi aqui funifo. Roma anoa niaifo pui fishomisifo yafi futsaforifi aqui funifo ato futan pishcaquin. <sup>30</sup> Ascaifoan Fariseofo futan Moisés yononi cuscan tapimamisifoan Jesús fu rafumisifo yoini, —¿Ahuuscain man pui fimmisifo yafi

yora chacafo futan man piiyain? —ato huanifo. <sup>31</sup> Ascaifohan nicaquin Jesús ato cumani, —A isinincaifomacai caya huamitsamisi yopacan-ima. Asca nan isinincaifofin fasi caya huamamitsamisi yopacaniquin. <sup>32</sup> Nanscarifi aquin, “Uncai ahua chaca huamismaran,” icaifocai un ato chaca soashotiroma. Asca tsoan yoiqui isca huai, “Unfin fasi chaca huamisiquin. Un Numamisi yopacoinran,” icaifofin un ato chaca soashotiroquin, —ishon Jesús ato huani.

*Piqui tunuaihuunoa*

*Mt 9.14-17; Mr 2.18-22*

<sup>33</sup> Ascaiton futsan Jesús yocani, —¿Ahuuscai mifu rafuafoan piqui tunumisimamun? Juan fu rafumisifoan piqui tunufain Dios cufimisifo. Nanscarifi Fariseofo yafi afu fomisifoan huamisisifo. Ascan manfin pifain ayafain huamisiquin, —huaifoan.

<sup>34</sup> Ato cumani, —Nocofunu fu ainfo fianainnoricaí unimai fusicaquin tsoan piqui tunutiroma. Nanno funu anocai ato chani huaifoan piqui tunutirofoma unimamain acaquin. <sup>35</sup> Ascafiaino funu amaqui rutua-fono shinancaquin piqui tunutiroforan, —ishon Jesús ato yoini.

<sup>36</sup> Ascashon afanan Jesús ato yoiquin isca huani, —Tsoancai sahuuti shuni fashnucun potu funapan icushtiroma. Asca huashon potu funapan icushuano ustui futsuashu chacanai finatiro. Aquirifi sahuuti shuni anaitiriscatiro. Afanancai funa cuscara itiroma. Nanscarifiai un mato yosiai cuscan nicacoinshocai man apaoni cuscan afanan man huatiroma. Tsoan ua tanacoinshon ipaoni cuscan cachiquiri huacoin-tiro. Ascashu funa cuscara shara iishquin. <sup>37</sup> Ascashon tsoancai fichi tutso shuni muran vino funa nanutiroma. Fichi tutso toshacainaino vino funa cuyofoi chacanai futsutiro. Nanscarifiai maton shunifoan mato yosimisi cuscan yafi un mato yoiái cuscacai nan rafu ositiroma. Un mato yosiain cuscacoin nannori Diospan tsain shara. Ascafia mato shunifoan mato yosimisifo cuscacai anorima. Nan tanashucaí man isharatiroma. Nan rafu osishon nicapaiquicai man shinansharatiroma. <sup>38</sup> Ascacun vino funa fichi tutso funa muranri nanua sharacoin itiro. Nanscarifiai ratoranfoan ipaonifo cuscan unucatan un ato yosiain nan fusti tanashu isharacointirofo. <sup>39</sup> Tsoan puti pau ayatiashocai afanan fata ayapaitiroma. Nanscarifi aquin yorafoan yoiqui isca huatirofo, “Un ipaoni cuscan un afanan apai. Uhuun shunifoan ua yosia cuscan shara. Nan fusti un tanapai. Ascacun tsain futsan un yopaimaran,” —ishon shinantirofo.

## 6

*Jesús fu rafumisifoan trigo mutusnifo*

*Mt 12.1-8; Mr 2.23-28*

<sup>1</sup> Ascatan Israelifoan tunutitian Jesús yafi afu rafuafo mau mapai focaquin trigo mutuscashon rashoquiri ashon piyaifoan. <sup>2</sup> Oinquin Fariseofoan ato yoinifo —¿Ahuuscai Moisés noco yononi cuscan tunutitian trigo man mutusimun? —ato huaifoan.

<sup>3</sup> Nicaquin Jesús ato cumaqun isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun? <sup>4</sup> Dios fu tsainti pushu iquicaishon a murannoa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoisimisifo naasi iniquin.

Tsoa futsacai a misi pitiro inima. Nannori yoifianifo fasi fonicoinquin David pini. Ascashon afu rafuafori pimani. <sup>5</sup> Ascán uafin uhuun Upa Diosin catonniquin. Ascacun urusu fusti un yoitiro ahuamain tunutitian man huatiroquin, —ishon Jesús ato yoini.

*Nocofunun mucu musufimua*

*Mt 12.9-14; Mr 3.1-6*

<sup>6</sup> Ascatan tunuti futsaino Jesús Israelifoan aton ichananti pushu muran iquini. Nanno iquishon ato yosiaino nantianri nocofunun ahuun mucu mumiori musufimuaton arifi nicani. <sup>7</sup> Ascaino Fariseofo futan Moisés cunu tapimamisifoanri nannoshon oincaquin shinannifo, —Non tapinon Jesusmain tunutitian nocofunu caya huai iyamarai Moisés noco yononi cuscacoinmain aiquin, —ishon Jesushuunoa shinannifo. Ato niaifofoqui chanipaicaquin. <sup>8</sup> Ascashon a shinainfo cuscan onanshon Jesús a nocofunun musufimua yoini, —Funinaca huahuun. Mia oinonfo, —ishon yoiaino nan yoiai cuscacoin ani.

<sup>9</sup> Ascaiton Jesús ato yoini, —Un mato yocain. ¿Moisés yononi cuscan tunutitian non shara huatiro iyamarai non chaca huatiro mun? ¿Ascayamarai non futsafo nimatiro iyamarai non namatiromun? —ishon ato yoini.

<sup>10</sup> Ascashon ato oiancutan a nocofunu musufimua yoini, —Mushahuun, —huaino. Nan yoia cuscan huatanaiton oianfo ahuun mucu muma sharacoin ini. <sup>11</sup> Ascaiton oincani Fariseofo yafi Moisés cunu tapimamisifo fasi aquí sinacoincaquin yoinifo —¿Nonmun ahuuscashon Jesús shatumatiroquin afanan isca huanonma? —icashu ahuun yoinannifo.

*Jesús doce nocofunifo catonni afu rafunonfo*

*Mt 10.1-4; Mr 3.13-19*

<sup>12</sup> Shafa futsaino Jesús machi ano mapuni Apa Dios cufishquin. Ascano nannoshon yamutishon apa cufishini. <sup>13</sup> Ascashu iyoconaino a tanamisifo yoini, —Uqui fucahuun, —ato huaino aquí fuafoan doce ato catonni afu rafunonfo. <sup>14</sup> Nan docefain ato anufo. Futsa Simonfiacun Jesús ahuun anu tuquihuashoqui, Pedroran, huani. Nanton chipocu Andrés. Futsafoan ato anu Santiago non Juan non Felipe non Bartolomé non <sup>15</sup> Mateo non Tomás non Santiago Alfeopan facu Simón futsari nanton ahuun caifo futsafo futan Romanonfo potapai afanan Israelifo yonononfoma. <sup>16</sup> Futsan ahuun anuri Judas, Santiago ahuun facu. Futsarifi Judas Iscariote nanton Jesús potashon ato achimani. Nanfosi Jesús ato catonni.

*Jesús yora ichapaforasi tapimani*

*Mt 4.23-25*

<sup>17</sup> Machi tununman fotoaino aquí yorahuanrasi funifo. Ascaino a tanamisifo yafi Judea anofo atirifi fuaino Jerusalén anofofu fuaino ianmanhuan cusumunnoa Sidón yafi Tiro pushurasi anofofu funifo. <sup>18</sup> Ahuun tsain nicashcaquin fuafoan atirifi a isinincaifo ato cayahuafain a yoshin chacapan ato fucash huaifori Jesús atomaquinoa potapacuni. <sup>19</sup> Ascashon nan isinincaifo futan nan yoshin chaca atohuun nuafoan shinannifo, —Non ahuunoashu cayanonmun Jesús noco ramanmapainon, —ishon shinannifo. Nanfoan tapinifo Diosin ahuun curushhuunshon Jesús ato caya huapacua.

*Tsoa unimatirofo yafi unimatirofoma Jesús ato yosini*

*Mt 5.1-12*

<sup>20</sup> Ascatan Jesús afu rafumisifo oinquin ato yoini isca huaquin,  
—Man ahuuomafiashu chipo Dios niaifo icari matonari iishquin.

Ascacun ahuuomafiashu unimacahuun.

<sup>21</sup> Man natian Dios fu rafupaicain ahuun tsainri man tapipaiquin finai a  
cuscara shara iishcaquin.

Man ascafia Diosin chipo mato imasharai a cuscaracoin man inon.

Natianri man uaiifiashu chipo man shuchitiro.

Ascacun unimacahuun.

<sup>22-23</sup> Futsafoan uhuunshon mato noicasmaquin mato potafain mato  
roofain matohuunoa tsain chaca yoicani.

Nanscarifi nan Diosin tsain yoimisifo mato shunifo omitsisca hua-  
paonifo.

Ascan matori omitsisca huafiaifoanno chipo man Upa Diosqui no-  
coaitian fasi sharacoin mato inanshquin man afu ipanon.

Ascacun unimacoincahuun, —huani.

<sup>24</sup> Ascacun futsafo Jesús yoiqui isca huani,

—¡Ohua! Manfin natian mafo ichapayashu unimaicain.

Ascafia naashu man chipo omitsiscapanaca. Mancai afanan uni-  
manacama.

<sup>25</sup> ¡Ohua! Natian man shinanquin isca huaa, “Un ahuara yopaima. Un  
ica cuscan shara. Uncai ahua futsa shinanpaimaran,” ishon man  
shinan.

Ascafia ohua. Man chipo mato nomuran shinansharapaiifiashu man  
omitsiscapanaca.

Man fasi numamisi yopapacunaca. Natian man shuchisharai. Dios  
shinantama. Ascafiashu chipo uaiqui man omitsiscapanaca.

<sup>26</sup> Nantifi yorafoan mato yoiqui isca huacani, “Na nocofunu fasi  
ishara. Ahuacai yopaimaran,” ishon matohuunoa yoirafo. Ascafia ¡Ohua!  
Nanscarifi aquin Diosin tsain yoifiaquin afi shinainfo cuscan yoimisifo.  
Nanfo mato shunifoan nannori atohuunoa yoipaonifo. Ascan manfin  
atofu omitsiscapanacaquin, —ishon Jesús ato yoini.

*Mato noicasmafiaifoan atohuun noicahuun*

*Mt 5.38-48; 7.12*

<sup>27</sup> —Ascan nan man ua nicaifo un mato yoi. Mato noicasmaifo  
atohuun noicoincahuun. Tsoan mato noicasmái ato shara huacahuun.

<sup>28</sup> Tsoan mato chaca huai copitama rau huafain ato yoisharacahuun.

Tsoan mato roofiacun ato Dios cufishocahuun. <sup>29</sup> Tsoan mato tapasiai  
ato copitamarocon nanno nishohuun mato ocuma futsari afiaiton

tunucahuun. Futsan mato niaifo ano iyocun mato sahuuti mato fiaiton  
mato sahuuti custopari inancahuun. <sup>30</sup> Tsoanran mato ahuara yocaiton

ayashon ato inancahuun. Futsan mato ahuara fiano shinanchacaya-  
macahuun matori nasoyamafiaino. <sup>31</sup> Man futsafo shara huamapaiyai

cuscan marifi futsaforifi shara huashocahuun.

<sup>32</sup> A matohuun noiaifosi copiqirifi man atohuun noiainocai acai  
ahuama. Yora chacafori nanscarifiaifoanno. Man ascainocai Diosin

mato yoima, “Man shara huaran,” ishon. <sup>33</sup> A mato shara huafosi  
copiqirifi man ato shara huaino acai ahuama. Yora chacafori nanscar-  
ifiaifoanno. Man ascainocai Diosin mato yoima, “Man shara huaran,”

ishon. <sup>34</sup> Ascashon man yora ahuara inanyopaiquin shinanqui isca

huai. “Un inanyocun ua nasotiro. Ascan nanscara yorafo fusti un inanyotiroran,” ishon man shinain. Aacai ahuama. Yora chacafanri nannorifi shinantirofo cuscan. Marifi man anori shinainnocai Diosin mato yoima, “Man shara huaran,” ishon.

<sup>35</sup> Ascacun un mato yoi. Mato noicasmaifo atohuun noicaquin ato shara huacahuun. “Ato ahuara inanyoshon ua nasoimaran,” ishon shinanchacayamacahuun. Mato nasoyamafia, “Nanscanonran,” ishon yoicahuun. Man ascacoinnashu Upa Dios ari man nocoaiton matoqui unimaqui ahuara fasi sharacoin mato inanshquin. Diosi nai muran isharacointsia. Diosin nantifi yorafo shara huaa. Tsoan “¡Aicho! Upa Diosin,” huayamafiafoan nanfohuunri fasi noi. Yora chacafahuuri noi. Marifi nanscarifi aquin man futsafo ismatiro man Diospan facufo. <sup>36</sup> Maton Upa Diosin nantifihuun ramapaia cuscan marifi nanscarifi acahuun.

*Futsafohuunoa shinanchacayamacahuun*

*Mt 7.1-5*

<sup>37</sup> Futsafohuunoa shinanchacacui futsafori yoiyamacahuun. Man futsafohuunoa yoisharayamaino Diosiricai matohuunoa yoisharashquima. Ascashon yoiquin isca huayamacahuun, “Nanton chaca huaa. Ascacun Diosin iconquin onaintimairan,” ishon yoiyamacahuun. Nan onaintimainonran, ishon man futsafohuunoa shinanyamaino Diosiricai mato onaintimaima. Man futsafo rau huacuri Diosirifi mato rau huashquin. <sup>38</sup> Ascacun yorafo shara huacahuun. Man yorafo shara huacun Diosin matorifi shara huai. Ascacun futsafo inansharaqui finacoincahuun. Matsiquimacoinquin. Maniriqui futsunon. Man futsafo asca huacun Diosin arifi mato nanscacin huaashquin, —Jesús huani.

<sup>39</sup> Jesús ahuarafo yoiyai cuscarahuunshon ato yosini, —Fushocai afu fusho raqui iyotiro. Iyopai afu shato muran pacutiro. Nanscarifi aqui futsan Diosin tsain tapishomacai mato tapimatiroma. Matofu afiri funotiro. Mato amaquiri yoitirofoquin. <sup>40</sup> Ahuunshon tapiainfoancai tapimamisiton tapian cuscan tapiafoma. Ascfia nan ahuunshon tapiainfoan chipo tapiaino nan tapimamisi cuscara itirofo.

<sup>41</sup> ¿Ascan ahuuscai yora ahuara pasnanshta fuostamua man futsupaiyain marifi sapa uhuapa fuostamufiashon? Ascashon min chaca huairan futsa huafiaquin mancaifin fasi finaciaquin. <sup>42</sup> Ascashon man yoiqui isca huai, “Uhuun yorashtan, un min furo murannoa ahuara pasnanshta un mia futsunon,” man huamisi. Ascfiashocai man tapiama man sapa fuostamufafainna. Man fuparamitsapaimisi. Ascacun sapa futsucumuhuun. Asca huashon oinsharafain marifi man futsa pasnanshta futsutiro. Nanscarifi aquin futsafoan ato chaca shatumpafiaquin marifi man chaca hua. Man fasi paran. Ascacun iquisi mato chaca shatucahuun. Ascashon marifi man futsafo chaca shatumatiro.

*Ihui ahuun fimihuunshon non onantiro*

*Mt 7.17-20; 12.34-35*

<sup>43</sup> Ihui sharafoan ahuun fimicai chaca itiro. Ihui chacafanri ahuun fimicai shara itiro. <sup>44</sup> Ascano ihuifoti ahuun fimifohuunshon non onantiro ahuu cuscarafomainquin. Ihui moshayafohuunocai shopa foaicun non tuscutiroma. Nanhuafaquisihuunricai uva foaicun non tuscutiroma. <sup>45</sup> Nanscarifiai nocofunun sharapan ahuun nomuranshon

ahuara sharafosi shinain cuscan ahuun tsainrifi sharacoin itiro. Nanscarifiai nocofunun chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascashon nocon ointi muranshon non shinain cuscan nannoricoin non yoitiro.

*Futsan pushu mutsisipa huaino futsan pushu mutsisipama huatiro*

*Mt 7.24-27*

<sup>46</sup> ¿Ahuuscai Ifo ua huafiamisishaquin un mato yoia cuscan man aimamun? <sup>47</sup> Ascacun un mato yoi ahuu cuscaramain tsoan ua nicasharashu nan un yoia cuscacoin aaiquin. <sup>48</sup> Tsoan pushu huaquin ahuun quishi nichishquin iquisi mai puhuuqui mai tuiqui noco. Ascashon pushu anaitiano ananmanri unu foanfiaquicai pacutiroma. Fasi pushu mutsisipacoin. Nanscarifiai nan uhuun tsain nicacoiانو nan un yoia cuscacoin acani. Ascashu ahuara ahuuscarafianocai umaqui itirofoma.

<sup>49</sup> Ascan un yoiai cuscan nicafiashu tsoa ascaima ahuuscamain acanicain un mato yoi. Yoran pushu huaqui ahuun quishi nichifiaquin mai puhuuqui tuiqui nocoama. Fuquinishtacoin huua. Ascashon pushu anaitiano ananmanri unu fai foanquin pushu paoanquin chacana huatiro. Nanscarifiai tsoan uhuun tsain nicafiiai ascashuma ahuun unutani nantifi funocani. Omitsiscashcaniran, —ishon Jesús ato yoini.

## 7

*Romano ranushumua niaifoan ahuun oinmati Jesús caya huani*

*Mt 8.5-13*

<sup>1</sup> Yorafo yoiquin anaititan Jesús Capernaum ano cani. <sup>2</sup> Nannoa ranushumua niaifoan ahuun oinmati nan ahuun noicoian fasi isininqui finacoin ini. <sup>3</sup> Ascacun Jesús ahuamamishti huatiro nicaquin ranushumua niaifoan shinanquin isca huani, —Uncai Israelima. Ascacun un niaifofo ato yoi ua Jesús yoishonafo oshon uhuun oinmati ua caya huashoyoi onon, —ishon shinanni. <sup>4-5</sup> Ascano ato yonoa focani Jesusqui nocoshon yoinifo isca huaquin, —Ranushumua niaifoan noco yonoa non mia yoi onon. Nan nocofunu shara. Nocon caifohuuri fasi noimisi. Nanton nocon ichananti pushu huamashona. Noco shara huashomisi. Ascacun mirifi asharashoicapun ahuun oinmati caya huashoshquin, —ishon Israeli niaifofoan yoinifo.

<sup>6-7</sup> Ascano Jesús atofu cani. Ranushumua niaifoan ahuun pushu chaimashta man fuaifoan afanan ahuun yorahuafo Jesusqui nichini yoiqui isca hanonfo, —Ifon, un mia fucash huapaima. Un cai ahuama. Min nocofunu tsoa cuscaramacoin. Uhuun pushu ari capaiyamaquin. Min tsainmanshi uhuun oinmati ua caya huashohuun. <sup>8</sup> Ascan uafin uhuun niaifoan ua yonomisiquin. Urifi ranushumuafu un yonotiro. Unmain ato yonoainofin un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashoriscahuun,” un huacun ua ashoriscatiro. Asca minfin ahuamamishti huatiroquin. Ascacun min tsainmanshi yoihuu uhuun oinmati cayanon, —ishon yoini.

<sup>9</sup> Ascaiton nicaquin Jesús a mufaina yorafo yoiqui isca huani, — ¡Aira! ¡Niacapon! Tsoa futsacai naton acai cuscan ua icoinra huacoinmisima. Israeli anoafoanricai ua isca huaqui icoinra huacoinmisifoma, —ishon Jesús ato yoini. <sup>10</sup> Ascano a ranushumua niaifoan ato nichiafo Jesús tsainqui anaitiano afanan naso furan oianfo ahuun oinmati man cayasharacoin ini.



*Ainfomaqui ahuun funu naa ahuun facu man naafiacun Jesús funini*

<sup>11</sup> Ascano chipo shafa futsa Jesús pushurasi Naín ano caino afu rafuafo yafi yorahuanrasi afu fonifo. <sup>12</sup> Ascashu Naín ano nocoti chaima oian pushcohuai naa mai huai focani ahua fu yora ichapa fonifo. Nan pushcohuai ahuan ahuun facu fusticoín. Nan ahuanmaqui funu naani ini. <sup>13</sup> Ascashu uaicaiton oin Jesús ahuun ramapaicoínquin yoini, —Uaiyamahuu, —huani. <sup>14</sup> Asca huatan pushcohuai ahuun ihuaifo aqi racati muuainno nitunifo. Ascaiton Jesús yoini, —Pushcoshtan. Un mia yoi. Funihuu, —huaino. <sup>15</sup> Pushcohuai tsainacahuan tsainni. Ascaiton ahuun ahua Jesús yoini, —Naquian. Min facu afanan man nia. Iyosharatahuun, —huani.

<sup>16</sup> Ascaiton oincani yorafo fasi ratucoinnifo. Ratu nishmapacuquin Dios yoisharaqui isca huanifo, —Diosin tsain yoimisi noco muran Diosin nichian. Diosin ahuun yorafo ashoin oaran, —ishon yoinifo. <sup>17</sup> Ascashon nan Jesús aca cuscan yoifoanfainfo. Judea anoafu futan mai futsa ariafoan ahuunoa nicaquin futsanifo.

*Nan yorafo unu muran iquimamupacuni Juanpan afu rafuafo Jesusqui nichini*

*Mt 11.2-19*

<sup>18-19</sup> Juanpan tanamisifoan Jesús ahuarafu huaiton oianfo cuscan Juan yoi focani cunu muran iquinifo. Ascaiton nicaquin Juanpan a tanamisifo rafu yoini, —Nanmain Diosin catonniquin ointacahuun. Ascashon yocaquin isca huatacahuun, “Nan miamun Diosin catonni nocoqui nichishquin. Ascayamarai futsa raca non manaicai noco Numamisi inon,” ishon ua yocashotacahuun, —Juanpan ato huani.

<sup>20</sup> Ascano nan rafutan focashon Jesús yoinifo, —Nan yora unu muran iquimamisi Juanpan noco nichian non mia yocayonon. Ascacun non mia yocai. Nan miamun Diosin catonni nocoqui nichishquin. Ascayamarai futsaraca non manaicain nocon Numamisi inon, —ishon yocanifo. <sup>21</sup> Ascaino nantianri Jesús nan isininqui omitsiscaifo caya huafain yoshin chacafo atohuun nuuafu atomaquinoa potafain fushoforifi oin-masharapacuni.

<sup>22</sup> Ascashon nan Juanpan ato nichian rafu Jesús yoini, —Un acaiton man oian cuscan uhuunoa man nicai cuscan Juan yoitacahuun. Ascashon fushofo un caya huua oinsharaifo cuscan yoifain pastocoinfori un caya huua nicasharanonfo nanrifi yoifain ato yoratisho coyo cuscara tocoi futsuafori caya huafain yora nipaíqui ranainfori un ato caya huua yoifain man nacoínnafori un ato funimana. Ascashon yora ahuuomafori tsain shara un ato yoifainmisi ahuuscashumain Diosin niaífo fu ipatirofoquin, ishon un ato yoimisi. <sup>23</sup> Ascan nanfo un mato yoiai cuscan Juan yoitacahuun tsoan ua icoinra huacoinshocai afanan ahua futsa shinainma. Nan cuscara yorafofin fasi unimacointirofoquin, —ishon Jesús ato yoini.

<sup>24</sup> Ascatan man foafoanno Juanhuunoa Jesús nanno niafo yora huarasi yoini, —¿Ahuuscai istaipama ano Juan oin focani fonifomun? Juancai nan facatahua pui ninhuun focu focu acai cuscarama. Nanscarifiai man man tapia Juancai ointi rananyama. <sup>25</sup> ¿Ascan ahuuscai Juan oinpai man fonimun? Itsairaca nan nocofunun sahuuti sharacapacoin sahuucun oincai man foni. Ma. Juanpacai sahuuti shara sahuumisima. Niaífofoanfin ato pushu muranshon sahuuti sharacapacoin sahuutirofoquin.

<sup>26</sup> Nan Diosin tsain yoimisiraca oincai man foni. Ascafia nan icon Juanpan Diosin tsain yoimisifia nanton yoimisi cuscacai tsoa futsan anori yoimisima.

<sup>27</sup> Ascacun nanhuunoa Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi nichiqui tau huai mihuunoa ato yoiaino itisharashon mia nicanonfo,” ishon cununi. <sup>28</sup> Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara tsain yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai oinyomisima. Ascashon nantifi Dios icanoafoan Juan finoanfo, —ishon Jesús yoini.

<sup>29</sup> Ascashon nan Jesús nicaifo futan Roma anoa niaifo pui fishomisifo Juanpan ato unu muran iquimacuni aton chaca shatunonfo. Ascano nanfoan Jesús yoiaiton nicaquin yoinifo, —Jesús noco cayacaficoi yoi. Diosin noco yonoa cuscan nan iconran, —ishon yoinifo. <sup>30</sup> Asca huafiafoan Fariseofo futan Moisés cununi cuscan tapimamisifoancai Diosin ato amapaiyai cuscan nicapainifoma. Ascasho nanfoanri yoinifo, —Juanpan noco yoiai cuscacai anorima. Nocoricai unu muran iquimatiro-maran, —ishon yoinifo.

<sup>31</sup> —Ascashon afanan un mato tapimai. Natian niyoafo ahuu cuscarafocuin. <sup>32</sup> Nanfofin nan facu cashumisi cuscarafocuin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafocuin. Ascan nan facu cashumisifoan yoitirofo isca huaquin, “Man non shainti manufiainocai monopaicanimaran,” ishon yoifain “fanainca omitsiscati cuscara non fanafiainocai man uaipaimaran,” ishon nan facu cashumisifoan yoitirofo.

<sup>33-34</sup> Nanscarifi aqoi nanfoanrifi Juan yafi uqui tsain chipufafainmisi. Ascafia Juanpacai piqui tunufain fimi unu pau ayamisima. Ascacun ahuunoa yoiqui isca huamisifo, “Juan nisocoin. Yoshin chaca ahuun nuaran,” ishon yoimisifo. Asca unfin piisharafain un ayasharamisiquin. Ascafia uhuunoari yoiqui isca huamisifo, “¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisi. <sup>35</sup> Nanscarifi aqoin nanfoanri yoiqui isca huamisifo, “Tsoanmain shinansharafain icaquin non onantiro. Nan yorafin isharacoianquin shinansharamain huaifin,” ishon nanori yoimisifo. Nannori yoifiaquicai uhuunoa ascara yoipaimisifoma. Ascatarocon uqui tsain chaca fusti huamisiforan, —ishon Jesús ato yoini.

*Jesús Simón pushu muran iquini nan Simón Fariseo ini*

<sup>36</sup> Ascano Fariseo futsan Jesús yoini, —Tapimamisiton, uhuun pushu ano cahuun un mia pimanon, —huani. Ascaino ahuun pushu ano cashon a futan pini. <sup>37</sup> Nan pushurasi anori ainfo furomacoin ica ini. Ascashon Fariseo pushu muranshon Jesús piaiton nicai arifi nan pushu muran iqui caini. <sup>38</sup> Ininti motica tsomashu Jesús cachiore nitishoni. Nan moticanun ahuun anu alabastro a muran ahuun ininti fasi paratamacoin ahuun pui nua ini. Ascatan amanaon niashu uaiqui ahuun fuonpan Jesús tau muchana huani. Ascashon ahuun foo chainipaton otucruaqui shara huatan ahuun tau tsoatan ininti ahuun tauqui ocani.

<sup>39</sup> Asca huaiton nan Fariseo Jesús piimaiton shinanquin isca huani, —Na nocofunu Diosin tsain yoimiscoinshon na ainfoan muai cuscan onancuana na ainfomain ahuu cuscaraquin, —ishon ahuan nomuran shinanni.

<sup>40</sup> Ascaiton onanshon Jesús Fariseo yoini, —Simón, un mia ahua futsa yoiran, —huaiton. Simón cumani, —Tapimamisiton, ua yoihuu, —huani.

<sup>41</sup> Ascaiton Jesús yoini. —Ato pui inanyomisiton nocofunu rafu pui inancun nan rafutan ahuan rafanan nifnifo. Futsan quinientos denario nifiaino futsan ichapama nifini cincuenta denario. <sup>42</sup> Ascacia nan rafutan nan nifian cuscan nasopaifiacai tsoa puiya inima. Ascacun nan ato pui inanyomisiton ato yoisharani afanan tsoan a nifinonma. Ascan nan rato futsacaimun fasi ahuan noi qui finacaiquin, —ishon Jesús yocaiton.

<sup>43</sup> Simón cumani, —Nan paratama nifiatocairaca fasi noi qui finaiquin, —ishon yoiaiton.

<sup>44</sup> Afanan Jesús cumaqui isca huani, —Min cayacafi yoiran, —huatan ifiacuahuan yoini, —Oinpon. Na ainfoan fasi ua noicoin. Min pushu muran un iquifaitocai mian ochoama. Asca na ainfoanfin fasi uhuun noi quin ahuan fuonpan uhuun tau muchana huafain ahuan foon ua otucuruacaquin. <sup>45</sup> Nocon fuyamisi cuscaricai mian ahuan tamo tsoama. Asca na ainfoanfin min pushu muran un iquiaitian uhuun tauqui ua tsoariaiquin. <sup>46</sup> Ascan mianricai uhuun mapoqui shuni ocama. Asca na ainfoanfin uhuun tauqui ininti ocaquin.

<sup>47</sup> Ascacun un mia yoi. Na ainfoan ahua ichapa chaca huafiamisicun natian ahuan chaca mun soashona. Ascashori mun rau huacoinna uhuun fasi noi aiton. Asca tsoan shinanquin isca huai, “Uncai ichapa chaca huamisima. Ascacun uari uhuun chaca ichapama ua rau huashotiroran,” ishon shinaintocain ua ichapa noimaran, —ishon Jesús Fariseo yoini.

<sup>48</sup> Ascashon ainfo Jesús yoini, —Natian mun mia chaca rau huashoanran, —huani.

<sup>49</sup> Ascaino Fariseo pushu murannofo afi ranan yoinannifo, —¿Tsoamun na nocofunuquin? Fasi chaca huamisifo ato chaca soashofain ato rau huatiroran, —icashu yoinannifo.

<sup>50</sup> Ascashon Jesús afanan ainfo yoi qui isca huani, —Mian icoinra huaitofin un mia numaquin. Caasharatahuun, —ishon Jesús yoini.

## 8

### *Jesús futan ainfofoan apaoni cuscan*

<sup>1</sup> Asca huatan chipo Jesús pushurasiti ato yoifoanfaini ahuu cuscarain Upa Diosin niaifoan ahuan yorafo iquinai cuscaraquin. Ascaino doce afu rafuafori afu fonifo. <sup>2</sup> Ascaino ainfofori afu fonifo. Nanfo isinincái yoshin chaca atohuun nuucun Jesús ato caya huapaoni. Nan futsan ahuan anu María Magdalena. Nanhuan siete yoshin chacafo ahuan nuucun Jesús amaquinoa potani. <sup>3</sup> Futsan ahuan anu Juana nan Cuzapan ahui ini. Nan Cuza niaifo Herodes ahuan niaifo patashari ini. Ainfon futsan ahuan anu Susana. Ascashu ainfo futsaforifi Jesús yafi afu rafuafo fu fonifo. Nan ainfofoan Jesús yafi afu rafuafo pui inannifo ahuan rafanan tushu finonfo.

*Jesús fimi ushu saamisihuunshon ahuarafó ato yosini*

*Mt 13.1-9; Mr 4.1-9*

<sup>4</sup> Pushurasifoti anoashu ahuun tsain nicapaicani yorahuanrasi aquí fuaifoan ahuarafó yoiai cuscarahuunshon ato tapimani isca huani, <sup>5</sup>—Nocofunun ahuun noshati murannoa fimi ushu fishon ahuun mau mamaquí saaca ushufo fai nushmancayan pacucun puamanafoanno puiyafóanri piinifo. <sup>6</sup> Ushu rananri toquiri camaquí pacua mai ichapamashta anoashu foaifia fari tsasi huani unun muchana huaiyamaino nai cuyoni. <sup>7</sup> Ascaino ushu rananri tasha murannoashu foaifishucai ushu futsa foaisharanima. <sup>8</sup> Ushu rananri mai shara ano pacuafó foaisharashu fimi ichapayacoin iniran, —ishon Jesús ato yoitan oi ashcafinin ato yoiqui isca huani, —Manmain ua nicatiroquin ua nicafain uhuun tsainri maton nomuran nanucoincahuun, —ishon ato yoini.

*Ahuuscaquimain Jesús futsafó ahuarafó futsahuunoa yoini ato yosinon*  
*Mt 13.10-17; Mr 4.10-12*

<sup>9</sup>—Min ato saamisihuunoa ahuarafó futsa tapima ato yoia cuscan noco shafacafi tapimahuu, —ishon afu rafuafóan Jesús yocaifoan. <sup>10</sup> Jesús ato cumani, —Upa Dios a icanoshon ahuun yorafó iquínai cuscan un mato fusti shafacafi tapimai. Ascan nanfofin ahuarafó cuscarahuunshon fustisi un ato yoiaquin. Ascashon nanfoancai un ato oinmana cuscan oinfiarquicai tapiafoma. Nicafiarquircái tapisharafoma.

*Fimi ushu saamisihuunoa ahuarafó yoifíashon shafacafi afu rafuafó tapimani*

*Mt 13.18-23; Mr 4.13-20*

<sup>11</sup> Un saamisihuunoa ahuarafó futsa un ato yoia cuscan un mato shafacafi tapimai. Nan ushufo Diospan tsain cuscara. <sup>12</sup> Nan fai curushu yorafóan aton ointi cuscara. Ascashon nanfoan Diospan tsain nicafain ato nomuran nanufiáfo nan yoshin chaca Satanás atoquí oshon nan nicafo cuscan ato fiantiro icoinra huayamafain Dios fu ipanonfoma. <sup>13</sup> Ascan nan toquiri camaquí mai ichapama cuscan nanscarifíai yorafóan Diosin tsain nicaquin tau huai unimacoinyofíashu ahuarafó ahuuscaraino samamashta cachiquiri huatiro. Nanfoan Diospan tsain icoinra huacuí chai huashoma ahuarafó chaca finonquin samamashta Dios cachiquiri huatirofo. <sup>14</sup> Ascan nan ushu futsafó moshafó muran pacuashu foai sharatiroma. Nanscarifíai futsafóan Diospan tsain nicafíashon ahuarafó nan acái cuscan fustisi shinanfain pui ichapa yafi mafo ichapa noiqui itiashmashtafi Dios cachiquiri huai. Ascaquicái Diosin ato amapayai cuscan huacanima. Ahuarafó futsafóhuunshosi ato nomuran afi unimamapaicani. <sup>15</sup> Ascafia ushu futsafó mai shara ano pacuashu foaiquin yosiashu fimi ya itiro. Nanscarifíai futsafóan Diospan tsain nica cuscan icoinra huashu ahuun nomuran sharacoin. Ascaquicái Diospan tsain nicafo cuscan cachiquiri huacanima. Ascashon nanfoanri futsafó icoinra huamatirofo.

*Lamparinahuunoa cuscara Jesús ato yoini*

*Mr 4.21-25*

<sup>16</sup> Tsoancai tapa camaquí lamparina otashon paninranun fupomisima. Asca huatama otashon tapa camaquí huaa pushu muran iquiafoan oinsharatirofo. <sup>17</sup> Nanscarifíai man shinanmisi cuscan ahuarafó huafíashon man fomanmisi cuscari nantifi mato puashoshquin. Anoshocái huashafó afanan man fomantiroma.

<sup>18</sup> Ascacun oinfain. Uhuun tsain nicasharacahuun. Tsoan uhuun tsain nicasharacoian paratamari Dioshuunoa tapisharatiro. Ascan tsoan uhuun tsain nicafiashu ascacoianma ascashu nan nicamisi cusdari funoshqui, —ishon Jesús ato yoini.

*Jesús ahua yafi ahuan ushtofa*

*Mt 12.46-50; Mr 3.31-35*

<sup>19</sup> Ascatan Jesús ahua yafi chipocufa aqui iquipai oianfo yorahuanrasi fasi fospiafono iquinifoma. <sup>20</sup> Ascaiton futsan yoini, —Min uhua futan ushto rananun mia oinpai fuafo chifi niaforan, —ishon yoiaiton.

<sup>21</sup> Jesús cumani, —Nan uhuun Upa Diosin yoiai cuscacoin aafofin uhuun uhuafu yafi uhuun ushtofuquin, —ishon yoini.

*Jesús fuuhuan yafi ian fuchomanhuan nishma huani*

*Mt 8.23-27; Mr 4.35-41*

<sup>22</sup> Shafa futsa Jesús afu rafuafo yoini, —Non ianmanhuan oquiriti fonon focahuun, —ato huaino afu nanufainifo. <sup>23</sup> Ascashu foaifono atoqui fuuhuan noconi. Nantian Jesús shasho tsispa camaquinoashu osha ini. Ascano fuuhuanquin ianmanhuan fuchoquin unu shasho muran iquimani. Fasi musucuin ini.

<sup>24</sup> Ascaiton afu rafuafoan moinnifo, —Moihuu, Ifon, man non asai futsuicai, —ishon yoiaifoanno moinacahuatan ninacahuani. Ascashon yoini isca huaquin, —Fuun nishmahuu huafain fuchomanhuanun nishmahuu, —Jesús huani. Ascaino ian fuchoi nishmafaini. Man asca huano ian pusiquima racani. <sup>25</sup> Ascaiton ato yoini, —¿Ahuuscai un nunofiano ua icoinra huatama man ratuai? —ishon Jesús ato yoini. Ascaino fasi ratucani mustairicatan afi ranan yocanonannifo. —¿Noco ifomun tsoaquin? Fuuhuan yafi ian nan yoiai cuscan man nishma hua, —icashu afu rafuafo yoinannifo.

*Gerasa mai anoa nocofunhuun yoshin chaca nuua ini*

*Mt 8.28-34; Mr 5.1-20*

<sup>26</sup> Ascatan ianmanhuan pocufaini Galilea ocuma futsa Gerasa mai ano noconifo. <sup>27</sup> Ascashu shasho murannoashu Jesús fotocainaino nocofunu yoshin chaca ahuan nuua aqui noconi. Sahuuti sahuu sahuutianima. Pushu muranricai imisima. Mahua quini muransi iitiani. Nan mahua quini muranri naafo mai huamisifo. <sup>28</sup> Jesús fuchitan ratoconun mai chachipacufuoi oi ashcafinin yoiquin isca huani, —¿Mian ahuusca huapaimun, Jesús? Diosin nai muran ica nantifi finoncoianton ahuan Facufin minquin. Ua omitsisca huayamapun, —ishon yoshin chacahuunshon nocofunun Jesús yoini. <sup>29</sup> Nannori yoini Jesusmain yoshin chaca amaquinoa potayamaiton. Asca aqui Jesús nocoatama yoshin chacapan nocofunu achiriapaoni. Ascaiton yorafoan cadenanun munushfain onushushon cushufiafo nanfo tusaqui futsafaini ichopaoni. Ascashon yoshin chacanun tsoan istaipama yoini.

<sup>30</sup> Ascaiton Jesús yocani, —¿Min ahuanumun? —ishon yocaiton. Yoshin cumani, —Nocon anufin ichapaquin. —Anori yoini yoshin chacafomani ichapa ahuan nuucun. <sup>31</sup> Ascashon yoshin chacafuoi Jesús yoinifo, —Omitsiscapanacafo quininhuan muran noco potayamapun, —huarianifo.

<sup>32</sup> Ascaino nantianari machi mananunshon yahua inafaoan piinifo. Ascacun yoshin chacafoan Jesús yoicaquin isca huanifo, —Noco yahuarasi-huun nichipun, —huaifoan. —Ascaiton yahuafohuun fotacahuun, —Jesús ato huaino. <sup>33</sup> Nocofunuhoashu yoshin chacafo yahuafohuun fonifo. Ascaino yahua huanrasi ian muran maocofainni asai futsunifo.

<sup>34</sup> Ascaifoan oinfaincani yahua cushumisifo ichonifo pushurasi ano chani focani. Pushu patashari icafo yafi chaima icafoqiri chaninifo. <sup>35</sup> Ascaiton nicacani yorahuanrasi yahua asai futsuaiton oinpaicani funifo. Fucaquin oianfo Jesús naman nocofunu ahuun yoshin chacafo nuumisi tsoa ini. Man amaquinoa Jesús yoshin chacafo potano. Afananricai imisi cuscan chitoria iyamacain nison inima. Shinan-sharacoinni. <sup>36</sup> Atirifi atoqui nocoifoan Jesús amaquinoa yoshin chaca potaiton oianfo cuscan futsafoqui chaninifo. <sup>37</sup> Ascaino Gerasa anofoan nicacani ratucoincaquin yoinifo, —Nocomaquinoashu cata-pun, —huaifoanno Jesús shashon nanucaini cani. <sup>38</sup> Jesús cataima a yoshin chaca amaquinoa potaton yoini, —Uari iyoiicapun. Un mifu capaica, —huafiaiton. <sup>39</sup> Jesús yoiquin, —Ma. Min pushu ano cashon min yorafo mia Diosin ashoan cuscan huafain yoitahuun, —huani. Asca huaino cashon Jesús ashoan cuscan yoifoanfaini. Pushurasi muran yafi patashari icafo chaima icafori yoifoanfaini.

*Jairo shotocofacu caya huafain ainfoan Jesús ahuun sahuuti muunni cayashquin*

*Mt 9.18-26; Mr 5.21-43*

<sup>40</sup> Asca huatan ianmanhuan pocufurannaiton yorahuanrasiton cusumunshon Jesús mananifo. Fasi aqui unimacaquin —Nocoqui ohuu, —huanifo. <sup>41-42</sup> Nannori nocofunun ahuun anu Jairo. Israelifoan ichananti pushu anoa aton niaifo ini. Nanton ahuun shotocofacu fustishtacoin doce fari aya ini. Ascano Jesús shasho murannoashu foto curanaiton Jairo fuoshopacucahuan yoini, —Uhuun facushta isininqui man naiquin uhuun pushu ano ufu capun. Uhuun facushta ua caya huashoshquin, —ishon Jairo yoiaino Jesús afu caino yorahuanrasi atofu focaquin fasi yuruanifo. <sup>43</sup> Nannori ainfo atofu cani. Nan ainfo imi imitiani doce fari man aqui caafiano nusuyamacai. Cayapaiqui nan aya cuscan doctorfo ato inanfiacucai tsoanshta caya huamamisima. <sup>44</sup> Ascashu Jesús caiton ainfoan acachorishori ahuun sahuuti cupanan muunni. Muuanshu imi shaturiscatani. <sup>45</sup> Ascaiton Jesús ato yocani, —¿Tsoan ua muamun? —ato huaiton.

Nantifiton yoinifo, —Non mia muamaran, —ishon futsan yoicun futsan yoicun huanifo. Ascaiton Pedronun yoini, —Tapimamisiton, yorahuanrasiton mia yuruafain mia putsiquinaforan, —huaiton.

<sup>46</sup> Afanan ato yoini, —Ratoran futsan man ua mua. Uhuun curshuunoashu nan ratoran man cayaran, —ishon. <sup>47</sup> Jesús yoiaino ainfoan tapini Jesús man onan. Ascacun raquica onutiroma oin ratui taritari iyanan yora huanrasiton ointaifi Jesús nia naman ratoconun mai chachishon nan ica cuscan yoini, —Un imi imitiani doce fari man uqui caa. Tsoancai ua caya huamamisima. Ascacun min sahuuti muuashu un imi shaturiscaran, —ishon ainfoan Jesús yoini. <sup>48</sup> Ascaiton, —Achishtan, ua icoinra huashufin min cayaquin. Caasharatahuun, —ishon Jesús yoini.

<sup>49</sup> Ascashu Jesús tsaincai muran niaifoan pushu anoashu aqui oshon futsan yoini, —Min facu man naaqui. Natian nocon tapimamisi afanan fucash huayamacahuun, —ishon futsan niaifo yoini.

<sup>50</sup> Ascaiton nicaquin Jesús yoini, —Ratuyamahuu. Min ua icoinra huaino min facu cayaiquin, —ishon yoini.

<sup>51</sup> Ascatan pushu ano nocoshon Jesús yoini, —Pedro yafi Juan non Santiago non facun ahuun apa non ahuari marusu ufu pushu muran iquicahuun, —ato huani. <sup>52</sup> Ato asca huaino iquifainquin oianfo uaicani shorarascanifo. Manocani. Ascaifoan Jesús ato yoini, —Uayamacahuun. Na facuca naama. Oshafinquin, —ishon ato yoiaiton.

<sup>53</sup> Jesús osanifo. Man facu naacoina oinfiainfoan. <sup>54</sup> Ascashon Jesús shotocofacu mutsoinifoanquin oi ashcafinin yoiquin isca huani, —Facushtan, funinaca huanhuun, —huaino. <sup>55</sup> Afanan funinaca huatan shotocofacushta nini. Ascaiton, —Piimacahuun, —Jesús ato huani.

<sup>56</sup> Apa yafi ahua aton facu funia oincani fasi unimacoinnaifoan ato yoini, —Maton facu naacoinfiacun un funimana cuscan tsoa yoiyamacahuun, —ishon Jesús ato huani.

## 9

*Jesús afu rafua doce nichini Diosi niaifo icanomai ahuu cuscara iishquicai ishon ato tapimanonfo*

*Mt 10.5-15; Mr 6.7-13*

<sup>1</sup> Shafa futsaino Jesús doce afu rafuafo cunaino aqui funifo. Ascano aqui fuafoan ato yoiqui isca huani, —Uhuun curushhuunshon yoshin chacafo yorafohuun nuucun atomaquinoa potafain pau futsa futsata-pafori uhuunshon man ato caya huatiro. <sup>2</sup> Ascashon uhuun Upa Dios niaifohuunoari ato yoifain isinincaifori ato caya huatacahuun.

<sup>3</sup> Ascacun mato ahuara foyamacahuun. Mato poquti non forusa non tushu non puri foyamafain mato sahuuti futsafori foyamacahuun. <sup>4</sup> Ascan ratoran pushurasi ano man nocoano tsoa aton pushu muran mato iquimai nan fusti muran iyocahuun nan man caitian.

<sup>5</sup> Asca rato pushu futsa iyamarai pushurasi anofoanri mato nicacasmaifoanno atomaquinoashu focaquin maton sapato tatashacahuun. Ascaquin man ato ismatiroquin mato nicacasmafain Diosirifi nicacasmaifo cuscan. Diosin tsain icoinra huamaforan, —ishon Jesús ato yoini.

<sup>6</sup> Ascashon ato yoiquin anaitiano pushurasifoti ano Upa Dios niaifohuunoa yoifain isinincaifori Jesushuunshon ato caya huafoanfainifo.

*Niaifo Herodescai nannorisi shinannima*

*Mt 14.1-12; Mr 6.14-29*

<sup>7</sup> Ascano nan niaifo Herodes a Jesús aca cuscan nicashu, —¿Tsoamun na nocofunuquin? —ishon shinanni. Atirifoan yoinifo, —Nanfin Juanqui man afanan funia, —ishon yoinifo. <sup>8</sup> Futsafoanri yoicaquin, —Nanfin Eliasquin, —huaino. Futsafoan yoicaquin, —Ma. Nantofin noco shuni caifo Diosin tsain yoimisi ipaoniquin man afanan funiaran, —ishon yoinifo. <sup>9</sup> Ascafiaifoan Herodes yoini, —Ma. Nancai Juanma. Munfin Juan tushtumayamaquin. ¿Asca nan nocofununmun tsoaquin? —ishon yoini. Asca nan niaifoanri fasi Jesús oinpaicoinni.

*Jesús cinco mil nocofunifo pimani*

*Mt 14.13-21; Mr 6.30-44; Jn 6.1-14*

<sup>10</sup> Ascashu chipo afu rafuafo Jesusqui naso cashon nan acafo cuscan Jesús yoinifo. Ascaiton nicaquin Jesús ato yoini, —Pushurasi Betsaida ano nocotisi non fononfocahuun, —ishon ato yoini. <sup>11</sup> Ascafia yorahuan-rasi Jesús yafi afu rafuafo nan foafo ano tapicanashu atoqui funifo. Ascashu nocoifoan Jesús ato yoini, —¡Aicho! Man uqui fui. Uhuun Upa Dios niaifo icanomain ahuu cuscaraqui un mato yoinon, —ishon ato yoini. Nannoshori ratoran futsa isinincai fuafo ato caya huapacuni.

<sup>12</sup> Ascashu man fari caino afu rafuafo doce aqui fucashon yoinifo, —Yorafo nichihuun. Pushurasi ano yafi a chaima icafoanno fotanonfo. Fonaincaniquin. Anoshon tushu fifain ranimain oshacanicain shara futsa fuchinonfo. Nuno tsoa yamaiquin, —ishon yoinifo. <sup>13</sup> Ascaiton ato cumani, —Ato piimacahuun, —ishon a rafuafo yoiaiton. —Nonfin misi mucu fustiti yafi shiman rafusi ayaquin. Min shinanmun na yorafo pimashquin non tushu ichapa fiicaiquin, —ishon yoinifo. <sup>14</sup> Nanno cinco mil nocofunufosi ini. Ainfofo yafi facufocai tanan huamunima. Ascaiton ato yoiqui isca huani, —Ato yoicahuun futsano cincuenta tsaohuaifono futsa anori cincuenta tsaononfo. Nanscasi anonfo, —ato huani.

<sup>15</sup> Nan ato yoiiai cusca tsaocunifo. <sup>16</sup> Ascaino shiman rafu yafi misi mucu fustiti tsomashon nai ari foisinifoantan apa Dios cufinquin isca huani, —¡Aicho! Upan, mihuunshon un ato pimai. Min fasi sharacoin-cun, —huatan. Misi torupacutan shiman rafu ya osishon afu rafuafo ato inanni ato pashcanan huapanonfo. <sup>17</sup> Ascashon picani mayancoinnifo. A picaquin tushu huafo afu rafuafoan doce shihuati fospi huanifo.

*Pedronun, —Jesús Diospan facuran, —huani*

*Mt 16.13-19; Mr 8.27-29*

<sup>18</sup> Ascatan shafa futsa Jesús afu rafuafo ointaifi apa Dios cufini. Cufinquin anaititan ato yocani, —¿Yorafoan shinanmun un tsoaquin? —ishon ato yocaiton.

<sup>19</sup> Cumanifo, —Futsafoan yoiiafin min Juanquin. Nan yorafo unu muran iquimacumisi. Asca futsafoanri yoiiafofin min Eliasquin. Asca futsafoanri yoiiafofin min noco shuni nan Diosin tsain yoimisi ipaoniquin man min afanan funiaran, —huaifoan.

<sup>20</sup> —¿Asca marifi man shinanmun un tsoaquin? —ishon ato yocaiton. Pedronun cumani, —Minfin Cristoquin. Nan Diosin mia catonniran, —ishon yoiaiton. <sup>21</sup> —Ascacun tsoashta yoiyamacahuun, —Jesús ato huani.

*—Unfin chipo naashquicai, —ishon Jesús ato yoini*

*Mt 16.20-28; Mr 8.30-9.1*

<sup>22</sup> Ascatan afu rafuafo yoiqui isca huani, —Un chipo fasi omitsis-cashquin. Nocon yorafohuunshon Dios cufimisi niaiffo non Dios fu tsainti pushu cushumisifo Moisés cununi cuscan tapimamisifoan futan ua icoinra huashquicanima. Ascashon ua ato rutumafiafo osha rafu non fusti finontan un afanan funishquiran, —ishon Jesús ato yoini.

<sup>23</sup> Ascashon nantifi yorafo yoiqui isca huani, —Tsoan ua tanapai sharaquicai afin apaiyai cuscan huatiroma. Ascataka nan un yoiiai cuscacoin huatiro. Ascashon shafatifiri shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiaiffoanno un tanaqui unupacunacamaran,” ishon shinantiro. <sup>24</sup> Ascatan tsoan shinanquin isca huai, “¡Ohua! Un Jesús tanaitonraca ua omitsisca huacanicati,” ishon shinanquin uhuun tsain cachiquiri huua.



Nanscara yorafo naashu omitsiscapanacafo. Ascan tsoan uhuunoashu omitsiscái naa. Nanscara yorafofin nacanashu ufu isharapacunacafoquin. <sup>25</sup> Ascan ratoran futsan nantifi manifoti anoafo ahuara fia ahuunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai ahuashta itiroma. <sup>26</sup> Ascan tsoa uhuun rafipaiquin uhuun tsainri uhuunoa yoicasmaifo. Nanscarafihuun urifi un chipo uhuun Upa Dios cuscaracoin iicaino uhuun Upa Diospan oinmati afu nai muran ica sharafoya chasha curani un fotoaitian un nanscara yorafohuunri un rafipaishqui. “Nacai uhuun yoramaran,” ishon un yoishqui. <sup>27</sup> Ascacun icon un mato yoi. Man futsa nuno ufu niaton naataishoma Upa Dios niaifo icano cuscara man oinyoshquiran, —ishon Jesús ato yoini.

*Jesús fianananriscatani*

*Mt 17.1-8; Mr 9.2-8*

<sup>28</sup> Ascashu ocho osha finontan Jesús Pedro non Juan non Santiago nan rafu non fusti ato machi ano yoni. Apa Dios cufi caquin. <sup>29</sup> Ascashon Apa Dios cufiaino ahuun fuso fianananriscatani. Ahuun sahuutiri chashariscatani nan yoa rama furoa ointsa. Fasi osho sharacoin facafacai ini. <sup>30</sup> Ascaino nocofunu rafu aqui niriscatan afu tsainnifo. Nan rafu Moisés yafi Elías ini. <sup>31</sup> Ascashu nan rafuri chashariscatishotan nan Jesús Jerusalén anoashu omitsiscacai naashquiai cuscan afi ranan yoinannifo.

<sup>32</sup> Ascaiton oincani Pedro yafi afu rafua rafutari oshapaifiacaquin osha tunucoinnifo. Jesús chashariscatanaiton nan rafutari oinnifo. <sup>33</sup> Ascashu nan rafu man Jesusmaqui caino Pedronun yoini, —Ifon, nuno non ica shara itiro. Non mia tapasi rafu non fusti huashonon. Mina futsa non Moisésna futsa non Elíasna futsari non huashonon, —ishon yoifiashocai Pedronun tapinima raquirimain huaaquin.

<sup>34</sup> Ascashu nan tsaincai muran atoqui coin manipacufoannaino coin muran nii futsuashu ratucoinnifo. <sup>35</sup> Ascashon nan coin murannoari oi nicanifo yoiqui isca huaiton, —Naanfin uhuun facuquin. Nan un catonni. Ascacun a nicacoincahuun, —Upa Diosin ato huani.

<sup>36</sup> Diosin tsainqui anaititanaino oianfo arus fusti Jesús nia ini. Ascafiashocai tsoashta yoinifoma arus fusti aton nomuranshon shinannifo.

*Jesús yoshin chaca furonanfacuhuun nuua caya huani*

*Mt 17.14-21; Mr 9.14-29*

<sup>37</sup> Ascatan iyoco futsaino machi anoashu fotocaini Jesús caino aqui yorahuanrasi funifo oinpai fucani. <sup>38</sup> Nanno yorahuanrasi muranshon futsan Jesús cunani. —Tapimamisiton, uhuun facu fusti ua oinshoniyopun. <sup>39</sup> Yoshin chaca ahuun nuushon. Uhuun facu fasi musta musta imayanan fiisimafain ahuun ashfapan facoshurasi atsispomamisi. Yoshin chacacai uhuun facumaquinoashu capaima. Nanscaquisi man rutui. <sup>40</sup> Un mifu rafuafo yoia isca huaqui, “Na yoshin chaca uhuun facumaquinoa ua potashocapun,” un ato huafiacai tsoan atiro icamaran, —ishon nocofunun Jesús yoini.

<sup>41</sup> Ascaiton Jesús afu rafuafo yoini. —¡Ohua! Mancái ua icoinra huacoinnama. Man fasi amaquiri shinanmisi. ¿Ahuutia un matofu icamun man ua nicayamacaiyai? —ishon ato yoini. Ascan facun ahuun apa yoini, —Min facu ua ihuushohuun, —huani.

<sup>42</sup> Ascashon furun ihuushonaino yoshin chacanun afanan musta mustaimainifoanaino pacuni. Ascaiton Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curush-cai yoiaino facu cayani. Ascaiton Jesús apa yoini, —Naquian min facu. Iyosharatahuun, —huani. <sup>43</sup> Ascaino oincani mustairicatan, —Diosin ahumamishti huatiroran, —icashu yoinannifo.

*Jesús nashquiai cuscan afanan yoi futsani*

*Mt 17.22-23; Mr 9.30-32*

<sup>44</sup> Nan acaiton oian cuscan shinansharaifoan Jesús afu rafuafo yoiqui isca huani, —Un mato yoiyai cuscan nicacoincahuun. Futsafin ua ato achimashquiquin, —ishon Jesús ato yoini. <sup>45</sup> Ascashon ato yoiyai cuscaai tsoan tapinima. Diosin ato nomuran ato shinantima huaino. Ascacuai yocapaifia ratucaqui yocanifoma shafacafi ato tapimanon.

*Tsoacaimun fasi shara finacaiiqui*

*Mt 18.1-5; Mr 9.33-37*

<sup>46</sup> Ascashu chipo afu rafuafo afi ranan fochishmanantanannifo. Ascan non rato futsacaimun non fasi shara finacaiiqui ishon yoipacunifo. <sup>47</sup> Ascashon nan shinainfo cuscan onanshon Jesús facu mutsofuran yoiqui isca huani, —Facushtan, nuno ufu niyohuu, —ishon yoini. <sup>48</sup> Asca huatan afu rafuafo yoiqui isca huani, —Tsoan uhuunshon na facu shara huaifin nan uari shara huai cafisca huaiquin. Nanscarifiai tsoan ua shara huaquifin nan ua nichini uhuun Upa Diosiri shara huaqui. Ascan ratoran man futsa oinmati cuscara ahuumamafisho man yora shara huamisi nanfin fasi shara finacaiiquin, —ishon Jesús ato yoini.

*Tsoan noco chaca huapaitama noco shara huai*

*Mr 9.38-40*

<sup>49</sup> Ascaiton Juanpan yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun nan non yoiquin isca huaa, “Asca huayamahuu. Min no fu rafumisimaquin. Asca yoshin chaca yorafomaquinoa min potatiromaran,” ishon non yoiaran, —Juanpan huani. <sup>50</sup> Ascaiton Jesús cumani, —Asca huayamahuu. Tsoan noco chaca huapaitama noco shara huaifin sharaquin, —ishon Jesús Juan yoini.

*Jesús Santiago yafi Juan, —Asca huayamahuu, —ato huani*

<sup>51</sup> Afanan Apa Dios icari cati chaima Jesús Jerusalén ano cayoni. Ascaitocai tsoashta nitun huatiro inima. Manmain tapicufin a Jerusalén anoashu noco nashoyoai Apa Diosin yonoa cuscan. <sup>52</sup> Ascacun a rafuafo rafu rucun nichini. Nan pushurasi Samaria ano focashon itishara huashononfo. <sup>53</sup> Ascafia nannoafoan ato yoiquin isca huani, —Nuno iquiyamacahuun. Non mato oinpaimaquin, —ishon ato yoinifo. <sup>54</sup> Ato asca huaifoan nicashon afu rafuafo rafu Santiago futan Juanpan Jesús yoinifo, —¿Ifon, min noco yonopaimun atohuunshon non Upa Diosin cufinon nan pushurasi nai muranshon chii atoqui pota nai cuyononfo? —ishon yoiyaifoan. <sup>55</sup> Jesús ato cumani, —Asca huayamacahuun. Man shinain cuscaai un shinanpaima, —ishon Jesús ato yoini. <sup>56</sup> Asca huatan pushurasi futsa ano cani.

*Jesús tanasharapaiyaifo**Mt 8.19-22*

<sup>57</sup> A fu caquin nocofunu futsan Jesús yoini, —Ifon, min raquiracaino urifi un mifu cahuacacainon, —huaiton. <sup>58</sup> Jesús cumaquin, —Marifi quiniyaquin puiyaforti naa yafofiano uncai pushu yama, —ishon yoini. <sup>59</sup> Ascashon nocofunu futsa Jesús yoiquin isca huani, —U fu cahuun, —huaiton. Cumaquin, —Ifon, ua manayohuu. Nan uhuun upa naitian iquisi mai huayotan un mia tanasharashquinon, —huaiton. <sup>60</sup>—Ascaquima ua tanafafainhuun. Ua ifoamafofin nan yora naa cuscarafokin. Ascashon nanfoan ato yora naacun mai huatirofo. Ascan minfin uhuun Upa Dios niaifohuunoa ato yoifafainicain, —ishon yoiaiton.

<sup>61</sup> Futsan yoini, —Ifon, un mia tanapai. Ascafia iquisi uhuun pushu ano un cayotanon uhuun yorafo ato yoioicai, —huaiton. <sup>62</sup> Jesús cumaquin, —Tsoan ua yonoshofiaquin apaoni cuscan afanan huapai, nanscara yorafocai itisharafoma uhuun Upa Dios niaifo ano iquishcaquin, —ishon Jesús yoini.

**10***Jesús setenta y dos nocofunifo nichini*

<sup>1</sup> Ascatan Jesús setenta y dos nocofunifo catonni. Ascashon rafurasi ato nichipacuni. Nan pushurasi patasharifo ato rufifo nichini nanno chipo arifi atoqui caashquin. <sup>2</sup> Ascashon Jesús ato yononi isca huaquin, —Yora ichapafaoan uhuunoa nicataiyamafashon ichapamaton ua yonoshocani uhuunoa ato yoishcaquin. Ascacun fasi Upa Dios cuficahuun ahuun yonoshomisifo catonon uhuunoa ato yoinonfo. <sup>3</sup> Ascacun fotacahuun. Un mato yonoa cuscan chashoanfo masharonun pipaitiro cuscan nanscarifi huaquin uhuunoashu man isharafiacun yora chafaoan mato chaca huapaicaniquin. <sup>4</sup> Ascashori a muran pui huati yafi forusa non mato saporator foyamacahuun. Focaquin yorafo finonfaincahuun. A fu tsainyoashu man funa nocotiromaquin.

<sup>5</sup> Pushu futsa muran iquishon ato yoicahuun, “Diosin mato shara huacoinnon. Isharacahuun,” ishon ato yoicahuun. <sup>6</sup> Asca nan pushu muran ica futsa isharacoincun naanfin “Diosin shara” huacoinnaquin nan man yoiacusan. Asca man yoiacusan a pushu muran icafoan mato nicacasmaifocai Diosin ato ointi unimamatiroma. Ascashu funocani. Ascafia man ato yoiacuscacairocofin Diosin matoqui unimaiquin. <sup>7</sup> Ascatan pushurasi muran nocoashu pushu fusti muransi oshacahuun. Nannoshon mato pimafain mato ayamanaifoan acahuun. Diosinhuunoashu yonomisifo nan yopaifo cuscan nan nicamisifoan ato inantirofo.

<sup>8</sup> Ascashu man pushurasi muran man nocoaiton mato ihui sharafain mato pimafain mato ayamanaiton acahuun. <sup>9</sup> Nannoshon isinicaifo uhuunshon ato cayahuamacahuun. Ascashon ato yoicahuun isca huaquin, “Natian Diosin niaifoan ahuun yorafo iquinai cuscan chaimashtaran,” ishon ato yoicahuun. <sup>10</sup> Ascan mato nicacasmaifoanno ato fai ano fotacahuun nannoshon ato yoicahuun isca huaquin, <sup>11</sup> “Maton chaca nocohuun nuama. Matohuunfin nuaquin. Ascafiaio Diosin maton Ifo ipairan,” ishon ato yoicahuun. <sup>12</sup> Un mato yoinon. Diosin Sodoma anoafao ato namaqui cuyoni. Ascan nan mato

nicacasmaifofin ahuutiaran nan Sodoma anoafu ani finonmacaifain ato omitsisca huaquin finacoinshquin.

*Pushurasi anoafu yoitimacoinfo*

*Mt 11.20-24*

<sup>13</sup> ¡Ohua! Man Corazín anoafu yafi Betsaida anoafuan man chipo fasi omitsiscai. Tsoan oinyomisima cuscara shara un mato ismafiano mancai chaca shatupaima. Ascan nan Tiro anoafu yafi Sidón anoafu un mato isma cuscan un ato ismaiton nanfoan ato chaca shatucuanafu. Ascashon yoicuanafu isca huaquin “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafu. <sup>14</sup> Ascafia Diosin nantifi icoinra huamafo onaintimaitian nan Tiro anoafu yafi Sidón anoafori onaintimafiaquicai mato onaintimaquin finacoinshquin. <sup>15</sup> Ascan man Capernaum anoafuan man shinanmun man nai muran Dios ari foicai. Ma. Omitsiscapanacafu muranrocon mato potai, —Jesús yoini.

<sup>16</sup> Asca huatan Jesús ahuun tanamisifo afanan ato yoiqui isca huani, —Tsoan man yoiái cuscacoin mato nicaquifin nan uacoin nicai cafisca huaiquin. Ascan tsoan mato nicacasmaquifin uarifi nicacasmaiquin. Ascan tsoan ua nicacasmaquifin nan ua nichini uhuun Upan Diosiri nicacasmaiquin, —ishon Jesús ato yoini.

*Setenta y dos nocofunufu Jesús yonoa cuscan afanan naso furanifo*

<sup>17</sup> Ascano chipo nan setenta y dos ahuun tanamisifo afanan aqui naso furacani fasi unimacoinceni fucashon yoinifo isca huaquin, —Ifon, yoshin chacafoanfin min anuhuunshon noco nicacointirofoquin. Ascacun yorafomaquinoa non mihuunshon potaran, —huaifoan.

<sup>18</sup> Jesús ato cumani, —Aifain. Dios icanoashu nan cana piishicai cafiscái Satanás mai ano pacutanaiton un oian. <sup>19</sup> Ascano un mato yonoainocai uhuunshon mato ahuaraton ahuusca huatiroma. Rono paupan futan inapapiaton mato ahuusca huanonma un mato cushutiro. Ascashon nan Satanás noco noicasmamisi uhuunshon man finoncointiro mato ahuusca huanonma.

<sup>20</sup> Ascacun nan man yoshin chaca potahuunoashu unimayamacahuun Diosifin nai muranshon mato anu ahuun libro muran cunuaquin man ahuun facufocun ato ismashquin. Nan shinainfin man unimatiroquin, —ishon Jesús ato yoini.

*Uqui fucahuun. Un maton ointi unimamatiro*

*Mt 11.25-27; 13.16-17*

<sup>21</sup> Ascano ato yoiqui anaititan Diosin Yoshin Sharahuunoashu unimacoinquin Apa Dios yoiquin isca huani, —Upa Diosin, min fasi sharacoin. Nantifi nai murannoafu futan mai anoafuan aton Ifofin minquin. Ascano nan mapo sharayafu yafi cunu tapiafocai min tsain shara min ato tapimanama. Ascafia nan cunu tapisharafoma nan facu cuscarafuqui. Ascashon nanfoan un ato isma cuscan yafi un ato yoiái cuscan ua icoinra huafu. Nanfofin min ato tapimanaquin. Icon, Upan, minfin nanscara fuchipaiquin, —ishon apa yoini.

<sup>22</sup> Ascashon cufinquin anaititan Jesús nantifi yoini, —Uhuun Upan Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aquin urus fusti Upan

Diosin un onancoian. Nanscarifi huaquin urifi un futsafo Upa Diosihu-unoa tapimanai cuscan nanfoanri Upa Dios tapitirofoquin, —ishon Jesús yoini.

<sup>23</sup> Ascashon ifiacucahuan ahuun tananmisifo fusti yoini, —Diosin ma-tohuun noiquin ahuun yono mato isma. Ascacun mato shara huacoinna.

<sup>24</sup> Man oiain cuscan Diosin tsain yoimisifo futsafo futan niaifofoanri oin-paifiaquicai oinpaonifoma. Man nicai cuscari nicapaifiaquin tsoan nicapaonimaran, —ishon Jesús ato yoini.

*Samaritanon sharahuunshon Jesús ato ahuaara futsa tapimani*

<sup>25</sup> Ascano nocofunu futsa Moisés cununi cuscan tapicoian Jesusqui oni yocayoi. Tapipaiquin Jesusmain cayacafi cumaiquin ishon. Ascashon yocani, —¿Tapimamisiton, unmun ahuuscatiroquin Dios fu ipashquin? —huaiton.

<sup>26</sup> Jesús cumani, —¿Raquiri Moisés cununimun? —ishon yoiaiton.

<sup>27</sup> Cumani, —“Nocon Ifo Dios nocon ointi muranshon fasi noifain, nocon nomuranshori fasi noifain, fasi curushcai Dios noifain nocon shinanfoyashori Dios noihuu. Ascatan nan mifiri min noiai cuscan aquin mia chaima icafori noicoinhuun,” ishon Moisés cununiran, —huaiton.

<sup>28</sup> Ascaiton Jesús yoini, —Min ua cayacafi cumashara. Nanscacoian atahuun. Ascashufin min Dios fu ipatiroquin, —ishon yoini.

<sup>29-30</sup> Asca huaiton cumani, —¿Ascan tsoafomun ua chaima icafoquin afohuun un noiai? —ishon yocani. Ascan nantocai atifihuun noinima. Ascacun Jesús a nocofunun shinain cuscan onanshon cumaquin isca huani, —Nocofunu Jerusalén anoashu Jericó ano caiton. Yomutsofan achicashon sahuuti shoriquin futsatan sutuquin futsacaquin nama cuanifo. Ascashon fai cusmun ratafaini yomutso ranan ichonifo.

<sup>31</sup> Ascano ahuun caifohuunshon Dios cufimisi oquin oian fai cusmun racacun oinfiakin fai ocuma futsa caquin tanafainima.

<sup>32</sup> Ascano nocofunu futsa Levita arifi oquin oian racacun nantorifi rahuinfainni.

<sup>33</sup> Ascaino nan fainri chipo Samaritanon oquin fuchitan ahuun ramapaitoshini.

<sup>34</sup> Ascashu chipacopacucahuatan ahuun yoratishon shuni ya cayati futsa osishon ahuun ratucuraquin futsatan. Ahuun ina camaqui ratainifoantan iyoshon pushu muranshon cushushoni.

<sup>35</sup> Ascatan iyoconaino ahuun rafanan toro paratamacoin ahuun pui nua rafu inanni. Ascashon pushu ifo yoiquin isca huani, “Na nocofunu ua cushusharashohuun. Afanan oshon un mia rafuri inanyoshquinon. Min cushusharaiton finonmafaintan afanan oshon un mia pui inanyoshquinon,” huani.

<sup>36</sup> ¿Ascan rato nocofunu rafu non fusti caimun a chaima icafo cuscaraquin a nocofunu omitsiscapishtai? —ishon yocaiton.

<sup>37</sup> Nan Moisés tsain tapimamisiton cumani, —Ahuun ramapaiyafin a chaima ica cuscaraquin, —ishon yoiaiton. Jesús yoini, —Caashon mirifi nanscarifi huatahuun, —ishon yoini.

*Marta futan María ahuun pushu ano Jesús ini*

<sup>38</sup> Ascatan Jesús cai pushurasi muran noconi. Nanno ainfoan ahuun anu Marta ica ini. Nanton ahuun pushu muran Jesús iquimasharani.

<sup>39</sup> Ascano nan Marta chipocufin María iniquin. Nanton Jesús tsain yoiaiton nicashquin icashu Jesús naman tsaotoshini nicasharashquin.

<sup>40</sup> Ascafiatocai Marta nicanima nan tushu huaisi shinanni Jesús pi-mashquin. Ascacun nan Martan Jesús yoini, —¿Ifon, mian shinainma-mun? Urusu fusti un tushu huai. Uhuun chicocai u futan apaima. Ua yoishohuun u futan aquiyonon, —huaiton. <sup>41</sup> —Martashtan, minfin tushu fusti shinanquin. Ahuarafo futsa huaquicai mian nicaima. Nan uhuun tsain sharafin María catoanquin. Ua nicaquin. <sup>42</sup> Uhuun tsain fusti shinanquin. Nan fusti yopaiquin. María ahuun nomuran uhuun tsain nanushon aquimashquimaran, —ishon Jesús yoini.

## 11

—*Raquirimain non Upa Dios cufiqui huatiroquin, —ishon Jesús ato yosini*

*Mt 6.9-15; 7.7-11*

<sup>1</sup> Ascano shafa futsa Apa cufiqui anaitiano afu rafua futsan yocani, —Ifon, raquirimun non Upa cufiqui huatiroquin. Noco tapimahuun. Juanpan afu rafuafo tapimani cuscan nocorifi tapimahuun, —ishon yoiaiton. <sup>2</sup> —Isca huacahuun, —ishon Jesús ato yosini, “Nocon Upan nai murannoaton min fasi sharacoin.

Manifotiton aton niaifo iishquin mia ifoannonfo.

<sup>3</sup> Shafatifi nocon tushu non yopai cuscan noco inanhuun.

<sup>4</sup> Nan noco chaca huaifoan non ato rau huaa cuscan huafain nocon chacafori noco rau huashohuun, Upan.

Satanás yoshin chacapan noco chaca huamapaifiaiton

nocoqui cumatima huahuu.

Nansca huaquiquian,”

ishon Jesús ato yosini.

<sup>5</sup> Ascatan afanan ato yoiquin isca huani, —Manmun mato yorahua yamunacuhanaino mato ano nococun maton yora futsa yoa yocashoquin isca huaquin, <sup>6</sup> “Ua yoa rafu non fusti inanpun. Un mia nasonon. Un natian yopaicai uhuun yorafo chaicunoashu uqui nocoano un ahuashta pimaimacain,” ishon yocaiton.

<sup>7</sup> ¿Ascaiton cumaquimun isca huatiro, “Mun uhuun facufo ya iquia caincaitiri man fupoa. Asca ua fucash huayamahuu,” ishomun anori cumatiro? <sup>8</sup> Ma. Ascacai huatiroma. ¿Raquiri huatiromun? Un mato yoi. Ahuun yorahuaton inanyamai shafai fasi manariaiton inanyamacuatan inantiro. Funinaca huatan nan yoca cuscan inantiro.

<sup>9</sup> Afanan ahuaara futsa un mato yoiyai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Dios cufifafaincahuun man cufiai cuscan mato inanon. <sup>10</sup> Tsoan Upa Dios yocariai fiishquin. Ascan tsoan ahuaara shara fasi fuchipaiyai cuscan Diosin ato fuchimatiro. Ascan tsoanri Upa Dios cufiriaiton ashoshquin.

<sup>11</sup> ¿Ascan maton facun mato shiman yocaiton man rono inantiromun? Ma. Mancai maton facu asca huatiroma. <sup>12</sup> ¿Maton facuri mato tacara to yocaiton man inapapia inantiromun? Ma. Mancai maton facu asca huatiroma. <sup>13</sup> Ascacun tapicahuun. Man chaca huamisifiashon maton facufo man inansharamisi. Man ascaiton finacaiya maton Upa Diosin nai murannoaton man yocai cuscan ahuun Yoshin Shara mato inanshquin, —ishon Jesús yoini.

—*Yoshin chaca ato niaifoan ahuun curushhuunshon Jesús yoshin chacafo potatiroran, —huanifo*

*Mt 12.22-30; Mr 3.20-27*

<sup>14</sup> Ascano yoshin chaca nocofunuhuun nuushon tsainmatiro ma Jusqui ocon. Amaquinoa yoshin chaca potano tsaiinnaca huanaiton oincani mustairinifo. Ascashon atirifiton, —¡Aicho shararan! —huaifoanno. <sup>15</sup> Futsafoan yoinifo, —Satanás curushhuunshon Jesús yoshin chacafo yorafomaquinoa potatiroran, —ishon. <sup>16</sup> Futsafoan Jesús yoiquin isca huani, —Dioshuunshon nai murannoa noco ahuaara futsan ismahuu non mia icoinra huanon Diosin mia catoanquin, —huaifoan.

<sup>17</sup> Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushu fusti muran icaforti afi ranan chaca huatananfaincani pashcanantirofo afanancai tsoa anosi itiro ma. Ascashuricai afanan tsoa yorahuatanantirofoma. <sup>18</sup> Nanscarifiai Satanás niaifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itiro ma. Un nannori yoia manmain yoiquin isca huayamacun, “Satanashuunshon yoshin chacafo potaran,” ishon man uhuunoa yoia.

<sup>19</sup> Ascafia manfin uhuunoa yoimisiquin. “Satanás curushhuunshon yoshin chacafo potaran,” ishon man yoimisi. ¿Un asca huaino tsonhuunshon mato yorafoanri yoshin chacafo atomaquinoa potafomun? Ascacun nanfohuunshon man tapitiro man uhuunoa amaquiri shinanchacai cuscan. <sup>20</sup> Ascafia Diospan Yoshin Sharahuunshon un yoshin chacafo atomaquinoa potaiton man tapitiro maton Numamisi Diosin catonni man matoqui noco. <sup>21</sup> Ascan nocofunu mutsisipacoinin tucuti yashon ahuun pushu cushuanocai tsoan ahuun ahuashta muntiro ma. <sup>22</sup> Ascafia nan finoncaia fasi mutsisipacoin aqui nocoshon achifain ahuun cunoti mufishon ahuun ahuafoa cuyonfiatocai ahuusca huatiro ma. Ascashu ahuun ahuafoa pashcanain futsutirofo.

<sup>23</sup> Tsoa ufu rafucasmaquifin uhuun tsain nicacasmaquifin. Nanfoan futsafo ua icoinra huamapaicanima. Ascaquifin Diosimaqui ato imacanicun.

*Yoshin chaca yoraqui afanan nasotiro*

*Mt 12.43-45*

<sup>24</sup> Yoshin chaca nocofunumaquinoashu cai tsoa istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuhuun ipaoniquin. Ascacun un afanan aqui nasoiran,” ishon shinanni. <sup>25</sup> Aqui nocoshon oian tsoa futsacai afu rafua inima. Nan pushu matsomua shara ointsa. <sup>26</sup> Ascacun nan yoshin chacanun afu yoshin chacafo siete ato ihuuni nan fasi chaca finacai fo. Ascashon ato yoiqui isca huani, “Nocofunun un mato ismaicai non ahuun nuifonon,” ishon ato yoini. Ascatan aqui foshon iquinaifoanno nan nocofunu fasi mimacai chacacoin ini. Manmain aqui rananri focun, —ishon Jesús ato yoini. —Asca huaifoanno nan nocofunu afanan finacai pacucahuani. Mimacai fasi omitsiscas finacoincun, —ishon Jesús ato yoini.

*Nicafo cuscan unimacoincaini*

<sup>27</sup> Ascaiton ato yoiaino ainfoan nan yorahuanrasi muranshon oi ashcafinin Jesús yoiqui isca huani, —Min uhua mia cainshon mia shoma amani. Ascacun min uhuauquimun Upa Diosin unimasharapainon, —ishon yoini.

<sup>28</sup> Ascatan Jesús cumani, —Ai, nan min yoiiai cuscan iconflashu tsoan Diosin tsain nan nica cuscacoin Diosin nan unimamatiro finacoian, —ishon cumani.

—*Tsoan atiroma cuscan noco ismahuu non mia icoinra huanon, —ishon yoinifo*

*Mt 12.38-42; Mr 8.12*

<sup>29</sup> Ascatan fasi paratama yorahuanrasi Jesusqui fuaifoan. Ascaiton ato yoini, —Natian niafo fasi chacacoinfo. Ascashon ua yoimisifo isca huacaquin, “Tsoan atiroma cuscan noco ismahuu min Dios ariashu oa non mia icoinra huanon,” ishon ua yoimisifo. Ascafia nan Diosin tsain yoimisi Jonás ani cuscacoin un chipo mato ismaiton nan fusti man oinshquin. <sup>30</sup> Ascan Jonás tsainhuunshon Ninive anoafoan Dios icoinra huanifo cuscan nanscarifi huaquin natian niafo un mato yoi marifi man icoinra huanon.

<sup>31</sup> Ascashon Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshcaniquin. Nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscaicai tsoa futsa tapipaonifoma. Ascacun ahuun tsain nicapaicoin un aqui chaicunoashu cani cuscan mancai nan Diospan Fururi asca huapaipaonima. Ascatarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfacun mancai ua nicapaima.

<sup>32</sup> Nanscarifi huaquin Diosin nantifi yorafo ichanan huaitian ato yoi pacushquin ratofomain afu ipatiro iyamarai omitsiscapanacafo muran foshcaniquin. Nantian Ninive ano ipaonifoan matohuunoa yoishcani isca huaquin, “Jonás noco Diosin tsain yoiiai cuscan nicacoinshon non nocon chaca shatucoinfain non Dios icoinra huani. Asca man manfin Diospan furucoin nicafishocai maton chaca man shatupainimaran,” ishon mato yoishcani. Nan icon un Jonás finonfiacucai man ua nica-paimisima.

*Nocon ointi sharaquin non shinansharatiro*

*Mt 5.15; 6.22-23*

<sup>33</sup> Asca huatan afanan ato yoiquin isca huani, Tsoancai lamparina ihuashon otayamafain paninaranunri fupoima. Asca huatarocon shafacafi tsaoni nan iquiaifoan oinsharanonfo.

<sup>34</sup> Nanscarifiai nocon furo rafu noco cayan lamparina cuscara. Nan rafu sharano non oinsharatiro. Ascashon nocon caya cushusharatiro non ahuuscanonma. Nanscarifiai mato nomuranshon man shinansharai man isharacointiro. Ascafia maton furo chacanocai man oinsharatiroma. Ascashu nan faquish muran ica shinantsain. Nanscarifiai maton nomuranshon man shinanchacaicain man isharatiroma. Man funocointiro. <sup>35</sup> Ascacun oinfain. Tapicahuun mato nomuranshon man shinansharai cuscan chaca shinantama. <sup>36</sup> Ascashu shafacafi man icafin nan chashamatinin mato chashama cuscaraquin. Nanscara ano man icacai faquish itiro. Nanscarifiai maton nomuranshon man



Dioshuunoa fusti shinansharaino man ahuaara chaca shinantiromaran, —ishon Jesús ato yoini.

—*Manfin chacafoquin, —Fariseofo yafi Moisés cunu tapimamisifo Jesús ato yoini*

*Mt 23.1-36; Mr 12.38-40; Lc 20.45-47*

<sup>37</sup> Ato yoiqui anaitiano Fariseonun Jesús yoimani pimashquin. Ascano ahuun pushu muran oashu tsaoni. Ascaino pishcaquin Fariseofo ato shunifoan ato tapimani cuscan ahuun mucu chocayoni. Asca Jesuscai Fariseo imisifo cuscan anima. <sup>38</sup> Ascaiton oinquin Fariseon ahuun nomuran shinanni, —¡Ajaa! Nocon shunifoan noco tapimani cuscaai Jesús aimaran, —ishon shinanni.

<sup>39</sup> Ascaiton Jesús ahuun nomuran onanshon yoiqui isca huani, —Ua nicahuu. Man Fariseofoancai maton mucu chocafiaquicai man maton nomuran ahuaara shara shinainma. Yora futsafohuunoa shinantama. Man ahuaara futsa futsa tapasi noicoin. Maton nomuran chaca futsa futsatapafa fospicoianran, —ishon ato yoini. <sup>40</sup> —Manfin fasi amaquri shinanmisiquin. ¿Man tapiamamun tsoan noco caya fumancayan oni-huafain noco nomuranri onihua? <sup>41</sup> Ascacun ahuuomafohuun rama-paicain ato inansharacahuun. Man ascaiton tapitirofo Diosin maton chaca mato soashotiro man sharacoin inon. Ascashu man shinain cuscan shara fustisi iishquin.

<sup>42</sup> ¡Ohuashta! Fariseofoan mato Diosifin onaintimashquiquin. Mato fanafo atirifi man Dios inanmisi. Man asca huafiaquicai man futsafo shara huamisima. Ascaquifin man Diosiri noicoianmaquin. Man mato fanafo atirifi Dios inanmisi cuscan sharafia futsafo shara huafain Diosiri noicoincahuun.

<sup>43</sup> ¡Ohua! Fariseofoan Diosin mato onaintimai. Ichananti pushu muran iquitan shafacafi man tsaofafaini mato oinquin, “Sharacoinforan,” mato huanonfo. Yorafoan mato finonfoancaquin, “Noco tapimamisiton,” mato huaifoanno man unimanon.

<sup>44</sup> ¡Ohua! Ascacia Diosin mato onaintimai. Manfin naan yora naa cuscarafuquin. Yora mai huafo manaon cahuaqui futsafoan tapishoma puamafoantirofo. Nanscarifiai yorafo matoqui nocoflashocai tapiafoma maton nomuran man chacacoinfiacun, —ishon Jesús Fariseofo yoini.

<sup>45</sup> Ascaiton nicacaquin Moisés cununi cuscan tapimamisi futsan cumani, —Tapimamisiton, min anori yoiquifin nocori min roaiquin, —huaiton.

<sup>46</sup> Jesús cumani, —¡Ohua! Moisés cununi cuscan tapimamisifoan mator Diosin onaintimai. Man maton caifo yoiqui isca huamisi, “Moisés cununi cuscan nantifi huacahuun. Fustishta finonmayamacahuun,” ishon man ato yonoflashuca marifi man ascacoinyama. Ascatarocon Moisés yononi cuscan finonmafain man ato huama. Ascano apaifi-aquicai tsoan atiroma. Ascafiaifoancai maton mucuman ahuashta ato futan man huapaiyama. Ascashu aton nomuran omitsiscafiaifoancai man atohuun ramapaiyama.

<sup>47</sup> ¡Ohua! Diosin mato onaintimacoin. Man mato shunifo nan Diosin tsain yoimisifo maiifo ano man ahuaara toquiri onihuamisi ato shinanshquin. Man asca huafia mato shunifoan ato rutupaonifo. <sup>48</sup> Mato shunifo Diosin tsain yoimisifo rutunifo. Man amisi cuscan huaquin man yorafo ismai nan maton shunifoan aponifo cuscan huaquin marifi atofu niyoshon man asca huacuana. Ascashu fin marifi man

rutumitsamisi cuscaraquin. Diosin tsain yoimisifo maton shunifoan rutunifo. Ascacun mairafo ano man toquiri onanti huaquin fufoa.<sup>49</sup> Ascacun Diosin onancoinshon matohuunoa yoiqui isca huani, “Uhuun tsain yoimisifo yafi uhuun facu fu rafuafo ato yoisharanonfo un ato nichishqui. Ascafia atirifi ato rutufain atirifi ato omitsisca huashcaniran,” ishon Diosin matohuunoa yoini.

<sup>50-51</sup> Ascun nan icon un mato yoi. Nantifi Diosin tsain yoimisifo ato rutupaonifo nan Diosin ato onihuaqui tau huanitian yafi natian. Ascacun atohuunshon Diosin matoqui nutashquin. Nan Abel rutuqui tau huafain ahuun unutaqui Zacarias nan Dios fu tsainti pushu muranshon cufiti chaimashon man rutunifo. Ascashon nantifi Diospan yorafo chaca huapaonifo cuscan natian man niyoano matoqui nutashon mato omitsisca huaqui finacoinshqui.

<sup>52</sup> ¡Ohua! Moisés yononi cuscan tapimamisifoan Diosin tsain cununi cuscan onui cafisca man huaa futsafoanri tapisharanonfoma. Mancai Diospan tsain icoinra huacoinnama. Ascashon futsafoanri tapipaifaiton man ato shutia icoinra huanonfoma. Ascacufin Diosin fasi mato onaintimaquin finacoinquin, —ishon Jesús ato yoini.

<sup>53-54</sup> Nicacanashu Fariseofo yafi Moisés cunu tapimamisifori fasi aqui sinacoincaquin aqui tsain chipunifo. Fasi ichapafain yocanifo. Ahuarashta amaquiri ato cumaiton nicapaicaquin. Amaquiri ato yoi-tanaino niaifofoquin chanipaicaquin Jesús cunu muran iquimanonfo.

## 12

—*Fuparamitsapaimisi iyamacahuun*, —*Jesús ato yosini*

<sup>1</sup> Ascaino yorahuanrasi aqui fucani yurui furanifo. Ascaifoan Jesús afu rafuafo yoiqui isca huani, —Oinfain. Fariseofoan, “Sharaforan,” mato huamapaicani. Sharafofaminquin. Sharafo shafain man ica sharafoyamafiacun. Nanfo fuparamitsamisifo. Ascacun ato cus-cara iyamacahuun. <sup>2</sup> Ascafia ahuarashta onupaifiamisifo nantifi Diosin ato puashoshquin. Ahuarari fomanpaimisifo nanfori ato puashoshquin. <sup>3</sup> Futsafo fomanfain arusu fusti shinanfiamisifo nanfori Diosin ato puashoshquin. Cunu muranshon onushta yoifiafo nanfori ato puashoshquin nantififain tapinonfo.

*Tsoquimain man ratutiroquin*

*Mt 10.26-31*

<sup>4</sup> Uhuun yorafoan un mato yoi. Mato rutupaiyaifoanno ratuyamacahuun. Mato caya fusti rutucaniquin. Asca maton yoshinfocai tsoan ahuusca huatiroma. <sup>5</sup> Ascacun atoqui ratuquimarocon Diosiqui ratucahuun. Nantofi mato rutufain maton yoshinfori omitsiscapanacafo muran potatiroquin. Nanno chi urumanhuan matsinacama. Naan icon un mato yoi. Dios fustiquifin man ratutiroquin. <sup>6</sup> Ascano tsitsipio mucu fustiti inanmitsashonraca toro rafu fitirofo. Ascafia Diosicai fustishtahuun ointiaquimanima. <sup>7</sup> Nan icon un mato yoi. Diosin nantifi tapicoian. Mato foori man tanan huani. Ascasho Upa Diosin tsitsipiofo shinanmisi cuscan fasi mimacaia matohuunoa shinanfaini. Ascacun ratuyamacahuun. Matocafin tsitsipio aca finonmacaifain Diosin mato-huun noiquin.

*Tsoan yorafoan ointaifi*, —*Jesús uhuun Iforan*, —*huaa*

*Mt 10.19-20, 32-33*

<sup>8</sup> Ascano tsoan yorafoan ointaifi, “Jesús uhuun iforan,” ishon ato yoiafin uhuun Upa Diosin ahuun oinmatifoan afu nai muran icafoan ointaifi, “Naanfin uhuun yoraquin,” ishon un yoishquin. <sup>9</sup> Asca tsoa yorafoan ointaifi, “Jesús uhuun ifomaran,” ishon yoia nantocai ua icoinra huamisima. Nanscarifi huaquin Diospan oinmati afu nai muran icafo ointaifi, “Naancai uhuun yoramara” un yoishquin. <sup>10</sup> Tsoan ua chaca huafin Upa Diosin rau huashotiroquin. Asca tsoan Diospan Yoshin Sharaqui tsain chaca huacai rauhuanacama. Aton chaca atohuun nuu-pacunaca.

<sup>11</sup> Ascano ichananti pushu muran mato iyocashon niaifofoan ahuun ointaifi raquirira mato huafiaifoan shinanchacayamacahuun. <sup>12</sup> Nantianfin Diosin ahuun Yoshin Sharapan mato shinanmatanaino mato tsain chaca huaifo Diospan Yoshin Sharahuunshon man ato cumasharanon, —ishon Jesús ato yoini.

*Yora mafo ichapaya musucoinquin*

<sup>13</sup> Nannoa nia futsan Jesús yoini, —Tapimamisiton, uhuun yora ua yoishohuun nocon upan noco inan cuscan uari pashcashonon, —huaiton.

<sup>14</sup> Jesús cumani, —Uhuun yoran. Uncai tsoa yoimisima futsa pash-cashonon. Tsoanricai ua catoanma un ato pashcanan huanon, —ishon yoitan.

<sup>15</sup> Afanan ato yoiqui isca huani, —Ua nicacahuun. Matonama fuchipaiyamacahuun. Ahuara ayafiashon afanan finonmafain fipairiyamacahuun. Mafo ichapayahuunoashucaí non unimatiroma. Nocon mafocai nocon ointi unimamatiroma. Nocon mafohuunoashucaí non isharatiromaran, —ishon ato yoini. <sup>16</sup> Ascashon nocofunun ichapayahuunshon Jesús ato ahuaara yosini isca huani, —Nocofunu futsa mafo ichapaya ahuun mau ano ahuun yono sharafori ichapaya ini. <sup>17</sup> Ascacun nan nocofunu mafo ichapayaton shinanqui isca huani, “¿Umun uhuun yonofu ahuusca huaquin? Uhuun tasha pushufo murancai uhuun yonofu icoinama. <sup>18</sup> Ascacun uhuun tasha pushufo pucashon un afanan uhuapacoin huai. A muran uhuun yonofu yafi uhuun mafofo icoinon. <sup>19</sup> Uhuun nomuran un shinanqui isca huaa, ‘Uhuun ahuaara ichapa iquisi mucushon chipo un tunusharafain ayafain aqui pifain monocain un unimasharacoinniran,’ ” ishon ahuun nomuran shinanni.

<sup>20</sup> Ascashon anori shinanfiaiton Diosin yoini, “Mincai ahua tapiama. Na yamutafin min naicain. ¿Min naanomun na min mucuafo ahuus-caiquin?”

<sup>21</sup> Nanscafin yora ahuaara ichapayashon Diosin shinantama imisishaquin. Naashucaí afanan ahuaaya iquima. Nan ahuuoma cuscara iishquin, —huani.

*Diosin ahuun facufo cushushara*

*Mt 6.25-34*

<sup>22</sup> Ascaino Jesús afu rafumisifo yoiquin isca huani, —Afanan un mato yoisharanon. Ua nicasharacahuun. Isca huaqui shinanyamacahuun, “Non ahua pimara,” ishon shinanchacayamacahuun. Ahuaricai non sahuuimaran iyamacahuun. <sup>23</sup> Non ahuaara pifain non sahuuatocai noco imasharatiroma. <sup>24</sup> Shinanapon. Nan puiyafocanai ahua fanayamafain ahua pitamisi. Nanscarifi aquin Diosin matohuun noiquin nan

puiyafó aca finonmafain mato cushushara. <sup>25</sup> Ascacun shinanchacayamacahuun. ¿Non shinanchacatocai shafa fusti noco nimayotíromun? <sup>26</sup> Asca shinanchacahuunshoncai ahuaton noco nimayotíroma. Asca ahuara futsari shinanchacahuunshon noco imatíroma. Asca ahua shinanchacayamacahuun.

<sup>27</sup> Ascashon shinanquiri isca huayamacahuun, “¡Ohuashta! Rani-amun un sahuuti finanti sahuushqui,” ishon shinanyamacahuun. ¡Shinacapon! Salomón sahuuti sharashtacoin sahuuflapaoncaí nan charo sharashtacoinfo cuscarama. Charofoancai yonoyamafain sahuuti icushuima. <sup>28</sup> Diosin charo sharashatacainfo onihua. Foaisharafia supashon samamashta tsasicun coatirofo. Nanfo finonmacaifain mato noiquin mato sahuuti sahuumashquin. Ascafia mancai iconra huasharacoinnana.

<sup>29</sup> Ascacun shinanquin isca huayamacahuun, “¡Ohuashta! Unmun ahua piishquin uhuun tushuyamaino. Unricai ahua sahuuimaran,” ishon shinanchacayamacahuun. <sup>30</sup> Ascan nannori nan iconra huamafoan shinanchacamisifo. Ahuara pifain sahuupaiyaifo fustisi shinanmisifo. Ascan maton Upa Diosifin tapiquin man yopai cuscan. Ascacun mato inanshquin. <sup>31</sup> Ascacun Diosicairocon shinancahuun. Mato yonoma-paiyai cuscan nan fusti shinanfafaicahuun. A cuscara shara ipaicahuun. Nancai shinanquin tau huafafaincahuun. Man ascaiton ahuara futsa man yopai cuscan Upa Diosin mato inanshquin.

*Diosin icarishon ahuara sharacoinfo noco mucushotiro*

*Mt 6.19-20*

<sup>32</sup> Ascano uhuun yorafoan ratuyamacahuun. Maton Upa Diosin mato cushushara. Nantifi ahuuna matori inain. Unimacai mato inanshquin. <sup>33</sup> Maton mafo inanmitsacahuun ahuun rafanan pui fishon yora ahuuomafo inanshcaquin. Man ascaiton Diosin nan icanoshon mato ahuara sharacoinfo mucushoni. Nanfocai cuyopacunacama. Coroisin nanfo piquin chacana huayamainocai yomutsori ano iquítíroma ahuara mato fianshquin. <sup>34</sup> Asca man mafo fusti shinanfafaingquin nan fusti man noicain. Ascan man Dioshuunoa fustisi shinanfafaingquin nanrifi man yonoshosharafafaintiro ahuun noicoingquin. Ascashu man afu ishara-pacupaitiro.

*Iquisi itisharacahuun*

<sup>35</sup> Ascacun itisharacahuun. Un mato anoashu un chipo nai muran caiquin. Ascafiashu ratoran shafatan iyamarai yamu un matoqui afanan nasoshquin. Yamu yora futsa nocoaiton manquin lamparina otatiro itisharashon. Asca nanscarifiai itisharacahuun. <sup>36</sup> Oinmatifoan aton ifo fustitian mai futsa ari cano futsafoan a pushu anoshon manasharatirofo. Ascano ifoan nocoshon ato cunaiton yoitirofo, “¡Aicho! Iquiyohuu,” huatirofo.

<sup>37</sup> Ascaino Ifoan nocoshon oian ahuun oinmatifo itisharafaanno unimacointiro. Nanforifi a unimatirofo. Ascan un mato icon yoi, Nan ifoan atoqui nocoshon ato pimaquin yoiqui isca huai, “¡Aicho! Fucahuun. Un mato pimapaingquin,” ishon ato yoitiro.

<sup>38</sup> Ascashu man rama osha pacuaino iyamarai yamunacuhuanaino iyamarai shafa matsi matsicaino ifo nocoaiton oin ahuun oinmatifo itisharashu fasi aqúi unimacointirofo. <sup>39</sup> Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino

ahuun pushu muran iquiai tapishocai iquimatiroma. <sup>40</sup> Nanscarifiai marifi itisharacahuun. “Iscaino nocon ifo oimaran,” ishon shinanyamacahuun. Ahuuscara atanaino un matoqui nocoriscaiquin, —ishon Jesús ato yoini.

*Oinmati rafu futsa ifoan yonoai cuscacoin aino futsa nan yonoai cuscacoin aima*

*Mt 24.45-51*

<sup>41</sup> Ascaiton Pedronun yocani, —¿Ifon, min ahuafo yoiai cuscan noco fusti min tapimapai iyamaraimun nantifi yorafori min tapimapaiquin? —ishon yocaiton.

<sup>42</sup> Jesús cumani, —Man tapinon un mato yoi ahuu cuscaramain oinmati shara itiroquin.

Niaifocoin mai futsa ari caquin niaifo patasharinoaton yoitiro isca huaquin, “Uhuun oinmati futsafo ato tushu shafatifi inanhuun. Nanticoi rafu aton pashcanan huahuun,” huafaini catiro. <sup>43</sup> Ascatan niaifocoin afanan nocoshon oinquin ahuun niaifo patasharinoa nan yoia cuscacoin aano fasi aqui unimacointiro. Ascashon nan shara huacointirori.

<sup>44</sup> Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo min ua cushusharashotiroran,” ishon yoitiro. <sup>45</sup> Ascafa nan niaifo patashari chacapan ahuun nomuran shinanqui isca huatiro, “Uhuun niaifo funa nasoimaran,” ishon shinanquin oinmatifo futsafo nocofunufu yafi ainfori ato chaca huaqui futsani. Ascashu shafatifi pauncain monoi. <sup>46</sup> Ascaino ahuun niaifocoin samamashta nocoriscatiro. Nan oinmati chaca itisharamano ahuun niaifo nocoshon a onaintimai. Ascashon niaifoan oinmati futsafo yonoqui isca huai, “Nan oinmati chaca icoinra huamafoanno potacahuun omitsiscapashanon,” ishon yoishqui.

<sup>47</sup> Ascan nan oinmati ahuun niaifoan yoia cuscan man tapiflashu ascayamacai itisharayamacun ahuun niaifoan nocoshon a fasi curushcain coshaquin futsai. <sup>48</sup> Asca nan oinmati futsa ahuun niaifoan yoia cuscan tapishoma chaca huacun nan icoquin ahuun niaifoan ichapama coshashquin. Nanscarifiai tsoa Diosin ichapa tapimana aqui nococun yocaqui isca huai, “¿Un mia ichapa tapimana cuscan man mian nanscacoin aamun? ¿Ascashon futsafori un mia yoia cuscacoin min huashoamun?” ishon yocashquin. Ascacoin huaiyamashu funotiro.

*Yorafoancai Jesushuunoa nannorisi shinantirofoma*

*Mt 10.34-36*

<sup>49</sup> Un nantifi manifotifi chaca shatumani yoi un oa. Atirififoan ua icoinra huaifoanno futsafoan ua icoinra huacanima. Nan icoinra huamafo Diosin ato onaintimai. Uhuun Upa Diosin ua mai ano yonoma cuscan natian cuyoa shara icuana. <sup>50</sup> Ascafiacun matohuunoashu naashqui un oni. Un nataima iquisi un omitsiscacoinshquin. Ascashu u omitsiscacaini naashquin. <sup>51</sup> Ascan man shinanmun nantifi manifoti anofo uhuunoashu unimanonfo un oni. Ma. Ascaramafiqui. Un mato yoiai cuscacai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuara chaca futsafosi shinancani.

<sup>52</sup> Ascashu pushu muran mucu fustiti icafoan rafutasi ua icoinra huaifoannocai nannorisi atirifiton tsoan shinantiroma. Nanscarifiai

rafutan iyamarai rafu non fustifain ua icoinra huaifoannocai nannorifosi atirifiton tsoan shinantiroma. <sup>53</sup> Apa ua icoinra huaino furumun ua icoinra huashma apaqui sinatiro. Ahuan ua icoinra huaino ainfacu ua icoinra huashma ahuaqui sinatiro. Ahuun yayan ua icoinra huaino ahuun raru ua icoinra huashma ahuun yayaqui sinatiroran, —ishon Jesús afu rafuafo yoini.

*Nai foisquin non tapitirohuunoa*

*Mt 16.1-4; Mr 8.11-13*

<sup>54</sup> Ascaino nannori yorahuanrasi mapofoan afanan ato yoiquin isca huani, —Fari iquiai anori nai choshtacoin foancuaiton oinquin, “Oi fuiran,” man huano. Oi futiro. <sup>55</sup> Ascasho manri yoimisi, “Fuu fari cai istafari fasi shana iishquiran,” man huamisi. Ascan nan icon fasi shanacoin itiro. <sup>56</sup> Ascafia mancai man yoia cuscacoin amisima. Nai foisquin man tapitiro oi fui iyamaraimain fuimacai. Ascafia mancai Diosin mato yoia cuscan icoinra huapaima. Natian ahuaa ahuuscarai cuscacai man tapiamama.

*Tsoan mia chaca huamapaiyai shara huarisca huahuu*

*Mt 5.25-26*

<sup>57</sup> ¿Ahuuscain mafiri man cayacafi shinansharaimamun? <sup>58</sup> Tsoara futsan mato yoiqui isca huai, “Min ua chaca huua cuscan. Un miqui niaifo yoicairan,” ishon mia yoicun. Niaifo ari cataima rufofo shara huacahuun. Man asca huayamacun niaifoan mato cunu muran iquimatiro. <sup>59</sup> Mato iquimananocai man cainritiroma nifian cuscan nantifi inanshu man caintiro. Nanscarifiai man Dios chaca huamisiquin. Oataima iquisi mato yoia cuscan acahuun mato omitsiscahuanonma, —ishon Jesús yoini.

## 13

*Nocon chaca shatushon Jesús noco amapaiyai cuscan fusti non yopacoin*

<sup>1</sup> Nantianri futsafo Jesusqui fucashon yoiqui isca huafo, —¿Tapimamisiton, man min tapiamun Pilatonun Galilea anoafu rafu rutua? Ascashon Dios fu tsainti pushu muran aton imi yafi inafuan ahuun imi osia Dios cufiti camaqui huaran, —ishon yoiaifoan. <sup>2</sup> Jesús ato cumani, —¿Man shinanmun nan Galilea anoa rafutan chaca huaqui fina ahuun caifofoan acama cuscan huaquin? <sup>3</sup> Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanaca.

<sup>4</sup> Man shinanrimun nan dieciocho yorafoqui pushu cuyacoin ahuun anu Siloé atoqui paoinquin atoti rutuni. Nanfoanmun fasi chaca huaquin finacaimisifo nan Jerusalén anoafuan acama cuscan finonmafain. <sup>5</sup> Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanacaran, —ishon Jesús ato yoini.

*Huiguera fana fimiomahuunoa Jesús ato yoini*

<sup>6</sup> Ascashon ahuaa futsahuunoa ato yoiquin ato tapimanon isca huani, —Nocofunun ahuun mau mamaqui fimi fanani ahuun anu huiguera. Ascan chipo fimimisitian fii capaiquin oian fimiamama ini. <sup>7</sup> Ascacun nan mau ifoan ahuun mau cushumisi yoini, “Rafu non fusti fari na

huiguera fimiataima. Un ahuun fimi fipaifiaino fimiama. Ascan natian rurahuu. Non ahua futsa nanno fananon,” ishon yoiaiton. <sup>8</sup> Nan mau cushumisiton yoini, “Ifon un afanan mana futsayononhuun. Afanan na fari fusti non manayonon. Un natian cushusharafain ahuun tapo ano un ahua futsafo huayonon fimisharanon. <sup>9</sup> Nan un asca huainomain fimi qui non oinon. Ipaishoma na fari anaitiano man fimi ya shara itiroquin. Ascan fimi yamaiton min ua ruramatiroran,” ishon mau cushumisiton yoiniran, —Jesús ato yoini

*Jesús tunutitian ainfo putoco caya huani*

<sup>10</sup> Ascano chipo Israelifoa ichananti pushu muranshon tunutitian ato Diosin tsain yoini. <sup>11</sup> Ascashon ato yoiaino nannori ainfo putoco dieciocho fari isinintiani tofu nanno ini. Yoshin chacanun nan ainfo nansca huaa. Cayacaficai nimisima. <sup>12</sup> Nannoa fuchishon Jesús yoini, —Ainfoshtan, natianfin min cayaiquin, —ishon yoitan. <sup>13</sup> Ahuun muman manmainno samamashta cayacafi ninacahuani. Ascatan, —¡Aicho! Diosin ua cayahuaquin. Dios fasi shararan, —ainfoan huani.

<sup>14</sup> Ascafiaino ichananti pushu murannoa niaifo fasi sinaquin ato yoini, —Seis shafatan non yonotiro. Ascan na shafata tunutitiancai tsoa cayayotiroma. Cayapai shafa futsan otiro cayashquin, —ishon ato yoini.

<sup>15</sup> Ascaiton nocon Ifo Jesús a cumaquin isca huani, —Manfin fuparamitsamisifoquin ¿Asca manmun tunutitianfiacun maton moi iyamarai burro man tuputiro unu ano iyoquin ayanonfo? <sup>16</sup> Ascano na ainfofin nocon caifoquin. Abraham ahuun funa. Satanashuunoashu dieciocho fari putocoa. Cayacafi niisharamisima. ¿Asca ahuuscaimun un tunutitian na ainfo cayahuatiromaquin? —ishon Jesús yoiaiton. <sup>17</sup> Nicacani Jesús noicasmaifo fasi rafipaicaquin tsoan cumanima. Jesús ahua sharafo huaiton oincani atirifo aqui unimacoinnifo.

*Mostaza ushuhuunoa Jesús ato yoini*

*Mt 13.31-32; Mr 4.30-32*

<sup>18</sup> Ascaifoa Jesús ato yocani, —¿Ahuu cuscaramun Diosin ahuun yorafo nantifi ato iquifain ato yonotiroquin? ¿Ascan ahua futsarimain Diosin ahuun yorafo cuscarquin? Un mato tapimai. <sup>19</sup> Nocofunun ahuun pushu umainti mostaza ushu fanani. Asca foaica ihui tio ica. Puiyafa ahuun tushpahuu tsaofa. Nanscarifiai Diosin ahuun yorafo tau fustirasi ifiashu chipo paratama caitoran, —ishon ato yoini.

*Misi farashatihuunoa Jesús ato ahua futsa yosini*

*Mt 13.33*

<sup>20</sup> Afanan Jesús ato yocaquin, —¿Ahuu futsamun Diosin nantifi iquina cuscarquin? Un mato tapimai. <sup>21</sup> Diosin ahuun yorafo nantifi ato iquifain ato yonotiro cuscan un mato tapimai. Ainfoan farashati ichapamashtaya harina osishon camisonano farashuinitiro. Nanscarifiai Diospan yorafo taucani fustirasi ifiashu paratama itirofo. Ascashu icoinra huamafo muran ishon ato shara huaino atirifiton ahuunshori icoinra huatiroforan, —ishon Jesús ato yoini.

*Caincanti atsoshtahuunoa Jesús ahua futsa ato yosini*

*Mt 7.13-14, 21-23*

<sup>22</sup> Ascashon Jesús pushurasiti ano yoifoni Jerusalén ano nocopaiquin. <sup>23</sup> Ascaiton futsan yocani, —¿Ifon, fustirasitomon aton chaca soacaniquin Upa Dios fu nipashcaquin? —ishon yocani.

<sup>24</sup> Ascaiton Jesús ato cumaquin isca huani, —Uhuun Upa icanocai atirifi iquitirofoma. Ascacun nan un mato yoiyai cuscacoin nantifi huacahuun. Nan fai atsoshta tanashcaquin. Ascashon marifi Diosin tsain tanasharacoincahuun iquisharashcaquin. Yora ichapafo iquipaifiacanicai iquitirofoma. <sup>25</sup> Nan pushu Ifo Diosin ahuun cunu fupoti fupoanocai tsoashta afanan iquitirofoma. Ascacun chifi nishon yoiqui isca huatirofo, “Ifon, noco cunu fupushohuun. Min icano non canon,” huariacani. Tuyuyun ifiaifoancai ato fupushotiroma. Fuputama ato yoiqui isca huatiro, “Mancai uhuun yorafoma,” ato huafiaino.

<sup>26</sup> Yoicaquin “Non mi futan pifain ayafain huamisi. Min noco yosiano,” ishon yoishquicani. <sup>27</sup> Ascafiaino afanan ato cumaquin isca huashquin, “Mancai uhuun yorafoma. Uncai matofu rafumisima. Manfin chaca huamisifoquin. Ascacun umaquinoashu fotacahuun,” ishon ato yoishquin.

<sup>28</sup> Ato asca huaino nannoashu uaicani omitsiscai futsushcani. Dios fu rafuafo Abraham non Isaac non Jacob non nantifi Diosin tsain yoimisifo Dios fu icafo oin atoqui capai man fasi uaiqui. Yoishquin isca huquin, “Ahuuscashucai non catioma. ¡Ohua! Ahuuscaín un Dios nicascamamisishaquin. Un omitsiscapanacaran,” ishon man yoishquin. Man ascafiaiton Diosimaquishon mato potashquin.

<sup>29</sup> Ascaino manifoti anoashu Diosin niaifoan ahuun yorafo iquina ano nococanashu afu unimashcani. Ascaifoan Diosin ato yoiquin isca huashquin, “Uqui fucahuun. U fu ipasharashcaquin,” ishon Diosin ato yoishquin. <sup>30</sup> Shinacapon. Futsafocai natian Diosin ahuun yorafoma. Chipicoira huacanashu ahuun yora ishquicani. Futsafoan man Diosin tsain nicafiamisishaquin tsoa ascacoinyafoma. Afocai afu itirofomaran, —ishon Jesús ato yoini.

*Jesús Jerusalén anoafohuun ramapai uaini*

*Mt 23.37-39*

<sup>31</sup> Nantianri Farisefo Jesusqui fucashon yoinifo, —Nunoashu mai futsa ari cariscatahuun. Nan niaifo Herodes mia ato rutumapai oiquin, —huaifoan.

<sup>32</sup> Jesús ato cumani, —Nan onanya yoitacahuun. “Uncai nunoashu funa caima. Na shafata yafi shafa futsa un yorafo yoshin chaca atohuun nua un ato caya huafain isinincaifori un ato cayahuayoi. Uhuun yonofu anaititan nan un nocopai ari un nocoicai. <sup>33</sup> Un natian uhuun Upa ua yonoa cuscan nan fusti un yonoyoi nan un naitian. Man man tapia Diosin tsain yoimisifo Jerusalén anoshon fusti ato rututirofo.”

*Jerusalén ano yorafohuunoashu Jesús uaini*

<sup>34</sup> ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yafi mato yorafo cushupaifia mancai ua nicapaimisima. Manricai uqui fumisima un mato cushunon. <sup>35</sup> Ascan natiancai tsoan mato cushuima. Diosiricai afanan mato cushuima. Ascacucai man ua afanan oinnacama Diosin matoqui nichian un nai murannoashu oaitian. Man yoiqui isca huaino, “Diosin nocoqui nichian fasi shara finacaia. Upa Diosin a shara huapanacaran,” ishon man huunoa yoishquin, —ishon Jesús ato yoini.



## 14

*Jesús nocofunun ahuun poyan rafu yafi ahuun quishi ocuma rafuri quihuarashica caya huani*

<sup>1</sup> Man ascano chipo Fariseo niaifoan ahuun pushu muranshon Jesús tunutitian pimani. Ascaino yora futsafori afu pushu muran iquinifo. —Jesusmain ahua huaicain non oinnon, —icanashu. <sup>2</sup> Ascaino nannori nocofunu poyan rafu farashicain quishi rafuri farashiqui futsua. Ato fu iquia oincaquin atirifoan shinannifo, —Jesusmain cayahuaicain non oinnon, —ishon. <sup>3</sup> Ascaiton Fariseofo yafi Moisés cunu tapimamisifo Jesús ato yocani, —¿Tunutitianmun non ahua ahuusca huatiroma? ¿Moisés cununi cuscan tunutitian non yora caya huatiromanmun? —ishon. <sup>4</sup> Ato yocafianocai tsoa puusinima. Ato asca huatan a isinincai Jesús mutsoano cayariscani. Ascacun Jesús a nichini.

<sup>5</sup> Ascashon Jesús ato yocani, —¿Rato man futsamun tunutitian maton facu futsa iyamarai maton moi mai quini muran pacucun man ihuirisca huatiromaquin? —ishon ato yocaino. <sup>6</sup> Tsoa puusinima.

*Nocofunun yafi ainfo fianaintian piitirofohuunoa ato yoini*

<sup>7</sup> Ascashon Jesús oinni shafacafi tsaopaiyaifoan —Noco oinsharanonfo, —icanashu. Ascaifoan oinquin Jesús ato yoini, —Ua nicasharacahuun un ahua futsa mato yoi man tapinon. <sup>8</sup> Tsoan mato piimaino pushu ifo tsaano tsaoyamacahuun. Un tsoa cuscamaran ato huamapaiyamacahuun. Min pushu ifo fu tsaaiton mia yoitiro, “Nuno min tsaotioma yora futsa nuno tsaoyoi. Nan mia finoncoian. Ascan minfin futsano tsaotiroquin.” <sup>9</sup> Aton ointaifi pushu ifoan mia anori acaino min fasi rafipaicai. Shararcoai min pasotain tsaotiro. <sup>10</sup> Ascan ifoan mia tsaopaiquin a chaima mia cunatiro. Mia asca huaiton oinonfo a mia shara huai cuscan.

<sup>11</sup> Ascan tsoa oinanpaimisi chipo Diosin ismashquin acai ahuacuma. Ascan tsoa oinanpaimisima naanfin yorafoan ointaifi Diosin yoitiro isca huaquin, “Ua chaima tsaoyohuu. Ufu nipashquin,” ishon yoishquiran, —Jesús ato yoini.

<sup>12</sup> Ato asca huatan nan pimai Jesús yoiqui isca huani, —Min yorafosi yafi yora mafo ichapayafo pimapaiquin nanfosi cunayamahuu. Nanfoanri mia copiquiri aton pushu anoshon mia piimacani. <sup>13</sup> Ascatarocon man yorafo man pimapaiyai cuscan a yora ahuuomafo yafi yora nipaiqui ranainfo non a fushofori piimacahuun. <sup>14</sup> Nanfoan mato copiquiri shara huapaiquiaicai atirofoma. Ascashu man Dios icari nococun man ato shara huaiton oian cuscan Diosin nantian mia shara huacoinshquiran, —ishon Jesús Fariseo yoini.

*Nocofunun tushu sharacapacoin yorafo pimapaiyaihuunoa Jesús ato ahua futsa yosini*

*Mt 22.1-10*

<sup>15</sup> Futsan sapa ano tsaoshon Jesús yoini, —Ifon, Upa Diosin nantifi yorafo iquinai ano atofu iquiashu fasi ipasharashquiran, —ishon yoiaton.

<sup>16</sup> Jesús cumani, —Nocofunu futsan tushu ichapa itishara huashon yora ichapafo chani huani a futan piishquin. <sup>17</sup> Ascano man itishara huashon ahuun oinmati nichini ato yoitanon. Yoiqui isca huani. “Nan

un chani huafo ato yoi foanfafaintahuun isca huaquin, ‘Man nantifi itishara huaqui. Fucahuun,’ ishon ato yoitahuun,” huani.

<sup>18</sup> Asca huano caashon ato yoiaiton, “Un cayotiromaran,” ishon yoipacunifo. Futsan yoiquin isca huani, “Un rama mau fia. Natian un mau ari capai oincai. Ascacun un mia yoi un ari cayotiromaran,” ishon yoini.

<sup>19</sup> Futsanri yoiqui isca huani, “Un rama moi rafurasi nushua mucu fustiti un fia. Un natian ato yonomapai yonosharacanimainquin un ato oinpai. Ascacun un ari cayotiroma mi futan piishquin,” ishon yoini.

<sup>20</sup> Ascano futsan yoiquiri isca huani, “Un rama ainfo fia. Ascacun un ari cayotiroma mi futan piishquin,” ishon yoini.

<sup>21</sup> Asca huaifoanno oinmati ahuun ifo ano nasoshon nan yoiafo cuscari yoini. Ascaiton nicai pushu ifo atoqui sinacoinni. Afanan ahuun oinmati nichiqui yoini, “Natian pushurasi anoa faifoti ano cariscatahuun yora ahuuomafo yoifain nipaiki ranainfo yoifain fushofori yoiriscatahuun un ato pimanon,” ishon yoini.

<sup>22</sup> Asca huano afanan cashon nan yoia cuscacoin ahuun oinmatin huashotani oi. Naso cura ahuun ifoqui oshon yoini. “Ifon, mian yoia cuscan mun ato yoia. Ascan natian man fucani. Ascafia min pushu fospicanima. Tushufori tushuiran,” huaiton.

<sup>23</sup> Pushu ifoan afanan yoini, “Afanan fai futsafo ari cariscatahuun ua ato yoishoshquin funonfo. Ato yoihuu isca huaquin, ‘Uhuun ifoan pushu ano nitutama furiscacahuun mato pimapaiquin,’ ishon ato yoitahuun uhuun pushu fospi funonfo. <sup>24</sup> Nan yorafo un tau huaqui ato pimapaiyafancai u futan pinacafoma,” ishon pushu ifoan yoiniran, —Jesús ato huani.

*Cristo tanapaiyi yora itisharatiroquin omitsiscashoshquin  
Mt 10.37-38*

<sup>25</sup> Yorahuanrasi afu foaifoan. Ifiacuahuan ato yoini, <sup>26</sup> —Tsoan ua finonmacaifain apa yafi ahua non ahuin non ahuun facufo non ahuun yorafo non poifo afiri noiashucau ua tanamisi itiroma. <sup>27</sup> Ascan unfin mato ihui coyan iquinanqui nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmái acai ua tanamisi itiroma.

<sup>28</sup> Nanscarifiai tsoan pushu huapaiquin iquisi shinanyotiro ahuun pui itiromainquin. <sup>29</sup> Ascano pui iyamaitocai pushu huatiroma. Quishifo fusti nichiano yorafo aqui cashutiofo. <sup>30</sup> “¡Cuu! ¡Oincapon! Na nocofunun ahua huatiroma. Ahuun quishifo fusti nichian. Pushu anaitima. Ascaracai sharamaran,” icashu aqui cashutiofo. Nanscarifiai nan man naitian ua tanacahuun. Nan man naitian ua tanapaiyamaquin “Un Jesús tananon,” iyamacahuun.

<sup>31</sup> Nanscarifiai niaifo rafu noconain aton ranushumuafu rutunanonfo. Futsa diez mil ranushumuafu aya icaino futsa veinte mil ahuun ranushumuafu ya. Ascacun nan diez mil ranushumua ayaton iquisi fasi shinainyotiro ahuuscamain acanicain. <sup>32</sup> Ascacun afu niaifo tsain fomayotiro isca huaqui, “Non rutunainmaquin. Nanscanon. Min noco rutuyamacun min fipaiyai cuscan mia inantiroran,” icashu raunantirofo. <sup>33</sup> Nanscarifiai ratoranfuson uhuunshon nantifi ahuunafo potayamashucau ua tanamisi itiroma.

*Sao sharacunma non fipaitiroma*

*Mt 5.13; Mr 9.50*

<sup>34</sup> Ascacun shinacahuun. Sao sharacun non tototiro. Asca sao sharamacai non tototiro. Chacacun. <sup>35</sup> Nanscaracai tsoanshta yopaima. Potacani. Nanscarifi aquin tsoan uhuunshon ua tanasharayamacai uhuun nuusharaima. Chacacoin iqui. Tsoanmain man pafiqui sharayaquin ua nicasharacahuun, —ishon Jesús yoini.

## 15

*Chashoan cushumisiton ahuun chashoan funoa fuchiahuunoa Jesús ato ahudara futsa yosini*

*Mt 18.10-14*

<sup>1</sup> Asca nantiantanri niaifo puifishomisifo yafi yora chaca huamisifo aqui funifo ahuun tsain nicai fucani. <sup>2</sup> Ascaino Fariseofo yafi Moisés cunu tapimamisifo Jesusqui tsain chaca huaquin yoinifo isca huaquin, —¡Oincapon! Jesús yora chacafo fu rafutiro ato futan piaiton, —ishon yoinifo.

<sup>3</sup> Ascaifoa onanshon Jesús ato yoiqui isca huani ahudara futsa ato tapimanon, <sup>4</sup>—Ratoran man futsa cien chashoan ayafiano fustishta amaqui funoano atirifi nan noventa y nueve fasi fununun man potayofaintio. A fusti funoa funaiyoicaqui nan man fuchiaitian. <sup>5</sup> Ascano fuchishon unimacain chishtoinfoan man iyafaintiro ahuun pushu ano foi caquin. <sup>6</sup> Asca huatan ahuun pushuano nocoshon man atoti chanihuai a chaima icafo yafi afu rafuafo ato cunaqui isca huatiro, “U fu unimai fuchiahuun. Uhuun chashoan funoa mun fuchiaquin,” ishon man ato yoitiro. <sup>7</sup> Ascacun un mato yoi nanscarifiai futsan ahuun chaca shatucioan-shu afanan ipaoni cuscan atama Dios ifoacoinna oincani nantifi Dios icanoafo fasi unimacoinceni. Noventa y nueve yora sharafo nanfocai tsoa Diosqui nasoima manmain tanasharacanashufin. Ascan nanfoqui unimafiacani nan chaca huamisiton Diosin icoinra huanocafin fasi aqui unimai finacoinceni.

*Ainfoan ahuun toro funoa fuchiahuunoa Jesús ato ahudara futsa yosini*

<sup>8</sup> Nanscarifiai yainfo futsa mucu rafuti toro paratamacoin ahuun pui nuua aya ini. Pushu muran fusti funoni. Ascano lamparina otani ahuun tapa ano matsoyanan funashquin. Ascashon funariaquin fuchini. <sup>9</sup> Fuchishon ahuun yorahuafo yafi a chaima icafo cunashon ato yoiqui isca huani, “Uhuun yorafoan ufu unimacahuun. Uhuun toroshta mun funofashon natian mun fuchiaran,” ishon ato yoini. <sup>10</sup> Nanscarifiai tsoan ahuun chaca shatuaashma man funoa. Ascafiashon Diosin icoinra huaino Diospan oinmatifo nai murannoashu fasi aqui unimacoinceni, —ishon Jesús ato yoini.

*Apa furu rau huaa cuscahuunoa Jesús ato ahudara futsa yosini*

<sup>11</sup> Afanan Jesús ato yoiqui ahudara futsa ato tapimaquin isca huani, —Nocofunu futsa facu rafu ya ini. <sup>12</sup> Ascano chipocuton apa yoini, “Upan, nan naaquin mian inanfanonpacoai natian iquisi ua inanhuun,” huani. Ascaiton apan ahuun pui cashcu futsa ahuun facu chipocu inanni.

<sup>13</sup> Ascano shafa ranan finontan ahuun facu chipocuton nan apa inan cuscan nantifi ahuun rafanan pui fiananan huani. Asca huatan mai futsa chaicoin ari cani. Nanrison ahuun pui shafatifi potani monocain pauncai yainfo furomafo fu icai. <sup>14</sup> Asca huaqui nantifi ahuun pui

potaquin anaitini. Ascashon nantianri a mai ano tushu yamacoin ini. Ascashu arifi chipo tushu yamaino fasi fonicoinni. <sup>15</sup> Ascano nan mai ariashu nocofunu futsa ano cashon yono yocaqui isca huani, “Un mia yonoshopairan,” ishon yocani. Ascaiton pushu ifoan nichini yahuarasi faasi funununshon pimanon. <sup>16</sup> Ascashon yahuarasi maropa ahuun shacafo pimani. Ascaino nantian fasi fonicoinquin arifi piqui rashquini. Tsoancai a pimanima.

<sup>17</sup> Ascaquicai nan chaca shinanpaoni cuscan afanan shinanpainima. Nantian cayacafi shinanquin isca huani, “¡Ohua! Uhuun upa ahuun oinmatifoan natian man piisharafo. Aton tushufori man tushu huafo. Asca unfin nunoashu fonicoiñ naicain. <sup>18</sup> Asca natian un afanan uhuun Upa ari cai. Nocoshon uhuun upa un yoitiro isca huaquin, ‘Upa, un Dios chaca huafain miari chaca huamisi. <sup>19</sup> Ascan uncai natian min facu cuscara itiroña. Natian min yonoshomisi cuscara un itiroran,’ ishon uhuun upa un yoishquin.” <sup>20</sup> Nannori shinantana apa ari cani.

Ascashu caiton chai cunoa apan ahuun facu fuchini. Fuchitan fasi ahuun ramapaicoiñ aqui ichoni. Aquí nocoshon icoacufoan tsoatoshini.

<sup>21</sup> Ascaiton apa yoiqui isca huani, “Upa, un Dios chaca huafain miari un chaca huamisi. Asca un afanan natian min facu cuscara itiroñaran,” ishon yoifiaino. <sup>22</sup> Apan ahuun oinmami yoini, “Ichoriscatahuun. Sahuuti sharacapaicoiñ yafi anio fifain sapatari firiscatahuun. Uhuun facu ua sahumashoshcaquin. <sup>23</sup> Ascashon moipan facu shoa sharari ua rutushocahuun uhuun facu un pimanon. Noco sharano non fasi aqui unimanon. <sup>24</sup> Uhuun facu man naa shinantsa amisishaquin afanan man nasoaquin. Natian afanan ufu nuno nia. Man funofiani natian afanan man non fuchiaquin. Non ichananon nantifi aqui unimaquin pifain non mononon. Noco manutifo non manunon,” ishon apan yoini.

<sup>25</sup> Ascaino iyoa mau ano yonofaiashu nasocui pushu chaimashon nicani fasi manuti manuaino monoaifoan. <sup>26</sup> Ascaiton nicaquin ahuun oinmami cunashon yocani, “¿Uhuun upa pushu anoshon ahua huacan-imun?” ishon yocaiton. <sup>27</sup> Ahuun oinmatinini yoini, “Min ushto rama nocoano min upa fasi unimacoinquin ato ichanan huaa moipan facu shoa shara ato pimafain manuti manufain ushto ahuuscatama noco sharano unimaquin upa aquiran,” ishon yoini.

<sup>28</sup> Ascaiton nicai iyoa fasi sinacoin pushu muran iquinima. Ascaino chifi catan apa ahuun facu iyoa yoini, “Upashtan, pushu muran iquiy-opun. Min ushto rama noco sharaquin,” ishon yoiaiton. <sup>29</sup> Cumatama apa yoini, “Shinanpon. Un fari ichapa min oinmami cuscara un mia yonoshomisi. Ascashu min ua yoiai cuscacoñ un huamisi. Uncai yoitimamisima. Ascafiacucai mian chashoanun facu rutushomisisima uhuun yorafo fu un ichananshon unimaqui un pinon. <sup>30</sup> Asca min facu chipocu min inan cuscan nantifi man pota. Ainfo furomafo fu iqui. Ascafiashu afanan miqui nocoaino unimaqui min a moipan facu rutushonaran,” apa huaiton.

<sup>31</sup> Apan yoini, “Upashtan, miancai potamisima. Min ufu iitiani. Nan uhuunafocin minariquin. <sup>32</sup> Ascafi min ushto man naa shinantsa amisishaquin natian man noco shara. Man funofiani man non afanan fuchia. ¿Asca ahuuscacmun non ichanainmacain aqui unimashquin?” ishon apan furu iyoa yoini, —ishon Jesús yoini.

## 16

### *Niaifo patashari ahuun niaifocoinin yoia cuscacoin anima*

<sup>1</sup> Ascatan Jesús afu rafuafo yoiquin isca huani, —Nocofunun futsa mafo ichapayaton ahuun oinmati futsa niaifo patashari huani. Ascashon chipo nica ahuun oinmatinin ahuunafo cushusharashocuma.

<sup>2</sup> Nicaquin cunashon yocani, “¿Ahuuscai uhuunafo min cushusharamisimamun? Natian min afanan uhuun niaifo patashari iquima. Asca nantifi uhuun cunufu ua nifiafo ati shara huashohuun. Ahuutimain ua nifiafoquin ua ismashquin,” ishon ahuun niaifoan yoini.

<sup>3</sup> Asca huaiton nicaquin ahuun oinmatinin shinanni, “¡Ai timafin! ¿Unmun natian ahuuscaiquin? Uhuun niaifoan ua pota. Uncai afanan a yonoshonima. Unfin nan papio fusti yonoqui fuya huamisiquin. Uncai curushcain yonotiroma un mau huapanan. Unricai yocacamisi ipaima. Un fasi rafipaitiro. <sup>4</sup> ¡Aira! Natian mun shinanshara. Ratoran futsafoan uhuun niaifo ichapa nifiafo un aton shucashopacufuanni ichapama nifinonfo. Un ascaino uqui unimanonfo. Uhuun niaifoan ua potafiaino nan futsafoan ua shara huatiroforan,” ishon shinanni.

<sup>5</sup> Ascatan nan niaifo nifiafoti cunani. Ascaino futsa tauí aqui ocun yocani, “¿Uhuun niaifo ahuuti min nifiamun?” ishon yocaiton. <sup>6</sup> “Ocho cientos galones de shuni un nifiaran,” huaiton. “Min papio futsaqui ahuu. Cuatro cientos galones de shuni cunuhuu,” ishon niaifoan ahuun oinmatinin futsa yoini. <sup>7</sup> Ascaino nan nifian futsari aqui ocun yocani, “¿Uhuun niaifo ahuuti min nifiamun?” ishon yocaiton. “Cien forusa trigo un nifiaran,” huaiton. “Min papio futsaqui ahuu. Ochenta forusa un nifiaran, ishon cunuhuu,” huani.

<sup>8</sup> Ascano niaifoan ahuun oinmatinin acái cuscan oinquin yoini, “Minfin fasi onaiancoianquin. Min aca cuscan futsafoan mia shara huacaniran,” ishon yoini. Ascan nan icon nan icoinra huamafoan fasi tapicoianfo yorafo parashcaquin. Nanfoan tapia cuscacai nan ua icoinra huafoan tapiafoma. Ascafia nan icoinra huafoancai tsoa parapaitirofoma icocoin fusti yoitirofo.

<sup>9</sup> Un mato yoinon isca huaquin. Man pui ayashon nan Diosin tanamisifo yopaifoan ato inancahuun. Man ato shara huacun mato noinonfo. Ascafia naashucaí afanan man pui yopaima man Dios ari nocoaiton nan man pui inannifoan mato yoiqui isca huatirofo, “¡Aicho! Min ua shara huamisi. Natian min nocofu Dios ari nocoa. Noco fu ipahuun,” ishon mato yoitirofo.

<sup>10</sup> Ratoran futsa ichapama ayafiashon nanshtahuunshon nan icaiti ahuunshon fisharashori ichapayashon nanscarifi huatiro ahuun fisharaquin. Parashquima. Ascan ichapamayafiashon ahuun rafanan fisharashoma parain. Nanscarifi huaqui ichapayafiashon fasi finacaiqui ahuun rafanan fisharashoma paratiro. <sup>11</sup> Ascacun nuno mai anoashu man aya cuscan afohuunshon man shara huamaqui man pota. Diosiri mato inanpaiyai cuscacai mato inantiroma. Matoricai icoinra huatiroma. Mato inanpaiyai cuscan nanfori man potatiro. <sup>12</sup> Nanscarifiai futsana man cushusharayamaiton. Tsoan mato inancointromun matonacoin inon.

<sup>13</sup> Ascano oinmatinincái ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiro. Ascashon futsa, “Nacái ahuamaran,”

ishon shinantiro. Tapicai huatiroma ratocaimain nicasharaiquin. Nanscarifiai Diosin yonoshopaiquicai man pui noitiro ma ton ifo inon, —ishon Jesús yoini.

<sup>14</sup> Nan Fariseofoan pui noiaifohuunoa Jesús ato yoiatton nicacani aqúi cashupaiquí yoinifo. —¡Cuu! Ahuomafishon noco yoiran, — icaifoan. <sup>15</sup> Onanshon Jesús ato yoini, —“Nafofin sharafoquin” man yorafo huamapaifiatton Diosin man mato onan. Manfin yorafo paratiroquin “Nafofin shara huacaniquin,” ishon yorafo man shinanmapaifiatton Diosin man mato onancoinshon ahuun nomuran shinain, “Nafofin fasi chaca huacaniran,” ishon Diosin mato huunoa shinain, —ishon Jesús ato yoini.

*Moisés cununi cuscan yafi Diosin nantifi ahuun yorafo iquinai cuscan*

<sup>16</sup>—Moisés Dioshuunshon cununi cuscan yafi Diosin tsain yoimisifoan cununifo cuscacoin Juan nocoaitian futsafoan mato yoimisi. Juanpan tsain shara futsa noco yoiquin tau huaquin isca huani, “Diospan Furun matoquí chipo oi. Ascacun mato chaca shatucahuun. Man ipaoni cuscan afanan ascayamacahuun. Natian Dios fusti shinancahuun,” mato huamisi. Urifi un mato nannori yoimisi. Asca tsoan ascaran shinancanashu Dios niaifo ari iquitirofo. Nan fusti shinanshu Diospan yora itirofoquin.

<sup>17</sup> Diosin yonoa Moisés cununi cuscacoinashu non icoinsharanon. Noco yononi cuscaricai non unutiroma ahuara sharafo huaquin. Mai yafi nai cuyotirofiflashucaí Diospan tsain cuyopacunacama.

—*Funun ahuin unuyamaino ainfoanricai funu unutiromaran, —ishon Jesús ato yoini*

*Mt 19.1-12; Mr 10.1-12*

<sup>18</sup> Ratoran futsan ahuun ahuin unuquin futsan fiishquin man chaca huai ahuun ahuincoinmafu icaino. Ainfon ahuun funu man unuquin futsan fiishquin arifi man chaca huai ahuun funucoinmafu icaiton, — ishon Jesús ato yoini.

*Nocofunu mafo ichapa yafi Lázaro ahuuomashta ini*

<sup>19</sup> Ascashon afanan Jesús ato yoiqui isca huani, —Nocofunu futsa mafo ichapayatton sahuuti mapash sharacoin sahuufain tushu sharacapafo shafatifi pisharamisi. <sup>20-21</sup> Asca futsan ahuun anu Lázaro nocofunu mafo ichapayatton ahuun cunu caincaiti ano tsaoni. Yoratishon coyoashu tsaocun pashnan aqúi oshon ahuun coyo ano tashoni. Ascaino Lázaro ahuuomaton shinanni, “Na nocofunu mafo ichapayatton nan tushu huaa ua inanpainonrati,” ishon shinanni.

<sup>22</sup> Ascashu Lázaro naani. Naacun Diosin oinmati afu nai muran icafoan ahuun yoshin Dios icari iyonifo. Nannori Abraham ica ini. Ascashu nan mafo ichapayari arifi naacun mai huanifo. <sup>23</sup> Ascano omitsiscapanacafa muran cashon nan mafo ichapayatton Abraham yafi Lázaro foisquin oian icafo ini. Arishon chii isin tunuyamacaiquin cunani. <sup>24</sup> “Uhuun Upan, Abraham, uhuun ramapaihuu. Ua Lázaro nichishohuun. Ahuun mutotinin ua ana muchana huanyonon. Un nunoshon chii isin tunuimaquin,” ishon cunaiton.

<sup>25</sup> Abraham cumani, “Upan, min shinainmamun min mai anoashu isharapaoni. Asca Lázaro fin omitsiscapaoniquin. Asca natianfin Lázaro

man isharaquin fasi unimasharacoinquin. Asca minfin natian fasi omitsiscaiquin. <sup>26</sup> Mia ari capaifiaicai non ahuuscashu catiroma. Mirificai min ahuuscashu nuno nocoqui otiroma. Manhuanhuan rafutan noco naquihua. Tsoan finontimaran,” ishon Abraham yoiaiton.

<sup>27-28</sup> Afanan cumani, “Upa Abraham, unfin mucu fustiti yora yaquin. Asca Lázaro ato ano nichihuun ato Diosin tsain yoiaiton nicacoinonfo nuriashu omitsiscai futirofoquin,” ishon yoiaiton.

<sup>29</sup> “Nanfofin man ayafuquin Moisés futan Diosin tsain yoimisifoan cununifo cuscan huafafin afi ointirofoquin,” Abraham huaiton. <sup>30</sup> “Ma. Upan, yora naashu funiaton uhuun yorafo yoiaitofin nicatirofoquin. Ahuara chaca huamisifo cuscan shatutiro Dios icoinra huashcaquin,” ishon yoiaiton. <sup>31</sup> “Ascan nan Moisés cununi cuscan nicayamafain Diosin tsain yoimisifoan yoiaiton nicayamashomun nan ratoran futsa naashu funiaricai icoinra huatirofomaran,” ishon Abraham yoiniran, —ishon Jesús ato huani.

## 17

### *Non chaca huaino fasi musucoin*

*Mt 18.6-7, 21-22; Mr 9.42*

<sup>1</sup> Asca huatan Jesús afu rafuafo yoini isca huaquin, —Ahuarafoan mato chaca huamapaifafainshcani. Ascafia nan futsa chaca huamafocafin fasi omitsiscai finacoinshcaniquin. <sup>2</sup> Ascashon ua icoinra huafuna futsan chaca huamai nancafin fasi onaintimaquin finacoinquin. Ascacun chaca huamataima toquiri ya tunushushon noacoin muran potafin shara icuanaquin.

<sup>3</sup> Asca oinfain. Tsoan futsa chaca huamaino fasi musucoin. Mi futan tanamisi futsan mia chaca huaiton rauhuahuu afanan mia asca huanonma. Ascashon min yoiaiton nicaquin yoinon isca huaquin, “¡Ohua! Ua rauhuahuu. Un afanan ascaran chaca huanonma,” ishon mia yoiaiton a rauhuahuu. <sup>4</sup> Nan shafata fusti mia chaca huaquin ichapa huafashon nan chaca huati mia rauhuapairiaiton rau huafafaincahuun, —Jesús ato yoini.

### *Non icoinra huaiton Dios noco ahumamishti huashotiro*

<sup>5</sup> Asca huatan afu rafuafoan Jesús yoinifo, —Ifon, non mia fasi icoinra huapaiquin noco finonmafain icoinra huamahuu, —ishon yoiainfoan.

<sup>6</sup> Jesús ato cumani, —Nan mostaza ushu uhuapamashtacoinfiashu foaicano uhuapacoin yositiro. Nanscarifiai tau man ua icoinra huashon uhuun tsain man tapisharayotiroma. Chipu uhuun tsain maton nomuran man nanucoinshon ihui uhuapa ahuun tapofoya tsucucain “Ununhuan muran pacuhuu,” man huaino a muran afanan fanainacahuan man yoia cuscan atiro.

### *Ahuun oinmatin ifoan yoia cuscacoin ashotiro*

<sup>7</sup> Ascacun tsain futsa un mato yoinon. ¿Man oinmati yashomun mato maumamaqui oro yamaraquin chashoanfo cushuashu yatashta pushu ano nasoaitomun ahuun ifoan yoitromun? “Piyohuu,” huaitromun. <sup>8</sup> Ma. Ascarama. Asacatamarocon man yoitiro isca huaqui, “Ua pichashoniyohuu. Ascan man icun mian yoitiro un picanon. Mun piqui anaitiano min chipo pitioran,” ishon man oinmati yoitiro. <sup>9</sup> ¿Asca ahuun oinmati nan yoia cuscacoin aino ahuun niaifoan yoitiro “¡Aichoran! Min fasi shara huaran,” ishon yoitromun? Ma. Afi tau huafaincai acama.

Ahuun ifoan yonoo cuscan huua. <sup>10</sup> Nanscarifiai Diosin mato yonoo cuscacoin aquin marifi yoicahuun isca huaquin, “Noncai ahuama. Nofi tau huafaincai non acama. Nocon Ifoan noco yonoo cuscan non acaran,” ishon yoicahuun, —Jesús ato huani.

*Jesús mucu rafuti nocofunufu aton nami tocoi futsua cayahuani*

<sup>11</sup> Jerusalén ano caaquin Jesús nan fai Samaria yafi Galilea shatsocamun rafu finonfaini. <sup>12</sup> Ascashu pushurasi ano nocoano mucu rafuti nocofunufu aton nami tocoi futsuafo aqui noconifo. <sup>13</sup> Ascatan ato chaima caiton oi ashcafinin cunanifo, —Nocon Ifo Jesús, nocoahuun ramapaihuu, —huaifoan.

<sup>14</sup> Ato oinquin Jesús ato yoini, —Diosin yoimisifo ano fotacahuun. A man cayashara ato ismashcaquin, —ato huaino focani cayariscatanifo.

<sup>15</sup> Ascaino fustiton mua man caya sharashu afanan Jesusqui naso curan oi ashcafinin yoini, —¡Aicho! Dios shara. Ua cayahua shararan, —ishon yoini. <sup>16</sup> Ascatan Jesús naman fuopacuahuan, —¡Aicho! Jesús, min ua cayahua. Min fasi sharacoinran, —ishon yoini. Naanfin Samaritanon iniquin.

<sup>17</sup> Ascaiton Jesús yoini, —Un mucu rafuti nocofunufu cayahuafia na fustiton ua shinanquin ua yoishara yoa. <sup>18</sup> ¿Ahuuscaimun na nocofunu uhuun caifomafishu nan fusti uqui nasoa Dios shara huapai futsafo uqui nasoyamafiaino? —ishon Jesús yoini. <sup>19</sup> Asca huatan a Jesús yoini, —Funicaitahuun. Min ua icoinra huashufin min cayasharaquin, —ishon Jesús yoini.

*Ahuuscashumain Diosin nantifi iquinai cuscan iishquicain*

*Mt 24.23-28, 36-41*

<sup>20</sup> Ascaino Fariseofoan Jesús yocanifo. —¿Ahuutianmun manifotiton ato niaifo Dios iishquiquin? —ishon yocaifoan. Jesús ato cumaqui isca huani, —Ahuuscashocai Diosin yorafo iquinai cuscan man ointiro. <sup>21</sup> Ascashu Upa Diosin mato nomuran mato niaifo itiro mato yonoshquin. Ascacuai tsoan yoitiro isca huaquin, “Diosin niaifo nuno noco mai ano icaraca,” tsoan huatiroma. Futsaricai yoitiro isca huaquin, “Diosin mai futsaria niaifo icaran,” ishoncai tsoan yoitiro, —ato yoitan.

<sup>22</sup> A fu rafuafori yoiqui isca huani, —Chipo un mato anoashu matomaqui caano fasi man ua shinancoinquin yoishquin isca huaquin, “Nocon Ifo no fu ipainon. Fasi non oinpaicoinran,” ishon yoifiaquicai man ua oinshquima. <sup>23</sup> Ascaino futsafoanri mato yoishqui isca huaquin, “Nanfin Cristoquin. Oa ono icaran,” ishon futsafoan yoiaino futsafoanri, “Nuno icaran,” ishon yoiaino. Ari foyamacain atori tanayamacahuun. <sup>24</sup> Uficoin un oaiton man ua oinshquin. Caná facaicaiton shafacafi non oinriscatitiro. Nanscarifiai un oaiton shafacafi man oinshquin. <sup>25</sup> Ascafiashu tau un fasi omitsiscacoinshquin. Natian nia yorafoancai ua niaifo huapaicanima.

<sup>26</sup> Noé niyoano inifo cuscacoinrifiai un afanan oaitian nanscarifi ashcani. <sup>27</sup> Ascaino nantian Dios shinantama pisharafain ayafain fianansharacaino faitahuan noconi. Nanscasi ariaino. Noé ahuun shashohan muran iquitapaiyaino oinhuanrasi furiai unuyamacaiyaino faitahuanun nantio manifoti unuhuan marafumuni. Ascaino asai futsunifo.



<sup>28</sup> Nanscacoindrifi nan nocofunu Lot niyoano nanscacoindrifi. Dios shinantama pisharafain ayafain inanmitsashon ahuafo fifain mau fanafain pushu huapaonifo. <sup>29</sup> Nanscarifi ariaifoanno Lot Sodoma anoashu caani. Diosin yonoa cuscan. Nantianri Diosin yononi nai murannoashu chihuan atoqui pacunon. Ascaino Sodoma anofo cuyocoinnifo. <sup>30</sup> Nanscacoindrifi aashqui un afanan oaitian. Ua shinantama ari apaiyaifo cuscani huariaifoanno.

<sup>31</sup> Ascan tsoa pushu fomancayan niashucai afanan ahuun pushu muran iquitiroma ahuun ahuafo fiishquin. Ascata ma ichoriscatahuun. Nanscarifi tsoacai mau yonofiai afanan pushu ano nasotiroma ahuun sahuuti fiishquin. <sup>32</sup> Ascacun Lotpan ahuihuunoa shinacahuun. Naanton ahuun ahuafofosi shinain ifiacucahuan oinpai nariscani cuscan marifi ascayamacahuun.

<sup>33</sup> Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huua. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacashu ufu ishara pacunacafoquin. <sup>34</sup> Ascacun un mato yoinon un oaitian yora rafu mosquitero muranfiashu fusti ufu cariscatanaino futsa nitushquin. <sup>35</sup> Nanscarifiyaiyainfo rafu nanincani futsa ufu uari cai yamariscatanaino futsa nituashu omitsiscashquin. <sup>36</sup> Ascaino nantianri nocofunu rafu mau ano yonocani futsa uari cai yamariscatanaino futsa nitushquin omitsiscapanacafo muran caashquin, —ishon Jesús ato yoini.

<sup>37</sup> —¿Ifon, raqui focanimun? —ishon yocaifoan. Jesús ato cumaqui isca huani, —Ahuafo naa nanno cotocotofo nocoriscatiro. Nanscarifiyai un nocaitian ua tanamisifo uqui furiscatashcaniran, —ishon Jesús ato yoini.

## 18

*Niaifo yafi ainfomaqui funu naahuunoa Jesús ato ahuafo futsa yosini*

<sup>1</sup> Afanan Jesús ahuafo futsahuunoa ato yoini ato tapimashquin, —Upa Dios unutama cufiriai atsananonfoma. <sup>2</sup> Pushurasi futsa ariai niaifo ini. Nan niaifo Diosqui ratutama yorafohuunri noinima. <sup>3</sup> Ascafiaino ainfomaqui funu naa aqui oshon yoiriapaoni, “Ua noicasmamisiton ua chaca huaiquin ua yoishohuun ua afanan asca huanonma,” ishon yoifiaino <sup>4</sup> niaifo ahuun ramapaitama. Puusinima. Asca huafiaino aqui ihuan ihuanpaoni. Ascaiton niaifoan yoini isca huaiquin, “¡Cuu! Na ainfo funuoma fasi ua fucash huariai. Uncai Diosqui ratuima. Na ainfohuuricai un ramapaiyamafiaino <sup>5</sup> fasi ua fucash huariai. Ascacun afanan ua fucash huanonma un aroshoniran,” ishon niaifoan yoini.

<sup>6</sup> Ascano a niaifo chacapan yoini cuscan nicacahuun. Chacafishon nan ainfo funuoma yoiriaiton man aroshoni. <sup>7</sup> Asca Diosicai a niaifo chaca cuscarama. Ascata marocon fasi noco nicapai. Noco nicaicain atsanatiroma. A catoanfoan shafatishon yafi yamutishon cufiaifo cuscan ato nicacasmaima. <sup>8</sup> Ascacun un mato yoi nan manamisifo mato aroshoriscatashquin. Ascan nan mato noicasmamisifo onaintimashqui. Ascafia un chipo afanan uhuun Upa Dios icariashu mai ano oaino fustirasiton ua icoinra huacaniraca, —ishon Jesús ato yoini.

*Fariseo yafi niaifo pui fishomisihuunoo Jesús ato ahuara futsa yosini*

<sup>9</sup> Ascan afanan ato ahuara futsa yoini ato tapimashquin, —Unfin sharaquin. Uncai chaca huamisima. Yora futsafo ua cuscaramaran, —ishon shinanmisifoahuunoo Jesús ato yoiquin isca huani, <sup>10</sup>—Nocofunu rafu Israelifoo Dios fu tsainti pushu muran iquinifo Dios cufishcaquin. Futsan Fariseo icaino futsan niafo pui fishomisi ini. <sup>11</sup> Nan Fariseo ninacahuan cufiqui isca huani, “Uncai tsoa cuscarama. Unfin nocofunu sharaquin. ¡Aichoran! Upa Diosin, uncai na nocofunu niaifo pui fishomisi cuscarama. Uncai yora chacafo cuscarama. Unricai yomut-soma. Uncai tsoa paratiroma. Unfin yora futsa shara huatiroquin. Uncai uhuun ahuinma furi imisima. <sup>12</sup> Nan semanantifi un piqui tunuquin rafu huafafaini. Nan un fiaishtafin un mia pashcashofafainiquin, Upa Diosin,” ishon Fariseo yoini.

<sup>13</sup> Ascafiainocai nan niaifo pui fishomisitoo anori yoitama. Mananquiri foistamari. Tutipacutsishon shochi sutu sutuaquin yoini, “¡Ohua! Diosin, un mia fasi chaca huamisi. Uhuun ramapaihuu. Un chacaquin,” huani.

<sup>14</sup> Un mato cayacafi yoi. Nan pui fishomisi Diosin ahuan chaca soashofain ahuan yora ima. Ascafiacuicai nan Fariseo ahuan chaca soashonima. Ascan tsoan ahunoo yoiqui isca huai, “Un shararan,” ishon futsafo shinanmapai nanscara yorafo chipo Dios ismashquin arifi chaca huamiscun. Ascan tsoan yoiqui isca huaa, “Unfin chaca huamisiquin,” ishon yoiquin nanscara yorafofin Diosin aton chaca soashotiroqui afu ipanonfo, —ishon Jesús huani.

*Jesús Apa Diosihuunshon facufo shara huani*

*Mt 19.13-15; Mr 10.13-16*

<sup>15</sup> Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiafoan afu rafuafoan ato yoini, —Maton facufo ihuutan nocon Ifo fucash huayamacahuun, —ishon yoinifo. <sup>16</sup> Asca huafiafoan Jesús facufo cunani, —Uqui fucahuun, —ato huatan afu rafuafo yoini, —Unucahuun uqui funonfo. Ato nitun huayamacahuun. Uhuun Upa Dios niaifo icariafofin nan facumishti cuscaraforiquin. <sup>17</sup> Ascacun un mato icon yoi. Nan facumishtifoan Dios iconra huacoinnafo cuscan tsoan iconra huashmacai Dios icari iquinacafomaran, —ishon Jesús ato yoini.

*Nocofunu mafo ichapaya Jesús fu tsainni*

*Mt 19.16-30; Mr 10.17-31*

<sup>18</sup> Ascaino Israelifoo aton niaifo futsa Jesusqui oshon yocaquin isca huani, —Tapimamisiton, minfin sharacoinquin. Ua tapimahuu. ¿Unmun ahuscatiroquin Dios fu ipashquin? —ishon yocaiton.

<sup>19</sup> Jesús cumani, —¿Ahuuscaquin mian “shararan,” huaimun? Dios fusti sharaquin. <sup>20</sup> Diosin yononi cuscan man min tapian. Yonoqui isca huani, “Min ahuinma fu iyamahuu. Futsa rutuyamahuu. Ahuara onuyamahuu. Chaniri yoiyamahuu. Ascashon upa yafi uhuari nicas-harafain ato shara huahuu,” —ishon yoiaiton.

<sup>21</sup> —Nantifi mian yoiyai cuscan facushon un nicainifoannaran, —huaiton.

<sup>22</sup> Afanan Jesús cumaquin, —Fustiricai min nicataima. Nan yoiqui isca huaa. Ahuarafo inanmitsashon ahuan rafanan pui fihuun ahuumofo inanshquin. Min ascaitofin Upa Diosin nai muranshon mia ahuara

sharacoin mucushoniquin. Asca huatan ua tanasharahuu, —ishon Jesús yoiaiton.

<sup>23</sup> Nicai puusinima. Mafo ichapayacoinshon ahuun mafofo potacasmai. <sup>24</sup> Ascaiton oinquin Jesús ato yoini, —Yora mafo ichapaya Uhuun Upa Dios niaifo ari nocopaiificani nocotirofoma. Fustirasifin nocotirofoquin. <sup>25</sup> Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari iquitiromaquin, —ishon Jesús ato yoini.

<sup>26</sup> Ascaiton nicacaquin —¿Ascan tsoa Dios fu nipatiromun? —ishon yocaifoan.

<sup>27</sup> —Nocofunucai afinri numamutiroma. Diosin fustitofin yorafo numatiroquin. Diosinfin ahuamamishti huatiroquin. Nocofunufoancai asca huatiroma cuscan Diosin huatiroquin, —huaiton.

<sup>28</sup> Pedronun yoini, —Ifon, nonfin nocon ahua rafo nantifi nocon yorafo potafurani mifu non oquin, —ishon yoiaiton.

<sup>29</sup> Jesús afu rafuafo yoiqui isca huani, —Un mato icon yoi. Tsoan Dioshuunshon ahuun pushu yafi ahuin non ahuun yorafo non apa yafi ahua non ahuun facufori potashon ua tanapaisharai. <sup>30</sup> Nanscara yorafofin Upa Diosin finacaiqui ato shara huaiquin. Ascana naashu Dios fu ipasharashcane, —ishon Jesús ato yoini.

*Nashquiai cuscahuunoa afanan Jesús yoi futsani*

*Mt 20.17-19; Mr 10.32-34*

<sup>31</sup> A fu rafuafo doce futsano atotisi iyoni nannoashu atofu tsainquin iscani, —Ua nicacahuun uhuun yoramishtichin. Non Jerusalén ano fononfocahuun. Nan Diosin tsain yoimisifoan uhuunoa cununifo cuscan nanscacoquin aiquin. <sup>32</sup> Nannoshon nocon caifoan futsafo ua ato inancani. Nanfoan ua cashu mutsama huafain fasi ua chaca huacani. Uqui cumo michofain fichi cunoqui tuchiaton ua coshacani. Ascatan ua rutucani. <sup>33</sup> Ua asca huafiafo osha rafu non fustitan un afanan funiran, —ishon ato yoini.

<sup>34</sup> Ato asca huafiaitocai tsoa tapinima ato yoi ai cuscan. Man nicafiquiricai tapisharanifoma. Diosin ato tapimanataima.

*Jesús Jericó anoshon fusho caya huani*

*Mt 20.29-34; Mr 10.46-52*

<sup>35</sup> Ascaino Jesús Jericó ano nocoataima fusho fai cusumun tsaoini. Nannoashu pui yocacamisi. <sup>36</sup> Ascana nan fai cusumun tsaoshon yorahuanrasi foannaiton nicaquin ato yocani, —¿Tsoafo na iscai foananimun? ¿Ahua huacanimun? —ishon ato yocaiton. <sup>37</sup> Yoinifo, —Jesús Nazaret anoa cahuaniran, —huanifo.

<sup>38</sup> Ascaiton nicaquin yoini, —Jesús, minfin David ahuun funaquin. Uhuun ramapaipun, —ishon cunani.

<sup>39</sup> Ascana Jesús fu foaifoan asca huanifo afanan tsainonma. Asca huafiaifoanno fasi oi ashcafinin yoiriani, —Minfin David ahuun funaquin. Uhuun ramapaipun, —huariaino.

<sup>40</sup> Jesús nituacucahuan ato yoini, —Nuri ua ihuushocahuun, —ato huaiton aqui ihuunifo.

<sup>41</sup> Ascaiton Jesús yocani, —¿Un mia ahua ahuusca huashotiromun? —ishon yocaiton. Cumani, —Ifon, un fasi oinpaicoinran, —huani.

<sup>42</sup> Ascaiton afanan Jesús cumani, —Ua icoinra huashon natian min oinshairan,—huani.

<sup>43</sup> Ascaino nantian oinsharariscatan yoini, —¡Aicho! Man mian caya huaa shara. Dios shararan, —icashu afu caiton oincaquin futsafoan arifi, —¡Aicho! Dios fasi sharacoinran, —ishon yoinifo.

## 19

### *Jesús yafi Zaqueo*

<sup>1-2</sup> Asca huatan Jesús Jericó anoashu cahuanaino nanno nocofunu ahuun anu Zaqueo ini. Nantofin ahuun niaifo pui fishomisi iniquin. Pui fishomisi futsafoan aton niaifo ini. Nanrifi ahua yopatanaimacoin ini. <sup>3</sup> Jesús yorafoan naqui huano cahuanaiton ahuuscashoma oinpaiquin fuai mishtoshtacoianshu, —¿Ranishomain un oinnanti? —ini. <sup>4</sup> Ahuuscashoma oinpaiquin ranain. Ascacun rusoatori ichoni fñoantaima. Ichotan fai cusumun ihui niahuun ichoinacahuani. Inainacahuatan ahuunshon Jesús cahuanaiton oinshquin icashu inacun. <sup>5</sup> Nan ihui nia naman finonfainquin foisinifoantan fuchishon, Jesús yoini

—Zaqueo, fotoriscahuu. Un min pushu ano osha fusti yoi canon, —ishon yoiaiton.

<sup>6</sup> Nicai Zaqueo fotoriscani. Fasi unimasharacoinquin ahuun pushu ano iyoni. —¡Aichoran! Min uhuun pushu ano oiquin. Iquiyohuu, —Zaqueo huani. <sup>7</sup> Ascaiton oincaquin yorahunrasiton yoinifo, —¡Ajaa! ¡Oincapon! ¿Ahuuscaimun Jesús yora chacapan ahuun pushu ano caiquin? —icashu afi ranan yoinannifo. <sup>8</sup> Ascafiaifoanno Zaqueo Jesús yoini,

—Ifon, natiantafin un yora ahuuomafo cashcu futsa un ato inanpacuicain. Nan un finonmafaintan fia cuscan onushori un ato finonmafaintan ato inanpacuiquin. Un diez soles fianshonfin cuarenta soles un ato inainquin. Ascan veinte soles ato fianshonfin ochenta soles un ato inaincain. Un ato onuyofiamisishaquifin un ato asca huapaiquin, —ishon Zaqueo yoini.

<sup>9</sup> Ascaiton Jesús Zaqueo yoiqui isca huani, —Zaqueo, na shafata min chaca un mia soashona min Diospan facu ica afu nipanonran, —ishon yoini. Ascan nannoa pushu murannoaforti ato yoini, —Na nocofunu Zaqueo arifi Abraham ahuun funa. Abraham Dios icoinra huaa cuscan arifi natian icoinra huaa. <sup>10</sup> Ascan tsoa funoa un ato fai shara ismayoi uhuun Upa Dios anoashu un oni nanfo Dios fu ipasharanonforan, —ishon ato yoini.

### *Puihuunoa Jesús ato ahuaara futsa yosini*

#### *Mt 25.14-30*

<sup>11</sup> Nan nicanan focani Jerusalén chaima nocoshon shinanfo, —Nan Diosin niaifo ahuun yorafo iquinai cuscan nocoti chaimaran, —ishon shinannifo.

<sup>12</sup> Ascaiffoan Jesús ahuaara futsahuunoa ato yoiqui ato tapimaquin isca huani. —Nocofunu niaifo cuscara ini. Nan nocofunu mai futsa ari caani niaifo huashu afanan naso curashquin. <sup>13</sup> Cataima ahuun oinmatifo mucu rafuti cunashon yoiqui isca huani, “Un mato pui paratamacoin inanfainicai. Nan puihuushon ahuaara fiashu inanmitsashon finonmainifoan ahuun rafanan man finon nan un nasoaitian,” ishon ato yoini. <sup>14</sup> Ascaiton ahuun caifo futsafoan nan noicasmacoinnifo. Ascashu

caiton yorafo achon nichinifo. Nan niaifocoin yoiqui isca huanonfo, “Nan nocofunu non niaifo huapaimaran,” huanonfo.

<sup>15</sup> Asca huafiaifoanno niaifocoinin catoan niaifotan afanan ahuun mai ano naso curani. Ascashu nocotan ahuun oinmatifo cunatoshini ahuuti pui man fiafomainquin tapipaiquin.

<sup>16</sup> Ascaino futsan aqui oi taushon yoiqui isca huani, “Ifon, mian inan cuscan mucu rafuti finonmainifoan un mia fishoaran,” huani.

<sup>17</sup> Ascaiton niaifoan yoini, “¡Aicho! Minfin oinmati sharaquin. Mian yonoshon shara. Un mia ichapama inanfia finonmafain mian fishoano un miqui fasi unimai. Un mia yoia cuscacoin min aano. Ascacun pushurasifo mucu rafuti anoafoan ato niaifo min iquiran,” ishon yoini.

<sup>18</sup> Ascaino futsanri aqui oshon yoini, “Ifon, mian pui inan cuscan mucu fustiti finonmainifoan un mia fishoaran,” ishon yoiaiton.

<sup>19</sup> Nicaquin nanrifi yoini, “Mirifi mucu fustiti pushurasi anoafoan ato niaifo min iquiran,” ishon yoini.

<sup>20</sup> Ascaino oinmati futsari aqui oshon arifi yoini, “Ifon, naquian min pui. Un mia rashushon huashoan. Min ua inan cuscan finonmafain fiamafishucaí un funoama. <sup>21</sup> Un miqui ratuqui un mia mucushona. Mun tapia mincai tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran,” ishon yoini.

<sup>22</sup> Ascaiton nicaquin ahuun ifoan yoini, “Min fasi chacacoin. Minfin shanishuniquin. Min tsainhuunshon un mia onaintimai. ¿Min shinanmun un futsafo shinainmaquin? ¿Uaraca futsafoan yonoshofiaiton un ato ahua inanma? Un fimisi ua mian huaa. <sup>23</sup> ¿Ascan nannori shinanfi-aquin ahuuscaquin min rashushon huamun? Asca huatamarocon nan pui huamisifoanno min huaa shara icuana paratama finonmainifoan fiishquin,” ishon niaifoan yoini.

<sup>24</sup> Asca huatan nanno niafo niaifoan ato yoiqui isca huani, “Nan oinmati chaca ahuun pui flashon nan mucu rafuti finonmainifoan fiarocon inancahuun,” ishon ato yoiaiton.

<sup>25</sup> Cumanifo “Ifon, nanfin ichapayacaiquin,” huaifoan. <sup>26</sup> Afanan niaifoan ato cumani, “Un mato icon yoi. Nan ratoran futsan ua iconra huacoinafin un fasi paratamacoinri inainqui. Ascan nan ua iconra huamafin nan ichapama aya cuscan futsa fiainquin. <sup>27</sup> Ascashon nanfoanfin ua noicasmacaquin yoiafoquin, ‘Noncai mia niaifo huapaimaran,’ ishon uhuunoa yoiafo. Ascacun ato ihuucahuun uhuun ointaifi ato rutush-caquin,” ishon yoiniran, —Jesús ato huani.

### *Jesús Jerusalén ano cani*

*Mt 21.1-11; Mr 11.1-11; Jn 12.12-19*

<sup>28</sup> Asca huatan Jesús Jerusalén ano caino. Achon ahuun tapimisifo fonifo. <sup>29</sup> Machi ahuun anu Olivo tunanman pushurasi rafu Betfagé yafi Betania ini. Nanno chaima noconifo. Nocoshon afu rafua rafu nichini.

<sup>30</sup> —Pushurasi ano fotacahuun. Nocoshon man burro cahuashara nushucun man fuchicaicain. Tsoacai na burro camaqui cayomisima. Tupushon nuri ua ihuushotacahuun. <sup>31</sup> Futsan mato yocaiton, “¿Ahuuscaquin man burro cahuashara tupuimun?” yocai foan ato yoiquin. “Nocon Ifo yopaiton non tupuyoaran,” ishon ato yoitacahuun, —Jesús ato huani.

<sup>32</sup> Ato nichiafocatan nococashon Jesús ato yoia cuscan nansacoin huaquin fuchitoshinifo. <sup>33</sup> Man tupuafoanno muropan ifofoan ato yocani, —¿Ahuusca huashquimun man nocon burro cahuashara tupuaquin? —anoa ifofoan ato yocani.

<sup>34</sup> Ascaiton cumacaquin, —Nocon Ifo yopaiton non tupuyoaran, —huanifo. <sup>35</sup> Nan burro cahuashara Jesús ihuushonifo. A fu rafuafoan aton sahuuti muropan catu camaqui fucashonafoanno acamaqui Jesús tsaoinifoannifo. Ascaino cani. <sup>36</sup> Cahuanaiton fai naman cayan afofori sahuuti fucashonifo. Niaifo cahuanaiton apaonifo cuscan Jesusrifi cahuanaiton afofori sahuuti fucashonifo. <sup>37-38</sup> Machi Olivo tusirimucaitan ahuunshon tapimisifo aqui noconifo. Unimacaquin oi ashcafinin Jesús yoinifo,

—*¡Aicho! ¡Diosin shararan!*

Dioshuunshon ahuamamishti min hwaiton non oian. ¡Aicho! Nocon niaifo nocoqui oaqin. Diosin shara huamafainni. Diosin yononi Jesús nocon Niaifocoin inon. Ahuunshon Diosin nantifi shara huanon. Ascarifiatan ahuun nai oinmatifoan nai muranshon yoicani, “Diosifin sharacoinshon yorafoqui ahuun Furun nichiniquin ato numanon,” man huaicain —ishon oi ashcafinin yoinifo.

<sup>39</sup> Asca huacatan Fariseofoan yorahunrasi muranshon Jesús yoini, —Tapimamisiton, minhuunshon tapimisifo yoihuu ascanonfoma, —huaifoan.

<sup>40</sup> —Un mato yoinon. Ua yoisharayamaifoan na toquirifoan ua oi ashcafinin tsain shara ua yoicuanaforan, —ishon Jesús ato yoini.

<sup>41</sup> Machi tusirimupacuquin nan pushurasi Jerusalén anoa icafo oin atohuun ramapai Jesús uaini. <sup>42</sup> Ascashon yoiquin isca huani, —¡Ohua, Jerusalén icanoafoan! Ua icoinra huashufin man isharapacucuaquin. Mancai tapiama natian Diospan Facu nocoa. Mancai ua niaifo huapaima. Un mato numapaifaiton man ua tanacasmai. Natiancai un afanan mato numatiroma. Man fasi finoan. <sup>43-44</sup> Mancai tapiama un mato cushunon Diosin ua catonfiacun, tsoancai mato noicasmamisifoan mato ahuuscara hwaiton mato numatiroma. Mato chituacuafo nantia iqui furancatan mato rutuquin anaitishocani. Matofo yafi maton facufo rutuqui cuyoshceni. Maton pushufo paoinquin futsui. Diosin ua matoqui nichifiacun man ua nicacasmaiton mato asca huashcaniran, —ishon Jesús ato yoini.

*Jesús Dios fu tsainti pushu muranshon ahuaara chacafo potani*

*Mt 21.12-17; Mr 11.15-19; Jn 2.13-22*

<sup>45</sup> Asca huatan Jesús Israelifoan Dios fu tsainti pushu muran iquitoshiquin oian a murannoashu ahuarafo inanmitsaifoan fuchitan ato chifi cainmaquin futsani.

<sup>46</sup> Ascashon ato yoiqui isca huani, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufianicun nan yomutsofoan ichananti cuscara man huapairan, —ishon ato yoini.

<sup>47</sup> Asca huatan shafatifi Israelifoan Dios fu tsainti pushu muranshon Jesús ato yoini. Ascafiaiton nocon yorahuunshon Dios cufimisi niaifofo futan Moisés cununi cuscan tapimamisifo non Israeli niaifo futsafoanri Jesús rutupainifo. <sup>48</sup> Asca huafiaifoan ato caifo futsafoan nan Jesús yoiai

cuscan nicapaicoinnifo. Ascacucaí a rutupaifiaquin tsoan tapinima ahuuscashomain rututirofoquin.

## 20

*Jesús noco yonotiro*

*Mt 21.23-27; Mr 11.27-33*

<sup>1</sup> Ascatan shafa futsaino Jesús Israelifoa Dios fu tsainti pushu muran-shon ahuun tsain shara ato yoifain ahuuscashumain Dios fu ipatirofoquin ato yoiaino nocon yorafohuunshon Dios cufimisi niaifofa Moisés cununi cuscan tapimamisifo non Dios fu tsainti pushu cushumisifoan Jesús yocanifo.

<sup>2</sup> —¿Tsoan mia yonoamun min isca huanon? —ishon yocaifoan.

<sup>3</sup> Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoa asca huanimun? <sup>4</sup> ¿Diosin iyamarai noco-funufoa yononifomun? —ishon ato yocaino.

<sup>5</sup> Afi ranan yocanonannifo. —“Diosin Juan nichiniran,” non huaiton Jesús noco yoitiro. “¿Ascan ahuuscaquin man Juan icoinra huamamun?” —noco huaitiro. <sup>6</sup> Ascan —“Juan nocofunufoa nichiniran,” non huaino yorafo nocoqui sinatirofo. Nantifi yorafoanmain yoimifocun “Juanpan Diosin tsain yoimisiran,” ishon yoiáfo. Ascan “Juan Diospan yonoamaran,” non icaiton toquirifoa noco rututiroforan, —icashu yoinannifo.

<sup>7</sup> Ascashon Jesús yoinifo, —Noncai tapiama tsoanmain Juan yonoaquin, —huaifoan.

<sup>8</sup> Jesús ato yoini, —Urificai un mato yoima tsoanmain ua yonoa un ahuafo huaquin —ishon ato yoini.

*Yonomisi chacafohuunoa Jesús ato yosini*

*Mt 21.33-44; Mr 12.1-11*

<sup>9</sup> Ascashon Jesús ato ahua futsan tapimani isca huaquin, —Nocofunu futsan ahuun mau fanafaini mai futsa ari caano. Futsafoan cushushonifo. Nasoshon ahuun fana atirifi pashcashoshquinon. <sup>10</sup> Fimimisitian mau ifoa ahuun oinmati nichini ahuun fana fimifo fishotanon. Mau cushumisifoan a oinmati sutucashon ahuuoma nichinifo. <sup>11</sup> Ascashon futsari nichian nanrifi sutunifo. Sutuafono maisi cani. <sup>12</sup> Ascashon afanan futsari nichini. Nanri nanscari huacashon. Maumamaquishon potanifo.

<sup>13</sup> Ascashon mau ifoa shinan futsani, “¿Un ahuusca huaimun? Uhuun facucoin nan un ahuun noiai un nichicai. Nanraca nicacointirofo,” huani.

<sup>14</sup> Ascano ahuun facucoin mau ano oaiton fuchinifo, “Ahuun facucoin oiquin. Non rutucoinon. Apa naano naafo ahuun facu ifoaiquin. Non rutunoncahuun. Afin aton apa fiana noncairocon non fianon,” ishon yoinannifo. <sup>15</sup> Asca ocun achicashon mau pasotain iyoshon rutucoinnifo. ¿Asca a mau ifoa nicatamun ahuun facu rutuafo ato ahuusca huaquin? <sup>16</sup> Oshon mau cushumisifo ato rutuquin anaitishon futsafoan ahuun mau cushumaniran, —ishon Jesús ato yoini. Nicacatan, —Ascanacama ipainonran, —inifo.

<sup>17</sup> Ascaifoa Jesús atosi oinquin ato yocani. —¿Asca ahuuscaquimun Diosin tsain nunori yoiquin?

“Pushu yonomisifoa, ‘Ahuun quishi chacaran,’ ishon potafia-cun ifoa afanan shara catonshon nichiano pushu onitiro.”

Nanscarifiai man Diospan Furun pota. “A chacaran,” huafo. Ascafiacun Diosin man catoan ahuunoashu fustisi yorafo Upa Diosin fu nipatirofoquin. <sup>18</sup> Ratoran futsa a nicacasmaifo omitsiscatiro. Asca ratoran futsanfoan nicacasmariamiscun naitian a omitsiscapanacafo muran potashquinran, —ishon Jesús ato yoini.

<sup>19</sup> Nicacanashu Moisés tsain tapimamisifo yafi nocon yorafohuunshon Dios cufimisi niaifofoan Jesús achipainifo cunu muran iquimashcaquin. Atohuunoa yoiaiton nicacani aqui sinanifo. Ascafiashocai a nicapaiyaifoqui musucaquin tsoan achinima.

*Niaifofoan ato caifozo pui yocamisifohuunoa*

*Mt 22.15-22; Mr 12.13-17*

<sup>20</sup> Ascacun nan fuparamitsamisifo Jesús fu foanfainmisifo ahuun tsain nicapaicani ahuarashta amaquri yoiaiton ato niaifoqui chanishcaquin Jesús achinonfo. Asca nanfo Jesusqui nichinifo cuncun huaqui yocatanonfo.

<sup>21</sup> Ascano nanfoan focashon Jesús icon tsainman yocanifo, —Tapimamisiton, ahuara icocoin fusti min noco yoifafainmisi. Nan atirifi min yoiyai cuscun nannoricoinrifi min noco yoifafainmisi. Ascashon icon fustisi min nantifi yorafo Diospan tsain yoifafaini. Minricai ahuara yoipai ranomisima. Nantifi min ato cayacafi yoia. <sup>22</sup> Asca sharamainquin noco yoihuu. ¿Norifimun non Romanonfoan aton niaifo Cesari non pui inainquin? —ishon yocaifoan.

<sup>23</sup> Nan fuparamitsamisifoan yoiainfo cuscun onanshon Jesús ato yoini.

<sup>24</sup> —Ua mato toro fusti ismacahuun, —ato huaiton. Ismaifoan ato yocani, —¿Tsoa ointsa torohuun nuuamun? ¿Tsoan ahuun anuri nuuamun ua yoicahuun? —ishon ato yocaiton. <sup>25</sup> —Niaifo Cesarnaran, —huaifoan.

—Ascan Cesarnacun nan inancahuun. Ascan Diosinacuri Dios inancahuun, —ishon ato yoiaiton. <sup>26</sup> Nicacani fasi mustairicatan yoinifo, —Nan yoiyai cuscacai tsoan tafitiroma. Fasi tapisharacoianran, —icashu ahuun yoinannifo. Ascacuai yorafoan ointaifi, —Jesús amaquri noco cumaran, —ishon tsoan yoitiroma. Ascashu afanan tsoa puusinima.

*Yora naashu afanan funitirofohuunoa yocanifo*

*Mt 22.23-33; Mr 12.18-27*

<sup>27</sup> Ascano nannori Saducefo ini. Nanfoan shinanquin isca huamisifo, —Yora naashucui afanan funinacamaran, —ishon yoimisifo. Ascan nanfo Jesusqui fucashon yocanifo.

<sup>28</sup> —Tapimamisiton, Noco shuni Moisés noco cunushoqui isca huani, “Ratoran futsan ahuin futan facu acashma naano afu nanua futsan ahuun facahua fitiro a futan facu aashquin,” ishon cununi. <sup>29</sup> Ascacun un mia yoinon. Siete nanupacuafo ini. Nan iyoacoinnin iyoacachin ainfo fiqi tau huani. Ascafiashon a futan facu acashma naani. <sup>30</sup> Ascano chipocu futsan arifi ahuun facahua fini. Arifi aqui facu acashma naani. <sup>31</sup> Ascano chipocu futsanri arifi fiini. Nanrifi afutan facu acashma naani. Nanscasiai amaqui nai cuyonifo. Aqui facu acashma. <sup>32</sup> Ascatan ahuun unutan arifi ainfo naani. Facu nanuashma. <sup>33</sup> ¿Ascan ratotocaimun nai muranshon nan yorafo naashu funiaifotian fishquiquin nan fusti fipashu amaqui nai cuyoafo? —ishon yocaifoan.

<sup>34</sup> Jesús ato cumani, —Yorafo nuno mai ano niyoashu nocofunufu yafi ainfofo fiananmisifo. <sup>35</sup> Asca ratoranfoan Diosin tsain icoinra huacun



Diosin ato imasharatiro afu ipanonfo. Asca nanfo naashu afanan funiashu Dios icari nocotan afanan fianantirofoma. <sup>36</sup> Afananricai tsoa natiroma. Nanfo Diospan oinmati afu nai muran ica cuscarafu. Ascashu Diospan facufu. Naashu funicatan Dios fu nipanacafu.

<sup>37</sup> Ascan Moisésirifi noco yoini yora naashu afanan funitiro ni-pashashquin. Ascashon noco yoiquin isca huani, “Chofu uru manhuain murannoa Diosin oi un nicaní. Ua yoiqui isca huaiton, ‘Unfin Abraham non Isaac non Jacob non afoan aton Diosiquin natian ufu niafo,’ ” ishon Moisés yoini. <sup>38</sup> Yora naashu afanan funiyamaino ahuuscashumun Dios fu itirofoquin. Ascafia ascarama. Yora man naafianishaquin afanan nanfofin Dios fu ipatirofoquin. Ascacun Upa Diosifin ato Diosiquin. Diosinafin nantifi niafoquin, —ishon Jesús ato yoini.

<sup>39</sup> Ascaiton nicacani Moisés cununi cuscan tapimamisifoan yoinifo. — Tapimamisiton, min ato cayacafi yoiran, —huanifo.

<sup>40</sup> Ascashocai afanan tsoan yocapainima. Ato cumasharaino aqui ranonifo.

*Tsoan funamun Cristo*

*Mt 22.41-46; Mr 12.35-37*

<sup>41</sup> Ascatan Jesús ato yocani, —Asca ahuuscaimun “Cristo David ahuun funaran,” huamisifoquin. <sup>42</sup> Nan Davidcoinin fanainti cunuqui isca huani,

“Upa Diosin uhuun Ifo Cristo yoini isca huaquin, ‘Minfin ufu niaifocoinquin. <sup>43</sup> Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’ ”

ishon Diosin yoini cuscan David cununi. <sup>44</sup> ¿Criston David Ifono ahuuscashucon ahuun funa itiomun? —Jesús ato yoini.

*Moisés cununi cuscan tapimamisifoan chaca huamisifo cuscan Jesús yoini*

*Mt 23.1-36; Mr 12.38-40; Lc 11.37-54*

<sup>45</sup> Ato asca huatan afu rafuafori ato yoiaiton yora huarasifain arifi nicanifo ato yoiqui isca huaiton.

<sup>46</sup> —Oinfain. Moisés cununi cuscan tapimamisifoan sahuuti chainipafo sahuusho ato oinmafoanfafaicani fasi tapicoianforan ato huamapaicani. Yora ichaparasi ano foanscacani “Sharacoinforan” ato huamapaicani. “Nanfoan fasi Diosin tsain tapicoianran” ato huanonfo. Ichananti pushu muran iquitán shafacafi tsaotiofo ato oinonfo. Ichananshon piyainfoannori shafacafi tsaopaicani. <sup>47</sup> Ascasho ainfomaqui funu naafo parashon pushu ato fianceni. Ascatan fasi chaicoiri cufiriatirofo atohuunoa shinansharanonfo. Ascafia nanfo fasi fuparamitsamisicoinfo. Nanfocaifin Dios ato onaintimaquin finacoinshiquin, —ishon Jesús afu rafuafo yoini.

## 21

*Ainfomaqui funu naa ahuuomashtacoinfiacun Dios inansharani*

*Mr 12.41-44*

<sup>1</sup> Ato yoitán fuhuunina cahuan Jesús oinni yora mafo ichapayafoan pui ichapa nanuti muran nanuiniyaifoanno. <sup>2</sup> Asca huaifoanno ainfo funuoma otan arifi nanuni. Toroshta rafusi a muran nanuni.

<sup>3</sup> Ascashu oiainfoan Jesús ato yoini, —Un mato icon yoi. Na ainfo funuoma ahuomashtafiashton inancoian. Ahuun toroshta rafu cuyoina. Ascacun na ainfo funuomashta fasi Dioshuun noicoinquin inanshara. <sup>4</sup> Asca ichapayafancai Dios inanfiacaquin atirifi tsoan inanqui cuyoafoma tushu huafo. Na ainfoan Dios inain cuscacai ichapa yafoan inansharacoianfoma. Ascafia na ainfo funuoma ahuomafiashton nantifi ahuun pui man inanquin cuyoina. Man inanqui anaitia afancai ahuaunshon ahuun tushu fitiromaran, —ishon Jesús ato yoini.

*Jesús yoini, —Dios fu tsainti pushu paoinshquiran, —ishon ato yoini*  
*Mt 24.1-2; Mr 13.1-2*

<sup>5</sup> Ascano afu rafuafo afiranan yoinancaqui yoinifo, —Nocon Dios fu tsainti pushu toquiri putsamuashu cunuacua fasi sharashtacoin. Yorafoan ahuaara sharashta Dios inancoianfo cuscan nutamuacua, —icashu yoinannifo. <sup>6</sup> Ascaifoan Jesús ato yoini, —Nan man oiain toquiri putsamuashu cunua Dios fu tsainti pushu chipo paoinshquin. Afancai toquirifo putsamushquimaran, —ishon ato Jesús yoini.

*Nan cuyoaitian ahuarafo ishquiai cuscan*  
*Mt 24.3-28; Mr 13.3-23*

<sup>7</sup> Ascaiton cumanifo, —Tapimamisiton, ¿Nan min yoiai cuscamun ahutian iishquiquin? ¿Ahuuscashomun non tapitiroquin a ishquiai cuscan? ¿Diosimun noco ahua futsa ismaiquin non tapinon? —ishon yocaifoan.

<sup>8</sup> Jesús ato cumani, —Oinfain. Mato parapaicaniqui. Yora ichapafafoan, “Un Cristoran,” ishon mato parapaishcani. Ascashon nanfoanri yoishcani, “Un mato yoia cuscan Cristo samamashtacoin oiran,” ishon mato yoiaifoan ato tanayamacahuun. <sup>9</sup> A man nica yorafo rutunainfoanno ratuyamacahuun. Man nica futsafoan aton niaifo potashu arifi ni-aifo ipaiyaiton nica ratuyamacahuun. Nan un yoiaifin nanscacoian aashquiquin. Ascafia nantifi cuyoaitian nocoataima.

<sup>10</sup> Iquisi mai futsa fu yorafo rutunainfoanno mani futsafori mani ya futsafori rutunainfoanno. <sup>11</sup> Ascaino mai futsafoari fasi mai nayanaiyaicaino mai futsafoariri yora tushuomafo icaifoanno. Mai futsafoariri pau isininpacoinfoan ishquicani. Ahuaara chaca futsa futsatapafo icaino yorafo fasi ratucoishcani. Nai ari tsoan oinyomisima cuscara oincani fasi ratucoishcani.

<sup>12</sup> Ascataima achicashon mato ichananti pushu muran iyoshcani ni-aifofoan mato yocanon. Ascashon chipo mato cunu muran iquimashcani. Asca huatan niaifo futsafoan ointaifiri afanan mato asca huashcani. Uhuunshofin mato asca huashquicani. <sup>13</sup> Mato asca huafiaifoan man ato uhuunoa yoitiro. <sup>14</sup> Ascan man niaifofo ano cataima shinancha-cayamacahuun nanfoan matohuunoa tsain chaca yoishcani. <sup>15</sup> Ascafia unfi mato cayacafi yoimamaicain man ato cumasharanon. Uhuun tsain shara un mato nomuran nanumashquin. Ascano nan mato noicasmaifoan tsoan mato cumayamafain matori tafitirofoma. Ascashori tsoancai anorimaran mato huaima.

<sup>16</sup> Ascashon mato upafo futan uhuafon non mato yoracoinfo non man yorahun futsafoanri mato achimashon atirifi mato rutumashcani. <sup>17-18</sup> Ascano cushunshon nantifi yorafoan mato noicasmafiaifoan Upa Diosin mato cushusharafafainshquin. Ascashon mato rutufiafocai ahuashta man funotiroma. <sup>19</sup> Ascan omitsiscafiacquin man ua potama

nan man naitian uhuun tsain tanasharashu Upa Dios fu man ipasharashquin.

<sup>20</sup> Mato noिकासmaifo aton ranushumuafoan Jerusalén chituacuaifoan oinquin man tapitiro man samamashta Jerusalén cuyoi. <sup>21</sup> Nanscara oincani Judea mai anofoan machi ari ichotacahuun Jerusalén anofo-maqui. Patashari icafo Jerusalén muran fuyamacahuun. <sup>22</sup> Nantifi Diosin tsain cununi cuscan Jerusalenhuunoa nanscacoín aiquin. Nantian Jerusalén anofo Diosin ato onaintimai. <sup>23</sup> Ascacun ohua. Ainfo facu nanuafo yafi aton facu yomumishti shoma acaifoya nantifi Israel anofo fasi omitsiscaashcani. Yora futsafo fasi atoqui sinacoincaquin ato asca huashcani. <sup>24</sup> Ato rutufain atirifi achicashon mai futsafoari ato nichishcani. Ato asca huatan a Israelifoma Jerusalén ano iyoshcani. Nan Diosin ato nasopaiyaitian Israelifo afanan Jerusalén ano fushcani. Yora futsafo afanan aton niaifo inonma.

*Diospan facu nasoaítian*

*Mt 24.25-35, 42-44; Mr 13.24-37*

<sup>25</sup> Ascaino nantianri fari yafi oshu non fishifo nan imisima cuscaín futsushcani. Ascaiton nuno mai anofoan oincani fasi ratucoincaquin yoishcani, “¿Ahuuscaimun unuhuan fasi fuchoaino ahuan oi achacoinquin? Noncai iscara oinyomisimaran,” icashu ratucani afiranan yocanonanshcani. <sup>26</sup> Ascaiton oincani yorafo ato ratupan naiyoshcani. Nai ari yafi mai ano ahua chacafo tsoan oinyomisima cuscarafu oincani. <sup>27</sup> Ascaifoanno nantianri un nai ariashu coin camaqui mai ano foshquin. Ascaiton nantifiton ua oinshcani. Un Diospan facuashu uhuun curushhuunoashu un fotoaiton ua oinshcani. Un nantifi iquinai cuscan. <sup>28</sup> Ascacun nan un mato yoiai cuscacoin tau aino nan ua iconra huafo unimacain ua manasharayanan itisharacahuun. Nanscacoín aino un matoqui oti chaimaquin mato numayoi, —ishon Jesús ato yoini.

<sup>29</sup> Ascashon afanan ato yoiqui isca huani, —Nan fana higuera yafi nii futsafuhoanoari shinacahuun. Nanhuunshon mato ahua futsa tapimanon. <sup>30</sup> Nan nii pui risquisi futsuaiton man tapitiro manmain fari-aitonfin. <sup>31</sup> Nanscarifiai nan un mato yoiai cuscacoin aiton tapicahuun Diosin niaifoan ahuan yorafo iquinai cuscan man nocoti chaima.

<sup>32</sup> Ascacun un mato icon yoi. Ahuarafo un mato yoiai cuscacoin aiton nataishoma oinyoshcani. <sup>33</sup> Ascaino nai yafi mai cuyoshqui. Uhuun tsain cayacafi iconcoin. Fiananancái apanacama. Un mato yoiai cusca-coin aashquin.

<sup>34</sup> Ascacun oinfain. Un matoqui nocoriscatashquin. Man itisharayamano ahuafo ahuscarai futsui. Ascacun ahua chaca huayamacahuun. Paunyanan monofafainyamacahuun. “¡Ohua! Un ahuscarairan,” ishon shinanfaiyamacahuun. Nanscafin nan ua iconra huamafofo aaquin. Afo itisharafomano un nocoriscatashquin. Afo icai cuscan ayamacahuun. Oinfain. Masharo nicatsashu cunu muran iquitiro cuscan ayamacahuun. <sup>35</sup> Ahuarafo ahuscarai futsuaino nan maitio omitsiscaí futsushcani. <sup>36</sup> Ascacun itisharayanan Upa Dios cufifafaincahuun omitsiscaítian ahuan curushhuunshon mato amapaiyai cuscacoin huashcaquin. Ascashu man chipo uqui nocoaitian un matoqui unimatiroran, —ishon Jesús ato yoini.

<sup>37</sup> Ascatan shafatifi Israelifoan Dios fu tsainti pushu muranshon ato yoini. Yamutifi machi ahuun anu Olivo ano oshani. <sup>38</sup> Funamanritifi aqui fupaonifo Dios fu tsainti pushu muranshon nicashcaquin.

## 22

*Jesús rutushcaquin afi ranan yoinannifo*

*Mt 26.1-5, 14-16; Mr 14.1-2, 10-11; Jn 11.45-53*

<sup>1</sup> Nan noco caifo Israelifoan ato fusititian shinanpaonifo Diosin nai oinmati ato facu iyoafofosi finonmani rutuquima. Ascan nan fusiti shafa anunifo pan farashati maisiran ishon anunifo man nocoti chaima.

<sup>2</sup> Ascan nantianri nocon yorafohuunshon Dios cufimisi niaiffofo yafi Moisés cununi cuscan tapimamisifo ichanancashon shinanqui isca huanifo, —¿Ahuuscashomun non Jesús ato rutumatiroquin? ¿Ahuara chaca ahuunoa non yoitiro ato rutumashquin? Non cashman rutuaino yorafa fasi mucacani noco raca asca huatirofo, —icashu yoinannifo.

<sup>3</sup> Ascaino nantianri Judaspan ahuun nomuran Satanás shinanchacamariscatani. Nan Judaspan ahuun anu futsa Iscariote nanrifi Jesús fu rafua futsa ini. <sup>4</sup> Ascashu niaiffofo ano cani atofu tsainquicai. Ascano cashon ato yoini, —Unmun ahuuscashon Jesús ato achimatiroquin matoqui ihuunonfo, —ato huaiton. <sup>5</sup> Nicacani fasi unimacoincaqui yoinifo, —¡Aicho! Non mia pui inain min noco Jesús ato achimashocun, —ishon Judas yoiaifoan. <sup>6</sup> Judas ato cumani, —Ai. Man ua yoia cuscan un mato Jesús achishotiroran, —ishon yoini. Ascacun nantian Judaspan shinanni ahuuscashomain un Jesús ato achishotiroquin. Yorahuanrasi yamaino achimapai.

*Ahuun unutaqui Jesús afu rafumisifo futan pini*

*Mt 26.17-29; Mr 14.12-25; Jn 13.21-30; 1Co 11.23-26*

<sup>7</sup> Asca noco fusititian non misi farashati maisi pimisi. Diospan nai oinmatinin nocon shunifoan ato facufo rututamarocon Diosin ato yononi cuscan chashoanun facufo rutunifo. Ascacun nocon fusiitian norifi chashoanun facu rutumisi nocon shunifoan ani cuscan shinanshquin.

<sup>8</sup> Ascacun Jesús Pedro yafi Juan nichiqui ato yoini isca huaquin, —Itishara huatacahuun. Non chashoanun facu picanon, —ato huaiton.

<sup>9</sup> Cumanifo, —¿Rato pushu muran caashon non ati shara huaicaimun? —ishon yocaifoan.

<sup>10</sup> Jesús ato cumani, —Jerusalén ano nocoshon man oian nocofunun unu tutsaomushon foaiton nan mufaitacahuun. Ascashu nan iguiaino afu iguifainshon pushu ifo man yoiqui isca huatiro, <sup>11</sup> “Nocon tapimamisiton mia yocaqui isca huaa, ‘¿Rato cunu muranshon ufu rafuafo futan non chashoanun facu picaimun?’ ” ishon man yoiaiton. <sup>12</sup> Mato cunu uhuapa fomancayan ismai. Nan cunu muranfin nan non yopaiti mato ismaiquin. Nannoshon atishara huacahuun, —Jesús ato huani.

<sup>13</sup> Ascaino nan rafu Jerusalén ano focashon nan Jesús ato yoia cuscacon oinnifo. Nannoshon chashoanun facu pichashonifo.

<sup>14</sup> Ascashon man itishara huashoafono Jesús yafi afu rafuafo ari fonifo. Nococatan nantifi sapa ano tsaonifo.

<sup>15</sup> Ascashu tsaofano Jesús ato yoini, —Un matomaqui nataima un fasi mato futan chashoanun facu piiyopaimisi. <sup>16</sup> Ascacun un mato iquisi icon yoiyoi uncai afanan mato futan piiyoima. Nan man Upa Dios

niaifoan nantifi iquina ano nocoaitian yafi natian un acai cuscan ahuu cuscaramainquin man tapishquin, —ishon ato yoini. <sup>17</sup> Ascatan cucho finifoan Apa Dios cufiyoni, —¡Aicho! Upan —huatan. Ato cucho inanqui yoini, —Ayapacucahuun. <sup>18</sup> Un afanan mato futan na fimi unu ayaima nan un nasoaitian uhuun Upa Dios fu nantifiton niaifo un iishquiran, —ato huani.

<sup>19</sup> Asca huatan Jesús misi finifoan afanan Apa cufiyoni, —¡Aicho! Upan, —huatan. Torupacushon atoti inanqui afanan ato yoini, —Naafin uhuun caya cuscaquin. Un nantifi yorafohuunoashu nai. Ascacun nan man piaitian ua shinanfafaicahuun, —ishon ato yoitan.

<sup>20</sup> Nanscarifi huaquin cucho finifoantan ato ayamapacuquin yoini, —Na ayatihuunshon un mato ahuara funa shara yoi isca huaquin, “Uhuun imi foaino un matohuunoashu nai man ufu uhuun Upa Dios ari ipanon,” —ishon ato yoini.

<sup>21</sup> Ascashon Jesús afu rafuafo yoiqui isca huani, —Nuno ufu sapa ano tsaon futsan ua ato achimai. <sup>22</sup> Ascan Upa Diosin tsain inon pacoai uhuunoa cununi cuscaoinfin un naicain. Ascacia nan nocofunun ua ato achimanai cainyamanifin shara icuanaquin, —ishon Jesús ato yoini.

<sup>23</sup> Ascaiton nicacani afu rafuafo yocanonannifo, —¿Rato futsacaimun non achimaiquin? —icashu afi ranan yoinannifo.

*Tsoacaimun fasi shara finaciaquin*

<sup>24</sup> Ascatan rato futsacaimun fasi finoinnifoan niaifocoin ishquiquin icashu fochishmanantanannifo.

<sup>25</sup> Ascaifoan Jesús ato yoini, —Nan icoindra huama niaifofoan ato curushcain yonofafainmisifo. Ato asca huafiacaquin yoimisifo, “‘Noco shara huashofafainmisiforan,’ ishon nocohuunoa yoicahuun,” ato huamisifo. <sup>26</sup> Asca huafiamisifo marifi ato cuscara iyamacahuun. Ascatarocon facu pushco cuscara icahuun. Nanfo nan iyofofaan ato yonoafo cuscan ato ashotirofo. Ascatari niaifopaicaquin futsafo shara huacahuun. Asca nan mato shara huafafainmisi nanfin niaifo iishquiquin. <sup>27</sup> ¿Ascan ratotocaimun futsafo finoanquin? ¿Futsafo yonofafainmisi iyamarai ato yonoshomisi? Nan icoindra huamafoan yoimisifo nan yonomitsamisitocafin futsafo finoanquin ishon yoimisifo. Anori yoifiafo uncaifin mato yonoshomisiquin.

<sup>28</sup> Ascacia ahuara chacafo finonfiaqui man ua potama. Man uhuun nuua. <sup>29</sup> Ascacun uhuun Upa Diosin ua catoan un afu niaifo inon. Nanscarifi aquin un mato catoan man ufu niaifo inon. <sup>30</sup> Ascano un mato yoiyai cuscan un niaifoanno marifi man ufu niaifofo iishqui. Nocon Upa Dios ari man ichanaintian marifi man ufu tsaoshquin. U futan pifain man ufutan ayashquin. Ascashu nocon caifo Israelifoan aton niaifofo man iishquin. Nan doce shoco noco caifofoan ato niaifo man ishquiran, —ishon Jesús afu rafuafo yoini.

—*Pedro min futsafo, “Un Jesús oinmisimaran,” ishon yoiran, —Jesús huani*

*Mt 26.31-35; Mr 14.27-31; Jn 13.36-38*

<sup>31</sup> Asca huatan Jesús Pedro nan ahuun anu futsa Simón yoini, —Simón, Satanás Dios yocashon mia chaca huamapai. Umaqui mia imapaiquin. <sup>32</sup> Ascacia un mia Upa Dios cufishona min ua icoindra huafain afanan ua tanasharanon. Ascan min afanan uqui nasaino ufu rafua futsafori min ato yoisharatiro ua tanasharanonfo, —ishon yoiaiton.

<sup>33</sup> Pedronun cumani, —Ifon, mia cunu muran iquimanaifoanno urifi un mifu iquitiro. Ascashon mia rutuaifoannori urifi un mifu natiroran, —huaiton.

<sup>34</sup> Afanan yoini, —Pedro, un mia yoi. Tacara cuoatama min ato yoiquin, “Un Jesús oimisimaran,” ishon min ato yoiqui rafu non fusti huairan, —ishon Jesús yoini.

<sup>35</sup> Asca huatan Jesús ato yocani, —¿Un mato nichiyamuatian pui non forusa non sapato futsan maisi nichiano man ahuara futsari yopaiya-muamun? —ishon ato yocaiton.

Cumanifo, —Noncai ahuara futsa afanan yopayamuama, —huaifoan.

<sup>36</sup> —Asca natian pui ayashon mato pui fofain maton forusari fotac-ahuun. Asca nopu yopaquin maton sahuuti shochiquirinoa futsahu-unshon nopu ficahuun. <sup>37</sup> Ascacun uhuunoa cununifo isca huaquin, “Arifi yoicaquin ‘man chaca huamisiran,’ huashquicani,” ishon uhuunoa cununi. Uhuunoa icon yoiamafiaquin nan icocoin yoi cafisca huaafo. Ascano uquin cununi cuscan samamashtacoin aiquin, —ishon ato yoiaiton.

<sup>38</sup> A fu rafuafoan yoinifo, —Oinpon. Na nopu rafu, Ifon, —huaifoan.

—Un mato yoipaiyai cuscacai man tapiama. Ascacun non afanan aya tsainquimaquin, —ishon ato yoini.

*Jesús Getsemani anoshon apa cufini*

*Mt 26.36-46; Mr 14.32-42*

<sup>39</sup> Nan camisi cuscan machi Olivo ano caino afu rafuafo achon fonifo. <sup>40</sup> Nanno nocoshon ato yoini, —Upa cuficahuun Satanás mato chaca huamapaiyai cuscan huashcaquima. Ascacun ua potashcaquima cuficahuun, —ato huani.

<sup>41</sup> Ato asca huatan chaimashta atomaqui caashon Apa cufinquin isca huani ahuun ratoconun mai chachipacufoan Apa cufini.

<sup>42</sup> —Upaan, min ahuara futsa yorafo numashqui atiroamainquin nan min apaiyai cuscan huahuu. Unfi mun itisharaquin atohuunoashu omitsiscacai naashquin, —Apa huaino.

<sup>43</sup> Ahuun oinmati afu nai muran ica aqui niriscatan mutsismaini-foanni.

<sup>44</sup> Asca huaino fasi curushcain Jesús Apa cufini fasi ahuun nomuran nan omitsiscacai cuscan shinanquin. Ascaino imi foya niscan maiiqui futosomuni.

<sup>45</sup> Ascacaini afanan afu rafuafo ano caaquin oian man oshafo ini. Fasi aton Ifon omitsiscaiton shinancani oshafainnifo.

<sup>46</sup> Atoqui nocoshon oian oshafoan ato yoini, —Ahuuscain Upa cufitama man oshariai. Ascaquima Upa cuficahuun yoshin chacapan mato chaca huamapaiyai cuscan huashcaquima. Ua potashquimari cuficahuun, —ato huani.

*Jesús achinifo*

*Mt 26.47-56; Mr 14.43-50; Jn 18.2-11*

<sup>47</sup> Nan ato yoi ai muran yorahunrasi nocotoshinifo. Nan afu rafumisi futsa Judascaifin rufofo oaino acho yora huanrasi funiquin. Nocotan Judaspan tamo tsoacatoshini. <sup>48</sup> Ascaiton Jesús Judas yoini, —¿Judas, nan Diosin ua catoancaimun ua tamoqui tsoacaihuunshon mian ato achimaicai? —huani.

<sup>49</sup> Asca huaiton oincaquin afu rafuafoan Jesús yocanifo, —¿Ifon, non ato nopu rurapacutiromun? —ishon yocanifo.

<sup>50</sup> Asca huatan futsan nopu fifaitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>51</sup> Ascaiton Jesús yoini, —Unuhuu, —huatan afanan ahuun pafiqui funa futsa panichirishcatani.

<sup>52</sup> Ascashon Jesús nocon yorafohuunshon Dios cufimisi niaifofu yafi ranushumuafo yafi Dios fu tsainti pushu cushumisifo yocani, —¿Ahuuscái nopu yafi coshatifo ya man uqui fuamun? <sup>53</sup> Shafatifi Dios fu tsainti pushu muran un matofu icanocái man ua achipaiti huama. Asca na yamu man uqui fua Satanás maton ifoanno, —Jesús ato huani.

—*Un Jesús oinmisimaran, —ishon Pedronun yoini*

*Mt 26.57-58, 69-75; Mr 14.53-54, 66-72; Jn 18.12-18, 25-27*

<sup>54</sup> Ascafiaiton achicashon nocon yorafohuunshon Dios cufimisi niaifocoinin ahuun pushu ano iyonifo. Ascaino chipo achon Pedro cafiacquín fishtanima. <sup>55</sup> Umainti chii cutuhuashu yooaifoanno Pedrori atofu yooni. <sup>56</sup> Ascaiton niaifoan ahuun oinmati shomayatón Pedro fuchini. Chii uruquin fuchashaiton ahuun fuso onanshon yoini, —Naafin nan Jesús fu imisiquin, —huaiton.

<sup>57</sup> Pedronun cumani, —Ma, ainfon. Uncai Jesús oinmisima, —huani.

<sup>58</sup> Man ascano futsanri afanan onanshon yoini, —Minfin nan Jesús fu imisi futsaquin, —huaiton. —Ma. Unmafinquin, —Pedronun huani.

<sup>59</sup> Man ascano chipo afanan futsanri onanshon yoini, —Nancoinfinquin. Jesús fu cahuacacaimisi. Nanrifi Galilea anoaran, —ishon nocofunu futsan yoiaiton.

<sup>60</sup> —Min yoiai cuscacai un tapiama. Uncai Jesús oinmisimaran, —itapaiyaino tacara cuoni. <sup>61</sup> Nanscatanaino ifiacucahuan Jesús Pedro fuistani. Fuistanaiton nan Ifoan yoia cuscan shinanriscatani, —Tacara cuoataima min yoiquin rafu non fusti huai, “Un Jesús oinmisimaran,” —Jesús huacun Pedro shinantani. <sup>62</sup> Umaintinoashu chifi caicaintan fasi uaicoinni.

*Jesusqui cashupainifo*

*Mt 26.67-68; Mr 14.65*

<sup>63</sup> Ascaino nan cushuafo Jesusqui cashu mutsamai taunifo. <sup>64</sup> Ascano fufoposhon sutucashon yocanifo, —¿Mia tsoan acamaínquin? Oinyamafíashon noco yoihuu, —huanifo. <sup>65</sup> Asca huashon roaqui futsanifo.

*Niaiffoan Jesús yocanifo*

*Mt 26.59-66; Mr 14.55-64; Jn 18.19-24*

<sup>66</sup> Shafatapaiyaino Israeliffoan niaifofosi nan yorafohuunshon Dios cufimisi niaifofu non Moisés cununi cuscan tapimamisiffoan ichanannifo atoqui Jesús iyoafoan yocashcaquin.

<sup>67</sup> Ascashon atoqui iyoafoan yocanifo, —¿Minmun Criston? ¿Diosin mia catonni? Noco yoihuu, —ishon niaiffoan yocaiton.

Jesús ato cumani —Un mato, “Ai,” huaitocai man ua icoinra huaima. <sup>68</sup> Ascashon un mato yocaitoricai man ua cumaima. <sup>69</sup> Ascacun natian yafi nantishon tapiquin uhuun Upa Diosin ahuamamishti huatiro futan un nantifi ato iquipacunacaran, —ishon yoiaiton.

<sup>70</sup> Afanan yocanifo, —¿Ascan minmun Diospan facu? —ishon yocaifoan.

—Nan man yocain cuscafin unquin, —ato huani.

<sup>71</sup> Ascaiton nicacaquin yoinifo, —Nicacapon. Afanancai ahuunoa tsain chaca huaifoan non yopaima. Naan yoiai cuscan noficoín man non nicairan, —icashu yoinannifo.

## 23

### *Jesús Pilato ano iyonifo*

*Mt 27.1-2, 11-14; Mr 15.1-5; Jn 18.28-38*

<sup>1</sup> Ascatan Israeli niaifofoan Jesús aton niaifocoin shinanmaqui iyoinifo. Nan Pilato niaifofin Romanonfoan ato niaifo iniquin. <sup>2</sup> Ascano niaifofoan Jesús tsain paranacaquin yoinifo, —Na nocofunun fasi noco yorafo fucash huaquin ato yoia, “Romanon niaifoan mato pui yocaiton inanyamacahuun,” ishon yoifain “Un Diospan facu un mato niaiforan,” noco huaran, —ishon Pilato yoinifo. <sup>3</sup> Ascaiton Pilatonun yocani, —¿Minmun Israelifoan niaifo? —ishon yocaiton.

Jesús cumani, —Nan mian yoiai cuscafin unquin, —huani

<sup>4</sup> Ascaino Pilato nocon yorafohuunshon Dios cufimisi niaifofo yafi nanno nia futsafo ato yoini, —Na nocofununcai ahuaara chaca yoima. Ahuashtacai ahuan nuama non iquimanai, —ishon ato yoini. <sup>5</sup> Ascafiaiton fasi curushcain cumanifo, —Na nocofununfin ato yoiquin Judea maitio fasi ato fucash huafoanfaini. “Romanonfoan niaifo non potanon,” ishon yoiaquin. Tau huaqui Galilea anoafu yoiqui fucash huatan nunorifi man oaran, —huanifo.

### *Jesús Herodes ano iyonifo*

<sup>6</sup> Ascaifoan nicaquin Pilato afanan ato yocani, —¿Na nocofununun Galilea anoafu? —ishon ato yocaiton. <sup>7</sup> —Aifain, —huaifoan. —Asca un Herodesqui Jesús nichinonquin. Nan Galilea anoafu niaifoquin. Ahuusca-main huaicai afi noco yoinon, —ishon Pilato yoini. Nantianri Herodes arifi Jerusalén ano oni.

<sup>8</sup> Jesús aqui nocoaiton fuchitan Herodes unimacoinni. Fasi oinpaimisishaquin. —Ahuamamishti noco ismapainonran, —ishon ahuan nomuran shinanni. <sup>9</sup> Ascashon fasi ahuaarafo Jesús yocapaifaitocai cumanima. <sup>10</sup> Ascaino nocon yorafohuunshon Dios cufimisi niaifofo yafi Moisés cununi cuscan tapimamisifo Herodesqui fasi chanirianifo chaca huacaquin. <sup>11</sup> Ascaino Herodes futan ahuan ranushumuafoanri fasi cashumutsama huaquin roarianifo. Niaifoan sahuuti sahumatan Pilato ano afanan nichinifo. <sup>12</sup> Pilato fu Herodes shara huantananyamafiamisishaquin nantian shara huantanannifo. Jesús achicanisi ruanannifo.

### *Niaifoan ato yononi Jesús rutunonfo*

*Mt 27.15-26; Mr 15.6-15; Jn 18.39-19.16*

<sup>13</sup> Ascacun Pilato afanan ato cunani. Nocon yorafohuunshon Dios cufimisi niaifofo yafi niaifofo futsafori ichanan huashquin. <sup>14</sup> Ascano ato ichanan huashon ato yoini,

—Man uqui na nocofunu ihuaa. Man ua yoia naton yorafo tsain chaca yosian Romanonfoan aton niaifo non potanon, icaran ishon man ua yoia. Ascafiaicai ascarama. Maton ointaifi un yocafiaitocai man ua yoiai cuscan ua cumaqui chaca huama. <sup>15</sup> Herodesricai ahuunoa ahua chaca nicama nan man yoiai cuscan. Ascacun Herodes nocoqui afanan



Jesús nichian. Na nocofununci ahua chaca huamafinquin naashquin. <sup>16</sup> Ascacun un onaintimaiyoi catanon, —ishon ato yoini.

<sup>17-18</sup> Ascaino mucainifoannifo. —Na nocofunu rutuhuu. Barrabás noco cainmashooun, —huaifoan. Fuusititiansi Pilato a cunu muran iquiafo fusti ato caimapaoni. Faritifi nan yorafoan cainmapaiyaifo Pilaton ato cainmashopaoni.

<sup>19</sup> Nan Barrabasfin yora rutumisi iniquin. Nantori yoini, —Romanonfoan niaifo non potanon, —ishon yorafo yoini. Ascaiton cunu muran iquimanifo. <sup>20</sup> Ascaifoan afanan Pilatonun ato yoini Jesús nichipaiquin. <sup>21</sup> Ascafiaino afanan mucainifoan yoinifo, —Mastahuun, —huarianifo.

<sup>22</sup> Ascaifoan afanan Pilato ato yoini, —Ahuuscacufin. Ahuacai chaca huamafinquin. Ahuashtacai chaca huatananma napanan. Unfin onaintimashon nichiqui catanon, —ishon ato yoini.

<sup>23</sup> Ascafiaino oi ashcafinin, —Mastahuun, —huarianifo. Yoiquin unuyamacaiyaifoan Pilato shinantani ascaiton, —Mafin acahuun. <sup>24</sup> Man fasi yoiriaicai asca nan man apaiyai cuscan huacahuun, —ato huani. <sup>25</sup> Nan Barrabás yora rutufain niaifo potapafiamisicun nancai cunu murannoa cainmafain Jesusrocon ato inanni nan apaiyaifo cuscan huanonfo.

*Jesús ihui coyan iquinanqui mastanifo*

*Mt 27.32-44; Mr 15.21-32; Jn 19.17-27*

<sup>26</sup> Jesús iyocaquin oianfo Simón pushurasi patasharinoashu oaiton fuchitan Simón Ćirene anoa yononifo, —Ihui coyan iquinan noco foshoicahuun, —ishon iyamafainifo. Jesús rucucaino achon iyashon foni.

<sup>27</sup> Ascaino yorahuanrasifo ya ainfofori achon fonifo. Nan ainfofo uai-fonifo aton Ifo manocani. <sup>28</sup> Ascaifoan ifiacucahuan Jesús ato yoini, —Jerusalén anoa ainfofoan, uhuunoashu uaiyamacahuun. Mafiri uaicain maton facufohuunoashu uaicahuun. <sup>29</sup> Manfin chipo omitsiscaquin yoishquiquin isca huaquin, “Non facuomafofi shara icuanaquin no fu omitsiscanonfomaran,” ishon man yoishqui. <sup>30</sup> “Machi nocoqui maocoano non nai futsuafin shara itiroquin. Omitsiscashquima,” ishon nannori man yoishqui. <sup>31</sup> Un ahua chaca huayamafiamisicun ua isca huacani. Ascan tsoan ahua chaca huaquin unuyamacaiyaifofin fasi finacaicani omitsiscamashcaniquin, —ishon Jesús ato yoini. Ascashon Jesús iyonifo mastaifocaquin. <sup>32</sup> Ascashon yomutso rafuri iyonifo Jesús ya mastaifocaquin

<sup>33</sup> Ascatan anoshon mastaifoanno noconifo. Nanno ahuan anu mapo shao ini. Nannoshon Jesús mastanifo. Ascashon nocofunu chaca rafuri ocuma futsa futsafain ocuma futsari futsa mastanifo. <sup>34</sup> Ascashon mastaifoan Jesús Apa cufini,

—Upan, ato rau huahuu. Ua isca huaifo cuscan tsoan tapiamaquin. Un min facufiacun tapiafoma, —ishon Jesús apa cufini.

Mastacatan ahuan sahuuti pashcananshcaquin. Aya cashuti ya cashunifo nan finonmanaton ahuan sahuuti fiqui tau huani. <sup>35</sup> Nanno yorahuanrasi mapo cashon oinnifo. Ascashon niaiffoanri roaqui futsacaquin yonifo,

—Non oinon. Futsafo numamisi cuscain afiri numaiquin nan Diosin catonni Cristo huashuforan afiri numaicain futsafo numamisi cuscan, —ishon yoinifo.

<sup>36</sup> Ascaino ranushumuafu aqui cashupainifo. Fimi unu focashcoin muran mishan pocotan inanpaicaquin.

<sup>37</sup> Ranushumuafu yoinifo, —Minmain Israelifoan niaifoquin mifiri numahuu, —huanifo.

<sup>38</sup> Ascashon ahuun mapo manaonri aqui cununifo.

#### ISRAELIFOAN NIAIFORAN

ishon.

<sup>39</sup> Ascaino afu masta futsan Jesusqui tsain chaca huani.

—Minmain Cristoqui mifiri numacain nocori numahuu, —huaiton.

<sup>40</sup> A fu masta futsan yoini, —Asca huayamahuu. ¿Minmun Diosqui ratuimacai? <sup>41</sup> Non chaca huamicufin noco mastafuquin. Asca Jesuscai ahua chaca huayamafiamiscun mastaforan, —ishon futsan yoini.

<sup>42</sup> Ascashon nantori yoini, —Ifon, Dios niaifo ari nocoshon ua shinanhuun, —huaiton.

<sup>43</sup> Jesús cumani, —Icon un mia yoi. Na shafatan min ufu ari iquicaquin. Nanno fasi sharacoin. Min ufu unimacoin sharapacunacaran, —huani.

#### *Jesús nani cuscan*

*Mt 27.45-56; Mr 15.33-41; Jn 19.28-30*

<sup>44</sup> Asca huatanaino fari masafinin racafishu nan maitio faquishpacuahuani. <sup>45</sup> Ascainocai fari chashayonima. Ascashu man fari caino afanan shafani. Ascaino nantianri Dios fu tsainti pushu murannoa Dioshuunoashu panomanhuan pochimua aficoín nushmancayan fashnupacuhuan. <sup>46</sup> Ascaino Jesús Apa cunainifoanni oi ashcafinin,

—Upan, miari ua ihuicoinhuun, —huatan shacaica unufaini naani.

<sup>47</sup> Ascaiton ranushumua niaifoan yoiquin. —Icocoínfinquin na nocofunucái ahua chaca huayomisima. Fasi sharacoin. Nan non oian cuscan nantifi Diosin acarán, —ishon ranushumua niaifoan yoini.

<sup>48</sup> Ascaiton oincani fasi manocoincáni fonifo. <sup>49</sup> Ascaiton ahuun yorahuafo yafi nan ainfofo Galilea anoashu afu foafoan chai nishon oinnifo.

#### *Jesús mai huani*

*Mt 27.57-61; Mr 15.42-47; Jn 19.38-42*

<sup>50</sup> Nannori nocofunun ahuun anu José Israelifoan aton niaifo ini. Nan nocofununfin Dios tanasharapaicoinniquin. <sup>51</sup> Nantoricai niaifo futsafoan shinainfo cuscan shinannima. A niaifofin Arimatea mai ano ainiquin. Arimatea nan pushurasi Judea muran ini. Nantorifi Cristo nan Diosin catoan manapaoni aton niaifo inon.

<sup>52</sup> Ascashu cashion José Pilato yocani. —Un Jesús ahuun caya toquirininhuan quini muran mai huapairan, —ishon. <sup>53</sup> Ascano yocafaini cashion a ihui coyan iquinganqui mastafa fotomapacufoan ahuun yoratishton racoshon toquirininhuan quini muran mai huani. Jesús naataima quini puhunifo nan murancai toa maiyomisima muran Jesús mai huani. <sup>54</sup> Tunutitian man nococuanaino Jesús mai huani. Nan shafatan itishara huamisifotian ini.

<sup>55</sup> Ascaino nan Galilea anoashu ainfofo Jesús fu fuitafoan José Jesús mai huaiton oinshcaquin mufainifo. Ahuuscashomain rataicain oinsharanifo. <sup>56</sup> Ascashu nan ainfofo afanan aton pushu ano nasofainifo. Ininti shara itishara huai focani. Unupa yafi mutopa inin shara fii focani fonifo. Jesús ahuun caya camaqui ocashcaquin. Ascafiaino tunutitian

nasoyonifoma. Finonyocani. Israelifoan yononi cuscan tunutitian tsoa raqui cayotiroma ini. Ascacun nan nicacoinnifo.

## 24

*Jesús funini cuscan*

*Mt 28.1-10; Mr 16.1-8; Jn 20.1-10*

<sup>1</sup> Israelifoan tunutitian iyoco futsaino funamanrishta aton ininti rafu ya Jesús maia ano fonifo. Iquisi ininti ati shara huafaincani.

<sup>2</sup> Nococaquin oianfo quini ahuun fupoita toquirininhuan tocoro man fupucua ini. <sup>3</sup> Ascaino iquifainpaiquin oianfo aton Ifo Jesús ahuun cayacai ano inima. <sup>4</sup> Ascaiton oinquin aton nomuran shinannifo, —¿Raquimun ahuun caya foafoquin? —ishon shinanpaiyaifoanno nocofunu rafu ato sahuutifoya chashatanaino atoqui niriscatanifo.

<sup>5</sup> Ascaino ainfofo fasi ratucoincani fuoi futsunifo. Ascaifoan Diospan oinmati rafutan ato yoini, —¿Ahuuscaquimun yora nia man funaicain nan yora naacun mai huamisifo murannoa? <sup>6</sup> Afanancai nunomafinquin. Manfin funiaquin. <sup>7</sup> ¿Galilea ano matofu iyoshon mato yoimisimun man shinainmacai? Mato yoimisi isca huaquin, “Chacafoan ua achishon ua mastafo un naafiashu osha rafu non fusti finontan un afanan funishquiran,” mato huamisi nanmun man shinainmacai, —ishon ato yoinifo.

<sup>8</sup> Ascaiton nan Jesús ato yoimisi cuscan shinanriscatanifo. <sup>9</sup> Ascatan ainfofo nasofaincani nan once nocofunufu Jesús fu rafumisifoquin chanitoshinifo. Nannoa futsaforifi nan rama oinfainfo cuscaquin ato yoinifo. <sup>10</sup> Nanfofin María Magdalena non Juana non Santiago ahua María non ainfo futsafori nanfo atoqui chanitoshinifo. <sup>11</sup> Ascafiaifoancai ato icoinra huanifoma. —Icon yoicanimaran, —ato huanifo.

<sup>12</sup> Ascaiton nicafaini Pedro ichoni toquirinin huaa quini muran oincai. Nocotan tucupacuahuan quini naisquin oian ahuun racoita fusti nanno mania ini. Ascaino Pedro —¿Ahuuscamun aaquin? —icaini cani.

*Jesús Emaús fain cani cuscan*

*Mr 16.12-13*

<sup>13</sup> Nan shafatanri Jesús tanamisi rafu pushurasi Emaús ano fonifo. Emaús Jerusalén chaima ini. <sup>14</sup> Nan rafu focaquin Jesús aquitafo cuscan afi rafu yoinanfonifo. <sup>15</sup> Ascaifoanno Jesuscoi afanan atoqui nocotan. <sup>16</sup> Ato fu cafiatocai tsoan onannima. Diosin ato onantima huaino. <sup>17</sup> Ascaiton Jesús afincoi ato yocani,

—¿Nocofunu rafutan, raquiri man yoinanfoi caimun? —ato huaino. Pusitama nituriscatanifo.

<sup>18</sup> Ascaiton naan Cleofas fustiton cumani,

—Mirus fusti Jerusalén ano min icatoracafin min tapiamaquin na rama iquitan cuscan, —huiton.

<sup>19</sup> —¿Ahua ahuuscaitamun? —ishon ato yocaiton.

—Jesús Nazaret anoaya non tsainquin. Nanfin Diosin tsain yoimisiquin. Diosin ahuun curushhuunshon noco yoimisi. Dioshuunshon ahumamishti noco huashomisi. Ahuun tsainman yora caya huafain ahua sharafo noco huashomisi. Nan acai cuscan nantifi man non oian. Diosin yafi nantifi man non oian. Nocofunu sharacoinfin non oinmisi. <sup>20</sup> Ascafiaiton nocon yorafihuunshon Dios cufimisi niaifofo non nocon niaifofoan achicashon mastaitafo. <sup>21</sup> “Nancairocon nocon caifo Israelifo nocon Numamisi ipainonran,”

non huamisi. Asca natian man naita shafa rafu non fusti man finoan.  
<sup>22</sup> Na funamanri ainfofoan no fu focashon man funatanafo ahuun caya quini muran yamaiton.

<sup>23</sup> Ascashon naso furan noco yoirafo ahuun caya anocuma. “Ahuun oinmati afu nai muran ica rafutan yoirafo Jesús man afanan niaran,” noco huafo. Ascacun non shinan “¿Ahuuscamun aaquin?” ishon. <sup>24</sup> Ascaino nocomaquinoashu rafu ichocashon oiancai ano Jesús ahuun caya icama. Naan ainfofoan yoirafo cuscan iconcoiran, —ishon non yoi.

<sup>25</sup> Ascaifoan ato yoiqui isca huani, —¡Ohua! Manfin tatimacoinfoquin. Diosin tsain yoimisifoan yoinifo cuscan mancai icoinra huacuanama. <sup>26</sup> Man cununi isca huaquin, “Diosin yonoa nan catoan Cristo omitsiscayotan. Apa Dios fu niaifocoin iishquiran,” icashon ahuunoa cununiran, —ishon Jesús ato yoini.

<sup>27</sup> Ascacun tau huaquin ahuunoa Moisés cununi cuscan yoifain Diosin tsain yoimisifoanri ahuunoa cununifo yoifain nantifi Diosin tsain ahuunoa cununi cuscan atofu cafoquin shafacafi ato yoifoni.

<sup>28</sup> Ascano Emaús ano man nocoti chaima nan rafutan shinannifo, —Noco finonfaini cairan, —ishon shinannifo. <sup>29</sup> Ascatan nan rafutan yoinifo —Cayamahuu. Man fari caiquin. No fu iyopun, —huariaifoanno atofu caani. <sup>30</sup> Ascatan piaifoanno Jesús misi finifoantan Apa Dios yoiqui isca huani, —¡Aicho! Upan, non yopai cuscan min noco inanmisiran, —huatan. Misi torupacushon aton inanni. <sup>31</sup> Ato inainton Dioshunshon Jesús onanriscatanifo. Onantapaiyoianno atomaquinoashu yamariscatani. Afanancai tsoan oinnima. <sup>32</sup> Ascano afi rafu yoinannifo, —Noco fu fain oquin Diosin tsainhuunoa cununi cuscan noco yoi fuaino non mua nocon ointi fupuisharatanaiton. Ahuun tsain sharacoinran, —icashu yoinancatan.

<sup>33-34</sup> Ascashu Jerusalén ano nasoriscafurannifo nan Jesús fu rafuafo once funashcaquin. Ascashon ato fuchinifo ichananshu nan once yoinainfoanno, —Icon, nocon Ifo funia. Pedro man oinmanaran, —ishon yoinifo.

<sup>35</sup> Ascaifoanno nan rafu Emaús anoashu fua rafutari yoinifo, —Noficoinri Jesús man non oian Emaús fain non caino noco ahuunoa Diosin tsain yoi. Ascatan noco misi torupacushonaiton man non onanriscatanaran, —ishon nan rafutari ato yoinifo.

*A fu rafuafoqui Jesús niriscatani*

*Mt 28.16-20; Mr 16.14-18; Jn 20.19-23*

<sup>36</sup> Nan yoiriaifo muran Jesús afanan atoquei niriscatani. Ascashon ato yoini, —Maton ointi unimacain isharacoincahuun, —ato huani.

<sup>37</sup> Ascaino —Yoshiran, —icashon shinannifo. Fasi mustairitan ratucoinnifo.

<sup>38</sup> Ascaifoan Jesús ato yoini, —¿Ahuuscai man ratuain? ¿Ahuuscai maton nomuran man icoinra huaimamun? <sup>39-40</sup> Ua oincahuun. Uhuun mucun yafi uhuun tau oincoincahuun. Pirico tohua. Nan uncoinnifoquin. Yoshincai ua cuscara namiyacain shaoyamainquin. Man manfin oincain shao yacain un nami yaran, —ishon ato yoini. Ato yoiquin asca huatan ahuun mucun tohua yafi ahuun tau ato ismani. <sup>41</sup> Ascaiton oincquin ato nomuran shinannifo, —Namaparaca non oincatin, —ishon shinannifo. Icoinra huacuatama fasi aqi unimacoinnifo. Ascaiton nan iconcainran huacaicainonfo ato tushu yocani.

<sup>42</sup> Ascaiton shiman shoi inannifo. <sup>43</sup> Ascano aton ointaifi pini.

<sup>44</sup> Ascashon afanan ato yoini, —Munfin mato yoiyomisiquin. Uhu-  
unoa Moisés non Diosin tsain yoimisifoan non fanainti uhuunoa cu-  
nunifo cuscan nansacoinfin un aiquin, —ishon Jesús ato yoini.

<sup>45</sup> Ahuun shinanpan aton nomuran nanumana aqui cununifo cuscan  
tapisharanonfo. <sup>46-47</sup> Ato yoini, —Diospan tsain cununi isca huaquin,  
“Cristo nan Diosin catoan naafiashu afanan osha rafu non fusti finon-  
tan funishquin.” Ascacun uhuunshon ato yoifoanfafahtacahuun aton  
chaca shatucashon shinansharaifoan un ato chaca soashonon. Jerusalén  
ano ato yoiqi tau huatacahuun. Ascashon nan manifoati ato yoifoan-  
fafaishcaquin.

<sup>48</sup> Ascashon un mato yoiaiton man oian cuscan yafi man nica cus-  
can futsafori yoipacushacahuun. <sup>49</sup> Ascafia nuno Jerusalén ano oiny-  
ocaquin. Upa Diosin yoiyotiani cuscan un ahuun Yoshin Shara matoqui  
nichishqui. Ascano matoqui nocoshon ahun curush mato inain. Nan-  
tian un mato yonoa cuscan man futsafo uhuunoa ato yoitiro, —ishon  
Jesús yoini.

*Jesús nai muran cani cuscan*

*Mr 16.19-20*

<sup>50</sup> Ascashon Jesús Jerusalén anoshon Betania pasoato ato iyoni. Be-  
tania pasoato nococashon Jesús mushainacahuan yoini, —Upa Diosin,  
fasi uhuunshon tapimisifo cushusharapacuhuun, <sup>51</sup> —huatan atom-  
aquinoashu Jesús nuinacahuan Apa Dios icano ari cani. <sup>52</sup> Ascaino  
nanno amaquinoashu naso furanifo. Yoinifo, —Jesús, min nocon Ifo fasi  
sharacoin. Non minhuun noiran, —ishon yoinifo. Yoicatan Jerusalén  
ano naso furancatan fasi unimacoinnifo. <sup>53</sup> Dios fu tsainti pushu muran-  
shon Dios yoisharariapaonifo. Nanti.

## Juan Jesushuunoa Cununi

### *Jesucristohuunoa Juanpan cununi*

<sup>1-2</sup> Natian Jesucristohuunoa un mato yoicain man tapinon. Ahuashta oniataima Cristo Apa Dios fu iyopaoni. Arifi Diosin. Apa Diosin shinain cuscari arifi shinanmisiquin. Nannori fusti ahuun tsain. <sup>3</sup> Ahuunshon Upa Diosin nantifi onihuaniquin. Cristohuunoomacai ahuashta onihuanima. Arusu fusti Apa futan nantifi onihuaniquin. <sup>4</sup> Ahuunshon fusti yora nitirofoquin. Aafin chashamati cuscaraquin. Upa Diosin ahuu cuscaramainquin arus fusti yorafo oinmatiro. <sup>5</sup> Faquish muran chashamatinin noco oinmasharatiro. Nanscarifiai yora chacafo murannoari Cristo noco oinmatiro non Dios tanasharanon. Nan chacafoancai Cristo unumatiroma.

<sup>6-7</sup> Ascano Upa Diosin Juan nichini Jesucristohuunoa yorafo yoinon. — Jesushuunoaahu yorafo Dios fu ipatiro. Upa Diosin mato tapimapaiyai cuscan Jesushuunshon mato tapimatiroran, —ishon Juanpan ato yoini. Nannori ato yoini icoinra huanonfo. <sup>8</sup> Juanpacai yorafo Dios ya imapacutiroma. Diosifin man Juan nichiniquin ato yoinon. —Jesucristo fustichifin noco Dios ya imapacutiroquin, —ishon ato yoinon. <sup>9</sup> Yoiyoni cuscan atoqui noconi. Criston iconquin Dioshuunoa tapimatiro. Diosin nantifi yorafoti imapaiyai cuscan ato tapimamisi.

<sup>10</sup> Nanton mai yafi yorafoti onihuafricanicucai atoqui nocoaiton tsoan onannifoma. <sup>11</sup> Ahuun mai ano nocofiaitocai ahuun yora Israelifoan oinpainifoma. <sup>12</sup> Asca huafainfoanno, nan noiaifoan icoinra huanifo. Ascaiton ato yoini isca huaquin, —Man ua icoinra huaashu Upa Diosin Facu man itiroran, —ishon ato yoini. <sup>13</sup> Yorafoancai Diosin Facu huatirofoma Diospan Facu inon. Ascashon tsoancai yoiqi isca huatiroma, —Uhuun ahuin un facu nanumatiro. Caianshu Diospan Facu inon, —ishoncai tsoan anori yoitiroma. Diosin fustiton ahuun facufo cainmatiro. Noncai asca huatiroma. Upan Diosin apaiyai cuscan Jesús icoinra huafoti aton nomuran fiananantiro ahuun facufo ishcaquin.

<sup>14</sup> Ascan Criston Apa Dios icanoashu mai ano oni yoracoin ishquin. Nocoashu no fu iyopaoni. Nantifi yorafo noimisi. Nocoahuun ramapaicoin. Ahuun tsain iconcain. Arusu fustifin Upa Diosin facucoinqin. Apa Dios shara imisi cuscan arifi nanscacoimisiquin. Man non oinpaoni. <sup>15</sup> Ahuunoa Juanpan yoini isca huani, —Ua nicacahuun. Nanhuunoa un mato yoimisisiquin. Un mato Diospan tsainhuunoa yoiyofiamisi natian aficoin man matoqui noco. Un mato yoimisi cuscan nanfin Diospan facu oinquin. Unmaquian. Un caiantaima Apa Dios fu iyopaoniquin. Ascan ua fasi finoncoian, —ishon Juanpan ato yoiniquin.

<sup>16</sup> Jesús nantifi noco shara huamisisiquin. Nocoahuun noiquin noco shara huafafaini. Nantififain man non mumisisiquin. <sup>17</sup> Upa Diosin noco yonopaiyai cuscan Moisés nocon shunifo yoiniquin. Ascaiton ahuunshon norifi non tapitiroquin. Moisés nanfo noco tapimafiaino Jesucristo nocoqui oni nocoahuun ramapaicain aafin iconmisisicoinqin noco ismapaoni. <sup>18</sup> Tsoancai Upa Dios oinmisima. Ascfia ahuun Facu fu rafumisiton ahuunoa noco yoimisisiquin. Ahuunshon non tapitiro ahuu cuscaramain Upa Diosiquin.

*Juanpan yorafo unu muran iquimapacumisiton Jesucristohuunoo ato yoiniquin*

*Mt 3.11-12; Mr 1.7-8; Lc 3.15-17*

<sup>19</sup> Ascano nocon caifo Israeli niaiffoan Jerusalén anoshon nan nocon yorafohuunshon Dios cufimisifo non ato fu niaifo patasharinoafu Juan icano nichinifo. —Juan yocatacahuun, “¿Min tsoamun?” ishon yocatacahuun, —ato huaafo focashon. <sup>20</sup> Juan yocaifoanno pusitama shafacafi ato cumani, —Uncai Diospan Furunma. Unricai Cristoma, —huaiton.

<sup>21</sup> —¿Ascan min tsoamun? ¿Minmun Elías? —huaiffoan. —Ma. Uncai Eliasma, —huaiton. —¿Ascan minmun Diosin tsain yoimisi nan nocoqui oiran Moisés noco huamisi? ¿Nan non manamisi minmun? —huaiffoan. —Ma. Unmafinquin, —huaiton.

<sup>22</sup> —¿Ascan min tsoamun? Noco yoihuu noco nichiafo non ato tapimanon. Mihuunoo noco tapimahuun, —huaiffoan.

<sup>23</sup> Isaias cununi cuscan nannoricoin Juanpan ato yoini isca huaquin, —Diosin mato yoipaiyai cuscan ua tapimana un mato yoinon. Tsoan istaipamashon un oi ashcafinin yoimisi isca huaquin, “Nocon Ifo nocoqui oshquiquin. Nocoataima itisharacahuun. Man ipaoni cuscan afanan ayamacahuun. Nantifi maton chaca potacahuun. Cayacafi isharashcaquin,” —ishon ato yoini.

<sup>24-25</sup> Nicacashon nocon caifo Fariseofoan ato Juanqui nichinifo yocanonfo, —¿Min Cristo iyamacain, min Elías iyamacain nan non manamisi Diosin tsain yoimiscái min ahuuscashocon min yorafo unu muran iquimapacuamun? —ishon yocaiffoan.

<sup>26</sup> Ascaiton Juanpan ato cumaquin, —Unfin ato unu muran iquimapacuaquin. Ascafiano nuno noco muran futsan nocoa. Mancai onanma. <sup>27</sup> Un natian mato Diosin tsain yoifafaini. Ascafia afincoin chipo mato yoishquin. Fasi ua finoncoian. Un ahuara shara huaa rafanancai un ahuun oinmatima. Uhuun ramapaiyamainocai un ahuun oinmaticuamaran, —ishon Juanpan ato cumani.

<sup>28</sup> Nan pushurasi Betania unu Jordán oquirishtashon Juanpan nanoshon ato unu muran iquimapacuni. Nannoashuri atofu tsainni.

*Jesufin Diospan Chashoan Facu cuscaraquin*

<sup>29</sup> Ascatan iyoiconaino Juanpan Jesús aqúi oaiton oinni. Ascanshon yorafo yoini isca huaquin, —¡Oincapon! Nan Diospan Chashoan Cahuashara cuscaracoin oi. Nanton nantifi yorafo nan icoinra huafotisi aton chaca soashonpacunaca. <sup>30</sup> Un mato ahuunoo yoimisi cuscan, un mato yoiqúi anaitiano nocofunu shara matoqui nocoi. Un caiantaima iyomisi. Ascan ua fasi finoncoian. <sup>31</sup> Unrifi un onansharayamafishon un yorafo unu muran iquimapacuaquin a nocon caifo Israeliffoan a onanonfo, —ishon Juanpan ato yoiniquin.

<sup>32</sup> Jesushuunoo Juanpan ato yoini isca huaquin, —Diospan Yoshin Shara nai murannoashu ruhui cuscara Jesusquí fotopacucahuanaiton. Ufficoín un oian. <sup>33</sup> Un onantaima Upa Diosin ua yoia isca huaquin, “Tsoan ua icoinra huaifo min unu muran iquimapacutiro. Futsa miqúi oaino uhuun Yoshin Shara nan nocofunuhuun nuupacucahuashquin. A fu nitushquin. Nan oinquín min tapitiro uhuun Yoshin Shara matoya rafumashquin ahuun shinanshara maton nomuran shinanmaniran,” ishon ua yoia. Upa Diosin ua anori yoiyamacucai Jesús nan Diospan Furun urifi un onancuanama. <sup>34</sup> Ascafiafashon mun oian. Ascan un mato

iconcain yoiquin nancaifin Diospan Furunquin, —ishon Juanpan ato yoini.

*Jesús icoinra huaquin tau huanifo*

<sup>35</sup> Iyoconaino afanan nanno Juan yafi ahuun tananmisifo rafu. <sup>36</sup> Niafoanno Jesús ato finonfainaiton Juanpan oinquin ato yoini, — ¡Oincapon! Nan Diospan Facu Chashoan Facu cuscara, —ishon ato yoini.

<sup>37</sup> Nicacatan nan rafutan Jesús mufainifo. <sup>38</sup> Ascaiton Jesús ifiacucuhuan ato oinquin yoini. —¿Ahua man funaimun? —ishon ato yocaiton. —¿Tapimamisiton, rani min iquimun? —huaifoan.

<sup>39</sup> —Fucahuun un mato ismanon, —ishon ato yoini. Ascatan afu focaquin oianfo ica ini. Nanno afu yatapacunifo.

<sup>40</sup> Nan rafu Juanpan ato yoia cuscan nicacatan Jesús mufainifo futsan ahuun anu Andrés. Nan Andrés ahuun ochi Simón Pedro. <sup>41</sup> Jesús icano nococatan Andrés samamashta ahuun ochi Simón funai cani. Aquí nocoshon yoini, —Upa Diosin noco yoiyoni, “Un maton Numamisi matoqui nichishquiran,” ishon noco yoiyoni. Nan man non fuchia. Nanfin Cristoquin. Oinyohuu, —huani.

<sup>42</sup> Ascantan foaifoanno Andrés Simón Jesusqui iyoni. Aquí nocoshon Jesús Simón oinquin yoini, —Minfin Simonquin Juanpan facu. Natian un mia anu futsa tuquihuanon. Non mia Cefas huairan, —ishon yoini. Cefas nahua tsainmanfin Pedro.

*Jesús Felipe yafi Natanael cunani afu fononfo*

<sup>43</sup> Ascan iyoconaino Jesús shinanni isca huaquin, —Un Galilea ano cairan, —ishon shinanni. Caquin Felipe fuchitan yoini, —U fu cahuun, —huani. Nicatan afu cani.

<sup>44</sup> Felipe non Andrés non Pedrori pushurasi ahuun anu Betsaida ano inifo. <sup>45</sup> Ascatan Felipen Natanael fuchishon yoini, —Moisés Diosin yononi cuscan cununi isca huaquin, “Un Numamisi matoqui nichishquiran,” ishon Diosin yoini cuscan Moisés aquí cununiquin. Nan-norifi Diosin tsain yoimisi futsafoan yoinifo. Nancai man non fuchiaran. Jesusfin José ahuun facu Nazaret anoquin, —huaiton.

<sup>46</sup> —¿Ahuatomun noco Nazaret ano shara huashotiroquin? —Natanael huaiton. —Ohuu, Oinshquin, —Felipe huani.

<sup>47</sup> Natanael aquí nocoaiton Jesús ahuunoa yoini, —Naafin Israelicoinquin. Diospan yora ipaicoin. Nantofin iconcain shinanfafaimisiquin. Paracai huamisimaran, —ishon Jesús ahuunoa yoini.

<sup>48</sup> Nicatan Natanael cumani, —¿Ahuuscashomun ua oinyamafiamisishaquin min ua onantiroquin? —ishon yocaiton. —Felipe mia cunataima un anoyamafishon ihui huiguera namannoa un mia oian, —Jesús huaiton.

<sup>49</sup> Ascaiton, —Tapimamisiton. Felipe ua yoia cuscan iconcain. Minfin Diospan Furunquin. Nocon caifo Israelifo min nocon niaifoquin, —huaiton.

<sup>50</sup> Jesús cumani, —Min fimi huiguera ihui naman raca. Un ano yamafishon un mia oian. Un anori mia yoiaiton mian icoinra huaa. Min ahua shara finacaia min oinshquin.

<sup>51</sup> Iconcain un mia yoinon. Min Upa Diosin nai muran icano oinshquin. Uhuunoashu Upa Diosin ahuun oinmati afu nai muran icafo mai arishon nai muran Diosin icano funishquin. Ascaiton min oinshquin.



Upa Diosin icanoashuri mai ano fotoaino min ato oinshquiran, —ishon Jesús Natanael yoini.

## 2

*Jesús ahuun tsainmansi unucoin fimi unu onihua*

<sup>1-2</sup> Man osha rafu ano Caná ano Galilea muranshon nocofunun ainfo fiaino yorafo anosi ichanannifo. Jesús non ahua non norifi afu rafumisifori noco yoimanifo. Ascano non cani. <sup>3</sup> Fimi unu man nutsoafono Jesús ahuan yoiquin, —Na focai afanan fimi unu yamafinquin, —huaiton. <sup>4</sup> Ascaiton, —Uhuashtan, funayamahuun. Uhuun yono un ato ismataimacai, —huani. <sup>5</sup> Ascaiton ahuan oinmatifo yoiquin, —Nan mato yonoai cuscan huashocaquin, —huani.

<sup>6</sup> Nanno mai cutimahuan seis funupafo chaimashta tsaonifo. Fasi funupafo bidóntirofo. Treinta galones a muran iquitiro. Nocon caifo Israelifoan aton muchoquimuti anoashu muchoquimui futsunifo. Shinanpaoni, —Non iscain muchoquimuaino Upa Dios nocoqui unimatiroan, —ishon shinanpaonifo. Nocon shunifoan nannori noco yonopaoni.

<sup>7</sup> Ascashon Jesús oinmatifo yonoqui, —Na cutimahuanfo muran unu fospi huacahuun, —huaiton. Fospi huacaquin cufirisacoinnifo. <sup>8</sup> Ascantan Jesús yononi, —Ichananfo cushumisi fuafaintan mumatahuun, —huaiton.

<sup>9</sup> Nicaquin oinmatinin ichananfo cushumisi fuashon inainton muacai unuma. Fimi unucoin ini. Ichananfoan cushumisitocai Jesús aca cuscan onannima. Oinmatifoansi Jesús aca cuscan huaquin onannifo. <sup>10</sup> Ichananfoan cushumisiton Jesús fimi unu onihua onanshoma nan rama ainfo fian cunashon yocani, —Na fimi unufin sharacoinquin. Nan ichananfoti aquifin rufoto shara nutsocashon chipo onanshta ichapama shara amisifo. Ascan huafiainfoan minfin nan sharacai ahuun unutaquin fasi sharacapacoin noco amaiquin, —huani.

<sup>11</sup> Ahuamamishti yora atiroma cuscan huatiroshaquin Jesús nanno nan pushurasi Caná ano tau huaquin noco ismaniquin. Ato ismani aamain Diospan Facucoinshofin ahuunshon ahuamamishti tsoan oinmisima cuscara huatiroquin. Ascano oincashon non afu rafumisifoan man non icoinra huani. —Icoifin Jesús Diospan Facucoinran, —ishon non shinanniquin.

<sup>12</sup> Ascatan Jesús ahua non ahuun ushtofa norifi afu rafumisifo nan pushurasi ahuun anu Capernaum ano non cani. Nanno osha rananyoni.

*Jesús Dios fu tsainti pushu muranshon ahua chacafo potani*

*Mt 21.12-13; Mr 11.15-18; Lc 19.45-46*

<sup>13</sup> Diosin ahuun oinmati afu imisiton nocon shunifoan aton furun iyoafofosi finonmani rutunonma. Faritifi nanfohuunoa shinanpaonifo. Israelifoan noco fusititian. Nan fusiti nocoti chaima Jesús nan pushurasi Jerusalén ano cani. <sup>14</sup> Nannoashu Dios fu tsainti pushu murannoashu moifo non chashoanfo non ruhuinfo ya inanmitsacashon ahuun rafanan pui fishcaquin. Nannori pui fiananan huamisifo tsaonifo.

<sup>15</sup> Ascaiton Jesús ato fuchitan fichi coshatiqui tuchia atoqui sannaino. Chashoanfo non moifo non aton ichonquin futsani. Sapa camaqui aton pui machiafori arasaquin futsani. Sapari cushca huaiacufoan potani. <sup>16</sup> Nan ruhui inanmitsamisifo potashon ato yoini, —Nafa ya Uhuun Upa Diosin pushu murannoashu fotacahuun. Ahuuscaimun uhuun Upa

pushu murannoashu man ahuafo inanmitsaicain ahuun rafanan pui fiishcaquin. Afanan uhuun Upa pushu murannoashu ahuafo inanmitsayamacahuun. Uhuun Upa Diosin ahuun pushuca a murannoashu inanmitsati pushumafinquin, —ishon ato yoini.

<sup>17</sup> Oincatan non afu rafumisifoan non shinanni isca huaquin, —Icon Diosin tsain nannori ahuunoa cununiquin isca huaquin, “Upa Diosin un min pushu cushusharapai a muranshon mia fusti shinanonfo. Ahua futsa a muranshon anonfoma. Ahuara futsacai min pushu murannoa un oinpaimaran,” —ishon cununiquin. <sup>18</sup> Jesús ascaiton Israelifoa nocon niaifoa a yocanifo, —¿Ahuuscain Dios fu tsainti pushu muranshon min ato potamun? Diosin mia yonoaiton ahua tsoan atiroma cuscan noco ismahuu non mia icoinra huanon, —ishon yoiaifoa. <sup>19</sup> —Man na pushu paonhuaca afanan osha rafu non fusti finontan un afanan mapoinnifoanshquin. Ufin ashquin, —ishon Jesús ato cumani.

<sup>20</sup> —¡Cuu! Nocon shunifoa cuarenta seis fari afianifo. ¿Ahuuscashocon osha rafu non fustisi min aquimun? —ishon cumanifo. <sup>21</sup> Ascafiatocai tapinifoma Jesús Dios fu tsainti pushuhuunoacai yoinima. Ahuun cayahuunoa afiri yoimuni. <sup>22</sup> Ascan chipo Jesús naafishu osha rafu non fustitan funiano noco yoiyoni cuscan non shinanni, —Icon Jesús yoini, “Nan pushu paonhuaca unfin shafa rafu non fusti un afanan funimashquicain,” ishon yoini. Nantian man non tapia ahuun cayahuunoa yoiran, —ishon non shinanni. Ascano Diosin tsain cununi cuscan huafain Jesús yoini cuscan non icoinra huani.

### *Jesús nantifi yorafa onancoinni*

<sup>23</sup> Ascan tsoanshta atirofoma cuscan huaquin Jerusalén anoshon Jesús ani. Ascan nanfo oincatan yorahuanrasifoa, —Nan Diospan Facucoiran, —ishon icoinra huanifo. <sup>24</sup> Ascanfiashon afoan shinainfo cuscan Jesús ato onancoinni. Icoinra huaiyamaifoa. <sup>25</sup> Yorafaon aton nomuran shinainfo cuscaai tsoan Jesús yoitiroma. Afincoinmain nantifi onancoiainton. Aton nomuran shinainfo cuscan onancoinni. Icoinra huayofianishaquin tapini samamashta shinan futsaifoa.

## 3

### *Jesús Nicodemo tapimaniquin*

<sup>1</sup> Nan nocofunufin Fariseo iniquin ahuun anu Nicodemo. Nanrifi Israelifoa aton niaifo patashari. <sup>2</sup> Nantori Jesusqui yamu oshon yoini, —Tapimamisiton, non tapiafin Upa Diosin mia nichiniquin min noco tapimanon. Man nonfin tapiaquin tsoan atiroma cuscan min huaiton Dios fu rafuamatocai asca huatiroma cuscafin min huaaquin, —ishon yoini. <sup>3</sup> Ascaiton cumani, —Unfin iconquin mia yoicain. Nocofunu afanan cain futsanyamacai Diosin niaifo ano nocotiromafinquin, —huaiton.

<sup>4</sup> Ascaiton afanan yocaquin, —¿Ahuuscashumun afanan nocofunun cain futsantiroquin? ¿Man anifofishu ahuuscashucon ahuan shaqui muran afanan nanutiromun cain futsashquin? —huaiton.

<sup>5</sup> Ascaiton afanan Jesús cumani, —Unfin iconquin mia yoicain. Yora unu muran iquimamutama ahuun chaca shatutama afanan Diospan Yoshin Sharahuunashuri cain futsanyamashuricai Dios niaifo ari nocotiroma. <sup>6</sup> Futsafin futsa cainmatiroquin ahuunfin canon. Nanscarifi aquin Diospan Yoshin Shara fustiton nocon cainma futsatiroquin. Norifi

non ahuufin canon. <sup>7</sup> Un mia yoiai cuscarifi, cain futsatiroquin, huaiton. “¡Aira! ¿Ahuuscashucon non cain futsatiromun?” iyamahuu. <sup>8</sup> Fuufin nan fopaiyaiquiri fotiuroquin. Fuun nicafiaquicai man tapitiroma raquirishu futanmain raquiri foicain. Nanscarifai yorafo Diospan Yoshin Sharapan ato cainma futsatiro. Ahuuscashomain cainma futsatiroquin tsoancai tapitiroma. Manricai tapitiroma ahuutianmain cainma futsaicain, —huaiton.

<sup>9</sup> —¿Ahuuscashucon ascatiromun? —Nicodemo huaiton. <sup>10</sup> —¿Min Israelifoa tapimamisifishomun na un mia yoiai min tapimacain? <sup>11</sup> Un mia iconquin yoi. Nan un nica cuscan huafain un oian cuscan un mia yoi. Ascafiacai un mato yoia cuscan man icoinra huama. <sup>12</sup> ¿Nuno mai anoa ahuarafo icai cuscan un mia yoiai icoinra huayamashu ahuuscashon Diosin nai muran icariafo un mia yoiaiton min icoinra huatiromun?

<sup>13</sup> Tsoacai nai muran camisima. Urus fustifin un nai murannoashu fotoaquin nocofunucain iquiyoi. Un afanan chipo nasocaincain. <sup>14-15</sup> Nocon caifo Israelifoa tsoan istaipamashon chaca huapaonifo. Ascaiton oinquin Diosin rono paupan atoqui nichini ato nasanon. Ascanori Moisés Diosin yononi ihuiqui rono ointsa huashon yayomashon nimainifoanni a oincanashu cayanonfo. Nanscarifi aquin uarifi ihui coyanaquin nimainifoanshanquin nan ua icoinra huafo uhuunoashu Dios fu isharapacunonfo.

*Upa Diosin nantifi yorahuun fasi noiquin*

<sup>16</sup> Unfin Upa Diosin Facu fustiquin. Ascafiashu nantifi yorafohuun fasi noiquin ua nichini atohuunoashu un nanon. Nan ua icoinra huafoti omitsiscapatamarocon Upa Dios fu ipasharanonfo. <sup>17</sup> Ua mai ano nichini un ato onaintimatama un aton chaca soashonon uhuunoashu nipanonfo. <sup>18</sup> Ua icoinra huafocai Upa Diosin ato omitsiscamapacunacama. Ascan tsoan ua icoinra huayamacun Upa Diosin ato onaintimai yoiyoni cuscan. Unfin Upa Diospan Facu fustiquin. Tsoan ua icoinra huayamashucai omitsiscain unupacunacama. <sup>19</sup> Isca huaquin mato tapimai. Shafa yafi faquishcai ositiroma. Nanscarifai unfin Diospan Facu sharaquin. Ahua chacacai ufu itiroma. Upa Diosin ua nichini nan maitio shafa cuscara un imanon chaca shatunonfo. Ascafiacai yorafoan aton chaca potacasmacanifin uqui fucasmacani isharashcaquin. Ascacun Upa Diosin ato onaintimai. Aton chaca noicanicai uqui fupaicanima chaca shatucanashu isharashcaquin. <sup>20</sup> Faquish noiquicai tsoa shafa oinpaitiroma. Nanscarifi aquin chaca noicanicai uqui fupaicanima. Uqui ranocani uqui oshon chaca huaifo cuscan tapicasmacani. Chaca huaifo cuscan ato oinmacasmacani. <sup>21</sup> Tsoa icoinsharapaiyafifin uqui fucaniquin Upa Diosin ato amapaiyai cuscan aquifin futsafoti oinmacaniquin, —ishon Jesús yoini.

*Juanpan nan yorafo unu muran iquimapacumisiton Jesushuunoa ato yoini*

<sup>22</sup> Ascatan chipofin Jesús yafi afu rafumisifo Judea mai ano non cani. Nanno atofu iyonni. Nannori aton chaca shatupaiyaifoan non ato unu muran iquimapacuniquin. <sup>23-24</sup> Juan cunu muran iquimanataifoma arifi futsafo unu muran iquimapacuniquin. Nan Enón pushurasi chaimashtari Salim ini. Ano unu noa sharacoin. Anoshon ato unu muran iquimapacuni. Nanno furi furiaifoan ato unu muran iquimapacuni. <sup>25</sup> Nantianri Juanpan tanamisifo ya nocofunu nocon caifo futsa

fu fochishmanantanannifo. Ahuuscashucaimun unu muran iquimamutiroquin icashu fochishmanantanannifo.

<sup>26</sup> Ascatan Juan ano fonifo. Nococashon yoinifo, —Tapimamisiton, non mia tapimapai. Unu Jordán oquirishon min na nocofunu Jesusqui nocotan, “Nan Diospan Facu. Nocoqui nocoaran,” ishon min yoita. Arifi natian yorafo unu muran iquimapacui. Nantifi yora aqui focaniran, —inifo.

<sup>27</sup> Nicaquin Juanpan ato cumani isca huaquin, —Diosin fustitofin catontiroquin ahuuscain huaicain. <sup>28</sup> Uncai Cristoma. Upa Diosin ua yonoa un Cristohuunoa yorafo tapimanon aton chaca shatunonfo Cristo nocoaiton icoindra huashquin. Nannori un mato yoiaiton man nicamisi. <sup>29</sup> Afanan un mato yoi ua nicacahuun. Man man tapia nocofunun afu rafua yoitiro isca huaquin, “¡Aicho! Na ainfo min ua fuchimana natian un rama fia uhuun ahui inon. Un aqui unimacoinran,” ishon funun yoiaino afu rafuan aqui unimatiro. Nanscarifiai un Cristo yamafiacun futsafoan nan Cristo Jesús nicacoiainfoanno un fasi unimacointiro. <sup>30</sup> Aafin Cristocoinquin. Uncai Cristoma. Ascan afanan un yoiqui chahuaima ua tanatama Cristo fusti shinacoinonfo.

#### *Nan Upa Dios icariashu oai*

<sup>31</sup> Criston Dios icariashu mai ano fotoni. Nantonfin tsoamamishti finoanquin. Un na mai anoashu caiantonfin na mai anoa ahuu cuscarainquin un tapiaquin. Nan fustihuunoasi un yoitiroquin. <sup>32</sup> Ascfia Jesús oinmisi cuscan nicamisi cuscan noco yoifiaiton fustirasiton icoindra huaafo. <sup>33</sup> Ascfia tsoan ahuan tsain icoindra huacashofin nanfoanfin tapitirofoquin Diosin tsain fasi iconcoin. <sup>34</sup> Upa Diosin ahuan Yoshin Shara Jesusqui nichini afu rafupacunon. Nantifi ahuan curushu inanni. Diosin yoia cuscan nantifi nocori tapimani. <sup>35</sup> Upa Diosin ahuan Furun fasi noicoinquin. Yonoa nantifi nai murannoa yafi mai anofoan aton ifo inon.

<sup>36</sup> Ascan tsoan Diospan Facu icoindra huashu afu ipatiro. Ascantarifi tsoan Diospan Facu icoindra huayamashu Diosin aqui sinaquin omitsiscamapacunaca. Ascan nan Jesús icoindra huafoma naacanashu afu ipatamarocon faquish muran omitsiscapanacaforan, —ishon Juanpan ato yoiniquin.

## 4

#### *Jesús ainfo Samaritanonqui noconi*

<sup>1-3</sup> Ascano isca huaquin yoinonannifo, —Nan Jesús yorahuanrasifoan icoindra huaifoan ato unu muran iquimapacui. Juanpan aca finonmafain iquimapacuiran, —icashu yoinannifo. Nan yorafoan Jesushuunoa yoini cuscan Fariseofoan nicafiacaquin aririma. Jesuscai afincain ato unu muran iquimapacunima. Nonfin afu rafumisifoquin non ato iquimapa-cuni. Nan yorafoan ahunoa yoini cuscan tapiashu no fu Judea anoashu Galilea ano nasoni. <sup>4</sup> Galilea anoashu Samaria mapaicaini.

<sup>5</sup> Ascatan Samaria ano mapaicaini nanno pushurasi ahuan anu Sicar ano non noconi. Nanno chaimashta nan mai nocon shuni Jacob ahuan facu José inanni. <sup>6</sup> Nannori Jacob mai poquini na murannoa unu fishqui. Ascaino fari masafinin racano Jesús arusu nanno noconi. Fasi chai cunoashu oashu atsanacoin. Ascashu nanno tsaoyoni.

<sup>7-8</sup> Non afu rafumisifo nantianri pushurasi ano cashon non tushu fini. Jesús nomifiaquicai ahuacui unu fitiro inima. Ascaino nantianri ainfon Samaritanon shafon nan pozo ano noconi ahuun cuti muran unu fiishquin. Ascan Jesús yocani, —Ua unu inanpun, —huaiton.

<sup>9</sup> Nocon caifo Samaritanon oincasmanifo. Ato futancai piinifoma. Ascan nan ainfoan cumani, —Minfin Israelifoquin. Unfin Samaritanon-quin. ¿Ascaino ahuuscain mian unu yocaimun? —huaiton.

<sup>10</sup> —Diosin mia inanpaiyai cuscan onanfain tapishonfin min ua unu yocacuanaquin. Na unun mia nimapacutiro, —Jesús huaiton.

<sup>11</sup> —Min cuti yafi rusfi yamai. Na pozo fasi noacoin. ¿Ascainon ahuuscashomun min na unun yora nimapacutiro min fitiroquin? <sup>12</sup> Nocon shuni Jacob pozo non a murannoa unu finon. Arifi nan unu ayani. Ascaino ahuun facufoanri ayani. Ahuun inaforti ayamani. ¿Min nocon shuni Jacob finoanmun? —huaiton.

<sup>13</sup> —Tsoan na pozo murannoa unu ayafishu chipo afanan nomitiro. <sup>14</sup> Ascafia tsoan na unu un ato ayamacai afanan nomipacunacama. Iconcoina unu un inanquin a muran unu tsoi shara fuchoi cafiscái. Ayashu nan unuhuunoashu ipasharacointiro, —huaiton.

<sup>15</sup> —Min nocofunu shara. Na unu shara ua inanhuun un afanan nomipacunonma un afanan nuno unu fiyononma —huaiton.

<sup>16</sup> —Min funu ihuitahuun afanan nasoshquin, —huaiton.

<sup>17</sup> —Uncai funuyamafinquin, —huaiton.

—Icon mincai funu fustiyama. Minfin funu rananyaquin. <sup>18</sup> Min funu mucu fustiti mia fimisifo. Natian min futsa fu ica. Min funucoinma fu. Icon min ua yoia, —huaiton.

<sup>19</sup> —Natian un tapia min Diosin tsain yoimisi. <sup>20</sup> Nocon shunifoan nuno machi anoshon Dios cufimisi inifo. Ascafiano min caifo Israelifoan yoimisi isca huaquin, “Jerusalén anoshon non Dios cufitiroran,” ishon yoimisifo, —huaiton.

<sup>21</sup> —Un mia yoinon ua icoinra huahuu. Chipó ahuutiaran tsoan afanan shinainma isca huaquin, “¿Ranishomun un Upa Dios cufitiroquin na machi anoshon iyamarai Jerusalén anoshon?” ishon afanan anori shinanshcaquima. <sup>22-24</sup> Non ranishora cufiainocai non chipo ascaran shinainma. Na machi ano iyamarai Jerusalén anocai non ascainocai ahuama. Ahuuscashomain non Dios cuficain, nan Diosin tapipai. ¿Nocon nomuran non Dios cuficoimun? ¿Ahuun Yoshin Sharahuunshon non Dios cuficoimun? Nan Diosin nicacoinpai. Aafin Yoshin Sharaquin. Non Dios cuficoiainton ahuun Yoshin Shara fustiton noco tapimatiro non cufisharanon. Ahuun Yoshin Sharahuunshon non Upa Dios cufi-aiton nanscara Upa Diosin fuchipai.

Ascafiashu manfin Samaritanonfoquin cufipaifiaquicai nocon Upa Dios man tapisharafoma. Asca nonfin Israelifoquin non nocon Upa Dios tapicoian. Man non tapiari nan Numamisi arifi Israeli iishquin, —huaiton.

<sup>25</sup> —Mun tapia Upa Diosin chipo nocofunu nocoqui nichishquin. Aafin chipo nocoquin ooshquin. Ahuun anu futsa Cristo. Afin nocoshon noco nantifi shafacafi tapimashquin, —afanan ainfoan yoini.

<sup>26</sup> —Unfin Cristoquin, —ishon Jesús cumani.

<sup>27</sup> Ascan Jesús ainfo fu tsaincaino non afu rafumisi aqui noconi. Jesús ainfo fu tsaincaiton oin non mustairini. Ascafiashon non yocanima, —¿Ahuuscain min ainfo fu tsainquinmun? —ishoncai non yocanima. —Min ainfo yoia cuscan noco tapimahuu, —ishoncai non anori yoinima.

<sup>28-29</sup> Ascantan nan ainfo ahuun cuti potafainicai ahuun pushurasi ano cani. Nocoshon ahuun yorafoti yoini, —Nocofunun uqui nocoshon un amisi cuscan nantifi ua yoiaquin. Nanraca Cristo. Oin fucapon, —ishon ato yoiniquin. <sup>30</sup> Nicacatan nan pushurasi anoashu Jesusqui funifo.

<sup>31</sup> Nantianri non afu rafumisifoan non yoini, —Tapimamisiton, piyohuu, —non huaino.

<sup>32</sup> —Unfin tushuyaquin. Un tushu ya cuscacai man ahuunoa tapiama, —ishon noco yoini.

<sup>33</sup> Ascaiton nicai non yocanonanni, —¡Aira! ¿Tsoancainco tushu fishoamun? —ishon non yoini.

<sup>34</sup> —Uhuun Upa Diosin ua nichini un ahuun yono ashonon. Afin ua amapaiyai cuscan nantifi un ashoin. Nanfofin uhuun tushu cuscarafoquin. <sup>35</sup> Man yoimisi isca huaquin, “Yono noco mau ano fanafo cuscara oshu rafu non rafuri finontan non chitutiroran,” ishon man yoimisi. Nanscarifiai man shinan raca chipo non yora Dioshuunoa yoitiro a Ifo huaa afu ipashcaquin. Oinyocahuun. Yora ichaparasi natian itisharacani Diosin icoinra huashceni.

<sup>36</sup> Futsan yonshotanfin chitushotiroquin. Nancai mau ifoan inansharatiro. Nanscarifi aquin futsan Diosin tsain icoinra huamano Upa Dios fu ipasharatiro. Nancafin ahuun ointi muran unimasharatiroquin. Upa Diosin a inansharacoinshquin. Icoinra huataima futsan yosiyomisi. Nan yosimisiri ahuun ointi muran unimashquin. Upa Diosin arifi inansharashquin. Ascaiton Diosin tsain yosimisifo yafi icoinra huamamamisifo nanscaracoin rafu. Upa Diosin ato inansharashquin aton ointi muran unimanonfo. <sup>37</sup> Ascano iconcain yoimisifo isca huaquin, “Futsan fanano chipo futsan nan yono chitutiroran,” ishon yoimisifo.

Nanscarifiai futsan Diosin tsain yoiquin tau huano futsanri chipo yoiaino nantocainfin icoinra huamacointiroquin. <sup>38</sup> Mancai mai futsa ano yosiamafaiton un mato nichian nannoa man ato icoinra huamanon. Futsafoan nannoshon fasi curushcain yonoa Diosin tsain ato yosicaquin. Mancai nanno yonoama. Ato yosiqui chai huayamafashon man ato icoinra huama. Futsafoan aton yonohuunshon man ato icoinra huamaran, —ishon Jesús ato yoini.

<sup>39</sup> Ascaino nan ainfon Samaritanon ahuun caifoan pushurasi ano nocoshon ato yoini, —Un imisi cuscan nantifi ua puashoan. Ua oinyamafiamisishaquin ua onancoianran, —ishon ato yoiaiton Jesús icoinra huanifo. <sup>40</sup> Ascano nan ainfoan ato yoiaiton nicacani Jesusqui funifo ahuun tsain nicai fucani. Aqui nocoshon, —No fu nuno iyopun, —huanifo. Ascaiton nicai Jesús atofu osha rafuyoni. <sup>41</sup> Ahuun tsain nicacaquin futsafoan icoinra huanifo.

<sup>42</sup> Ascano icoinra huacashon ainfo isca huanifo, —Min noco yoifi-aitocai non icoinra huama. Noficoin non ahuun tsain nicashon non icoinra huai nanton nantifi yorafo manifoti nocon Numamisiran, —ishon yoinifo.

*Jesús niaifoan ahuun oinmatinin facu cayahuamani*

<sup>43</sup> Ascano nan osha rafu yotan Jesús no fu nan Samaritanonfoan pushurasi anoashu Galilea ano cani. <sup>44</sup> Jesús arifi Galilea anoashu pushconi. Nannoashuri yonopaoni. Ahuun yoraforifi nanno inifo. Ascano Jesús yoini, —Diosin tsain yoisiton ahuun pushurasi ano ahuunoa isca huaquin shinanfo, “Acai tsoamaran,” —ishon shinanfo. <sup>45</sup> Ascatan Galilea ano noconi. Atirifi Galilea ano Jerusalén ano fusititian fonifo. Nannoshon tsoan atiroma cuscan Jesús Diosihuunshon huani. Nantifi Jesús acai cuscan oinnifo. Ascan atoqui nocoano aqui unimanifo. —¡Aicho! Man min oquin, —ishon Galilea anoafaoan yoinifo.

<sup>46</sup> Ascano pushurasi ahuun anu Caná Galilea ano Jesús nasoni. Nanno fari futsan Jesús ahuun tsainmansi unucoinfiacun fimi unu onihuani. Nantianri afanan nanno noconi. Nanno niaifon futsa ica ini. Pushurasi futsan ahuun anu Capernaum ano furun isininni. <sup>47</sup> Ascaiton niaifooan nica Jesús Judea anoashu Galilea muran Caná ano oaiton nicai aqui oshon yoini, —Ifon, uhuun facu isininqui man nai. Uhuun facushta ua oinshoyopun ua cayahuashoshquin, —ishon yoini. <sup>48</sup> —¡Ohuashta! ¿Ahuuscain yoran atiroma cuscan un huaiton man oinfiacaquicai man ua icoinra huaima? —ishon Jesús ato yoini.

<sup>49</sup> Ascan afanan nan niaifooan Jesús yoini, —Ifon, U fu cayoiicapun uhuun facu nanonma, —ishon yoini. <sup>50</sup> Ascaiton Jesús cumani, —Min facu ano catahuu. Min facucai naima. Niifinquin, —ishon Jesús yoini. Jesús yoia cuscan icoinra huafaini cani. <sup>51</sup> Nanscatan caino ahuun oinmatifo aqui nococashon yoinifo, —Min facu man caya. Naima man niaran, —ishon niaifo yoinifo. <sup>52</sup> Ascaiton ato yocani, —¿Ahuutia farimun uhuun facu cayafaitaquin? —ishon ato yocaiton. —Fari masafinin racano ahuun yona matsifaitanran, —huanifo. <sup>53</sup> Yoiaifooan nicatan apan shinanni, —Icon Jesús fari masafinin racano ua yoita, “Min facucai naimafinquin. Niifinquin,” ua huaitaran, —ishon shinanni. Ascano ahuun yorafo yashon nantifiton Jesús icoinra huanifo.

<sup>54</sup> Ascano Jesús Judea anoashu Galilea ano nocoshon afanan tsoan atiroma cuscan ato oinmaniquin. Ato oinmaquin rafu huani.

## 5

### *Jesús nocofunu isininmisi Betzata anoshon cayahuani*

<sup>1</sup> Ascano chipo Jesús Galilea anoashu Jerusalén ano no fu cani nocon caifo Israelifo fu fuusicai. <sup>2</sup> Nanno chashoanfoan aton iquiti cunu ini. Nanno chaimashta ianman facushta ini. Cusumun pushu cahuan sharamishti mucu fustiti tsaocuafo. <sup>3-4</sup> Nannori isinin imisifo ichaparasi racanifo. Fushofo non chatofo non yoratisho quicurushui fut-suafori racanifo.

Ascaino Diospan oinmati afu nai muran icaton nanno ian man facushta ano oi fustirasi ipaoni. Nanno nocoshon Diospan oinmatinin ianman facu fuchomapaoni. Nan ianman facushta fuchoai muran isinin icai futsa iqui tauashu cayapaoni. Ascan nantifi isinin imisifooan man-aifono Diospan oinmatinin ian fuchomanaino ian muran iquitaunon. <sup>5</sup> Ascano Jesús nanno nocotoshiqui oian nocofunu treinta ocho fari isinin itianiquin noconi. Yoratisho quicurushui futsua nipaiqui ranainton fuchini. <sup>6</sup> Futsan Jesús yoishoni na nocofunu treintiocho fari isinin imisiran. Huaiton yocani, —¿Min cayapaimun? —ishon Jesús yocaiton.

7 Nicaquin cumani, —Tsoancai ua ianman facushta muran iquimamisima Diosin nai oinmatinin ian fuchoaino. Un iqui taupaiyaiton ua shutimisiforan, —ishon yoiaiton.

8 Ascaiton Jesús cumani, —Funinaca huahuun. Min oshati ya catashquin, —ishon yononi. 9 Ascaiton nicai funinaca huan ahuun oshati ya cani. Nan sabadoai shafatan yoratishton quicurushui futsua Jesús caya huani. 10 Ascano nocon caifo niaiffoan oian nan nocofunun ahuun oshati foaiton oincaquin yoinifo, —¿Ahuuscain min oshati Sabadoaino min foain? ¿Min tapiamamun nocon shuni Moisés noco yononi non Sabadoaino ahuashta huatiroma? Ascan min oshaticai na Sabadoaino min fotiromaran, —ishon yoinifo.

11 Ascaiton ato cumani, —Na nocofunun ua caya huamashon. Ua isca huaa “Min oshati fotahuun,” ishon ua yonoaran, —ato huaiton.

12 —¿Tsoamun na nocofunuquin anori mia yonoa? —ishon yocanifo.

13 Yoratishto quicurushui futsuatocain tapinima tsoanmain caya huamaquin. Asca huafainicai Jesús samamashta amaquinoashu yorahuan-rasi muran cani. Ascaitocai afanan tsoan oinnima.

14 Man ascano chipo Jesús nan nocofunu caya huama Dios fu tsainti pushu anoa fuchishon yoini, —Shinanhuun. Min afanan isinin iquimaquin. Man min cayasharaquin. Ascan min chaca huamisi cuscan afanan ayamahuu. Min chaca nantifi shatuhuu. Min chaca shatuyamashu ahua chaca finacaia min ahuuscaratiroquin, —ishon Jesús yoini. 15 Ascaiton nicafainicai nan nocofunu Jesusmaquinoashu cani. Caya huamano nocon caifo Israelifoqui chanicai cani.

16 Ascano Jesús sabadoaino yora caya huamana nicacani nocon niaiffo Jesúsqui sinanifo. Sinaquin Jesús fucash huanifo. Aqui tsain chaca huarianifo. 17 Ascaiton Jesús ato yoini. —Uhuun Upa Diosin shafatifi yora shara huafafainmisi. Nanscarifi aqui urifi uhuun Upan acai cuscan un huafafainiran, —ishon ato yoini. 18 Ascano amaquiri shinannifo. Shinanfaquin Jesús yoiti huanifo. —Nocon shuni Moisés yononi cuscan non Sabado ahua huatiroma. Jesús Moisés yononi cuscan aquima. Yoiari Dios ahuun Upacoin. ¡Cuu! Jesús shinanmun afi Upa Dios cuscaracoin. Ascan ahuuscashomain non Jesús ato rutumatiroquin. Non shinanoncahuun, —icashu nocon niaiffoan ahuun yoinannifo.

*Jesusfin Diospan Facuquin. Ascacufin nan yonopaiyai cuscan atiroquin*

19 Nan shinainfo cuscan Jesús onanniquin. Onanshon ato yoini isca huaquin, —Un mato icon yoinon. Ua nicacahuun. Uficai un ahuashta huaima. Uhuun Upa Diosin acai cuscan mun oinmisi. Nanscacoïn urifi un huai. Ahuunshon fusti un aquin. 20 Unfin Diospan Facuquin. Ua noicoian. Afin acai cuscan ua oinmai urifi un anon. Ahuara futsa fasi finacaia chipo ua ismashquin. Ascaiton man oin man mustairishquin. 21 Upa Diosin yora naacoinfiacun funimapaiquifin afanan nimasharatiroquin. Un ahuun Facu. Nanton acai cuscanrifi un huatiroquin.

22-23 Upa Diosin uhuunoa nan yorafoti shinansharamapai unfin ahuun Facuquin. Nanhuunoa yorafoan shinansharamisifo cuscarifi uhuunoari ato shinansharamapai. Ascan Upa Diosin afincai yoima ratocaimain afu ipatiro iyamarai ratofomain faquish muran omitsiscapanacaquin. Ua yononi. “Min yorafoti yoitiro ratofomain ufu nipayamarai faquish muran omitsiscapanacaquin,” ishon ua yononi. Nannori



ua yononi. Upa Diosin nicapai uhuunoa shara yoiainfoan. Ua nichini. Ascan tsoan “Min Diospan Facu Shararan,” ishon ua yoiasmaiton Upa Diosihuunoiari yoisharama.

<sup>24</sup> Un mato iconcoin yoinon. Tsoan uhuun tsain nicasharafain Upa Diosin ua nichini iconra huafin Upa Dios fu ipasharapacunacaquin. Un nan cuscara yora onaintimaima. Afanancai Satanás ahuun yora itiroma. Omitsiscapatamarocon natian afi Upa Diosin ahuun yoracoinquin afu ipashquin. <sup>25</sup> Un ahudara futsa iconcoin mato yoinon. Natian nan naa shinantsain uhuun tsain nicacoianshu ufi Diospan Facu iconra huashu afanan Diosimaquin itamarocon afu nipasharatiro.

<sup>26</sup> Tsoan futsacai Upa Dios nimama. Afi nipamisi. Nanscarifiai Upa Diosin un ahuun Facucun ua yononi cuscan ufin nipamisiquin. Tsoa futsacai ua nimama. <sup>27</sup> Unfin Diospan Facuquin. Ascan ua yoiqui isca huani, “Min yorafoti yoitiro ratofomain ufu nipatiro iyamarai aton chaca shatuashma omitsiscapanacafoquin,” ishon ua yononi.

<sup>28-29</sup> Un mato yoiainfoan cuscan mustairiyamacahuun. Chipa nafoan uhuun oi nicashcani. Nicacani funishquicani. Ratoranfo niyoashu isharamisifo funiashu nipasharashcani. Ascanrifiai ratoranfoan niyocashon chaca huamisifo funiashuri omitsiscapashcani.

### *Jeshuunoa yoimisi*

<sup>30</sup> Urus fusticai un apaiyai cuscan un shinainma. Upa Diosin nanton ua nichini. Ascan afi ua amapaiyai cuscan un huapai. Ascafiacai ucai urus fusti un ahudara huatiroma. Upan Diosin ua tapimana cuscan un nicaquin un yorafo yoitiro. Nantifi onancoianquin. Ascan ua tapimana cuscan un cayacaficoin yorafoti yoitiro ahuu cuscarafomainquin. Urus fusticai un apaiyai cuscan un shinainma. Uhuun Upa Diosin ua nichini afi amapaiyai cuscan ua huamashquin.

<sup>31-33</sup> Ufficoin uhuunoa un yoisharaitocai tsoan nicasharapaima. Ascafiacai aririma. Urus fusticai uhuunoa un yoimisima. Juanpan arifi uhuunoa yoisharamisiquin. Manfin Juanqui yorafo nichiaquin. Nanton uhuunoa icon fusti yoisharamisi. Un Cristocun nanton mato tapimana. Futsanrifi uhuunoa yoisharamisi. Nan Upa Diosiri uhuunoa yoisharamisi. Nan uhuunoa yoimisi cuscan iconcoin mun tapia.

<sup>34-36</sup> Juanpan uhuunoa iconcoin yoifiamisi unfin tsoan atiroma cuscan un huaiton man man oinmisiquin. Tsoan uhuunoa yoiamaiton oinquin nanfohuunoa man tapitiro un mato iconcoin yoimisi. Ascafia Juanpan uhuunoa yoimisi cuscan un afanan mato shinanmai maton chaca man shatunon omitsiscapatamarocon Upa Dios fu ipasharashquin. Juan nocofunu fasi sharacoin. Ahuunshon Diosin mato yoipaiyai cuscan nanton mato tapimayoni. Chashamatinin man chashashon man faquish muran fai ointiro casharashquin.

Nanscarifiaquin Juanpan mato tapimana ahuuscashomain man chaca shatuashu Dios fu ipatiroquin. Mato yoimisi cuscan man shinanquin isca huai, “¡Aicho! Juanpan noco cayacafi Diosin tsain yoiaiton. Non nicasharanon,” ishon man anori shinanyomisi. Juanpan uhuunoa yoimisi iconflashu uhuun Upa Diosin Juan finoncoian. Afincuin ua yonoa. Uhuun Upa ua nichini ua amapaiyai cuscan un anon. Ua amapaiyai cuscan cuyocointan un unutiro. Natianri ua yonoa cuscan un aaquin. Ascan un acai cuscan oinquin man tapitiro Upa Diosin ua

nichini ahuunshon un yononon. <sup>37</sup> Upa Diosin matoqui ua nichini arifi uhuunoa yoimisi. Mancai Upa Diosin ahuun oi nicayamafain man oinmisima. <sup>38</sup> Diosin ua nichifianicucai man ua icoinra huaima. Ascan ahuun tsaincai maton nomuran man nanumisima.

<sup>39-40</sup> Man Diosin tsain fasi oinfafainmisishaquin man Dios fu nipatiro-ran ishon man shinanmisiquin. Anori man shinanfiaquicai Diospan tsain uhuunoa cunufiacashon mancai uqui fupaicanima un mato nimapacunon.

<sup>41-42</sup> Un mato onancoian. Mancai maton nomuran man Upa Dios noima. Ascacun man uhuunoa shinansharai iyamarai man uhuunoa shinain chacafainocai un shinainma. <sup>43</sup> Uhuun Upa Diosin ua matoqui nichini ahuu cuscaramainquin uhuun Upa uhuunshon man onancoion. Ua matoqui nichifiani mancai ua icoinra huatamarocon ua oincasmacani. Uacairocon icoinra huatama futsan matoqui oshon mato parapaifiaiton nancaifin man icoinra huashquiquin, “Unfin Cristoquin,” icaiton nancai man icoinra huai. Upa Diosin nichiamafiacun nancaifin man icoinra huashquin. <sup>44</sup> Mafi ranan futsan tsain sharasi man nicapai. Asca Upa Diosin matohuunoa yoipaiyai cusacai man shinainma. Ascacufin Upa Diosin ua nichini mancai icoinra huamisima.

<sup>45</sup> Man ua icoinra huayamafiacun uhuun Upa Dios ointaifi un mato puashoshquin. Man shinanmisi isca huaquin, “Moisés tsain nicashu non Upa Dios fu nipatiro-ran,” ishon. Man anori yoifiaino Moisés aficoin matohuunoa Upa Dios yoishquin isca huaquin, “Nafaoan uhuun tsain icoinra huamisifomaran,” ishon matohuunoa yoishquin. <sup>46</sup> Moisés uhuunoa cununi cuscan icoinra huashon ahuun tsainri man icoinra huacuanquin. Uarifi man icoinra huacuanquin. <sup>47</sup> Ascafiahocai Moisés cununi cuscan man icoinra huama. Asca un mato yoia cuscaricai man icoinra huamaran, —ishon Jesús nocon niaifofa yoini.

## 6

*Jesús cinco mil nocofunifo ahuun tsainmansi ato pimani*

*Mt 14.13-21; Mr 6.30-44; Lc 9.10-17*

<sup>1-2</sup> Ascano ato yoiquin anaititan Jesús afanan no fu ian ahuun anu Galilea pocufaini cani. Ahuun anu futsa Tiberias. No fu cusumunri noco ano yorahuanrasi aqui funifo. Isinin imisifo aqui fuafoan ahuun tsainmansi ato caya huani. Ato caya huaiton oincani aqui funifo. <sup>3-4</sup> Nocon caifo Israelifoan nocon fusititan Diosin ahuun nai oinmatinin nocon shunifo aton furu iyoafofosi finonmani nanonfoma. Nan shafan nocoti chaima. Nantianri Jesús cusumunri nocoshon nonfin afu rafumisifori machi ano caashu nanno non tsaoyoni.

<sup>5-6</sup> Nanno non tsaono yorahuanrasi funifo. Aqui fuaifoan atoquiri fusoshon Jesús oinni. Ato oinquin shinantani nan yorafo fonicoincani. Ahuuscashomain ato pimaicain affin tapiniquin. Ascashon Feliperifi icoinra huamapaini ahuuscashomain ato pimaicain. Ahuun tsainmansi ahuamamishti atiro tapimapaini. Ascano Jesús Felipe yocani, —¿Raniamun non tushu fiicai na yorahuanrasi pimashquin? —ishon yocaiton.

<sup>7</sup> Nicaquin Felipe cumani, —Ifon, non siete oshu yonoshon pui fiy-onon. Aticai itiromaquin na yorahuanrasi non piimaino, —ishon yoini.

<sup>8-9</sup> Ascano non Jesús fu rafumisifo futsan Andrés nan Pedronun ushton yoini, —Ifon, oinpon. Nuno furonanfacu misi uhuapamashta mucu

fustiti yafi shiman rafuri uhuapamashta. Ascafia nuno yora ichaparasi. Ahuun tushu itiramaran, —ishon yoini.

<sup>10</sup> Ascaino Jesús noco yononi isca huaquin, —Ato yoihuu tsaononfo, —ishon yoini. Nannorifi faasifo ini. Ascaino Jesús ato yoia cuscan faasi camaqui tsaohuacunifo. Cinco mil nocofunufocuana tsaohuacunifo.

<sup>11</sup> Ascano tsaofono Jesús mucu fustiti misi fitan Apa Dios yoiquin isca huani, —¡Aicho! Upan, min ua nicaran, —ishon Apa Diosin yoini. Yoitan misi yafi shiman rafu tucupacutan noco inanni. Anoshon non ato pashcashonpacunon. Ficashon picani maiancoinnifo. <sup>12</sup> Ascano nantifi yorafo maiancoianfono Jesús noco yononi, —Nan misi yafi shiman tushu huafo fitacahuun. Shihuati muran nanutacahuun ahuashta funononma, —ishon noco yoini. <sup>13</sup> Ascaiton nicashon misi yafi shiman tushuafo non fini. Doce shihuati non fospi huani.

<sup>14</sup> Ascan Jesús ahuun tsainmansi shiman rafu non mucu fustiti misi nantifi cinco mil nocofunufu piimaiton oincashon yoinifo, —Iconcoin Jesús Diosin ahuun tsain yoimisi. Nanton Upa Diosin noco yoiyotiani cuscan nancoin nocoqui nichiaran, —icashu yoinannifo. <sup>15</sup> Ascaiton Jesús nan shinainfo cuscan onanshon ahuun nomuran shinanniquin isca huani, —Na yorafoan ua curushcain aton niaifocoin ua imashcaniran, —ishon onanni. Ascatan atomaquinoashu arusu machi ano cani.

### *Jesús ian fumancayan cani*

*Mt 14.22-27; Mr 6.45-52*

<sup>16-17</sup> Ascano man fari caino non afu rafumisifo non afu shashon nanufaini ian pocufaini foi. Pushurasi Capernaum ano non nocopaini. Faquishaino Jesús nocoqui nocoataima. <sup>18</sup> Fuuhuan nocoano ian fuchoquin. <sup>19</sup> Ian mahuan naisti chainhuan nushmancayashon fuchomanhuaquin oquiri cusha futsan noco catima huani. Jesús ian fuman cayan ofiaintocai non onannima. Onantama non mustairicoinni. Ascashu non fasi ratucoinni. <sup>20</sup> Ascaiton, —Unquin. Ratuyamacahuun, —Jesús noco huani. <sup>21</sup> Ascaiton nicaquin, —¡Aicho! Shasho muran nanuyohuun, —non huani. Jesús nanuano samamashta nan non noco-paiyaiquiri ian cusumunri non noconi.

### *Yorafoan Jesús funanifo*

<sup>22</sup> Ascano iyoconaino yorahuanrasifoan nan Jesús ato pimaitafoan shinannifo Jesús arus fusti nituaiton. Oinnifo Jesús no fu shasho muran nanuyamaiton. Tapinifoma arifi chipo yamu nocoqui noconi. Nantianri shasho fustiton non afu rafumisifo non foni. Ahuuscashucon Jesús caimun ishon shinannifo. <sup>23</sup> Nantianri Tiberias chaimanoashu shashorasi muran fuafo. Nan Jesús yorahuanrasi pimaita anoashu funifo. <sup>24</sup> Ascan nan yorahuanrasifoan Jesús norifi non afu rafumisianoma tapicanashu shasho muran nanuinfoancatan Capernaum ano Jesús funai fonifo.

—*Unfi tushu cuscaraquin. Urus fustifin un yora nimapacutiroquin, —ishon Jesús ato yosiniquin*

<sup>25</sup> Fuchicashon yoinifo, —¿Tapimamisiton, ahutiancon min nuno no-coamun? —ishon yocanifo.

<sup>26</sup> Ascaiton ato cumani, —Iconcoin un mato yoi. Tsoan atiroma cuscan un mato ismafiaiton mancai afohuuñoa shinainma. Ascacuai man ua funaima. Uaricai man icoinra huataima. Nan un mato tushu pimafaita

nantifi man mayancointan. Ascano man afanan ua funai fua un mato pimanon. <sup>27</sup> Shinancapon. Manfin tushuhuunoasi shinanfainicain. Nan tushu chacanatiro manmain cuyoifin. Ascan nan cuscara tushu fusti fuchipaiquimarocon nan cuscara futsafin unquin. Unfin Diospan Facuquin, un mato inantiro nancai fuchipaicahuun. Nan cuscara cuyopacunacama. Nan piashu man nipasharatiro. Uhuun Upa Diosin ua catoanshu uqui unimamisi. Matoquirifi ua nichini na tushu cuscara un mato inanon, —ishon ato yoiaiton.

<sup>28</sup> Nicacaquin yoinifo, —¿Ahuuscashomain norifi non yonoshotiroquin Upa Diosin nocoqui unimanon? —ishon yocaifoan. <sup>29</sup>—Upa Diosin ua matoqui nichini. Ascan man Upa Diosin unimamapaiquin ua icoinra huacahuun, —ato huaiton.

<sup>30-31</sup> Diosin tsain cununi isca huaquin, —Tsoa futsan atiroma cuscan huafain Moisés ato tushu fariña cuscara fatan shara ato pimani. Nan tushu shafatifi nai murannoashu pacupaoni. Nan tushu ahuun anu nocon tsainman manán. Nanfo nocon shunifoan tsoa istaipamashon piinifo. Ascan mirifi tsoan atiroma cuscan noco ahuamamishti ismahuun Upa Diosin mia nichini non mia icoinra huanon, —huaifoan.

<sup>32</sup>—Un mato iconquin yoi man tapinon. Moiséscai nan tushu ahuun anu manán nocon shunifo inannima. Upa Diosin nai muranshon tushu ato niriashoni picanashu niisharanonfo. Ascan natian Upa Diosin ahuun tushucoi nai muranshon mato inanpai. <sup>33</sup>Nocofunu Upa Diosin nai muranshon mai ano nichini manifotifi ato nimapacunon. Nanfin tushucoinquin, —huaiton.

<sup>34</sup>—Ifon, nan tushu noco inanfafainpun, —huaifoan.

<sup>35</sup> Ascaiton Jesús ato cumaquin, —Unfin nan tushucoinquin. Tsoan fonicoi cafiscái ua onancoinpaiquin ua tanaino aton nomuran fucash-tamarocon isharapacunaca. Nanscarifiai tsoan nomicoin cuscara ua fasi fuchipaitan ua icoinra huacun un ato nimapacunaca. Acai afanan funopacunacama. Isharapacunaca. <sup>36</sup> Ascafia un mato yoia cuscan ua oinfashocai man ua icoinra huaima. <sup>37</sup>Nan ratoranfo uhuun Upa Diosin uqui nichiafin uqui fucaniquin. Ascan nanfofin un ato cushusharapacunacaquin. Un ato potapacunacama.

<sup>38-39</sup> Uhuun Upa Diosin ua isca huaniquin, “Tsoan un mia ya imapaiyai mifu ishqui funopacunacama. Nan mia icoinra huafo namisifo min afanan nai ariashu mai ano fotoaino funishcani no fu ipashquin. Nanscara un fuchipairan,” ishon Upan Diosin ua yoini. Ascan ufcái un apaiyai cuscan un huaima. Un mai ano fotoni Upa Diosin ua amapaiyai cuscan huashquin. <sup>40</sup> Nan ratoranfoan un Diospan facun ua icoinra huaashufin no fu Upa Dios icari ipasharatiroquin. Un afanan mai ano oaitian a namisifo un ato funimashquin ufu nipasharanonfo. Ascarafin uhuun Upa Dios fuchipaiquin, —ishon Jesús ato yoini.

<sup>41-42</sup>—Unfin tushu cuscara un nai murannoashu oniquin. Un yora imapacushquin, —ishon yoini. Ascaiton nocon caifo Israelifoan nicafiacashocai icoinra huanifoma. Jesusqui tsain chipunifo. —¡Cuu! ¡Nica-capon! Aafin Jesusquin. Apa José ahuari non oinmisi. Ascan acai ahuama. Galilea anoashufin cainniquin. Ascanfiashon, “Un nai murannoashu Diosin icariashu fotoaran,” noco huaiquin. Tsoancai na tsain icoinra huatiroma, —ishon yoinifo.

<sup>43</sup> Ascaiffoan Jesús aton nomuran shinainfo cuscan onanshon ato yoini, —Uqui tsain chipuyamacahuun. <sup>44</sup> Icon Upa Diosin ua nichini. Ascanfiacai tsoan Upa Diosin aton nomuran shinanmayamainocai ua icoinra huatirofoma. Ascan un afanan nai murannoashu mai ano nasoaitian ua icoinra huafoti un funimashquin Upa Dios fu ipanonfo. <sup>45</sup> Diospan tsain yoimisiton ahuun tsain cununi isca huaquin, “Upa Diosin afincoin yorafo ato tapimashquiran,” ishon cununi. Ratoranfoan Upa Dios nicaiffoanfin ahuunshon tapicaniquin. Upa Dios nicacashonri uarifi icoinra huashcaniquin. <sup>46</sup> Tsoancai Upa Dios oinmisima. Urus fustifin un Upa Dios oinmisiquin. Nanton ua nichini. <sup>47</sup> Unfin mato iconcoin yoicain. Tsoan ua icoinra huai Upa Dios fu nipashquin. <sup>48</sup> Unfin nan tushu cuscara. Ua icoinra huafoti un ato nimapacushquin.

<sup>49</sup> Nocon shunifo Moisés fu tsoan istaipama ipaonifo. Nan tushu ahuun anu manán fipaonifo pishcaquin. Pifiapaonishacaquin fari futsa nai cuyonifo. <sup>50-51</sup> Ascafia un nai murannoashu Uhuun Upa Diosin icariashu un oni. Unfin na tushucoinquin. Tsoan ua icoinra huashu nipanaca. Nan tushu ahuun anu manán nai murannoashu pacua nocon shunifoan pifianicai ato nimapacumisima. Nantian Upa Diosin afanan tushu nai muranshon mai ano fotomani. Nan tushu piashu yora nipatiro. Unfin nan tushuquin. Un nantifi yora manifoti ano ato nashoshquin nipasharanonfo, —ishon Jesús ato yoini.

<sup>52</sup> Ascaiton nicacani nocon caifo Israelifo fochishmanantanannifo. —¿Ahuuscashomun na nocofunun ahuun nami noco inantiroquin non pinon? —icashu yoinannifo.

<sup>53</sup> Jesús ato yoini, —Iconcoin un mato yoi. Unfin Diospan facuquin. Man uhuun nami piyamafain uhuun imi ayayamashu man nipatiroma. <sup>54</sup> Ratoranfoan uhuun nami pifain uhuun imi ayafain ufu nipashcaniquin. Ascan un afanan nai murannoashu oaitian un ato funimashquin Upa Dios icari nipasharanonfo. <sup>55</sup> Uhuun nami tushucoin yafi uhuun imi ayaticoin. <sup>56</sup> Ratoranfoan uhuun nami pifain uhuun imi ayai ufu rafupacunaca.

<sup>57</sup> Nan uhuun Upa nipanacaton ua nichini. Urifi ahuunoashu un nipanon. Ascano tsoan ufu rafucacaini uhuunoashu ipasharatiroquin. <sup>58</sup> Afanan un mato yoi. Nocon shunifoan nan tushu ahuun anu manán piinifo. Nan pifiapaonishacaquin nai cuyonifo. Ascan Upa Dios ariashu un matoqui oni. Unfin ahuun tushucoinquin. Tsoan ua piashucaini nanacama. Uhuunoashu nipasharatiroquin, —ishon Jesús ato yoini. <sup>59</sup> Nocon caifo Israelifoan nocon ichananti pushu muranshon ahuun anu Capernaum anoshon nan tsain noco yosini.

### *Jesushuunoashu yora nipatiro*

<sup>60</sup> Atirifi tanamisiffoan yoini, —¡Ohua! Jesús noco yoia cuscaicai tsoan tapitiroma. Noncai na cuscara tsain nicapaitiromaran, —ishon yoinifo.

<sup>61-62</sup> Ascaiton Jesús onanni rama noco yoia cuscan atirifi a tanamisifo nicacasmaiton. Ascan noco yoini, —¿Un rama mato yoia cuscan man nicapaimamun? ¿Afanan man ua icoinra huaimamun? ¿Nan nicai man umaqui ipaiquin raquiri man shinanshquimun ua afanan oinquin un nai muran Upa Dios icari un funicainaiton? <sup>63</sup> Diospan Yoshin Shara fustiton yora nimapacutiro. Mafiricai man nimapacutiro. Uhuun tsainri Diospan Yoshin Sharahuunshon un mato yoimisi. Ascacufin

uhuun tsain icoinra huashu man ufu nipatiroquin. <sup>64</sup> Ascafia man fut-sacai ua icoinra huaimaran, —ishon Jesús noco yoini. Noco catoaintian afincoin tapiyoni ratotomain achimanicain. <sup>65</sup> Ascan afanan noco yoini, —Ascacun un mato yoiqui isca huai, “Upa Diosin tsoan ahuun nomuran shinanmayamaitocai ua icoinra huatiromaran,” —ishon noco yoini.

<sup>66</sup> Ascano Jesús noco yoiyai cuscan nicatan a tananmisi futsafoan pota-cashon afanan tanannifoma.

<sup>67</sup> Ascano Jesús nocori doce catonni non afu foanfafainnon noco yocani, —¿Marifi man umaqui capaimun? ¿Man ua potapaimun? —noco huaiton.

<sup>68</sup> Pedronun cumani, —Ifon, non rato fut-sacai non catiroma. Mirus fusti min noco yoitiro ahuuscashumain non nipasharatiroquin. <sup>69</sup> Minfin Dios ariashu nocoqui oniquin. Min Dios cuscara shara. Nan non icoinra huairan, —huaiton.

<sup>70</sup> —Un mato doce catonni. Un mato catonfiani matofu rafumisi futsan Satanás yoshin chaca ahuun nuumisiton, —ishon noco yoini. <sup>71</sup> Nan Simón Iscariote ahuun facu Judashuunoa noco yoini. Jesús noco doce catonni. Judasrifi catonfianicun Jesús ato achimaniquin.

## 7

### *Jesús ahuun ushtofaan icoinra huanifoma*

<sup>1</sup> Ascashu chipo Jesús Galilea maitio cahuancacaini ato tapimafoan-fafaini. Norifi non afu cani. Judea ano non cayonima. Nocon caifo Israeli nocon niaifofoan Jesús rutupaiyaifono. <sup>2-5</sup> Nocon caifoan fusitit-tian tapaspaonifo. Nan fusiti nocoti chaima Jesús Judea ano catama Galilea ano nituni. Ahuun ushtofori nanno Galilea ano afu ini. Ahuun ushtocoinfofiacashon Jesucristofiacuncai tsoan icoinra huanifoma. Ascanshon yoinifo isca huaquin, —Nunoashu Judea ano catahuun. Nantifi minhuunshon tanamisifo min ato ashomisi cuscan oinonfo. Min acai cuscan min ato oinmayamaino atirifoancai minhuunoa tapitirofoma. Min ahuamamishti atiro nantifi yorafoti ismafotahuun —huaifoan.

<sup>6</sup> —Uncai ari cayoataima. Uhuun Upa ua nichiataima. Ascafia ahuutianran man capaiyaitian man catiro. <sup>7</sup> Nan icoinra huafoma nan ua noicasmái. “Manfin chaca huamisiran,” un ato huamisiquin. Ascacun ua noicasmacani. Ua noicasmafiacaquicai mato noicasmatiro-foma. <sup>8</sup> Ascacun natian fusitacahuun Jerusalén ano fotacahuun. Ucai cayoataima. Uhuun Upa Diosin ua nichiataimaran, —ishon Jesús ahuun ushtofo yoini. <sup>9</sup> Ato yoitan Galilea ano nituyoni.

### *Jesús fusititian nannori ini*

<sup>10</sup> Ascafiaino ahuun ushtofo nan fusi ishcaquin Jerusalén ano foaifoanno. Ascaino arifi chipo caani. Tsoa yoiashuma Jerusalén ano nocoaitocai tsoashta tapinima. <sup>11</sup> Nanno nocon caifo Israelifo niaifofoan Jesús funacaquin yoinifo, —¿Ranimun na nocofunu? —huanifo.

<sup>12</sup> Nannori yorahuanrasi. Atirifoan isca huanifo, —Jesús nocofunu sharacoinran, —ishon yoinifo. Ascafiainfoan atirifoan yoiquin isca huani, —Ma. Na nocofunucai sharama. Yorafo paramisiran, —icashon yoinifo. <sup>13</sup> Ahuunoacai aton ointaifi yorafoan yoisharanifoma. Nocon niaifofoqui musucaquin oinomashta yoinannifo.

<sup>14</sup> Fusiti anaitiataimano Jesús Dios fu tsainti pushu muran iquini a muranshon ato yosicai. <sup>15</sup> Nocon caifo niaifofoan nicashon yoinifo, — ¡Aira! ¡Nicacapon! ¿Ahuuscaimun na nocofunun cunu tapicoianmafiashon tsain fasi tapicoianquin? — icashu yoinannifo. <sup>16</sup> Yoiaifo cuscan onanshon Jesús ato yoini, — Un mato yosiain cuscan uhuun nomuranshoncai un mato yoima. Ascatamarocon Upa Diosin ua nichini, nanton ua shinanmana cuscan nannoricoin un mato yosiaquin. <sup>17</sup> Tsoan Diosin yoia cuscan apaiquin afi tapitiroquin ufi shinain cuscan un mato yosi iyamarai Upa Diosin afi ua shinanmanaino un mato yosia.

<sup>18</sup> Tsoan ahuun nomuran shinain cuscan yosiquin nanton yorafo ahuunoa shinanmapai isca huaquin, “Na nocofunun fasi tapicoian. Afin fasi sharacoinquin,” ishon ahuunoa ato shinanmapai. Ascanfiatan uncai ascarama. Un mato yoiqui isca huai. “Nan uhuun Upa Dios ua nichini. Nancaifin fasi sharacaiquin.” Anori un mato yoimisi ahuunoa man shinansharanon. Nanscacufin man icoinra huatiroquin un mato iconcain yoi un yorafocai paramisima. <sup>19</sup> Nocon shuni Moisés mato Diosin tsain yonofiani tsoashtacai nicasharamisima. Ascacufin ahuuscain man ua rutupaiyain un nocofunu tunutitian cayahuafiacun, —huaiton.

<sup>20</sup> — ¡Cuul! ¿Tsoantsi mia rutupaiquin? Minhuunfin yoshin chaca nuuquin, —huaifoan.

<sup>21</sup> — Un nocofunu tunutitian caya huaiton man oinquin. Ascan “¡Ajaal! Ahuuscain Jesús tunutitian nocofunu caya huamamun,” ishon uhuunoa man yoia. <sup>22</sup> Un tunutitianfiacun ahuara shara huaa cuscan marifi tunutitian ahuara man huamisi. Moisés noco yononi cuscan manfin maton furonanfacufo rama caian ocho osha finoanno maton furonanfacufo man ato foshqui rupa shatumisiquin. <sup>23</sup> Ascan tunutitianfiacun maton furonanfacufo man ato foshqui rupa shatumisi. Ascafia Moisés yononi cuscan man aima. ¿Ascacufin ahuuscain man uqui sinai tunutitianmain un nocofunu caya huasharacunfin? <sup>24</sup> Afanan un ahuara shara huaiton oincaquin, “Chaca huaran,” ua huayamacahuun. Cayacafi shinansharacahuun, —Jesús ato huani.

—*Jesús nocon Numamisi Cristomun, —ishon yocaifoan*

<sup>25</sup> Ascatan atirifi Jerusalén anoashu yoinannifo, —¿Naamun nocon niaifofoan rutupaiafo? <sup>26</sup> Ascanfiacanashu yorahuanrasi aton ointaifi ato yoifiaquicai tsoan ahuun tsain shatumanama. Ascacuri natian niaifofoan man shinanraca aafin nocon Numamisi Cristoquin. <sup>27</sup> Ascafiancai Jesús nocon Numamisi itiroma. Nocon Numamisicoin oaiton non tapitiroma raniashumain oicain. Ascan nan nocofunu Jesús raniashu oamainquin man non tapiaran, —ishon yoinifo.

<sup>28</sup> Jesús Dios fu tsainti pushu muranshon ato yosifiatan ahuunoa yoiafo cuscan onancoinshon ato cumani isca huaquin, —¿Iconmun man ua onan? ¿Un raniashu oamainquin man tapiamun? Ufi shinanfaincai un oama. Ascafia uhuun Upan ua yonoa un oa. Nantofin ua nichiniquin. Nanfin iconcainquin. Mancai uhuun Upa onanmisima. <sup>29</sup> Un ahuunoashu oni. Ua nichini. Ascan un Dios onancoianran, —ishon ato yoini.

<sup>30</sup> Nicacani aqi sinanifo. Ascashon achipainifo cunu muran iquimashquin. Ascafiaquicai tsoan ahuusca huayonima. Nantiancai achiaifotian nocoatai inima. <sup>31</sup> Nan yorahuanrasi Jerusalén anoafoan yoinifo, —Tsoa futsan atiroma cuscan Jesús Diosinhuunshon

ahuamamishti shara noco isma. Nan nocofunun tsoan asca huatiroma cuscan huatiro. ¿Nocon Numamisi oshon finonmafain ashquimun? —ishon yoinifo. Ascan anori yoiaifoan icoindra huanifo.

*Fariseofoan Jesús achipainifo*

<sup>32</sup> Nan yorahunrasiton Jesushuunoa tsain shara yoiaifoan Fariseofoan nicanifo. Ascan nocon caifohuunshon Dios cufimisi niaifofoan futan ranushumuafu nichinifo Jesús achicashon cunu muran iquimanonfo.

<sup>33</sup> Ascan Jesús ato yoini, —Un matofu ichaipacuima, Un samamashta uhuun Upa Dios ari cai. Nantofin ua nichiniquin. Un samamashta aqui cai. <sup>34</sup> Un mato anoashu caitocai man ua funafiaquin ua fuchishquima. Un cai aricai man catiromaran, —ishon ato yoini.

<sup>35</sup> Ascaiton nicacani nocon caifo Israeli niaifofo yoinannifo, —¿Ranimun na nocofunu caiquin noncai fuchitiroma? ¿Nocon yorafo Grecia pushurasi ano pashcafainnifo ano caimun? ¿Nanno Greciafo tapimaicairaca? <sup>36</sup> ¿Raquiri noco yoimun isca huaquin? “Man ua funafiaquicai man ua fuchishquima. Uncai aricai man catiromaran,” ishon noco yoia. ¿Raquiri noco yoipaimun? —icashu yoinannifo.

*Diosin Yoshin Sharapan yorafo nimapacutiro*

<sup>37-39</sup> Ascano fusitin ahuun unutaquin Jesús yorahunrasi muran nicahun oi ashcafinin ato yoiquin isca huani, —Nicacapon. Un mato yoinon.

Diosin mato yonomapaiyai cuscan man huashopai uqui fucahuun. Ua icoindra man huacun un mato Diospan Yoshin Shara mato ya rafumapacunaca. Tsoan ua icoindra huaiton Diospan tsain cununi cuscan ahuun shaqui muran unu tsosia shara cuscara a muran foiran, —ishon Jesús ato yoini. Unucoinhuunoacai yoinima Diospan Yoshin Sharahuunshon ato tapimani isca huaquin, —Tsoan ua icoindra huaiton Upa Diospan Yoshin Shara afu rafupacunaca. Ascan Diospan Yoshin Sharahuunshon ahuun nomuranshon yorafo yoishquin afoanrifi icoindra huacanashu nipasharanonfo, —ishon ato tapimani. Jesús apa Dios ari nasoataima yorafoan aton niaifo inon. Ascan nan icoindra huafoti Diospan Yoshin Shara atoqui nichiataima.

*Jesushuunoacai nannorifosi shinannifoma*

<sup>40</sup> Nicacashon atirifoan yoinifo, —Iconcoin na nocofunu Diospan tsain yoimisiran, —ishon yoinifo.

<sup>41</sup> Atirifoanri yoinifo, —Naanfin Cristoquin, —ishon yoinifo. Ascafiaino futsafoan yoini, —Ma. Nacai Cristoma. Cristocai Galilea anoashu cainshquima. <sup>42</sup> Diospan tsain cununi cuscan, “Cristo David funa inon. David ipaoni nannoashuri Cristo cainshquiran,” ishon Diospan tsain cunushoni. Ascan Cristocai Galilea anoashu caintiromaran, —ishon yoinifo. <sup>43</sup> Nanscafiacun nan yorafoan Jesushuunoa nicafiacashocai anorifosi shinannifoma. <sup>44</sup> Atirifoan Jesús achipainifo cunu muran iquimashcaquin. Asca huapaifiacaquicai tsoan Jesús ahuusca huaiyonima.

*Israeli aton niaifofoan Jesús icoindra huanifoma*



<sup>45</sup> Ascatan ranushumuafoan aton niaifoho yafi Fariseofoqui nasocashon ato yoinifo. Nocoafono nanfoan ranushumuafo yocani, —¿Ahuuscaquimun man Jesús achiamaquin noco ihuushoshquin? —ishon ato yocanifo.

<sup>46</sup> Cumacaquin, —Na nocofunun ahuun tsain shara cuscara tsoancai anori yoiyomisimaran, —ishon yoinifo.

<sup>47-49</sup> Ascaiton ato nicacashon niaifohoan ato yoini, —¡Cuu! Ascan Jesús matori paramisi. Shinacapon. Nonfofin Fariseofo yafi maton niaifohoanri Moisés cununi cuscan fasi non tapicoianquin. Nonfoancai tsoashtan Jesús icoinra huamisima. Na yorafoan man rama Jesús nica nanfoan Moisés Diospan tsain cunushoni cuscan tapiafoma. Diosin ato onaintimapanonran, —ishon ato yoinifo.

<sup>50-51</sup> Asca huafiaifoanno Nicodemon nan shafa futsa Jesús ano cani ahuara yocaicain. Arifi Fariseonfiashon afu Fariseofo yoini, —Uhuun yorafoan, nocon shuni niaifoan yononi cuscan non ratoran nocofunun nicasharayoataima non yoitiroma isca huaquin, “Naton chaca huaa. Non onaintimanonran,” ishoncai non ascatiroma, —huaiton.

<sup>52</sup> —Min tsain Galilea anoafonan tsain cuscarari. Shinanhuun. Tsoash-tacai Galilea anoashu Diosin tsain yoimisi fuafoa. Nannoricoin Diosin tsain noco yoicoinni. Oinyotahuun tapinon, —ishon Nicodemo cumanifo.

<sup>53</sup> Anori yoicatan aton pushufoanri fonifo.

## 8

### *Ainfony ahuun funuma fu icaiton niaifohoan achinifo*

<sup>1</sup> Asca huafaini Jesús machi ahuun anu Olivo ano cani. <sup>2</sup> Shafaino Dios fu tsainti pushu muran Jerusalén ano nasoni. Nanno yorahuanrasi afanan aqui funifo. Nicaifucani. Ascatan tsaoshon ato yosini. <sup>3-5</sup> Ato yosiaino Moisés cununi cuscan tapimamisifo yafi Fariseofoanri ainfo ahuun funuma fu icaiton fuchicashon Jesusqui ihuutan yorahuanrasifain ointaifi ainfo nimainifoannifo nantififain oiononfo. Asca huacashon Jesús yoinifo, —Tapimamisiton, na ainfoan fasi chaca huaa. Ahuun funuma fu icaiton fuchiafo. Moisés isca huaquin noco yononi, “Ainfo ahuun funuma fu icaiton fuchicashon toquirinin a tsacacahuun nanon,” ishon Moisés noco yononi. ¿Mirifi min nannori noco yonopaimun? —Jesús cuparananshon yocaifoan. <sup>6</sup> Raquirirashta icaiton ahuun chaca inifoan niaifoho ano iyopaicaquin. A yocaifoanno Jesús tutishon ahuun mutotinin mai cununi.

<sup>7</sup> Yocariaifoanno Jesús atoqui fuhuuni inacahua yoini isca huaquin, —Man ratotonmain man ahuara chaca huamisimaquin na ainfo toquirinin tsacaqui tau huahuun, —Jesús ato huani. <sup>8</sup> Ascan ato yoitan afanan ahuun mutotinin mai cununi. <sup>9</sup> Ascano ato yoia cuscan nicacatan nantifi nan ainfoqui tsain chaca huafo fustirasi foriforinifo. Nan iyoafofo fosi rufoho foriforinifo. Chipo atirifi cuyo fonifo. Jesús fusti nanno ainfo aqui nituano. <sup>10</sup> Ascan Jesús afanan fuhuuninacahuan ainfo yocani, —Uhuun shafoshta. ¿Na nocofunufoan mia chaca huaa man foafomun? ¿Tsoa fusti nituamamun afanan mia tsain chaca huai? —ishon yocaiton.

<sup>11</sup> —Ifon. Fustishtacai nituamaran, —ishon yoiaiton. —Unricai mia tsain chaca huaima. Natian min catiro. Ascafiashu min chaca huamisi cuscan afanan asca huayamahuu, —ishon Jesús ainfo yoini.

—*Unfin chashamati cuscaranquin* —*ishon Jesús ato yosini*

<sup>12</sup> Ascatan ainfomaqui caashon Jesús afanan yorahuanrasi yosini isca huaquin, —Unfin chashamati cuscaranquin. Un manifesti anofo un is-masharatiro nipasharonfo. Tsoan ua tanamisi icashucaí funotiroma. Uhuunshon fai oinsharatiro Upa Dios ari noco sharashquin. Faquish muran ipashquima, —ishon Jesús yoini.

<sup>13</sup> Ascaiton nicacaquin Fariseofoan yocanifo, —Min noco yoiai cusca-cai tsoa futsan mihuunoa noco anori yoimisima. Mirus fusti minuunoa min noco yoiai cusca-cai tsoa icoinra huatiroma, —huaifoan.

<sup>14</sup> Jesús ato cumani, —Un tapian raquiashumain un oaquin ascata-ri raquimain un caicain. Ascacun uhuunoa un yoitiro uhuun tsain iconcoin. Ascafia mancai tapiama raquiashu oashumain raquiriri un caicain. <sup>15</sup> Tapishoma un yosiaiton man icoinra huama. Uncai tsoaquin shinanchacaima tsain chaca huashquin. <sup>16</sup> Ascafiacun uhuun Upan shinain cuscan nannoricoinrifi un mato yoi. Ascan un iconcoin yoimisiquin. Uhuun Upan ua nichini. Un futsahuunoa yoiquicai un-rusu un yoima. Uhuun Upan ua tapimana cuscan un yoi. Ascan un futsahuunoa yoia cuscan iconcoin. <sup>17</sup> Moisés mato yononi cuscan isca huaquin cununi. “Nocofunu rafutan nannorisi yoiaiton man icoinra huatiroran,” ishon mato yononi. <sup>18</sup> Ascan uficoín uhuunoa un mato yoimisi. Ascafiacun uhuun Upan ua nichini nanton uhuunoa nannorisi yoimisi, —huaiton.

<sup>19</sup> Nicacashon yocanifo, —¿Ranimun min Upa? —huaifoan.

—Mancai ua yafi uhuun Upa man onanmisima. Ua onanshon uhuun Upari man onancuana, —ishon ato yoini.

<sup>20</sup> Jesús Dios fu tsainti pushu muranshon yorafo yosini. Nan cunu muranri nocon pui nanuti. Diosin tsain yonomisifo inanonfo. Nanno ato yoifiani tsoancai Jesús achinima cunu muran iquimashcaquin. Jesús rutuafotaima. Ascan rutushquiaifon shafan nocoataima tsoan ahuusca huayonima.

*Un cai aricai man catiroma*

<sup>21</sup> Ascan tsoancai achinifoma Jesús afanan nocon caifo aton niaifofo yoini. —Un chipo chai cai. Un caino man ua funafiaquicai man ua fuchishquima. Maton chaca potayamashu nanscasiai man nai. Ascaiton un cai anori cai man catiroma, —ishon ato yoini.

<sup>22</sup> Nicacani yoinannifo, —¿Afirmun rutushquiquin? Ascashori noco yoi, “Un cai anoricai man catiromaran,” noco huaiquin, —icashu nocon niaifofoan yoinannifo.

<sup>23</sup> Ascaiton Jesús ato cumani, —Manfin na mai ano iitianiquin. Ucai mai ano ipaonima. Ufin nai muran iitianiquin. <sup>24</sup> Un mato yoiai cuscan maton chaca potayamashu nanscasiai man nai. Un mato uhuunoa yoia cuscan icoinra huayamashu maton chaca ya man nai. Man naino maton chaca mato ya ipanaca, —ishon Jesús yoini.

<sup>25</sup> —¿Ascan minmun tsoaquin? —ishon yocaifoan. —Nan un mato yoimisi cuscafin unquin. <sup>26</sup> Matohuunoa un ichapa yoitiro. Man chaca huaa cuscan huafain un mato yoifiatiro nan ua nichinicai man icoinra huatiro. Afi ua yoimisi cuscan un nantio maifoti un ato yoifoanfafainon, —ishon Jesús ato yoini.

<sup>27-28</sup> Apa Dioshuunoa ato yoifiatocai tsoan tapinifoma. Ascan Jesús ato yoini, —Man ua ihui coyan iquinanqui funinifoanshquiaitian man

ua tapishquin umain tsoaquin. Nantianri man tapitiro uhuunoa fusticai un mato yoimisima Upa Diosin ua yoimisi cuscan nan fusti un mato yoi.<sup>29</sup> Nan ua nichini ufu imisi. Uacai potamisima. Afi ua amapaiyai cuscan un amisiquin. Ascacun uqui unimacoin, —ishon ato yoini.<sup>30</sup> Yoiai cuscan nicacashon atirifoan a icoinra huancoinnifo.

*Diospan facufo Diosin aton ifo. Yora chaca huamisifo chaca fustisi aton ifo*

<sup>31</sup> Ascano Jesús nocon caifo nan icoinra huafo yoini, —Un mato yoiai cuscan nicacoianshufin uhuun tanamisicoïn man itiroquin.<sup>32</sup> Uhuun tsain nicashon iconcain tapishon maton nomuran man isharacointiro. Ahuara iconma afanan maton ifo inonma, —ishon Jesús ato yoini.

<sup>33</sup> Ascan Jesús icoinra huamisifoan ato yoiaiton niaifofean nicacashon yoinifo, —Nonfin Abraham ahuun funafoquin. Tsoa futsacai nocon ifo imisima. Noncái tsoan oinmati imisima. Ascacufin ahuuscain, “Ahuara iconma maton ifo itiroa man icoinsharanon,” noco huaran, —huaifoan.<sup>34</sup> —Iconcain un mato yoinon. Tsoan chaca huamisifin ahuaara chacafoan aton ifo iishquiquin. Nanrifi chacafoan aton yonoshomisi iishquiquin.<sup>35</sup> Man man tapia ahuun yonoshomiscái ifoan pushu muran ipanacama. Pushu ifoan ahuun facu pushu muran ipatiro.

<sup>36</sup> Ascan unfin Diospan Furunquin maton chaca soashonano afanan ahua chaca futsa maton ifo itiroa. Man Dios fu isharapashcaquin.<sup>37</sup> Mun tapia maton shuni Abraham. Man ahuun funafofishon uhuun tsain man nicacasmai. Ascashon man ua rutupai.<sup>38</sup> Uhuun Upan amisi cuscan mun oinmisi. Nanfohuunoa un mato yoimisi. Ascan marifi maton upa mato yoimisi cuscan nannori man huamisi, —huaiton.

<sup>39</sup> —Nocon shunifin Abrahamquin, —huaifoan. —Man Abraham funafoshofin nanton apaoni cuscan marifi nanscarifi man huacuaquin.<sup>40</sup> Upa Diosin ua yoimisi cuscan un mato icon yoifiaïno man ua rutupai. Abrahamcái ascapaonima.<sup>41</sup> Maton upa acái cuscan marifi man amisiquin, —ato huaiton. —Noncái upa ichapayama. Nocon upacoin fustifin Diosiquin, —huaifoan.<sup>42</sup> —Unfin Upa Dios fu imisiquin. Un Dios icanoashu un oni. Ufi shinanfaincái un maj ano onima. Uhuun Upan ua nichiano. Ascan maton upacoin Diosicunfin man uarifi noicuaquin.<sup>43</sup> Ahuuscaïn uhuun tsain man shafacafiffiacucai man tapiama. Futsanfin mato nicatima huaquin.<sup>44</sup> Nanfin maton upa Satanasquin. Ascan maton upan apaiyai cuscan marifi man huapaiquin. Aafin tau rutumitsamisi ipaoniquin. Iconcái yoimisima. Atocái ahuaara icon yoimisima. Ahuun nomuran chani fusti shinantiro. Nanscashori chani fusti yoitiro. Afin chanimisicoïnquin. Chanimisifoan aton apacoin.<sup>45</sup> Uncai a cuscarama. Un mato iconcain yoifiaïton mancái ua icoinra huaima.<sup>46</sup> ¿Ratoran futsamain un chaca huaa yoitiroquin? Uncai chaca huamisima. ¿Un mato icon yoifiaïtocái ahuuscaquin man ua icoinra huaimacain? <sup>47</sup> Ratoranfoan Diosin ahuun yoracoin ahuun tsain nicatiro. Mancái Diosin ahuun yorama. Ascan uhuun tsain man nicaimaran, —ishon Jesús ato yoini.

*Abraham Caiantaima Cristo iyonï*

<sup>48</sup> Nicacashon nocon caifo Israelifoan cumanifo, —Icon man non yoimisi. Minfin Samaritanonquin. Yoshin chaca mihuun nuumisi, —huaifoan.<sup>49</sup> —Yoshin chaca uhuun nuumisima. Un uhuun Upa

Diosihuunoa tsain shara fusti yoimisifin unquin. Manfin uhuunoa tsain chaca yoimisiquin. <sup>50</sup> Ascanfiatan mancai uhuunoa yorafa tsain shara yoipaimisima. Upa Diosin fusti iconcoin yorafohuunoa tsain shara yoitiro. Uhuunoa yorafa yoisharamapai. Nantonri yoitiro ratofomain shara iyamarai chacafoquin. <sup>51</sup> Iconcoin un mato yoinon. Tsoan uhuun tsain nicacoianfin nacointamarocon nipanacaquin, —huaiton.

<sup>52</sup> —Natian man non tapicoin minfin yoshin chacayaquin. Abraham non Diosin tsain yoimisifori man naafianicun min noco yoia, isca huaquin, “Tsoan uhuun tsain nicacoianshu nacointamarocon nisharapacunacaran,” ishon min noco yoia. <sup>53</sup> Nocon shuni Abraham non Diosin tsain yoimisifori man nani. ¿Ascan min Abraham finoncoianmun? ¿Min shinanmun min nantifi finoan? —huaifoan.

<sup>54</sup> —Unfincoin un uhuunoa yoisharainocai ahuama. Upa Diosin fustitofin uhuunoa yoisharamisiquin, “Nanfin nocon Uparan,” man huamisiquin. <sup>55</sup> Mancai uhuun Upa Dios onanmisima. Ascafiacun unfin uhuun Upa onancoianquin. Uhuun Uparan un iyamafin Un mato cuscara chanimisiri icuanaquin. Ascatarocon un Upa Diosin onancoian. Ua yoiai cuscan un huamisi. <sup>56</sup> Maton shuni Abraham, yoini, “Un chipo Cristo ointiro. Oianshu un fasi unimashquinran,” ishon yoini. Ua oinni ascan fasi unimani, —Jesús huaiton.

<sup>57</sup> —Mincai cincuenta fari icataima. ¿Ascan ahuuscashomun min Abraham oinmisiquin? —huaifoan. <sup>58</sup> —Iconcoin un mato yoinon. Abraham caiantaima unfin iyopaoniquin, —ishon Jesús ato yoini. <sup>59</sup> Ascaiton nicacani nocon niaiffofo fasi sinacoincaquin toquiri ficatan Jesús tsacainifo rutupaicaquin. Ascan huapaiyaifono Jesús ato murannoashu cani. Dios fu tsainti pushu murannoashu atomaqui cafiaitocai tsoan oinnifoma.

## 9

### *Nocofunu fusho cainfianicun Jesús caya huamani oinsharanon*

<sup>1</sup> Jesús caaquin oian nocofunu fusho nanscarapan caini oinni. <sup>2</sup> Ascaiton non afu rafumisifoan yocatoshini. —Tapimamisiton, ¿Ahuuscainmun na nocofunu fushoquin nanscarapan caini? Ahuara chaca huamisishaquinraca fusho cainni. ¿Ascayamarai apa futan ahuan chaca huamisianoraca fusho cainimun? —ishon non Jesús yocani. <sup>3</sup> Ascaiton Jesús noco yoiquin isca huani, —Ahua chaca huayamafiamisishaqui afincoin fusho cainni. Apa futan ahuan chaca huanocai fusho cainnima. Nanscarapan cainnicun chipo Diosin ahuamamishti huatiro cuscan ahuunoa ismashquin.

<sup>4</sup> Diospan ua nichiniquin non yonoshononcahuun. Non shafata fusti yonoshotiroquin. Yamucaí non yonoshotiroma. Nanscarifiai ratoran shafatan nocoqui nocoano afanancái tsoanshtan na mai anoshon Dios yonoshotirofoma. <sup>5</sup> Un na mai ano iyoashufin un shafa cuscaraquin. Un ato oinmani ahuuscashumain isharatirofoquin, —ishon noco yoini.

<sup>6</sup> Asca huatan maiquin cumo michotan. Miscoacuoantán ayashon futucurani. <sup>7</sup> Asca huatan, —Siloé carayanun nashitahuun, —huani. Carayan ahuun anu futa —Nichiaran —yoimisifo. Asca huaa caashu nashianan fuchocomutan oinsharacufainiquin. Ascatan naso curani. <sup>8</sup> Nan oinmisifoan isca huanifo, —¿Nan fusho tsoashu ahuara yocaiton non oinmisimun? ¿Na nancaimun? —huaifoan. <sup>9</sup> —Ainfain.

Nanfinquin, —atirifiton huanifo. Atirifiton yoicaquifin, —Aamafinquin. Nan ointsacoinfinquin, —huanifo. Afiri ato yoini, —Unfinquin. Unfin fusho imisiquin. Ascafiashofin natiantan un oinsharaquin, —ato huaiton.

<sup>10</sup> —¿Ahuuscashomun min natian oincain? —huaifoan. <sup>11</sup> —Na nocofunu Jesusran huaafoanfin ua maiqui cumo michotan a yashon ahuun mucuman ua futucuracaquin. Ascashufin “Siloé naquinoashu nashitahuun,” ua huaano. Siloé carayanun nashianan un fuchoquimushofin un oinshara acufainnaquin, —ato huaiton. <sup>12</sup> Ascaiton, —¿Ranimun na nocofunu Jesusquin? —ishon yocaifoan. —Un tapiama. Raquiran man caaran, —ato huani.

*Nan fusho cainniton oinsharaiton Fariseofoan yocanifo*

<sup>13</sup> Ascano Fariseofo icano nan nocofunu iyonifoquin. <sup>14</sup> Jesús nan nocofunu tunutitian cayahuano. <sup>15</sup> Fariseofoan nan nocofunu yocacaquin, —¿Ahuuscacai ashumun min furo cayaquin? —huaifoan. —Ua maiquin cumo michotan ayashon ua futucuraca. Nashianan fuchoquimushofin un oinshara acufainnaquin, —ato huaiton.

<sup>16</sup> Nicacaquin Fariseo atirifoan isca huanifo —Acaico Dios ariashu ocufin tunutitian yora cayahuama, —huanifo. Ascaiton atirifiton yoiquin isca huani —Yora chacapancai naton acai cuscan huacuana-maran, —ishon atirifiton yoinifo. Ascaiton atirifoan shinancaquin, —Jesuscai sharama, —huaifoan. Atirififain, —Jesusfin sharaquin, —huanifo. Jesushuunoacai nannorisi shinannifoma.

<sup>17</sup> Ascaiton afanan a nocofunu fusho cainni yocacaquin. —¿Minmun ahuuscacai aaqi na nocofunun mia cayahua? ¿A mia furo cayahuama-mun tsoanquin? —huaifoan. —Naantofin inon pacoai cuscan huafain Diosin tsain yoimisiquin, —ato huaiton.

<sup>18</sup> Ascaitoncai nocon niaifofoan icoinra huanifoma nan fusho nanscarapan cainni. Ascaiton fushon apa yafi ahua cunashon yocanifo. <sup>19</sup> —¿Nan na aamun min facu fusho caini? ¿Ascafiashomun ahuuscashon natian oinquin? —huaifoan. <sup>20</sup> —Nanfin nocon facuquin. Nanscarapan cainni. Nan non tapiafin nocon facuquin. <sup>21</sup> Ahuuscashomun oinquin noncai tapiamafinquin. Ahuuscashumain cayaquin. Facumafinquin. Manfin nocofunuaquin. Afifin mato yoitiroquin ahuuscashumain cayaquin. Nan yocacahuun, —ahua futan apan ato huani. <sup>22</sup> Nocon niaifofoquin musucaquin anori yoinifo. —Tsoan “Diosin Jesús catonniran,” huacai nocon ichananti pushu muran afanan iquitirofomafinquin, —niaifofo icaiton nicai ahua yafi apa atoqui musunifo. <sup>23</sup> —Afanan facumaquin, Nancoin yocacahuun, —huanifo.

<sup>24</sup> Ascano afanan a nocofunu fusho ipaoni yoimashon yoini, —Yoihuu. “Diosin ua cayahuaran,” ihuu. Jesuscaicon sharacufin. Chacafinquin. “Diosinfin sharaquin,” huahuu. “Jesús shararan,” huayamahuu. Non tapiafin Jesús chacaquin, —huaifoan. <sup>25</sup> —Utsan. Uncain tapiama chaca iyamarai sharamainquin. Un tapia fustifin un fusho iyofiamisishaquin natian un oinsharaicain, —huaiton. <sup>26</sup> —¿Ahuusca huafainmun mia cayahuaquin? —ishon yocaifoan.

<sup>27</sup> —Munfin mato yoiflashucaí mato yoia cuscan man nicapaima. ¿Ahuuscaquin man afanan ua yocainmun? ¿Marifimun ahuun tanamisí man ipaicain? —ato huaiton. <sup>28</sup> Fasi roaquin futsanifo. —Minfin ahuun tanamisiquin. Nonfofin Moisés tsain tanamisifoquin. <sup>29</sup> Non

tapiafin Diosin Moisés fu tsainpaoniquin. Noncai a Jesús tapiamafinquin. Tii ahuu cuscaranfinquin a nocofunucái non tapiama, —huaifoan. <sup>30</sup> —Choon. Mancai tapiamafinquin raniashumain Jesús oshon. Un fushofiacun ua cayahuamaquin. <sup>31</sup> Non tapiafin yoran chaca huamiscái Diospan nicapaitiroma. Ratoran Diosin tanasharafain yoia cuscan aitonfin nanscarafó Diosin nicatiroquin. <sup>32</sup> Nan Diospan mai onihuani chaincai ascaran nocofunun fusho caya huaa non nicaiyomisimafinquin. <sup>33</sup> Upa Diosin na nocofunu Jesús nichiyamanicái ahua ahuusca huacuanama, —huaiton. <sup>34</sup> Nicacani fasi aquí sinanifo, —Minfin chacacoin cainiquin. ¿Ascan ahuuscaquimun min noco tapimapaicain? Min chacashunifiashon. Nocon ichananti pushu muran min afanan iquitiroma. Nunoashu cariscatahuun. Noncaicon mia afanan oinpaityaintonfin. Afanan nuno iquicuranyamahuun, —huanifo.

*Ratoranfoan Jesús icoinra huayamacanashu fusho cuscaracoiffo*

<sup>35</sup> Ascaiton fusho ipaoni aton ichananti pushu muranshon potaifoan Jesús nicani. Ascashon funaquin fuchini. Fuchishon yoini, —¿Minmun na nocofunu Dios ariashu oni icoinra huaicái? —ishon Jesús yocaiton. <sup>36</sup> —¿Tsoanmun na nocofunuquin? Ua yoihuu urifi un icoinra huanon, —huaiton. <sup>37</sup> —Nan min ufu tsaincaifin unquin, —Jesús huaiton. <sup>38</sup> Nicatan, —Ifon, unfin mia icoinra huaicain. Min fasi sharacoin. Un mia noi. Un mia Ifoai. Min Diospan Facuran, —ishon yoini.

<sup>39</sup> Ascano nanno niafo Jesús ato yoini, —Uhuun Upa Dios icarishu un nuno mai ano oni ratofoanmain ua icoinra huayamaino ua icoinra huacanicain un puashoshquin. Ascan tsoa Upa Dios fu ipaifiaquin tapiama ahuuscain atiroquin nanfo fusho cuscarafashon ua icoinra huaashucái afanan fusho cuscara itirofoma oinsharatiro Upa Dios fu ipashacuin. Futsafoan shinacaquin tapisharafashocái tapisharafoma. Ua icoinra huayamaifo. Nanfo fusho cuscaracoin. Funoshcaquin, —ishon Jesús yoini.

<sup>40</sup> Nanno Fariseofo Jesús yoiai cuscan nicacashon a yocanifo, —¡Cuul! ¿Min noco yoimun non fushocun? —huaifoan.

<sup>41</sup> Ato yoiquin, —“Nonfin fusho cuscarafocuin. Man non funoa. Non chaca huamisirán,” ishon man yoiáiton un maton chaca soashocua. Mancai ascatamarocon, “Nonfin oinsharatiroquin. Noncai funoama. Nonfin sharaquin. Noncai chacamarán,” man imisi. Ascan maton chaca soatama man funocoianshu Upa Dios icano nocopacunacamarán, —ishon Jesús ato yoini.

## 10

*Chashoanfo cushumisihuunoa afincoin ahuunoa Jesús ato yosini*

<sup>1</sup> Ascatan Jesús ato tapimani nanmain aton cushumisicoishofin. Chashoan cushumisiton ahuun chashoanfo cushutiro. Nanscarifi aquin Jesús ahuunshon icoinra huafo cushuointiro. Nannori Jesús ato yoini isca huaquin, —Iconcoin un mato yoinon. Pasoatoshon yoran chashoanfo cunushotiro iquimashquin raquí fononfoma. Nan cunu caincaiti ya. Ascan tsoa caincaiti murannoashu iquitama pochininnoashu iquíafin nan yomutsoquin.

<sup>2</sup> Ascan nan tsoa caincaiti cunu muran iquimamisifin nancaifin ato cushumisiquin. <sup>3</sup> Caincaiti ano nocoaiton nan nocofunun caincaiti

cushumisiton fupushotiro chashoan cushumisiton iquimapacunon. Ascan chashoan cushumisi iquiaiton ahuun chashoanfoan ahuun oi onanti huanifo. Nantifi ahuun chashoanfo anu futsapacuni. Aton anun cunapacuaino chashoanfoan mufainifo. <sup>4</sup> Aton cushumisi rucun caino chashoanfoan cunu muranshon mufainifo. Ahuun oi onancoincashon mufainifo. <sup>5</sup> Futsan cunafaiatocai chashoanfoan ahuun oi onannifoma. Ahuun oi onainyamacani amaqui ichotiroran, —ishon Jesús ato yoini. <sup>6</sup> Jesús ahuunoa ato yoifiaiton tsoan tapinima.

*Jesús nocon cushusharamisi*

<sup>7</sup> Ascano Jesús afanan ato shafacafi yoini, —Un mato iconcoin yoinon. Nan chashoanfo cunu muran iquipaicani shoi fusti muran iquitirofo. Unfin nan shoi cuscaraquin. Tsoa Upa Dios icano iquipai uhuunoashu fusti ari iquitirofoquin. <sup>8</sup> Un matoqui nocoataima futsafoanri yoia isca huaquin, “Un mato tapimatiro ahuuscashumain Upa Diosqui man nocotiro afu nipashquin,” ishon yoifiamisishacaquin afoancaifin paramisifoquin. Yomutso cuscarafo. Diospan yora parapaicani ato yonomapai. Asca huapaiiaifin Diospan yorafoancai na cuscarafo nicapaicanima. <sup>9</sup> Unfin na shoi caincaiti cuscaraquin. Tsoa Upa Dios icano ipapaiquin uhuunoashu fusti ari iquitiro afu ipashquin. Natianri uhuunoashu ishariatirofo ahuatocai aton nomuran fucash huatiroma.

<sup>10</sup> Futsafoan uhuun yorafo parapaicani. “Ua tanacahuun. Un mato tapimasharanon,” ishon ato yoifiaquicai nanfoanfin uhuun yorafo umaqui imapaicani. Yomutso cuscarafo. Ua iconra huafo shara huapaicanima. Ato shara huatamarocon ato chaca huapaifain ato rutupaicani. Asca ato huafiafonocai un ascarama. Ua tanamisifo un ato imasharafain un ato unimamashquin. Nanscaifin un oniquin.

<sup>11-13</sup> Ua iconra huafo chashoan cuscarafo. Cushumisi yopacani. Unfin nan chashoanfo cushumisi shara cuscaraquin. Ascan na nocofunucai chashoanfo ifoshomacai ato cushusharama. Chashoanfo futsan cushumashofin ifoan aton pui inantiroquin. Ascan chashoanfohuunoa shinantamarocon pui fusti shinain. Ascaino masharo chashoanfoqui nocoaino nan cushumisi futsan ato cushusharatama ato potafaini ichotiro. Shinanquin isca huatiro, “Na masharo fasi musucoin. Nan chashoanfocai uhuunacoimafinquin. Ascan na masharonun ato piquin nanscanon. Uncai ahusca huatiroma un ato numapanan. Unfin atomaqui ichoicaicain masharonun ua ahusca huanonma,” ishon shinantiro. Chashoanfoan aton ifocoincai ascatiroma. Afifin ahuun chashoanfo cushusharatiroquin masharonun ato pinonma. Shinantiro isca huaquin, “Uhuun chashoanfohuunoaashucaifin un natiroquin. Nanfocairocon ahuuscanonma,” ishon shinantiro.

<sup>14-15</sup> Unfin na chashoanfo cushumisi shara cuscaraquin. Cushumisinin ahuun chashoanfo onancoin ato cushusharamisi. Urifi ua iconra huafo un ato cushusharamisi. Uhuun Upa Diosin ua onancoin. Urifi uhuun Upa un onancoian. Nanscarifai ua iconra huafo un ato onancoin. Nanfoanrifi ua onancoinquin. Un atohuunoashu naashquin. <sup>16</sup> Yora futsafoanri ua iconra huashquicani. Afocai Israelifoma. Nanforifi un uhuun Upa icano iyotiroquin. Nanfoanri mai ano niyocashon ua nicasharayoshceni. Ascan Israelifo yafi mani futsafoanri ua iconra huacanashu fusti cuscaracoim iishcaniquin. Nantifi nan iconra huafoti Upa Diosin yorafo iishcaniquin. Urusu fusti un aton cushumisi un iishquin.

<sup>17</sup> Un ato cushusharashu un atohuunoashu naashquin. Ascan uhuun Upa Diosin ua noiaino naashu un afanan funishquin nipashquin. <sup>18</sup> Ua icoinra huafohuunoashu napaiyamainocai tsoan ua namatiroma. Uhuun Upa ua yononi cuscan un atohuunoashu naicain. Uhuun Upa Diosin ua yononi cuscan un atohuunoashu nayoflashu un afanan funitiro nipashquin, —ishon Jesús ato yoini.

<sup>19</sup> Nicacashon atirifi nocon caifoan icoinra huaifoanno atirifoancai tsoan icoinra huanima. <sup>20</sup> Atirifoan yoiquin isca huanifo, —Aafin niso-coinquin. Yoshin chaca ahuun nua. ¿Ahuuscaquitsi non na nocofunu nicitiro? —ishon yoinifo.

<sup>21</sup> Atirifoanri yoini, —Aacai yoshin chaca ahuun nuama. Yoshin chacanuncaí nocofunu fusho afanan oinmاتيromaran, —ishon yoinifo.

*Israelifo aton niaifoancai Jesús icoinra huanifoma*

<sup>22-24</sup> Ascano Jesús nocon caifo Dios fu tsainti pushu Jerusalén ano non cani. Oi pacutian non cani. Nanno tapasi uhuaparasi muran fonifo. Nantianri nocon caifo Israelifoan nocon fustin ahuun anu tuqui huani isca huaquin, —Dios fu tsainti pushu onihuashararan, —ishon anuni. Nanno pushun facu ahuun anurifi tuquihuani, —Salomonran, —huanifo. Nannori Jesús ini. Nocon caifo niaifofo aquí funifo a yocacani. —Minmain Cristoquin nocon shafacafi yoihuu. ¿Ahuuscaimun min noco shafacafi yoyamacaíquin? ¿Ahuutiatsi min noco shafacafi yoiain? —huaifoan.

<sup>25</sup> —Un mato yoifiamisicun man ua icoinra huaama. Uhuun Upa ahuunshon un yorafo tsoan atiroma cuscan un huaafaini. Nanfo un mato isma unmain Diospan Facushofin. <sup>26</sup> Ascacia mancai Upan Diosin ahuun yorama. Man ua icoinra huama. <sup>27</sup> Ua icoinra huafoan ua nicasharatiro. Un ato onancoianno ua tanafo. <sup>28-30</sup> Omitsiscapanacafo muran focanima. Ua tanaifocai ari fonacafoma. Ascatarocon un ato Upa Dios ya imapacunaca. Upa Diosin ato ua inan. Upan nantifi finoncoian. Upa Dios fu un fusti cuscaracoin. Ascancunfin tsoancai ua tanamisifo unmaqui yafi Upamaquiri imapacunacamaran, —ishon Jesús ato yoini.

<sup>31</sup> Nicacani afanan Israeli niaifofoan toquiri uhuapa ficatan Jesús tsacapainifo rutupaicaquin. <sup>32</sup> Asca huafiaifoan Jesús ato yoini, —Upa Diosihuunshon tsoan futsan atiroma cuscan un mato ismami. ¿Ascan ahuunhuunshocaimun man ua toquirinin tsacaicain? —huaiton.

<sup>33</sup> —Nanfohuunshocai non mia toquirinin tsacaima. “Tsoa futsacai Diosima,” anori Diosin tsain cununi. Minrifi nocon tuscara nocofunuquin. Ascanflashu mian yoia mirifi Diosiran min icaquin. Ascan min Dios chaca huai. Ascacufin non mia toquirinin tsacaicain, —huaifoan.

<sup>34-36</sup> —Diospan tsain mato cunushoni isca huaquin, “Un mato yoi manfin Dios cuscaracoinfoquin,” ishon ato yoini. Diosin yoini cuscaicai tsoan, “Chaniran,” huatiroma. Ascan nan Diosin anori yoiaino ahuuscain man yoiai “Un Dios chaca huaran,” ishon. Nantofin ua catonshon nai arishon nuno mai ano ua nichiniquin. Ascancunfin un icon yoitiro unfin Diospan Facuquin.

<sup>37-38</sup> Mancai ua icoinra huaima. Uhuun Upan Diosin aca cuscan un huayamaiton ua icoinra huayamacahuun. Ascaciaquin uhuun Upa acai cuscan urifi nanscasi huaiton ua icoinra huacahuun. Uhuun Upan acai



cuscan urifi nanscasi un huaiton man tapitiro Uhuun Upa ufu ica. Unrifi uhuun Upa fu un icaran, —ishon Jesús ato yoini. <sup>39</sup> Nicacashon afanan Jesús achipaifiainfoanno atomaquinnoashu caitocai tsoan achinima.

<sup>40</sup> Atomaquinoashu cai unu Jordán ari cani. Nannoshon Juanpan tau huaquin yorafo unu muran iquimapacuni. Nanno chaimashta Jesús iyoni. Unu cusumunri iyoni. <sup>41</sup> Ascaino yorafo aqui fucashon. Yoinifo isca huaquin, —Jesús Diosihuunshon ahuamamishti noco isma. Juanpacai asca huamisima. Ascafiashon Juanpan Jesushuunoa iconcoi. Yoia cuscan nanscaco huamisiran, —icashu yoinannifo. <sup>42</sup> Asca huacanashu nanno yora ichaparasion, —Icon Jesusfin Diospan Facuquin, —icashon iconra huanifo.

## 11

### *Lázaro nani cuscan*

<sup>1-2</sup> Ascatan nocofunu Lázaro isinin icai. Ahuun pushu Betania ano ini. Nan Lázaro isinin icaiton ahuun poi rafu María yafi iyoa Marta nannori inifo. Nan María Jesusqui motica murannoa ininti sharacapa Jesús tau pumancayan ocatan ahuun foon otucuru aniquin. <sup>3</sup> Nan poi rafutan Jesús tsain fomaquifin, —Ifon, nan min ahuun noiaifin isinin iquiquin, —ishon yoimanifo. <sup>4</sup> Jesús nicatan yoiquifin, —Nan Lázaro isinincaicain naimafinquin. Isinin icafin yorafoan oicaniquin Dios sharacun. Unmain Diospan Facuquin un ahuamamishti huaiton tapicashon iconra huanonfo, —ishon Jesús ato yoini. <sup>5</sup> Jesús Lázaro yafi poi rafu atohuun noicoinni. <sup>6</sup> Lázaro isinincaiton nicafiai nanno osha rafuyoni. <sup>7</sup> Ascaiton —Non Judea ano afanan nasononcahuun, —ishon noco yoini. <sup>8</sup> Ascaiton non cumaquin, —Tapimamisiton, nocon niaifofu Judea anoshon ramashta mia rutucuanafu. ¿Ascan ahuuscain min afanan ano capaimun? —ishon non yocainton.

<sup>9</sup> —Shafatan non oinsharatiro. Farin chashaino non oinsharatiro pacushquima. Nanscarifiai shafatifi uhuun Upa Diosin ua amapaiyai cuscan ua tapimamisi. Ua cushuano un funotiromaquin. Uricai un musutiroma. <sup>10</sup> Ascafia faquishiano chashamatiyamaino yora pacutiro. Nanscarifiai tsoan Dios fu rafuyamatocai tapisharatiroma ahuuscashu-main isharatiroquin. Ascái funotiro, —ishon noco yoini.

<sup>11</sup> Nannori noco yoitan Jesús afanan yoini isca huaquin, —Nocon yorahuan Lázaro oshafiacun un moimanicain, —huaiton.

<sup>12</sup> Non afu rafumisifoan nicashon non yoiniquin, —Ifon, oshacoianfinquin naama. Chipo cayasharatiroan, —huanifo.

<sup>13</sup> Man nacoifiacun, —Osharan, —ato huaiton. Chipo moiran ishon shinannifo. Jesús man arusu onanfiashon ato yoicoinnima.

<sup>14-15</sup> Ascan noco shafacafi yoini, —Lázaro man nacoifiano un unimai naino un ano icama. Ascan man chipo oinquin man fasi ua iconra huashquin. Ascafia natian non Lázaro ano fononfocahuun, —ishon Jesús noco yoini.

<sup>16</sup> Ascan nicatan Tomás nan rafanacani Jesús fu rafumisi futsan noco yoini, —Non canon. Norifi afu non nannon, —ishon noco yoini.

### *Jesús fustiton naafu funimatiro nipanonfo*

<sup>17</sup> Ascatan Betania ano nococashon Jesús nica man Lázaro naita. Osha rafu non rafuri finoan ini mai huaitafo. Mahua qúni muran mai huaitafo ini.

18 Betania Jerusalén chaima ini. 19 Nocon caifo Israelifo ichapa María yafi Marta icano funifo aton ointi shinanmasharashopai poi naano. 20 Martan Jesús oaiton nicai aqui nocoicai cani. María pushu muran nichifaini.

21 Jesusqui nocotan yoini, —Ifon, min nuno anocai uhuun ushton ua nashocuanitamafinquin. 22 Un tapiafin natianri min ahuara futsa Dios yocaitofin mia ashonrisca huatiroquin, —huaiton. 23 —Ushstofin afanan funiquin, —huaiton. 24 —Un tapiafi ahuun unutani nan naafo funiaifoannorifi funitiroquin, —huaiton. 25 Ascaiton Jesús cumaquin, —Unfinquin uhuunoashu naafoti funicani. Uhuunoashufin nantifi niafoquin. Nan ua icoinra huaafin nafiashu afanan funiashu ahuuscanacamaquin. 26 Niyoshon ua icoinra huashucaí nanacama. ¿Nan mianmun icoinra huaicai? —huaiton.

27 —Ai, Ifon, unfin mia icoinra huaicai. Minmain Cristocufin Diospan Facu. Nocon caifohan mia manamisi. Nocon shunicaifohanrifi mia mana-paonifoquin, —huani.

### *Lázaro mahua quini muran maia anoashu Jesús uaini*

28 Yoitan Martan chipocun María yoicai cani. Nocoquin oian afu rafafo María fu uaicaifohan oinquin Marta chipocun fusti mushannantan yoiquin, —Nocon tapimamisifin oaquin. Mia yoimana, —ishon yoini. 29 María nicatan funinaca huantan cai aqui nocoriscani. 30 Jesuscai pushurasi muran nocoatai inima. Nan Marta fu tsaincanoashu oataima ini. 31 María fu uaicaifohan oin atofu uaifiain funinaca huatan caiton oincaquin María poi maia anoashu uaiqui cairafain nocon yora Israelifo mufainifo.

32 María Jesusqui nocotan taucopacufohan yoini, —Ifon, min nuno anocai uhuun ushto ua nashocuanitamafinquin. Iscaifin uhuun ushto ua nishon icuanquin, —huaiton. 33 Jesús María oian uaicaifohan nocon caiforifi María fu fucanashu afu uaicaifohan ato oinfin Jesús arifi atohuun ramapaitan ato shinantaquin. 34 Ato yocani, —¿Ranimun man mai huaitanquin? —ato huaiton. Cumacaquin, —Ifon, oinyopon, —huanifo. 35 Oinyopon huaifono, Jesús uaini.

36 Uaicaifohan oincaquin nocon caifohan, —¡Oincapon! Lázaro fasi noi ahuunoashu uaiquin, 37 ¿Nan fushe cayahuani cuscarifi huaquimun nunoshon Lázaro cayahuacuanitan? —huanifo.

### *Jesús Lázaro funimani*

38 Ascatan afanan Jesús ahuun ointi muran fasi shinancoinquin maia ano nocotan. Maiano toquirininhuan quini ano nocoshon yoiquin, 39 —Toquiri fupucahuun, —huaiton. Nicaquin poi Marta yoiquin, —Ma, Ifon, manfin osha rafu non rafuri finoanquin a naita. Natianfin man pisiaquin, —huaiton. 40 Nicaquin Jesús yoiquin, —¿Un mia yoiaiton min nicamamun? Mian icoinra huafin Diosin ahuara shara tsoan atiroma cuscan huaiton min ointiroquin, —huani. 41 Ascaiton nicacaquin fupushonifo. Fupushonafanno nai foisinifoantan, —Upan, un mia cufia cuscan mian nicai. Un mia aicho huai.

42 Un tapiafin mian nicafafainmisiquin. Ascan nuno niafoan mia icoinra huacashofin un mia cufiai cuscan mia huacaniquin, —Jesús apa cufini.

<sup>43</sup> Asca huatan Jesús yoiquin oi ashcafinin, —Lázaro, quini muran-oashu funicuruahuun, —huaino. <sup>44</sup> Funicurani, —Ahuun rashuafo pucacahuun cainshara curanon —Jesús ato huani.

*Israelifo aton niaiffoan Jesús rutupainifo*

*Mt 26.1-5; Mr 14.1-2; Lc 22.1-2*

<sup>45</sup> Ascaiton a nocon caifo María fu rafuafoan oincaquifin Jesús icoinra huanifoquin. <sup>46</sup> Ascaiton oincanifin atirifi Fariseoqui chani focani fonifoquin. <sup>47</sup> Ascaiton nicacanashufin Fariseofo yafi nocon yorafohuunshon Dios cufimisi niaiffofo ichanannifoquin. Ichanancashon yoicaquifin, —¿Nonmun ahuusca huaicai? Jesús tsoan atiroma cuscara ahuarafu huiquin. <sup>48</sup> Non ahuuscara huaiyamafin nantififain icoinra huacaniquin. Ascano Romanonfoan noco asca huatirofo. “Mancai afañan niaiffofo itiomaran,” ishon noco yoitiro. Nocon ichananti pushuri paon huatiro, —nocon caifo Israelifo niaifo inifo.

<sup>49</sup> Ascaiton nocon yorafohuunshon Dios cufimisi niaiffofoinchi Caifás ato yoiquin, —Mancai ahua tapiamafinquin. <sup>50</sup> ¿Man tapiamamun na nocofunu fusti nocon yorafohuunoashu naashquin? Nancaifin sharaquin. Arus fusti nashquin tsoashtamaquian, —ishon yoini. Ascacufin Caifás inon pacoai cuscan yoiniquin. <sup>51</sup> Caifás yoiquicai afin shinanfain yoinima. Diosin ahuan shinanpan shinanmanainofin yoiniquin. Nocon yorafohuunshon Dios cufimisi niaiffofoinchi Diosin ahuan shinanpan shinanmana Jesús nantifi ahuan caiffohuunoashu nanonpacoiran, ishon yoini. <sup>52</sup> Jesuscai nocon caifo fustihuunoashu naimaquin. Nantifi maniftichin icoinra huaffohuunoashufin noco naashoshquiquin. Ascano nantifi Diosin facu inonfo. Noinancoincani. Nan yora fusti cuscara ishcaquin. <sup>53</sup> Nan Lázaro funiatianfin shinanquin tau huanifoquin, —¿Ahuuscashomain non Jesús rututiroquin? —icashon nanscasi huaquin shinanriapaonifo.

<sup>54</sup> Rutupaiyaifoan tapiashu Jesús afañan nocon caifo ichapafo icano cayonima. Yorahuanrasi ano catamarocon pushu fustirasi ano cani. Nan pushu fustirasi Jerusalén chaimashta ahuan anu Efraín. Nanno non afu rafumisi.

<sup>55</sup> Nocon caifo Israelifo nocon fustitin shafatan Diospan oinmati nan afu nai muran imisiton nocon shunifoan aton furonanfacufo iyoafofosi finonmani shinanshcaquin nocoti chaima. Nantianri yora ichapafo pushurasi ano chai icanashu Jerusalén ano funifo. Jerusalén anoafu Moisés aton shunifo yononi cuscan atorifi huamapai aton chaca soamapai ichananti pushu muran iquinifo.

<sup>56</sup> Ascaifoanno nocon caifo niaiffofoan Jesús funanifo. Dios fu tsainti pushu ano chifi niafo yocananannifo, —¿Ranimun Jesús? ¿Man shinanmun nocon fustitin Jerusalén ano oimamun? —ishon yocanonannifo. <sup>57</sup> Asca huacanashu nocon yorafohuunshon Dios cufimisi niaiffofo yafi Fariseofoanri ato yononi isca huaquin, —Jesús fuchishon noco tapimacahuun non achinon cunu muran iquimashquin, —ishon ato yononi.

## 12

*Ainfoan Jesús shinanquin inintin shara ahuan tau pumancaya ocani*  
*Mt 26.6-13; Mr 14.3-9*

<sup>1</sup> Ascano seis osha fustitin nocoti chaima Jesús no fu Betania ano cayoni. Nanno Lázaro ica ini. Nan Lázaro naacun Jesús funimani. <sup>2</sup> Naannoshon

Jesús pimapaiquin tushu pichashonifo. Ascan Lázarorifi nanno atofu ini. Marta ato pimani. <sup>3</sup> Piaifono María Jesusqui oano ahuun ininti shara moticaquinoa Jesús ahuun tau pumancaya ocani. Ocashon ahuun foon otucurani. Asca huaiton nan pushu murannofoan nan ininti sharacoin shutunifo.

<sup>4</sup> Ascan Jesús afu rafumisi futsan nan Judas Iscariote nan Simonpan facu nanton chipo Jesús achimashquin yoini, <sup>5</sup>—¡Cuu! ¿Ahuuscaquimun na ainfoan ininti shara potaquin? Ahuun rafanan pui ichapa fishon noco inancun ahuuomafo non inancuana. Ascan shara icuanaran, —ishon Judaspan yoini. <sup>6</sup> Anori shinanfiaquicai ahuuomafo shinancoinnima. Afi yomutso iniquin. Nocon pui nanuti cushupaoni. Cshucoinpaonima. Ahuara fipaiquin nannea pui onupaoni.

<sup>7</sup> Ascano Jesús Judas yoini, —María fucash huayamahuu. Un samamashta nai tapishon uqui ininti ocaquin. <sup>8</sup> Nan yora ahuuomafo matofu ipanaca. Ascacufin ato afanan inansharatiroquin. Ucai matofu nuno mai ano ipanacama. Ascaiton María natian ua shara huaran, —ishon Jesús yoini.

*Nocon caifo nocon niaifofoan Lázaro rutupainifo*

<sup>9</sup> Ascano Jesús nicafuracani nocon caifo Israelifo ichapa aqui funifo. Lázaro funia nicacani yora ichapa aqui funifo. Jesús fusti oinpaicanimaquian Lázaro nacoinfiacun Jesús funimana oinpaicani funifo. <sup>10-11</sup> Lázarohuunooa nicacaquin nocon caifo ichapafoan afanan nocon yorafohuunshon Dios cufimisi niaifofo tanatama Jesús fusti icoinra huanifo. Ascaino nocon niaifofo yoinannifo, —Nan rafu non rutunon. Jesús fustimaquian. Lázarori non rutunon, —icashu yoinannifo.

*Jesús Jerusalén ano nocotoshiniquin*

*Mt 21.1-11; Mr 11.1-11; Lc 19.28-40*

<sup>12</sup> Man ascano iyoconaino nocon caifofo nocon fusititan yorahuanrasi Jerusalén ano inifo. Jesusrifi nocoaiton nicacani aqui funifo. <sup>13</sup> Upufo ya aqui fucaquin oi ashcafinin isca huanifo,

*¡Aichol! Nocon Numamisi oiquin. Nonfin Israelifoquin. Minfin nocon niaifoquin. Nocon Ifo Diosin mia nocoqui nichini. Min fasi sharacoin. Upa Diosin mia shara huapapainonran*

ishon yoinifoquin. <sup>14-15</sup> Nannori yoiaino Jesús burro cahuashara camaqui tsainacahuatan cani. Diosin tsain yoini cuscaín iscani,

*“Jerusalén ano icafoan ratuyamacahuun. Maton Niaifo matoqui oshquiquin. Burro cahuashara camaqui matoqui oshquiran,”*

ishon cunuyoni cuscan.

<sup>16</sup> Nantian nanfohuunooa oinfiacquicai icai cuscan non tapiyonima. Chipo Jesús afanan Apa ari nai muran cani afu niaifocoin iquicai non shinanni isca huaquin, —Jesús mai anoshon amisi cuscan nannoricoin Diosin tsain ahuunooa cunuyonifo. Nocon shunifoan Jesús caiantaima inonpacoai cuscan aqui cunuyoniforan, —ishon nocon nomuran non Jesús shinanni.

<sup>17</sup> Jesús Jerusalén ano nocoaiton nicacaquin nantianri yorahuanrasi-foan a mananifo oinpaicaquin. Atirifoan Jesús Lázaro naafiocun funimanaiton oinnifo. Oincanifin futsafoqui chaninifoquin arifi oinnonfo.

<sup>18</sup> Nocofunu man nacoinfiacun funimana nicacaquin nanfoanri oin-painifo. Ascashon fai anoshon Jesús mananifo. <sup>19</sup> Ascano Fariseofo aquí yoinannifo, —¡Cuu! ¡Shinacapon! Noncai ahuusca huatiroma Jesús isca huanonma. Tsoancai noco nicapaicanima. Nantifi yorafoan Jesús nicapaicaniran, —icanashu yoinannifo.

*Jesús inon pacoai cuscan yoiyoni isca huaquin, —Ua rutushquicaniran, —ishon yoini*

<sup>20</sup> Nantianri Jerusalén ano yorahuanrasi muran nocon caifomafori nocon yora futsafo fusitin ano funifo. <sup>21</sup> Nococatan Felipe ano fonifo yocain focani. Nan Felipe Galilea mai ano nan pushurasi ahuun anu Betsaida anoashu cainni. —Non Jesús fu tsainpai. Noco ihuushojuun non afu tsainon, —ishon Felipe yoinifo. <sup>22</sup> Nicashon yoiafo cuscan Andrés tapimani. Ascan nan rafutan Jesús yoinifo.

<sup>23-24</sup> Nicaquin Jesús ato yoini, —Unfin samamashta uhuun Upa Diosin nai muran icano un caicain afu niaifo iqui cai. Ascanfia uhuun Upa ari cataima un yorafotihuunoashu un nayoshqui. Isca huaquin un mato tapimashquin man tapinon. Shuqui furo fusti non fanayamacai foatiroma. Ascatamarocon nan shuqui furo fusti fanano ahuunoashu furo shara ranan caintiro. Nanscarifiai un matohuunoashu nayamacai tsoa futsa un nimapacutiroma. Urus fusti un nipatiro. <sup>25</sup> Tsoan iscatiro “Diosin ua imapaiyai cuscaai un apaima. Ufi apaiyai cuscan fustifin un shinaincaini,” ishon anori shinanshu funocointiro. Ascafia tsoan isca huaquin shinain, “Un nuno mai ano niyoshon ufi apaiyai cuscan un shinanpaitamarocon Diosin ua imapaiyai cuscan fusti un shinanpairan,” ishon yoitan Upa Dios fu ipasharatiro.

<sup>26</sup> Ascan tsoa uhuunoa yonomisi ipaiqui uhuun tsain nicacointan un yoia cuscan huatiro. Ua tanashu un icano arifi nannori ufu ipatiroquin. Uhuun yonomisi un yonoa cuscan ua ashoinquin Uhuun Upa Diosin futsafo aton ointaifi ahuunoa yoishquin isca huaquin, “¡Aicho! Min uhuun Facu Jesús nicamisi sharacoin. Min shara huamisiran,” ishon Upa Diosin ahuunoa yoisharatiro.

*Jesús rutushquiaifo cuscan yoini*

<sup>27</sup> ¡Ohua! Natian uhuun nomuran un fasi omitsiscái. ¿Un raquiri huatiromun? Ucai yoitiroma isca huaquin, “Upan, ua numahuu un natian omitsiscanonma,” ishoncai un anori yoitiroma. Upa Diosin ua nichini un natian ato omitsiscashonon. <sup>28</sup> Upan, Uhuunshon ato oinmahuu min fasi shara, —ishon Jesús yoini.

Yoiaiton nai muranshon oi ashcafinin Apa Diosin cumani, —Un minhuunshon un ato ismafafaini un shara. Nanscarifi un afanan huai, —ishon yoini. <sup>29</sup> Nan yorahuanrasi nannoshon nicacani atirifoan yoinifo, —Man turuicaran, —inifo. Atirifoanri yoinifo, —Upan Diosin ahuun oinmati afu nai muran icaton Jesús yoianan, —ishon yoinifo.

<sup>30</sup> Ascan Jesús ato yoini, —Nan oi nai murannoa man rama nicaicain ua tapimanama matofin nicamapaiaquin. <sup>31</sup> Natian nan icoinra huamafoti Diosin ato onaintimaicoinni. Aton ifonri nan yoshin chaca Satanás arifi nantiantari Diosin potashquin afanan aton niaifo inonma. <sup>32</sup> Ascafiatan ihui coyan iquinanqui ua mastashon uaya finifoanshcani. Nanhuunshon un nantifi yorafo uqui omashquin, —ishon ato yoini. <sup>33</sup> Nannori ato yoini ahuuscashumain nashquicai tapinonfo.

<sup>34</sup> Nicacashon yorahuanrasifoan nanno nishon yoinifo, —Diosin tsain cununi cuscan noco yoimisi isca huaquin, “Cristo, nan Diosin catoanfin nipanacaquin. Nanacamaran. Ascacufin ahuuscashomain, Diospan Facu ihui coyan iquinanqui uaya finifoanshcanicain,” min noco huaran. Tsohuunnoamun min yoicain, —ishon yoinifo.

<sup>35</sup> Jesús ato yoiquin, —Uncai mato chashamashoriaima. Un mato yoia cuscan nicasharacahuun funoshcaquima. Chashamati yamaino faquish itiro yora funonon. Tsoa faquish muran caquin fai funomatiro. Rani caimancai tapitiroma. <sup>36</sup> Un matofu icano ua icoinra huacahuun funoshcaquima. Man ua icoinra huacun un mato chashamashotiro man shafacafi inon. Unfin chashamati cuscarquin. Ua tanashon manrifi fut-safo chashamashotiro matohuunshon uari tananonfo, —ishon Jesús ato yoini. Ahuun tsain yoiqui anaititan atomaquinoashu cani. Ascaitocai afanan oinnifoma.

*Israelifoa Jesús icoinra huanifoma*

<sup>37</sup> Jesús aton ointaifi yoran atiroma cuscan ato oinmafiacun tsoan icoinra huanifoma nan Diospan Facucoinfacun. <sup>38</sup> Nannori Isaías atohuunoa inonpacoai cuscan yoiyoni isca huaquin,

“Ifon, non min tsain ato yoiflainocai tsoan noco icoinra huama. Yoran atiroma cuscan min ato ismafiacun tsoamun mia icoinra huaiquin,”

ishon Isaías inonpacoai cuscan cunuyoniquin. <sup>39</sup> Diosin ato yoipaoni cuscan nicacasmanifo. Ascashon icoinra huapainifoma. Ascacufin afanan atohuunoa inonpacoai cuscan cunuyoni isca huaquin.

<sup>40</sup> “Icoindra huayamaifoa Upa Diosin fusho ointsa ato imapacushquin. Diosin tsain iconcain oinfiacashon icoinra huaiyamaifoa Diosin aton shinantimahuatani shinansharonfoma. Diosin tsain oinfiacaquin oianma shinantsacani. Nicafiacanashon shinansharatirofoma tapishcaquin. ‘Muafo aton chaca shatucasmacani uqui funonfo un ato cainmasharon,’ ishon Diosin yoini.”

Nannori Jesushuunoa Isaías inaca cuscan cunushoni. <sup>41</sup> Jesús fasi sharacon inon pacoai cuscan Isaías oinquin tau huani. Ascacufin nannori ahuunoa yoiyoni.

<sup>42-43</sup> Nocon caifo Israeli niaifofa atirifoa Jesús icoinra huayamafiaino atirifoa icoinra huanifo. Icoindra huafiacani Fariseofocui musunifo. Fariseofoa yoinifo, —Tsoan Jesús icoinra huaicai nocon ichananti pushu muran afanan iquitiromaran, —ishon yoinifo. —¡Ohua! Jesús icoinra huaran non icaiton nocon ichananti pushu muran noco potashcaini afanan atofu non ichanannonma, —ishon yoinifo. Ratucoinnifo. Ascacuncai non Jesús icoinra huaran inifoma. Upa Dios ato yoishara icai fuchipaitama atohuunoasi fuchipainifo.

*Jesús ahuun tsainhuunshon yorafoti tapimatiro chaca huayama-raquinmain shara huaquin*

<sup>44</sup> Ascatan Jesús oi ashcafinin ato yoiquin isca huani, —Tsoan ua icoinra huaquin nan ua nichiniri man icoinra huatiro. <sup>45</sup> Nanscarifi aquin ua oinfain nan ua nichiniri man oian. <sup>46</sup> Nuno mai ano faquishi-huan cuscara. Ascacufin Uhuun Upa Dios icanoashu un nuno mai ano oniquin chashamati cuscara iquiyoi. Ascan un mai ano oni afanan

yorafoan chaca huafafaintamarocon ua icoinra huashon Upa Dios tanasharanonfo shafacafi icoinsharashcaquin.

<sup>47</sup> Tsoan uhuun tsain nicafiaquicai un yoia cuscan aima uncai ato onaintimaima. Un mai ano oni yorafo onaintimatamarocon ato numaiyoi un oni. <sup>48</sup> Ascafiacai tsoan ua ifo huapaimisima uhuun tsainri nicacasmaquin nanscarafo onaintimaitian Upa Diosin ato yoipacushquin isca huaquin, “Min niyoshon uhuun Facun ahuun tsain min nicacasmamisi. Min omitsiscapanacafo muran ipanacaquin,” ishon yoishquin. <sup>49</sup> Uhuun Upa Diosin ua yonoa cuscan nannoricoin un mato yoimisiquin. Ufi shinanfaincai un mato yoima uhuun Upa Diosin ua shinanmanai cuscan un mato yoimisiquin. <sup>50</sup> Mun tapian Upa Diosin yonoa cuscan icoinra huashu man nipatiro. Ascacufin un mato yoimisi cuscan uhuun Upa Diosin, “Nannori ato yoihuu,” ua huamisi, —ishon Jesús ato yoini.

## 13

### *Jesús afu rafumisifo ochonpacuni*

<sup>1</sup> Diosin oinmati nan afu nai muran icaton nocon shunifoan aton facu iyoafofosi finonmani ato rutunonma nan fusitin chaima. Jesús onanni iyoconaino rutuaifo. Mai anoashu Apa ari caanon. Non afu rafumisifo nuno mai ano niyoshon noco noiyopaoni cuscan natian noco isma nocohuun noi finacoinquin.

<sup>2</sup> Jesús futan non afu rafumisifoan fari caino non pini. Non piataima Satanás yoshin chaca Simón futsan ahuun facu Judas Iscariote ahuun nomuran yoini isca huaquin, —Ato tapimahuu ahuuscashomain Jesús achitirofoquin, —ishon ahuun nomuran yononi. <sup>3</sup> Ascatan Upa Diosin ahuun Furun yoini, —Nantio nai murannoa non mai anoafori min ato yonotiro. Min ato iforan, —ishon Upa Diosin yoini cuscan Jesús tapiyoni. Upa Dios ariashu oni afananri aqui nasoshquin nanri tapiyoni. <sup>4</sup> Ascacufin piquin anaititan Jesús funinaca huan ahuun sahuuti pucatan ahuun turuitinin piracomuni. <sup>5</sup> Ascatan unu tasoqui manushon non afu rafumisifo noco ochonpacushquin. Ochontan ahuun turuiti piracomuaton noco otucuruapani. <sup>6</sup> Ascatan Pedrori apaiyaiton, —¿Ifon, ahuuscain min uhuun Ifoflashon mian ochonpaiyain? —huaiton.

<sup>7</sup> —Un mato acai cuscan natian min tapiama. Ascafia min chipo tapishquin, —huaiton.

<sup>8</sup> —Ma, Ifon. Miancai ochonpacunacama, —huaiton. —Un mia ochonyamainocai min ufu rafutiroma, —huaiton.

<sup>9</sup> —Ascaiton, Ifon tauquisimaquian ua muchofain ua machonhuun, —huaiton.

<sup>10</sup> —Rama yora nashia ahuun tau fusti non ochotiro. Mantsi chostanayamacun. Ahuun caya afanan chostanama. Nantificai man choshtama. Ascashu atifincoinmaquian, —ishon Jesús noco yoini. <sup>11</sup> Mantsi tapiamashon ratotomain achi mashquicain. Ascacun nannori noco yoini.

<sup>12</sup> Man noco ochopacutan nasocain ahuun sahuuti sahuuni. Sahuutan afanan tsaoti camaqui tsaoni. Ascashon noco yoini, —¿Man man tapiamun un mato ashoan cuscan? <sup>13</sup> “Tapimamisiton,” huafain “Uhuun Ifon man ua huaquin.” Iconquiuan. Unmainquifin. <sup>14</sup> Ascatan unmain maton Ifocain maton tapimamisishofin unmain mato iquinshofin. Ascashon un mato ochopacua maton oinmati cuscara iishquin.

Ascan un mato ochonpacua cuscari mafi ranan oinmati cuscara huaa tananshu ochononancahuun. <sup>15</sup> Un mato oinmana un aca cuscari marifi man anon. Ua cuscara icahuun. <sup>16</sup> Un mato icon yoi. Yonomisitocai ahuun ifo finontiroma. Nanscarifiai futsan futsa nichian ahuun tsain ato tapimashonon. Nan tsain fomisitoncai nichimisi finontiroma. <sup>17</sup> Un aca cuscan man man tapia. Ascan man man tapia cuscan aaquin unimacointiroquin.

<sup>18</sup> Uncai nantifi matohuunoa yoima. Un tapian ahuutimain un catoanquin. Ascafiacun Diosin tsain yoia cuscacoin non icoinra huatiro.

“Nuno u futan piyai futsan ua chaca huaashquin.”

<sup>19</sup> Icataima un mato yoiyomisi. Ahuutiaran icai cuscan un mato yoiyomisi. Chipo icai cuscan un Cristo Diospan Facu man icoinra huanon. <sup>20</sup> Un mato icon yoi. Nan un nichian uhuun tsain ato yoinon. Nanrifi icoinra huashofin uarifi man icoinra huatiroquin. Ascataari ua icoinra huashofin un nichiaru man icoinra huaicai, —ishon Jesús ato yoini.

*Jesús Judaspan ato achimashquiai cuscan ato yoini*

*Mt 26.20-25; Mr 14.17-21; Lc 22.21-23*

<sup>21-22</sup> Yoiquin anaititan Jesús fasi afiri shinanmucoinni. Ascashon fasi shafacafi nichifain noco yoini, —Un mato iconcoin yoi. Ratoran man futsafin ua ato achimashquiquin, —icaiton nicaquin non oiancufainni nofi ranan fuuisinan acufainni. Tapitsi non huaashu. <sup>23</sup> Unquian afu potasinanshu tsoan. Fasi uhuun noicoian. <sup>24</sup> Ascaiton Pedronun oi nomashta ua yoini. —Tsoanmain achimashquicain yocahuun, —ua huani. <sup>25</sup> Ascaiton aqui tasicain un yocani, —¿Ifon, tsohuunoa min yoiimun? —ishon un yocaiton.

<sup>26</sup> Jesús ua cumani, —Nan misi torushtan pocotan un futsa inaintonfin man tapicain nantofin ua ato achimashquiquin, —ishon ua yoini. Ascano nanscacoïn huaquin Simón futsan ahuun facu Judas Iscariote inanni. <sup>27</sup> Inantanaino Judashuun yoshin chaca Satanás nuuriscatani. Ascaiton Jesús Judas yoini, —Nan min acai cuscan ariscahuu, —huani.

<sup>28</sup> Non tsaoshon piairananuncai non tapinima ahuuscamain huacanicain. <sup>29</sup> Ascaiton atirifoan shinannifo Jesús Judas nichian shafain fusituan non yopai cuscan ficaishafain. Atirifoanri shinannifo Jesús ahuuomafo yopai cuscan ato inantahuun huaashafain non ini. Nan Judasfin pui cushumisi iniquin. <sup>30</sup> Nan Jesús misi pocotan Judas inan-tapaiyaino funinaca huan caicainni. Man yamuaino.

*Tsain funa shara noco yononi cuscan*

<sup>31-32</sup> Ascatan nomaquinoashu man caano Jesús noco yoini, —Un naitian Upa Diosin mato ismai unmain ahuun Facu sharacun. Un acaiton man oian cuscan Upa Dios fasi shararan huashcani. Samamashta Upanri ato tapimai unmain ahuun Facu sharacufin. Unmain a cuscaracoïncunfin.

<sup>33</sup> Uhuun facufoan uncai nuno matofu iqui chaima. Man ua funashquin. Un nocon caifo Israelifo yoia cuscan natian un matori yoi un cai aricai man catiroma. <sup>34</sup> Tsain funa futsa un mato yoicain, “Noinancahuun. Nan un matohuun noiai cuscari huafain marifi noinancahuun.” <sup>35</sup> Man noinainno nantifi yorafoan tapitiro man ufu rafuaiton man uhuunshon tapishara, —Jesús noco huani.



*Pedronun, —Un Jesús oinmisimaran, —ishquiai cuscan Jesús yoini  
Mt 26.31-35; Mr 14.27-31; Lc 22.31-34*

<sup>36</sup> Ascaiton Pedronun yocani, —¿Ifon, raqui min caimun? —yocaiton. Yoiquin, —Uncai aricai natian min ufu cayotiroma. Chipu min ua mufaintiro, —huaiton. <sup>37</sup> —¿Ahuuscain natian un mifu catiromamun, Ifon? Natianfin mun itisharaquin mihuunoashu naashquin, —huaiton.

<sup>38</sup> —¿Iconmun min itishara uhuunoashu naashquin? Iconquin un mia yoi. Na yamu tacaranun acataima, “Uncai Jesús oinmisimaran,” ishon min ato yoiquin rafu non fusti huairan, —ishon Jesús yoini.

## 14

*Jesusfin fai cuscarquin. Nan fustihuunoashu non Upa Dios ari nocotiroquin*

<sup>1</sup>—Maton ointi fucashniyamachuun. Upa Dios icoindra huafain uarifi icoindra huachuun. <sup>2</sup> Uhuun Upa icanofin cunu ichaparasiquin. Un mato itishara huashoin caicain. Ascarayamacucain un mato yoicuanama. <sup>3</sup> Cayoshon un mato itishara huashoicaicain. Itishara huatani un afanan matoqui nasoshquin un icano mato ihuiyoi. Ari ufu man ipanon. <sup>4</sup> Man manfin un cai ari fai tapiaquin, —ato huaiton.

<sup>5</sup> Ascaiton Tomás cumani, —Ifon, noncai a min cai ari fai tapiamafinquin. ¿Ahuuscashomun non tapitiroquin? —huaiton.

<sup>6</sup> Ascaiton Jesús cumani, —Unfin na faiquin. Unfin iconmisiquin. Uhuunoashufin yorafo nipatirofoquin. Tsoacai afi uhuun Upa icano nocotiroma. Uhuunoashu fustifin uhuun Upa ari nocotirofoquin. <sup>7</sup> Ua onancoinshofin uhuun Upari man onantiroquin. Natian non chipori man uhuun Upa onancoin cai. Nan ua oinquinfin man uhuun Upa oianri man huaicain, —huaiton.

<sup>8</sup> Ascaiton Felipe cumani, —Ifon, noco Upan Dios ismapun. Min noco Upa Dios ismaino non unimacointiro, —huaiton.

<sup>9</sup> Ascaiton Jesús cumani, —Felipen, Un fasi matofu ipaifiamisicun. ¿Ahuuscain mian onanyomisimamun? Nan tsoan ua oinquinfin uhuun Upari oinquin. ¿Ahuuscain ua “Upa oinmahuu” mian huaimun? <sup>10</sup> Un uhuun Upa fu imisi. Non fusti cuscaracoinquin. ¿Nan min icoindra huaimamun? Un mato yoi ai cuscaai uhuunoacoin un mato yoima. Uhuun Upahuunoafin un mato yoicain. Nai arishon Upa Diosin mai ano apaiyai cuscafin ua huamaiquin. <sup>11</sup> Un mato yoi uhuun Upa fu rafuaino urifi uhuun Upa fu un rafumisiquin. Ua icoindra huachuun. Uhuun tsaincoin icoindra huayamaquima. Un acaiton man oian cuscan ua icoindra huachuun.

<sup>12</sup> Iconquin un mato yoi. Tsoan ua icoindra huashon un acai cuscan arifi huashquin. Uhuun Upa ari un caiyoano. Ascacufin un aca cuscan finonmacaifain ashquicani. <sup>13</sup> Ahuara uhuun anuhuunshon Uhuun Upa man yocaiton un mato ashotiro. Ascaiton yorafoan “Upa Dios shararan,” huanonfo. <sup>14</sup> Ahuara futsa uhuun anuhuunshon man yocaiton un mato ashotiro.

*—Upa Diosin ahuun Yoshin Shara un matoqui nichishquin, —ishon Jesús ato yoini*

<sup>15</sup> Ua noifin un mato yonoai cuscan man aicai <sup>16-17</sup> Un Upa Dios yocain mato futsan nichishonon maton ointi fucash huanonma man isharanon. Maton tapimamisi inon. Amain Diosin Yoshin Sharashofin. Aafin

iconmisiquin. Mato fu ipashquin. Icoinra huafoanmacai a onantirofoma. Ascarifi atacai ahuamain huaincai tapitirofoma. Ascan manfin onanmisiquin mato fumain icufin. Ascatari maton nomuran matofu rafui.

<sup>18</sup> Uncai matomaqui iquima. Un mato potacoinma. Un matoqui afanan nasoshquin. <sup>19</sup> Un nuno iqui chaima. Ua icoinra huafoama ua oinyoshcanima. Ascan manfin ua oinshquicai. Nan un nipaino marifi man nipanaca. <sup>20</sup> Un funiaiton man tapitiro unmain Upa Dios fu ipanacacufin. Ascarifi atan marifi man ufu icaquin. Urifi un matofu icaino. <sup>21</sup> Un mato yonoa cuscan ua nicacoinshonfin ua fasi noicoinquin. Ua noicoiaiton uhuun Upari ahuun noi. Ascaino urifi un ahuun noi. Un shinain cuscan u ato tapimairan, —ishon Jesús noco yoini.

<sup>22</sup> Ascaiton Judas futsan Iscariotemaquian yoini, —¿Ifon, ahuuscain mia icoinra huafoama min shinain cuscan yoitama noco fusti min tapimai? —ishon yocaiton.

<sup>23</sup> Jesús cumani, —Tsoan ua noi un mato yosiain cuscan ua nicaointiro. Uhuun Upa ahuun noiaino urifi un ahuun noi. Non afu rafupacushquin. <sup>24</sup> Ua noiamacai un yosian cuscan ua nicaima. Na tsainfo man nicaicain uhuunacoinma. Uhuun Upan tsain un mato yoi.

<sup>25</sup> Un matomaqui cataima un mato yoiyofafaini. <sup>26</sup> Ascan Upan Diosin ahuun Yoshin Shara uhuunshon matoqui nichu mato futan afain maton ointi fucash huanonma man ishara. Nantifi un mato tapimafain un mato yoiai cuscan un mato shinanmai man ointiaquimanonma.

<sup>27</sup> Un matomaquinoashu cafiakin un maton ointi mato unimamashquin man isharanon. Icoinra huafoanmacai maton ointi mato unimamatiroma mato imasharanon. Mato anori yoifiaquin ipaitsi mato yoi. Uncai ato cuscarama un mato icon yoi. Ascacun shinanchacayamafain ratuyamacahuun.

<sup>28</sup> Un mato yoia cuscan man man nica, “Un matomaquinoashu caicain. Ascashiashu un afanan matoqui ooshquin.” Ua noicoianshu man uqui unimatiro umain Upa ari caiton. Upanmain ua fasi finoncoincufin. <sup>29</sup> Nan un mato rama yoia cuscacoin aiton man icoinra huatiro. Ascacun un mato yoiyomisi. <sup>30</sup> Yoshin chacafoan aton niaifo Satanás uqui oi. Ofiashocai ua iquintiro. Ascacun un matomaquinoashu cai. Afanan un mato yoiquin chai huaima. <sup>31</sup> Un Upa Diosin fasi noicoi ascacun nan ua yoia cuscan un acoinmisi. Ascaiton nantififain tapicani un fasi ahuun noiaiton. Funicahuun. Nunoashu non canon, —ishon Jesús noco yoini.

## 15

*Jesús nan fimi ahuun anu uva ahuun caya cuscaracoin*

<sup>1</sup> —Unfin fana uva ahuun caya cuscaracoinquin. Uhuun Upafin uva fana ahuun Ifo cuscaracoinquin. <sup>2</sup> Manfin uva ahuun poyan futsan cuscarafuquin. Rato poya futsanmain fimiofomaquin Uhuun Upa nanfo poshtushon potashquin. Ascafia poyan futsa fimiafo aton tushpa futsafo chacamishti poshtutiro poyan sharafo mutininon fimi sharashquin. <sup>3</sup> Nanscarifi aquin manfin uhuun tsain nicaquin maton chaca potaquin isharashcaquin. <sup>4</sup> Umaquin pashcayamacahuun. Nan un matofu ica cuscariai. Poyan fustisicai fimitiroa ahuun cayamaisi. Nanscarifiai umaqui icashucai un mato imapaiyai cuscan man atiro.

<sup>5</sup> Unfin nan fana ahuun caya cuscaraquin. Ascan manfin ahuun poyanfo cuscarafuquin. Tsoa ufu rafucoincacainaino urifi un afu rafucoiaino ua cuscaracoinri itiro. Ua maisicai marusu man ahuuscatiroma. <sup>6</sup> Ahuun poyan futsa chaca fimioma poshtushon potashquin tsasinon. Tsasicun poyafo icha huatiro coashquin. Nanscarifiai tsoa ufu rafutama umaquin icun nanscarafo chipo icha huashon chi urumanhuan muran ato potashquin. <sup>7</sup> Man ufu rafucoinshon uhuun tsain maton nomuran shinanfafaquin man ahuarashta cufia cuscan Upa Diosin mato ashotiro. <sup>8</sup> Un mato imapaiyai cuscan man afafainnifin man ufu rafumisi itiroquin. Man ascaitonfin mato ointirofoquin Upa Diosimain sharacoincunfin.

<sup>9-10</sup> Uhuun Upa Diosin ua noicoian cuscan nanscarifi huaquin un matohuun noi. Nan shinanfafaicahuun. Unuyamacahuun. Uhuun Upa Diosin ua yonoa cuscan un amisi. Ascan ua noia cuscan un shinanfaini. Nanscarifiai un mato yonoa cuscan man aiquin un mato noiaiton man shinanfafaaitiro. <sup>11</sup> Un mato yoia cuscan man aino un matoqui unimatiro. Marifi fasi man unimacointiro. <sup>12</sup> Isca huaquin un mato yonoi, “Un matohuun noiai cuscan noinancahuun.” <sup>13</sup> Tsoan afu rafua futsan noicoifin ahunoashu natiroquin. A noiai cuscacai tsoan finontiro. <sup>14</sup> Un mato yonoai cuscan man aifin ufu rafumisi man itiroquin.

<sup>15</sup> Nan ufu rafuafosi un shinain cuscan un ato tapimatiro. Manfin ufu rafumisiquin. Ascan nantifi uhuun Upan ua yoimisi cuscan un matori tapimana. Ascacucacai man afanan uhuun oinmatiforan un mato huaima. Man ufu rafumisiran un mato huashquicain. <sup>16</sup> Man ua catonyamafaiton ufi un mato catoon ua cusca man inon matohuunshon futsafoanri ua icoinra huanonfo. Nanfoan ua tanapacunacafo ufu ipashcaquin. Asca huaino man ahuarashta Upa Dios uhuun anuhuunshon yocaiton mato ashotiro. <sup>17</sup> Afanan un mato yononon. Noinancahuun.

*Icoindra huamafoan Jesús fu rafumisifo noicasmacani*

<sup>18</sup> Icoindra huamafoan mato noicasmaifoan shinancahuun. Uacafin noicasmaquin tau huanifoquin. <sup>19</sup> Marifi man ua icoinra huayamaiton matori noicuanafu. Afi ranan noinanfo cuscan matori noicuanafu. Ascacacai man ato cuscarama. Un mato catonni icoinra huama cuscarafu man inonma. Ascacun icoinra huamafoan mato noicasmacani.

<sup>20</sup> Un mato yoia cuscan shinancahuun. Un mato yoia isca huaquin, “Yonomisitocai ahuun ifo finonmatiro.” Ua omitsiscamacaquin matori omitsisca huashquicani. Un ato yosian cuscan acashon marifi man ato yosiaiton matori nicacoincani. <sup>21</sup> Man ua tanaiton ua amisifo cuscan matorifi huashcani. Upa Diosin ua nichifianicai tsoan onancoinmisima. Ascan matori asca huashcani. <sup>22</sup> Un atoqui oyamani Diosin tsain un ato yoiamaino tapicuanafoma. Ascan chaca huafiaquicai tapicuanafoma. Tapiyamaifoannocai atohuun nuama. Ascacacai un oni un ato Diosin tsain yoishquin. Ascacucacai natian tsoan yoitiro isca huaquin, “Uncai nicataima. Ascacun un chaca huama,” ishoncai anori icon yoitirofoma. Man nicafiamisishuquin aton chaca shatuafoma. Ascan aton chaca atohuun nua.

<sup>23</sup> Tsoan ua noicasmái uhuun Upari noicasmái. <sup>24</sup> Diosihuunshon tsoa futsan atiroma cuscan un ato ismamisi. Ascacacai aton chaca shatuafoma. Un ato ismayamaino aton chaca atohuun nuucuanama. Tsoa futsan atiroma cuscan un ato ismafaini. Man oinfiacashon ua

noicasmafain uhuun Upari noicasmafo. <sup>25</sup> Diosin tsain cununi cuscan mun acoinna. Diosin tsain uhuunoa cununi isca huaquin,

“Un ahua chaca huayamafiacun ua noicasmacaniran,”  
ishon uhuunoa cununi.

<sup>26</sup> Matori noicasmafiafoan uhuun Upa Diosin arishon ahuun Yoshin Shara matoqui nichishquin. Nanton maton ointi unimamatiro isharashcaquin. Afin iconmisiquin. Uhuunoa mato yoishquin. <sup>27</sup> Un aton Diosin tsain yoiqui tau huanitian marifi man ufu imisiquin. Ascashonfin marifi uhuunoa nantishon tapiquin man ato yoitiroquin, —ishon Jesús yoini.

## 16

<sup>1</sup> Ascano Jesús noco yoini isca huaquin, —Man omitsiscataima un mato yoiyoa man nunori shinanonma. “¿Ahuuscaimun Jesús uhuun Numamisifiano un omitsiscai?” ishon man anori shinanquin man ua potapaishquin afanancai man ua icoinra huashquima. <sup>2</sup> Tapicahuun. Maton caifo nan ua icoinra huamafoan chipo yonoi man nocon ichananti pushu muran afanan iquinonma. Un mato icon yoinon. Chipo amaquiri shinancani isca huaquin, “Diosin apaiyai cuscan non huashonon. Non Jesús icoinra huafo rutunon,” ishon anori shinancani. <sup>3</sup> Uhuun Upa onanyamafain uarifi onancoianfoma. Ascacun mato asca huashcani.

<sup>4</sup> Man ua tanaquin tau huanitiancai man chipo omitsiscashquiran un mato huanima. Un matofu iyoflashocai un mato yoiyonima. Natian un matomaqui caiyoicai. Ascan man omitsiscaitian un mato yoiyomisi cuscan huaquin man shinantaniran, —ishon Jesús noco yoini.

### *Diosin Yoshin Sharapan acai cuscan*

<sup>5</sup> Afanan Jesús noco yoini isca huaquin, —Uhuun Upan ua nichini. Natian un afanan aqui caicain. Ascafiacai man ratoran futsan ua yocama, “¿Min raqui caimun?” man huama. <sup>6</sup> Un mato yoia cuscan maton ointi muran man fasi nocoi. <sup>7</sup> Un mato icon yoinon. Un mato shara huahuunshon otomaqui caiyoicai. Un cayamainocai Diospan Yoshin Shara matoqui otiroma mato cushusharafain mato ashoshquin. Ascafia matomaquinoashu caquin uhuun Yoshin Shara un matoqui nichifainicai. <sup>8</sup> Afi oshon a icoinra huamafoan chaca huamisifo ato tapimai oshquin Diosin amapaiyai cuscan huafain tapimai oshquin. Diosin icoinra huafoma ato onaintimai cuscan ato tapimai oshquin. <sup>9</sup> Ua icoinra huatama chaca huafo cuscan ato tapimai oshquin.

<sup>10</sup> Unfin uhuun Upan ua amapaiyai cuscan un huamisiquin. Ascan uhuun Upa icano un caicain ua afanan man oionofoma. Nanri Diospan Yoshin Sharapan ato tapimai oshquin. <sup>11</sup> Nantianri icoinra huafoma aton niaifo Satanás Diosin man onaintima afanan ahua yoinonma. Nanri Diosin Yoshin Sharapan ato tapimai oshquin.

<sup>12</sup> Un mato fasi paratama tapimapaifiaintocai man natian tapitiroma. <sup>13</sup> Ascafiatan Diospan Yoshin Shara matoqui oshon mato ahuarashta Diosin tsainhuunoa mato tapimashquin. Aafin iconmiscoinquin. Ahuunshon mato yoitama uhuun Upan yoia cuscan nannoricoin mato tapimai. Inonpacoai cuscari mato tapimai. <sup>14</sup> Un yoiyai cuscan Diospan Yoshin Shara mato tapimai uhuunshon man uhuunoa shinansharanon. <sup>15</sup> Nan uhuun Upanaforifi uhuunariquin. Un mato yomisi cuscan uhuun Upa Diosin ahuun Yoshin Sharapan mato tapimashquin.

<sup>16</sup> Ascan uncain matofu iyoima. Uacai man oinyoshquima. Ascafia ahuutishomatan man afanan ua oinshquiran, —ishon Jesús noco yoini.

*Jesús furafumisifoan aton ointi nocoyofiacanashu chipo unimacoinnifo*  
<sup>17-18</sup> Nicacatan atirifi non yoinanni, —Ahuuscain noco isca huaimun, “Uhuun Upa ari un cai. Ascan uncai matofu iyoima. Uacai man oinyoshquima. Ascafia ahuutishotama man afanan ua oinshquiran,” ishon noco yoi. Noco yoiai cuscacai non tapiamaran, —icashu non yoinanni.

<sup>19</sup> Nanfohuunoa non yocapaiyainton Jesús onanni. Ascanshon noco yoini, —¿Un mato yoiai cuscan man tapiashma man yocanonaincain?  
<sup>20</sup> Un mato shafacafi yoinon. Un omitsiscaino ua icoinra huamafo fasi unimashcaini. Mancai ascashquima man ua manoshquin uaiquin. Uaiflashu chipo fasi man unimashquin.

<sup>21</sup> Ainfon facu cainti chaima tau isin huaino isinyotiro. Chipo ahuun facu cainshon afanan ahuun isin shinantiroma. Unimacointiro ahuun facu cainsharashu. <sup>22</sup> Nanscarifiai un matomaquinoashu caitian maton ointi muran man omitsiscayofiashu un afanan matoqui oano ua oin man fasi unimashquin. Man unimaitocai tsoan mato umaqui imatiroma man unimanonma. <sup>23</sup> Un funiaitian un afanan matofu iyamano man afanan ahuara ua yocaima. Un mato icon yoinon. Uhuun anuhuunshon man Upa Diosin yocatiro. Ahuarashta uhuun anuhuunshon man Upa yocaiton mato inanshquin. <sup>24</sup> Uhuun anuhuunshoncai man Upa yocayomisima. Ascan uhuun anuhuunshon Upa yocacahuun. Man yocaiton Upan mato inanshquin. Mato inainno man fasi unimashquin.

*Jesucristo fustitofin nantifi chacafononcoian*

<sup>25</sup> Un mato yoiaifo tapiflashocai atirifi man tapiataima. Un mato shafacafi yoicoiantaima. Ascafia un chipo mato yoicoiun Upa Diosihuunoa shafacafi man tapinon. <sup>26-27</sup> Man ua noi. Un Diosin ariashu matoqui oni man ua icoinra huamisi. Ascan Upa Diosin matori noicoiun. Ascacufin un matomaquinoashu caitian un matohuunshon Upa yocainmacai mafincoin uhuun anuhuunshon Upa yocashquincahuun. <sup>28</sup> Un Upa ariashu oni nocofunucain mai anoashu cainshquin. Natian un mai anoashu afanan Upa ari caicain, —ishon Jesús noco yoini.

<sup>29</sup> Yoiaiton non afu rafumisifoan non cumaniquin, —¡Aicho! Natian min noco afanan fomainma. Natian min noco fasi shafacafi puashoan.

<sup>30</sup> Natian man non tapia min nantifi tapicoian. Mia yocataima min rufofo onanyoi mia yocapaiyai cuscan. Ascacun min Dios ariashu onicon non mia icoinra huai, —ishon non yoiaiton. <sup>31</sup> —Inoncai man ua icoinra huai. <sup>32</sup> Ascafia chipo umaquinoashu man pashcafainicai. Maton pushu ano man cai. Icon natian man ua potafainicai. Tsoacai ufu nituima. Man ascafiainocai urusu un nituima. Man umaqui cuyofofiaino uhuun Upa fu un patanain. <sup>33</sup> Un mato yoiafo uhuunshon maton ointi man unimamafain man isharanon. Nuno icoinra huafoma murannoashu omitsiscayofiacain shinanchacayamacahuun. Un Satanás yafi icoinra huafomati finoncoianquin. Ascan un mato cushuicai, —ishon Jesús noco yoini.

## 17

*Jesús ahuunoa Apa Diosi cufini*

<sup>1</sup> Asca huatan Jesús nai foisinifoantan yoini,

“Upan, natian un nanon ato tapimahuun un min Facu shara-coinquin. Min uqui unimai ato tapimahuun. Min anori ato tapimanaino urifi un ato tapimatiro min fasi sharacoincun.

<sup>2</sup> Mian yonoa un atoti yonopacunon. Mian inanti un ato nimapacunon. <sup>3</sup> Mirus fusti min Diosincuin. Unfin Jesucristoquin nan mian nichini. Tsoan noco onancoianfin nipanacafoquin.

<sup>4</sup> Min ahuu cuscara sharamainquin nuno mai ano niyoshon un ato puashoan. Nan mian yonoa cuscan mun aca. <sup>5</sup> Ascan Upan, un mifu iyopaoni cuscan afanan ua imahuu. Non mai oni huataima u mifu niaifo shara iyopaoni. Afanan nanscara mia ya ua imahuu un min Facu shara nantiffain ua tapinonfo.”

*Jesús a fu rafumisifo cufishoni*

<sup>6</sup> “Nuno mai ano a ufu rafumisifo mian inanni un ato ismanon min ahuu cuscara sharamainquin. Na ufu rafumisifo minafociacun mian ato inanni. Min tsain mia nicacacoianfo.

<sup>7</sup> Mian yoia cuscan nantifi un ato yoimisi. Nanfo tapicoianfo.

<sup>8</sup> Mian yoia cuscan un ato yoiaiton ua icoinra huacoinnafo. Un miariashu fotoniri tapicoianfo. Mian nichinicun icoinra huacoinnafo.

<sup>9</sup> Un mia ato cufishofafaini. Uncai a icoinra huafoa ato cufishonima. Nan mian inannifosihuunshon un mia cufifafaini. Un mia ato cufishofafaini nanfomain minafocufin. <sup>10</sup> Nan uhuunaforifi minaquin. Ascan nan minaforifi uhuunaquin. Ua icoinra huafohuunshon onantirofo unmain ahuu cuscara sharaquin.

<sup>11</sup> Uncai afanan na mai ano iyoima. Unfin miqui caicain. Afofin na mai ano nitucaniquin. Upan, min fasi sharaquin ato cushusharahuu.

Min curushhuunshon ato cushusharahuu. Mian inanfoti ato cushusharahuu. Nonfin nan fusti cuscaracoinquin. Nanfori no fu nan fusti cuscararifi ato imahuu.

<sup>12</sup> Un atofu iyoshon un ato cushushara. Minhuunshon un ato cushushara. Un tsoanshta funoama. Nan Satanás ahuu facu fusti funoa. Min tsain yoiyoni cuscan nan fusti funoa.”

<sup>13</sup> “Natian un mi ari caicain. Un cataima un yoioi nan un icai cuscari unimacoinnonfo. <sup>14</sup> Mian yoia cuscan un ato tapimamisi. A icoinra huafoanma ato noicasmaifo. Ato cuscarafocutsi ascacun ato noicasmafo. Ascarifi atan unricai ato cuscarama. Ascan uarifi noicasmafo. <sup>15</sup> Uncai mia yocama mai anoshon min icari min ato ihuion. Ascatararocon un mia yocain nuno mai anoshon min ato cushushara nan yoshin chaca Satanás ato ahuusca huanonma. <sup>16</sup> Nanfoancai icoinra huafoa aton yorama. Unrifica un aton yorama.

<sup>17</sup> Min tsain iconcain. Min tsainman ato shara huamahuu mia cuscara shara inonfo. <sup>18</sup> Mian yorafocui nichini cuscan nanscarifi aquin un ato yorafocui nichicain. <sup>19</sup> Mian yoia cuscan mun atohuunshon aca afoanri ascarifi huanonfo.”

*Jesús nantifin a icoinra huafo cufishoni*

<sup>20-21</sup> “Uncai ato fustihuunshon cufifafainima. Nantifi aton tsainhuunshon ua icoinra huanonfo un ato cufishofafaini nan non shinain cuscarafosi arifi shinanonfo. Min ufu icacainai cuscan aforifi no fu ifafaincaini mian nichini icoinra huamafoan

icoinra huanonfo. <sup>22</sup> Min ufu imisi cuscan urifi un atofu imisi. Ascan non shinain cuscarafosi arifi shinannonfo. <sup>23</sup> Min ufu icacainai cuscan urifi atofu icacaini. Ascan min ipaiyai cuscan nanscarafosi non shinantiro. Min ointi cuscarafosi non itiro. Nan oincaquin icoinra huamafoan tapitirofo mian nichinicun mian noia cuscarifi ua icoinra huafohuunri min fasi noicoin.”

<sup>24</sup> “Upan, nan mian inanfo un mifu icano un atorifi iquinpai un mifu ishara cuscan oinonfo. Non nan mai oni huataima min ua noicoinyopaoni. Ascan min yononi cuscan un mifu imisi nantifi min iquinon.”

<sup>25</sup> “Upan, min shara fustisi imisi. Icoinra huamafoancai mia onanfoma. Ascan un mia onancoin. Min ua nichini ufu rafumisifoan tapiafo. <sup>26</sup> Min ahuu cuscaramainquin un ato ismamisi. Nanscasi aqui un ato ismafaini min ua fasi noimisi cuscan afoanrifi munonfo un atofu icacainaiton,” ishon Jesús Apa cufini.

## 18

### *Jesús achinifo*

*Mt 26.47-56; Mr 14.43-50; Lc 22.47-53*

<sup>1</sup> Ascatan Apa cufinquin anaitiano non afu rafumisifo shushan Cedrón yamu pocufainiquin. Nanno fanafoan ahuun anu olivo. Nan fanafo muran non iquitoshini. <sup>2</sup> Nannorimain Jesús noco iyomisicunfin. Ascano Judas nanton Jesús ato achimaniton tapini raquimain non foaquin. <sup>3</sup> Nannori Judaspan ranushumuafu non nocon yorafohuunshon Dios cufimisi niaifofoan futsafo afu nichini non Fariseofo iyoni Jesús achimaicaquin. Chiifo ya nopu non coshatifo non ashifo yari funifo.

<sup>4</sup> Ascaiton Jesús onanni ahuuscamain huacanicain. Onanshon ato yocani, —¿Man tsoa funaimun? —ishon yocaiton. <sup>5</sup> —Jesús Nazaret anoa non funairan, —huaifoan. —Unfinquin, —ato huaiton. Nan ato achimaicai Judas nanno atofu ini. <sup>6</sup> —Unfinquin —Jesús ato huatanaino chitucuri ifainpai cani pacui fustunifo. <sup>7</sup> Ascashon Jesús afanan ato yoca futsani, —¿Tsoan man funaimun? —huaiton. —Jesús Nazaret anoa non funairan, —huaifoan. <sup>8</sup> —Munfin mato yoiaquin. Unfinquin. Ua funacaquin na ufu icafo ato nichicahuun, —ato huani. <sup>9</sup> Inonpacoai cuscan Jesushuanoa cunuyoni isca huaquin, —Uncai mian inan un fustishta funoamaran, —ishon cununi. Nan cununi cuscan Jesús rama Apa Dios cufini.

<sup>10</sup> Ascaino Pedronun ahuun nopu chinushumua ahuun ona muran-noa tsucainifoantan nocon yorafohuunshon Dios cufimisi niaifocoinin ahuun oinmati pashtufain rurani. Nan oinmati ahuun anu Malco ini. <sup>11</sup> Ascaiton, —Min nopu ahuun ona muran huahuu. Upa Diosin ua amapaiyai cuscan un aicai, —Jesús Pedro huani.

### *Jesús Anás ano iyonifo*

*Mt 26.57-58; Mr 14.53-54; Lc 22.54*

<sup>12-13</sup> Ranushumuafu aton niaifofoya nocon caifo Israelifo niaifofoyashon oscashon Jesús munushnifo. Munushushon Anaspan pushu ano iyonifo. Nan Anás Caifás ahuun raisi anifo ini. Caifás nantian nocon yorafohuunshon Dios cufimisi niaifocoin ini. <sup>14</sup> Nanton nocon caifo

Israelifo yoini, —Nocofunu fusti nantifi yorafohuunoashu naafin shara itiroquin, —huani.

—*Uncai Jesús oinmisimaran, —ishon Pedronun yoini*

*Mt 26.69-70; Mr 14.66-68; Lc 22.55-57*

<sup>15</sup> Jesús iyoaifono Pedro yafi afu rafumisifo futsanri acachori fonifo. Pushu ano unmainti nocotan afu iquifainnifo. A fu rafua futsa niaifoan onanshon iquimani Jesús iquicainaino. <sup>16</sup> Pedron shoi caicainti ano nituni. Ascano nan niaifoan oinmisishaqui nasocura shomayaton caincaiti cushua yoini, —Pedrori iquimahuu, —huani.

<sup>17</sup> —¿Mirifi min Jesús fu rafuamun? —ishon shomayaton Pedro yocaiton. —Ma. Uncai afu rafumisimafinquin, —huani.

<sup>18</sup> Matsinacoincani nantifi chiin yoonifo. Niaifofo yafi oinmatifori yoonifo. Pedrorifi ato fu yooni.

*Nocon caifoan aton niaifoan Jesús yocani*

*Mt 26.59-66; Mr 14.55-64; Lc 22.66-71*

<sup>19</sup> Ascatan nocon yorafohuunshon Dios cufimisi niaifocoinin Jesús yocani. —Mi fu rafumisifohuunua ua tapimahuu. ¿Ahua min ato yosiamun? —huaiton. <sup>20</sup> —Uncai onuyoiama. Nantiffain ua nicanonfo un yoimisi. Un nocon ichananti pushu murannofo yafi nocon Dios fu tsainti pushu murannoari un nocon caifo yosimisi. Uncai uhuun tsain fustishta un fomanmisima. <sup>21</sup> Ahuuscaian mian yocain. Ua nicamisifo yocahuun. Un yoimisi cuscan nanfoan tapicoianfoquin, —Jesús huaiton.

<sup>22</sup> Ascaiton ranushumua afu niaton tapastan. —¿Ahuuscaian nocon niaifo min anori aquimun? —huaiton. <sup>23</sup> —Ahua un amaqiri yoiamainquin ua yoihuu. Ascán uhuun tsain iconfiacun ahuuscaian mian tapasain, —huani. <sup>24</sup> Anori icaiton nicaquin Anás ahuun raisi Caifás ano Jesús nichini. Caifás nocon niaifocoin ini. Ahuun munushumua ya nichini.

*Ascano Pedron afanan yoaini, —Uncai Jesús oinmisimafinquin —ishon yoini*

*Mt 26.71-75; Mr 14.69-72; Lc 22.58-62*

<sup>25</sup> Ascaino afianoashu Pedro atofu yooriani. Ascaiton afanan Pedro yocanifo, —Miriffin min afu rafumisifutsaquin, —ishon yocaiton. —Unmafinquin. Uncai afu rafuamaquin, —huaiton.

<sup>26</sup> —¿Un mia oianmamun? Nan mianfin un oianquin. Fanafo mapoa murannoa Jesús yafi un mia oian. Min racafinquin, —nan nocon yorafohuunshon Dios cufimisi niaifocoinin ahuun oinmati pashtuaton ahuun yoran Pedro huaiton. <sup>27</sup> —Ma. Unmafinquin, —Pedron huaino tacara cuoinacahuani.

*Ascano niaifon Pilaton ano Jesús iyonifo*

*Mt 27.1-2, 11-14; Mr 15.1-5; Lc 23.1-5*

<sup>28</sup> Ascano funamanrishta Caifás ahuun pushu anoshon Pilato niaifo ano Jesús iyonifo. Nanfin Romanon iniquin. Ascashiashcai Pilato ahuun pushu muran iquinifoma aatsi Israelicun. Shinanpaonifo, —Non a muran iquiashu non chaca itiroran, —icashu ascashu iquicasmanifo. Afocai Israelifomaran icashu. Diosin oinmati nan afu imisiton nocon shuninfoan facu iyoafofo ato finonmani nan fusiton icaitian shinantacani. Nanscacun Pilato ahuun pushu muran iquicasmanifo. A muran iquiashu non chacacoin itiroran fusi muaimuran non iquitiroma. —A



muran iquishocai nocon caifo futan non chashoanun facu pitiromaran, —ishon shinannifo. <sup>29</sup> Ascaino chifi cainacahuan Pilato ato yocani, —¿Ahua chaca huacunmun na nocofunu uano man ihuuaquin? —ishon ato yocaiton. <sup>30</sup> —Ahua chaca huayamacucai non miqui ihuucuanamaran, —ishon huaifoan.

<sup>31</sup> —Mafi iyotacahuun. Maton shunifoan yononi cuscmain chaca Israelifoan huaquin. Nanfin maton fuyamisiquin. Ahuamain chaca huaquin mafi ahuuscara huacahuun, —huaiton.

—Maton yorafoan yononifo cuscacai non tsoa mastatiroma naanon —icashon yoinifo. <sup>32</sup> Jesús yoyioni cuscan nanscacoín huaquin. Mastashquicani naanon.

<sup>33</sup> Ascaino Pilaton ahuun pushu muran Jesús yioni yocanon. —¿Minmun Israelifoan aton niaifon? —huaiton. <sup>34</sup> —Mifimun min anori shinaincai. Futsanfoanraca mia uhuunoa yoiafo, —huaiton.

<sup>35</sup> —¿Min shinanmun urifi un Israeli? Min yorafo futan maton yorafohuunshon Dios cufimisi niaifofoan mia uqui ihuuafo. ¿Min ahua chaca huacunmun mia uqui ihuuafoquin? Ua yoihuu, —huaiton. <sup>36</sup> —Uhuun yorafocai na mai anoafoma. Un nuno mai anoa niaifocun ua numacua-nafo Israelifo ua achinonfoma. Uhuun yorafo futsa ari icafo —huaiton.

<sup>37</sup> Ascaiton Pilato cumani, —¿Iconmun min niaifo? —ishon yocaiton. —Mian yocain cuscafin unquin. Niaifo icain iconcoín yoipacushaquin un cainni. Tsoan iconcoín nicapaiquin ua nicamisifo, —Jesús huaiton.

<sup>38</sup> —¿Ahuamun iconquin? —Pilato cumani.

### *Niaifoan ato yononi Jesús rutunonfo*

*Mt 27.15-31; Mr 15.6-20; Lc 23.13-25*

Asca huatan chifi cainacahuani Israelifo yoishquin, —Un na nocofunu yocafiagai un ahuunoa ahua chaca nicama. <sup>39</sup> Natian maton fuyamisí nocoano man imisi cuscan maton caifo cunu murannoa iquiafo fusti cainmafafainmisi. Maton shunifoan aton facu iyoafofo finonmani shinantaquin nantianri fusti mato cainmafafainni. ¿Ascan Israelifoan, maton niaifo Jesús un mato cainmashotiromun? Casharanon, —Pilaton ato huaiton.

<sup>40</sup> Oi ashcafinin cumanifo, —Ma. A caimatama Barrabás caimahuun, —huanifo. Nan Barrabás nocon caifo shinanchacamanaino mucai fut-sucashon futsa rutunifo.

## 19

<sup>1</sup> Ascashon Pilaton ato yonoa Jesús yionifo fichiqui cuno tuchiaton coshanonfo. <sup>2</sup> Ascaino ranushumuafoan mosha chainipafo maiti huacashon maimanifo. Aquí cashupaiqui sahuuti nanhuainqui pocoa ointsa sahumanifo. <sup>3</sup> Ascashon aquí cashucaquin. —¡Aicho! Minfin Israelifoan aton niaifoquin. Min chai niyopacupainon, —huatan fupasiriani.

<sup>4-5</sup> Ascaino Pilato Jesús chifi cainquifainni oinonfo. Jesús sahuuti nanhuainqui pocoa ointsa sahumatan mosha chainipafo maiti huashotan sahumanifo. Ascashon Pilato, —Oicapon na nocofunu. Ucai ahuunoa ahuashta nicayomisima un chaca huapanan, —huaiton.

<sup>6</sup> Ascafiatton nocon yorafohuunshon Dios cufimisi non niaifo futsafoanri oinquin Jesusqui tsain chipunifo. Ascashon oi ashcafinin —¡Mastahuun! —huarianifo. —Ascaiton mafi iyoshon mastatacahuun.

Uncai ahuunoa ahuashta nicayomisimafinquin un chaca huapanan, — Pilaton ato huani. <sup>7</sup> Ascaiton nocon caifoan cumanifo, —Ma. “Unfin Diospan Facuquin,” Jesús noco huamisi. Ascacun nocon niaifofoan yonoa, “Tsoa anori icafin naiquin. Nayamacaiyaima,” —huaifoan.

<sup>8</sup> Ascaifoan nicai Pilaton fasi ratui finacoinni. <sup>9</sup> Ascashon Jesús ahuun pushu muran afanan iyoni. Iyoshon yocani, —¿Raniamun minquin? — ishon yocani. Yocafiainocai Jesús pusinima. <sup>10</sup> —¿Mian cumaimamun? ¿Min tapiamamun un mia caimayamaraquin un mia mastamatiro? — huaiton.

<sup>11</sup> —Diosin mia yonoyamainocai mian ahusca huacuanama. Ascacun nan mian chaca huanon mi ano ihuuafon nanfoancafin ua chaca huaquin finacaniquin, —huani.

<sup>12</sup> Ascaiton nicaquin Pilatonun Jesús caimapairiani. Ascafiaino nocon caifo Israelifoan tsain isininpaton yoinifo, —Tsoa, “Unfin niaifoquin,” icafin Romanonfoan niaifocoin Cesari chaca huaiquin. Ascan min na nocofunu Jesús caimanacai nocon niaifocoin Cesari min ahuun yorahuancoinma, —icashon oi ashcafinin yoirianifo.

<sup>13-14</sup> Nicatan afanan Pilatonun Jesús chifi cainmani. Nantianri nocon caifo Israelifo fusiti iyocoshquin icaino. Nan Diosin oinmati nan afu imisiton aton shunifoan facu iyoafofo finonmani shinantanfafainpaon-nifo. Fari masafinin racano Pilatonun Jesús iyoni anoshon aton shara aroshofafainmisi. Ano tsaoshon yocanshquin chaca huayamaraquin shara huacun. Nannoshon ato yonotiro onaintimayamaraquin nichimisi. Nanno anuni —Toquiri saparan, —huapaonifo. Nocon caifo Israelifoan ahuun tsainman, “Gabataran,” huanifo. Pilaton tsaoshon aton ointaifi Jesús cainmani. Cainmashon, —¡Oincapon! Naafin maton niaifoquin, —Pilaton ato huaiton.

<sup>15</sup> Ascafiaton, —Iyoshon mastatahuun nanon. Ihui coyan iquinanquin mastahuun, —oi ashcafinin huaifoan. —¿Iconmun unmun maton niaifo mastaicai? ¿Manmun mastanpaicai? —Pilaton ato huaiton. — Cesari fustifin nocon niaifoquin. Nocon niaifo futsa yamai, —ishon nocon yorafohuunshon Dios cufimisi niaifofoan yoinifo.

<sup>16</sup> Asca huatan inoncai Pilaton atoqui Jesús caimani. Ranushu-muafoan iyocashon ihui coyan iquinanquin mastai focaquin iyonifo.

*Jesús ihui coyan iquinanquin mastanifo*

*Mt 27.32-44; Mr 15.21-32; Lc 23.26-43*

<sup>17</sup> Ascano iyoaifoanno afincoi ihui coyan iquinan iyashon foni. Anoshon mastaifoanno noconi. Nanno ahuun anu mapo shaoran huanifo. Israelifoan tsainmanfin Gólgotaran huapaonifoquin. <sup>18</sup> Jesús yomutso rafu yafi mastanifo. Yomutso rafutan naquihuano Jesús mastanifo. <sup>19</sup> Ascan mastacashon Pilaton yonocun Jesús ahuun mapo man-aonrishta aqui cununifo.

JESÚS NAZARET ANOA ISRAELIFOAN ATON NIAIFOCOINRAN ishon Pilato ato cunumani. <sup>20</sup> Jerusalén anoashu mani futsafo ya osiafo ichapacoin inifo. Jesús nanno chaimashtashon mastanifo. Ascanofin Pilatonun aton tsain futsa futsatapafo ato cunumani isca huaquin, — Jesús Israelifoan aton niaiforan —ishon tapinonfo. Nocon tsain cunufain Griegofoan aton tsainri cunufain Romanonfoan aton tsainri cununi. <sup>21</sup> Nan oincatan nocon yorafohuunshon Dios cufimisi niaifofo Pilato ano fonifo. Yoifocani, —“Jesús nocon niaifocoinran,” huacaquima

“Unfin Israelifoan un mato niaiforan, Jesús icaran,” ishon cunuhuu, —huaifoan.<sup>22</sup>—Un cunumana cuscan nannoricoin un cunua. Uncai ahua futsan afanan tuqui huaimaran, —ishon Pilaton ato cumani.

<sup>23</sup> Ranushumufoan Jesús mastafono ahuun sahuuti fianpacunifo. Pashcananpacushon mani rafu non rafuri machinifo. Ascano ahuun sahuuti chainipa ashcapari chichia tushu huayonifo.<sup>24</sup>—Fashnuyamacahuun. Nanscara muma shara non finon. Non aya cashutihuun aqui numero nuupacua potashon futsa shuhuianton ahuun sahuuti ashcapari chichia fitiroran, —icashu yoinannifo. Nannori Diosin tsain Jesushuunoa inonpacoai cuscan aqui cunuyoni isca huani,

“Uhuun sahuutifo aya cashutihuun aqui numero nuupacua potashon futsa shuhuianton uhuun sahuuti finonran,”

ishon inon pacoai cununi. Ascano ranushumufoan nanscacoïn huaquin.

<sup>25</sup> Jesús mastafon chaimashta ahua non ahuun achin nan Cleofaspan ahuni non María Magdalena non afo nanno chaimashta ninifo.<sup>26</sup> Un non Jesús ahuari chaimashta non nia ini. Jesús noco oinquin yoini, —Uhuashtan, natian Juan min facu iquiran, —ishon yoini. Ua noiquifin anori huaniquin.

<sup>27</sup> Asca huatan —Naafin min uhuaquin, —ishon ua yoiaton nicaquin uhuun pushu ano un iyoni cushusharashquin.

### *Jesús nani cuscan*

*Mt 27.45-56; Mr 15.33-41; Lc 23.44-49*

<sup>28</sup> Jesushuunoa Diosin tsain cunuyonifo cuscacoïn acoincun onanshon Jesús yoini, —Un nomicoinran, —ato huani.<sup>29</sup> Ascano fimi unu focash muran nanupacufoantan faca tahua shatun finifoantan Jesús inanpaini.

<sup>30</sup> Jesús muushon yoini, —Natian uhuun Upan ua yonoo cuscan mun acoïnna, —huani. Ascatan nai fupopacucahuani.

### *Ranushumuaton Jesús ashin pishi chachini*

<sup>31</sup> Iyoco futsaino nan fusititian Diosin oïnmati nan afu imisiton non con caifo Israelifo aton shunifoan facu iyoafofo finonmani shinantan-fafainpaonifo ini. Ascano Jesús yafi yomutso rafu ihui coyan iquinanqui nanno mastafonno nocon niaifofoncai fusititian oïnpainifoma. Ascanofin Pilato ano fonifoquin, —Funamanri nocon fusititian. Jesús yafi yomutso rafu ato fitucucahuun nariscanon. Mai huariscanonfo nocon fusititian mastafonno ninonma, —ishon nocon niaifofon Pilato yoinifo.<sup>32</sup> Ascan Pilato ato yonocun ranushumufoan yomutso rafu aton fitash shao tucunifo nariscanon.<sup>33</sup> Ascano Jesusqui fucaquin oianfo man naacoïnna ini. Ascaitocai fitucunifoma.

<sup>34</sup> Ascaiton man naa oinquin ranushumuaton ahuun ashin pishi chachiano imi focain unu foni.<sup>35</sup> Unfin nan oinni cuscan un mato yoiaton marifi man icoinra huanon. Unfin icon yoiquin.<sup>36</sup> Diosin tsain yoimisiton inonpacoai cuscan cunuyoni isca huaquin, —Ahuun shaocai tucushquimafinquin, —ishon cununi.<sup>37</sup>—Pishi chachiaitonfin oïnshcaniquin, —Diosin yoimisi futsan inonpacoai cuscan Jesús naiyoataima cunuyoni.

### *Jesús mai huanifo*

*Mt 27.57-61; Mr 15.42-47; Lc 23.50-56*

38-39 Ascano José Arimatea anoashu cainni nan Pilato ano caní, — Jesús ihui coyan iquinanmaquinoa un fotomapai mai huashquin — ishon Pilato yocani. Ascaiton, —Ahuu, —Pilato huani. Nan José Jesús icoinra huatanafashocai tsoashta yoinima. Nocon caifo niaifofequi musuquin ato yoipainima. Nan Nicodemo futan Josén Jesús ihui coyan iquinanmaquinoa fotomani mai huashcaquin. Nan Nicodemo arifi Jesusqui yamu oni yocaicain. Afi ininti shara ichapa treinta kilo cuana funi Jesús ahuun caya raishashquin funa payocononma. Nan ininti rafu osinan huani tuipa yafi ofucoin. Nan ininti ahuun anu rafu mirra yafi aloes.

<sup>40</sup> Ascano José yafi Nicodemo inintinin pano osho shara ahuun raishashon ahuun raconifo. Nocon caifo Israeliffoan nocon yora mai huaquin amisifo cuscan huanifo. <sup>41</sup> Nii funuamamishti mapoa anoshon afi ano chaimashtashon Jesús mastanifo. Nannori mahua quini funa tsoacai a muran maiyomisima. <sup>42</sup> Nocon caifo nan Israeliffo nocon tunutitiani iyocoshquin icaino fari iquiataima Jesús mai huariscapainifo. Ascán nan mahua quini chaimashtacun a muran Jesús mai huariscanifo.

## 20

*Jesús mahua quini muran man mai huafiafo afanan funini*  
Mt 28.1-10; Mr 16.1-8; Lc 24.1-12

<sup>1</sup> Ascano Domingoaino shafataimashta María Magdalena Jesús maia mahua quini ano caní. Caquin oian mahua quini ahuun fupoitan man fupucua ini. Nan toquirininhuan man fupucua ini. <sup>2</sup> Ascaiton oinfainnicai María ichoni Pedro yafi ua chanihuaicai, Jesús uhuun noimisi noco chani huaicai ichoni, —Nocon Ifoan ahuun caya quini murannoa man raquiran onuafo noncai tapiama, —icaiton nicai.

<sup>3</sup> Pedro fu non maia ano ichoni. Mahua quini muran oincai. <sup>4</sup> Un Pedro shononfaini un rufofo noconi. Chipó Pedro nocotoshini. <sup>5</sup> Rufofo nocotan mahua quini tucupacucahuatan un naistoshini. Naistoshiquin oian ahuun racoitan pano mania ini. Ascaflancai iquitoshinima. <sup>6</sup> Ascaino Pedro ucachiori nocotoshitan mahua quini muran iquicaintan oinquin oian ahuun rashuitafo mania ini. <sup>7</sup> Ahuun foraconitafo fosoitaquiri mania ini. <sup>8</sup> Ascaino unfincoin quini muran iquicaini. Iquicaiquin oinquin un icoinra huani Jesús funia. <sup>9</sup> Oinyoshomacai Diosin tsain yoia cuscan, —Jesús funishqui ain, —non tapiyonima. <sup>10</sup> Ascaiton ointan nocon pushu ano non nasocurani.

*Mariaqui Jesús niriscatani*  
Mr 16.9-11

<sup>11</sup> Non cafiainocai María canima. Mahua quini cachiori niashu uaiqui arifi quini tucucain naisquin oian. <sup>12</sup> Diosin oinmati rafu afu ica sahuuti oshopa sahuucanashu tsoafo ini Jesús rataintanfoanno futsan fosoitaquiri icaino futsan ahuun tau iquitaquiri tsoafo inifo. <sup>13</sup> —¿Ahuuscain min uaicain? —oinmati Dios fu imisiton rafutan huaifoan. —Uhuun Ifo man ahuun caya raquiran onuafo uncai tapiama ahuuscara huaforan, —huatan. <sup>14</sup> Ifiacucahuaquin oian Jesús acachori nifiacucacai onannima. <sup>15</sup> Jesús arifi yocaquin, —¿Ahuuscain min uaicain? ¿Min tsoa funaimun? —huaiton. Afía fasi oromisi shafain, —Minmain uhuun Ifoan ahuun caya rani huaquin ua yoihuu. Un afanan nuno mai huanon, —huaiton.

<sup>16</sup> Jesús, —Maria, —yoini. Ascaiton foisini foanquin oian nan Jesús ahuun fusocoincun. Israeli tsainman, —Rabuni, —huani. <sup>17</sup> —Ua muyamaquin. Uhuun Upari un cataimacai. Ascan ua muquima. Uhuun yorafa ua ato yoishotacahuun isca huaquin, “Uhuun Upa ari un caicain. Nan uhuun Uparifi maton Upaquin. Nan uhuun Diosifin mato Diosiquin,” ato huatahuun, —huani. <sup>18</sup> Ascashu cai María nocoshon yoiquin, —Munfin nocon Ifo un oianquin, —ishon. Noco yoini nan Ifoan yoia cuscan huafain noco yoipacuniquin.

*Jesús afu rafumisifoqui niriscatani*

*Mt 28.16-20; Mr 16.14-18; Lc 24.36-49*

<sup>19</sup> Asca huatan tunutitian iyoconaino man fari caino non afu rafumisifoan nocon niaiffoqui musuquin non cunu fupoti futaonshacashu non ichanan ano noco nushmancayan Jesús niriscatani. Ascaiton noco yoiquin, —Maton ointi fucashcaquima isharacahuun —ishon noco yoini. <sup>20</sup> Yoitan noco ismaquin a piriconun mastaitafo tsuhuu ismaquin mushanshotan ashin pishi chachitan noco ismaniquin. Noco ismaiton non oinni fasi nocon Ifoqui unimacoinni. <sup>21</sup> Afanan Jesús noco yoiquin, —Maton ointi fucashcaquima isharacahuun. Nan uhuun Upan ua nichini cuscan huafain natian un matorifi nichiran, —ishon yoini. <sup>22</sup> Ascashon nocoqui ashaintaquin, —Uhuun Upa ahuun Yoshin Shara ficahuun. <sup>23</sup> Ratoran futsan man aton chaca rauhuacufin Diosin aton chaca soashoshquin. Man aton chaca rau huamafin atohuun nuaquin, —ishon Jesús noco yoini.

*Jesús afanan atoqui niriscatanaino Tomasri atofu ini*

<sup>24</sup> Ascashon noco yoiaino cai Tomás fusti ano inima. Nan Tomás arifi Jesús fu rafumisi futsa ini. Ahuun anu futsa Gemelo huapaonifo. <sup>25</sup> Ascanshon Tomás Jesús oinshoma yoini, —Un ahuun mucu natan pirico tsuhuu uhuun mutotinin muifain ahuun pishi tsuhuu pimuishofin un icoinra huatiroquin. Un asca huayamashocai man Jesús oincoian un icoinra huashquimaran, —ishon Tomás noco yoini.

<sup>26</sup> Asca huatan ocho osha finontan non afanan cunu muran ichananfono Tomasrifi nanno no fu ini. Cunu fupoti futaonshacafono afanan Jesús nocoqui niriscatani. Ascashon afanan noco yoiquin, —Maton ointi fucashcaquima isharacahuun, —huatan. <sup>27</sup> Jesús Tomás isca huani, —Ua min mutotinin uhuun mucu natan muifain ua piiimuihuu. Afanan ua icoinmaran huaquima. Ua icoinra huahuu, —huaiton. <sup>28</sup> Ascaiton Tomás cumaquin, —Minfin uhuun Ifoquin. Minfin uhuun Diosiquin, —huaiton.

<sup>29</sup> —Ua oinquisifin mian icoinra huaicai. Ascan ua oianmafanquin ua icoinra huafofin fasi unimashcaniquin, —ishon Jesús yoini.

*Ahuuscashomain Juanpan Jesushuunoa cunushoniquin ato tapimani*

<sup>30</sup> Ascatan ahuamamishti tsoa futsan atiroma cuscan ahuara futsafo Jesús noco oinmani. Afohuunocai un mato cunushonama. <sup>31</sup> Upan Diosin Jesús catonni. Afin Diospan Facuquin. Un mato cunushona cuscan nan man icoinra huanon. Icoinra huaashu man Dios fu ipanon.

## 21

*Ian cusumun Jesús afu rafumisifoqui noconi*

<sup>1</sup> Ascano Jesús afañan nocoquin noconiquin. Ianmanhuan Galilea cusumun noconi. Un mato yoinon ahuuscashumain Jesús nocoqui oniquin. <sup>2</sup> Pedron yafi Tomás nan ahuun anu futsan Gemelo non Natanael nan Canan murannoa Galilea anoa non Zebedeo facufo nonri afu rafumisi non ichananni. <sup>3</sup>—Unfin nushuicaicain, —Pedro icaiton. —Non mifu cairan, —non huani. Ascashu focani shasho nanufain nushushifiaquin non shiman fustishta finima.

<sup>4</sup> Shafa cuaino ian cusumun Jesús nia ini. Nifiacun non onannima. <sup>5</sup>—Uhuun facufoan man shiman achiamamun, —noco huaiton. —Ahuashta non fiamaran, —non huaiton. <sup>6</sup> Ascaiton noco yoiquin, —Shashon rushti cayacafi potacahuun. Ascashonfin man fitiroquin, —noco huaiton nicacaquin. Nan noco yoia cuscan non potani shashon rushti cayacafi potashon non mua fospicoian ini. Shimanoanfo ihu-ucoincun shasho muran nanupaiquin non rananni. <sup>7</sup> Unfinquin ua Jesús noicoimisi. Ascacun un Pedro yoini, —Nanfin nocon Ifoquin, —un huani. Ascaiton nicaquin Pedron samamashta ahuun sahuuti sahuacafuantan shasho naquinoashu ian muran fotocaini ahuun Ifoqui nocoriscapei. <sup>8</sup> Ascaiton atirifiton non shashon mufaini. Nocon nushuti fospicun shashoqui nushashon non aya tohuufoni. Ian cushan chaima shara. Cien metrocuana.

<sup>9</sup> Non cusumun nocoquin oian chi cutuai ini shiman shoi yafi yoa chi cusumun raca ini. <sup>10</sup> Ascatan Jesús noco yoiquin, —A man rama shiman fia futsan fucahuun, —huani. <sup>11</sup> Ascaino Pedro shasho naqui nanupacuahuan noco nushuti cusumun sharashon. Non oian shimanoanfo nushuti fospicoian. Ciento cincuenta tres shimanoanfo fospicoinflashocai nushuti fashnunima. <sup>12</sup> Ascaiton Jesús noco yoiquin, —Piyoi fucahuun, —noco huaiton. Nicacaquin. —¿Min tsoamuncai? —non huanima. Man nonmain tapishofin nocon Ifocun. <sup>13</sup> Ascanshon Jesús noco pimaquin noco nantifi yoa yafi shiman inanni. <sup>14</sup> Man funitashaquin nocoqui oi rafu non fusti ya ini.

### *Jesús Simón Pedro fu tsainni*

<sup>15</sup> Piquin anaititan Jesús Pedro yocani, —Pedron minfin Juanpan facuquin. ¿A mifu rafuafoan ua noicoiainfo finonmafain mian noicoianmun? —huaiton. —Aifain Ifon. Man minfin tapiaquin un minhuun noicoiain, —huaiton. —Ua noisharashon ua rama icoinra huafori ato cushusharahuu ua tanasharanonfo, —huani. <sup>16</sup> Afañan Jesús Pedro yoini, —Pedron, minfin Juanpan facuquin. ¿Iconmun mian fasi noicoiain? —huaiton. —Aifain Ifon. Man minfin tapiaquin un mihuun noicoiain, —huaiton. —A ua noisharashon ua tanamisifori ato cushusharahuu ua tanasharanonfo, —huani. <sup>17</sup> Ascaiton afañan yoca futsani, —Pedron, minfin Juanpan facuquin. ¿Mianmun noiquin? —huaiton. Yocariaiton Pedronun fasi ointi noconi.

Ascashon afañan cumani, —Ifon, minfin ahuamamishti tapiaquin. Man min tapiari un mia fasi noicoiain, —huaiton. —Ascan ua tanamisifo cushusharahuu ua tanasharanonfo. <sup>18</sup> Pedron, iconcoiain un mia yoinon. Pushcoshon nan min apaiyai cuscan min huaa. Ascatori nan min capaiyaiquiri min camisi. Ascan min anifo ano futsafoan mia yonoshquicani. Min capaiyamaiquiri mia iyoshquicani, —huani.

<sup>19</sup> Jesús Pedro tapimayoni ahuuscamain naiyaicain. Pedro ahuun Ifohunoashu naicain tapishquin, —Upa Dios shararan, —huashquicaniquin. Ascano Jesús Pedro yoini —Ua tanasharahuu, —huani.

<sup>20</sup> Asca huaino Pedron ifiacuahuan ua oinni un ato mufainaiton. Ua fasi Jesús noimisi, Jesús nataima no futan yamu piyoaquin un Jesús yocani, —¿Ifon, tsoancai mia achimashquimun? —ishon un yocani. Nan ucaifin yocaniquin. <sup>21</sup> Ascaiton Pedron ua oinquin yocani, —¿Ifon ahuuscamain Juan naiyaicain? —huaiton.

<sup>22</sup> —Un nimapaiyaino niyoi nan un nasoaitianri. Inon. Shinanyamahuu. Ascatama ua tanacoinfafainhuun, —huani. <sup>23</sup> Ascano afu rafumisifo yoinannifo, —Juancai nayoimafinquin, —uhuunoa huanifo. Ascafiacai Jesús anori yoinima. Yoini isca huaquin, —Un Juan nimapaiyaino niyoi nan un nasoaitianri. Inonpun shinanyamahuu, —ishon nan fusti Jesús anori ani.

<sup>24</sup> Unfin Jesushuunoa yoimisiquin. Jesús ahuarrafo huai cuscan mun oinmisiquin. Nanfo un mato cunushoni. Ascacun uhuun tsain man icoinra huatiro. Nantiffain man man tapia un ahuunoa yoiaiton nan iconcoin.

<sup>25</sup> Ahuarrafo Jesús ani cuscaicai non afoqui cunuqui nocotiroma. Unquian Juan un mato cunushoni. Nanti.

## Jesús Fu Rafuafoan Apaonifo Cuscan (Hechos)

*Jesús ato yoiyoni cuscan, —Diospan Yoshin Shara matoqui oshquiran, —ishon yoini*

<sup>1-2</sup> Unquian, Lucas, un afanan mia cunu fomai min tapinon. Uhuun yora Teófilo, Jesús mai ano iyoshon ani cuscan huafain yosini cuscani Apa Dios ari cainitian nanfohuunoa un mia cunushoni min tapinon. A fu rafuafo catonni ato Diospan Yoshin Sharahuunshon tapimashquin. Apa Dios ari caiyoataima ato tapimaiyofafainpaoni. <sup>3</sup> Atohuunoashu nayoaitian cuarenta oshatan Apa ari cani. Cayoataima atofu iyopaoni. Ato ahuamamishti oinmayoni afanan funia cuscan icoinra huanonfo. Nantianri Diosin nantifi ato iquinai cuscan ato tapimani. <sup>4</sup> Ichanancashon piyaifoan ato yoini,

—Un mato yoimisi cuscan uhuun Upa Diosin mato tapimayoni ahuun Yoshin Shara matoqui nichishquin. Nocoataima Jerusalén anoashu foriyamacahuun. Manayocahuun. <sup>5</sup> Juanpan ato unu muran iquimapacuni aton chaca shatushon oinmanonfo. Ascano samamashta Upa Diosin ahuun Yoshin Shara mato ya imapacunon, —ishon Jesús ato yoini.

*Jesús Apa ari nai muran cani*

<sup>6</sup> Ascatan chipo afanan afu ichanancashon yocanifo, —¿ifon, min natian yonoimamun nocon caifo Israelifo nocon niaifo fusti inon Romanofano aton niaifoan afanan noco yonononma? —huaifoan. <sup>7</sup> —Ahuutian iquimancai mancai tapitiroma. Nocon Upa Diosin fustiton yonotiro ahuutianmain ishquicain. <sup>8</sup> Ascafia Diospan Yoshin Shara matoqui oshon ahuun curushu mato inanshquin. Ahuun shinanhuunshon uhuunoa man ato yoifoanfainon. Un amisi cuscan huafain un yoimisi cuscani man man oinmisi man nicamisi cuscan nantifi uhuunoa man ato yoitiro. Nuno Jerusalén ano yoifain nantio Judea muran yoifain Samaria ano yoifain nantifi manifotiton uhuunoa man yoifoanfainon, —ishon ato yoini.

<sup>9</sup> Yoiquin anaititan aton ointaifi nuinacahuani. Oiainfono nai coin muran ihuacainaiton afanan oinnifoma. <sup>10</sup> Foiscaquin oianfo nocofunu sahuuti oshopacoin sahuua rafu atoqui niriscatanifo. <sup>11</sup> Ascashon ato yoini, —Galilea anofoan, ahuuscain man nai ari foisain. Jesús man nai muran caa nanscacoín acurani afanan oshquiquin, —ishon Diosin oinmati afu imisiton rafutan Jesús fu rafuafo yoinifo.

*Matías catonni Judas imisi cuscani anon*

<sup>12</sup> Ascatan machi Olivo anoashu Jerusalén ano nasofainifo. Nan machi Olivo Jerusalén chaimashta ini. <sup>13-14</sup> Nococatan pushu osa futsa foman-cayan inacashon Upa Dios cufinifo. Nanno Pedro non Jacob non Juan non Andrés non Felipe non Tomás non Bartolomé non Mateo non Jacob futsa Alfeopan facu non Simón nanton ahuun caifo futan Romanonfo cachiquiri huapainifo, non Judas Santiagon facu non Jesús chipocufu non ahua María non ainfo futsafori nanno inifo. Ichanancashon shafa rananun Dios cufinifo.



<sup>15</sup> Cufiaifono nanno ciento veinte yorafo atofu ichanannifo. Ichananfono Pedronun ato nastui nishon yoini. <sup>16</sup> Isca huaquin, —Uhuun yoramishtichin ua nicacahuun. Judaspan ato tapimaita ahuuscashomain nocon Ifo Jesús achicanicain. Nocon shuni David Diospan Yoshin Sharahuunshon inonpacoai cunuyoni cuscan Judaspan man aca. <sup>17</sup> No fu rafupaoni. Nocon Ifoan noco yonoai cuscarifi huaquin nan Judasri yonopaoni. <sup>18</sup> Nocon Ifo tanayopaonifiashon fasi chaca huani. Nocon Ifo ato achimacun ahuun rafanan pui inannifo. Nan puihuushon mai fitan nanno fomancayan inashu aficoi tunushumutan pacucuranpai ari rononi. Chipu ahuun posto farashutan musiriquicahuan pacuni. Pacuaino ahuun posto toshatani. Ascaino ahuun poco arasiqifutsuni. <sup>19</sup> Nantiffain Jerusalén anoshon nicafo. Ahuun imi focun nanno anunifo, “Imi mairan,” huani. Yora futsan aton tsainman Acéldama. Nocon tsainman imi mai. <sup>20</sup> Nocon shuni David Judashuunoa inaca cuscan aquin cunuquin isca huani,

“Ahuun mai ano tsoa afanan ano inonma, Ahuun yono noco-funu futsan finon cushumisi inon,”

ishon David ahuunoa inonpacoai cuscan cununi. Ahuun cunu anunifo Salmos, huanifo.

<sup>21-22</sup> Ascacun non futsa catononcahuun. Judaspan ahuun yono finon. Nan Juanpan yorafo unu muran iquimapacunitian non Jesús nomaqui Apa ari canitian no fu itiani non catononcahuun. Nan no fu cahuas-capaoi non catontiro. Non Jesús nican cuscan huafain non oinyomisi cuscan arifi huamisi ahuunoari yoinon. No futan yorafo yoinon, “Jesús funia mun oincoianran,” ishon ato yoinon, —Pedro huani.

<sup>23</sup> Nicacashon nocofunu rafu catonnifo. Nan fusti anu rafu non fusti ya ini. José Barsabás ahuun anu futsa Justoran huashon anunifo. Nocofunu futsa catonnifo ahuun anu Matías. <sup>24</sup> Aton catoncashon Upa Dios cufinifo, —Ifon, nantifi nocon nomuran non shinain cuscan min tapicoian. Noco tapimahuun ratocaimain nan nocofunu rafu min catonpaicain mifu rafumisi no fu inon. <sup>25</sup> Judas min yononi cuscan man pota faquishihuan muran canon. Nanno ipanon. Ascan futsan ahuun yono fianon mifu rafua inon, —ishon cufishonifo. <sup>26</sup> Cuficatan toquiri tocoro rafuhuun anu nutanifo. Ascashon motica muran nanushon napacufoanni. Ascashon oianfo ratocaimain Jesús fu rafumisi iquicain. Ascashon oianfo. Matías ahuun anu nuucun. Nan catonnifo Jesús fu rafumisi atofu inon.

## 2

### *Upa Diosin ahuun Yoshin Shara atoqui oni cuscan*

<sup>1</sup> Ascaino Israelifoan aton fusititian ahuun anu Pentecostés ini. Nantianri Jesús tanamisifo pushu fusti muran ichanannifo. <sup>2</sup> Ichanancatan pushu muran tsaocashon nicafo samamashta nai ariashu fuhuan nicatsain nicanifo. Pushu muran fuhuan rupifurannaiton nicanifo. <sup>3</sup> Nocotoshiaino ana ointsa chi rucun maratamufafaino oinnifo. <sup>4</sup> Ascaino Diospan Yoshin Shara aton nomuran nanutanaino nantifi tsain futsanman ipaitama inifoannifo. Nantifi ascai futsunifo.

<sup>5</sup> Ascaino nantianri Israelifoan Dios tanasharapaicani manifoti anoashu Jerusalén ano funifo. Fusititian Jerusalén ano funifo. <sup>6</sup> Ascan fuhuanun oi cuscara nicafuracani Jesús tanamisifo ichananfo ano

ichotoshinifo. Yorahuanrasi nocotoshinifo. Nococatan yoinannifo, — ¡Aira! ¿Ahuuscashucon iscaimun? ¿Ahuuscain na yorafo nocon tsainman icanimun?

<sup>7-8</sup> Na yorafo Galilea anoafofiacashon nocon tsainman noco shafacafi yoi. Nan noco tsainman noco yoicani. <sup>9</sup> Nonfin tsain futsa futsatapa yafo. Atirifi Partia anoashu caiyainfono, atirifi Media anoashu caiyainfono, atirifi Elam anoashu caiyainfono, atirifi Mesopotamia anoashu caiyainfono, atirifi Judea anoashu caiyainfono, atirifi Capadocia nan Ponto muran anoashu caiyainfono, atirifi Asia anoashu caiyainfono. <sup>10</sup> Atirifi Frigia anoashu caiyainfono, atirifi Panflia anoashu caiyainfono, atirifi Egipto anoashu caiyainfono, atirifi Africa nan Cirene orima futsa anoashu caiyainfono, atirifi Roma anoashu caiyainfono, atirifi Israelifo yafi mani futsafoan Diosin tanapainifo. <sup>11</sup> Atirifi Creta anoashu caiyainfono, atirifi Arabia anoashu caiyainfono. Nonfin manifoti anoashu nuno ichanain fuaquin nan Galileafoan nocon tsainman noco yoicani. Ahuara sharafo Diospan huaa noco yoiafo, man non nicai. <sup>12</sup> ¿Ahuuscai na yorafoan nocon tsain tapiamafiashton noco tsainman noco yoicanimun? —inifo. <sup>13</sup> Ascano futsafoan ato cashu mutsama huaifoan, —Na yorafo pauncaniran, —ato huanifo.

*Pedro ato yoini cuscan*

<sup>14</sup> Ascan Jesús fu rafuafo once ato nastui nishon Pedronun oi ashcafinin isca huaniquin. —Uhuun yoramishtichin Israelifoan nunoa Jerusalén anoafu futan ua nicasharacahuun. Un mato cayacafi yoinon. <sup>15</sup> Atirifiton man shinan raca non pauin. Ma. Noncai pauinma. Man shuni cuyainano nocon yorafo paunmisima. <sup>16</sup> Non pauntamarocon man oiain cuscan nocon shuni Joel inonpacoai cuscan yoiniquin. Diosinhuushon isca huaquin yoini, <sup>17</sup> Upa Diosin noco yoi isca huaquin,

“Uhuun facu oti chaima un manifoti anoafu uhuun Yoshin Shara atoqui nichishquin. Ahuunshon maton facufo nocofunufu non ainfofori inonpacoai yoishcaquin. Maton pushcoaifo namapan cuscara un ato ahuarafa ismai. Maton anifofanri uhuunshon aton namapan cuscara ahuarafa shara oinshcani. <sup>18</sup> Ua yonoshonafori nocofunufu yafi ainfofo uhuun Yoshin Shara un nantianri atoqui nichishquin inonpacoaifoanri uhuun tsain yoishcani. <sup>19</sup> Ahuamamishti tsoan oinyomisima cuscara un nai aria yafi mai ano un ato ismai. Imi yafi chi urumanhuan non coinmahuan ishquin. <sup>20</sup> Uhuun facu nan maton Ifon fasi sharastacoan matoqui oaiton man oinshquin. Oataima faquishihuancoin ishquin. Oshuri imi ointsa oshicoan ishquin. Afanan oaitian ahuamamishti tsoan oinmisima cuscara nantifiton oinshcani. <sup>21</sup> Ascanfiashton ratoran futsan isca huaquin, ‘Ifon, Jesús, uhuun ramapahuu. Ua numahuu,’ huaiton Diosin numaiquin,”

ishon Joel Diospan tsain inonpacoai cuscan yoini.

<sup>22</sup> Uhuun yora Israelifoan ua nicasharacahuun. Jesús nan Nazaret anoaton Upa Diosin aqui unimani mato isma. Tsoan atiroma cuscan huafain tsoan oinyomisima cuscara huafain ahuamamishti futsafori ahuunshon Upa Diosin mato isma. Man man tapia non iconcoin. <sup>23</sup> Ascafia Upa Diosin inon pacoai cuscan shinanni cuscan mato ahuun Furun inanni man rutunon. Manfin nocofunu chacafo futan ihui

coyan iquinanqui mastaitaqui nanon. <sup>24</sup> Naafiacun Upa Diosin funimana afanan omitsiscacai nanonma. Jesuscái tsoan namapacutiroma. <sup>25</sup> Nocon shuni David niaifoan Jesushuunoa yoini isca,

“Mun tapian uhuun Ifo ufu ipanaca. Ua potapacunacama. Ua cushui. Ascan tsoancai ua ahuasca huatiroma ua ratupaiquin. <sup>26-27</sup> Ascacufin uhuun nomuran un fasi unimacoin. Un nantifi ato yoitiro uhuun Ifoan ua cushuaino un unimai. Uhuun Ifo ua isca huaa, ‘Uhuun Ifon, Diosin, un nacuncaí uhuun yoshin namisifo muran mian potaima. Mincai uhuun caya payocomaima. Ascan mun tapi un niyoano mian cushusharayoi’ ishon ua huani. <sup>28</sup> Ahuuscashumain un nipasharatiroquin mian tapimana. Un miqui nocoano mian unimamacoinshquin,”

ishon nocon shuni David cununi.

<sup>29</sup> Uhuun yoramishtichin, un tapicoian cuscan mato yoi. Nocon shuni David nani. Man maifiani nanno natianri non ointiro. <sup>30</sup> Ascafiano David inonpacoai cuscan Diosin tsain yoiyopaoni. A Diosin yoiyotiani cuscan tapia ini. Diosin yoiyoni chipo ahuun funari niaifocoin ishqui oi. Nocon caifo Israelifo a cuscarari nocon niaifo inon. “Un mia icon yoi min funa chipo mia cuscarari min caifoan aton niaifocoin inon,” ishon Upa Diosin David yoini. Diosicai tsoa paratiroma David tapini.

<sup>31</sup> Ascano David chipo fari ichapa inaca cuscan yoini. Cristo funinonpacoai cuscarari yoini. “Naacucaí Apan naafo muran potanonpacoínma. Ahuun cayaricai payoconacamaran,” ishon yoini. <sup>32</sup> Icon, Upa Diosin Jesús funimaita nipanon. Nantiffain man non oian. <sup>33</sup> Natian Apa Dios fu niaifocoin nantifi iquina. Apa yoiyotiani cuscan Jesús ahuun Yoshin Shara nocoqui nichian. Ascacufin natian man oian cuscan huafain man nica cuscan Diospan Yoshin Sharapan aca. <sup>34-35</sup> Ascan nocon shuni Davidcái Dios ari ahuun cayafu ya nai muran canima. Ascashorifi yoini, “Ifon uhuun Ifo yoini isca huaquin, ‘Min ufu niaifo itiro nantifi iquinshquin. Mia noicasmaifori min ato finoncointiro afanan mia chaca huanonfoma. Atorifi min iquini. Un mia amashquinran,’ ”

ishon yoini.

<sup>36</sup> Ascacufin nantifi Israeli anoafoan maton nomuran tapisharacahuun. Jesús man ihui coyán iquinanqui mastaitafo Diosin yonoa nocon Ifo Cristo inon. Nan Apan catonni, —ishon Pedro yoini.

<sup>37</sup> Nicaquin aton ointi noconifo, —¡Ohua! Non chaca huaita, — ishon shinannifo. Pedro non Jesús fu rafuafo futsanfo yocanifo, — Nocon yoramishtichin, non mato nica. ¿Non ahuuscatiromun? —ishon yocaifoan.

<sup>38</sup> —Man chaca huamisi cuscan shatucahuun. Afanan chaca huatarocon Dios shinancahuun. Jesucristo Ifo huacahuun. Man Ifo huaino mato unu muran iquimacutiromo maton chaca soafain Upa Diosin mato numanon. Asca huano Diosin ahuun Yoshin Shara matoqui nichishquin matofu rafucoinon. <sup>39</sup> Jesús yoiquin isca huaita, “Ratoran futsan nuno nocon Ifo Diosin catoan ahuun Yoshin Shara mato ya rafumashquin. Maton facufo ya chai manifoannafori ato ya rafumashquin,” —ishon Pedronun ato yoini.

<sup>40</sup> Yoitan afanan Pedronun ato tsain ichapa yoini. Ato yoiquin isca huani, —Matan chaca shatucahuun, uhuun yoramishtichin. Nocon

caifo futan mani futsanfoanri man fasi chaca huamisifo. Ascarafo iya-macahuun. Jesús icoinra huacahuun mato numanon, —ishon Pedronun ato yoini. <sup>41</sup> Nicacaquin tres mil yorafoan icoinra huanifo. Ascano ato unu muran iquimapacuni.

<sup>42</sup> Ascatan Jesushuunoa tapipaiyaifoan Jesús fu rafuafo ya ichanacashon ato tapimafain ato futan pifain Upa Dios cufinifo. Asca hua-paonifo.

*Jesús icoinra huaquin tau huanifo cuscan*

<sup>43</sup> Nantiffain Jesús shinancoinnifo. Ahuun tsain noiquicai ahua futsan shinanpainifoma. Nantianri Jesús fu rafuafoan atofu inifo. Doce Jesushuunshon afu rafuafoan tsoan atiroma cuscan huafain oinyomisifoma cuscarafu ato oinmanifo. <sup>44</sup> Ascatan Jesús icoinra huamisifo shafatifi ichanannifo. Nantifi aton ahuarafuya cuscan pashcanapacunifo. <sup>45</sup> Aton mafo non ahuarafu inanmitsacashon ahuun rafanan pui ficashon yopaifo ato inanshcaquin.

<sup>46</sup> Shafatifiri Dios fu tsainti pushu muran ichanannifo Dios cufincani. Aton pushu muranri fasi unimacoinyanan ichananshon pishcaquin. Picaquin, —¡Aicho! Upa Diosin min noco shara huafafainiran, —ishon yoinifo. <sup>47</sup> —Upa Diosin min shararan, —ishon huapaonifo. Nantiffain atohuunoa yoinifo, —Jesús icoinra huafoan shararan, —huanifo. Ascatari nocon Ifohuunshon shafatifi futsafoanri ato futan Jesús icoinra huanifo. Ato fu ichanannifo.

### 3

*Chato chatotiani cayani cuscan*

<sup>1</sup> Ascatan Dios fu tsainti pushu ano Pedro yafi Juan yatapacu Dios cufin focani fonifo. Yatatifi Dios cufi focani fopaonifo. <sup>2</sup> Nocofunu chato chatotiani nanscarapan cainni nan anosi shafatifi tsoa tsaotiani. Atiritifon iyopaonifo anoashu pui yocacanon. Ascano Dios fu tsainti pushu shuinshcaian tsaoshon iquifurafafainaifoan ato pui yoca yocotiani. A caincaitinin ahuun anu sharashta. <sup>3</sup> Pedro yafi Juan iquifainpaiyainfoan oinquin, —Ua pui inancapun, —ato huafaiton. <sup>4</sup> Pedro futan Juanpan fuuiscaquin Pedronun yoini. —Noco fuuisihuun, —huaiton. <sup>5</sup> —¡Aicho! Ua pui inancaniran, —ishon ahuun nomuran shinanni. Ascanshon ato foisini.

<sup>6</sup> —Uncai pui yamafinquin. Ascaflaquin un aya cuscan un mia inanon. Jesucristo nan Nazaret anoahuunshon funinaca huahuun. —Pedronun huani. <sup>7</sup> Mananquiri mutsoinifoannaino funinaca huatan. Mua ahuun oposhco yafi ahuun tau muma curushu shara ini. Pedronun funaiguimashta mutsoinifoanpaiyaino afin fianshinacahuani. <sup>8-9</sup> Ascatan man chaima catan. —¡Aichoran! —icashu, fia fiashuita unimani. Ichotiritiritan. Dios fu tsainti pushu muran atofu cani. Ato fu cashon, —¡Aichoran! Diosin muan caya huaquin. Dios shararan, —icashu ichotiritirini. Nantiffain Israelifoan ichananti pushu anoshon oinquin futsanifo. <sup>10</sup> Onancashon, —¡Aira! ¡Oincapon! Nan chato chatotiani caincaiti ahuun anu sharashtaran ano tsaoshu pui yocacamitsamisi. ¿Ahuuscashumun cahuacacainniquin? Noncai ascara oinyomisimaran, —icashu ahuun yoinnanifo.

*Cunu futsan ahuun anu Salomón anoshon Pedronun ato yoini*

<sup>11</sup> Ascano nanno cunu futsan ahuun anu Salomón muranshon noco-funu chato chatotiani Pedro yafi Juan poyatani. Nantififain a oinpai atoqui ichonifo. Nocotoshiqui oianfo, —¡Aira! ¿Ahuuscaimun? —icashu yoinannifo. <sup>12</sup> Atoqui ichoaifoan Pedronun ato oinquin. Yoini, —Nocofunu Israelifoan ua nicacahuun. ¿Ahuuscain man mustairimun? ¿Ashuuscaquimun man noco shararan ishon oincain? Na nocofunu chato chatotiani caya huaran ishon. Non sharacuai nocohuunoashu cayama. Nocon curushhuunshocai cayama.

<sup>13</sup> Noncai acama. Nocon Upa Diosin ahuun oinmati Jesushuunshon caya huaa. Nocon shunifo Abraham non Isaac non Jacobori Upa Dios aton Dios. Nan nocon Diosin mato oinmapai ahuun facu Jesús shara-coin ahumamishiti huatiro. Manfin Jesús achimanitaquin futsafoan rutunonfo. Niaifon Pilaton a nichisharapaifiaiton “Nacai nocon niaiformaran,” man Pilato huaita.

<sup>14</sup> Jesuscai ahua chaca huamisima. Sharacoinfiacun mancai caimapaítama. “Jesuscai caimatamarocon rutumitsamisi Barrabás caimahuun,” man iquita. <sup>15</sup> Jesús fustichin yora nimatirofiacun man rutuita. Man rutufiata Upa Diosin funimanita. Non ointa Jesús funiaiton. <sup>16</sup> Man man tapia na nocofunu chato chatotiani imisi. Natian muma shara. Non Jesús icoinra huano ahuunoashu man caya. Man man oian.

<sup>17</sup> Uhuun yoramishtichin, mun tapia man Jesús onanshoma rutua. Mato niaifofoanricai onanfoma. <sup>18</sup> Man aca cuscan tapiamafiaquin Upa Diosin nocon shunifo nan ahuun tsain yoishomisifoan inon pacoai yoiquin isca huanifo, “Cristo Diospan Furun omitsiscairan,” ishon inonpacoai cuscan yoinifo. <sup>19</sup> Ascacun man chaca huamisi cuscan shatucahuun. Chaca huatamarocon Upa Dios shinacahuun maton chaca soashonon. <sup>20</sup> Man ascaiton Upa Diosin mato unimamatiro. Ahuun Furun Jesús catonni maton numamisi Cristo inon. Matoqui afanan onon. <sup>21</sup> Ahuun yonoshomisifoan nan inon pacoai Jesushuunoa yoinifo isca huaquin, “Upa Diosin yoiyotiani, ‘Un chipo nantifi funa shara imai. Afanan ahua chaca inonma. Un asca huayoai chain uhuun facu ufu nai muran iyoiran,’” inonpacoai cuscan Diospan tsain yoinifo.

<sup>22</sup> Nocon shuni Moisés arifi yoini, “Nocon Ifon Diosin noco caifo futsa catonshquin noco inon pacoai yoimisi inon. Ua cuscara inon. Nantifi mato yoiyai cuscan a nicasharacahuun. <sup>23</sup> Tsoan a nicasamai afo amaquishon potatiro ariashu omitsiscapanon,” yoini. <sup>24</sup> Samuel Diosin tsain yoiquin tau huani. Nan inonpacoai cuscan. Ascano chiporifi Diosin tsain yoimisifoan nannoricoinri yoinifo cuscacoin man aa. Nantififain Jesushuunoaasi yoinifo. <sup>25</sup> Manfin aton funafoquin. Ascan Diosin nocon shunifo yoiyotiani cuscan matori ashoshquin. “Min funahuunshon nantifi manifoti anoafu un ato shara huairan,” ishon Upa Diosin Abraham yoini. <sup>26</sup> Ascan ahuun Furun Jesús matoqui nichini ahuun oinmati inon. Matoqui nichiqui tau huani mato shara huanon maton chaca man cachiquiri huapanon, —ishon Pedronun ato yoini.

## 4

*Israeli niaifofoan Pedro yafi Juan cunanifo ato yocashquin*

<sup>1</sup> Ascatan Pedro futan Juanpan ato yoiaino ano yorafohuunshon Dios cufimisifo Dios fu tsainti pushu cushumisifoanri aton niaifo non Saducefori atoqui funifo. <sup>2</sup> Upa Diosin Jesús funimanaran ishon Juan futan Pedronun ato yoiaino aton nomuran shinanchacanifo. <sup>3</sup> Ascano man fari caino ato achinifo nan yamutan cunu muran ishinifo. <sup>4</sup> Ascashiashon ato Jesushuunoa yoiaino yorahuanrasifoan icoinra huanifo. Cinco mil nocofunifoan nantian icoinra huanifo.

<sup>5</sup> Iyoconaino Israelifoan aton niaifofo non Moisés cununi cuscan tapimamisifo Jerusalén ano ichanannifo. <sup>6</sup> Nannori aton yorafohuunshon Dios cufimisi niaifocoin Anás yafi Caifás non Juan futsa non Alejandro non aton yoraforti nanno inifo. <sup>7</sup> Pedro yafi Juan caincurannaiton niaifofoan cusutumushon yocanifo. —¿Tsoan mato yonoamun man aca cuscan man huanon? ¿Tsohuunshon man acaya huamun? —ishon niaifofoan yocanifo.

<sup>8</sup> Asca huaifoan Pedronun Diospan Yoshin Sharahuunshon ato cumani, —Niaifofoan un mato yoisharanon. <sup>9</sup> Man noco yoca tsoa na chato chatotiani shara huamainquin. Man tapipai ahuuscashumain cayaqui. <sup>10</sup> Un mato cayacafi yoinon. Man nantiffain uhuun caifo nan Israelifo yashon tapisharacahuun un mato yoinon. Jesucristo nan Nazaret anoahuunshon man caya muma shara inon. Manfin Jesucristo ihui coyan iquinanqui mastaitaquin. Man naafiacun Upa Diosin funimana.

<sup>11</sup> “Pushu yonomisifoan toquiri quishi shara potano pushu oni sharatiroma. Man potafiafo pushu ifoan catonni toquiri quishi shara nichishquin pushu mutsisipacoin inon,”

ishon Diosin tsain cununi. Jesucristo nan toquiri quishi cuscara. Manfin pushu yonomisifo cuscara man man potafia Upa Diosin a catonni ahuunoashu man ahuun yorafa inon. <sup>12</sup> Tsoa futsacai noco numatiroma. Manifotifoan tsoa futsahuunoashucaí non ipatiroma. Jesucristo fustitofin nocon chaca soatiroquin non Upa Dios fu nipanon, —ishon Pedron ato yoini.

<sup>13</sup> Ascán nicacani mustairinifo. Niaifofo yoinannifo, —¿Ahuuscaquimun na rafutan ahuamafashon ranotama noco yoiquin? Cunu tapiamafiamisishaquin noco shafacafi yoi. Jesús fu rafumisishaqui noco anori yoiquin, —icashu yoinannifo. <sup>14</sup> Ascano chato chatotiani cayasharashu atofu nia ini. Ascaitocai niaifofoan, —Cayamaran, —ishon yoitiroa ini. <sup>15</sup> Ascashonrifi Pedro yafi Juan cunu futsa muran nichinifo atohuunoa yoishcaquin.

<sup>16</sup> —¿Non ahuusca huaimun na nocofunu rafu? Nantifi Jerusalén anofoan tapiafo na rafuhuunoashu nocofunu chato chatotiani man caya. Ascara tsoan oinyomisima. ¿Nonmun ahuusca na nocofunu rafu huaicai? Noncai futsafo fomantiroma. Cayamarancai non huatiroma. <sup>17</sup> Ascanshon non ato yoinon afanan Jesushuunoa tsoan yoiyamacahuun. Ascán futsafoanricai Jesushuunoa nicatirofomaran, —icashu yoinnanifo.

<sup>18</sup> Ascatan ato cunu futsa murannoa cunani funonfo. Fuafoan ato yoinifo, —Afanan Jesushuunoa tsoan yoiyamacahuun. Ahuunoa yosiymacahuun, —ato huaifoan. <sup>19</sup> Asca huafiaifoan ato cumanifo, —¿Non mato nicayamarquin Upa Diosin noco yonoa cuscan non nicatiromun? ¿Rato sharamun? Mafin shinanchahuun. ¿Non mato nicaino

Diosin nocoqui unimatiro iyamarai afin noco yonoa cuscan non yoiaino unimatiro mainquin? <sup>20</sup> Non oinmisi cuscan huafain non nicamisi cuscani non mato yoitiroran, —ishon Pedro futan Juanpan cumanifo. <sup>21-22</sup> Nicacani ato onaintimapaifiaquin nica nantifi yorafo, —¡Aicho! Upa Diosihuunshon chato chatotiani cuarenta fari aqui caa nanscarapan caini man cayahuamaforan, —ishon yoinifo. Ascan niaifofaan ato onaintimatamarocon ato yoinifo, —Man afanan Jesushuunoa yoiaiton non mato asca huatiroran, —ishon yoinifo. Yoicatan ato nichinifo.

*Jesús icoinra huafaan Upa Dios cufini ahuun curushu ato inannon*

<sup>23</sup> Nocon yorafohuunshon Dios cufimisi niaifofa non Dios fu tsainti pushu cushumisifoan ato nichiano Pedron yafi Juan Jesús tanamisifo fu ichanannifo. Ichanancashon niaifofaan ato yoia cuscan chanipacunifo. <sup>24</sup> Nicacaquin Dios cufinquin isca huanifo. —Nocon Ifon, min nantifi iquinaquin. Min nai onihuafain mai onihuafain ununhuan min onihuani. Nantio nai murannoa yafi mai anoa non unuhuan murannoa min onihuani.

<sup>25-26</sup> “¿Ahuuscaimun nan Israelifoma manifoti Diosqui fiishquicaniquin? Ipaitsi ichanancani chaca huapaicani. Manifoannati aton niaifofa ichanancani nocon Ifo Dios yafi Furun Cristo cuyopaicaniran,”

ishon nocon shuni nan min oinmati David min Yoshin Sharahuunshon yoini.

<sup>27</sup> Nanscarifi atan nan niaifo rafu Herodes yafi Poncio Pilaton Israeliyamafishu nocon caifo Israelifo fu ichanaintafo min Furun nan min oinmati Jesús min catonni chaca huashcaquin. <sup>28</sup> “Uhuun facun nantifi yorafo omitsiscashoshquin ato nashonon,” ishon min shinanni. Min ahumamishti huatiro. Ascan min shinanyoni cuscan huaitafo. <sup>29</sup> Ascan nocon Ifon, shinanhuun. Nonfin min oinmatifoquin. Noco ati ati huacaniquin. Min curushu noco inanhuan non min tsain ranotamacon ato yoinon. <sup>30</sup> Min oinmati sharacoin nan Jesushuunshon tsoan atiroma cuscan huahuu. Ahuunshon isinin icaifo caya huafain tsoan oinyomisima cuscara sharafo ato oinmahuu, Upan, —ishon cufinifo. <sup>31</sup> Cuficatan ichanafono mai naiyanaiyaini. Ascatan nantifi nanno Diospan Yoshin Sharapan ato iquini ahuun tsain cayacafi ranotama yoinifo.

*Nantifi ahuarafo nantifina ini*

<sup>32</sup> Nantififain Jesús icoinra huamisifoan aton nomuran nannorisi shinnannifo. Tsoan ahua futsa shinantanima. —Nan uhuunarifi matonaquin. Un aya cuscan man yopaiton un mato inantiroran, —icashu yoinannifo.

<sup>33</sup> Ascatan nan doce Jesús fu rafumisifoan, —Nocon Ifon Jesús noco nashoashu funiaran, —ishon Diospan Yoshin Sharapan ahuun shinnansharahuunshon aton caifo yoinifo. Ascata nantifi nan icoinra huafo Upa Diosin ato shinanmashara unimacoinonfo. <sup>34-35</sup> Aton mai inanmitsafain aton pushu inanmitsanifo ahuun rafanan pui ficashon a Jesús fu rafumisifo doce pashcashoshcaquin. Yopaifofaan pashcashonifo. Ascannifi atan tsoa ahua yopatanima.

<sup>36</sup> Nantianri nanno nocofunu aton caifofaan ahuun anu José. Nanton aton shuni Levipan funa. Unu nushmancayan rafu mai tomahuan ahuun anu Chipre anoashu cainni. Jesús fu rafumisifoan anu futsa tuqui

huani Bernabé. Onicoinnin tsainman yorafo aton fupihuanmapaimisi shinansharamapaimisiran. <sup>37</sup> Ahuun mau inanmitsashon pui fishon Jesús fu rafumisifo inan yopatanaifoan pashcashopacunifo.

## 5

*Ananías yafi ahuin Safira chaca huani cuscan*

<sup>1</sup> Ascano Ananías futan ahuin Safira mai inanmitsacashon ahuun rafanan pui finifo. <sup>2</sup> Nanscatanfin atirifi pui tushu huafashocai cuyoinanima. Atirifi Jesús fu rafumisifo foshoni. Ato fomaní, —Nantifi pui un mato cuyoinaran, —ishon ato shinanmapaini. Aca cuscan ahuinin arusu tapini.

<sup>3</sup> Ascaiton Pedronun yoiquin isca huani, —¿Ananías, ahuuscaimun Satanás min nomuran yonoaino min Diospan Yoshin Shara paraincain? Min mai inanmitsashon pui fia atifincai min noco inanma. Atirifi min mucua mina inon. <sup>4</sup> Min inanmitsataima minacoin iyoa. Min atirifi mucupaquin min noco yoia shara icuana. Ascatamarocon min noco fomanpai. Mincai noco fuparanima. Minfin Dios fuparanicai, —ishon yoini.

<sup>5</sup> Asca huatapaiyaino Ananías nayacucahuani. Ascaino nantifi anoafo ratucoinnifo. <sup>6</sup> Ascano pushcofoan rashunifo mai huai foshcaquin. <sup>7</sup> Man ascano tapiamaino ahuinri nocotoshini. <sup>8</sup> Nocotoshiaiton Pedronun yocani, —¿Man mai inanmitsashon rafanan pui fiamun? ¿Man man nantifi noco inanmun? —ishon yocaiton. —Ai. Mian yocai cuscafin iconquin, —ishon yoiaton.

<sup>9</sup> —¡Ohua! Ahuuscaimun min funu futan tsoan tapimaran ishon “Diospan Yoshin Shara man fomanpaiyain. Tsoan tapimaran,” ishon man shinan. Man shinan raca Diospan Yoshin Sharapan tapiama. ¡Oinpon! Na pushcohuaifoan min funu mai huatacani fucani miarifi mai huacaniran, —ishon Pedronun yoini. <sup>10</sup> Asca huatapaiyaino Safira Pedro nia naman pacuriscatani. Ascatan charish acucahuani. Ascatapaiyaino iqui fura-paiquin oianfo man naa fuchitoshitan ihuifainifo funu patashari mai huai foshcaquin. <sup>11</sup> Ascaiton nicacani Jesús icoinra huafo yafi futsafori ratucoinnifo.

*Jesús fu rafumisifoan doce isca huani, —Iscaracai tsoan oinyomisimaran, —huanifo*

<sup>12</sup> Ascano ichananti pushu ahuun anu futsan Salomón Jesús icoinra huafo nantifi nanno ichanannifo. Nannori afu rafumisifo doce-ton Diospan Yoshin Sharahuunshon tsoan atiroma cuscan huanifo. Yorafoan aton ointaifi. <sup>13</sup> Icoinra huamafoan ato oinquin yoinifo, —Jesús icoinra huafo yora shararan, —ifacatan Jesús icoinra huayamashu atofu rafunifoma. Musunifo. <sup>14</sup> Ascafiaino nocofunufu yashon ainfofoanri shafatifi icoinra huarianifo. Ascashu atofu ichanannifo.

<sup>15</sup> Ascano yora isinin icaifo ato shuhua naratashon ihuunifo. Ascashon nanfo fai cusumun ratani cahuaquin, —Pedron ahuun yora faquishi ihuafainaino raca cayatiroati, —ishon shinannifo. <sup>16</sup> Yorahuanrasi Jerusalén patashari icafo isinincaifo ato ihuunifo. Atirifi yoshin chaca atohuun nushon ato fucashni huaiton ihuunifo. Ascashon nantifi ato caya huamapacunifo.

*Jesús afu rafumisifo doce omitsisca huanifo*



<sup>17</sup> Jesús fu rafumisifoan acaifo cuscan huafain yoiaino cuscan, —¡Aicho! Na yorafo shararan, —icashon yoinifo. Ascano Israelifoan aton yorafohuunshon Dios cufimisi niaifocoin yafi niaifo futsafoan nicacaquin shinannifo, —Atohuun noiai cuscacai nocohuun noima. Atohuunoa yoisharai cuscacai nocohuunoiari yoimisimaran, —ishon shinannifo. Curafiamisifo Jesús fu rafumisifoqui fiishquinifo. <sup>18</sup> Ascano ato achimacashon cunu muran iquimanifo. <sup>19-20</sup> Iquifiafoan yamu nacucahuainaino Diospan oinmati afu nai muran icaton atoqui nocoshon ato yoini, —Dios fu tsainti pushu anoshon ato yoitacahuun. Ahuuscashomain nocon Ifo Jesús ato nimapacutiroquin ato yoitacahuun, —ato huani. Yoitan ato cunu fupotifo fupushoni. Fupushonano cain furanifo.

<sup>21</sup> Shafaino Dios fu tsainti pushu muran iquitoshicashon ato yosi- acufainifoquin. Israelifoan aton niaifoho ichanancashon cunu cushumisifo aton niaifoho ato nichinifo Jesús fu rafumisifo doce ihuitanono. <sup>22</sup> Ascano cushumisi niaifoho nococashon oian toa anoma oincani. Ascan naso furan niaifohoqui chaninifo. <sup>23</sup> —Non ato matoqui ihu- upaifia cunu fupotifo fupocoian. Nannoshon ranushumuafon ato cushua. Non fupotifo fupushon cunu muran oian. Ano toa ya- mairan, —icashu cushumisi ranushumuafon aton niaifo uhuapafoqui chaninifo. <sup>24</sup> Nicacani nocon yorafohuunshon Dios cufimisi niaifocoin non ranushumua aton niaifocoin non nocon yorafohuunshon Dios cufimisi niaifoho futsafori mustairinifo, —¡Ohuashta! ¿Ahuuscain ascamun? ¿Ahua finoanmun? ¿Non ahuuscatiromun? —ishon fasi shinanchacatan- ifo.

<sup>25</sup> Shinainfoanno futsan atoqui nocoshon yoini, —¡Oincapon! Na nocofunufu man cunu muran iquimafia natian Dios fu tsainti pushu muran- shon yorafo yosicaniran, —ishon ato yoini. <sup>26</sup> Nicacani ranushumua niaifon yafi niaifo patasharifo ato ihui focani. Fofiacashon curushcain ihuunifoma. —Non ato curushcain ihuaiton yorafo sinatirofo noco toquirinin tsacatiroforan, —ishon yoinifo.

<sup>27</sup> Ato ihuunifo Israeli aton yorafohuunshon Dios cufimisi niaifocoin ato yocanonfo, <sup>28</sup> —Non mato cayacafi yoita Jesushuunoa man yosinonma. Ascafia man Jerusalén anofo atoti man yoiafufaina. Man ato shinanmapai nonmain na nocofunu Jesús rutumaitaquin. Noco rafancaniran, —huaifoan.

<sup>29</sup> Ascan Pedro futan Jesús fu rafumisi futsafoanri cumacaquin. —Nocofunun noco yonoa cuscan nicatamarocon Upa Diosin noco yonoai cuscan non nicacointiro. <sup>30</sup> Manfin Jesús ihui coyana iquinanqui mastaitaquin rutushquin. Man asca huafia nocon shunifoan aton Diosin Jesús funimaita. <sup>31</sup> “Ua cuscara onihuafoti iquihuun aton Ifo inon,” ishon Apa Diosin Jesús yoini. Ascano Israelifo nocon Numamisi inon non chaca shatunon a ifo huashquin nocon chaca noco soashonon. <sup>32</sup> Non mato yoiai cuscan non afohuunoa yoimisi. Diospan Yoshin Sharapanri nannori yoimisi. Tsoan Dios nicacoianfin ahuan Yoshin Shara aquni nichishquin afu nipanon, —ishon yoiaino.

<sup>33</sup> Nicacani fasi atoqui fiishquinifo. Ato rutupaicani. <sup>34</sup> Ato rutupaifiaifon Fariseo ahuan anu Gamaliel ato nastui nishon ato yoini, —Oinfain. Ato chifi nichiyocahuun un mato yoinon, —ishon yoini. Nan Gamaliel Moisés cununi cuscan tapimamisi. Nantififain ahuunoa

yoimisifo, —Gamaliel fasi nocofunu sharacoin. Fasi tapicoianran, —ishon ahuunoa yoinifo. Ascashu nanno ichanannifo a nicapaicani.<sup>35</sup> Ato yoiquin isca huani, —Uhuun yoramishtichin Israelifoon ua nicasharacahuun un mato yoinon. Man nocofunufu rutupaicain. Oinfain.<sup>36</sup> Shinacapon. Fari futsan nocon caifo futsan ahuun anu Teudas, “Unfin mato niaifo itiroquinran,” ishon noco shinanmapaipaoni. Ascano cuatrocientos nocofunufoon a tanapaonifo. Ascafia futsafoan Teudas rutunifo. Ahuun tanamisifo pashcafainnifo. Ahua finontama.

<sup>37</sup> Chipu nocon caifo futsa Galilea anoashu noconi. Ahuun anu Judas. “Non niaifofu potanoncahuun,” noco caifo huani. Nanrifi rutunifo. Ascan nantifi ahuun tanamisifori pashcafainnifo.<sup>38-39</sup> Ascacufin un mato yoicain ua nicasharacahuun. Jesús tanamisifoon apaiyai cuscan anaitiriscatiroquin. Diosin shinan cuscan yositamarocon nocofununafi shinan cuscan yoiquin ipaitsi yositirofo. Ascaiyamaiton Diosin ato yonoaitocai tsoa ato shatumatiroma. Man ato shatunapaiquin Dios fu chaca huan tanain cafiscain man huacain. Ascacufin ato ahuusca huayamacahuun. Ato nichicahuun, —ato huani.

<sup>40</sup> Nicacani, —Ahuun tsain cayacafi. Noco yoia cuscan non anon, —huanifo. Ascano Jesús fu rafumisifo iquifuranifo. Iquifuranaifoon fichiqui tuchiaton ato fasi coshaqui futsanifo. Coshatan, —Afanan Jesushuunoa tsoa yoiyamacahuun, —ato huanifo. Yoitan ato nichinifo.

<sup>41</sup> Atomaqui focatan —¡Aicho! Upa Diosin nocoqui shinansharaquin non Jesushuunoa non omitsisca. Ahuunshon niaifofoon nocohuunoa shinanchacaran, —icashu unimanifo.<sup>42</sup> Ascano shafatifi Dios fu tsainti pushu ano yafi pushufotirifi tsain shara yoinifo, —Nocon Ifo Jesusfin nocon Cristonquin. Diospan Furunmun, —ato yosiaino. Ato yoiquin unupaonifoma.

## 6

### *Siete ato futan yonoafo catonni*

<sup>1</sup> Ato yosiainfoanno yora ichapafoan icoinra huacashon Jesús tanamisicoinfo inifo. Yora ichapafoan icoinra huariapaonifo. Nantianri nanno Israelifo Griego tsainman inifo. Shoco futsafo Israeli tsainmansin inifo. Nan Griego tsain yoimisifoon tsain chipunifo. —Nocon caifo aton tsain fusti yoimisifoon shafatifi tushu pashcanan huacashon aton ainfo funuomafo inain cuscaicai nocon ainfo funuomafo atori ati inanmaran, —ishon tsain chipunifo.<sup>2</sup> Ato nicacani Jesús fu rafumisifo doce nantifi Jesús tanamisifo ichanancashon ato yoinonfo. —Non mato Diospan tsain yoifafaini. Noncain unutiroma mato tushu pashcashoshquin.

<sup>3</sup> Ascan nocon yoramishtichin, maton murannoa nocofunufu siete catoncahuun mato tushu pashcanan huanonfo. Man tapia ratofomain Diospan Yoshin Shara fu rafucain shinansharamisiquin. Nan cuscarafo catonhuun non ato yononon mato tushu pashcanan shara huanonfo.<sup>4</sup> Ascan nonfin shafatifi Upa Dios cuffafainicain ahuun tsainri yoishquin, —ishon yoinifo.

<sup>5</sup> Nicacani nantifi unimanifo. Ascashon Esteban catonnifo. Nanton fasi icoinra huamisi. Diospan Yoshin Sharapan a iquina ini. Felipe non Prócoro non Nicanor non Timón non Parmenas non Nicolás afo catonnifo. Nan Nicolás Israelifomafishon nanfoan Diosin icoinra huac cuscan arifi anorisi acaifo cuscan shinanni. Antioquia anoashu cainni.

<sup>6</sup> Aton catoncashon Jesús fu rafumisifo ano iyonifo. Ascan nan doce ato manmancashon Upa Dios cufishonifo.

<sup>7</sup> Ascatan Diosin tsain mai futsafoanriri yoifoanfainifo. Jerusalén anoshon samamashta icoinra huanifo Jesús tanamisifo ica ini. Israeli-foan aton yorafohuunshon Dios cufimisifo ichapafoanri Jesús icoinra huacashon ahuun tsain nicacoinnifo.

### *Esteban achinifo*

<sup>8</sup> Esteban Upa Diosin shinanmasharani ahuun curushu inanni. Ascan ahuunshon ahuamamishti yora atiroma cuscan ato ismani. <sup>9</sup> Ascano Israeli-foan aton ichananti pushu futsa nanno ichananshon ato anunifo. —Apaiyai cuscan huatiroforan, —ishon atohuunoa yoimisifo. Nanfocai afanan oinmatifoma. Nanfoan aton mai Cirene anoashu non Alejandría anoashu non Cilicia anoashu non Asia anoafori. Nanfo Esteban fu fochismanantanannifo. <sup>10</sup> Fochismanantanapafiaifoan Diospan Yoshin Shara Esteban shinansharamani. Cayacaficoín ato yoiaino tsoan cumanima.

<sup>11</sup> Ascano fustirasi yoinanpacunifo. Tsoa futsa nicanonma. —Estebanhuunoa tsain chaca yoitacahuun. Nanton Moisés yafi Diosqui tsain chaca huaaran, —ishon ato yoitacahuun. Estebanhuunoa chani yoinifo.

<sup>12</sup> Ascan ahuunoa chani nicacani yorahuanrasi Estebanqui fiishquini-foqui. Ascano niaifo patasharifo non Moisés tsain tapimamisifoanri Esteban achinifo niaifofo ano iyoshcaquin. <sup>13</sup> Ahuunoa chani yoinifo, —Na nocofunun nocon Dios fu tsainti pushuhuunoa yafi Moisés noco yononi cuscahuunoiari tsain chaca huariai. <sup>14</sup> Man non nicamisi yoiaiton, “Jesús Nazaret anoaton nocon Dios fu tsainti pushu paoanshquin. Moisés noco yononi cuscari fiananan huairan,” —ishon chani yoinifo.

<sup>15</sup> Ahuunoa chani yoicashon niaifofoan fuiscaquin oianfo ahuun fuso. Diospan oinmati afu nai muran ica ointsa fupishtacoin ini.

## 7

### *Esteban ato cumasharani cuscan*

<sup>1</sup> Ascatan Israeli-foan aton yorafohuunshon Dios cufimisi niaifocoin yocani, —¿Mihuunoa chaca huafo cuscan iconmun? —huaiton.

<sup>2</sup> Esteban cumaquin isca huani —Uhuun yorafoan ua nicacahuun. Nocon shuni Abraham Harán ano icataima Mesopotamia ano ini. Nantianri Upa Diosin fasi chashacoinshon oinmaquin yoini isca, <sup>3</sup> “Min mai anoashu non min yorafo anoashuri catahuun. Un mai futsa ari mia ismaicai. Nanno un mia iyoiran,” ishon Upa Diosin Abraham yoini.

<sup>4</sup> Ascatan Caldeamaquinoashu canishaquin Harán ano ini. Anoashu apa nani. Naacun non icano Upa Diosin nichini. <sup>5</sup> Nuno nichiflashocai maishta inantaima. “Chipo min non min funafori un na mai inain matona inon,” ishon Upa Diosin yoiyotiani. Anori yoiyai cuscaicai Abraham facu yatai inima. <sup>6</sup> Yoiari “Min funafo yora futsafoan mai ano iishquicaniquin. Aton maima ano iishquicaniquin. Nanno cuatro ciento fari aton yonomisifo iishquicani. Ato fasi curushcai yonomashcaquin. Fasi omitsiscashceni. <sup>7</sup> Ascacufin un nan yora futsafo anaintimai. Ascatan chipo aton mai anoashu focani nuno nocoshon ichananfainshcaquin ua cufishcaniran,” ishon Upa Diosin nocon shuni Abraham yoini.

<sup>8</sup> Ascan Upa Diosin Abraham yononi isca huaquin “Min furonanfacufo ato foshqui rupa shatuhuu. Ascan huatanfin min tapitiroquin. Unfin maton Upa Dios ipanacaquin. Un mato cushufafaini min funafo ichaparasi inon.” Ascacufin Abraham ahuun facu Isaac caintan ocho osha finontan facu ahuun foshqui rupa shatuni. Ascan Isaac nocofunuaitian man facu yari anuni Jacob. Ascan Jacob nocofunuaitian ahuun facu furonanfacufo doce. Nanfo nocon shunifo. Afohuunshon nocon caifo anumisi.

<sup>9</sup> Nocon shunifoan aton ushto José noicasmacaquin yora futsa inan-nifo ahuun rafanan pui fishcaquin. Ascan José Egipto ano iyonifo nanno aton yonomisi inon. Asca huafainfoan Upa Diosin José potanima. A fu imisi. <sup>10</sup> José omitsiscafiaton Upa Diosin numani ahuun nomuran shi-nansharamani. Ascano Egipcio niaifoan Faraón fasi José fuchipaipaoni. “Min niaifo patashari itiro. Nantifi uhuun yorafo non uhuun caifo min ato nantifi yonotiroran,” ishon Egipcio niaifoan José yoini.

<sup>11</sup> Asca huatan nantifi Egipto anoafo non Canaán anoafori fonicoin omitsiscapaonifo. Nocon shunifo tushuoma inifo. <sup>12</sup> Nantianri nocon shuni anifoshta Jacob arifi tushu yamaino nica Egipto anoafo man shuqui ichapa ya inifo. Asca ahuun facufo nanfo nocon shunifo nichini Egipto ano shuqui finonfo. <sup>13</sup> Asca huatan chipo afanan Egipto ano fonifo tushu ficani. Nantianri José ahuun ochifo futan chipocuton onannifoma. Onainyamafiaifoan “Uquian, José un maton ushto,” ishon ato yoini. Ascatan Egipciofo aton niaifo Faraón arifi José ahuun yorafo-huunoa nicani. <sup>14</sup> Chipo José apa tsain fomani, “Upashtan, uqui ohuu. Un nunoshon mia cushusharanon. Nocon yorafori uqui ihuuhun. Nan setenta cinco yora uqui ihuuhun, upashtan” ishon José yoini.

<sup>15</sup> Ascatan Jacob yafi ahuun yorafori Egipto ano fonifo. Nannoashu nocon shunifo ya nai cuyonifo. <sup>16</sup> Naacun aton caya Siquem ano iyonifo mai huanonfo. Nocon shuni Abraham mai fiini. Nocofunu ahuun anu Hamor mai inanni pui finon. Nanno mahua quini muran nocon shunifo mai huanifo.

<sup>17</sup> Ascan Upa Diosin Abraham yoyoni cuscan ato Egipto anoashu cainti chaima. Nantianri nocon shunifo Egipto ano fasin ichapacoin ini. <sup>18</sup> Nantianri Egipciofoan aton niaifo funapacai nocon shuni Joséhuunoa nicayomisima. <sup>19</sup> Nanton nocon shunifo parafafaini. Ato omitsiscamani. Fasi curushcain ato yonomani. “Maton facufo rama caincun potacahuun nanonfo,” ishon ato yononi.

<sup>20</sup> Nantianri nocon shuni Moisés cainni. Caianshu rato facu futsacai a cuscarama. Upa Diosin aqui unimai. Oshu rafu non fusti apa yafi ahua pushu muran onunifo Egipciofoan fuchinonfoma. <sup>21</sup> Oshu rafu non fusti finontan facu chifi cainmafiashon shihuatinin fuposhon unu cusumun tsaoni a murannoashu uaicaiton niaifoan facu shomayaton fuchishon ihuini ahuun facucuin cuscara inon. Ascanshon pushconi. <sup>22</sup> Ascatan Egipciofoan tapiafo cuscan Moisés yosinifo. Fasi ahuun mapo shara. Egipciofoan tapini cuscan arifi tapiniquin. Ahuun tsainri cayacafi shara. Niaifo sharapan atiro cuscan arifi asca huapaoni.

<sup>23</sup> Ascan Moisés cuarenta fari aqui caano ahuun nomuran shinanni isca huaquin, “Un natian uhuun caifo nan Israelifo ato oin cai atohuunoa tapishquin,” ishon shinanni. <sup>24</sup> Atoqui nocoshon nocofunu Egipcion Israeli coshaiton oinni. Ahuun caifo numapaiquin curushcain Egipcio coshaquin namani. <sup>25</sup> Asca huatan ahuun nomuran shinanni “¡Aicho! Un

aca cuscan uhuun caifoa nicacangquin tapitiro Diosin ua yonoa un ato numanon,” ishon shinanni. Anori shinanfiaino ahuun caifoa anori shinannifoma. <sup>26</sup> Nan ifainaca shafatan oinpaquin oian ahuun caifo rafu sutunainfoan oinquin. Ato numapaiquin, “Unucahuun. Manfin yorahuan tananquin. ¿Ahuuscaimun man sutunaincain?” ishon yoini.

<sup>27</sup> Ato numapafiaiton ahuun caifo futsan sutuaiton cumaquin chaca huani. “Mifin ihuu. Mincai ahuama. ¿Tsoan mia yonoamun min nocon niaifo inon min noco iquinon? <sup>28</sup> ¿Min Egipcio nocofunu rutuita cuscan uarifi mian rutupaimun?” ishon yoini. <sup>29</sup> Nicatan Moisés mai futsari ichoni. Nan mai Madián ano ichoni ato muran iyon. Nannoshon ahuun facu furonanfacu rafu ani.

<sup>30-31</sup> Ascano cuarenta fari finoanno Diosin ahuun oinmati afu nai muran ica Moisésqui nichini. Nantianri Moisés machi ahuun anu Sinain chaimashta cani. Nanno pushu yamacain nii yamai. Fasi yafi chofo uhuapama fusti nanno. Nii cuyamamishti urufiainocai coonima. Moisés oinni. Oiainno mustairini. Ascan tapipai ahuuscain nii cuyamamishti urufiashucai nocaima chaimashta cashon. Oinni nii cuyamamishti uruai muran Upa Diosin ahuun oi nicani. <sup>32</sup> “Unfin min shunicaifoa aton Diosiquin. Abraham non Isaac non Jacobori un aton Diosiran,” ishon yoini. Nicatan Moisés ratui taritarini. Afanan uru oinyamafiain aqui ratuni.

<sup>33</sup> “Unquian un nuno ica. Ahuara chaca ufu itiroma. Ascan min sapato pucahuu un mia yoinon. <sup>34</sup> Uhuun yorafo Egipto ano omitsiscail cuscan mun oian. Man pashapaiyaifoa mun nica. Ascan un fotoa ato caimashquin. Natian un mia Egipto ano afanan nichicai.”

<sup>35</sup> Nan Moisés nocon shunifoan a nicacasmanifo. “¿Tsoan mia yonoamun min nocon niaifo inon noco iquinshquin?” ishon yoifiafo Upa Diosin Moisés catonni nocon shunifoan aton niaifo inon ato numanon. Nan nii cuyamamishti uruai anoshon Upa Diosin Moisés afanan Egipto ano nichini nocon shunifo numanon. <sup>36</sup> Nanno Dioshuunshon ahuarashta tsoan oinyomisima shara ato ismani yoran atiroma cuscan ato ismani. Unuhuan ahuun anu oshin anori tsoan atiroma cuscan Dioshuunshon ato ismani. Tsoan istaipamashon nanscasi huapaoni.

<sup>37</sup> Nocon shunifo Israelifo yoini “Chipo Upa Diosin nocofunu ua cuscara matoqui nichishquin. Nocon caifo ishquiquin. Inon pacoai cuscan mato yoishquin a nicasharacahuun,” ishon Moisés ato yoini. <sup>38</sup> Moisés tsoan istaipama ano nocon shunifo fu ipaoni. Machi Sinain anoshon Diospan oinmati afu nai muran icaton a yoini cuscari nocon shunifo tapimani. Nan Diospan tsainman noco nimapacutiro ishon ato yoini.

<sup>39</sup> Yoifiaiton nocon shunifo Moisés nicacasmanifo. “Min nocon yonotromaran,” ishon shinanni. Aton nomuran Egipto ano nasopaicani. <sup>40</sup> Ahuun ochin Aarón yoinifo “Dios futsan cuscara noco rami huashohuun. Nanton noco tapimatiro non raqui caimancai. Moisés noco Egipto anoshon iyoafiacun ahua finoanmun noncai tapiama. Machi mamaqui inacun non afanan oianmaran,” ishon yoinifo. <sup>41</sup> Nantian Aarón ato moipan facu cahua shara ointsa rami huashoni aton Dios inon. “¡Aicho! Nan moipan facu cahua shara ointsa non rami huua. Nan nocon Dios. Non ichananshotiro moi futsa rutushoshquin a fufori ratashoshquin nocoquin unimanon. ¡Aicho! Non rami huua cuscan shararan,” ishon yoinifo.

<sup>42</sup> Ascano Upa Diosin afanan atoqui unimanima. Ato potayoni “Ua afanan tanapaicanima. Ascacuncai un ato numaima. Aton diosicoinma ipaitsi aton nomuran shinantirofo. Fishifo ipaitsi shinantiro aton diosiran,” ishon Diosin yoini. Nocon shuni Amós inonpacoí cuscan Diosin tsain yoimisi ini. Diosin atohuunoa yoini cuscan cununi isca huaquin,

“¿Man cuarenta fari pushu yamai ano cahucacainnai ua yoina rutushon ua inanpaicani. Ahuara futsari ua inanpaicanimun? <sup>43</sup> Ma. Mancai maton nomuran ua shinancoianma. Man yoimisi isca huaquin, ‘Nocon dios Moloc yafi nan fishi Refán,’ man huamisi. Ahuara futsan man rami huashon. Noco diosiran man huamisi. Ascan un mato caifo futsa ano mato nichicai. Mato achinonfo aton yonomisifo man inon. Babilonia mai orima futsa ano fasi chai un mato nichicain.”

<sup>44</sup> Nocon shunifo tsoan icamano foanfainpaonifo pano pushu fonifo a muranshon Dios cufinifo atofu inon. Ascan man isma Upa Dios aton Dios aforifi ahuun yoraquin. Upa Diosin nocon shuni Moisés oinmani cuscan pano pushu onihuani.

<sup>45</sup> Ascatan fari ichapa finontan nocon shunifoan nan pano pushu fonifo. Nantianri aton niaifo ahuun anu Josué ato iyoni mai futsa finonfo. Diosihuunshon caifo futsafo nan mai anoafoto potanifo aton mai inon. Nan Josué niaifo taupaonino man fari ichapa finontan Davidrifi yositirofo pano pushu muran ichananpaonifo Upa Dios cufishcaquin.

<sup>46</sup> Upa Diosin David fasi noi aqui unimaicoinni. David Upa Dios cufinquin yoini, “Upa Diosin, min nocon shuni Jacob ahuun Dios nocon Diosiri, un mia pushu futsa shara huashoin. Ihui yafi toquiri pushu un mia onihuashopai a muran un non uhuun yorafo mifu inon mia cufishcaquin,” ishon yoini. <sup>47</sup> Anori cufifainton furun Salomón pushu huanshoni.

<sup>48</sup> Ascanfiacai Diosin yora pushu huaa muran itiroma. Diosin nai muran icanoshon nantifi finoncoian. Diosihuunshon nocon shunin inonpacoai cuscan yoini isca huaquin.

<sup>49</sup> “Nai muran un ica. Nannoshon un nantifi oni huati un iquini. Nan mairi un onihuani. Nai muranshon un mai oinfainni. Nanri uhuuna. Nantifi onihuafoti nai muranoa yafi mai anoafoti uhuuna. ¿Ascan ahuuscashocon man ua pushu huashotromun un a muran fusti inon futsa ano cayamashquin? <sup>50</sup> ¿Un nantifi onihuanimamun?”

ishon Diosin yoini.

<sup>51</sup> Manfin maton shunifo cuscaracoinquin. Fasi nicayosmashunifo. Upa Diosin tsain nicapaicoicanima. Man icoindra huacoinmisima. Diospan Yoshin Shara mato yoimisi cuscaai man nicacoinmisima.

<sup>52</sup> Maton shunifoan nantifi Diosihuunshon inon pacoai yoimisifo man ato omitsiscamapaoni. Inonpacoai yoimisi futsafoan yoinifo, “Nocon Numamisi isharamisi nocoqui oshquiquin,” ishon yoipaonnifo. Nanfoanri nocon shunifo man rutunifo. Man yoinifo cuscan nocon Numamisi shara nocofiacun nanrifi man rutuafo. <sup>53</sup> Upa Diosin ahuun oinmati afu nai muran icafo nichini ahuun tsain mato inanfiacai man nicapaimaran, —ishon Esteban ato yoini.

<sup>54</sup> Nicacani fasi fiishquinifo. Aquí sinacoinceni. <sup>55</sup> Ascano Diospan Yoshin Shara Esteban rafuquinaino nai muran foisini Diosin chashamanaiton ointapaiquin oian Jesús Apa fu nia ini. Nan rafutan ahuamamishti huaifoan oinni. <sup>56</sup> Oinshon yoini, —¡Oincapon! Un nai muran oin. Nanno Jesucristo Diospan furun nocoqui nichini afu nia. Un oinran, —ishon ato yoini.

<sup>57</sup> Nicacani aquí sinacoinceni. Mucanifo. Ahuun tsain nicacasmacani pafopomunifo. Aquí ichonifo. <sup>58</sup> Achicashon pushurasi pasotainri sharafonifo. Aton sahuuti pucashon ointiaca ahuun anu Saulo nia naman machinifo. Ascacatan toquirifoan Esteban tsacaquin futsanifo.

<sup>59</sup> Toquirinin tsacaifoanno Esteban iscani, —Ifo Jesús, uhuun yoshin mi ari ihuihuun, —ishon yoini. <sup>60</sup> Yoitan ratoconun mai chachishon oi ashcafinin yoini, —Ifon, ua chaca huafiaifoan ato numahuu. Ato rau huahuun, —ishon yoini. Yoitan nani.

## 8

<sup>1</sup> Naacun Saulo ato yoini, —Manfin shara huaqui rutuaquin, —ato huani.

### *Saulo icoinra huafo omitsiscamani*

Nan shafatanri icoinra huamafoan Jesús icoinra huafo Jerusalén anoshon fasi ato omitsisca huanifo. Ascano Judea ari non Samaria mai ariri pashcafinnifo. Nan doce Jesús fu rafumisifocai atofu fonifoma. Jerusalén ano nitunifo. <sup>2</sup> Ascano nan Dios tanasharapaiyaifoan Esteban mai huanifo. Noicani fasi uainifo. <sup>3</sup> Ascantan Saulon Jesús icoinra huafo fasi ato noicasmani. Ato cuyopaiquin. Fasi ato omitsisca huani. Pushuti iquicahuacacaini ato achishon cunu muran iquimashquin. Ainfofo yafi nocofunufori ato asca huani.

### *Tsain shara Jesushuunoa Samaria anoa yoinifo*

<sup>4</sup> Ascatan nan Jerusalén anoashu pashcafinnifo. Diosin tsain Jesucristohuunoa ato yoifoanfafaini. <sup>5</sup> Nocofunun ahuun anu Felipe Samaria mai ano cani. Nanno pushurasi futsan anoshon ato Cristohuunoa yoini. <sup>6</sup> Yorahuanrasifoan nicanifo. Dioshuunshon tsoan atiroma cuscan ato ismani. Ascaiton oincani fasi nicapaicani aquí taisinifo. <sup>7</sup> Yoshin chacafo yorafomaquinoa potani. Atomaqui potaino fiisifainifo. Yoratishon charishi futsuafo non chato chatotianifo Felipe Jesushuunshon ato caya huani. <sup>8</sup> Asca huano nantifi pushurasifoti unimacoinnifo.

<sup>9</sup> Ascan nanno Samaria mai ano nocofunu ahuun anu Simón. Nanton yoshin chachahuunshon yoran atiroma cuscan huapaoni, —Tsoa futsacai ua cuscarama. Unfin fasi uhuapa sharaquin, —ishon cacapaimisiton yoini. <sup>10</sup> Ascano nantifi yorafoan nan niainfofo yafi yora ahuamafo a nicacoinnifoquin. —Nan nocofunu Simón fasi ahuamamishti huatiro. Diosihuunshon yora atiroma cuscan noco ismailan, —ishon yoinifo.

<sup>11</sup> Yoshin chachahuunshon yora atiroma cuscan huaiton oincaquin ahuamamishti acaiton nan fusti fari ranan tanannifo. <sup>12</sup> Ascafiainfoan Felipen ato tsain shara Jesucristohuunoa yoiaiton Upa Diosin yorafo iquinai cuscan a icoinra huanifo. Icoinra huaifoan ato unu muran iquimapacuni. Nocofunufu yafi ainfori iquimapacuni. <sup>13</sup> Nan Simón arifi icoinra huacun uyu muran iquimani. Ascano Felipen Jesucristohuunshon ahuamamishti yoran atiroma cuscan huaiton oin fasi mustairini. Ascashon Simón Felipe mufoanfafainni acaiton oinquin.

<sup>14</sup> Ascano Jesús fu rafumisifo doce Jerusalén anoafao Samaria anoafao Diospan tsain icoinra huaifoan nicacaquin Pedro yafi Juan ato ari nichinifo. <sup>15-16</sup> Nococashon nan rafutan oian Samaria anoafao nocon Ifo Jesús fusti icoinra huanifo. Ahuun Yoshin Sharahuunoa tapiataifoma. Ato iquinataima. Unu muran iquimapacuano Jesús fusti ifoancoinnifo. <sup>17</sup> Ascano Pedro futan Juanpan manmanyanan Upa Dios cufishonifo ahuun Yoshin Shara ato iquinon.

<sup>18-19</sup> Jesús fu rafumisifo rafu Pedro futan Juanpan ato manmanni Diospan Yoshin Shara ato iquinaiton Simón oinni. Oinshon yoini isca huaquin, —Uarifi tapimahuun man aca cuscan un ratoran yora mayatashon Diospan Yoshin Shara ya un ato imanon. Man ua tapimacun un mato pui inanon, —ishon ato yoini.

<sup>20</sup> —Ma. Min shinan raca non puihuushon Diosin noco inanpaiyai cuscan non fitiro. Anorimafinquin. Ascano minfin min pui ya min maicain. <sup>21</sup> Min nomuran min Diosihuunoa shinansharama. Ascacucain non Dios yonoshonai cuscan min no futan atiroma. <sup>22-23</sup> Min nomuran min shinanchaca cuscan mun onan. Mincai Diospan yonomisifoan atiro cuscan min atiroma. Ascan min chaca mimuran fospicoian. Chaca min ifo. Ascan nocon Ifo Jesús cufihuun min nomuran min shinanchaca cuscan rau huanon, —ishon Pedron yoini.

<sup>24</sup> —Ua Ifo Jesús cufishohuun min ua yoia cuscan ua Diosin onaintimanonma, —ishon Simón cumani.

<sup>25</sup> Ascatan Pedro futan Juanpan Samaria anoafao nocon Ifo Jesús tsain ato yoicatan Jerusalén ano nasofainifo. Focaquin pushurasifo ano ato tsain shara Jesushuunoa yoifonifo.

*Felipe yafi Etiopía niaifo patashari*

<sup>26</sup> Nantianri nocon Ifo Jesús ahuun oinmati afu nai muran icaton Felipe yoini, —Na fai tapiaquiri nii yamai Jerusalén yafi Gaza nushmancayan catahuun, —huani. <sup>27</sup> Caquin nocofunu Etiopía anoa oaiton oinni. Nan nocofunun ahuun caifo aton niaifo patashari. Ahuun niaifoncoian ainfoan. Ahuun caifo aton pui cushushomisi iniquin. Jerusalén anoshon catani Upa Dios cufitani. <sup>28</sup> Nasocurani oi ahuun inapan aya ninifoaino ahuun taramuti chinutamuashu cayacafi cani. Tsaoshon Diospan tsain Isaías cununi cuscan oinfony aya caino.

<sup>29</sup> Oinfoicai Felipe fu noconanni. Noconanshon Diospan Yoshin Shara Felipe yoini, —A taramutiyahuun aqui catanhuun —huani. <sup>30</sup> Aqui ichotan nicani Isaías nan inonpacoai Diosin tsain cununi cuscan anufoaiton. Nicaquin yocani, —¿Min oiain cuscan min tapiamun? —yocaiton.

<sup>31</sup> —Ma ¿Ahuuscashorocon un tapiafin? ¿Tsoan ua yosiamaiton? —huaiton. Ahuun iyomisi nitumatan. —Mapuinifoanhuun. U fu tsaoinacahuahuun, —huani. <sup>32</sup> Mapuinifoantan oinni Isaías cununi cuscan oinquin. Cunuquin isca huani,

“Nan chashoan iyoshon rututirofo cuscan arifi iyonifo rutushcaquin. Chashoanun facu ahuun rani shatuaifoaanno furoitiroma cuscarifiai arifi pusinima. <sup>33</sup> Rafini huanifo ahua chaca huaa nicayamafiashon niaifoaan numapainifoma. Numatamarocon rutunifo. Chaca huacoinnifo cuscaai non cainmatiroma, tsoancai atirifi noco tapimatiromaran,”

ishon Isaías cununi cuscan oinni.



<sup>34</sup> Ascashon Felipe yocani, —¿Isaías cununi cuscan ahuunoa cununi iyamaraimun futsahuunoa cununi? Ua yoipun, —ishon Etiopía niaifo patashari yocaiton.

<sup>35</sup> Cumaquin, —Isaías Jesushuunoa cununiran, —ishon cumani. Nan tau huaquin yoiano Diospan tsain futsafori ismani a Jesushuunoa cununi. Diosin tsain shara ahuunoa oinmani. <sup>36</sup> Caino atoqui unu noconi nocofunun etiope yoini, —Oinpon unu. ¿Mian na unu muran iquimatiromun un Jesús icoinra huacoinnai cuscan un ismanon? —ishon yocaiton. <sup>37</sup> —Jesucriston Diospan Furun min ointi muran min icoinra huacoinnaiton un mia iquimatiroman, —ishon Felipe yoini.

<sup>38</sup> Asca huatan ahuun iyomisi nitun huani. Nitun huano Felipe fu fotocani unu muran iquimanon. Ascano iquimapacufoantan cainmani. <sup>39</sup> Unu cusumun nocoafono Diosin ahuun Yoshin Sharapan mai futsari Felipe iyoriscatani. Nocofunun oinni Felipe yamariscatanaiton afanan oinnima. Ascafiashu fasi unimai ahuun mai ari cani. <sup>40</sup> Ascanrifiatan Felipe mai futsa ahuun anu Azoto ano nitariscani. Nanno yafi nantifi pushurasi Cesarea fai anori cashon tsain shara Jesushuunoa ato yoifoan-fafaini.

## 9

*Saulo Jesús ifoanquin shinan futsacunfoanni*  
*Hch 22.6-16; 26.12-18*

<sup>1-2</sup> Nantianri Saulo nantifi Jesús icoinra huafo rutupaiyai. —Un nantifi Jesús tanamisifo un rutuicain, —ishon yoini. Ascan Israeli aton yorafo-huunshon Dios cufimisi niaifocoin ano cashon yoini, —Ua cunushohuun un nantifi ichananti pushu Damasco ano ismanon min ua yonoa un Jesús icoinra huafo nocofunufu non ainfori fuchishon Jerusalén ano un ato cunu muran iquimanon, —ishon yoini. <sup>3</sup> Ascanofin Jerusalén anoashu cai Damasco ano nocoti chaíma samamashta nai arishon chashatanaino pacuni. <sup>4</sup> Pacuquin ahuun oi nicani, —Saulo, Saulo, ¿Ahuuscaquimun mian omitsisca huaiquin? —huaiton.

<sup>5</sup> —Ifon, ¿Minmun tsoaquin? —ishon yocaiton. —Unquian Jesús. Mian omitsisca huai. <sup>6</sup> Funihuu. Pushurasi Damasco ano catashquin nannoshon min ahua huaimancain un mia yoinon, —huani.

<sup>7</sup> Yoiano afu fofo puusinifoma. Ahuun oi nicaflaquin tsoan oinni-foma. <sup>8</sup> Saulo funinaca huapai fushoacucahuanaiton mutsoinifoannifo. Ascashon Damasco ano iyonifo. <sup>9</sup> Nannoshon osha rafu non fustitan oinyamafain ayayamafain piqui tununi.

<sup>10</sup> Asca huatan nanno Damasco ano Jesús tanamisi futsan ahuun anu Ananías namapan cuscara Jesús yoini, —Ananías, —huaiton —Unquian, Ifon, —huaiton.

<sup>11</sup> —Fai Cayacafiran huamisifohuun catahuun. Ari cai Judaspan pushu ano catahuun. Nocoshon min ato yocatiro nocofunu Saulo Tarso anoashu cainni nanno pushu muranquin. Nannoshon Saulo ua cufinquin. <sup>12</sup> Ahuun namapan cuscara mia oian min manmainno afanan oinsharanon, —huaiton.

<sup>13</sup> —Ifon, tsain ichapa ahuunoa mun nicamisi. Nantonfin mia icoinra huafo Jerusalén anoafu ato chaca huamisiquin. <sup>14</sup> Natianri mun nica

Jerusalén anoashu nuno oi. Nocon yorahuunshon Dios cufimisi niaifofoan a yonoa nantifi mia icoinra huafo cunu muran iquimaniran, —huaiton.

<sup>15</sup> Yoifaiton, —Un mia yoia cuscan catahuun. Un na nocofunu catoan Israelifoma non aton niaiffo non Israeliforifi uhuunoa ato yoinon. <sup>16</sup> Uhuunoashu fasi omitsiscai un oinmacoinshquiran, —ishon yoini.

<sup>17</sup> Ascatan nicafainicai Ananías cani. Cai pushu muran iquini. Iquicain Saulo fuchitan manmantoshini. —Mun oa. Uhuun yorashtan, min fain oquin nocon Ifo Jesús oian. Nanton ua nichian min afanan oinsharafain ahuun Yoshin Sharapan mia iquionon, —ishon yoini.

<sup>18</sup> Yoiaino ahuun furo murannoashu pusu cuscara fupacumuni. Ascashon oinsharacufaini. Ascatafin Jesús icoinra huashu unu muran iquitan funinaca huaniquin. <sup>19</sup> Iquitan cainnacahuan pini. Pitan muacai afanan shaca fuanima. Ascatan mutsisinacahuani. Shafa ranan Jesús tanamisifo fu Damasco ano iyoni.

#### *Saulo Damasco anoshon ato yosini*

<sup>20</sup> Anoashu ichananti pushu ano nocoshon ato yoini isca huaquin, —Jesús Diospan Furunquin, —ishon ato yoini. <sup>21</sup> Nicacani mustairinifo. —Ahuuscaquitsi Jerusalén anoa Jesús tanamisifo ato chaca huafain. Nunoari ahuun tanamisifo munushushon nocon yorafohuunshon Dios cufimisi niaifofoqui ano iyonon natianrifi, “Jesús Diospan Furunquin” noco huaiquin, —icashu yoinannifo.

<sup>22</sup> Ascano Saulo Jesushuunoa fasi tapiquin finacoinni. Ahuun curushu Jesús inanni ahuunoa ato yoinon. Ascan cayacaficoin ato yoini, —Jesús Diospan Furun nocoqui nichiniran, —ishon tosa futsacai anori yoiaiton nicayomisifoma. Ascaiton shinancaquin, —¿Ahuuscashocaicon na nocofunun tapicoianmun? —ishon ahuun caiffoan Israeliffoan shinannifo.

#### *Saulo ato rashquimafainni*

<sup>23</sup> Ascano shafa rananun ichananshon Israeliffoan shinanpainifo ahuuscashomain Saulo rutumatirofoquin. <sup>24</sup> Ascano futsan Saulo yoini, —Mia rutupaicaniran —ishon tapimani. Yonoafono shafatishon yafi yamutishon cushushinifo Saulo oaiton rutushcaquin. Pushurasi aton caincaiti anoshon cushunifo. <sup>25</sup> Asca Saulo caicuranaicon rutupaifi-aifoanno fomancayan pochinin tsuhuu anori futanmanhuan muran nanushon yamutan tanamisifoan fotomapacufoannifo.

#### *Saulo Jerusalén ano ini*

<sup>26</sup> Fotomafo Jerusalén ano cani Jesús tanamisifo fu iquicai. Iquicafaiton aqui musunifo. —Nacai Jesús tanamisicoinmaran, —icashu yoinannifo. <sup>27</sup> Ascafiaino Bernabé icoinra huacoinni Saulo tanasharacun. Ascashon Jesús fu rafumisifo doce ano iyonni ahuunoa shara ato tapimanon. —Damasco fain caquin Saulo ano caicon nocon Ifo Jesús oian. Ascano Damasco anoshon noco Ifohuunoa ranotama ato yoifafainiran, —ishon ato yoini. <sup>28</sup> Nicacaquin icoinra huanifo Saulo atofu Jesús tanamisi ica. Ascano atofu iyopaoni. Jerusalén anoafori ranotama nocon Ifo Jesushuunoa ato yoini. <sup>29</sup> Ahuun caifo Israelifofiafashon Griego tsain tapinifo ato Jesushuunoa yoiaino fochishmanantanannifo. Ascashon a rutupainifo. <sup>30</sup> Nannori Jesús icoinra huafoan nicacatan Cesarea ano iyonifo. Anoshon Tarso ano nichinifo.

<sup>31</sup> Ascaino Jesús icoinra huafoan Judea anoafo non Galilea anoafo non Samaria anoafori isharanifo. Nantian tsoan ato omitsiscamanima. Diospan Yoshin Sharapan ato mutsismana Jesús tanasharashu aton nomuran fupi huamani. Nanscaino paratamafain Jesús icoinra huanifo. Icoinra huacashon Dios nicasharapainifo.

*Eneas caya huamani cuscan*

<sup>32</sup> Nantianri Pedronun ato yosifoanfaini. Icoinra huafo Lida anori oinmitsai cani. <sup>33</sup> Nannoa nocofunu ahuun anu Eneas fuchini. Charishi futsua ini. Ocho fari aqui caa funitiroma ini. <sup>34</sup> Fuchishon Pedronun yoini, —Eneas, Jesucristo mia caya huamaquin. Funihuu min oshati shara huahuu, —ishon yoini. Asca huaino samamashta funina cahuani. <sup>35</sup> Nantifi Lida anoafo non Sarón anoafoanri oincashon nocon Ifo Jesús icoinra huanifo.

*Dorcas man nacoinfiacun Jesushuunshon Pedro funini*

<sup>36</sup> Ascatan Jope mai futsari ano ainfo ahuun anu Dorcas ica. Ahuun anu futsa Tabita. Nan ainfo Jesús tanasharamisi. Shara huamisi ahuomafori ashomisi. <sup>37</sup> Nantianri isinin ipapacucahuanashu naani. Nacun rashucashon pushu fomancayan ratanifo. <sup>38</sup> Ascano Jesús tanamisifoan nicafo Pedro Lida chaimanoa. Nicacaquin yora rafu Pedroqui nichinifo yoinon, —Oinrisca huayonon, —Pedro huanifo.

<sup>39</sup> Nicatan atofu cani. Nococatan pushu fomancayan mapufainifo. Nanno ainfo funuomafo uainifo. —Oinpon. Nocon yora yamashtan nocon sahuutifo icushushomisi. Niyoshon noco shara huamisiran, —icashu uaiquin Pedro yoinifo.

<sup>40</sup> —Chifi cainfaintacahuun, —Pedronun ato huani. Foainfono ratoconun mai chachipacufoantan Dios cufini. Ainfo yamashta oinquin yoini, —Tabitan, funinaca huahuun, —huaino. Fupuinacahuatan Pedro oinni. Ointan tsaoinachuani. <sup>41</sup> Ascaiton Pedronun mutsoinifoanni. Mutsoinifoantan Jesús tanamisifo yafi funuomafo cunani Tabita man funia ato oinmashquin. <sup>42</sup> Oincani nantifi yorafo Jope ano chanifoanfainifo. Ascaiton nicacani yora ichapafoan nocon Ifo Jesús icoinra huanifo. <sup>43</sup> Ascatan Pedro Jope pushurasi ano nituyoni. Nocofunun ahuun anu Simón nan fichi shinan huamisi ahuun pushu muran iyoni.

## 10

*Pedro yafi Cornelio*

<sup>1</sup> Nantianri nocofunun ahuun anu Cornelio mai futsa Cesarea ano ini. Afin ranushumuafan aton niaifo. Nan ranushumuafan anumisi —Italianoran, —huamisifo. <sup>2</sup> A non ahuun yorafori Diosquiri shinansharamisifo. Nocofunu fasi shara. Ahuuomafo ato inanmisi. Dios cufifafainmisi. <sup>3</sup> Ascan shafa futsan fari nai pochinin racano oshashoma namapan cuscara Diospan oinmati afu nai muran ica aqui oaiton oinni, —Cornelion, —huaiton. <sup>4</sup> Fasi ratucoinquin oinni, —¿Ahua min ua yoipaimun Ifon? —huaiton. —Diosin mia oian min shafatifi cufiainton min yora ahuuomafo pui inanmisi. <sup>5-6</sup> Ascan nocofunufo Jope ano nichihuun. Nanno nocofunu Simón ahuun anu futsa Pedro ihuion. Nan fichi shinan huamisi ahuun anuri Simón ahuun pushu muran ica. Ahuun pushu unuhuan cusumunriran, —ishon Diosin nai oinmatinin yoini.

<sup>7</sup> Yoitan amaquinoashu cani. Ascan Cornelio ahuun oinmati rafu non ranushumua ahuun cushumisi nanton Dios shinanmisi cunani. <sup>8</sup> Diospan nai oinmatinin yoia cuscan nantifi ato tapimani. Tapimashon ato Jope ano nichini.

<sup>9</sup> Ascan iyoconaino fari masafinin racano Jope chaimashta noconifo. Nantianri Pedron pushu manmancaya cashon Upa Dios cufi caicani. <sup>10</sup> Fonaincaiton futsan pichashoni. Pichanqui anaitiataima Pedron oshashoma namapan cuscara ahuara futsa oinni. <sup>11</sup> Nai fupuicano pano putanmanhuan cushtocoin nai murannoashu fotopacucahuani. <sup>12</sup> A muran yoia futsa futsatapafo non ronofu non mai ano sharatirofo non puiyafori. <sup>13</sup> Oinquin ahuun oi nica isca huani, —Pedron, funihuu. Rutushon piishquin, —huaiton.

<sup>14</sup> —Ma, Ifon. Ascaracai un pimisima. Moisés noco yononi na cuscara non pitiroma. Suya chacaran, —huaiton.

<sup>15</sup> Afanan ahuun oi nica, —Diosin na cuscarafu imashara. Ascan afanan nan chacaran huayamahuu, —huani.

<sup>16</sup> Rafu non fusti nansaracoin oinni. Ahuun unutaqui afanan nan pano putanmanhuan nai muran cani.

<sup>17</sup> Ascano Pedronun ahuun nomuran fasi shinanpaini, —¿Ahua ua Diosin yoipaimun? —ishon shinanni. Anori shinanquin nan nocofunufu Cornelio nichian Simón pushu caincaiti ano nococashon yocanifo. <sup>18</sup> —¿Nocofunu Simón ahuun anu futsan Pedro nunomun? —ishon yocanifo.

<sup>19</sup> Nantianri Pedro namapan cuscara shinainno Diospan Yoshinin yoini, —Nocofunu rafu non fustiton mia funai fuaforan. Un ato miqui nichian. Ascan shinanchacayamahuu. <sup>20</sup> Fotopacucahuatan atofu catahuun, —huani.

<sup>21</sup> Ascaino Pedro atogui fotoni. —¿Man ua funai fuamun? ¿Ahuuscaquimun man ua funaicaí? —huaiton.

<sup>22</sup> —Nocon niaifo ranushumuaton noco nichian non mia ihuunon. Nanton nocofunu shara. Diosquiri shinanfafaimisi. Cornelio nocofunu shararan min caifo Israelifan huamisifo. Diospan oinmati sharapan afu nai muran icaton yonoa, “Pedro min pushu ano ihuitahuun mia yoisharanon,” ishon yoitan. Ascan “Ua ihuishotacahuun,” noco huaiton. Non mia ihui oaquin —huanifo.

<sup>23</sup> Nicaquin, —Iqui fucahuun. Non pinon. Nuno oshayoshcaquin, —ishon Pedro ato yoini. Iyoco futsaino atofu cani. Icoinra huafo Jope anoafori atofu fonifo.

<sup>24</sup> Focanashu iyocofutsaino Cesarea ano noconifo. Nannoshon Cornelio ato cunano ahuun yorafo ahuun pushu ano ichanannifo Pedro manacani. <sup>25</sup> Pedro pushu muran iquiano Cornelion fuopacucahuatan, —Min fasi shararan —ishon yoini. <sup>26</sup> —Funihuu. Uncai Diosimafinquin. Urifi un nocofunuquin. Min icai cuscarifai un nocofunuquin, —huani.

<sup>27</sup> A fu tsainquincai cunu futsan muran caashon yorafo ichanacashon manacaquin oinni. <sup>28</sup> Ato yoini, —Man man tapian nocon shunifan yonoa non Israelifoma fu rafutiroma. Non matofu oinmitatiromaran, ishon noco yoini. Ascafiacun uhuun namapan cuscara Upa Diosin ua tapimaita un tsoahuunoa shinanchacatiroma. Atofin nantifi manifoannati noicoinquin. <sup>29</sup> Man ua iyopaiyainocai un cacasmama. Ascatarocon un samamashta oa. Natian un tapipai ahuuscaquimain man ua ihuipaiquin, —ishon Pedro yoiaiton.

<sup>30</sup> Cornelion cumani, —Osha rafu non rafuri finontan nantianri un Upa Dios cufiaino nocofunu ahuun sahuuti chashaino uqui niriscatana. <sup>31</sup> “Cornelion, min cufiain cuscan Upa Dios nica. Min ahuuomafo inainton oian. <sup>32</sup> Ascashon nocofunufu Jope ano nichihuun Simón miqui ihuunon. Ahuun anu futsa Pedro. Simón futsan nanton fichi shinan huamisi ahuun pushu muran ica. Ahuun pushu unuhuan cusumunri icaran” ishon ua yoita. <sup>33</sup> Ascano un samamashta nocofunufu nichian mia ihuunonfo. ¡Aicho min noco shara huaa! Samamashta min nocoqui oa. Ascashon man non ichanan nocon Ifon minhuunshon noco yoipaiyai cuscan nantifi non nicanon, —ishon Cornelion yoiaiton.

*Pedronun Cornelio pushu muran icafo ato yoini*

<sup>34</sup> Ascaiton Pedronun nishon yoini, —Nantian mun tapia iconquin. Upa Diosin nantifi yorafo nan manifoti anoafu noicoian. Upa Diosincai toon huatan noima nanscasi huaquin noicoian. <sup>35</sup> Manifoti ahuun tsain nicapaicani shara huan tananmisifofin Upa Diosin ahuun facufo itirofoquin. <sup>36</sup> Diospan Furun Jesucristo manifoti anoafuan aton Ifo. Ahuunshon Upa Diosin afanan noco onaintimaima. Man nicaino fasi unimacoincaquin. Nannori Upa Diosin uhuun caifo Israelifo tapimani. <sup>37</sup> Judea mai anoa ica cuscan man man nicamisi Galilea ano ato yoiquin tauhuani. “Maton chaca shatucahuun Dios icoinra huacahuun un mato unu muran iquimanon,” ishon Juanpan ato yoini. <sup>38</sup> Ascan man man nicamisi Juan cachiori Jesús oni. Upa Diosin ahuun Furun Jesús ahuun Yoshin Shara nichian afu rafunon ahuunshon ahumamishiti yora atiroma cuscan anon. Ahuara sharafo huafoanfafaiani. Upa Diosin afu imisi nantifi yora yoshin chaca ato yonoaiton atomaquinao potani.

<sup>39</sup> Nantifi nan aca cuscan uhuun caifo Israelifo mai anoa yafi Jerusalén anori man non oinmisi. Ihui coyan iquinanqui mastayamuafu. <sup>40</sup> Asca huafiafo osha rafu non fustitan Upa Diosin mai murannoa funimaita noco oinmana. <sup>41</sup> Atirifoancai oinyamuama. Ratoranfo nan Upa Diosin catoanfoansi oinyamuafu. Mai murannoa funiano non a futan pifain ayayamua. <sup>42</sup> “Manifoti anoafu uhuunoo ato yoitacahuun. Upa Diosin ua catonni nantifi yorafoti nan niafo nan naafori un ato yoitiro ratofomain un icano nipatiro iyamarai omitsiscapanaca muran focanicain. Ato yoifoanfafaicahuun,” Jesús noco huayamua. <sup>43</sup> Diosin tsain yoishomisi-foan isca huani ahuunoo cununifo. “Tsoan a icoinra huacun ahuunshon Upa Diosin aton chaca soatiro rau huanon,” ishon cununifo. —Pedronun ato yoini.

*Israelimafoan Diospan Yoshin Shara finifo*

<sup>44</sup> Yoiaifono nantifi ahuun tsain nicaimisifo Diosin ahuun Yoshin Sharapan ato muran nanucoinni. <sup>45-46</sup> Ascano anori tsain nicayamafiamisishacaquin Diosin Yoshin Sharahuunoashu tsain futsanman iqui futsunifo. Ascaifoon nicacani Israelifoan nan icoinra huafo nanno mustairinifo. —¡Aira! Nan yorafo nocon caifomafishu Upa Diosin ahuun Yoshin Shara atoti nanumanaran, —ishon yoinifo. Ascano Pedron ato yoini. <sup>47</sup> —Non Diospan Yoshin Shara fia cuscan afoanrifi fiafo. ¿Ascan ahuuscaimun unu muran iquimamutiromaquin? —ishon Pedro yoini.

<sup>48</sup> Ascano, —Jesucristo icoinra huafo ato unu muran iquimapacucahuun, —ato huani. Ascatan, —No fu iyopun, —Pedro huanifo.

# 11

## *Pedronun icoinra huafo Jerusalén ano ato tapimani*

<sup>1</sup> Ascano Jesús fu rafumisifo doce non icoinra huafo Judea anoafaoanri nicanifo Israeli anoamafoanri Diospan tsain icoinra huanifo. <sup>2-3</sup> Ascano Pedro Jerusalén ano noconi ahuun caifo nan Israelifooan aqui tsain curushu yoinifo, —Min mani futsa muran cashon aton pushu muran iquia ato futan min piaran, —ishon yoinifo.

<sup>4</sup> Ascan nantifi ahuara finoan cuscan ato shafacafi yoiquin isca huani.

<sup>5</sup> —Un Jope anoshon Dios cufiaino namapan cuscara un oian. Panomanhuan ronoashu nai murannoashu uqui fotoaiton un oian. <sup>6</sup> A muran yoina futsa futsatapafo non shafo cuscara mai ano sharatiofo non puiyafari mun oian. <sup>7</sup> Un oiainno un ahuun oi un nica ua yoia, “Funihuu. Rutushon piishquin,” ua huaa.

<sup>8</sup> “Ma, Ifon. Uncai ahua chaca pitiroma. Moisés noco shunifo yononi cuscacai na cuscara non pitiroma. Ascan afocai un pimisima,” huani.

<sup>9</sup> Nai muranshon afanan ua yoia, “Nan Diosin shararan huaafin nan sharaquin. Acai sharamaran min huatiroma,” ua huaa. <sup>10</sup> Nai murannoashu panomanhuan fotoi rafu non fustia. Ascatan afanan nai muran caa.

<sup>11</sup> Nantianri nocofunu rafu non fusti Cesarea anoashu pushu ano nocofo. <sup>12</sup> Ascano Diospan Yoshin Sharapan, “Min caifoyamafiacun shinanchacayamahuu. Natian atofu catahuun,” ua huaa. No futan icoinra huafo seis ufu foafo. Non Cornelio pushu muran iquia. <sup>13</sup> “Uhuun pushu muran Diospan oinmati afu nai muran ica uqui nocoita. ‘Min yorafo Jope ano nichihuun Simón ahuun anu futsan Pedro miqi ihu-unon. <sup>14</sup> Aafin mia tsain shara yoinon. Ahuun tsain nicaino min non min yorafori Dios fu nipatiroran,’ ishon ua huaitaran,” ishon Cornelio ua yoita.

<sup>15</sup> Un ato yoiaino Diospan Yoshin Shara nocoqui nocoyamua cuscan atoquiri noco. <sup>16</sup> Ascano nocon Ifo Jesús noco yoini cuscan un shinanpacutana, “Juanpan mato unu muran iquimapacuni maton chaca shatushon man oinmanon. Ascafia Upa Diosin ahuun Yoshin Shara matoqui nichishquin mato ya imapacunon,” ishon noco yoini cuscan uhuun nomuranshon un shinan. <sup>17</sup> Upa Diosin ahuun Yoshin Shara noco inanni cuscan atorifi inainta. Ascacuncaín ahuuscaquin “Ato inainyamahuu” un Diosin huatiroma. Uncai anori yoitiroa, —ishon Pedron ato yoini.

<sup>18</sup> A nicacashocai afanan tsoan —Min aca cuscan afanan huayamahuu, —huanifoma. Ascataamarocon, —¡Aicho Upa Dios shararan! Nocon caifomari ato shinan futsamana afu nipanonfo, —ishon yoinifo.

## *Icoinra huafo Antioquía ano ichanannifo*

<sup>19</sup> Ascano Esteban rutuaifotian ato omitsiscamaifoanno Jesús icoinra huaafo pashcaifaifainifo. Atirifi Fenicia ano foaino atirifi Chipre ano foaino atirifiri Antioquía ano fonifo. Nococashon aton caifo Israelifo fusti tsain shara Jesushuunooa yoifoanfainifo. <sup>20</sup> Ascafianashu atirifi Chipre yafi Cirene anoashu Antioquía ano fonifo. Tsain shara Jesucristo-huunooa Israelifomari yoifocani. <sup>21</sup> Upa Diosin ahuun Yoshin Shara atofu ini. Aton tsainhuunshon Israelimafoan ichaparasion nocon Ifo icoinra huanifo.

<sup>22</sup> Ascano Jesús icoinra huafo Jerusalén anoa nicacaquin Bernabé Antioquía anoshon nichinifo. <sup>23</sup> Nocoshon Diosin ato shara huaa cuscan atohuun ramapaiyaiton oinni. Oin ahuun nomuran fasi unimani. — ¡Aicho! Natian man Jesús icoinra huaa. Ascan nocon Ifo tanasharacahuun. Maton nomuran ahua futsa shinanyamacahuun, —ato huani. <sup>24</sup> Nan Bernabé nocofunu fasi shara. Diospan Yoshin Sharapan rafuquimisi. Fasi Jesús icoinra huani. Ascacufin ahuunshon yora ichapafaoan nocon Ifo Jesús icoinra huanifoquin.

<sup>25</sup> Ascatan chipo Bernabé Antioquía anoashu Tarso ano cani Saulo funaical. <sup>26</sup> Aquí nocoshon Antioquía ano ihuuni. Ascano nanno fari fusti nan rafu Jesús icoinra huafo ichapa fu ichanannifo ato Diosin tsain tapimanifo. Antioquía ano Jesús tanamisifo ato anu futsaqui tau huanifo, —Cristoforan —ishon ato anunifo.

<sup>27</sup> Ascaino nantianri Diosin tsain inon pacoi cuscan yoimisisfo Jerusalén anoashu Antioquía ano funifo. <sup>28</sup> Ascan icoinra huafo ichanancanashu ato nicapai futsan ahuun anu Agabo Diospan Yoshin Sharahuunshon ato yoini isca huaquin, —Nantifi maitio Romanofaan ato yonoafo tushu cuyoiran, —ishon ato yoini. Icon nan Romano Claudio niaifotian tushu cuyocoinni. <sup>29</sup> Nicacatan icoinra huafo Antioquía anoafan pui ichan huacashon icoinra huaafo Judea mai anoa yopaifoan fomanonfo. Nan inainton inannifo. <sup>30</sup> Asca huacatan Bernabé yafi Saulo inannifo Jerusalén ano fomanonfo. Nanno Jesús tanamisifo aton niaifofo inanno pashcananonfo.

## 12

### *Santiago rutufain Pedro cunu muran iquimanifo cuscan*

<sup>1</sup> Ascatapaiyaino Herodes niaifoan atirifi Jesús icoinra huamisifo achimani cunu muran iquimashquin ato omitsiscamanon. <sup>2</sup> Ascashon Juanpan iyoa Santiagori achimani nopun tushtunon. <sup>3</sup> Tushtumana nicai Israelifo aqui unimanifo. Ascanori Israelifoan aton fuusititian ahuun anu misi farashati maisi pimisisforan huanifo nantianri Herodes yonocun Pedro achinifo. <sup>4</sup> Achimashon cunu muran iquimani. Ascashon ranushumua dieciseis cushuriapaonifo. Nantianri Israelifoan aton fuusititian Diosin nai oinmatin in aton shunifoan facu iyoafofosi finonmani shinanshaquin. —Nan fuusititian cuyoano un Pedro cunu murannoa cainmayoshquin ahuun caifoan oinonfo. Ascano un yoishquin nanton chaca huaquin rutucahuun un ato huashquinran, —ishon Herodes shinanniquin.

<sup>5</sup> Ascano Pedro cunu muran iquimanaiton Jesús icoinra huafoan fasi Upa Dios cufishonifo.

### *Diosin cunu murannoa Pedro cainmani*

<sup>6</sup> Herodes iyoco futsaino Pedro rutupai. Nan yamutan Pedro fasi osha murancoian ini. Cunopan munushushon ocuma rafutan ranushumu rafushon aton mucu rafuqui nushashon cushushinifo. Atiri ranushumuafo ahuun cunu caincaiti anoshon cushushinaifoanno. <sup>7</sup> Ascatapaiyaino Diosin ahuun oinmati afu nai muran ica cunu muran niriscatani. Faquishfiashu punariscatani. Ascaino Pedro moinpaiquin pipasni, —Funiriscahuun, —huaino ahuun cuno mupucumuriscatani.

<sup>8</sup> Ascashon, —Min sahuuti yafi min sapato sahuufain min nanushu-mutinin nanushumuhuu ufu cashquin, —ishon Diosin oinmati afu nai muran icaton Pedro yoini.

<sup>9</sup> Ascaino cunu murannoashu afu caicainni. Caicainquin ahuun nomuran shinanni, —Uncai cacoinnima. Uhuun namapan raca un caicatin, —ishon shinanni. <sup>10</sup> Ascanshu cunu rafu mapai cainni. Ranushumua cushuafo finonfaini. Ascatan ahuun cuno fupoti ano noco-caquin oian man fupucua ini. Ascaino cainnacahuatan fai tanafainifo. Chaimashta afu catan Diosin oinmati afu nai muran ica amaqui yamariscatani.

<sup>11</sup> Ascaino Pedronun shinanni, —Iconfinquin. Uhuun Ifo Jesús ahuun oinmati nai muranshon ua nichian ua numaquin. Herodes yafi uhuun caifo Israelifoan ua rutupaifiaifoan ua numaran, —ishon ahuun nomuran shinanni.

<sup>12</sup> Ahuun nomuran tapicoinfaini cani Diosin ashoan cuscan. María pushu ano cani. Nan María ahuun facu Juan. Ahuun anu futsan Marcos ini. Nanno yora ichapa ichanancashon Upa Dios cufiaifono. <sup>13</sup> Caincaini ano nocotan Pedronun cunu fupoti tooto huani. Ascaino oinmati shomaya ahuun anu Rode fupoti ano caquin. <sup>14</sup> Pedro ahuun tsain onantan fasi unimacoinquin samamashta nasocain ato chani huani. Cunu fupuyotama. —Pedro man oashu. Caincaini ano niaran, —ishon ato yoini. <sup>15</sup> —Ma. Mimun nison, —huaifoan. —Ma. Nancoinfinquin, —iriani. —Man rutuaifono ahuun oinmati Diosfu imisi nocoqui oaran, —ishon shinannifo.

<sup>16</sup> Ascafiainfono afi Pedronun tooto huariani. Fupuacufono oianfo nancoin ini. Fasi mustairinifo.

<sup>17</sup> Fasi tsaincaifoan, —Tsainyamacahuun. Nocon Ifoan ua cunu murannoa caimana cuscan un mato tapimanon, —ato huani. —Un mato yoiyai cuscan Santiago yafi nocon yora a futan icoinra huamisifo ato yoitacahuun, —ato huani. Yoitan pushu futsa ari cani.

<sup>18</sup> Ascatan man shafaino Pedro yamaino fuchicanashu ranushumuafoan fasi mucanifo. —¿Ahuuscashucon Pedro yamaimun? —icashu yoinannifo. <sup>19</sup> Herodes nicatan, —Funariscahuun, —ahuun ranushumuafo huani. Fuchiyamaifoan Herodes cushumisifo fasi yocariani. Tsoancai tapinima raquimain Pedro caaquin. Ascaiton ranushumua futsafo ato yononi a nantifi nan cushumisifo rutunonfo. Ascano Herodes Judea anoashu Cesarea ano cani. Nanno osha rananni.

### *Herodes niaifo nani cuscan*

<sup>20</sup> Nantianri Tiro anoafu yafi Sidón anoafuqui Herodes atoqui sinacoinni. Ascafiaino rau huapaicani aficoin aqui fonifo yoisharapaicani. Herodes ahuun oinmatinin ahuun anu Blasto yoiyai cuscan fasi icoinra huani. Ascano yoicaquin, —Blaston, niaifon Herodes noco yoishohuun non afu tsainon. Nocoqui sinaiquin. Non afu ipaisharaicai afanan nocoqui sinanonma. Nocoqui sinaquin ahuun yorafo yonotiroquin afanan noco tushu yafi non yopai cuscan noco inanonma, —ishon Tiro anoafu non Sidón anoafuanri Blasto yoini. Nicatan yoiiaifo cuscan ahuun niaifo tapimani.

<sup>21</sup> Ascaiton, —Ato yoihuu un samamashta atofu tsainnon, —ishon yoini. Chipu aqui funifo. Sahuuti sharacapacoin niaifoan sahumisi cuscara sahuuashu tsaolan ini. Ahuun tsaoti ano tsaoni ato yoishquin.



Tsain ichapa ato yoini. <sup>22</sup> Yoiquin anaititapaiyaino nantiffain oi ashcafinin isca huanifo, —Nacai nocofunuma. Nafin Dioscoinguin. Diosin ahuun oi cuscaracoinran, —ishon yoinifo. <sup>23</sup> Herodescai, —Un Diosinma. Dios fustifin shararan, —inima. Asca huaifoannocai Diosin oinmatinin afu nai muran ica yonoo isinin imariscatani. Noinmanhuarasi ahuun shaqui muran fospitanaino nariscani.

<sup>24</sup> Ascafiaino Diospan tsain shara Jesushuunoo manifoti yoiaacunifo. Paratama yorafoan icoinra huanifo.

<sup>25</sup> Ascaino Bernabé yafi Saulo icoinra huafo Jerusalén anoafu ato shara huani Jerusalén anoashu Antioquía ano nasofuranifo. Juan ahuun anu futsan Marcos arifi atofu cani.

## 13

### *Bernabé futan Saulo Diosin tsain yoiquin tau huani*

<sup>1</sup> Ascatan Antioquía anoashu Jesús icoinra huafo ichananfafainifo. Atirifi Diosin tsain inonpacoai cuscan ato yoifain. Atirifi ato yosipacunifo. Nanfo futsa Bernabé non Simón ahuun anu futsa Negro non Lucio nan Cirene yafi Manaén nan Herodes niaifo fu pushconi non Saulo. <sup>2</sup> Ascan shafa futsaino nanfo ichananshon piqui tununifo nocon Ifo Jesús cuficani. Asca huaifono Diospan Yoshin Sharapan yoini, —Un Bernabé yafi Saulo catoan ua yonoshononfo. Ato cufishocahuun. Ascan un ato tapimatiro un ato yonomai cuscan, —ishon ato yoini.

<sup>3</sup> Ascatan piqui tununifo Upa Dios cufinquin anaiticashon Bernabé yafi Saulo manmanshon cufishonifo. Ascashon ato nichinifo futsafo Diosin tsain yoitanonfo.

### *Bernabé yafi Saulo Chipre ano ini*

<sup>4</sup> Asca huatan Diospan Yoshin Shara ato Seleucia ano nichini. Anoashu shashon pocufainifo Chipre mai ano ocuma rafu unu tapia rafu nushmancayan mai mapaifainifo. <sup>5</sup> Nanno Salamina pushurasi ano noconifo. Nococatan Israelifoan aton ichananti pushu muran iquinifo ato Diospan tsain yoishquin. Juanpan ahuun anu futsa Marcos atofu cani. Ato futan ashoicai.

<sup>6</sup> Nannoashu nantifi nan mai natoroti ocuma rafu unu tapiano foanfainnifo. Ascano pushurasi ahuun anu Pafos ano noconifo. Nanno Israeli shointian Barjesusran, ishon anuquin. Inaca cuscan yoipaifiaquin icon yoinima. <sup>7</sup> Nan niaifo Sergio Paulo fu imisi. Niaifohan ahuun mapo fasi shara. Shinansharamisi. Bernabé yafi Saulo nicapaiquin ato cunani Diospan tsain nicashquin. <sup>8</sup> Ascafia Barjesús ahuun anu futsan Elimas nan shointian ahuun niaifohan Diosin tsain nicatima huani, —Niaifo Sergio Paulo, nan Bernabé yafi Saulo aton tsain nicayamahuu. Mia amaqiri yoitiroquin, —ishon yoini.

<sup>9</sup> Ascaiton Saulon ahuun anu futsa Pablo Diospan Yoshin Shara iquinano aasi oinquin yoini, <sup>10</sup> —Min nan yoshin chaca Satanás ahuun facu. Nan sharafoti min noicasmái. Minfin chanimisiquin. Min fuparapaimisi. Nocon Ifoan yorafo cayacafi tapimafiatiro afohuunoo min ato amaqiri yoimisi. ¿Ahuutian min unuimun? <sup>11</sup> Natian nocon Ifoan mia onaintimai. Ipaítama min fusho acucahuani. Fari chashaino min afanan oinyoimaran, —ishon Pablonun yoini. Asca huatapaiyaino fushoriscatani. Ascashon cunacufaini, —Ua mutsoyopun ua iyoshquin,

—ishon yoini. <sup>12</sup> Ascaino niaifo mustairini nocon Ifoan tsain fasi curushcoin oin. Ascaiton oinquin arifi nocon ifo Jesús icoinra huani.

*Pablo yafi Bernabé pushurasi ahuun anu Antioquía ano ini nan Antioquía Pisidia mai ano ini*

<sup>13</sup> Ascashu Pafos anoashu Pablo yafi afu rafuafoan unu pocufaini Panflia mai mapaifainifo. Nanno pushurasi ahuun anu Perge ano noconifo. Nannoashu Juan Marcos atomaqui nituni. Nituashu Jerusalén ano nasoni. <sup>14</sup> Perge anoashu Pablo yafi Bernabé Antioquía futsa ano fonifo. Nan Antioquía Pisidia muran ini. Nanno Israelifoan aton tunutitian ichananti pushu muran iquicanashu tsaonifo. <sup>15</sup> Moisés Diosin tsain cununi cuscan yafi inon pacoai yoimisifoan Diosin tsain cununi cuscan yoicatan niaifofoan atori yoimanifo, —Nocon yoramishtichin, man nocon ointi fupi huamatiro noco yoicapun, —ato huanifo.

<sup>16</sup> Ascatan Pablonun ninacahuan ato mushanshon yoini, —Uhuun yorafo Israelifo futan imafifoan no futan Upa Dios cufipaiquin ua nicayocahuun un mato yoisharanon. <sup>17</sup> Nonfin Israelifoquin. Upa Diosin nocon shunifo catonni ahuun yorafo inonfo. Egipto ano iyoshon ato shara huani. Ahuun curushhuunshon Egipto anoshon ato iyoni. <sup>18</sup> Tsoan istaipamashon cuarenta fari ato cushusharayopaoni. <sup>19</sup> Siete mani futsafo aton mai muranshon ato potani. Nocon shunifo inanni atona inon. <sup>20</sup> Nocon shuni Abraham ahuun mai anoashu cainitian yafi nocon mai ano nocon shunifo funifotian cuatrocientos cincuenta fari finonni.

Ascano Diosin yononi nocon shunifo futsan nocon caifo aton niaifo inon. Samuel niaifoataima nocon shunifoan aton niaifofo ichaparasi iyopaoni. Samuel inonpacoai cuscan yoimisi ini. <sup>21</sup> Ascatan nocon shunifoan Samuel yoinifo, “Caifo futsa niaifo cuscara noco inanhun,” huanifo. Ascano Diosin Cispan ahuun facu Saulo catonni aton niaifo inon. Aafin cuarenta fari Israelifoan aton niaifo ipaoniquin. Saulofin Benjamín ahuun funa iniquin. <sup>22</sup> Upa Diosin Saulo unumashon nocon shuni David tuqui huaniquin. Ahuunoa yoini isca huaqui, “Isaipan facu David ua noicoin. Uhuun ointi muran un fuchipaiyai cuscan arifi fuchipaiquin. Un yonoa cuscafin atiroquin,” ishon yoini.

<sup>23</sup> David ahuun funafo futsahuunshon Upa Diosin Jesús cainmani nocon numamisi inon. Noco yoiyoni cuscan Israelifo muran nocoqui nichini. <sup>24</sup> Jesús nocon caifo Diosin tsain yoiataima Juanpan noco caifoti yoini isca huani, “Maton chaca shatucahuun. Ascano un mato unu muran iquimanon,” ishon ato yoini. <sup>25</sup> Ahuun yono anaiticuantan Juanpan ato yocaquin, “¿Man shinanmun un tsoanquin? Uncai maton Numamisima. Ascafia Upa Diosin samamashta nocoqui ahuun Furun nichishquin. Ua fasi finoan. Un ahuun oinmati ipaifiashucai Upa Diosin uhuun chaca soayamanocai un itiromaran,” ishon ato yoini.

<sup>26</sup> Uhuun yoramishtichin, manfin Abraham ahuun funafoquin. Uhuun caifomafiashon Dios icoinra huatan marifi ua nicacahuun. Upa Diosin ahuun Furun nichini nocon Numamisi inon. Na tsain shara Jesushuunoa manifoti Upa Diosin yoipai. <sup>27</sup> Diosin tsain inonpacoai yoimisifoan cununifo isca huaquin, “Nocon numamisi rutushcaniran,” ishon cununifo. Tunutitiansin na cunu noco yoifafaini. Ascafiaicai nocon Numamisi nocoano Jerusalén anoa icafo futan nocon niaifofoanri a onannifoma. Ascan Diosin tsain inonpacoai yoimisifo

cununifo cuscan nanscacoïn huaquin. Nocon Numamisi Jesús rutunifo. <sup>28</sup> Ahuashta chaca huaiton oianmafiacaquin, “A rutucahuun,” niaïfofo futan yorahuanrasifoan Pilato huanifo. <sup>29</sup> Ahuunoa nocon shunifoan cununi. Nantifi ahuunoa cununifo cuscan huacashon ihui coyan iquinanmaquinshon fotomashon mahua quini muran mai huanifo.

<sup>30</sup> Asca huafïaintafo Upa Diosin mai murannoa funimani nïpanon. <sup>31</sup> Ascano man samano Galilea anoashu Jerusalén ano afu foafoan oïnifo. Nanfo ahuunoa natian nocon yorafo yoitiro.

<sup>32-33</sup> Nan tsain shara ahuunoa non mato yoi. Upa Diosin nocon shunifo yoiyoni cuscan nonfin aton funafoquin noco ashoan. Jesús funimana. Diosin tsain nan Salmo rafu yoini isca huaquin,

“Min uhuun facu. Natian un nantifi un ismai un mihuun noiai cuscan oïnonfo un min Upacun,”

ishon cununi. <sup>34</sup> Diosin ahuun Furun yoini cuscan Isaías inon pacoai cunuquin isca huani,

“Ahuara shara tsoan oinyomisima un mia ashoshquin. Nannori un David yoiyoni cuscan un mia inanon,”

ishon yoini. Ascan cununi cuscan Upa Diosin ashoni. Ahuun Furun naafiacun mai murannoa funimani afanan nanonma. <sup>35</sup> Nanscara Diosin tsain futsan aqï cununi,

“Upa Diosin ahuun Facu shara cushusharani payocononma,”  
ishon cununi.

<sup>36</sup> Davidhuunocai cununima. Man non tapia Diosin yonomani cuscan David ahuun yorafo ashoquin. Anaititan naani. Ahuun shunifo maini ano arifi maini. Ascano ahuun caya payoconni. <sup>37</sup> Ascafiacun Upa Diosin Furun funimayamua payocononma.

<sup>38-39</sup> Ascacufin uhuun yoramishtichin, un mato tapimapai Jesushunshon Upa Diosin nocon chaca soashotiro noco rau huanon. Nan mato yoi. Moisés noco yononi cuscaï nocon chaca soatiroma. Ascafiashu tsoan Jesús icoinra huaiton Upa Diosin ahuun chaca soashotiro. <sup>40</sup> Oïnfain nan inon pacoai yoïmisifoan cununi cuscan man anonma.

<sup>41</sup> “Nicacapon. Man niyoaichain un ahuaara sharacoin mato ashoïcain. Ahuaara un mato ashoai cuscan futsan mato yoïaiton mancaï icoinra huaima. Man yoïshquin, ‘¡Cuu! ¿Tsoan na tsain icoinra huatiromun? Nonmaquian,’ ishon man yoïshquin. ‘Ascan nanonquin,’ ”

—ishon Diospan tsain cununi.

<sup>42</sup> Ascatan tsainqui anaititan ichananti pushu murannoashu Pablo yafi Bernabé fonifo. Focashon, —Man noco tapimapaiyai cuscan afanan tunuti futsaino no fu ichanancahuun noco afanan tapimashquin, —ishon yoinifo. <sup>43</sup> Ascano nantifi ichananti pushu murannoashu fonifo. Israelifo yafi futsafoanri Upa Diosin tana cuscan afoanrifi tanapaicani atofu fonifo. Pablo yafi Bernabé mufainifo. Ascashon ato yoini, —Nocon yoramishtichin, Diosin mato shara huashoïain cuscan shinancahuun. Unuyamacahuun, —ato huani.

<sup>44</sup> Ascatan semanana futsan aton tunutitian nantifi yorafo nan pushurasi anoafo ichanannifo nocon Ifoan tsain nicashcaquin. <sup>45</sup> Fasi yorahuanrasi ichanannifo ato nicacani. Israelifoan oïncani Pablo yafi Bernabequi sinanifo. Ascano yoïafo, —Pablonun noco yoïai cuscan chacacoin. Jesuscaï Diospan facumaran, —ishon yoinifo. Ato roanifo.

<sup>46</sup> Asca huafiainfoanno ranotama ato cumanifo, —Non Diosin tsain Jesushuunoo mato yoiqui tauhuai yoi non oa. Ascafiaiton man nicacasmai. Nicacasmahucai man Upa Dios fu ipatiroma. Ascacun non nocon caifoma yoicai. <sup>47</sup> Nocon Ifoan noco yononi isca huaquin,

“Un mato yonoi man chashamati cuscara man inon. Man manifotifo oinmai ahuuscashumain man ufu ipatiroquin,”  
—ishon yoini.

<sup>48</sup> Nicacani Israelifoma fasi unimanifo. —¡Aicho! Nocon Ifoan ahuun tsain fasi shararan, —inifo. Tsoan Upa Diosin catoan afu nipashquin icoinra huanifo.

<sup>49</sup> Ascano nan mai anoafaan nocon Ifoan tsain Jesushuunoo yoinifo. <sup>50</sup> Yoifiaifoan Israelifoan atoqui tsain chaca huanifo. Pablo yafi Bernabé omitsiscamanifo. Atoqui tsain chaca huacatan nan ainfofo Dios tananpaiyaifo non niaiffoanri Antioquía anoshon aton nomuran Pablo yafi Bernabequi shinanchacashon aton mai anoshon ato rafu potanifo.

<sup>51</sup> Ato potaifoanno aton sapato potapota saquin Jesushuunoo nicacasmaifoan ismaifo. Ascatan Iconio ano fonifo. <sup>52</sup> Nan Antioquía ano icafo rama Jesús icoinra huacanashu fasi unimanifo Diospan Yoshin Sharapan ato iquinano.

## 14

### *Pablo yafi Bernabé Iconio ano ini*

<sup>1</sup> Iconio anoshon Pablo futan Bernabé amisifo cuscan pushurasi futsa anoshori ato yoinifo aton ichananti pushu muranshon. Ato shafacafi Jesushuunoo yoiaifoan Israelifo non yora futsafoan ichaparasion icoinra huacoinnifo. <sup>2</sup> Ascanfiainfoan Israeli atirifoan icoinra huafoma atoqui tsain chaca huanifo. Ato chaca huaifoan yora futsafoanri aton nomuran atoqui shinanchacanifo. <sup>3</sup> Ato asca huafiainfoanno Pablo yafi Bernabé nanno iyopaonifo. Nocon Ifohuunshon ranotama ato Jesushuunoo yoinifo. —Nocon chaca soashotiro Dios fu ipanon, —ishon ato yoinifo. Ahuunshon ahuarafo fasi sharafo tsoan oinyomisima cuscara fusti ato ismanifo. Asca huaifoan Diosin ato oinmani ahuunshon ato yoinonfo.

<sup>4</sup> Ascafiainfoan Iconio anoafaan anorisi shinannifoma. Ascashon Pablo futan Bernabé ato yoiai cuscan atirifoan icoinra huanifo. Ascafiaiton Israelifo nan icoinra huamafoan ato yoishonai cuscan icoinra huanifoma. <sup>5</sup> Ascano Israelifo yafi futsafo aton niaifofori ichannannifo yoinanshcaquin, —Non Pablo yafi Bernabé omitsisca huanon. Non ato toquirinin tsacanon rutushquin, —icashu yoinannifo. <sup>6-7</sup> Ascaifoan nicacani anoashu Licaonia mai ari ichonifo. Nanno pushurasifoan aton anu rafu Listra yafi Derbe anoshon. Ato tsain shara Jesushuunoo yoinifo.

### *Pablo Listra anoshon toquirinin tsacanifo*

<sup>8</sup> Listra ano nocofunu chato chatotiani nanscarapan cainni cahuascamisima. <sup>9</sup> Pablonun ato yoiaino arifi nicacoinni. Ascaiton fuisquin Pablonun ahuun nomuran shinanni, —Na nocofunu Jesús caya huamatiro icoinra huanon, —ishon shinanni.

<sup>10</sup> Ascashon yoiquin, —Funihuu, —huaino. Nicatapai aficoín fianshinacahuani. <sup>11</sup> Ascaiton oincani yorahuanrasi tsain futsan man inifo. Licaonia tsainman inifo.

—¡Aicho! Diosifo nocoqui fotoa. Nocofunu ointsafishu dios rafu nocoqui fotoaran, —icashu yoinannifo.

<sup>12</sup> Bernabé anu futsa tuqui huaquin Zeusiran huanifo. Pablonri aton tsain ichapa yoiaiton anu futsaqui Hermes huanifo. <sup>13</sup> Pushurasi patashari pushu huanifo Zeus aton dios cufishcaquin. A muranshon Zeus yonoshomisiton Pablo yafi Bernabé shinanmaqui charofo ya moi funufo ihuunshoni. —Man diosiran, —ishon ato moi rutushopainifo ato inanshquin. <sup>14</sup> Man acai cuscan nan rafutan oincaquin aton sahuuti fashnunifo aton nomuran ointi isincoincquin ato oinmapaiquin. Ato muran ichotanonfo,

<sup>15</sup> —Nocofunufaoan. ¿Ahuuscain man noco isca huashopaiyain? Noncai Diosimafinquin. Nonrifi maton cuscara nocofunu rafuquin. Non mato tsain shara yoi oa. Non mato yoimisi Dioscoinma shinanyamacahuun. Ahuarafo Dioscoinma potacahuun nan Dioscoinfin niaquin. Nan icoinra huacahuun. Nanton nantifi onihuaniquin. Nantifi nai muran onihuafain maitio onihuafain yorafoti onihuafain unuhuanri nantifi a murannoari onihuaniquin. <sup>16</sup> Ipaoni maifoti anofoan man apaiyai cuscan Upa Diosin ato shatumanataima. <sup>17</sup> Ascafiashu afincain ahuu cuscaramainquin ato ismamisi. Tsoacai “Diosin ahuu cuscaramainquin ua ismamaran,” itiroa. Diosin nantifi manifoti anofo shara huapai ato isma. Ascan maton mai ano oi fumamisi maton fanafo foaisharanonfo. Mato tushu ichapa inanmisi maton ointi unimanonfo, —ishon ato yoini.

<sup>18</sup> Pablo futan Bernabé ato yoisharapaifaiton ina rutushopainifo. Nocon Diosiran huapaicaquin. <sup>19</sup> Ascatapaiyaino Israelifo Antioquía yafi Iconio anoashu atoqui funifo. —Pablo yafi Bernabé fasi chacafo. Mato amaqiri yoipai, —ishon ato yoinifo. Nicacaquin shinan futsa acufoantaton ato chaca huanifo. Pablo toquirinin tsacaquin futsanifo. Ascan huacashon, —Man naaran, —huanifo. Ascashon pushufo pasoato shara fonifo ratai focaquin. <sup>20</sup> Jesús tanamisifoan Pablo naqui huanifo. Ascano funinaca huan pushurasi ano naso curani. Iyoco futsaino Bernabé fu Derbe ano cani.

<sup>21</sup> Naannoshon tsain shara Jesushuunoa ato yoinifo. Ascaiton nica-cani yorahunrasiton Jesús icoinra huanifo ahuun tanamisi ishcaquin. Ascano Listra non Iconio non Antioquía anori nasonifo. <sup>22</sup> Nanno Jesús tanamisifo Diosin tsain yoinifo aton ointi fupihuamashquin Jesús tanaquin finacoinnonfo. —Diospan tsain cachiquiri huayamacahuun. Jesús fusti icoinra huacahuun. Upa Diosin nantifi iquina ano non nocoataima non niyoashu non fasi omitsiscatiroran, —ishon ato yoini. <sup>23</sup> Ichananti pushuti anoshon Pablo futan Bernabé Upa Dios icoinra huafohuunoa cufifain piqui tununifo aton cushumisifo catonshcaquin. Ascaino, —Upa mia icoinra huacaniquin ato cushusharahuu, —ishon cufinifo.

*Pablo yafi Bernabé Antioquía ano nasonifo nan Antioquía Siria mai muran ini*

<sup>24</sup> Ascano anoashu focani Pisidia yafi Panfilia mapafainifo. <sup>25</sup> Anoashu Perge ano nococatan nanno nituyonifo Diosin tsain yoishcaquin. Ascatan anoashu Atalia ano fonifo. <sup>26-27</sup> Atalia anoashu unuhuan pocufaini focani Antioquía ano nasonifo. Nococashon icoinra huafo Pablo futan Bernabé ato ichanan huani. Atomaqui cataima ato Upa Dios cufishonifo Diosin ato mutsismafain ahuunshon yoisharanonfo. Ascan nantian Diosin ato yonoa cuscan anaiticashon

nantifi acafo cuscan ichanancashon ato yoinifo. —Nantianri nocon caifoma yora futsan icoinra huafo Upa Diosin atorifi ahuun yorafo imaran, —icashon ato yoinifo. <sup>28</sup> Ascano Pablo yafi Bernabé Jesús tanamisifo fu iyopaonifo.

## 15

### *Jerusalén ano icoinra huafo ichanannifo*

<sup>1</sup> Ascano nocofunufu Judea anoashu Antioquía ano funifo. Nococashon yoinifo, —Nocon shunifo ipaonifo cuscan non amisi. Nocofunufu foshqui rupa shatuafo Dios fu ipatiromaran, —ishon Moisés noco tapimani cuscan yoinifo. <sup>2</sup> Ascaiton nicacani Pablo futan Bernabé, —Aririmaran, —icashu atofu fochishmanantanannifo. Ascano icoinra huafoan Pablo yafi Bernabé non futsafori catonnifo. Ascashon ato Jerusalén ano nichinifo. Jesús fu rafumisifo doce non cushumisi futsafori ato yocanonfo iconmainquin.

<sup>3</sup> Ascano icoinra huafoan ato nichiafo. Focani Fenicia mai ano yafi Samaria mai anori mapaifainifo. Ascashon ato yoinifo, —Israelimafoan Jesús icoinra huashon ato chaca shatuaforan, —ishon ato yoinifo. Icoindra huafo anofoan nicacani fasi unimanifo.

<sup>4</sup> Ascatan Jerusalén ano nocoafono Jesús fu rafumisifo doce non cushumisi futsafori nantifi Jesús icoinra huafoti iscanifo, —¡Aicho! Man nocoqui fuafokin, —ishon yoinifo. Ato fu ichanancashon Diosihuunshon afoanfainnafo cuscan ato yoinifo. <sup>5</sup> Nicacashon atirififoan icoinra huafo Fariseofoan yoinifo, —Nocon caifomafashon Moisés yononi cuscan aton nocofunufori non foshqui rupa shatupacutiro, —ishon yoinifo.

<sup>6</sup> Asca huafoan Jesús fu rafumisifo doce yafi icoinra huafo aton cushumisifoanri tiri futsan ichanancashon nanfohuunoa yoinanshcaquin. <sup>7</sup> Tsain ichapa yoinainfoanno Pedron ninacahuanaino nishmapacufoanafoan ato isca huani,

—Uhuun yoramishtichin, ua nicacahuun. Man man tapia noco futsan Diosin ua catonni mani futsanfo muran ua nichishquin ahuun tsain shara Jesushuunoa un ato yoinon icoinra huanonfo. <sup>8</sup> Diosin yorafoan aton nomuran shinain cuscan tapicoian. Nanton noco ismani nocon caifoyamafiacun ato iquina ahuun yorafo inonfo. Ahuun Yoshin Shara noco inan cuscan atorifi inan. Ascan non tapitiro Diosin atorifi fuchipai. <sup>9</sup> Nan non icoinra huaiton nocon chaca soashona cuscari afoanri icoinra huafoan atori chaca soashona. Nanscarasi huaquin noco fuchipai. <sup>10</sup> Nan iconquin. Moisés noco yononi cuscacai nocon shunifo non norifi non ascatiroma nipashquin. ¿Ascacufin ahuuscain norifi non atiroma cuscan man Jesús tanamisifo yonomapai? Asca huaquin man ato ointi ihumatiro. <sup>11</sup> Ma. Aririma. Nocon Ifo Jesús nocohuun ramapaiyaino non Upa Dios fu ipatiroquin. Nan non icoinra huai. Afoanri icoinra huacanashu Dios fu ipatiroran, —ishon Pedro ato yoini.

<sup>12</sup> Asca huatan Bernabé yafi Pablonun ato yoiaino nantifi nanoashu ichanancanashu pusinifoma nicapaicani. Diosin atohuunshon tsoan oinyomisima cuscara ahuafoasi fasi shara Diosin fustiton atiro cuscan Israelimafo muranshon huanifo. <sup>13</sup> Aton tsain anaitiano Santiago ato isca huani,

—Uhuun yoramishtichin ua nicayocahuun. <sup>14</sup> Pedro noco rama yoiacuscancashomain Upa Diosin nocon caifoma catoanquin ahuun

yorafo inonfo. <sup>15</sup> Nannorifosi Diosin tsain inon pacoai yoimisifoan yoinifo. Isca huaquin cununi,

<sup>16</sup> “David ahuun caifoa un potaino urifi un ato potayoni. Ascafia un ahuun funafo afanan atoqui nasoshquin ato caya huanon uhuun yorafo afanan inonfo. <sup>17</sup> Ascacun manifotifoanri ua cufishcani uhuun yorafori un ato anupacushquiran,’ ishon Upa Diosin yoini. <sup>18</sup> Diosin ahuamamishti tapian. Icataima inonpacoai cuscan yoiyoniran,” ishon cununi.

<sup>19</sup> Ascancufin un shinanquin isca. Nocon caifoma Dios tanapaiyaifoan non ato ahuara curushcai non yonotiroma. <sup>20</sup> Ascatarocon non ato cunu fomatiro yoiquin isca huaquin, “Dioscoinma aton Diosiran huacashon tushu tamanchinafo. A oincaquin tushu piyamacahuun. Man ascara piaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Maton ahuinmari chotayamacahuun. Maton funumari chotamayamacahuun. Yoina yafi ina tumosishon ahuun imi foyamaino ahuun nami piyamacahuun. Imiri ayayamacahuun.” <sup>21</sup> Nanfohuunoa nocon ichananti pushu muranshon tunutitian yoimisifo. Afo ascayamacahuun. Nocon shunifoanri nannori yoimisiforan, —ishon Santiago ato yoini.

### *Israelifoma cunu fomani*

<sup>22</sup> Ascatan Jesús fu rafumisifo doce non Jesús icoinra huafo non cushumisifo non icoinra huaa futsafori ato futan rafu catonnifo Judas ahuun anu futsa Barsabás yafi Silas catonnifo Pablo yafi Bernabé fu Antioquía ano fononfo. Nan rafu icoinra huafoan nicacoinnifo. <sup>23</sup> Ato cunu inanquin isca huani,

—Nonquian Jesús fu rafumisifo doce non cushumisi futsafori non nantifi Jesushuunoa yoimisifoan non mato cunu fomai man tapinon. Nocon yoramishtichin Antioquía anoafu yafi Siria anoafu non Celia anoafu man nocon caifoyamafashon no futan man Jesús icoinra huamisi. Non mato tsain shara yoinon.

<sup>24</sup> Man non nica futsafo noco anoashu mato ano foitacashon mato yoicaquin maton nomuran fucashmana. Non ato nichiamu. Mato yoia cuscan noncai ato yonoama.

<sup>25</sup> Ascacun non ichanan nannorifosi non shinan nocofunu futsafo catonshquin Pablo yafi Bernabé fu mato ano nichishquin. Pablo yafi Bernabé non atohuun noicoin. <sup>26</sup> Nan rafutan nocon Ifo Jesushuunoa futsafo yoipafiaifoan atirifoan ato rutupafiafoancai yoiquin ununifoma.

<sup>27</sup> Ascano non Judas yafi Silas matoqui nichian non mato cunushona cuscan nannoricoin mato yoinon. Ato tsainhuunshonri man tapitiro iconcain.

<sup>28</sup> Diospan Yoshin Shara shinan cuscan norifi nannori non shinan. Nanfohuunoa non mato cunushona. Man ahuara futsa yopaima isharaquin. Nan fusti man yopai. <sup>29</sup> Diosicoinma tushu tamanchinafo piyamacahuun. Imi ayayamacahuun. Yoina yafi ina tumosishon imi foamano ahuun nami piyamacahuun. Maton ahuinma chotayamacahuun. Maton funuma chotamayamacahuun. Nan fusti non mato yoipai. Nantisi non mato yoi. Non cunua cuscan aashu man isharacontitoran, —ishon cununi.

<sup>30</sup> Ascano Jerusalén anoshon ato nichinifo. Antioquía ano nococashon icoinra huafo ichanan huashon ato cunushoni cuscan inanni oinnonfo. <sup>31</sup> Oincani fasi unimanifo, —¡Aicho! Noco cunushona cuscan nocon ointi roamaroama sharairan, —icashu yoinannifo. <sup>32</sup> Ascatan Judas yafi Silas nan rafutan Diosin tsain inonpacoai cuscan yoimisi inifo. Jesushuunoa yoiyai cuscan icoinra huanifo. Nicacoinmisifo aton ointi fupi huamani ato mutsismanon Jesús tanasharashcaquin. <sup>33-34</sup> Nanno osha ranan atofu ichanannifo. Ascatan Antioquía icanoafoan ato nichinifo, —¡Aicho! Non fasi unimai noco yoisharamisifo. Natian afanan Jerusalén ano fosharacahuun. Nan icoinra huafo nanno nocoaino ato yoisharashohuun, —huanifo. <sup>35</sup> Ascafiainocai Pablo yafi Bernabé atofu fonifoma. Antioquía ano nitunifo futsafo futan Diosin tsain tapimanifo.

Pablonun afanan cai futsacai Jesushuunoa pushurasifoti ato tapimani <sup>36</sup> Ascaifoan chipo, —Icoindra huafo pushurasi futsa anoafo non oin canon. Non ato nocon Ifoan tsain yoini. Man natian tanasharafomainquin non oin canon, —ishon Pablonun Bernabé yoini.

<sup>37</sup> —Ai. Non canon. Juanrifi no fu canon, —Bernabé huani. Nan Juanpan ahuun anu futsan tuqui huani Marcos. <sup>38</sup> —Ma. Noncai Marcos iyoicaima. Noco Panfilia anoshon potani. No fu afanan yonotiroma. Afanan noco potatiroraca, —ishon Pablonun yoini. <sup>39</sup> Fasi fochishmanantanancanashu pashcananfainnifo. Bernabé shashon Marcos Chipre ano iyoni. <sup>40</sup> Ascano Pablonun Silas catonni afu yononon. Antioquía anoashu foataifoma icoinra huafo atofu ichanannifo. —Nocon Ifon, Pablo yafi Silas cushusharahuu mihuunoa yorafo yoinonfo, —ishon ato cufishonifo. <sup>41</sup> Ascatan anoashu focashon Siria yafi Cilicia anoafo Jesushuunoa ato yoifoanfainnifo. Icoindra huafo pushurasifoti shinanmasharani Jesús tanasharanonfo.

## 16

### *Timoteo Pablo yafi Silas fu cani*

<sup>1</sup> Ascano Derbe ano Pablo yafi Silas noconifo. Anoashu chaimashta Listra ano fonifo. Nanno Jesús tanamisi futsan ahuun anu Timoteo ini. Ahuari Israeli shafo ini. Arifi Jesús icoinra huani. Apa Griegofo ini. <sup>2</sup> Icoindra huafoan Listra anoa non Iconio anoafoan, —Timoteo nocofunu shararan, —huanifo. <sup>3</sup> Ascacun Pablo ato ya Timoteo iyopaini. Iyoataima shinanni, —Nantifi uhuun caifo nan Israelifoanri tapiafo Timoteo apa Griego. Ascatan uhuun caifoon amisifo cuscan un Timoteori foshqui rupa shatumatiro ahuunoa shinansharanonfo, —ishon shinanni. Asca huano atofu cani. <sup>4</sup> Pushurasiti mapaicainicai Jesús fu rafumisifo doce non cushumisi futsanfori Jerusalén ano yononifo cuscan ato tapimani yoirafo cuscan huanonfo. <sup>5</sup> Ascano nicacashon fasi icoinra huaquin finacoinnifo. Paratama yorafoanri icoinra huanifo.

### *Pablonun namapan cuscara nocofunu Macedonia anoa oinni*

<sup>6</sup> Asia mai ari Jesushuunoa yoifopaiyaifoan Diospan Yoshin Sharapan, —Asia mai ari foyamacahuun, —ato huani. Ascaino Frigia yafi Galacia ano mapaifaini fonifo. <sup>7</sup> Anoashu Misia mai pasoato ano noconifo. Anoashu pushurasi futsan Misia anoashu Bitinia ano fopaiyaifoan, —Ari foyamacahuun, —Jesús ahuun Yoshin Sharapan ato huani. <sup>8</sup> Ascano Misia finonfaincani Troas ano noconifo. <sup>9</sup> Nococashon nan yamutan



Pablonun ahuun namapan oinni nocofunu Macedonia anoaton, — Macedonia ano ohuu. Noco tapimashquin, —ishon yoini. <sup>10</sup> Moishon Pablonun noco yoini, —Natian Upa Diosin noco Macedonia ano nichipai tsain shara Jesushuunoa non ato tapimanon, —ishon noco yoini. Ascano non ati shara huani samamashta afu cashquin.

*Pablo yafi Silas Filipos ano inifo*

<sup>11</sup> Ascan Troas anoashu shashon nanucaini non cani. Mai ano ocuma rafu unu tapia rafu ahuun anu Samotracia ano cayacafi non pocufaini cani. Anoashu iyoco futsaino non pushurasi Neápolis ano noconi. <sup>12</sup> Anoashu non pushurasi ahuun anu Filipos ano cani. Nan Macedonia mai ano. Macedoniafoan aton niaifofo nanno icafo ini. Nanno non osha rananyoni. <sup>13</sup> Tunutitian pushurasi pasoato non unu cuseumunri cashion. Non nica nanno ichananmisi Upa Dios cuficani. Nocoshon man non oian ainfofo nanno ichananfo. Ascan tsaoshon non ato Diosin tsain tapimani. <sup>14</sup> Nannoshon ainfo futsan noco nica ahuun anu Lidia. Pushurasi ahuun anu Tiatira anoa ini. Pano mapash inanmitsamisi. Dios cufinmiscoin. Pablonun Jesushuunoa yoiaiton nocon Ifohuunshon ahuun nomuran icoinra huani.

<sup>15</sup> Ascaiton icoinra huaino ahuun yorafoanri icoinra huanifo. Icoinra huaifoan ato unu muran iquimani Jesús aton Ifocun ismashcaquin.

—Man tapia unrifi nocon Ifo Jesús un icoinra huaquin uhuun pushu ano fucahuun un mato pimanon. Nanno man itiroran, —ishon Lidia noco yoini.

<sup>16</sup> Ascatan shafa futsan non afanan cufimisi ano foanno shomaya nocoqui noconi. Futsafoan aton oinmati yoshin chaca ahuun nua. Nanton inonpacoai cuscan yoshin chacahuunshon ato onanshopaoni. Onanmafoan ato yoini. Ato yoiaiton ahuun ifofo pui inannifo. <sup>17</sup> Nanton Pablo yafi noco mufoquin oi ashcafinin yoifoni,

—Nan nocofunufofin nan Diosin nantifi finoanton ahuun oinmatifo. Ahuunscashumain non Dios fu ipatiroquin noco yoi fuaforan, —ishon yoini.

<sup>18</sup> Shafa ranan noco ascasi huafoanfafaini. Noco fucash huamisi. Pablonun afanan tunuyamacaiquin ifiacuahuan yoshin chaca shomaya fu imisi isca huani,

—Jesucristohuunshon un mia yonoicai. Na shomayamaquinoashu catahuun, —huani. Ascan huatapayaino samamashta amaquinoashu cani.

<sup>19</sup> Shomayaton ahuun ifofoan oincaquin shinannifo, —¡Ohua! Nocon yonoticaí afanan yoshin chaca afu icama. Afanancai inon pacoai cuscan yoitiroma. Ascan tsoancaí afanan ahuunshon noco pui inainmaran, —ishon yoinifo. Ascashion Pablo yafi Silas achinifo. Achishon aton niaifofoan pushu ano ato sharafonifo.

<sup>20</sup> —Nan nocofunu rafutan Israelifoan nocon pushurasi ano yorafo fucash huamacoin ato shinanchacamacani. <sup>21</sup> Noco amapayai cuscaí Romano niaifofoan noco yonomisima. Noncai afanan ascatiromaran, —ishon aton niaifofo yoinifo. <sup>22</sup> Yorahuanrasifoan nannorisi yoinifo. Ascano niaifofoan yonocun aton sahuuti pucashon ihuin ato coshaqui futsanifo. <sup>23</sup> Man coshaquin futsatan cunu muran ato iquimanifo. —Na rafu cushusharahuu. Chifi ichofoanno non mia rututiroquin, —ishon niaifofoan ranushumua cushumisi yoinifo. <sup>24</sup> Ascan huaifoan nicaquin

fasi ocu murancoin ato iquimani. Ihui rafu oyucuruamashon aya ato tsaoni.

<sup>25</sup> Ascano yamunacuahuanaino Pablo yafi Silas Upa Dios cufinyanan fanainnifo. Ascaiton atofu iquiafoan nicanifo. <sup>26</sup> Ascatanaino fascocoin mai nayanaiyainacahuani. Ascaino a cunu ahuun quishifo tsucu tsucusini. Ascatanaino cunu fupotifo afincoïn fupucui futsuni. Ascata-paiyaino cunopan ato munushafo afincoïn oshoriquitan mushorimuni. <sup>27</sup> Ascaino ranushumua moinacahuaquin oian a cunu fupotifo man fupucui futsua ini. Ascaiton oin ahuun nopu tsitsucumutan afiri chachipaini. <sup>28</sup> Ascaiton Pablonun oi ashcafinin yoini,

—Ascayamahuu. Mifiri rutuyamahuu. Tsoa raqui caamaquin, —huani.

<sup>29</sup> —Chi otashon ua fushoriscahuun, —ranushumuaton futsa huani. Otafurani Pablo yafi Silasqui ichoni ato naman tsitsaotoshini. Fasi tari tari yanani. <sup>30</sup> Funinaca huan ato rafu chifi caimani.

—¿Ahuuscashomun uhuun chaca un shatutiroquin Upa Dios fu ipashquin? —ishon ato yocani.

<sup>31</sup> —Nocon Ifo Jesucristo icoinra huashu min non min yorafori man Dios fu ipatiroquin, —ishon Pablo futan Silaspan yoinifo.

<sup>32</sup> Asca huacatan nocon Ifo Jesús ahuun tsain a yoifain pushu anoafori ato yoini. <sup>33</sup> Asca huacashon unu fitan coshafo ano puchoquin futsafoanno a pushu muran icafoti ato unu muran iquimapacuni icoinra huacashon ismanonfo. <sup>34</sup> Asca huano ranushumuaton ahuun pushu muran iquimani ato pimashquin. A yafi ahuun yorafoti Dios icoinra huashu aton nomuran fasi unimanifo.

<sup>35</sup> Ascano man shafano ahuun niaifofoan aton niaifo patasharifo aqui nichinifo, —Pablo yafi Silas caimanonfo ato yoitacahuun, —ishon ato nichini. <sup>36</sup> Ranushumuaton Pablo yoini,

—Niaifofoan yonoa natian man casharatiroran, —ishon ato yoini.

<sup>37</sup> Nicaquin Pablonun ranushumua niaifofo yoini, —Norifi non Romanofiacun noco yocashoma yorafoan ointaifi noco coshamanafo. Non ahua chaca huayamafiacun ascan natian tsoa yoishoma noco caimapaicani. Ma. Noncai ascaran tapipaimaficain. Niaifofo aafi funonfo noco caimashquin. Nannori ato yoitacahuun —Pablonun ato huani.

<sup>38</sup> Yoiaifo cuscan ranushumuafoan aton niaifofoqui chaninifo. Pablo yafi Silas Romanofori nicacani niaifofo fasi ratucoinnifo. —¡Ohuashta! Nocon niaifofoan anori nicacaquin noco asca huatiroran, —ishon yoinifo. Musucani. <sup>39</sup> Ascano ato ano fonifo ato yoisharapai focani. —Nocon pushurasi anoashu fosharatacapun, —ato huanifo. <sup>40</sup> Ascano cunu murannoashu focani Lidia pushu ano fonifo. Nan anoshon icoinra huafo Jesushuunoa yoisharanifo aton ointi fupi huanonfo. Yoicatan atomaquinoashu fonifo.

## 17

### *Tesalónica anoashu mucanifo*

<sup>1</sup> Ascatan focani Anfípilis yafi Apolonia mapafainifo. Tesalónica ano noconifo. Nanno Israelifoan aton ichananti pushu ini. <sup>2</sup> Ahuun fuyamisi cuscan iquishon tunuti rafu non fustitan Pablonun ato Diosin tsain yoini.

<sup>3</sup> —Cristo noco omitsiscashoni. Naafiacun funimani. Jesushuunoo un mato tapimai nanfin Cristoquin. Upa Diosin catonni nocoqui nichishquin, —ishon Pablonun ato yoini.

<sup>4</sup> Nicaquin atirifi Israelifoon ato futan icoinra huanifo. Griego ichapafo non ainfofoanri nicacoinpainifo afoanri icoinra huanifo. <sup>5</sup> Ascano Israelifoon aton niaifooan Pablo yafi Silas nicacoiainfoan oincani fasi ato rafuqui sinacoinnifo. Ascashon a inanmitsamisifo anoa focashon nocofunu shanishunifo fuchinifo. —Pablo yafi Silasqui tsain chaca huatacahuun yorafoanri nicashon afori atoqui sinanonfo, —ishon ato yononi. Asca huacatan fonifo yoifocani. Ascashon Pablo yafi Silasqui tsain chipunifo. Yorahuanrasi fasi mucanifo. Mucacatan nocofunu ahuun anu Jasón pushu ano fonifo Pablo yafi Silas achipaifocani. Yorahuanrasi muran caimapaicaquin ato asca huanonfo. <sup>6</sup> Ato fuchiymacaquin Jasón yafi icoinra huaa futsafo achinifo. Achicashon niaifoofo ano ato iyonifo. Iyoshon isca huanifo,

—Pablo futan Silaspan manifoti anoafu shinanchacamamisifo. Natian nuno nocon mai anori man fuafo. <sup>7</sup> Nan Jasón ahuun pushu muran ato iquimana. Nan rafu nocon niaifo Cesari noco yonomisi cuscan nicacasmanifo. Ascashon yoirafo, “Nocon niaifo futsan. Ahuun anu Jesusran,” ishon nan rafutan yoiaraforan, —ishon oi ashcafinin yoinifo.

<sup>8</sup> Niacani niaifoofo yafi yorahuanrasiton aton nomuran fasi shinanchacanifo. Ascashu mucanifo. <sup>9</sup> —Noco pui inancahuun mato nichinonran, —ishon niaifoofoan Jasón yafi futsafo yoinifo. Ascaiton ato inainfoan ato nichinifo.

*Pablo yafi Silas Berea ano ini*

<sup>10</sup> Ascacashon icoinra huaa futsafoan Pablo yafi Silas yamutan ato Beria ano nichinifo. Nococatan nan rafu Israelifoon aton ichananti pushu muran iquinifo. <sup>11</sup> Iquicaintan ato Jesushuunoo tapimani. Bereafocai Tesalonicafo cuscarafoma. Pablo futan Silaspan ato yoiar cuscan fasi nicapainifo. Nicacatan shafatifi Diospan tsain oinnifo iconmain Pablonun ato yoiarquin. <sup>12</sup> Ascano Israelifoon icoinra huanifo. Griego ainfofoanri nicacoinpainifo afoanri icoinra huanifo. Griego nocofunufaanri icoinra huanifo. <sup>13</sup> Ascaifoon Pablonun Bereafo Diosin tsain tapimani Tesalónica ano nan Israelifoon icafo niacani. Berea ano focashon aqui tsain chaca huanifo. Yorahuanrasi niacani aqui tsain chaca huaa. Ascano aton nomuran shinanchacamanifo Pablo nicanonfoma. <sup>14</sup> Ascano Jesús tanamisifo nanno musucaquin Pablo unuhuan cusumunri nichinifo chaca huanonfoma. Cafiashu Silas yafi Timoteori Berea ano nituyonifo. <sup>15</sup> A fu focani Atenas ano iyonifo. Nannoashu afanan nasofainifo. Pablonun ato cunu inanno Silas yafi Timoteo inanonfo, —Uqui furiscacahuun, —ishon ato cunushoni.

*Pablo Atenas ano ini*

<sup>16</sup> Nannoshon ato manquin oian Atenas anoafoon ahuarafu fasi icha-parasi rami huacashon, —Nocon diosiran, —huaifoon. Oinquin ahuun ointi fucash huariapaoni, —¡Ohua! Ahuuscaquin Diosicoimmafo icoinra huacanimun, —ishon ahuun nomuran shinanni. <sup>17</sup> Ascaino Israelifoon aton ichananti pushu muran iquini ahuun caifo yafi Griegofoan Diosin icoinra huapaiyaifoon Jesushuunoo ato yoini. Ichananti pushu muran-noa fustima chifnoa inanmitsamisifori shafatifi nan nicapaiyaifori ato yosini.

<sup>18</sup> Ato yoiaino futsafo aqui noconifo afu fochishmanantanancani. Atirifoan shinannifo non apaiyai cuscafin non huatiroquin noco unimanon. Nanfoan anu tuqui huani Epicureofo. Atirifoanri shinannifo ahuara ahuuscarafiaino non tunutiroran ishon shinannifo. Nanfo anu tuqui huani Estoicos. Nan rafu Epicureofo non Estoicofori Pablo fu fochishmanantanannifo. Yoinifo,

—Nan tsainmisi fahua cuscara. Raquiri noco yoipaimun, —ishon atirifiton yoinifo.

—Dios futsafo noco icoinra huamapairan, —ishon atirifoanri yoinifo. —Pablonun noco Jesushuunoa yoiā. Naafishu funini noco yoiaran, —ishon yoinifo.

<sup>19-20</sup> Yoifiacashon Areópago ano Pablo iyonifo. Nanno ichananmisifo ahuarāfo futsahuunoa nicamisifo. —Min noco tapimapaiyai cuscan tsoa nicamisima. Non tapipaicain. Min yoiāi cuscan funacoin. Tsoacai anori nicayomisima. Ascan afanan noco yoihuu nonri tapinon, —ishon yoinifo. <sup>21</sup> Nantifi nan Atenas ano icafo non yora futsafori ichananmisifo yoinanshquin. Ahuarāfo tsoan anori nicayomisima yoipaicani. Atirifiton nicashon atirifi yoinifo. Ahua futsacai huanifoma.

<sup>22</sup> Ascaifoanno nan ichananmisifo ahuun anu Areópago anoashu Pablonun aton ointaifi ninacahuan ato yoini.

—Atenasfoan ua nicacahuun un mato yoinon. Mun oian manfin Diosihuunoa fasi tapipaimisifoquin. <sup>23</sup> Nuno man icano un cahuacacainquin mun oian man cufimisi anoshon man cunuquin isca huaa,

“Dios futsa tsoancai onanmisima non cufipairan”

ishon man cunua. Mancai nan Dios onanmisima. Ahuunoa natian un mato tapimaicain.

<sup>24</sup> Diosin nantifi mai anoafoti non nai murannoati onihuaniquin. Aton ifon inon. A yorafoan pushu huaa murancai Diosin icama. <sup>25</sup> Atofin yorafoti nimafain noco shacaimaquin. Asca acai ahua yopaimaquin. Non yorafoancai non ahua Dios ashotiroma ahuatzi yopaiton.

<sup>26</sup> Diosin nocofunu onihuaquin tau huani. Na nocofunuhuunoashu manifoti caicani. Aafin yononi raquifomain icanicain. Ahuuti farimain itirofoquin arusu fusti tapia. <sup>27</sup> Nantifi asca huani manifoti afu ipainofo. A funaquin fuchishcaquin. Ascāfia nocoti chai huaama. <sup>28</sup> Ahuunoashu fusti non nitiro. Noco nimayamainocai non ahuuscatiroma. Arusu noco nimatiro. Maton tapimamisifoan cununi cuscan, “Non Diospan facuforan,” ishon cununi.

<sup>29</sup> Iconcuacain nocofununcāi afin Dios oni huatiroma. Cuno chashna faca facaitsa iyamarai cuno oshopa iyamarai toquiri nocofunfoan rami huafiatirocai Diosin ascarama. <sup>30</sup> Ascapaonifiashocai Dios onanmisifoma. Ascāfiafoan ato onaintimapaonima. Ascāfia natian nantifi manifoti anoafō ato yonoa aton chaca shatushon icoinra huanonfo. <sup>31</sup> Jesús naafiācun funimani. Ascancunfin non tapitiroquin Upa Diosin a catonni nantifi yorafoti cayacāfi shara yoinon afu ipaiyamarai omitsipacunacafo muran focani. Upa Diosin inonpacoai cuscan shinanni ahuutianmain iquicain, —nicacaquin ato huani.

<sup>32</sup> Jesús nafiashu funini nicacani atirifi shuchinifo. Atirifoanri yoinifo isca huaquin,

—Shafa futsan afanan noco yoihuu non nicanon, —ishon Pablo yoinifo.

<sup>33</sup> Ascatan ichananmisifo anoashu Pablo cani. <sup>34</sup> Nocofunu fustira-siton Jesús icoinra huacashon Pablo tanacoinnifo. Futsan ahuun anu Dionicio. Nan Areópago ano atofu ichananmisi ato yoi. Ainfo futsa ahuun anu Dámaris. Futsafoanri icoinra huanifo.

## 18

### *Pablo Corinto ano ini*

<sup>1</sup> Ascano chipo Pablo Atenas anoashu Corinto ano cani. <sup>2</sup> Nocoano nocofunu yafi ahuin nantianri mai futsariashu noconifo. Nocofunun ahuun anu Aquila. Israeli Ponto anoashu cainni. Ahuin Priscila arifi Israeli shafo. Nan rafu Italia ano imisifo. Ascan Italiafoan aton niaifon ahuun anu Claudio potani isca huaquin, —Nantifi Israelifo Roma anoashu fotacahuun, —ato potani. Ascanofin Aquila yafi Priscila Italia anoashu Corinto ano ramashta noconifo. Pablonun atohuunoa nicafaini aton pushu ano cani. Ato onaincai. <sup>3</sup> Nan rafutan pano pushu icushaino. Pablonunrin ato futan icushpaoni. Ascano nanno nituyoni ato futan yonoi. <sup>4</sup> Asca huacatan tunutitiantifin Israelifo aton ichananti pushu muran iquini Jesucristo icoinra ato huamapai.

<sup>5</sup> Ascano Silas yafi Timoteori Macedonia anoashu aqui funifo. Nocoafono Pablonun Israelifo Jesushuunoa yoifoanfaini. Nan fusti yoini. Ahua futsan yoinima. —Jesús Diosin catonni, nanton ahuun facuran, —ishon ato yoini. <sup>6</sup> Ascafia Pablonun ato yoifiaino nicatimanifo. Aqui tsain chaca huanifo. Ascafoan aton ointaifi ahuun sahuuti pucatan tatan ani aton fuyamisi cuscara ato oinmaquin. Diosin tsain nicacasmaifan ato oinmaquin.

—Man ua nicacasmai. Ascan man omitsiscainocai uhuun nuama. Matohuunfin nuaquin. Diosin ua yonoa cuscan un mato yoifiaino man ua nicacasmai. Ascan un afanan mato yoitamarocon un nocon caifoma un yoi cairan, —ishon ato yoini.

<sup>7</sup> Yoitan aton ichananti pushu murannoashu chaimashta Ticio Justopan pushu ano cani. Nanton Upa Dios noicoinquin cufipaoni. <sup>8</sup> Ascan ichananti pushu niaifoan ahuun anu Crispo arifi Jesús icoinra huani. Nantifi ahuun yorafoanri icoinra huanifo. Corinto anofoanri icoinra huaifoan ato unu muran iquimanifo. <sup>9-10</sup> Ascano yamu futsan Pablo ahuun namapan nocon Ifo Jesús yoini, —Ratuquima uhuun tsain ato yoifoanfaincahuun. Shatuquima. Un mifu icaquin. Tsoan mia ahuusca huanonma. Nuno nan pushurasi ano uhuun yorafo ichaparan, —ishon yoini. <sup>11</sup> Ascano nanno Corinto ano nituyoni. Fari fusti yafi nushmancayan Diospan tsain ato yosipaoni.

<sup>12</sup> Ascatan Acaya mai anoa Galión aton niaifo. Nantianri Israelifo ichanannifo Pablo achishcaquin. Achishon ato niaifo ano iyoshquin.

<sup>13</sup>—Na nocofunun yorafo amaquri yoifoanfaini. Nocon shunifoan noco yononi cuscan ato anorima shinanmaniran, —ishon yoinifo.

<sup>14</sup> Pablonun cumapaifiaino niaifo Galión ato yoini,

—Israelifoan man ua yoicun na nocofunumain onanshta chaca iyamarai fasi chaca huacoinnamainquin un mato nicacuana. <sup>15</sup> Ascatamarocon maton shunifoan yosini cuscahuunoa ua yoifain maton caifoan aton anuhuunoa yoifain maton caifo yonoa cuscan ua yoipai. Uncai afohuunoa nicapaima. Mafin man afo arotiro. <sup>16</sup> Umaquinoashu fotacahuun, —ato huani.

17 Foaifoan Sóstenes ichananti pushu ifo achinifo. Achicashon niaifoan aton ointaifi sutunifo. Asca huafiaifoanno niaifon Galión ato pusanima. Atohuunoa tapipainima.

*Pablo Antioquía ano nasoni. Nannoshon afanan Jesushuunoa ato yoifoanfaini, cai rafu non fustini*

18 Ascatan Pablo Corinto mai ano shafa ranan nituyoni. Nanno iyoano Upa Diosin yoiyoni cuscara a cushusharanon ahuun caifoan aton fuyamisi cuscara ahuun fo marucuni. Upa Diosin cushusharano cataima marucuyoni. Ascatan Priscila yafi Aquila fu Pablo cani. Icoinra huafo-maquinoashu Corinto anoashu shasho nanufaini fonifo. 19 Efeso ano nococatan Priscila yafi Aquila shasho naqui nichifaini cai Israelifoan aton ichananti pushu muran Pablo iquini ahuun caifo fu yoinanshquin. 20-21 —Cariyamahuun. Nuno nituyohuun noco Jesushuunoa paratama yoiyoshquin, —ishon yoinifo. Ascaiton ato yoini. —Ma, Uncai natian nitutiroma. Asafia Upa Diosin ua nichipaiyaino un matoqui afanan otiroran, —ishon ato cumani.

Yoitan Efeso anoashu shasho nanucaini cani. 22 Cesarea ano mafufaini anoashu Jerusalén ano cani. Icoinra huafo fu ichanain ato yoisharani. Ascatan ato anoashu Antioquía ano cani. 23 Nanno nituyoni. Ascatan nannoashu cahuancacaiquin ato Jesushuunoa yoini. Galacia yafi Frigia mai ano cahuancacaini Jesús tanamisifoti ato yoisharai Jesús tanaqui finasharanonfo.

*Apolos Efeso anoafu Jesushuunoa ato yoini*

24 Israeli futsan Alejandría anoashu cainni ahuun anu Apolos. Nantianri Efeso ano oni. Diosin tsain fasi tapicoinni. Tsain fasi shafacafi yoimisi. Yorafoan nicapainifo. 25 Nocon Ifo Jesushuunoa Apolos nicapaoni. Tapini cuscan fasi cayacafi yosini. Jesushuunocai atirifi tapishara inima. Juanpan yosini cuscan fusti tapini. —Maton chaca shatucahuun. Diosin icoinra huacahuun, —ishon. Nan fusti ato yoini. 26 Ascatan ichananti pushu muranshon ato ranotama yoisharani. Ascaiton Priscila futan Aquila nicacoinnifo. Ascashon, —Nocon pushu ano ohuu, —huanifo. Oano Jesushuunoa fasi paratama yosinifo.

27 Ascano Apolos Acaya mai ano capaini ato Jesushuunoa yoipai. Icoinra huafo nicacani, —¡Aicho! Min shinan cuscan shara. Non Jesús tanamisifo ano cunu fomatiro mia nicasharanonfo, —ishon yoinifo. Ascatan atoqui nocoshon Diosihuunshon ato Jesushuunoa yoisharapaoni. Ascaiton nicacaquin icoinra huafoan aton ointi unimacoinnifo. 28 Asafia atirifi Israelifoan, —Jesuscai Diospan furunma. Upa Diosincai nichinima. Nocon Cristomafinquin, —ishon yoinifo. Asaifoan —Man shinain cuscacai anorima. Un mato tapimai Diospan tsainhuunshon Jesusfin Diospan Furunquin. Aafin nocon Cristoquin, —ishon Apolos yorafoan ointaifi shafacaficoín ato yoini. Ascaitocai tsoan cumanima.

## 19

*Pablo Efeso ano ini*

1 Ascatan Apolos Corinto ano iyoashu Pablo machi fai tapiaton cai afanan Efeso ano noconi. Nocoshon Jesús tanamisifo fuchini.

2 —¿Man icoinra huashon man ahuun Yoshin Shara fiamun? —ishon Pablonun yocaiton. —Ma. Noncai ahuunoa nicayomisima, —huaifoan.

<sup>3</sup> —¿Ascashon man unu muran iquipacunitian man raquiri yoiamun? —ishon ato yocaiton.

—Juanpan noco yosiaino noco unu muran iquimani cuscan non yoiaran, —ishon yoinifo.

<sup>4</sup> —Juanpan yoini isca huaquin, “Maton chaca shatucahuun Diosin tanasharashquin un mato unu muran iquimanon.” Ascatan yoiari “Chipo Jesús oshquiquin icoinra huacahuun,” ishon Juanpan noco yoiniran, —ishon Pablonun ato yoini.

<sup>5</sup> Nicacatan —Norifi nocon Ifon Jesús non icoinra huairan, —ishon yoinifo. Yoiaifon ato unu muran iquimani. <sup>6</sup> Ascashon Pablonun ato manmainno Diospan Yoshin Sharapan ato imaino tsain futsanman inifo. Diospan tsainri yoipacunifo. <sup>7</sup> Doce icuana inifo.

<sup>8</sup> Ascano Pablonun Israelifon ichananti pushu muran iquishon ranotama ato Jesushuunoa yoini. Oshu rafu non fusti ato yoipaoni. Upa Diosin ato iquinahuunoa ato yoipaoni. Nicacaquin atirifon icoinra huanifo. <sup>9</sup> Ascafiaino atirifonri nicacasmanifo. Icoinra huacasmaquin, —Jesushuunoa huacai non Upa Dios fu ipatiromaran, —ishon yoinifo. Ascaifon nica Pablo atomaquinoashu cani. Afanan atofu ichanannima. Pushu futsa ano tapimamisifo ano cani. Nan pushu anu tuqui huanifo Tiranoran, huanifo. Jesús tanamisifo afu iquininifo ato shafatifi tapimanon. <sup>10</sup> Fari rafutan nan pushu muranshon ato Jesushuunoa tapimani. Ascano Israelifo futan yora futsafoan Asia mai ano icafoan nocon Ifo Jesús tsain nicanifo.

<sup>11</sup> Nantianri Upa Diosin Pablohuunshon tsoan oinyomisima cuscara ato ismani. <sup>12</sup> Isinin imisifo yafi yoshin chaca atohuun nuufafaina ahuun panuela iyamarai ahuun sahuutifo muncanashu cayariscatanifo. Yoshin chacafo atomaquinoashu cuyofoni.

<sup>13</sup> Ascaifono Israelifo futsafoan nicacani Jesús icoinra huayamafiamisishaqui pushurasiti foanfainnifo Jesús ahuun anuhuunshon yoshin chaca atomaquino potapaicani. Isca huanifo, —Pablonun Jesushuunshon yoimisi. Ahuunshon un mato yonoi atomaquinoashu fotacahuun, —huanifo.

<sup>14</sup> Nocon yorafohuunshon Dios cufimisi niaifo futsan ahuun anu Esceva ahuun facufo sieteton asca huapainifo. —Jesushuunoa amaquinoashu catahuun, —huanifo.

<sup>15-16</sup> —Jesús onanfain. Pablori mun onan. ¿Manmun tsoaquin? —yoshin huani. Yoshin chacapan yoiaino nocofonu yoshin chacayaton ato achini. Ato fasi sutupacuni aton sahuuti fashnufain ato imi tohuuni. Ascaino pushu murannoashu chitoria ichonifoquin. <sup>17</sup> Atohuunoa Efeso anofo Israelifo non yora futsafori nicacani ratui futsunifo. —Nocon Ifon Jesús fasi shararan, —huanifo.

<sup>18</sup> Ascashon Jesús icoinra huafoan aton ointaifi chaca huafo cuscan yoinifo. <sup>19</sup> Yofufoan aton yofu shatushon Jesús ifoannifo. Aton libro murannoa cununifo cunufu ahuuscashomain yoshin chacanun yonotiroquin cunupaoni. Ascan nan cunufu ichanan huacashon aton ointaifi coanifo. Shinanniquin nan cunufu nantifi fasi chicoin. Cincuenta mil aton pui nuua ini. Ascafiacun coanifo. <sup>20</sup> Asca huacashon maifoti anofoan nocon Ifo Jesús tsain nicanifo. Ahuun tsainhuunshon finacoinnifo icoinra huafoan Jesús tanacoinnifo.

<sup>21</sup> Ascatan Diosin ahuun Yoshin Sharapan Pablo shinanmanaino yoini, —Un natian Efeso anoashu Jerusalén ano cai. Caquin un Macedonia yafi Acaya ano un mapufainicai. Jerusalén ano nituyoshquin un anoashu un chipo Roma ano cairan, —ishon shinanni. <sup>22</sup> Ascano afu yonomisi rafu Timoteo yafi Erasto Macedonia ano nichiyoni. Afincoin Asia muran nituyoni.

*Efeso anoafu mucanifo*

<sup>23</sup> Nantianri Efeso anoafuan Jesús fustihuunoashu Apa Dios ari noctiro nicacani atirifo fasi mucacaquin tsain chipunifo. <sup>24</sup> Isca huaquin. Nanno nocofunun ahuun anu Demetrio. Ahuun yono ahuafo rami huapaoni. Cuno oshopafo huapaoni. Nan cuno oshopari ainfo ointsaramihuani. —Nan nocon diosiran, —ishon, —Ahuun anu Artemisa, —huanifo. Futsafori afu cuno oshopa ainfo ramihuafo uhuapamafori, —Artemisa ointsaran, —huanifo. Ascan inanmitsashon ahuun rafanan pui finonfo.

<sup>25</sup> Ascano Demetrio nantifi ascaran yonomisifo ichanan huani ato tapimashquin. —Uhuun yoramishtichin, man man tapia non nocon dios Artemisa rami huaa non inan mitsashon ahuun rafanan pui ichapa non fimisi. <sup>26</sup> Ascafia man man nicamisi na nocofunu Pablonun noco yora ichapafo Efeso anoafu amaquri shinanmana. Non rami huafocai diosima. Ahuamafinquin ato huamisi. Ascan yoimisi cuscan atirifiton icoinra huafo. <sup>27</sup> Pablonun yoiai cuscan musucoin. Nocon yorafoan icoinra huacashocai afanan rami huafo rafanancai non pui fitiroma. Non funotiro. Nocon pui fusticai non funoima. Tsoancai afanan nocon dios Artemisa pushu muran ichananpaitiroma. Nantifi manifoti Asia muran natian Artemisa cufiafo. Ascan Pablonun yosian cuscan icoinra huafoan yoitirofo, “Artemisacai ahuama. Nocon diosimafinquin,” ishon yoitirofo. Ascano nocon dios Artemisa non funotiro, —ishon Demetrio ato yoini.

<sup>28</sup> Nicacatan fasi sinacaquin oi ashcafinin yoinifo, —Artemisa tsoa futsa cuscarama. Nonfin Efesofo nocon diosinran, —ishon oi ashcafinin yoirianifo.

<sup>29</sup> Ascaiton pushuhuanrasi anoafuan nicanifo. Samamashta fasi mucanifo fucash tapinifo. Ascashon Pablo fu foanfainmisi rafu Gayo yafi Aristarco achinifo. Ichananti pushu uhuapa ano ato iyoriscanifo. <sup>30</sup> Nicatan Pablo nan pushu uhuapa muran iquipaifaiton Jesús tanamisifo futsafoan a iquimacasmanifo. Pabloqui musucaquin. <sup>31</sup> Nan Asia mai anoa aton niaifofoanri Pablo noicaquin cunu fomanifo, —Pablonun ichananti pushu uhuapa muran iquiyamapun mia asca huatirofoquin, —ishon cununifo.

<sup>32</sup> Ascaino yorahunrasi ichananti pushu uhuapa murannoashu fasi mucai futsunifo. Atirifoan futsanori shinainno fasi shinanquin futsanifo. Atirifi yorafoan, —¿Ahuuscainun non ichananti pushu uhuapa muran non iquiamakin? —huanifo. <sup>33</sup> Israelifoan ahuun anu Alejandro fuchicashon putsiqui putsiqui anifo. —Ato yoihuu matsipacunonfo, —huanifo. Ascaifoan ato mushanshon inacahua ato yoini, —Pusiyamacahuun. Un mato cayacafi yoisharanon, —ishon Alejandro ato yoini. <sup>34</sup> Ascafia, —Nan nocofunu Israeliran, —huacashon tsoan nicapaima. Tsain chipuquin hora rafu oi ashcafinin oi fusti nicatsa



yoirianifo, —Nonfin Efesofoquin. Nocon dios Artemisa ahuamamishti huatiroran, —ishon oi ashcafinin yoirianifo.

<sup>35</sup> Ascaiffoan niaifo futsan ato, —Tsainyamacahuun, —mushanshoquin huani. Ascaino pusinifoma. —Efeso nocofunuffoan ua nicacahuun. Nantifi manifesti anoaffoan tapicani nonfin Efesofoquin. Non Artemisa pushu cushushomisi. Ahuun rami huati nai murannoashu pacuaran inifo. Nanrifi non cushushomisiquin.

<sup>36</sup> Tsoancai, “Aririmaran” huatiroma. Ascacun ahuuscain man mucain. Puusiyamacahuun. Man mucaquin man chaca huatiroquin. <sup>37</sup> Nan nocofunuffoancai ahua chaca huamisima. Ahua onuyamafain nocon dios Artemisaqui tsain chaca huayamafiamisifoan ato nuno ihuaa. <sup>38</sup> Demetrio yonomisifo futan tsoan tsain chaca futsaqui huapai. Nocon niaiffo yoicahuun nicanonfo. Atoqui yonotiro. <sup>39</sup> Ahuara futsan yoipaiqui niaiffoinfo yoitiro afoan arotirofo. <sup>40</sup> Man natian chaca huacusan niaiffoan nicashon noco asca huatirofo. Na yorafoan ahua chaca huayamafiamisishaquin man tsain chipuin man mucai. Ascan niaiffoan noco yocaiffoan ahuuscain mucacanimun noncai raquiri huatiroma, —ishon niaiffoan ato yoini. <sup>41</sup> Anori yoitan niaiffoan ato nichian fonifo.

## 20

### *Pablo Macedonia yafi Grecia ano cani*

<sup>1</sup> Ascano mucacani matsiaiffoanno Pablonun Jesús tanamisifo cunani aqui funonfo. Aqui fuaiffoan ahuun tsainhuunshon aton ointi fupi huamani. —Natian un mato shinan fainicairan, —ishon ato yoitan atomaquinoashu Macedonia ano cani. <sup>2</sup> Caashon tsain shara Jesushuunoo atoti yoiacuni aton ointi unimanon. Asca Grecia mai ano nocotoshini. <sup>3</sup> Nanno oshu rafu non fusti nituyoni. Ascatan Siria ano pocufaini capaiffoquin nica ahuun caifo Israeliffoan rutupaiyaiffoan nicai shinan futsashu Siria catamarocon Macedonia ano nasocainicani. <sup>4</sup> Futsafo afu fonifo. Aton anufo futsan Sópater Berea ano apa Pirro caino futsanfori Aristarco yafi Segundo Tesalónica anoaffo foaino Gayo Derbe ano caino rafunon fustiri Timoteo non Tíquico non Tróximo Asia anoashu afu fonifo. <sup>5</sup> Nanfo rucun Troas ano fonifo nannoshon noco manacani. <sup>6</sup> Ascainofin fusititian misi faranshashoma piinifo. Nan fusititian anaititan non Filipos anoashu pocufaini focani mucu fustiti oshan finontan non atoqui Troas ano noconi. Nocoashu siete oshatan nanno oshayoni.

### *Troas ano oinmitsaicai Pablo cani*

<sup>7</sup> Ascano Domingoaino non ichanan Jesús noco nashoni shinantani non misi torupacuashu pashcanain futsunon. Ascaino Pablonun ato Diosin tsain yoini. Iyoconaino cashquin yamunacucahuanaino ato yoiquin ununi. <sup>8</sup> Nan pushu cuyacoin ahuun osa rafu non fusti. Nan osa manaon ichananni. Atiriffoan aton otatifo funifo. Fomancayanri otai futsuni. <sup>9</sup> Ahuun cunu pushfan ano tsoashu pushcohuai ahuun anu Eutico. Pablonun fasi chai ato yoiriaino oshani. Fasi osha muranshu pacuni. Cuyacunoashu osa rafu non fusti anoashu pacuni. Pacuashu naani. <sup>10</sup> Ascaino Pablonun aqui fotoshon icoancufoanni. Icoacufoan ato isca huani,

—Na pushcohuaihuunoo shinanchacayamacahuun. Man niaquin, —ishon ato yoini. —Yoiai cuscan icon afanan man niaran, —inifo.

<sup>11</sup> Ascatan afanan Pablonun inacaitan misi torupacushon ato inan pacuni ato futan piishquin. Ascatan afanan ato yoiquin shafa huani. Shafaino atomaquinoashu cani. <sup>12</sup> Ascano nantifi anoafu fasi unimaquin pushcohuai ahuun pushu ano iyonifo.

*Troas anoashu Mileto ano cani*

<sup>13</sup> Ascatan Pablonun noco yoini, —Manfin shashon pushurasi ahuun anu Aso ano foicai. Unfin fain caicain matoqui chipo nocoshquin, —ishon noco yoini. <sup>14</sup> Aso ano nocotan no fu shasho naqui nanupacucahuani. Nannoashu non Mitilene ano fonifo. <sup>15</sup> Iyoconaino anoashu pocufaini non Quío cusumunri noconi. Shafa futsari non Samos cusumunri nocoshon nannoashu non Mileto pushurasi ano noconi. <sup>16</sup> —Non Efeso ano rutiatiroma. Non Jerusalén ano nocoriscapai fustitian ahuun anu Pentecostés icaitian non nocopai. Asca Asia ano non Efeso anori non rutiatiromaran, —ishon Pablonun ato yoini.

*Jesús icoinra huafo aton cushumisifo Efeso anoafu Pablonun aton tsain shara yosini*

<sup>17</sup> Mileto anoshon Pablonun nocofunufu Efeso ano nichini icoinra huafo aton cushumisifo ihuunonfo. <sup>18</sup> Nocofoan Pablonun ato yoini isca huaquin, —Un mato muran noco tauashu un cani cuscan man man uhuunoa tapian. <sup>19</sup> Nocon Ifo Jesús un yonoshona. Nocon caifo Israelifoan ua asca huapafiaifoanno un mato muran isharamisi. “Pablo tsoa futsan cuscaramarancai,” un mato huamisima. Uncai mato anori shinanmapaimisima. Uaiyananrocon Upa Diosin ua yonoa cuscan un mato tapimapaoni. <sup>20</sup> Ranotama un Diosin tsain mato tapimapaoni man Jesús tanasharanon. Ichananti pushu muran non pushufoti un mato tapimapaoni. <sup>21</sup> Nocon caifo non nocon caifomari un tapimapaoni isca huaquin, “Maton chaca shatucahuun Dios shinanshquin. Nocon Ifo Jesús icoinra huacahuun,” un ato huapaoni.

<sup>22</sup> Ascano natian Diospan Yoshin Shara ua yonoa cuscan un Jerusalén ano cai. Anoashumain un ahuuscai caicain uncai tapiama. <sup>23</sup> Diospan Yoshin Sharapan ua yoia pushurasiti anoshon ua cunu muran iquimanaifo ua omitsiscamashcani. Nan fusti mun tapia. <sup>24</sup> Ascafia un nocon Ifo Jesús yonoshoyamaino un nipaitiroma. Ua yonomapaiyai cuscan nan fusti un shinain. “Nantifi yorafoti Upa Diosin atohuun ramapai atohuun noicoin nan tsain shara ato yoitacahuun,” ua huani. Ua yononi cuscan un anaitipai.

<sup>25</sup> Upa Diosin ato iquina anomain ahuu cuscarauquin un mato tapimamisi. Un mato tapima cuscan nicafishocai man afanan ua oinacama. <sup>26-27</sup> Nantifi Diosin mato amapaiyai cuscan un mato yoimisi. Uncai shatumisima. Ascacun un mato Diosin tsain yoimisi cuscan nicacasmamisifo omitsiscapanacafo muran fotirofiacai uhuun nuama. Mun ato yoiyomisi.

<sup>28</sup> Diospan Yoshin Shara matori yonoa Jesús icoinra huafo yoisharanon. Ascan oinfain. Isharacahuun. Diospan yorafo cushusharacahuun. Jesús ato nashoaino ahuun imi foni ahuun yorafo inonfo. <sup>29</sup> Mun tapia un matomaqui caano amaquiri yosimisifo matoqui fucani mato funomacani. Masharo pofupan inafu cuyopaitiro cuscan. Nansarifi aquin afoanrifi mato funomapaicani. <sup>30</sup> Mato muranshonri mafin ranan chipo Diosin tsain iconquin amaquiri yoitirofo aton tanamisi inonfo.

<sup>31</sup> Ascacun ¡oinfain! Un mato yosimisi cuscan ointiaquimayamacahuun. Fari rafu non fusti un mato shafatifi yosifafainpaoni Jesús tanasharanon. Uaiyanan un mato yosifafainpaoni man funononfoma.

<sup>32</sup> Natian un Upa Dios cufin mato cushusharanon. Mato noiai cuscan ahuun tsain maton nomuran tapimanon. Nanfohuunshon ahuun curushu mato inantiro ahuun tsain tanasharanonfo. Asca huatan Diosin ahuun yorafo catonni cuscan ahuunari man inon. Ato inansharapaoni cuscan matori nanscarifi huatiro man afu ipanon. <sup>33</sup> Tsain futsari mato yoinon. Uncai maton pui yafi maton sahuutifo un fipaimisima. <sup>34</sup> Man man tapia un non u futan yonomisifo yopamisi cuscan unfin yonocain ahuun rafanan fishquin un yonomisi.

<sup>35</sup> Man man tapian mato muran icashu un curushcai yonopaoni mato oinmashquin marifi curushcai yonoshon ahuun rafanan fishon ahuuomafoya isinincalifori man inantiro. Nocon Ifo Jesús yoini cuscan un ointiaquimama. Yoiri isca huaquin “Futsan noco ahuaa inainno non unimafiatiro non futsafo inainno non mimacai unimatiroan,” ishon nocon Ifoan yoini. —Nannori Pablonun Efesofo ahuun tsain unutaqui yoini.

<sup>36</sup> Ahuun tsain yoiquin anaititan ato futan ratoconun mai chachishon Upa Dios cufinifo. <sup>37</sup> Cufincatan uaiyanan Pablo icoacufoannifo. <sup>38</sup> —Mancai afanan ua oinnacamaran, —ato huaiton shinannifo. Fasi aton ointi noconifo. Ascashu afu unu cusumun fonifo. Pablo shasho naqui nanucainaino.

## 21

### *Pablo Jerusalén ari cani*

<sup>1</sup> Ascano atomaquinoashu pashcapaiyamafiai non atomaqui pashcani. Shashon unuhuan pocufaincani non cayacafi pushurasi Cos ano non cani. Nannoashu iyoco futsaino pushurasi Rodas ano fonifo. Anoashu foi pushurasi Pátara ano noconi. <sup>2</sup> Nannoa non shasho uhuapa futsan fuchini Fenicia ari caiton. Ascano ahuun nanufainifoi non atofu cani. <sup>3</sup> Caquin non oian mai nushmancayan toomanhuan ahuun anu Chipre. Fari oai patashari finonfaini non Siria mai ano noconi. Nanno unuhuan cusumunri pushurasi ahuun anu Tiro. Ascano shasho naquishton aton mafo mapumanifo. <sup>4</sup> Mapuinfoan non Jesús tanamisifoqui noconi. Non atofu osha siete nanno non nituyoni. Nanfoan Diospan Yoshin Sharahuunshon Pablo yoinifo, —Jerusalén ano cayamahuu, —huanifo. <sup>5</sup> Jesús tanamisifo aton ainfofo ya aton facufori no fu pushurasi murannoashu unuhuan cusumunri fonifo. Nannoshon non nantiffain ratoconun mai chachishon Upa Dios cufini. <sup>6</sup> Ascatan —Non mato shinanfainnicairan, —ishon yoicatan munininantannifo. Ascatan shasho nanufainifo. Ascaino aton pushu ari nasofainifo.

<sup>7</sup> Ascatan Tiro anoashu foi non pushurasi Tolemaida ano noconi. Nanno non Jesús icoinra huaa futsafo fuchitan non atofu osha fustiyoni. <sup>8</sup> Iyoco futsaino non Cesarea ano noconi. Felipe pushu ano non afu iyoi. Siete nan futsan catonni Felipe ato futan tushu pashcanan huafafainon. Ascafia ahuun yono cuyoano Felipe Jesushuunoa yoifoanfainmisi inon. <sup>9</sup> Ahuun facu shomaya rafu non rafuri Diospan Yoshin Sharahuunshon ahuun tsain yoipaonifo. Nanfo funuomafo ini.

<sup>10</sup> Nanno non shafa ranan ini. Ascano Diosin tsain inonpacoai yoimisi ahuun anu Agabo Judea anoashu nocoqui noconi. <sup>11</sup> Nocotan Pablonun

ahuun nanushumuti fiantan ahuun munushumucain onushumushon yoini, —Nan nanushumuti Ifofin Israeli niaifofoan isca huashcaniquin. Ascashon niaifo futsafoanno iyoshcaini. Anorifi Diospan Yoshin Shara ua yoiacquin, —Agabo ato huani.

<sup>12</sup> Noco yoiyai cuscan nicacaquin non Pablo yoini, —Jerusalén ano cayamahuu, —non huani. <sup>13</sup> Noco cumani,

—¿Ahuuscain man uaiquimun? ¿Uarifi man uaimapaimun? Ua munushfain ua onushtiro. Jerusalén anoafoan ua rutufiatiro uhuun Ifo Jesushuunoashu mun itishara apaiyai fo cuscan ua huatirofo. Munfin itisharaquin uhuun Ifohuunoashu nashquin, —ishon Pablo noco yoini.

<sup>14</sup> Noco nicayamaitocai non afanan ahua yoitiroa.

—Nocon Ifoan mia amapaiyai cuscan min huatiroran, —ishon non yoini.

<sup>15</sup> Ascatan iyoco futsaino itishara huatan non Jerusalén ano cani. <sup>16</sup> Jesús tanamisifo Cesarea anoafo no fu fonifo. Mnasón pushu ano noco iyonifo. Nan Chipre mai anoa ini. Nannoshon Mnasón futsafo futan Jesús icoinra huaquin tau huani. Ahuun pushu muran non yioni.

*Pablonun Santiago oincai cani*

<sup>17</sup> Non nocoaino Jesús icoinra huafo nocoqui fasi unimanifo. —¡Aicho! Man man oaquin, —noco huanifo. <sup>18</sup> Iyoco futsaino non Pablo fu Santiago icano cani. Icoinra huafo aton cushumisifori nanno inifo. <sup>19</sup> —Uhuun yoramishtichin non fasi unimai matoqui nocoashu, —ishon Pablonun ato yoini. Ascano Diosihuunshon aton caifoma muranshon ato ashomisi cuscan ato tapimani.

<sup>20</sup> Ascaiton nicacani, —¡Aicho nocon Diosin shararan! —huanifo. Ascano Pablo yoinifo, —Nocon yorashta non mia yoisharapai. Man min oian nocon caifo Israelifo ichapafoan Jesús icoinra huafo. Nocon shuni Moisés noco yononi cuscari fasi tanasharapaicani. <sup>21</sup> Futsafoan ato yoiayo min nocon caifo Israelifo mai futsa ariayo min ato amaquiri yosi. Min ato yosian Moisés yononi cuscan afanan tananonfoma. “Nocon caifoan fuyamisi cuscara afanan tanayamacahuun. Maton facufo afanan aton foshqui rupa shatuyamacahuun,” ishon min ato yoiayon nicacani miqui musuayo. <sup>22</sup> Min nocoqui noco nicashcaini. ¿Ascan non ahuuscatiromun?

<sup>23</sup> Non shinain cuscan acahuun. Nocon nomuran non shinain isca huaquin. Nocofunu rafu non rafuri Dios yoiayo isca huaquin, “Upa Diosin min noco yonoa cuscan non airan,” ishon yoiayo.

<sup>24</sup> Ascano na nocofunufu Dios fu tsainti pushu muran ato iyotahuun. Nocon fuyamisi cuscara ato futan huahuu nantifi chaca soanon. Min pui inahuun nocon fuyamisi cuscan ato maruhuun. Min ato asca huaiton oincashon tapinonfo, “Iconma min Moisés yononi cuscan pota. Ascata-marocan Moisés nocon shunifo yononi cuscan mirifi min tanairan,” ishon shinanonfo. <sup>25</sup> Tsain futsari Jesús icoinra huafo nan nocon caifomahuunoa mia yoinon. Non ato yoiama, “Moisés noco caifo yononi cuscan marifi acahuun,” noncai anori ato huaama. Non ato cunu fomani isca huaquin, “Dioscoinma aton diosiran huacashon tamanchinafo. A oincaquin tushu piyamacahuun. Man ascara piyaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Imi ayayamacahuun. Yoina yafi ina tumosishon ahuun imi foamano ahuun nami piyamacahuun. Maton

ahuinmari chotayamacahuun. Maton funumari chotamayamacahuun,” ishon non ato cunushoniran, —ishon Pablo yoinifo.

*Pablo Dios fu tsainti pushu muranshon achinifo*

<sup>26</sup> Ascan man yoia cuscan Pablo nan rafu non rafuri nocofunufu Dios fu tsainti pushu muran iyonni ato futan ahuun caifoan fuyamisi cuscan anon. Aton chaca soashcaquin. Dios fu tsainti pushu niaifofu yoini, —Siete oshatan non nuno nituyoi nocon chaca soanon. Anaititan non Dios inanpacushquin. Non Upa Diosin yoita cuscan non anon, —ishon Pablonun ato yoini.

<sup>27-29</sup> Siete oshano man anaiticuanaino Israelifo Asia anoafu Dios fu tsainti pushu murannoa Pablo yafi nocofunu rafu non rafuri fuchinifo. Fuchicashon aton caifo cunanifo, —Noco caifomishtichin noco futan acapun. Nan nocofunun Pablonun manifesti ano cahucacainquin noco yorafoqui tsain chaca yoifain nocon shuni Moisés noco yononi cuscan nicayamacahuun ato huafain nocon Dios fu tsainti pushuhuunoari tsain chaca huamisi. Natian iguia nocon caifoanmari iquimana nocon Dios fu tsainti pushu chaca huairan, —ishon oi ashcafinin yoinifo. Nan Tróximo Efeso anoa ini. Pablo futan pushurasi anoa oinnifo. —Nocon caifomafiacun Pablo nanton Dios fu tsainti pushu muran iquimanan, —ishon shinannifo. Ascafiacai Tróximo ano inima.

<sup>30</sup> Ascano nantifi nanno ichanancashon ato Pabloqui tsain chaca huanifo. Fasi tsain fucash huanifo pushurasi anoafoti mucacainquin. Nicacatan pushufotifi aqui maconifo. Pablo achicashon Dios fu tsainti pushu muranshon chifi ninifainifo. Ascatanaino fupoti fuporiscatani. <sup>31</sup> Pablo rutupaifaifono Romano ranushumuafo niaifoan mucaifoan nicani. Nantifi Jerusalén ano icafo mucaifoan nicani. <sup>32</sup> Nicaquin niaifo patasharifo non ahuun ranushumuaforifi mucaifoanno ichonifo. Niaifo yafi ranushumua futsafo fuchicatan Pablo sutufiacainquin unuriscatani.

<sup>33</sup> Niaifoan ahuun ranushumuafo yonoano Pablo cuno pono rafutan munushnifo. —¿Na nocofunumun tsoaquin? —ato yocani. <sup>34</sup> Oi ashcafinin futsan futsa anori yoiafano futsanori yoinifo. Fasi mucaifoannocai niaifoan Pablohuunoa ahua tapinima. Ascano ahuun ranushumuafo yononi Pablo aton pushu muran iyononfo. <sup>35</sup> Paiti ano nocotoshiaifoan ahuuscashoma achipaiquin cufuntoshinifo rutupaicaquin. Ascaifoan ranushumuafoan Pablo finifoanni atomaqui iyai inifoannifo atoqui musu huaquin rutunonfoma. <sup>36</sup> Mufaincatan, —Ruturiscahuun, —oi ashcafinin huarianifo.

*Pablonun yoini ahuunoa shinanchacanofoma*

<sup>37</sup> Aton pushu muran iquimapaiyaiton Pablonun niaifo yoini,

—¿Un mia yocatiromun? —huaiton.

—¿Min Griego tsain tapiamun? <sup>38</sup> ¿Minmun Egipcioa? Nan nocon niaifo potapai 4,000 rutumitsamisifo tsoan istaipama ano iyonni. ¿Nanmun min? —ishon yocaiton.

<sup>39</sup> —Uncai aamafinquin. Unfin Israelifoquin. Un Tarso anoashu pushurasi uhuapa Cilicia murannoashu un caini. Natian ua yoipun un nan yorahuanrasi yoinon, —huaiton.

<sup>40</sup> —Ato yoihuu, —niaifoan huaiton. Pablo paitinin mapuinifoantan ato mushashoni. Ascaino mucafiacani nishmapacufoannifo. Ascano aton tsainman ato yoini.

## 22

1—Uhuun yoramishtichin ua nicacahuun un mato yoinon. Ua chaca huafo cuscan un mato cayacafi yoipai afanan uqui chaca shinanonfoma, —ishon ato yoini.

2 Nan Hebreo tsainman ato yoiaton nicacani fasi puusinifoma. Ascano afanan ato yoini,

3—Unrifi un Israeliquin. Un Tarso pushurasi Cilicia murannoashu un cainni. Ascano nuno Jerusalén anoashu un pushconi. Nocon yorashtan Gamaliel ua yosipaoni. Nocon shunifoan noco yonopaoni cuscan nanti ua yosipaoni. Manfin fasi Dios tanapaisharai cuscan urifi nansca hua-paipaoni. <sup>4</sup> Un Jesús tanapaiyaifo fuchishon un ato omitsiscamapaoni namapaiquin. Un nocofunufu non ainfori achimapaoni ato cunu muran iquimashquin. <sup>5</sup> Un mato yoi ai cuscan nocon yorafohuunshon Dios cufimisi niaifocoin non nocon Dios fu tsainti pushu cushumisifoan mato yoitiro iconquin. Ua cunu inanni ahuun yorafo Damasco ano inannon Jesús icoinra huafo anoashu Jerusalén anoa ihuushon ato cunu muran iquimanon.

*Pablonun Jesús ifoa cuscan ato tapimani*

*Hch 9.1-19; 26.12-18*

<sup>6</sup> Ascashu un Damasco fain caino fari masafinin racano nocoti chaima samamashta nai ariashu chashariscatani. <sup>7</sup> Chashamanhuan acucahuana-naino un pacuni. Pacuquin un ahuun oi nicani. “Saulo, Saulo, ¿Ahuus-caquimun mian omitsiscahuaicain?” ua huaiton. <sup>8</sup> “¿Min tsoamun, Ifon?” un huaiton. “Unquian. Jesús. Un Nazaret ano iyopaoni. Min ua omitsisca huairan,” ua huaiton. <sup>9</sup> U fu foaifoancai chashamanhuan oinfiaquin ua yoi ai cuscan tsoan nicanima. <sup>10</sup> Ascaino un isca huani, “¿Ifon, un ahua-cai huaimun?” ishon un yocaiton. “Funihuu. Damasco ano cayotahuun. Nannoshon min ahua huaimancain futsan mia tapimanon,” ua huani. <sup>11</sup> Chashamanhuanun ua fuiconacai un catiro inima. Un fu fomisifoan ua mutsoshon Damasco ano yonifo.

<sup>12</sup> Non nocoano nocofunun ahuun anu Ananías ua oin oni. Nanton nocon shuni Moisés noco yononi cuscan tanamisicoin. Nantifi nocon caifo Israelifo nanno icafoan yoimisifo, “Ananías nocofunu shararan,” huamisifo. Ahuun noiafo. <sup>13</sup> Uqui nocoshon ua yoini, “Uhuun yorash-tan Saulo, afanan oinhuun,” ua huani. Yoiaino un fupuinacahuani. <sup>14</sup> Ascashon ua yoini, “Nocon shunifoan aton Diosin mia catoan mia amapaiyai cuscan min tapitiro. Ahuun Furun shara oinfain ahuun tsain nicashquin. <sup>15</sup> Min oian cuscan huafain min nicai cuscari yorafoti min ato yoishquin. <sup>16</sup> Ascacun afanan manayamahuu. Funihuu mia unu muran iquimanon min chaca soashonon nocon Ifo Jesús icoinra huashon ismashquin,” ishon ua yoini.

*Upa Diosin caifo futsan muran Pablonun ato tapimani*

<sup>17-18</sup> Ascatan Jerusalén ano nasocurani nocon Dios fu tsainti pushu muran iquini. Dios cufinquin namapan cuscara un nocon Ifo oinni. “Nuno afoan min ato uhuunoa yoi ai cuscan mia icoinra huacanimaquin. Nuno Jerusalén anoashu cariscatahuun,” ua huani. <sup>19</sup> “Ifon, nuno icafoan tapi-afo un mia icoinra huafoti omitsiscamapaoni. Un ichananti pushufo ano cahuanscapaoni ato cunu muran iquimani ato coshaquin futsunonfo. <sup>20</sup> Ascarifiatan Esteban minhuunshon rutuaifono unrifi nannorisi shi-nanquin un ato yoini. Futsafoan Esteban rutuaifono un aton sahuutifo

cushushoniran,” ishon un nocon Ifo yoini. <sup>21</sup> “Cayotahuun. Un min caifo futsa muran mia nichu uhuunoa ato yoinon,” ishon ua yoiniran, —ishon Pablonun ato yoini.

*Romano niaifoan Pablo cushuni*

<sup>22</sup> Nicasharayonifo. —Un caifo futsan muran cairan —ato huaino afanan nicapainifoma. Oi ashcafinin cunanifo, —Nan nocofunun chacashuni. Rutucahuun afanan ninoma. Nanon, —ishon tsain fucashni huanifo. <sup>23</sup> Asca huacatan aton sahuutifo foman caya potainifoancatan mapori foman caya saanifo. Fasi mucainifoannifo. <sup>24</sup> Ascaino ranushumuafoan aton niaifoan yonoano Pablo aton cunu muran iquimanifo, —Iquimacahuun. Coshauqui futsashon. Fichin coshauquin yocacahuun isca huaquin “¿Ahuuscain miqwi fasi sinacanimun?” ishon yocahuun nonri tapinon, —ishon niaifoan ato yoini. <sup>25</sup> Asca huatan mushanhuanshon puchi coshapaiyaifoan Pablonun ranushumua niaifo patashari yoini,

—Unfin Romanoquin. Ua chaca huati huaafliashocai tsoan ua yocama iconmainquin. ¿Ascan isca huaquin min niaifoan mato yonoamun ua man isca huanon? —ishon yoini.

<sup>26</sup> Nicatan ahuun niaifo ano cariscani,

—¿Ahuuscain min na nocofunu coshamamun? Nanfin Romanoquin, —ishon yoini.

<sup>27</sup> Nicatan niaifo Pablo ano cani,

—¿Iconmun. Min Romanomun? —ishon yocaiton.

—Ainfain, Unfin Romanoquin, —huiton.

<sup>28</sup> —Unfin Romano ipaiquin un pui ichapa niaifo inanni ua Romano imanon, —huiton. —Ascafiashu uncai tsoa pui inanmisima. Unfin Romano cainniquin, —ishon Pablonun yoini.

<sup>29</sup> Nicacani ranushumuafoan fichin coshapaiyacani amaquinoashu foriscanifo. Niaifo arifi ratuni. —¡Ohua! Na nocofunu Romanofiacun un cuno pono rafutan munushua, —ishon shinanni.

*Israelifoan niaifofa aton ointaifi Pablonun yoini*

<sup>30</sup> Ascaino Israelifo Pabloqui sinaquin aqui tsain chaca huanifo ahuuscainun iscaiquin ishon ranushumua niaifoan tapipaini. Ascaino iyoco futsaino Pablo ahuun cuno pucashon nocon yorahuunshon Dios cufimisi niaifofa yafi Moisés cununi cuscan tapimamisifo yononi, —Ichanancahuun Pablo maton ointaifi man yocanon, —ishon ato yoini. Asca huatan Pablo ato ano iyonifo.

## 23

<sup>1</sup> Ato oinquin Pablonun ato yoini, —Uhuun yoramishtichin, Upa Diosin ua yonoa cuscan facuashu un tauni cuscan natianri un ascamisi. Un mato yoiai cuscacoin uhuun nomuran un icoinra huai, —ishon ato yoini.

<sup>2</sup> Ascaiton aton yorafohuunshon Dios cufimisi niaifocoin Ananiasin futsafo Pablo chaimashta niafo yoini, —Apasihuun, —huiton,

<sup>3</sup> —Min fuparapaimisi. Upa Diosin mia coshatiro. Min futsafo shinanmapai Moisés yononi cuscan un aamaran ishon. Ascan mincairon ascama. Moisés yononi cuscacai chaca huaa tapishoma non yora onaintimatiroma. Asca ahuascain min futsa min yonoamun ua apasinon, —ishon Pablonun niaifo yoini.

<sup>4</sup> Chaimashta niafoan yoinifo, —Ahuuscaimun min nocon yorafohu-unshon Dios cufimisi niaifocoin min tsain chaca huaquin, —huaifoan.

<sup>5</sup> —Uhuun yoramishtichin, un onanma nanton nocon yorafohuunshon Dios cufimisi niaifocoin. Diospan tsain cunuquin isca huani, “Maton niaifofo ato tsain chaca huayamacahuun,” —ato huani.

<sup>6</sup> Ascano Pablonun samamashta shinan futsani. Ahuun caifo nanno ichananfo atirifi Saduceofo non atirifi Fariseofo. Ascano ato yoini,

—Uhuun yoramishtichin, unfin Fariseoquin. Uhuun upa non uhuun shuniforifi Fariseofoquin. Yora naashu funicun un icoinra huaicain. Ascan uhuunoa tsain chaca huai na shafatan ua asca huapaicaniran, —ishon ato yoini.

<sup>7</sup> Ascaiton nicacanashu Saduceofo non Fariseofo fochishmanantanano. Niaifofoancai anorisi shinannifoma. <sup>8</sup> —Non naashucaí non funitiroma. Nocon yoshin yamai. Diosin oinmati afu nai muran icafori yamairan, —ishon Saduceofoan yoinifo. Ascafiaino Fariseofoan yoinifo, —Non naashu non funitiro. Nocon yoshin nipanaca. Upa Diospan ahuun oinmati afu nai muran ica ichaparasiran, —ishon yoimisifo. <sup>9</sup> Ascano nanno ichananshu fasi mucanifo. Fariseo futsanfoan Moisés yononi cuscan tapimamisifoan nishon yoinifo,

—Na nocofunu Pablocai ahua chaca huama. Noco ahua chaca yoiama. Itsairaca yoshin shara iyamarai Diospan nai oinmatinin Damasco fai anoshon Pablo yoiniran, —ishon yoinifo.

<sup>10</sup> Ascaino fasi mucariacaquin. Pablo achitan nininain futsunifo. Ascaiton ranushumua niaifoan oin Pabloqui musuni, —¡Ohuashta! Pablo nininain futsucani un numaiyamaino rututirofoquin, —ishon ahuun ranushumuafo yononi. —Numanon. Nocon pushu muran iyocahuun, —ato huani.

<sup>11</sup> Nan yamutan nocon Ifo Jesús Pabloqui noconi. —Pablon shinanchacayamahuu. Jerusalén anofo min ato uhuunoa yoimisi cuscan huafain Roma anofofori nanscarifi huaquin yoihuu, —huani.

### *Pablo rutushquin itisharanifo*

<sup>12</sup> Ascan iyoco futsaino Israelifo ichanancashon yoinifo, —Non Pablo rutuataima non piqui tunufain non ahua ayaima. Non asca huayamaino Diosin noco asca huanonran, —ishon yoinannifo. <sup>13</sup> Cuarenta nocofunfoan anori yoinifo. <sup>14</sup> Asca huacatan nocon yorafohuunshon Dios cufimisi niaifofo non Dios fu tsainti pushu cushumisifo ano fonifo chani huai focani,

—Non yoia non Pablo rutuataima non piqui tunufain non ahua ayatiroma. Non asca huayamaino Upa Diosin noco asca huanon. Non nantififain anori yoi. <sup>15</sup> Ascan natian niaifofo patashari matofu ichananfaitafo aton ranushumuafoan niaifo fuparashocahuun. Yoicahuun isca huaquin, “Noco Pablo ihuushotacahuun non afanan yocasharanon cayacafi ahuunoa tapicoinnon,” ishon yoihuu. Ascaiton oinquin cahuanaiton achishon non rutunon, —ishon yoinifo.

<sup>16</sup> Ascano yoiaifo cuscan Pablonun ahuun piacan nicatan ahuun co-caqui chanini. <sup>17</sup> Nicashon Pablonun ranushumua niaifo patashari cunani, —Uhuun piacan ahua min niaifo yoipai. Ascan min niaifo ano iyoriscahuun, —huani.

<sup>18</sup> Ascano niaifo ano iyoní. Nocoano,



—Niaifoan, Pablonun ua cuna. “Uhuun piashtan, min niaifo ano yoriscahuun ahuara yoinon,” —ishon ua yoia.

<sup>19</sup> Ascashon niaifoan pushcohuai mutsoinifoan chaimashta iyoni, —¿Ahua min ua yoipaimancain? Ua yoihuu, —huaiton.

<sup>20</sup> —Uhuun caiffo nan Israelifoan mia fuparapai fucani. Mia isca huacani,

“Noco Pablo ihuushotahuun non afanan yocapaicai ahuunoa cayacafi non tapinon,” mia huai fucani. <sup>21</sup> Ato icoinra huayamahuu. Uhuun coca atoqui iyoyamahuu. Cuarenta nocofunufaoan fai cusumunshon cushuafoqui uhuun cocan ato finoainton achishon rutushcaquin. “Non Pablo rutupaiyaichaincai non ahua piyamafain non ahua ayayoima. Non asca huayamaino Upa Diosin noco rutupainonran,” ishon yoiafo. Natian samamashta miqiu fucani mia yocai fucaniran, —ishon furonanfacun yoini.

<sup>22</sup> Nicatan ranushumua niaifoan, —Mian yoia cuscan tsoa futsa tapimayamahuu, —huatan furonanfacu nichini.

*Pablo niaifo Félix ano nichinifo*

<sup>23</sup> Nichitan niaifo patashari rafu cunani, —Doscientos ranushumuafo nichifain setenta ranushumuafo caballo camaqui nichifain doscientos ranushumuafo ashin ya un nichicain. Ato yoicahuun itisharanonfo Pablo na yamu a las nueve Cesarea ano iyocaniquin. <sup>24</sup> Pablorigo caballo inanyohuu niaifo Félix ano iyosharanonfo, —ishon ato yononi. <sup>25</sup> Yoitan ranushumua niaifoan ahuun niaifo cunu fomani isca huaquin,

<sup>26</sup> —Unquian Claudio Lisias. Un mia cunu fomai min tapinon.

<sup>27</sup> Un nocofunu ahuun anu Pablo miqiu nichishquin. Ahuun caiffoan Israelifoan achicashon rutucanafo. Mucaiffoan nicaquin uhuun ranushumuafo futan un Pablo numaita. <sup>28</sup> Ahua chaca huamainquin tapipaiquin Israeli niaifofo ichanain ano un iyoa. <sup>29</sup> Afoan yoiai cuscan nicashon mun tapia na nocofununcai ahua chaca huama. “Nocon caiffoan yononi cuscaicai Pablo amisima,” ishon nan fusti ahuunoa yoiafo. Ascan ahuacai chaca huamafinquin iquimafain rutupananfoan.

<sup>30</sup> Futsa uqui chania Israelifoan ua fuparapaicani Pablo rutushcaquin. Tapishon un miqiu nichirisca. A chaca huafori un yonoa miqiu focani Pablomain ahua chaca huaquin mia yoinonfo. Nanti uhuun niaifon Félix, —ishon cunushoni.

<sup>31</sup> Ascano aton niaifoan ato yonoa cuscan yamu Pablo Jerusalén anoshon Antípatris ano iyonifo. <sup>32</sup> Iyoco futsaino atirifi aton pushu ano naso furanifo. Ranushumuafo caballo ya fusti Cesarea ano iyonifo.

<sup>33</sup> Cesarea ano nococashon Pablo niaifo ano iyonifo. Ranushumua niaifo ahuun cunuri niaifo Félix inanni. <sup>34</sup> Cunu oinquin yocani, —¿Min rani icamun? —huaiton. —Unfin Cilicia anoquin, —Pablonun huani.

<sup>35</sup> —Mia chaca huafo nocoafotian un mia cunashquin non ichananon man ua yoinon, —ishon yoini. Yoitan nan Herodes niaifo icano nichini, —Pablo cushusharacahuun, —ahuun ranushumuafo yononi.

## 24

*Pablonun Félix niaifo yoini ahuunoa shinanchacanonma*

<sup>1</sup> Ascatan osha mucu fustiti finontan Israelifo aton niaifocoin Ananías Cesarea ano cani. Aton ichananti pushu niaifofori afu fonifo. Nocofunu

futsa ahuun anu Tértulo arifi atofu cani. Nanton Romano niaifofo yononifo cuscan fasi tapicoinni. Nococashon niaifo Félix nanfo yafi Pablo ichanan huani aquí tsain chaca huafoan nicanon. <sup>2</sup>Ascatan Tértulo yoini isca huaquin,

—Nocon niaifoan, min noco iquina fasi sharacoin. Min niaifo iyopaonitian non natianri noco tsoan fucash huaama. Min niaifoatamacai non isharamisima. Natian ascataamarocon mihuunoashu non fiananan non ahua yopaima. <sup>3</sup>Ascano non mia aicho huai. Nantifi uhuun caifoti miqúi unimacoin. Min noco shara huamisi.

<sup>4</sup>Ascafia un mia chai yoiriapaima min fucashnonma. Un mia ichapama yoipai noco nicayopun, niaifoan. <sup>5</sup>Nan nocofunu Pablonun fasi nocon caifo Israelifo fucash huamisi. Icafoti mucamamisi. Nocon caifo amaquiri shinanmapaiyaifoan aton anufo Nazarenonfo. Pablo aton niaifo. <sup>6</sup>Nocon Dios fu tsainti pushu chaca huapaiyaiton non achitan. <sup>7</sup>Nocon caifoan yononi cuscan non onaintimacuanita ranushumuafao aton niaifoan Lisias cushuyamacun curushcain yonoano nocomaquishton numaita. <sup>8</sup>Mifi yocashon min tapitiro ahuunoa chaca non yoia cuscan iconcoiran, —ishon yoini.

<sup>9</sup>—Niaifoan. Nocon yora Tértulo Pablohuunoa yoia cuscan iconcoiran, —ishon Israelifo nannoafoan yoinifo. <sup>10</sup>Yoicatan niaifoan mushashonaiton Pablonun a yoini,

—Niaifoan, uhuun caifo futsa chaca huapaiyaifoan min nicamisi. Fari ichapa min ato nicamisi. Icon iyamarai iconma min yoimisi. Ascan ranotama uhuunoa un mato yoi min tapitiro uncai ahua chaca huamisima. <sup>11</sup>Futsafoan mia yoitiro osha doce finontan un Jerusalén ano caita nocon Dios fu tsainti pushu muranshon Upa Dios cuficai. <sup>12</sup>Nunoshon ua chaca huapaiyaifoancai Dios fu tsainti pushu murannoashu un tso fu fochishmanantananmisima. Un nocon ichananti pushu muranshon yorafo mucamama. Jerusalén anoafoancai un yorafo mucamama. <sup>13</sup>Afoancai ahua oinmatirofoma un chaca huacun.

<sup>14</sup>Icon, un ranotama mia yoitiro nocon shunifoan aton Dios urifi noiquin un cuffimisi. Nocon lfoan noco yosipaoni cuscan un tanamisi. Un non futsafoan tana cuscan amaquiriran man huamisi. Nocon shuni Moisés yononi cuscan nantifi un icoinra huaiquin. Nocon caifon Diosin tsain yoimisifoan cununi cuscan nanfori un icoinra huaicain. <sup>15</sup>Diosin yoini cuscan yora sharafo yafi chacaforti funimashquin uhuun caifo nuno nanfo icoinra huaifo cuscan urifi un icoinra huamisi. <sup>16</sup>Ascacun un isharpaimisi cuscan uhuun nomuran un tapin un Dios yorafo chaca huamisima.

<sup>17</sup>Fari ranan un Jerusalén ano icama. Ascan natian un nasoita uhuun yora ahuuomafo pui inashquin Upa Dios fu tsainti pushu muranri un iquita Upa Dios ahuafo inanshquin. <sup>18</sup>Nocon Diosin tsain noco yononi cuscacoin un huaa. Un Upa Diosin ahuun ointaifi chaca huatamarocon un iisharaqin. Nanscara uhuun caifofoan Dios fu tsainti pushu muran ua fuchiafo. Yorahuanrasicai ufu icafoma. Tsoacai mucama.

<sup>19</sup>Uhuun caifo Asia anoafoanraca un ahua chaca huaiton oianfo ahuuscain miqúi fuafomamun mia yoishcaquin. <sup>20</sup>Uhuun caifo nunoafoanri ua oianfo nocon niaifofoan aton ointaifi un ato yoiaiton. ¿Ahuuscain afoanrifi uhuunoa ahua chaca yoiafomamun? Uncain ahua chaca huama. Ascan uhuunoa huacai chaca yoitirofoma.

<sup>21</sup> Ahuara fustishta nocon caifo niaiffoan ointaifi un ato yoia, Oi ashcafinin un ato yoita, “Yorafoti naacanashu afanan funishcani.” Ascacun ua miqui ihuuafo min ua nicanon. Afoanri mia yoipaicani mian asca huanon, —ishon Pablonun niaifo yoini.

<sup>22</sup> Nicaquin Félixpan nantifi nanno ichananfo ato yoini. —Natian non unuyonon, —ishon ato nichini. Arifi Jesús icoinra huafoan amisifo cuscan tapisharamisi.

—Ranushumua niaifo Lisias nocoafono un mia ahuusca huaimancai mia yoitiro, —ishon niaiffoan Pablo yoini.

<sup>23</sup> Ascacun niaiffoan ranushumua yoini, —Cunu muran Pablo iquimafashon ahuusca huanonma. Ahuun yorafoan oinpaiyaiton ato iquimahuu Pablo pimasharanonfo. Yopai cuscan inanonfo, —ishon Félixpan ranushumua niaifo yoini. Yoitan Cesarea anoashu mai futsa ano cani.

<sup>24</sup> Shafa ranan finontan Cesarea ano nasocurani. Ahuun ahuin Drusila afu oni. Nan ainfo Israeli shafu. Nococashon Pablo cunanifo nicashquin. Ahuuscashomain Jesucristo icoinra huatirofoquin Pablonun Félix yafi ahuin yoini. <sup>25</sup> Futsafoanri ahuara futsa ato yoini. Upa Diosin noco imasharatiro yoifain ahuuscashomain non chaca huapaiyai cuscan non potatiroquin yoifain Upa Diosin nantifi noco yoishquin ratofomain afu ipatiroquin atirifi omitsiscapanacafo muran focani. Pablonun afohu-unoa yoini. Nicaí Félix fasi ratuni.

—Nanscanon. Nanti. Min natian catiro. Un ahuara futsa huayamaquin un mia afanan cunatiro, —ishon yoini.

<sup>26</sup> Yoiaifono ahuun nomuran shinanni, —Pablo cunu murannoashu cainpaiquifin ua pui inantiroquin un caimanon, —ishon shinanni. Ascacun cunafafainpaoni afu tsaishquin. <sup>27</sup> Israeliffoan ahunoa shinansharanonfo ishon Félixpan Pablo cunu murannoa caimapainima. Fari rafu nanscan huapaoni. Ascan fari rafu finonmani niaifo futsa tuquihuani, ahuun anu Porcio Festo.

## 25

### *Pablonun Festo niaifo fu fusoiquinanshu yoinanni*

<sup>1</sup> Ascaino Festo nocotoshitan niaifoni. Nocoashu osha rafu non fusti finontan Cesarea anoashu Jerusalén ano cani. <sup>2</sup> Nocoano nocon yorafohuunshon Dios cufimisi niaiffo non Israeli niaifo futsafoan aqui funifo Pabloqui tsain chaca huai fucani. <sup>3</sup> Festo fuparapaiquin yoinifo, —Niaifo Festo, ranushumuafo yonohuun Pablo nuno ihuunon. Noco ashopun, —huanifo. Fai pochininshon Pablo cushupainifo rutushquin. Rutupaicaquin niaifo fuparapainifo. <sup>4</sup> Ato cumani, —Pablo cunu muran Cesarea ano ica. Urifi samamashta un ari cai.

<sup>5</sup> Ahuara chaca huacun maton niaiffo yoitacahuun ufu canon. Nannoshon na nocofunu man yoiti huatiroquin, —huani.

<sup>6</sup> Ascan huatan atofu osha mucu rafuti iyoni Cesarea ano nasocurani oni. Iyoconaino ato ichanan huani. —Pablo uqui ihuucahuun, —ishon Festopan ato yononi. <sup>7</sup> Nococun ahuun caifo Israeliffoan Jerusalén anoashu fucashon yoiti huanifo. Yoifiaitocai tsoan ismacoinnima iconmainquin. <sup>8</sup> Ascaiton Pablonun ato cumani isca huani,

—Aririma. Uncai ahua chaca huama. Uhuun caifo Israelifo nocon shunicaiffoan yononi cuscacai un potamisima. Nocon Dios fu tsainti

pushu un a muranshon ahua chaca huayamafain Romanofan yonomisi cuscaricai un yoitima imisima, —ishon Pablonun yoini.

<sup>9</sup> Ascatan niaifo Festopan Israelifo ahuunoa shinansharamapaiquin Pablo yoini,

—¿Min Jerusalén ano catiromun min caifofan mia yoitihuai cuscan nannoshon uhuun ointaifi min cumatiro? —huaiton.

<sup>10</sup> —Ma. Nuno Romanofa aton niaifofan yoitiro un chaca huaa iyamarai un chaca huama. Minfin tapisharaquin uncai uhuun caifo Israelifo un chaca huamisima. <sup>11</sup> Un ahua chaca huacun ua rututirofo. Ascafiashucai uqui chaca huafo cuscan iconyamaino tsoancai ua atoqui nichitiro ma ua rutunonfo. Unfin niaifocoin Cesar ano capaicain uhuunoa yoishquin, —ishon yoini. <sup>12</sup> Nicatan Festopan afu niaifofa patashari yoinannifo. Tsainquin anaititan yoini,

—Mihuunoa min niaifocoin Cesar yoipai. Ascacufin min Cesar ano catiroquin, —ishon niaifofan Pablo yoini.

*Pablonun Agripa niaifo fu fusoiquinanshu yoinanni*

<sup>13</sup> Ascano shafa ranan finontan niaifo futsan ahuun anu Agripa yafi ahuun chico Berenice Cesarea ano funifo niaifo Festo oinfucani. <sup>14</sup> A futan shafa ranan finoanno Festopan niaifo futsa Pabluhuunoa tapimani.

—Nocofunun futsa nuno ica. Nan Félixpan cunu muran iquimani. <sup>15</sup> Un Jerusalén ano cayamua Israelifoan ahuun yorafohuunshon Dios cufimisi niaifofa non Dios fu tsainti pushu cushumisifo uqui fucashon nan nocofunu ahuun anu Pablo ua yoitihuamanonfo. “A onaintimahuu,” ua huayamuafo.

<sup>16</sup> Un ato yoia non Romanofan nocon fuyamisicai ascarama. Nocofunu ahua chaca yocashomacai non onaintimatiroma. <sup>17</sup> Ascano ufu fuyamuafo nuno Cesarea anoshocai un ato manayamuama. Iyoconaino un ato ichanan huama. Nocofunun ahuun anu Pablori un iquimani. <sup>18</sup> Ascaiton ahuun caifofa un yoia, “¿Natian ua yoihuu ahua chaca huamun?” un ato huaa. Uhuun nomuran un shinan na nocofunun ahua fasi chaca huaa. Ascafiacai ua anori cumacanima. <sup>19</sup> Ascatarocon atofu Diosihuunoa fochismanantancani yoifain nocofunun Jesushuunoari ua yoiafo. “Nan Jesús naafiashu man funini,” Pablonun yoia. <sup>20</sup> Afohuunocai un tapiama. Un mun ahuuscaicain uncai tapitiro ma. Ascacun un Pablo yocan, “¿Min Jerusalén ano ufu catiro min caifofa muran mia chaca huafo cuscan min ato cumanon?” ishon un yocan. <sup>21</sup> “Ma. Unfin niaifo Cesar ano capaicain uhuunoa yoicai,” ua huaita. Ascana un yonoa Pablo cunu murannoa ranushumufo cushunonfo Cesar ano un nichiaitian, —ishon ato huani.

<sup>22</sup> Nicatan, —Urifi na nocofunu nicapairan, —ishon Agripanun Festo yoini.

—Funamanri min nicai, —huani.

<sup>23</sup> Iyoconaino niaifofa ichanancashon niaifocoinchi Agripa yafi ahuun chico Berenice pushu muran iquiafono manutifo chaan chaan acaino nantifi funinifo nan niaifo tsoaitian. Ascana Festopan yonoa Pablo iquimani.

<sup>24</sup> Iquishon Festo yoini,

—Uhuun niaifo Agripa yafi no fu ichananfo na nocofunu ahuun yorafo nan Israelifo Jerusalén anofo non Cesarea anofoan ua yoiafo, “Nan Pablo rutuhuu,” ua oi ashcafinin yonofo. <sup>25</sup> Asca huafiainfonocai un

ahuunoa un tsain chaca yoiainfoan un nicama. Ascashon ahuun tsainri un nica. Tsain chaca huafo cuscan yafi ahuun tsainri nicashon un shinan ahuacai chaca huamafinquin naashquin. Un cunu muran nichipaifia, “Un niaifo Cesari yoipai uhuunoa tapinon,” ishon ua yoiainfo. Ascan un Roma ano nichicain. <sup>26-27</sup> Ascafia ahua chaca huayamacucai un ahuunoa Cesar niaifo cunushotiroma. ¿Nocofunucacai ahua chaca huaa non yoitiro? ¿Ahuuscaicai non niaifon Cesar ano nichitiro mun? Un shinan un asca huacai sharama. Ascan mato ointaifi un na nocofunu iquimani man non nocon niaifo Agripa man nicaiton man yoitiro ahuarafo raquirimain un niaifo Cesar un cunushonocain, —ishon Festopan ato yoini.

## 26

*Pablonun Agripa niaifo yoini cuscan*

<sup>1</sup> Ascatan niaifo Agripan Pablo yoini,

—Min noco yoipaiyai cuscan noco yoihuu, —huaiton. Ascano Pablonun mushainacahuan ato yoini ahuunoa shinanchacanofoma. <sup>2</sup> —Niaifo Agripa un unimai uhuunoa un mia yoitiro. Uhuun caifo nan Israelifoaan ua chaca huafo cuscan un natian mia yoitiro uhuunoa yoiainfo cuscan min icoinra huanonma. <sup>3</sup> Min uhuun caifo imisi cuscan nocon shunifoaan noco yonopaooni cuscan nanfo min tapicoian. Ascan niaifoaan funaquima ua nicasharapun un mia yoinon.

*Pablo Jesús ifoataima ipaoni cuscan*

<sup>4</sup> Un furonanfacu ipaonitian natianri uhuun caifoaan uhuunoa tapi sharafo. Un cainni anoafoaan yafi Jerusalén anoafoaanri un icai cuscan tapisharafo. <sup>5</sup> Fari ichapa ua onanmisifo. Nocon shunifoaan noco yononi cuscan un tanasharapaoni. Uhuun caifoaan Diosin tsain tanasharacun Fariseoran, huamisifo. Urifi Fariseo ipaoni. Un mia yoiainfo cuscan uhuun caifoaanri tapiafo. Unmain icon yoicain mia yoipaiyai fo cuscan mia yoitirofo.

<sup>6</sup> Upa Diosin nocon shunifo yoyotiani cuscan un icoinra huamisi. Ascancunfin ua chaca huafoquin maton ointaifi na shafatan ua ihuuafo. <sup>7</sup> Uhuun yorafo nan shoco doce maniafo shafatifi yonofafaincani Diosin nocon shunifo yoyoni cuscan fishcaquin. Uhuun niaifoaan, uarifi fuchipaifiaiton, “Na nocofunun chaca huaran,” ishon uhuun caifoaan ua chaca huafo. <sup>8</sup> Yora naashu funitiro un icoinra huaa. ¿Nan un icoinra huaino chacamun? ¿Marifi shinanmamun Diosin nan ahuamamishti huatiro ahuun curushhuunshon naafo funimatiro? ¿Man icoinra huatiromamun Upa Diosin naafo funimatiro?

*Pablonun Jesús icoinra huafo omitsiscamapaoni cuscan*

<sup>9</sup> Ipaoni urifi Jesús Nazaret anoashu pushconi ahuun tanamisifo un fasi chaca huapaoni. <sup>10</sup> Jerusalén anoashu un ascapaoni. Nocon yorafohuunshon Dios cufimisi niaifoaan ua yonoai cuscan un Jesús icoinra huaafo cunu muran iquimapaoni. Ato rutuaifono, “¡Aicho! Ato rutuhuu,” un huapaoni. <sup>11</sup> Nocon ichananti pushuti muran un iquimapaoni Jesús tanamisifo omitsiscamai. “Jesús sharamaran,” un ato huapaoni. Anori yoyamaifoaan un ato omitsiscamapaoni Jesús afanan tanapaimaran inonfo. Nocon caifoma anori un capaoni Jesús tanamisifo omitsiscamai.

*Jesús ifoaan cuscan Pablonun afanan yoini*  
Hch 9.1-19; 22.6-16

12 Un Damasco ari cani ato omitsiscamaicai. Nocon yorafohuunshon Dios cufimisi niaifofoan ua cunu inanni un ato achimashon cunu muran iquimanon. 13 Uhuun niaifoan, un Damasco fain caino fari masafinin racano nai murannoashu fasi chashariscatanaiton un oinni. Fari chashatiromaquian fasi chashacointani. U fu foainfoanno chashariscatani. 14 Un pacuriscataquin un ahuun oi nicani. Uhuun tsainman Hebreo ua yoini, “Saulo, Saulo. ¿Ahuuscaquimun mian omitsiscamaquin? Mifi min omitsisca huamuaquin,” ua huaiton.

15 “¿Ifon, min mun tsoaquin?” huaiton. “Unquian Jesús. Mian omitsisca huamamisi. 16 Funihuu. Un mia oinmanaquin. Un mia catoan uhuun oinmati min inon. Min uhuunoa natian oian cuscan futsafo yoifain chipo mia oinmai cuscarí min ato yoitiro. 17 Min caifoan mia rutupaishquin. Yora futsafo muran un mia nichí. Afoanrifi mia rutupaifaino un mia cushusharatiro. 18 Uhuunoa min ato yoishquin. Natian faquish muran ica shinantsa. Uhuunoa min ato yoishquin afanan faquish itamarocon shafa muran inonfo. Natian Satanás aton ifon ato iquina. Uhuunoa min ato yoishquin afanan ato ifo itamarocon Diosin ato Ifo inon. Ascano ua icoinra huacashon aton chaca rauhuatiro Diosin ato catoan ahuun yorafo fu ipanonfo,” ishon ua Jesús yoini.

*Upa Diosin ahuun namapan cuscara yoini cuscan Pablo man aa*

19 Asca huatan, niaifon Agripa, ua nai muranshon yoini cuscan cai un yoitimamisima. 20 Maton chaca shatucahuun Diosiquiri shinanshquin. Isharashcaquin mato icoinra huanonfo maton chaca shatucoinshon Dios tanacahuun. Nannori un Damasco anoafó yoifain Jerusalén anoafó yoifain Judea mai anoafoti yoifain uhuun caifomari un ato nantifi yoimisi. 21 Ascano uhuun caifoan Dios fu tsainti pushu muranshon ua achiafo ua rutushquin. 22 Ua rutupaifiaifoan Upa Diosin ua cushusharamisi un natian nia. Ascano un nantifi yoifoanfainmisi. Nocon shuni Moisés yafi Diosfin inonpacoai cuscan yoimisifoan yoipaoni cuscan urifi nannoricoin un yoimisi. 23 “Nocon Cristo omitsiscái. Naafishu funi tauniquin. Funishon uhuun caifo nan Israelifo yafi Israelifoma yoishquin ahuuscashumain Upa Dios fu ipatirofoquin,” ishon ato yoipaoni. Urifi nannorisi un yoimisiran, —ishon Pablonun yoini.

*Pablonun Agripa shinanmapaini arifi Jesús icoinra huanon*

24 Yoiaiton Festopan Pablo tsainfiaton shutinifoanni.

Yoiquin, —Pablon, min fari ichapa cunu tapifafainmisi. Ascacan natian min nison cuscara, —ishon Festopan yoiaiton.

25 —Ma. Niaifo Festo uncai nison cuscarama. Un mato yoia cuscan iconcoin. Yorafoan shinansharaifo un mato yoia cuscan icoinra huatirofo. 26 Un mato yoia cuscan niaifo Agripa nicamisi. Ascan un shafacafi afohuunoa yoitiro. Un shinan arifi afohuunoa nicamisi. Man onan. Un mato yoia cuscaí onutirofoma. Nantifiton nicacuanifo. 27 ¿Niaifo Agripa, min Diosin tsain inon pacoai yoishomisifo icoinra huaimun? Mun tapia min ato icoinra huairan, —ishon Pablonun yoini.

28 —¿Man min shinain min samamashta ua Criston ahuun yora imatiromun? —niaifoan huaiton.

29 —Samamashta iyamarai chipo un icaí cuscan min non futsafo nuno ua nicaifori ua cuscara ipanonfo munushumutama. Nannori un mato Dios cufishonaran, —ishon Pablonun yoini.

30-31 Nicashon niaifon Agripa futan niaifo patashari non Berenice cunu murannoashu cainfurantan yoinannifo,

—Na nocofununcai ahua chaca huama cunu muran iquicain napanan.

<sup>32</sup> Na nocofunun, “Un Cesar ano capairan,” iyamaiton non nichisharacuanaran, —ishon Agripan Festo yoini.

## 27

### *Pablo niaifohan Roma ano nichini*

<sup>1</sup> Ascano niaifohan yononi noco shashohuan muran Italia mai ano nichinon. —Pablo yafi afu cunu muran iquiafo Italia ano iyotahuun, —niaifohan afu niaifo ranushumua ahuun anu Julio yononi. <sup>2</sup> Ascaiton non Adramitio anoashu nanufaini Asia mai ano fonifo. Nocofunu ahuun anu Aristarco no fu cani. Nanton ahuun mai Tesalónica Macedonia muran. Unuhuan non pocufaini. <sup>3</sup> Cai iyoco futsaino non Sidón ano noconi. Nocoshon ranushumua niaifo Julionun Pablo shara huapaiquin yoini, —Min nuno maputiro min yorahuan nuno icafoan min yopai cuscan mia inantiroforan, —ishon yoini. <sup>4</sup> Ascatan chipo Sidón anoashu non unuhuan pocufaini. Fuuhuanun noco catima huaino mai nushmancayan toomanhuan ahuun anu Chipre turocomucaini non cani. Ocuma futsan fuhuanun noco catima huani. Noco mushquihuuri fonifo. <sup>5</sup> Ascatan Cilicia mai cutanfoicai Panfilia mai futsari cutancuicai Mira pushurasi ano non noconi. Nan Mira Licia muran ini.

<sup>6</sup> Nanno ranushumua niaifohan shashohuan fuchini. Alejandría anoashu shasho muran noconifo Italia ano focani. Ascano ranushumua niaifohan shashon ifo yocani. —Non shashohuan muran mifu Italia ano capai. ¿Min noco iyotiro mamun? —huani. <sup>7</sup> Non caino fuuhuanun noco catima huaino funainquimashta non cafoni. Fasi man shocunashu non Gnido cusumunri nocopaifiai non nocotiro ma. Ascan fuun aforinnoashu fuaino mai nushmancayan toomanhuan ahuun anu Creta ahuun mushquiori noco catima huani. Salmón pushurasi finonfaini cusumun non foyacuni cusumunri non foyacupaiyaino fuun noco catima huani. <sup>8</sup> Ascatan noco catima huafaino fasi yonocoin cai non pushurasi ahuun anu Buenos Puertos ano noconi. Nan Buenos Puertos pushurasi futsan Lasea pushurasi chaima ini.

<sup>9</sup> Non nanno osha rananyoni. Oi pacutian capaifaino fasi unuhuan fuchomanhuain musunicoinni. Ascano Pablonun shasho niaifofo yoini,

<sup>10</sup> —Niaifofoan, mun tapia non natian caino musucoin itiro. Noco mafo non nocon shashori non funotiro. Norifi non asai futsutiroran, —ishon ato yoini.

<sup>11</sup> Yoifiano shasho ifo non chiatamisiton yoinifo, —Ma. Musuma. Non nocosharatoran, —huaifoan. Nicatan ranushumua niaifohan Pablonun ato numapaiyai cuscan nicatamarocon shasho ifoan non chiatamisi nicani. <sup>12</sup> Oi pacutiancai Buenos Puertos ano itiro ma. Unuhuan cusumun fuchomanhuatiro. Shasho chacana huatiro. Atirifohan yoinifo, —Non pushurasi Fenice ano canon. Nanno mahua ocu rafu ahuusca huatacai fuchomanhuantiroma. Shara itiro. Ascano non oi pacutian ari nituyotiroran, —ishon yoinifo. Nan pushurasi Fenice Creta mai ano ini.

### *Unuhuan fuchomanhuanni*

<sup>13</sup> Funainquimashta fuu nocoaino, —Non casharanon. Nan fuu sharapan non casharatiroran, —ishon yoinifo. Ascaino Buenos Puertos anoashu non pocufaini Creta cusumunri cutan acuni. <sup>14</sup> Samamashta fuuhuan furani. Fuuhuan furanquin. —Nocachiorinoashu fuuhuan fuiran, —huaniquin. <sup>15</sup> Ascafia non cusumunri capaifaiton noco catima huani. Ascano fuuhuanun noco iyoai ari non cani. <sup>16</sup> Mai nushmancayan raca uhuapamashta ahuun anu Clauda finonfain. Nanno finoainfono non fasi yonocain non shasho uhuapama chinutamua shashohuan muran naratainifoannifo. <sup>17</sup> Asca huashon shasho pinushusho finifoannifo. —Furo itama shara canon. Sumucainicai non Sirte ano minhuanmanhuanquin mai tsacanonna nanno musuni non suotiroran, —inifo. Ascashu nan, —Fuun noco iyoai ari non catiroran, —inifo. <sup>18</sup> Iyoco fut-saino afanan fasi fuuhuan curushpacoïn nocon shashohuan fuchomanhuaquin iquimapaiyaiton mafo potaquin futsunifo. Shashohuan shacatanon ishon. <sup>19</sup> Afanan puna futsan fuuhuan nishmayamacaiyaiton shashohuan murannoa aton ahuamamishti potaquin anaitinifo aton rusfiffo ya. <sup>20</sup> Ascafiainocai fuuhuan nishmanima. Shafa rananun nai faquishihuancoïn fari punaiyamaino fishiforicai cainnifoma. Fuchomanhuan unuyamacaiyaino, —Man non nai futsuiran, —icashu ratucoinnifo.

<sup>21</sup> Man non piqui tunuqui rananhuan. Ascashon Pablonun ninacahuantan yoiquin,

—Uhuun yoramishtichin ua nicayocahuun. Un Creta anoshon un mato yoiaiton man nicafin shara icuanaquin. Ahuuscacuanama. Ascainocai ahurafo nocon shashoricai funocuanama. Manricai omitsiscacuanama.

<sup>22</sup> Ascafia ratuyamacahuun. Man naimacai. Shashohuan fusti funocoin. <sup>23</sup> Un mato yoiaï cuscan Diospan oinmati afu nai muran icaton ua yamu tapimana. Unfin Diosin ahuun yoraquin. Un ahuun oinmati. Yamu ahuun oinmati nai muranshon uqui nichian ua yoinon. <sup>24</sup> “Pablon, ratuyamahuu. Min niaïfo Cesar ano nocotiro mia chaca huafo cuscan min cayacafi cumasharanon. Upa Diosin min cufiain cuscan mia nica. Na mifu rafuafocai nan shashohuan murannoashu ahuuscaïma,” ishon ua yoia.

<sup>25</sup> Ascano uhuun yoramishtichin, ratuyamacahuun. Upa Diosin ua yoia cuscan aiquin un icoinra huai. Tsoacai asaimafinquin. <sup>26</sup> Ascafia mai nushmancayan toomanhuan racani anoashu nocon shasho tosha-caishquïran, —ishon Pablonun ato yoini.

<sup>27</sup> Quince osha finontan nan ununhuan ahuun anu Adriático anoshon fuuhuanun noco iyofoi cai. Yamu nacucahuanaino shashohuan muranshon yonomisifoan yoicaquin, —Man non mai ano nocoïran, —icashon yoinifo. <sup>28</sup> Anori shinancanashu unuhuan ahuun noa tapipai caquin rusfinquin plomo tuchishon potanifo. Ahuun noa treinta seis metros. Ascashon afanan ori futsa ano ahuun noa tananni veinte siete metros ini.

<sup>29</sup> Ascaino man non toquirinin huaquin non nocoicairan ishon. Ratucaquin ahuun cuno ihuu rafu non rafuri rusfipan nushashon rusfipan shashoqui nushashon noa muran potanifo. Nanno shasho nitunon. —Toquirininhuan tsacatani shasho toshatiroran, —icashu. Ascashon ratucoïncaquin cufinifo samamashta shafanon. <sup>30</sup> Ascaino shashohuan



murannoa yonomisi futsafoan shasho uhuapama naratamua fotomapaiyaifoan. —Shasho nitunon. Non cuno ihuu potapairan, —ishon yoinifo. Fuparapaicaquin. Fopaicaquin. <sup>31</sup> Pablonun ato fuchishon ranushumua niaifo yoini,

—Na shasho uhuapama man nitu huayamafin nantifi man asai futsutiroquin, —ishon yoini.

<sup>32</sup> Anori yoitan ranushumuafoan ahuun rusfin shatuafono shasho nonocaini cani.

<sup>33</sup> Ascatan man shafano Pablonun ato yoini, —Man osha quince piqui tunua. Man ratucaquin. <sup>34</sup> Ascan pii fucapun. Man piafin shara itiroquin. Non ahuuscaimaran, —ishon yoini.

<sup>35</sup> Asca huatan misi tsomashon aton ointaifi Apa Dios cufiyoni, —Upa Diosin, ¡Aicho! Min noco cushusharamisi, —huatan misi pini.

<sup>36</sup> Ascashon piyaino afanan ratunifoma oincaquin shasho murannofoanri piinifo. Pablonun oincaquin ato ointi afanan ratunima.

<sup>37</sup> Nan shashohuan muran non dos cientos setenta y seis yora. <sup>38</sup> Ascano nantifi misi picani mayancoinnifo. Ascashon ushufo forusafo muran finifo shashohuan muranshon unu muran potaquin futsanifo. Shasho shacainacahuanon.

### *Shashohuan iquini*

<sup>39</sup> Shafacuaino mai fuchiflashocai tsoan onannima. Ascashon uhuhan patontana nannori mainfin fuchicatan ano nocopainifo. —

Catiro oinquifin non tanafaintiroquin, —Ishon aton nomuran shinannifo. <sup>40</sup> Tanapaicaquin shinancatan, —Rusfinquin tuchiaquin nushua

rafu non rafuri non shatunon cacoinni canon, —icashon shatuafono aton shashohuan nonoinacahuanaino fooshcaquin. Ahuun chifish-

tatinin rusfi shoshan huanifo. Ascatan afanan panomanhuan futsa rushtiquiriri afanan rotanifo. —Fuun iyo sharanon, —icashon. Ascatan tanafainifo. <sup>41</sup> Chaicushon oianfo unu tapia ointsacun tanafaipaicaquin

mai tsacatoshinifoquin. Shasho rushti fasi coraintoshini. Man fuchomanhuanquin chinahuaquin shasho tsispaquiri cuaquin futsani.

<sup>42</sup> Ascaino ranushumuafoan shinannifo, —Na shasho murannofoa ichotirofoquin Non ato rutunoncahuun, —ishon yoinifo.

<sup>43</sup> Ascanfianton aton niaifoan Pablo rutupaquima. Ascacun ato nitun huani rutunonfoma. Shasho murannoafoti niaifoan yonoa, —Atiriton man topiqui tapiaquin topifaifafaincahuun maiqui nocotacahuun.

<sup>44</sup> Atirifiri ihui sapafo yatacanashu maiqui nocotacahuun. Ahuara futsafo shasho muran nonotiro nonofaifafaincahuun mai ano nocosharashcaquin, —ishon ato yononi. Ato yonoa cuscan nanscasi

anifo. Nantifi cusumun nocosharai futsunifo.

## 28

### *Pablo toomanhuan ahuun anu Malta ano ini*

<sup>1</sup> Ascashon nantifi non unuhuan cusumun nocosharani. Nanno icafoan, —Nocon mai nushmancayan toomanhuan ahuun anu Malta, —icashon yoinifo. <sup>2</sup> Noco fasi shara huanifo. Nannori oi furiapaoni

fasi yotanmahuanquin. —Fucahuun chi cutu huashu yooshcaquin, —noco huanifo. <sup>3</sup> Ascano Pablonun caro ya iconfurantan chi cutu huapaiyaiton shana muuqui a muranshon shano cuscaraton mucun

nasani. Munastan aya rono inacahuani. <sup>4</sup> Ascaiton oincani, —¡Uru!

Na nocofunu rutumitsamisiraca. Unuhuan ariashu nocosharafiaiton Diosin noaintimananan, —unu tupusumuni anoashu yoinannifo.

<sup>5</sup> Ascaino mutashquiri itaquin chi muran potani. Isinin inima. <sup>6</sup> Ascashon, —Farashinacahuantan nairan, —icashon oinquin futsanifo. Manariacaquin paunyamacaiyaiton oinquin yoinifo, —¡Oincapon! Nacai rutumitsamisimafinquin. Naafin dios futsaquin, —ishon yoinifo.

<sup>7</sup> Ascatan nanno chaimashta niaifo Publio ahuun mai. Ahuun pushu muran noco iquimani. Noco pimasharafain noco shara huani. <sup>8</sup> Apa isinin icoinni yonacain imi chishoi. Oshati muran racani. Tapitan Pablonun ahuun cunu muran iquicaini Upa Dios cufishonicai. Cufishotan ahuun mucuman mamanni cayanon. Ascaino cayariscatani. <sup>9</sup> Nan mai anoafaoan nicacani nan isinin icaifoti aqui funifo ato caya huamanon. Nantifi ato caya huapacuni. <sup>10</sup> Ascatan noco ahua ichapa inancoinnifo. Non itisharaquin ato anoashu shashohuanun cashquin non yopai cuscan noco inancoinnifo.

*Pablo Roma ano noconi*

<sup>11</sup> Oshu rafu non fusti finontan non afanan shashohuanun Malta anoashu cani. Shashohuan anunifo Rafanacaran ishon anunifo. Dios rafuran huashon shinannifo. Ascashon ato rafu anu futsanifo. Futsan ahuun anu Cástor huafain futsan ahuun anu Pólux. Ascan shashohuan rushtiquiri aton ointsa rami huani. Alejandría anoshon shashohuan onihuanifo. Oi pacutian Malta ano nan shashohuan iyoni. Nanuinifoan non unuhuanun non cani. <sup>12</sup> Focani non Siracusa pushurasi ano noconi. Nanno non osha rafu non fustiyoni.

<sup>13</sup> Anoashu focashon unuhuan cutafain non Regio pushurasi ano noconi. Iyoco futsaino non Puteoli pushurasi ano mapuinifoanni. <sup>14</sup> Nannoa Jesús icoinra huafo non fuchini. —No fu osha siete iyopun, —noco huanifo. Ascano non chipo atomaquinoashu Roma ano cani. <sup>15</sup> Jesús icoinra huafo Roma anoafaoan Pablo oaiton nicacani nocoqui funifo. Atirifi pushurasi Foro de Apio nocoqui noconannifo. Atirifiri pushurasi futsan Tres Tabernas anoashu nocoqui noconannifo no fu Roma ano foshcaquin. Pablonun ato oinquin, —¡Aicho! Upa Diosin, min ua yorafoqui nichiaran, —huani. Ahuun ointi fasi fupihuacoinni. <sup>16</sup> Ascano pushurasi ichapacoin ahuun anu Roma ano nocoafono niaifaoan yononi Pablo arusu pushu futsan muran ishataro. Ranushumua fustiton cushusharanon.

*Pablo Roma ano ini*

<sup>17</sup> Ascatan osha rafu non fusti finontan Pablonun ahuun caifaoan aton niaifao cunani aqui funonfo. Aqui ichafoan ato yoini.

—Uhuun yoramishtichin, ua nicasharacahuun un mato yoisharanon. Uncai nocon caifo Israelifo chaca huamisima. Nocon shunifoan aton fuyamisifori un chaca huayamafiacun ua Jerusalén anoshon achicashon Romanofa ano ua nichinifo. <sup>18</sup> Nanfoan ua nicacani ahua chaca huamaran, ishon shinannifo ua nichisharapainifo.

<sup>19</sup> Ascafiaino nocon caifofaoan yoinifo, “Nichiyamacahuun. Onaintimahuu,” ua huafiainfoan copiquiri uhuun caifoqui un tsain chaca huama. Ascatarocon un Romano niaifo patasharifo yoini, “Unfin maton niaifo Cesar ano capaicain uhuunoa cayacafi yoishquin un ahua chaca huama tapinon,” ishon ato yoini. <sup>20</sup> Ascacun un mato cuna matofu tsainshquin. Nocon caifo Israelifoan non Diospan facu nan

nocon Numamisi non manamisi. Unrifi icoinra huamisi. Un icoinra huahuunshon nocon caifo ua Romanofu ano nichini. Ascashon man oiain cuscan ua munushuafoquin, —ishon Pablonun ato yoini.

<sup>21</sup> Nicacashon cumanifo, —Mihuunoa tsoan noco cunu fumama. Jerusalén anoashu funifo tsoancai mihuunoa tsain chaca yoimisima.

<sup>22</sup> Non nicamisi manifoti anofoan Jesús icoinra huafoqui tsain chaca huafo. Ascan min icoinra huai cuscan non tapipairan, —ishon yoinifo.

<sup>23</sup> Ascatan —Non chipo mifu ichanantiroran, —huanifo. Ascano yora ichaparasi Pablo icano funifo nicacani. Funamanri yoitiashon ato yamu huani. Upa Diosin iquinaino ato yoifain Moisés cununi cuscan yafi Diosin ahuun yoishomisi futsafoanri Jesushuunoa cununifo cuscan ato icoinra huamapain. <sup>24</sup> Nicacatan atirifiton icoinra huaino atirifoan icoinra huanifoma. <sup>25</sup> Tsoancai nannorisi shinannifoma. Ato yoiai cuscan fochismanantannifo. Amaquinoashu foataifoma Pablonun ahuun tsain unutaquin ato yoini isca huaquin,

—Nocon shuni Isaías nanton inonpacoai yoimisi Diospan Yoshin Sharahuunshon nocon shunifo iconquin yoini isca huaquin,

<sup>26</sup> “Min caifo nan Israelifo ano catahuun ato yoiquin isca huatahuun, ‘Man nicafafaiquaicai man tapinacama. Ahuara sharafo man oinfaquicai maton nomuran man nanucoiantaima.’ <sup>27</sup> Aton ointi mutocoianfo. Iconcain nicafaiquaicai nicacoianfoma. Oinfaquicai tapipaicanima. Iconcain oinfain iconcainri nicaifoan un ato chaca soashocuana ufu nipanonfo,”

ishon Diosin Isaíasihuunshon nocon caifo yoini. <sup>28</sup> Ascaino marifi Upa Diosin noco numapayai cuscan man nicapayamaino un caifo futsafo ahuun tsain yoicain. Afoanfin nicacainquin, —ishon Pablonun ahuun caifo yoini. <sup>29</sup> Yoitan amaquinoashu focanashu fasi fochishmanantannifo.

<sup>30</sup> Ascatan Pablo nanno fari rafu iyoni. Pushu ifo pui inanni a muran iishquin. Ascatan tsoa ahuun pushu ano fuafoan ato iquimani yoisharashquin. <sup>31</sup> Upa Diosin iquina cuscan huafain nocon Ifo Jesucristohuunoa ranotama ato yosini. Tsoancai ahuun tsain shatumanima. Nanti.

## Pablonun Roma Anoafu Cunu Fomani

*Jesús icoinra huafo Roma anoafu Pablonun cunu fomani*

<sup>1-3</sup> Uhuun yoramishtichin, Roma anoafuan un mato cunu fomai man tapinon. Unquian Pablo unfin Jesucristo ahuun oinmatiquin. Ua catonni un afu rafumisi un inon. Upa Diosin ua nichini ahuun tsain shara Furunhuunoa un yoinon. Jesús David ahuun funa ini. Caiantaima Diospan tsain shara inonpacoai cuscan ahuunoa cunushonifo.

<sup>4</sup> Ahuunoa cununi cuscan Diospan Yoshin Sharapan ahuun curushhuunshon nocon Ifo Jesucristo maiya anoa funimani. Funimashon noco tapimani nan Diospan Furun Shara nocon Ifoan ahuamamishti huatiro. <sup>5</sup> Non ahua shara huahuunshocai Upa Diosin noco catonima. Ahuun Furunhuunoaashu nocohuun ramapaiquin noco catonni afu rafumisi inon. Noco nichini nocon caifomari non ahuun tsain yoinon ahuun Furun Cristo icoinra huanonfo. <sup>6-7</sup> Upa Diosin manifoti icoinra huamapai. Mato Roma anoafori noiquin mato catonni maton chaca man shatunon Furun Jesucristo ahuun yorafo man inon. Upa Diosin nocohuun ramapaiquin nocon ointi shinansharacoinon. Furun futan Apamain mato asca huashopainon.

*Pablon Roma ano oinmitsai capaini*

<sup>8</sup> Tau huaquin un mato yoisharapai. Man Jesucristo icoinra huacun manifotiton nicamisifo. Ascacun un mato shinanquin un Jesucristohuunshon —¡Aichoran! Upa Diosin, —ishon un yoimisi. <sup>9-10</sup> Upa Diosin ua yonomapaiyai cuscan un curushcain yonoshomisi ahuun tsain shara Furunhuunoa un ato yoinon. Upa Diosinfin ua oinquin un mato shafatifi cufishofafainaiton. Nan un cufiain cuscamain Upa Diosin mato muran ua nichu huuati ishon un cuffafaini. <sup>11-12</sup> Un fasi mato oinpai mato Diosin tsain yoipaiquin. Ahuun Yoshin Sharahuunshon man icoinra huanon man yoinonansharanon Jesús tanasharashquin. Un icoinra huaino marifi man icoinra huainofin non unimanantanantiroquin.

<sup>13</sup> Uhuun yoramishtichin tapicahuun. Uhuun caifomari un ato Jesushuunoa yoimisi tanasharanonfo. Nanscarifi un mato huamapai. Mun catacatamisi ifiacuanano ahua futsa huai un camisima. <sup>14</sup> Jesús ua yonoa ahuunoa manifoti un yoinon. Ua yonoa cuscan ayamai un yoitima itiro. Ascan nantifi un yoipai. Uhuun caifomari yoifain nahuafori yoifain cunu tapiafori yoifain cunu tapiamafori un yoinon. <sup>15</sup> Ascashori un mato tsain shara Jesushuunoa Roma anoafu yoi capaimisi.

*Nan tsain shara Jesushuunshonfin ahuamamishti huatiroquin*

<sup>16</sup> Nan tsain shara Cristohuunoa Upa Diosin ahuun curushhuunshon icoinra huafoti ato numatiro afu nipanonfo. Uhuun caifo Israelifoan nicaquin tauhuanifo. Natiarifi mani futsafoan nicacani Upa Dios fu nipashcaquin. Ascacufin un ranotama manifoti ahuun tsain shara un ato yoicain. <sup>17</sup> Nan tsain sharafohuunoa Upa Diosin noco tapimana ahuscashuun main non isharatiroquin ahuun tsain tanasharashquin. Nan non Jesús Ifo huaquin tau huanitian non Upa ari caitianri nanscasi

huaquin non icoinra huatiro isharacoinshquin. Diospan tsain cununi isca huaquin, —Nan Diosin aton chaca soashonafoanfin icoinra huamisikoquin, —ishon cununi.

*Upa Diosin icoinra huamafo ato onaintimashqui*

<sup>18</sup> Ascaciai atirifo ascarafo. Diosihuunoacai shinanpaicanima. Icoinra huapaicanima. Chacasi shinanmisifo. Chaca fustisi tanapaicaniquin. Diospan tsain iconcoin tapificashon nicacasmamisifo. Nantifi nanscarafosi Upa Diosin atoqui sinacoinquin. Nai muranshon ato onaintimaquin finacoinshquin. <sup>19</sup> Upa Diosin ahuu cuscarainquin tapipaiquifin tapicuanafokin. Upa Diosin ato shafacafi ismani. <sup>20</sup> Nantifi onihuaquin tau huanitian natianri ato shafacafi ismanisi. Mai yafi nai onihuani cuscan nantififain oinmisifo. Diosin ahua-mamishti huatiro oinmisifo. Ascacun, —Uncai tapiama ahuu cuscarain Diosiquin, —itirofoma. Nan tapiamafofin atohuun nuaquin.

<sup>21</sup> Ahuunoa tapificashon yoicasmanifo. —Min nocon Diosin. Min fasi shara. Non mia noi. ¡Aicho! Min noco shara huafafainiran, —ishoncai yoinifoma. Ascacun ahuunoa amaquiri ipaitsi shinannifo. Aton nomuran afanan ahuunoa shafacafi shinantamarocon nisopan shinantiro cuscan shinannifo. <sup>22</sup> —Nonfin fasi tapisharaquin, —ificatan tati-mashunifo.

<sup>23</sup> Nocon Diosincai nanacama. Ifiacashocai isca huaquin yoinifoma, —Upa Diosin, tsoa futsacai mia cuscara shara imisima. Min ahua-mamishti huatiro. Non mia noiran, —ificashon anori yoitama ahua futsafo rami huanifo. Na nocofunufu naashu payocofiafo nan ointsa rami huafain puiyafu rami huafain yoinafu rami huafain rono cuscarafori rami huanifo. —Nanfo nocon Diosiran, —ishon yoipaonifo.

<sup>24</sup> Ascacun Upa Diosin ato potaquin futsani aton nomuran chaca huapaiyai cuscan huanonfo. Afanancai ato numanima. Afi ranan chaca huaa tanannifo futsan namannoa ainfo fucashni huaifoan. Ainfori ascariiaifanno. <sup>25</sup> Upa Diosin tsain icoinra huatama chani fusti caton-nifo. Diosin nantifi onihuani. Nan Diosicai cufitama nan onihuafo cufinifo. Ascatama Diosin shararan ishon yoipacupainonfo.

<sup>26</sup> Ascacufin aton nomuran chaca huapaiyaifoan tapishon Upa Diosin ato potani. Afanan ato numanima. Upa Diosin noco onihua cuscan nocofunufu ainfo ya icaino ainfori nocofunufu ya inonfo. Ascatamarocon ainfo afiranan fuchinanpaicani. Aforanansi iquinannifo. Chaca huatanannifo. <sup>27</sup> Nanscarifiai nocofunufu ainfo tanatama afi ranan iquinanpaicani. Ascashu chaca huantanancatan aton nomuran aton cayari omitsisca huapaonifo.

<sup>28</sup> Ascatari Upa Dios onanpainifoma amaqui inifo. Ascacurifi arifi ato potani aton nomuran afiranan shinanpaiyaifo cuscan chaca huan tananonfo. <sup>29</sup> Chaca fustisi shinanani chaca huan tananonfo aton ahuinma ya icaifanno ainfori ato funumafo yari ipaonifo. Aton namari fipaifain. Fasi chacafo icain mafo noiriamisi icain futsafoqui shinanachacamisifo icain fashimitsamisifo icain rutumitsamisifo icain fochishmanantanancatan sinaisi fuyamisifo icain paramitsafoanfain-misifo icain noimati huamitsamisifo icain yoiti huamitsamisifo icain <sup>30</sup> futsafo yoiti huafain Dios noicasmafain roanmitsamisifo icain cacapaimisifo icain aton nomuran chaca fustisi shinanmisifo icain aton apa yafi ahua nicacasmafain <sup>31</sup> ahua shara shara shinanpaimisifoma icain tsoashtacai ato icoinra huatirofoma icain tsoanshtahuun noiyamacain

chaca huapaimisifo icain rauhuaquin tapiamafo icain tsoanshtahuuncai ramapaimisifoma icain. <sup>32</sup>Upa Diosin ahuun tsain shara yoiquin isca huani, —Futsafoan ascaran chaca huaiton un ato namairan, —ishon. Yoini cuscan man tapificashon aton chaca shatupainifoma. Ascari-fiatan futsafoanri nan acaifo cuscan huaifoan oincaquin, —¡Aichoran! Nanscarocon chaca huatanacahuun, —ato huanifo.

## 2

### *Upa Diosin ato iconquin onaintimai*

<sup>1</sup> Ascano man shinanraca, —Nan cuscara yora fasi chacacoin. Upa Diosinmain ato onaintimapainonran, —ifiaшон marifi man asca huamisiquin. Ascashu, mafiri man yoimui cuscaracoin. Matori onaintimatiro. <sup>2</sup> Nan non ahuara chaca huamisi cuscan nantifi Upa Diosin man tapicoian. Ascan man non tapian nan chaca huamisifo iconcain ato onaintimai.

<sup>3</sup> Mancai Diosin cuscarama. Marifi man nocofunufiaшон man yoiquin isca huamisi, —Nan chaca huamisifomain Upa Diosin ato onaintimapainonran, —ifiaquin marifi man asca huamisi. ¿Ascacun man shinanmun Upa Diosin matori onaintimaimaquin? <sup>4</sup> Upa Diosin matohuun noiquicai mato funa ahuusca huarima. Man chaca huafaiton mato shara huafafaini. Mato funa onaintimaima. ¿Man tapiamamun matohuun ramapaiquin maton chaca shatumapai man tanasharanon? ¿Nanfohuunoamun man shinanpaimacai? ¿Diosiqui man ointi mutoimun?

<sup>5</sup> Upa Diosin mato shara huafiaintocai man shinan futsapaima maton chaca shatushquin. Diosiquiricai man shinanmisima. Man chaca huaa cuscan Upa Diosin ointiaquimaima. Ascan chaca huaquin man unuyamaiton Diosin sinaitian mato onaintimashqui. <sup>6</sup> Upa Diosin nan niyoshon amisifo cuscan atoti inanpacushquin. <sup>7</sup> Nan tsoaran Diosin ato imapaiyai cuscan amisiton futsafo shara huafafaini tsain shara Upa Diosin atohuunoa yoisharaiton nicapaicani. Isca huaquin, —¡Aicho! Un mia yonoa cuscan min amisi. Un miqun unimai. Min ufu ipasharatiroran, —ishon nicapaicani. Afu ipashquin. Nan cuscarafo Upa Diosin aya ato imapacunaca. <sup>8</sup> Ascafiata ratoranfoan afi apaiyai cuscan fusti shinainfoan aton nomuran fucash huamisifo icain Diospan tsain iconcain tanatama ahuara chacafosi tanaifoan. Nan cuscarafoqui Upa Diosin ahuun nomuran sinacoinquin ato onaintimashqui. <sup>9</sup> Nan ratoran futsa Israelifo iyamarai mani futsafoan chaca huamisishaquin fasi aton nomuran omitsiscas finacoinshcaini. <sup>10</sup> Ascacun ratoran futsa sharamisicun Diosin sharan ato yoishquin, —Mian nicamisicun. Un miqun unimairan, —ishon ato yoishquin. Aton nomuran unimacaquin ahua fucash huanonfoma. Israelifo iyamarai mani futsafo isharaifoan Upa Diosin ato shara huaiquin. <sup>11</sup> Ascacun Diospan nantifi noco nanscarafosi oin.

<sup>12-15</sup> Nantifiton chaca huamisicun ato onaintimashqui. Uhuun caifo Israelifoanma atirifiton Upa Diosin tsainquin cununifo cuscan oinyamafiamisishaquin ahuara shara aton nomuran tapiafo. Tapificashon shara huamisifoma. Chaca huafiacatan aton nomuran shinanquin isca huamisifo, —Un chaca huaran, —iyamarai, —Uncai chaca huamaran, —ishon shinancani. Ascacun chaca huaifoan ato onaintimashqui. Ascashu omitsiscapanacafo muran foshcaini. Ascan uhuun caifo Israelifoan Upa Diosin yononi cuscan noco cunushoni cuscan non aya.

Tsoan man tapifiashon chaca huaion nan yononi cuscan huaquin ato onaintimaicain nan omitsiscapanacafo muran foshcani. Diosin tsain cununi cuscan nicafiashucaí ascacoianfoma ato imasharanon. Ascano Diosin yononi cuscaín ato yoishquin, —Min shararan, —ishon ato yoishquin. <sup>16</sup> Nantififain aton nomuran shinanmisifo cuscan Upa Diosin tapicoian. Nan shinanmisifo cuscan fomanfiainfoan nocon Ifoan nantifi ato puashoshquin. Upa Diosin ahuun Furun Jesucristohuunshon ato onaintimashqui. Nannori Diospan tsain sharahuunoa un mato yoi.

*Diosin yononi cuscan Moisés Israelifo tapimani*

<sup>17</sup> Uhuun yoramishtichin, Upa Diosin yononi cuscan noco cunushopaoni. Nan noco cunushonicun man shinanraca, —Upa Diosin non Israelifo noco fusti catonni futsafocai catonnima. Non fustifin ahuun yoraquin, —ishon man shinanmisiquin. <sup>18</sup> Mato amapaiyai cuscan man man tapia. Tapimamisifoan ahuun tsain mato tapimana. Ascan ahuara shara nicashon, —Iconran, —ishon man yoimisi.

<sup>19</sup> Man yoiquiri isca huaquin, —Nocon caifoma fuscho cuscarafoma. Ahuuscashomain Diosin tsain tanasharatiroquin tapiafoma. Nonfin ato tapimatiroquin. Faquish muran ica shinantsa aafoma. Nonfin chashamati cuscara ato chashashotiroquin Dioshuunoa tapinonfo. <sup>20</sup> Upa Diosin noco yononi cuscan iconcain. Ahuun tsainhuunshon non tapicoian. Ascacun tsoa futsacai tapiataima aton chaca shatushcaquin non aton facufo ya tapimatiroan, —ishon man shinanmisi.

<sup>21</sup> Man futsafo tapimamisi ¿Ahuuscain mafiri man tapimamuiamanmun? Futsafo man yosimisi, —Ahua onuyamacahuun, —man huamisi. ¿Marifimun man onumisima? <sup>22</sup> —Maton ahuinma fu iyamacahuun. Maton funuma furi iyamacahuun, —man ato huamisi. ¿Ascafiashu marifi maton ahuinma fu man icamun? —Ascan Diosicoínma cufiyamacahuun. Dios fusti noicoíncahuun, —man ato huamisi. ¿Manmun Upa Dios fusti tanacoincaí? <sup>23-24</sup> —Upa Diosin noco yononi cuscan man non tapicoian, —nan cacapaimisi cuscara man tsainfafaini. Man futsafo yoifiatacai marifi Diosin yononi cuscan man aima. Ascan matohuunshon nocon caifomafoan yoiquin isca huamisifo, —Diosin ahuun yorafocai isharafo. Ascan arificai sharamaran, —ishon yoimisifo. Ascan matohuunshon Dios chaca huafo. Nannorifi Diospan tsainquin cununi.

<sup>25</sup> Upa Diosin noco yononi cuscan non aafin nan Israeli sharafo cuscara noco imatiroquin. Ascafia noco yononi cuscan ayamashu nan yora chaca cuscarafoma non itiro. <sup>26</sup> Yora futsafo Diosin yononi cuscan amiscun Upa Diosin noco shara huashopaiyai cuscan atorifi shara huashotiro. Noco inanpaiyai cuscaí atorí inanshquin. <sup>27</sup> Nanfo Israelifomafishon Diosin tsain nicasharacoíncani. Manfin Israelifoquin. Diosin mato yononi cuscan tapicoínfashu man yoitimamisi. Ascan nanfo isharafoainocai man isharamisima.

<sup>28</sup> Diospan yoracoínin ahuun tsain tanasharatiro. Nanfofin Israeli-coínfoquin. Futsafo Israelicoínfo cainfianishaquin Diosin yononi cuscaín acanima. Afocai Diospan yoracoínfoma. Ascafiashucaí Israelicoínma. Nocon fuyamisi cuscara furonanfacu rama caian non foshqui rupa shatumisi. Ascan tapitirofo nanfo Israelicoín. Ascafia noco yononi cuscan non ato foshqui rupa shatufiacai ahuun tsain icoinra huafo macai

Diospan yora itirofoma. <sup>29</sup> Diospan Yoshin Sharahuunoashu nocon no-muran fiananantiro non Diosiquiri shinansharanon. Ascashu Diospan yoracoin iishquin. Non ascaino yorafoan nocohuunoa yoisharayamafi-aino Upa Diosin nocohuunoa yoisharashquin.

### 3

<sup>1</sup> Ascan nonfin Israeliri cainniquin. Ascan non ahuaraya cuscacai futsafo ayama. ¿Non amisi cuscan nocon facufo non aton foshqui rupa shatuainomun shara itiro? Ainfain. <sup>2</sup> Uhuun yoramishtichin, shinan-capon. Upa Diosin manifoti yoipaiyai cuscan nocon caifo yoiqui tau huani. Noco tapimani cuscari non mani futsafori tapimanon.

<sup>3</sup> Icon, atirifi nocon caifocai Upa Diosin yononi cuscacoin acan-ima. ¿Icoinra huayamafishon Upa Diosin noco yoini cuscamun noco ashoimacai? <sup>4</sup> Ma. Ascapacunacama. Nantifi yorafoan noco paratirofi-ancai Upa Diosin noco parapacunacama. Nanfin iconcoin fustiquin. David cunuquin isca huani,

“Yorafoan Upa Diosin tsain icoinra huayamafishon ahuun tsain cayacafi iconcoin manifoti ato tapimashcaniran,”

ishon cununi.

<sup>5</sup> Futsan shinanquiraca, —Upa Dios fustifin sharaquin. Noncai as-caranma. Ascan non chaca huaiton futsafoan noco oinquin Upa Dios noco cuscarama aafin sharacoinquin. Ascan tapitirofo Upa Dios mi-macai sharacoincun. Nocon chacahuunshon futsan tapitiro Dios shara-coincun. Diosincai iconquin noco onaintimatiromaran, —ishon anori shinantirofoquin. <sup>6</sup> ¡Ohua! Fasi amaquiri shinancani. Upa Diosicai non chaca huaa cuscan ointiaquimatiroma. Non chaca huafiaiton Upa Diosin noco onaintimayamaitocai ahuuscashon non tapitiroma afanan asca huashquima. Diosin chacafo onaitimayamaino ahuuscashomain yorafoti yoitiroquin afu ipayamarain omitsiscapanacafo muran focani-cai.

<sup>7</sup> Ascan futsafoanraca shinancani, —Un chani yoimisicun futsafoan tapitirofo Upa Diosin iconcoin fusti yoimisi. “Upa Diosin sharacoin-ran,” ishon yoishcani. Ascan uhuun chanihuunshon futsafoan mima huaquin Dioshuunoa shinansharashcani ¿Ascan ahuuscain, “Min chaca huamisicun un mia onaintimairan,” ua Diosin huatiromun? —Nannori man shinanraca. <sup>8</sup> Nan cuscara yorafoan fasi amaquiri chaca shi-nanpaicani. Isca huaqui yoipai, —Non chaca huanoncahuun. Ascan Dioshuunoa shinansharatirofoquin, —ishon yoipaicani. —Pablonunri anori yoimisiran, —ishon yoicani. Chanimisifo. Uncai anori yoimisima. Upa Diosin iconquin na cuscarafu onaintimashqui.

#### *Tsoa futsacai non isharamisima*

<sup>9</sup> ¿Ascan yora futsafo chacafiaino noncai ato cuscaramamun? ¿Norus fustimun non shara? Ma. Anorima. Un mato tapima cuscan nantifi yorafocai nocon caifomafoan norifi non Israelifoanri man non chaca huamisi. <sup>10</sup> Nunorifi Diosin tsain cunuquin isca huaniquin,

“Diosin noco yononi cuscacai tsoashta amisima. <sup>11</sup> Diosin noco yononi cuscan tsoancai tapicoimisima. Mancai Upa Dios onanpaicoimma noco yononi cuscan tapishquin. <sup>12</sup> Manifoti anofoan Upa Dios cachiquiri huaafo ato isharamapaiyai cuscan atamarocon chacacoin tapiafo. Tsoacai shara



tapimisima. Tsoa fusticai isharamisima. <sup>13</sup> Yora naacur mai huashon non fupuaino pisin tohuutiro cuscan nanscarifai aton ashfan muranshon tsain fasi chacacoin yoimisifo. Nan rono paupaton noco nasa non mutiro cuscan aton tsainmanri noco omitsiscamatiro. <sup>14</sup> Roanmitsamisifo icain tsain isininpaton yoimisifo. <sup>15</sup> Samamashta yora rututirofo. <sup>16</sup> Nan cahuancacainaitishon yora chaca huafoanfafainmisi ato omitsisca huafoanfafainmisi. <sup>17</sup> Diosin nocon ointi shinansharamapaiyai cuscacai afoan mumisima. <sup>18</sup> Dioshuunoa shinanmisifoma. ‘Aacai ahuamaran,’ ishon shinanmisifo. Aquicai ratucanima,”

ishon Diosin tsain inonpacoai cuscan yoimisifoan cununi.

<sup>19</sup> Man non tapia Upa Diosin yononi cuscan Moisés noco cunushoni. Noco yononi non chaca huanonma. Noco yononi cuscacai non amisima. Ascan tsoancai yoitiro ma isca huaquin, —Diosin yononi cuscan un amisiran, —ishoncai yoitiro ma. Iconquin nantifi noco onaintimatiro. <sup>20</sup> Ascacucacai Upa Diosin tsohuunoa yoitiro ma isca huaquin, —Un mato yononi cuscan man amisi. Man ahua chaca huamisisaran, —noco huatiroma. Diosin noco yononi cuscan man non tapicoinfashon nanhuunshon non shinantiro, —¡Ohua! Upa Diosin yononi cuscacoincai un amisima. Urifi un chaca huamisiran, —ishon non shinantiro.

*Jesús icoinra huaashu non Dios fu ipatiro*

<sup>21-22</sup> Upa Diosin noco yononi cuscan Moisés noco cunushoni. Noco cunushoni cuscan non apaifai non itiro ma Diospan yora iishquin. Ascacia ahuuscashomain nocon chaca noco soashotiroquin a cuscara shara non inon Upa Diosin natian noco tapimana. Nannori Moisés yafi Diospan tsain yoimisi futsafoanri cununifo. Ratoranfo nocon caifo Israelifo iyamarai nocon caifoma non Jesucristo icoinra huacun nocon chaca noco soashotiro a cuscara noco imasharashquin. <sup>23</sup> Manifoti anofoan nantiffain man non chaca huamisi. Upa Diosin noco imapaiyai cuscacai tsoa acoinmisima.

<sup>24</sup> Ascaciafocun Jesucristo noco nashoni nocon chaca soashoshquin. Non icoinra huacun afanan chaca nocon ifo itama Jesucristo acoin nocon Ifo inon. Non ahua shara huahuunshoncai noco numanima. Ahuun Furunhuunshon nocohuun noiquin noco numani.

<sup>25</sup> Ahua chacacai Upa Dios fu itiro ma. Ascan Furun nichini nococairocon onaintimatama Furun onaintimani nocohuunooashu nashon nocon chaca soashonon. Ascan ahuun imi foyanan noco nashoni non icoinra huaiton Upa Diosin noco onaintimaima. Ascan Furunmun noco nashoantaima iyopaonifoanri chaca huapaonifo cuscan. Tapiyonifo chipo Furun atohuunooashuri nashquiai. Ascana icoinra huafoan aton chaca iconquin Furunhuunshon soashotiro afori afu ipanonfo. <sup>26</sup> Natianri Diosin ato ismapai chaca huafiamisishaquin Jesús icoinra huacun ahuun yorafo ato imatiro. Man raca shinain, —¿Ahuuscain chaca huamisifo ato onaintimama Upa Dios fu ipatirofocun? —ishonraca shinancaniquin. Anorimafinquin. Furunmun ato nashoni aton chaca soashoshquin. Ascan nan icoinra huacatan Upa Dios fu ipatirofo. Iconquin ahuun yorafo ato imatiro.

<sup>27-28</sup> Non ahua shara huahuunshoncai nocon chaca noco soashonima. ¿Ascan tsoancai yoitiro ma isca huaquin? —Upa Diosin noco yononi cuscan un nantifi amisi. Ascacufin un afu ipatiroquin, —ishon tsoancai

anori yoitiro. Ascarafo shinainno cacapaimisi itiro. Upa Diosin noco yononi cuscan non nicamisihuunshocai noco numanima. Furun icoinra huaiton noco numatiro. Nannori non mato yoimisi. <sup>29</sup> ¿Upa Dios nocon caifo Israelifoan nocon Dios fustimun? Ma. Caifo futsanfoanri aton Diosiri.

<sup>30</sup> Upa Diosin noco nanscarasi huai. Nocon caifo yafi nocon caifomari Jesús icoinra huaiton nocon chaca noco soashotiro afanan noco chacahuunoa shinanonma. <sup>31</sup> ¿Ascano non Jesús icoinra huacun Diosin Moisésihuunshon noco yononi cuscan non yopaimamun cununi cuscan aquin? Ascata ma non Jesús icoinra huaiton Upa Diosin noco yononi cuscan non atiro. Jesushuunshon fusti non atiro.

## 4

### *Abrahamhuunoa Pablo noco ahuara futsa tapimani*

<sup>1-2</sup> Ascatan natian un nocon shuni Abrahamhuunoa mato yoi. ¿Diosin yononi cuscan aimun ahuun chaca soashoni sharacoin inon? Ma. Anorima. Abraham asca huaiton yoicuana, —Unfin Diosin yononi cuscan un amisiquin, —ishon yoicuana. Ascafiashu nanoricai yoimisima. Upa Diosin ahuun ointaificai ascatiroma. <sup>3</sup> Ahuunoa Diospan tsain cununi isca huaquin, —Abraham Upa Dios icoinra huamisi. Ascaino Upa Diosin ahuun chaca soashona a cuscara isharonon, —ishon cununi.

<sup>4-5</sup> Non yonoaino ifoan noco cashman inainma. Noco nifishon noco inantiro. Nanscarifai non ahuara shara huatiroma Upa Diosin noco nifinon nocon chaca noco soashonon non afu ipanon. Nonfin chaca huamisifoquin. Ascafiashon non Jesús icoinra huacun Upa Diosin noco yoishquin, —Un maton chaca soashona. Man uhuun facuhuunoaashu isharonon, —ishon noco yoishquin. <sup>6</sup> Nannori nocon shuni David yoini. Noncai ahua shara huatiroma Upa Diosin noco unimamanon. Afin noco yoitiro, —Un min chaca mia soashona. Ascan min ua cuscara shara iquiran, —ishon noco yoiaino non unimatiro. <sup>7</sup> David isca huaquin yoini,

“Tsoan ahuun chacafo Upan Diosin rau huua afanan afohuunoa shinanyamaino fasi unimatiro. <sup>8</sup> ¡Aicho! Upa Diosin isca huaquin yoishquin, ‘Min chaca huua cuscan un afohuunoa afanan shinanpacunacama. Natian min chaca huamisima cuscara min itiroran,’ ishon yoiaino fasi unimacointiro,”

ishon David yoini.

<sup>9</sup> ¿Upa Diosin Israelifo fusti unimamatiromun? Ma. Israelirifomari aton chaca soashotiro a cuscara shara imashquin. Abraham Diosin icoinra huacun ahuun chaca soashona a cuscara shara imashquin. Nannori non mato yoimisi. <sup>10</sup> Foshqui rupa shatuataima ahuun chaca soashoni a cuscara shara imashquin. <sup>11</sup> Abraham foshqui rupa shatuataima Upa Dios icoinra huaqui tau huani. Ascacun ahuun chaca soashoni a cuscara shara inon.

Ascaino chipo fari ranan finoanno Upa Diosin Abraham yononi, —Min non min yoraforti foshqui rupa shatucahuun. Nan foshqui rupa shatushonfin min shinantiro isca huaquin, “Icon Upa Dios un icoinra huacun uhuun chaca ua soashona ua shara huapanaca Upan Diosin ua yoiyoniran,” —ishon Diosin Abraham shinanmani. Ascacufin tsoafo foshqui rupa shatuataima Dios icoinra huashu Abraham ahuun ua cuscara itiro. Afin foshqui rupa shatuataima Upa Dios icoinra huaqui tau

huani. Ascacun ahuun chaca soashoni a cuscara shara inon. <sup>12</sup> Foshqui rupa shatuafori Abraham cuscara itirofoquin. Aafin foshqui rupa shatuaatama Dios icoinra huaniquin. Afoanri arifi Jesús icoinra huacanashu Diospan yora itirofoquin. Ascan Abraham aton upa cuscarari itiro.

*Abraham Diosin yoiyoni cuscan icoinra huashon ahuunofini*

<sup>13</sup> Upa Diosin Abraham yoini isca huaquin, —Min non min funafori nan maitio un mato inannon matonna inon, —ishon yoiyoni. Upa Diosin icoinra huacun aton chaca soashona a cuscara shara inonfo. Ascacufin ato yoiyoni cuscan ato inanshquin. <sup>14</sup> Futsafoan icoinra huayamafishon shinanquin isca huaa, —Diosin yononi cuscan un aiton uqui unimatiro noco inanpaiyai cuscan ua inanshquiran, —ishon shinantirofo. Nanfo Diosin yoiyotiani cuscan fiaino non ipaitsi icoinra huaa. <sup>15</sup> Ascafiacai anorima. Diosin noco yonoyamaino tsoacai yoitima icuana-mafinquin. Ascafia noco yononi cuscan apaifaicai tsoa ascamisima. Diosin chacafoqui sinai yoitimamisifo onaintimashqui.

<sup>16</sup> Ascan non ahuara shara huaacuai Upa Diosin noco yoiyotiani cuscan noco inainma. Non icoinra huaiton noco cashman inanshquin. Ascan nan Israelifo yononi cuscan tanaifo iyamarai nan tanaifoanmari Upa Dios icoinra huacanashu ahuun yorafo itirofo. Ato yoiyotiani cuscan cashman inanon. Abraham icoinra huani cuscan afoanri icoinra huashu ahuun funafo cuscara itirofo. <sup>17</sup> Nannori Diosin tsain cunushoni isca huaquin, —Manifoti min aton upa cuscara. Un mia imashquinran, —ishon Upa Diosin Abraham yoiyoni. Abraham tau huaquin Upa Dios icoinra huani. Ascan norifi non chipo icoinra huaashu nocon upa cuscara itiroquin. Upa Diosin noco oin non Abraham ahuun facufo cuscaracun. Diosin yora nacun funimatiro ninon. Icataima rufoto Upa Diosin yoiqui tau huani.

<sup>18</sup> Ascano Abraham anifoshta afanan facu atiromafishon Dios icoinra huaacun. —Min chipo facu yashquin. Min funafori ichaparasi cainshquiran, —ishon Upa Diosin yoiyoni cuscan icoinra huani. Ascan yora ichapafoan aton upa cuscara ica. <sup>19</sup> Tapini anifoshtacoin cien fari aqui caa. Ahuin Sararifi noventa fari aqui caa afananricai facu nanutiroma. Ascan man tapifishon Diosin yoiyoni cuscan icoinra huani. Icoinra huaa cuscacai afanan amaqui ipainima.

<sup>20-21</sup> —Un anifocoinno uhuun ahuinri yoshafoflashon Upa Diosin ua yoiyoni cuscan ua facu inantiroran, —ishon shinanni. Mimacaiquin icoinra huani. —¡Aicho! Upa Diosin, mian yoiyoni cuscan mian inanshquin. Min curushhuunshon mian yoiyoni cuscan mian ashotiroran, —ishon yoini. <sup>22</sup> Icoinra huaiton Upa Diosin ahuun chaca soashoni a cuscara shara inon. <sup>23-24</sup> Upa Diosin tsain yoini isca huaquin, —Abraham Upa Dios icoinra huani. Icoinra huahuunshon ahuun chaca soashoniran, —ishon cununi. Abraham fustihuunshocai cununima. Norifi nan icoinra huafoti noco cunushoni. Nocon Ifo Jesús naacoinfiacun Upa Diosin funimani nipanon. Nan non icoinra huaiton nocon chacari noco soashonon a cuscara shara non inon.

<sup>25</sup> Nocon Ifo Jesús namani nocon chaca noco soashonon. Nantori funimani Upa Diosin noco rau huanon a cuscara shara non iishquin.

## 5

*Tsoan nocoqui patatiroma*

<sup>1</sup> Upa Diosin nocon Ifon Jesucristohuunshon noco rau huaa noco-maquí afanan iguima no fu ipashquin. Ascano nan icoinra huashu non afu isharapacutiro. <sup>2</sup> Non icoinra huacun Upa Diosin noco noiaino non afu shafatifi rafutiro. Ascano unimacoinquin non tapitiro noco imapaiyai cuscan shara non atiro.

<sup>3</sup> Ascatari non Jesushuunoashu omitsiscafaquin non shinancha-caquima Jesús tununi cuscan non tunuointiro. Ascatan non unimatiro. <sup>4</sup> Non tunuaino Upa Diosin nocoqui unimatiro non Jesús cuscara isharashquin. Non isharaquin non tapitiro non chipo afu ipasharashquin. <sup>5</sup> Upa Diosin ahuun Yoshin Shara nocoqui nichini. Ahuunshon non tapitiro noco fasi noicoin. Nan tapishocai non shinanchacatiroma. Noncai iscatiroma, —¡Ohuashta! Un ipaitsi Jesushuunoashu un omitsisca. Ua yoiyoni cuscan ua ashoshquimaran, —ishoncai non anori shinantiroma.

<sup>6</sup> Shinancapon. Noncai ahuuscashon nocon chaca soatiroma Upa Dios cuscara isharashquin. Non ascara chaca icaino nantianri Cristo oni noco nashoshquin. <sup>7</sup> Non isharafiatiro tsoan noco nashotiro. Itsairaca yora sharahuunoashu fustirasi noco nashotiro. <sup>8</sup> Ascafiacun non Diosquiri chaca huafainton nantianri Cristo noco huunoashu nani. Ascano Upa Diosin noco ismani fasi noco huun noicoinquin.

<sup>9</sup> Ahuun imi foyanan Criston noco nashoni Upa Diosin noco rau huanon a cuscara shara non inon. Ascacun icoinra huamafoqui Upa Diosin sinaquin ato onaintimaitian noco mimacai huaquin numashqui non omitsiscapanacafo muran canonma. <sup>10</sup> Non Upa Dios noicasmay-opaonitian Furunmun noco nashoni noco numano non afu ipanon. Natian Jesús niahuunshon mima huaquin noco numanon Upa Dios fu non ipasharanon. <sup>11</sup> Ascano natian nocon Ifo Jesucristo noco Apa Dios ya imapacushquin non ahuunoashu unimacoinon.

### *Adán yafi Cristo*

<sup>12</sup> Ascatan tapicahuun. Adán chaca huaqui tau huani. Chacahuunoashu nani. Ascacufin ahuunshon nantifi manifotifain chaca huamisifoquin. Ascano nantifi nai futsushquin. <sup>13</sup> Moisés huunshon Upa Diosin yorafo yonoataima nantifi manifoti anofoan chaca huapaonifo. Moisés yononi cuscan tapishoma Diosin nanfohuunshoncai ato onainti-manima nannonfo. <sup>14</sup> Ascafiacun Adán niyopaonitian non Moisésianri yorafoti nai futsunifo. Upa Diosin Adán yonofia nicayosmani chaca huani. Adán Dios chaca huani cuscan futsafoan huayamafiacanashu nai futsunifo. Adán onihuaquin tau huani. Chipo Cristo arifi mai ano oni Adán cuscara nocofunu ishquin. Ascafiashucaí Adán cuscaracoima.

<sup>15</sup> Nan nocofunun Adán ahuun chacahuunoashu nantifi yorafo nai futsucani. Ascan nan nocofunun Jesucristo fusticai ascanima. Ahuunshon yorafohuun ramapaiquin Upa Diosin ato rau huatiro aton chaca soashquin. <sup>16</sup> Adán chaca huaahuunshon Upa Diosin nantifi namaqui futsai. Ascafia Cristohuunshon aton chaca soashotiro natamarocon afu isharapacunonfo. <sup>17</sup> Adán ahuun chaca fusti huunoashu nantifi namisifono mimacaiquin Jesucristo fusti huunshon Upa Diosin noco rau huatiro. Noco rauhuano non afu ipasharanon a cuscara shara iishquin.

<sup>18</sup> Ascano Adán chaca huanihuunoashu fusti nantifi namisifo. Nanscarifiai Jesús ahuun sharahuunoashu fusti nantifi aton chaca soashotiro ato omitsisca huatarocon ato nimapacunon. <sup>19</sup> Nan nocofunun Adán Diosin nicacasmaquin tau huanino ahuunshon

chaca huapamisifo. Nanscarifiai nan nocofunun Jesucristo fusti Apan yoini cuscaín. Ascano Apa nicacoinshon ahuunshon yora ichapa imasharatiro Apa fu ipanonfo.

<sup>20</sup> Upa Diosin yorafo yonopaiyai cuscan Moisés cunushoni a chaca huamisifo cuscan tapinonfo. Nanhuunshon non tapitiro non fasi chaca huamisi. Mimacaiquin non tapitiro Upa Diosin nocohuun ramapaiquin noco rau huatiro nocon chaca soashoshquin. <sup>21</sup> Ipaoni chaca fustisi yorafoan aton ifo icaino ato namaquin futsani. Ascafiashu natian Upa Diosin nocohuun ramapaiyaino nocon Ifo itiro. Nocon Ifo Jesucristo-huunshon nocon chaca noco soashotiro a cuscara shara non inon afu ipashquin.

## 6

*Non Cristo fu nani cuscaracoin afanan chaca nocon ifo inonma Cristo nishon nocori nimapacunon*

<sup>1</sup> Ascan atirifoanraça shinanquin isca huacaniquin, —Non chaca huafafainfiainoraca Upa Diosin nocohuun ramapaiquin. Nocon chaca noco soashonaran, —ishon amaquiri shinanmisifo. <sup>2</sup> ¡Ai timafin! Ascayamapacushapainonran. Jesús noco nashoni nocon chaca afanan nocon ifo inonma. Yoran nashocai afanan futsa nicatiroma a furicai afanan rafutiroma. Futsan ahuun iforicai itiro. Nanscarifiai non Jesús fu naa cuscaracoin chaca afanan nocon ifo inonma. <sup>3</sup> ¿Man tapiamamun man nonfin unu muran iquimamuaquin Jesucristo ahuun yorashon ato oinmashquin? Ascacun Jesús noco nashoni nocon chaca soashoshquin. Norifi afu naa cuscaracoinshon non afanan chaca huanonma. <sup>4</sup> Ascano Jesús maini cuscan norifi non chaca huapaoni afu nani cuscaracoin. Ascashon Upa Diosin ahuun curushhuunshon Furun funimani afu ipasharanon. Nanscarifi aqui nocorifi funini cuscaracoin non afu ipasharanon non chaca huapaoni cuscan afanan non anonma.

<sup>5</sup> Naino non ahuun yoracoin ini afu yora fusti cuscara iishquin. Nacun afincoin funimani isharapacunon. Norifi ahuun yoracoianshu a cuscara funa shara non itiro. <sup>6</sup> Jesús mastaifono norifi afu masta cuscaracoin. Non chaca huapaoni cuscan cuyonon. Non Jesús ifoatama chaca nocon ifo ipaoni. Non afu masta cuscaracoin afanan chaca nocon ifo inonma. <sup>7</sup> Shinacapon. Tsoan nashocai afanan chaca huapaitiroma. Marifi Jesús fu naa cuscaracoinshocai man afanan chaca huapaishquima. Afanan chacapan mato yonotiroma mato chaca huamapaiyai cuscan anonma.

<sup>8</sup> Non Cristo fu naa cuscaracoinshon non iconra huashu non afu ipasharatiro. Nanri non iconra huai. <sup>9</sup> Man non tapia iconcoin Cristo funimani afanan nanonma. Ahuashatocai afanan Cristo namatiroma. Ahuun ifo itiro. Afanan namanonma. <sup>10</sup> Nai fustinishaquin nocon chaca noco soashoni afanan chaca nocon ifo inonma. Ascano natian Apa Dios fu isharapacunaca.

<sup>11</sup> Nanscarifi aquin natian man shinantiro isca huaquin, —Un chaca ipaoni cuscan man cuyoa. Afanan ua ahusca huatiroma. Natian un Jesucristohuunoashu Upa Dios fu rafucacaini ua amapaiyai cuscan aashquin, —ishon anori shinacahuun.

<sup>12</sup> Ascacufin afanan chaca maton ifo imayamacahuun mato chaca huamapaiyai cuscan ayamacahuun <sup>13</sup> Isca huaquin shinacahuun, —Yoshin chacan, mian chaca huamapaiyai cuscacai mian amatiroma. Uhuun cayacai minama mian chaca huamapanan, —ishon yoicahuun.

Man chaca ipaoni cuscan man naa cuscaracoin. Ascafiashu natian man funa cuscaracoin Upa Dios fu ipashquin. Ascano Upa Dios yoicahuun isca huaquin, —Upa Diosin, unfin minaquin. Mian shara huamapaiyai cuscan ua huamahuu. Uhuun caya non uhuun nomuranri mina mian amapaiyai cuscan ua huamahuu, —ishon yoicahuun. <sup>14</sup> Moisés yononi cuscacai non atiroma Upa Dios fu ipashquin. Nocon ifocai itiroma non nipanon. Ascatama Upa Diosin matohuun ramapaiquin arusu mato numatiro mato ifo iishquin. Ascano chaca afanan mato ifo itiroma.

*Upa Diosin mato shara huamapaiyai cuscan man ahuun oinmati inon*

<sup>15</sup> Moisés yononi cuscacai non atiroma noco imasharanon Upa Dios fu ipashquin. Ascan Diosin nocohuun ramapaiquin noco imashara. Nan fusti nocon ifo itiro noco numanon. ¿Ascanocai non chaca huafafaintiromun Diosin nocohuun ramapainon noco chaca soashonon? Ascayamapacupainon. <sup>16</sup> Man tapian mafi man catontiro ratofomain mato ifoquin. Upa Dios man nicacointiro ahuun oinmati ishquin iyamarai chaca catontiro ahuun oinmati ishquin. Chaca catoanshu man omitsiscapashquin. Ascan man Upa Dios nicacoianshu man afu isharapacunaca. <sup>17</sup> Man chaca catonpaoni ahuun oinmatifashon natian Upa Diosin mato yoimisi cuscan maton nomuran man nicacoian. ¡Aicho! Upa Diosin mato imasharamisi. <sup>18</sup> Ascanocai chaca afanan maton ifo itiroma mato yonoshquin. Natian ahua shara fusti maton ifo itiro. Manfin ahuun oinmatifoquin.

<sup>19</sup> Man oinmati yafi ifohuunoa man tapicoian. Ascan atohuunoa un mato yoipaiyai cuscan un mato yoi man shafacafi tapinon. Chaca futsa futsatapafo man huapaoni. Ascacun chaca mato ifo ipaoni. —Ua chaca huamapaiyai cuscan un aashquin. Fasi finacaiari un chaca huairan, —ishon man shinanpaoni. Afanan asca huayamacahuun. Natian Upa Diosin yoicahuun man ahuun oinmatifo. Afanan chaca huatama ahua shara fusti ahuun oinmati man itiro.

<sup>20</sup> Ipaoni chaca maton ifo icaino mancai ahua shara shinanpaonima maton ifo inon. <sup>21</sup> ¿Man ipaoni cuscan sharamun? ¿Mato imasharamun? Ma. Ipaoni cuscacai afanan afohuunoa man shinanpaima. Afohuunoa man shinainno man rafitiro. Nan chacafo shatuyamaino man naitian man omitsiscapanacafo muran man catiro. <sup>22</sup> Ascafia natiancai chaca afanan maton ifoma Upa Diosin maton ifo. Manfin ahuun oinmatifoquin. Man ahuun oinmatifocun mato shara huafafaini a cuscara shara man inon man afu ipanon. <sup>23</sup> Tsoa chaca ahuun ifono ahuunshon ato omitsiscapanacafo muran potashquin. Ascafia nocon Ifo Jesucristohuunshon Upa Diosin noco cashman numano non afu ipanon.

## 7

*Nocofunu fu ainfo fiananfohuunoa cuscara ahua futsan ato tapimani*

<sup>1</sup> Uhuun yoramishtichin, un mato yoipaiyai cuscan man man tapicoian. Moisés noco yononi cuscan man man tapia. Non niyoano noco yonotiro. Non nano noco afanan yonotiroma. <sup>2</sup> Iscara un mato tapimapai. Ainfo funun fianocai nocon caifoan yononi cuscan funu niyoano unutiroma. Ascacun funu nanocai afanan tsoan afanan yonotiroma. <sup>3</sup> Funu nano futsan fitiro. Asca huaquicai chaca huatiroma. Ascafia funu niyoanocai futsa fu fianantiroma. Futsan fiaino furoma chaca itiro. Nannori nocon caifoan yononi.

<sup>4</sup> Uhuun yoramishtichin, nanscarifi aquin Moisés yononi cuscan maton funu cuscara nan maton ifo ipaoni. Ascafia Jesús mastanifotian marifi man afu naa cuscaracoin. Naashu afanan Moisés yononi cuscan maton funu cuscara itiroma. Cristo naafiashu funini cuscan marifi afu funini cuscaracoin funa cuscara iishquin. Natianfin man Cristonaquin maton ifo inon a cuscara shara ishcaquin. <sup>5</sup> Jesús man Ifo huataima chaca maton ifon ipaoni. Moisés mato yonopaiyai cuscan atama yoitimacoinshon man fasi chaca huapaoni. Nan chacafohuunoashu non natiro omitsispacunacafo muran noco imatiro. <sup>6</sup> Non ascafiapaonishaquin non Jesús fu naa cuscaracoin.

Ascanocai Moisés cununi cuscan nocon ifo afanan itiroma. Nococai shinanmatiroma isca huaquin, —Min Moisés cununi cuscan ayamashu min nipatiromaran, —ishoncai noco yonotiroma. Noncai afanan ahuun oinmatima. Natian non Diospan Yoshin Sharahuunoashu non unimacoincain non Upa Dios yonoshotiro.

### *Chacapan ua ifoahuapai*

<sup>7</sup> ¿Ascano Upa Diosin Moisés huunshon yononi cuscan chacamun? Ma. Anorima. Amaquiri shinanyamacahuun. Moisés cununi cuscan un oinyamashon un chaca huamisi un tapicuanama. Uhuun nomuran un chaca fuchipaipaoni cuscan uhuun ointi un noconi. Moisés cununi cuscan un oinyamashon uhuun ointi muran un shinancuanama. <sup>8</sup> Ascafia Moisés cununi cuscan oinfiaquicai un chaca shatutama un finacaipaoni. Fasi finonmafain un chaca noipaoni. Upa Diosin noco yonoyamanicai non yoitima icuanama.

<sup>9</sup> Diosin noco yononi cuscan un tapipaonima un chaca huafiaquicai un mupaonima. Ascafia Diosin noco yononi cuscan un nicacoinshon un ahuunshon tapini unfin chaca huamisiquin. Un tapiniri chaca huamisifo omitsiscapanacafo muran focani. <sup>10</sup> Un shinanpaoni isca huaquin, —¡Ohuashta! Upa Diosin noco yononi cuscaicai un aima. Ua yononi cuscan un aiton ua nimapacucuana. Un ascayamacun ua omitsiscapanacafo muran ua camashquinran, —ishon un shinanpaoni. <sup>11</sup> Chacapan ua parapaoni. —Upa Diosin noco yononi cuscan un airan, —ishon un amaquiri shinanpaonima ascafiacai un apaonima. Ascacun un tapipaoni uhuun chacahuunoashu un nai omitsiscacai. <sup>12</sup> Man non tapia Upa Diosin noco yononi cuscan shafacafi sharacoin.

<sup>13</sup> Sharafiacucai un ascamisima. Ahuunshon ua tapimapaoni non chaca huamisi cuscan fasi chacacoincun. Upa Diosin yononi cuscan sharacoinfacun ahuunshon mun tapini un ascayamashu un omitsiscacaini nai.

<sup>14</sup> Man non tapian Moisés cununi cuscan Diosin ahuun Yoshin Sharapan shinanmani. Nan sharafianocai un sharama. Chaca uhuun ifo. Unfin ahuun oinmatiquin. <sup>15</sup> Ahuscain un iscamisimun uncai tapiama. Un shara huapaiyai cuscaicai un aama. Un asca huapaiyamafiaquin un amisi. <sup>16</sup> Un asca huafiaquin uhuun nomuranshon un shinan, —Upa Diosin Moisés huunshon noco yononi cuscan sharacoinran, —ishon un shinain. Moisés yononi cuscan nannoricoin un shinain. <sup>17</sup> Nannori shinanfiaquicai un chaca huai cuscan un shatutiroma. Uficoin un apaiyamafiaquin chaca uhuun ifono uhuun nomuran ua shinanchacamamisi.

<sup>18</sup> Mun tapia Upa Diosin ufu iyamaino un chacacoin. Diosimaisicai un ahuaa shara shinantiroma. Un sharapaifiaicai un itiroma. <sup>19</sup> Un sharapaiyai cuscan atama un chaca huamisiquin. Un chaca huapaiyamafiaquin un amisi. <sup>20</sup> Ascano un tapitiro ufcicoi un chaca huapaiyamafiaquin chaca uhuun ifon icaino ua yonomisi cuscan un shatutiroma.

<sup>21</sup> Ufi amisi. Un sharapaifiaiton chacapan ua amaquiri shinanmapai un shara shinanonma. Un ascamisi. <sup>22-25</sup> Uhuun nomuran, —¡Aicho! Upa Diosin ua yonoa cuscan shararan, —ishon shinanfiai un nicayosmamisi. Ua yonoa cuscan mun tapiflashu un nicayosmamisi. Chaca uhuun ifono ufi sharapaiyain cuscan un atiroma. Uncai chaca shatutiroma. Ascano un tapitiro uhuun nomuranshon un Upa Diosin oinmati ipai ua yononi cuscan aashquin. Asafia un Dios ifo huayamaino un chacapan ahuun oinmati itiro ua yonomapaiyai cuscan aashquin. ¡Ohuashta! Uhuun nomuran un omitsiscai. Unfin chacaquin. ¿Tsoan ua numatiromun chaca afanan uhuun ifo inonma? Nocon Ifo Jesucristohuunshon Upa Diosin noco numani chaca afanan noco ifo inonma. ¡Aicho! Upa Diosin, min noco shara huamisi.

## 8

### *Diospan Yoshin Sharahuunoashu non ica*

<sup>1</sup> Ascano Jesucristo nocon Ifono nonfin ahuun yoraquin. Ascacucui Upa Diosin —Min chacaquin un mia onaintimanon. Umaquinoashu omitsiscapanacafo muran catahuun, —noco huapanacama. <sup>2</sup> Jesucristohuunshon Diosin ahuun Yoshin Sharapan ahuun curushuunshon noco nimashara afanan chaca nocon ifo inonma non omitsiscapanonma.

<sup>3</sup> Moisés yononi cuscan non tapifiaicai aton noco isharamatiroma nocon chaca soashquin. Ascan Upa Diosin shinanni cuscan ahuun Furun nai muranshon mai ano nichini arifi noco cuscara yora inon. Noco cuscarafiahocai non chaca huamisi cuscan huamisima. Noco nashoni afanan chaca nocon ifo inonma. <sup>4</sup> Ascano natian non Diospan Yoshin Shara tanashu Moisés yononi cuscan non atiro. Nocon nomuran chacapan noco shinanmapaiyai cuscan non afanan nicayamashon non Diosin tsain tanasharatiro.

<sup>5</sup> Non chaca shatuyamashu nan chacapan noco amapaiyai cuscan nan fusti non shinantiro. Ascan Diospan Yoshin Shara noco iquinano noco amapaiyai cuscan nan fusti non shinantiro. <sup>6-8</sup> Diospan Yoshin Shara nocon nomuran iquinano nocon ointi fasi unimacointiro. Ascashu non Upa Dios fu ipasharatiro. Asca ratoranfo chacapan aton ifo icaino Diosihuunoa shinansharatiroma. Aton nomuran shinanchacamisifo Upa Dios noicasmaifoan. Ascan ato yonomapaiyai cuscan nicacasmamisifo. Chaca shinancaquin Diosin tsain nicatirofoma. Nicayamashu Upa Dios fu ipatamarocon omitsiscapanacafo.

<sup>9</sup> Asafia mancai aton cuscarama. Chaca afanan maton ifoma. Diosin ahuun Yoshin Sharafin mato fuqui. Nantofin mato yonomisiquin. Ointiaquimayamacahuun. Tsoan Jesús ahuun Yoshin Shara fu iyamaino ahuun yora itiroma. <sup>10</sup> Jesús matofu rafufiaino chacahuunoashu maton caya naashquin. Maton caya nafiacun maton yoshin Criston fiananan huai shara man inon afu ipashquin. <sup>11</sup> Jesús naafiacun Upa Diosin Yoshin Shara funimani. Nan Yoshin Shara matofu rafuaino matori funimashquin maton caya afanan nisharanon.



<sup>12</sup> Ascacun uhuun yoramishtichin, Diospan Yoshin Shara no fu rafuaino Upa Diosinhuunoa non shinantiro noco amapaiyai cuscan aquin. Non chaca huamisi cuscacai non afanan shinanpaitiroma noco amapai cuscan aquin. <sup>13</sup> Chaca nocohuun nuano non omitsiscapanaca nai. Ascafia Diospan Yoshin Sharahuunshon non chaca huamisi cuscan non shatuaino afanan chaca nocohuun nutiroma non Upa Dios fu nisharapacunon.

<sup>14</sup> Diospan Yoshin Shara ato amapaiyai cuscan nicasharamisi. Nanfofin Diospan yorafoquin. <sup>15</sup> Ahuun Yoshin Shara noco shinansharamapai non afanan ratunonma. Nonfin Diospan Yoshin Shara fiacun nanton ahuun facufo noco ima. Ahuunshon non yoitiro isca huaquin, —Upa Diosin min uhuun Upashtaran, —ishon non yoitiro. <sup>16</sup> Nocon nomuranshon Diospan Yoshin Sharapan noco yoi isca huaquin, —Min Upa Diosin facucoinran, —ishon noco yoi. <sup>17</sup> Non ahuun facufocun Apan ahuun facucoin inantiro cuscan nocori inanshquin. Criston ahuun Furuncoinin noco fasi omitsiscashoni. Omitsiscafianishaquin natian Apa Dios fu isharapacunaca. Nantifi Apanari ahuuna. Ascano norifi ahuunoashu natian non omitsiscafiai norifi chipo non afu Upa Dios ano isharapacunaca. Apan Cristo inan cuscari norifi non ahuun facufocun nocori inanshquin.

*Chipo norifi Upa Dios yafi Cristo fu nisharapacunaca*

<sup>18</sup> Shinanapon uhuun yoramishtichin. Natian non ahuunoashu omitsiscafiaquin non shinanchacanoma. Non aqui nocoaino a cuscara shara noco imai. Non omitsiscacai cuscan cuyoshquin. Ascan noco imashara cuscacai unupacunacama. <sup>19</sup> Upa Diosin ahuun facufo funimashquin a cuscara sharacoin imashquin. Ascan nan onihuanifoan manacani fasi oinsharapaicaquin ahuu cuscaramain non chipo ishquicain. <sup>20-21</sup> Onihuanifocai payocopaiyamafiai Diosin yononi cuscan payococani. Ascafiaquicai Upa Diosin noco funimanaitiancai onihuaniti afanan payoconacafoma. Nantianri non afu isharamisi afanan ahua chaca finontama. Nanscarifiai onihuanifoti sharashtacoin icani afanan chacanatiroma.

<sup>22</sup> Man non tapia ainfoan facu cainquin isin mui pashapaitiro. Nanscarifiai nan Diosin onihuanifo omitsiscacaini nashcani. Natianri nanscasi acani. <sup>23</sup> Norifi non Diospan facufo ahuun Yoshin Shara no fu rafuaino non tapitiro non chipo Dios fu isharatirofiashu natian non isinin itiro pashapaicain. Ascaquin non manasharatiro Upa Diosin icano noco ihuino non ahuun facufocun a cuscara shara noco imanoni. Natianri nocon caya funa sharacoin afanan isinin iyamacain nonricai afanan natiroma. <sup>24</sup> Noco a cuscara shara imai cuscacai icataima. Ascafia non icoinra huaiton noco numatiro a cuscara shara non inon. Icoinra huashon unimayanan non manasharatiro funaquinma non aqui nocoaitian. Aqui nocoshocai non afanan manatiroma. Manmain oinquin. <sup>25</sup> Ascafia noco ihuiataima funaquinma non manasharayotiro.

<sup>26</sup> Nanscarifi aquin Upa Diosin ahuun Yoshin Sharapan noco ashosharafanfainni. Ahuuscashomain non Upa Dios cufisharatiroquin noncai tapiama. Ascan ahuun Yoshin Shara nocohuunshon noco cufishotiro. Nocohuun ramapaiquin noco cufishonai cuscan sharacoin tsoancai aaton cufiai cuscan huatiroma. <sup>27</sup> Ahuun Yoshin Sharapan shinain cuscan Upa Diosin onancoian. Nantifi nocon nomuranri non

shinain cuscan tapicoian. Upa Diosin noco amapaiyai cuscan nannori ahuun Yoshin Sharapan icoinra huafoti cufishomisi.

*Jesushuunshon non nantifi finoncointiro*

<sup>28</sup> Ascano non tapia Upa Diosin noco catonni noco amapaiyai cuscan non anon. Non Upa noiaino ahuafo ahuuscara afiaino afohuunshon Upan noco shara huashoin. Norifi non icoinra huai. <sup>29</sup> Non Jesús Ifo huataima Upa Diosin tapiyoni ratofoanmain icoinra huaicain. Icoinra huaafotaima shinanni isca huaquin, —Nanfo uhuun facu cuscara un ato imashquinran, —ishon shinanyoni. Ascashon Furun Jesús funimaqui tau huani. Ascashon nocorifi funimashquin a cuscara non inon ahuun chipo facufo inon icai. <sup>30</sup> Onanyoni non ahuun facufo ishquinon. Ascano noco nomuranshon noco yoini, —Uhuun facu icoinra huahuu. Tsoan anori yoiaiton un ato chaca soashoni isharanonfo, —ishon Upa Diosin yoini. Aton chaca soashonano ahuun Furun sharashtacoin cuscara inonfo.

<sup>31</sup> ¿Noco asca huasharaino non raquiri yoitromun? ¿Upa Diosin noco shara huafafainaino futsafoan noco raquiri huatromun? <sup>32</sup> Upa Diosin nocohuun noiquin Furun numanima noco nantifihuunoashu nashonon. Ascanishaquin ahua futsa non yopai cuscan nanfori noco inanshquin. <sup>33</sup> Upa Diosin noco catonni nocon chaca soashonano Furun cuscara shara non inon. ¿Ascano tsoanmun, —Min chacaran, —noco huatiroquin?

<sup>34</sup> Jesucristo noco nashocun Apan funimani. Apa Dios icano ato nantifi iquinon. Natianri Upa Dios noco cufishofafaini. Nan iconcucaín tsoan, —Min chaca huamisiquin. Asca omitsiscapanacafo muran mia potanon, —noco huatiroma. <sup>35</sup> Tsoancai noco Cristomaqui imatiroma noco noinonma. Non omitsiscaçain nocon nomuran fucash huafain non Jesushuunoa yoiaiton noco omitsiscamafain non fonicaín nocon sahuuti yopacain noco musumafain noco rutupaifain noco huafiaquicai noco Cristomaqui imatirofoma noco noinonma. <sup>36</sup> Diosin tsain cununi isca huaquin,

“Upa Diosin, shafatifi non itisharai mihuunoashu naashquin. Chashoanfo yosicun Ifoan ato rutumamisi. Nanscarifi aquin nocori rutupaicaniran,”

ishon cununi. <sup>37</sup> Noco asca huafafainfiaifoan Jesús noco noiaino ahuunshon non ato finoncointiro. <sup>38-39</sup> Jesucriston nocon Ifonocai ahuashtaton Upa Diosmaqui noco pashcamatiroma noco noinonma. Nan un icoinra huacoinni. Upa Diosin nocohuun noiainocai ahua ahuuscatiroma nocohuun afanan noinonma. Non nafiancucai amaqui noco pashcamatiroma. Non niyo anoricai amaqui noco pashcamatiroma. Ahuun oinmatifoanricai amaqui noco pashcamatiroma. Yoshin chacafoanricai noco amaqui pashcamatirofoma. Ahuafo natian icai cuscaricai noco amaquinoa pashcamatiroma. Inonpacoai cuscaricai noco amaqui pashcamatiroma. Ahua chacafo aton niaiffoanri amaquinoa noco pashcamatiroma. Nan nai ariafo yafi mai anofoanricai noco amaqui pashcamatiroma. Upa Diosin nocon Ifon Jesucristohuunshon nocohuun noi. Ascano nantifi onihuafoanricai amaqui noco pashcamatirofoma afanan noco noinon.

## 9

*Upa Diosin Israelifo catonni ahuun yorafo inonfo*

<sup>1-3</sup> Uhuun yoramishtichin un Cristohuunshon iconquin un mato yoi. Un muai cuscan mun tapia uncai mato paraima. Un mato iconquin yoi. Diospan Yoshin Sharan ua shinanmanai cuscan un iconquin yoicain. Uhuun caifo Israelifoancai nocon Numamisi icoinra huafofoma. Ascacun uhuun nomuran un atohuunoashu omitsiscacaini. Un ato fasi shinancoinmisi. Uhuun caifo uhuun nomuran un ato shinanmisi isca huaquin, —Upa Diosin uhuun yora Israelifo un ato numapai mifu nipanonfo. Ascano ato Cristomaqui omitsiscapanacafo muran potatamarocon uacai potahuu un ato numanon, —ishon un anori shinanfiainocai Upa Diosin ascatiroma. <sup>4</sup>Upa Diosin ato catonni ahuun yorafo inonfo. Ato fu iyoshon ato ismapaoni ahuu cuscaramain aaquin. Ato shara huapaiyai cuscan ato yoiyoni. Ascashon ato yononi isharanonfo. Ato yosini ahuuscashomain ichananshon cufitirofoquin. Ascari fi atan ahuara sharacoin ato ashoain cuscan yoiyoni. <sup>5</sup>Maton shunifofoan Upa Dios tanasharafafainpaonifo. Nocon Ifo Cristo arifi Israeliri ini. Nocon shuni Abraham non Isaac non Jacobori aton funa. Aafin natian nantifiton aton ifoquin ato iquina. Ascan Upa Dios fasi shararan non huapanon. Amen.

<sup>6</sup>Upa Diosin noco yoisharayoni cuscan uhuun caifo Israelifoan icoinra huayamafiaifoan ahuun tsain iconcain. Ahuun yorafo yoiyoni cuscan ashquiquin. Ahuun yorafo shara huafiainocai atirifi Israelifo Diospan yorama. <sup>7</sup>Nanscarifi aquicain Abraham acai cuscan ahuun funa atirifoan icoinra huamisima. Afocai Diospan yorama. —Abraham ahuun facu futsafoyafiacun Diospan tsain cununi cuscan ahuun facu Isaac yafi ahuun funafo nanfosi Upa Diosin yoiyoni cuscan fitiroran, —ishon cununi.

<sup>8</sup>Ascano non tapitiro atirifi Abraham funafocai Diospan yorama. Diosin Abraham yoiyoni ahuun facu chipo cainshquiain. Yoiyoni cuscan Abraham icoinra huani. Nan icoinra huafofi Diospan yoraquin. Abraham facu cuscarafo. <sup>9</sup>Abraham ahuin Sarapan facu nanuataima Upan Diosin yoiyoni isca huaquin, —Fari futsan un miqui nasoshquin. Nantianri min ahuin Sarapan facu furonanfacu cainshquiran, —ishon yoini.

<sup>10-13</sup>Ascano man fari ichapa finontan Sarapan facu Isaac ahuin Rebeca rafanacani. Caiantaima Upa Diosin yoini isca huaquin, —Min facu Esaú cain tau. Afu rafanaca Jacob. Chipocuton oinmati cuscara iyoa ishquiran, —ishon yoini. Caiantaimacai ahua chaca huafain shara huatian inima. Ascafian Diosin yoiquin, —Jacob un noiquin un ashoin. Un iyoa Esaucai un noiquin asca huaima, —ishon Diospan tsain cununi. Ascano non tapitiro Diosin inonpacoai shinanyoni cuscan atiroquin. Esaú futan Jacob amisifo cuscaai shinanyonima. Aafin apaiyai cuscan yoiyoni.

<sup>14</sup>¿Ascano Upa Diosin shinancoinmamun? Ma. Anoricai non shinantiroma. <sup>15</sup>Upa Diosin yoini isca huaquin,

“Nan un noipaiyai fin un noitiroquin. Nanscarifiai nan un ahuun ramapaiyaihuurifi un ramapaitiroquin,”  
ishon Upa Diosin Moisés yoini.

<sup>16</sup>Ascano non tapitiro futsan shinanquin, —Diosin ua shara huashopainon, —ishon shinantiro iyamarai, —Un Upa Dios

yonoshosharatiro ahuun rafanan ua inansharatiroran, —ishon non shinanfiatirocai anorima. Upa Diosin afin nocohuun ramapaiquin noco catontiro non ahuun yorafo non inon noco inansharashquin.<sup>17</sup> Ascano Upa Diosin Egipciofo aton niaifo yoini, —Un mia niaifo imashquin nantifi manifoti anoafoan un ahuamamishti huatiro minhuunshon tapinonfo, —ishon yoini.<sup>18</sup> Ascacun non tapitiro Upa Diosin futsa ahuun ramapaiyaihuunri ramapaitiroquin. Nanscarifi aquin futsan chaca huafafaina cuscan shatuamashu ointi mutocoin imatiro.

<sup>19</sup> Man futsan ua yoiraca isca huaquin, —Ascacun non chaca huaiton noco shatumanama nocon ointi mutocoin imashquin. ¿Ascafia ahuuscain Upa Diosin nocohuun nuamun? Afin apaiyai cuscacai tsoan atima huatiroma, —itsairaca amaquiri yoiquin.<sup>20</sup> Ma. Asca huayamacahuun. ¿Ahuuscain min Upa Dios tafipaimun? Minfin nocofunuquin. Aafin Diosiquin. Ahuara onihuamatocai yoiqui isca huatiroma, —¿Ahuuscain mian iscara onihuamun? —huatiroma.<sup>21</sup> Cutin onihuamisiton mapo nan apaiyai cuscara shara cutin huatiro. Futsa amuran ahuara chaca nanuti huafain futsa amuran ahuara shara nanuti huatiro.

<sup>22</sup> Nanscarifiai Upa Diosin nantifi yora onihuafiacun atirifoan ahuun tsain nicacasmamisifo. Funainquimashta ato yoiyofiaiton nicayamacaiyaifoan inoncai atoqui sinaquin. Ato potatiro chacani fustisi tapiaifoan. Asca huaquin ato ismatiro ahuamamishti huatiro cuscan.<sup>23-24</sup> Ascafiaicai non ato cuscarama. Nocohuun ramapaiquin noco tapimamisi. Ascatari noco itisharamai unimacoincai non afu ipanon. Noco Israeli fusti catonnima non afu ipanon. Mani futsafori catonni.<sup>25</sup> Oseas nan inonpacoai yoimisiton Diosin tsain cununi isca huaquin,

“Futsafo Israelifomari un catonshquin uhuun yorafori inon. Tsoancai ato noiyomisimafiacun un ato yoishquin. Un mato noiran,”

ishon Upa Diosin yoini cuscan Oseas cununi.<sup>26</sup> Afanan ato yoini iscahuaquin,

“ ‘Mancai uhuun yoramaran,’ ishon Diosin mato yoiaran, huanifo. Ascafia chipo atohuunoa yoishcaquin, ‘Upa Diosin niaton man ahuun facuforan,’ ishon yoishquicani.”

<sup>27</sup> Isaías nocon caifo Israelifohuunoa yoini,

“Israelifo ichaparasi ishquicani tsoan ato tanan huatiromafishu fustirasiton icoinra huashquicani Upa Dios fu ipashcaquin.<sup>28</sup> Yoini cuscan iconcoi. Yoiyoni cuscan manifoti anoafoan nan icoinra huafoma nocon Ifoan ato onaintimariscashquin. Afanan ato manashquima,”

ishon Isaías cununi.<sup>29</sup> Ascashon Isaías afanan yoiyoni cuscan nanscaicoiain. Isca huaquin,

“Upa Diosin ahuamamishti huatiro. Nocon caifo Israelifo fustirasi numani atifi cuyononfoma. Asca huayamaino non Sodoma yafi Gomorra cuscarafa icuana. Nonrifi non cuyocuanaran,”

ishon Isaías cununi.

*Israelifo yafi nan tsain shara Jesushuunoa*

<sup>30</sup> ¿Ascano afohuunoa non raquiri yoitironun? Nan Israelifoanmacai aton chaca shatucasmamisima Upa Diosin icoinra huashquin aton chaca soashonon. Ascafia natian atirifoan Jesús icoinra huaifoan Upa Diosin

aton chaca soashona a cuscara shara inonfo. <sup>31</sup> Ascafia uhuun caifon Israelifoan Upa Diosin Moisés huunshon ato yononi cuscan shara-paicaquin. Ascafia cai Moisés yononi cuscahuunoashu shara inonfoma. <sup>32</sup> ¿Ahuuscain iscaimun? Un mato yoinon. Nanfoancai Diospan Furun Jesús icoinra huaafoma aton chaca soanon. Ascataमारोcon Moisés ato yononi cuscahuunoashu isharapaiafo aton chaca soashquin. Un mato ahuara futsa nicamapai. Toquiri fasi uhuapa fai naqui raca finonpai aqui oroshcomutiro.

<sup>33</sup> Nanscarifi aquin Jesús finonpaiyaifoancai icoinra huacanima nipashcaquin. Nannori inonpacoai cuscan Isaías Diospan tsain cunuyoni isca huaquin,

“Un Israelifo aton fai naqui toquirininhuan raitan. Ahu-unoashu yorafo pacunonfo,”

ishon cununi.

“Nanscarifi aquin Upa Diosin Jesús Israelifoqui nichini tsoan icoinra huayamashu funocoincani nipashcaquima,”

ishon cununi isca huaquin,

“Ascafia tsoan icoinra huacoinshon shinanchacanacamaran,”

ishon Diospan tsain Isaías cununi.

## 10

<sup>1</sup> Uhuun yoramishtichin, uhuun nomuran uhuun caifo un fasi shinain. Un atohuunshon Dios cufifafaini Jesús icoinra huanonfo Dios fu nipashcaquin. <sup>2</sup> Mun tapia nanfoanfin Upa Dios fusti fasi tanapaisharafi-aquin amaquiri shinanfoquin. <sup>3</sup> —Nonfin Moisés noco yononi cuscan non aino Upa Diosin nocoqui unimatiro noco numanonran, —ishon shinanpaonifo. Ascano Upa Diosin ato Jesushuunshon imasharapaiyai cuscan afu ipashcani. Ascafia nicacasmaonifo. <sup>4</sup> Moisés yononi cuscan Criston mai ano niyoshon nantifi apaoni. Ascano Moisés noco yononi cuscaai non afanan yopatiroma nocon chaca soanon Upa Dios fu ipashquin. Tsoan Cristo icoinra huaiton aton chaca soashotiro afu ipasharanon.

<sup>5</sup> Moisés isca huaquin cununi, —Upa Diosin noco yononi cuscan nantishon tapiquin non chaca huayamashu Upa Dios fu non nipatiroquin, —ishon cununi. <sup>6</sup> Ascafia non Jesús icoinra huashon non isca huaquin yoitiro, —Maton nomuranshocaí man isca huaima, “¿Tsoamun nai muran catiroquin Cristo fotomashquin noco numayonon?” <sup>7</sup> Iyamarai, “¿Tsoamun mai muran catiroquin Cristo funishquin?” —ishon yoyamacahuun. <sup>8</sup> Anorimaquin. Man Cristo icoinra huaiton mato numatiro. Nannori non mato yoimisi. —Mancai raqui cayotiroma Cristo fu ishquin. Natian man Cristo yoitiro matofu rafunon. Maton nomuranri man icoinra huacun matofu rafutiroan, —ishon Moisés cununi. <sup>9</sup> Ascano, —Jesús uhuun iforan, —huafain man shinanquin isca huai, —Jesús nafiacun Apa Diosin funimaniran, —ishon maton nomuran man icoinra huaiton maton chaca soashotiro afu man ipanon.

<sup>10</sup> Ascan maton nomuranshon man icoinra huacun Upa Diosin maton chaca soashotiro man isharanon. Man futsafo, —Jesucristo uhuun iforan —ishon yoiatton mato imapacunaca. <sup>11</sup> Nannorifi Diospan tsain cununi, —Tsoan Criston Diospan Furun icoinra huaashucaí rafipacunacafoma, —ishon cununi. <sup>12</sup> Israelifo iyamarai mani futsafoan icoinra huaifoan aton Ifo itiro. Diosinacai ahua rafuma. Nanscarafosi. Nan

icoinra huafoti aton Ifon. Fasi atohuun noiquin ato ya imapacunun. <sup>13</sup> Ratoran nocon Ifon icoinra huashon yoiqui isca huaiton, —Ifon, ua numahuu, —huaiton afu ipatiroquin.

<sup>14</sup> ¿Ascafia ahuuscashocon, —Jesús ua numahuu, —huatirofomun icoinra huacatama? Ahuunua nicamisimashaquicai ahuuscashon icoinra huatiroma. ¿Futsan Jesushuunua ato yoiamaino ahuuscashocon nicatirofomun? <sup>15</sup> ¿Ahuuscashocon yoifotirofomun futsan ato nichiamaino? Nannori Diosin tsain cununi isca huaquin, —Nan tsain shara futsafo yoifononfo nan fasi sharacairan, —ishon Isaías cununi. <sup>16</sup> Ascafia nan tsain shara atirifi Israelifoan icoinra huacanima. Nannori Isaíasin afanan cununi isca huaquin, —¿Ifon, non ato yoia cuscan tsoan icoinra huamun? —ishon yoini. <sup>17</sup> Ascano tsain shara nicaquin icoinra huatirofo. Nan tsain shara Jesucristohuunua.

<sup>18</sup> ¿Uhuun caifo Israelifoan nan tsain shara Jesushuunua nicamisimun? Ai, man nicamisifo.

“Manifoti anofoan nan tsain shara man nicafo,”

ishon David cununi. <sup>19</sup> ¿Uhuun caifoan tapinimamun nan tsain shara Cristohuunua nicacasmaifoan Upa Diosin caifo futsafo yoitiro ato numaquin? Ai, man nicamisifo. Moisés niyoshon ato Diosin tsain yoini isca huaquin,

“Uhuun yora Israelifoan un afanan ato uhuunua shinanmapai.

Ascan un caifo futsafo uhuunua un shinanmai Cristohuunua shinanonfo ato numanon. Nan oincani Israelifori uqui nasopaitiroran,”

ishon Diosin yoini cuscan Moisés cununi. <sup>20</sup> Chipa Isaías ranotama yoini isca huaquin,

“Mani futsafoan ua funyamafiacaquin ua icoinra huafo. Uhuunua yocayamafiamisishaquin un ato uhuunua onanmanaran,”

ishon Diosin yoini cuscan Isaías cununi.

<sup>21</sup> Ascafia uhuun caifohuunua yoini,

“Un shafatishon un ato cuna uqui fucahuun. Un ato huafiacaqui fupaicanima. Yoitimamisiforan,”

ishon Upa Diosin yoini cuscan Isaías cununi.

## 11

### *Ascan Upa Diosin Israelifo catonni*

<sup>1</sup> Ascano un mato yocanon. ¿Upa Diosin ahuun yora Israelifo potapacunacamun? Ma. Anorima. Unrifi Israeliquin. Abraham non Benjamín uhuun shunifo. <sup>2</sup> Upa Diosin ahuun yora inonpacoai cuscan onanshocai ato potamisima. Shinacapon. Nocon shuni Elías Israelifohuunua Upa Diosin yoini isca huaquin, <sup>3</sup> —Ifon, min tsain inonpacoai cuscan yoimisifo rutuafo. Mia a muranshon cufiti choquiaquin futsafo. Uru fusti un tushufiacun uari rutupaicaniran, —ishon Elías Upa Diosin yoini.

<sup>4</sup> ¿Ascan Upa Diosin raquiri Elías cumanimun? Isca huaquin cumani, —Ma. Mirus fusticai min tushuama. Siete mil min yora futsafoanri ua noiafo ahua futsacai ifoanfoma. “Baalcai uhuun diosiran,” huamisifomaran, —ishon Diosin Elías cumani. <sup>5</sup> Nanscarifi aquin natianri Upa Diosin uhuun caifo fustirasi catoan atohuun ramapaiquin. <sup>6</sup> Ahuara shara huaa rafanancai ato catoanma. Atohuun noiquin ato catoan. Dios

non yonoshonaitocai noco catoanma. Ahuara yonoshomacai non cashman fitiroma. Ascanfiacai non Upa Dios yonoshotiroma noco catonon. Noco cashmancoincatoan.

<sup>7</sup> Ascano uhuun caifo Israelifo Moisés yononi cuscan apainifo aton chaca soanon Diospan yora ipaiflashucahuuun yorafo icafofoma. Diosin catoanfosi aton chaca soashona ahuun yorafo inonfo. Nan futsafoan aton ointi mutonifo. <sup>8</sup> Nannori Diosin tsain cununi isca huaquin,

“Upa Dios nicacasmafo. Ascan ato oshamana cuscara shinantsa afo ahuunoa shinanonfoma. Oinfiacani fusho cuscarafoma. Nicapaicoinnifoma. Ascaiton ahuun tsain shara ato tapimanima. Natianri nanscapani,”

ishon Moisés cununi. <sup>9</sup> Nannori nocon niaifo shuni ipaoniton David yoini isca huaquin,

“Nan nicacasmamisifo onaintimapainon. Tushu ichapayafoma futan mafo ichapayafomaanriraca shinanfo Upa Diosin atoqui unimai. Ascarama. Amaquiri shinanshu omitsiscapainonfo.

<sup>10</sup> Ato fusho cuscara imapainon. Ato cacoapainon aton ointi ihuu ipainonran,”

ishon David Dios nicacasmamisifohuunoa yoini.

*Israeliffoanmari Jesús icoinra huacanashu afu nipanonfo*

<sup>11</sup> ¿Ascano uhuun caifo Israeliffoan nicacasmamisifoquin Upa Diosin ato potapacunacamun? ¡Ma! ¡Anorima! Chaca huafoan Jesús nicacasmacani. Ascacun mani futsafo Jesushuunoa yoi icoinra huanonfo afu ipashquin. Nanfoan Jesús icoinra huaiton uhuun caifo Israeliffoan oincashon shutitan ifoanpaitirofo. Nannori Upa Diosin ato shinanmapai. <sup>12</sup> Uhuun caifofoan chaca huapaonifo Jesús ifoanpaiquinma. Ascano Upa Diosin manifoti anofo Jesushuunoa tapimanano icoinra huashu nipanonfo. Ascano isharafo. Diosin ato shara huashoan. Ascacia uhuun caifori chipo Jesús icoinra huacanashu nantifi manifoti anofo mimacai unimashcani.

<sup>13</sup> Man uhuun caifoyamafiacun Upa Diosin ua mato muran nichini Jesushuunoa un mato yoinon. Un Jesús fu rafumisi. Ascashon un ahuunoa mato yoi. Un fasi unimai Upa Diosin ua catonni un mato yoinon.

<sup>14</sup> Uhuun caifori un yoimisi Upa Diosin ua matoqui nichini. Man unimaiton oincani afoanri mato shutipaitirofo Jesús icoinra huapaicaquin.

<sup>15</sup> Shinancapon. Afoan Jesús ifoanpaiyamaifoan. Mani futsa anofo Upa Diosin ato tapimani. Nicacashon Jesús ifoannifo. Nan sharafishu uhuun caifoanri Jesús icoinra huaifoanno fasi sharacoin iishquin. Yora naashu funia cuscara itiro. <sup>16</sup> Uhuun caifoan Jesús icoinra huaquin tau huanifo. Ascan nocon funafori chipo Diospan yorafo iishcani. Fanafo ahuun tapo sharano ahuun poyanfori shara itiro. Nanscarifi aquin Upa Diosin Israelifo catonni ato shara huaquin. Ascano aton funafori catonshquin aforifi imasharashquin ahuun yorafo inonfo.

<sup>17</sup> Un mato iscara tapimapai man tapinon. Israelifo ihui fana poyan cuscarafoma. Abraham Dios icoinra huaquin tau huano. Ahuun funafori Diospan yorafo ipaonifo. Nanfofin ihui fana poyan cuscarafomaquin. Natian Upa Diosin ihui fana poyan fimioma poshtushon potani. Nanscarifi aquin Israeliffoan Jesús icoinra huayamaiton ato pota. Manfin nan ihui poyan futsa cuscarafoma. —Ihui olivoran, —ishon anuni. Nan ihui fana olivo ahuun poyan futsaqui tuchia. Abraham fana futsa

poshtushon futsaqui tuchia cuscara. Nanscarifiai uhuun caifoon man icoinra huayamaiton Diosin mato ihui ahuun facufo man inon. Diosin Abraham yoini cuscan natian marifi man ahuun yorafo inon.

<sup>18</sup> Ihui fanacai ahuun tapomaisi nitiroma. Tsasitiro. Ihui fana ahuun poyanfo non ahuun tapohuunoashu nipatiro. Poyafoancai ahuun tapo nimatiroma. Nanscarifiai mancai Jesús nimapacutiroma. Nantocai fin mato nimapacutiromo. —Noncai futsafo cuscarama. Nonfin Diospan yorafoquin, —iyamacahuun. Cacapaimisi iyamacahuun. <sup>19</sup> Man shinanra. Fana poyan chacaran ishon man poshtushon potatiro. Nanscarifi aquin Israelifoon icoinra huayamaifoon ato potani. Ascano non ahuun yorafo inon. Ascacun, —Non shararan —ishon man shinanquin. <sup>20</sup> Nan iconfiashu oinfain. Nan Israelifoon icoinra huayamaifoon Upa Diosin ato potani. Man icoinra huashu fin ahuun yorafo man iquicai. Ascan cacapaimisi itama, —Non Jesús icoinra huayamashu non funotiroan, —ishon shinancahuun. <sup>21</sup> Israelifoon icoinra huaquin tau huafianishacaquin chipo aton funafoan icoinra huayamaifoon Diosin ato potani. Manrifi man icoinra huayamaiton matori potatiro.

<sup>22</sup> Ascacun shinancapon. Upa Diosin mato huun ramapaiquin ahuun yorafo mato imai. Israelifoon icoinra huayamaifoon ato onaintimaquin ato potani. Ascan mato huun ramapaiyai cuscan shinanfafaicahuun. Icoinra huafafaincahuun. Man ascayamaiton matori potatiroquin. <sup>23</sup> Uhuun caifofoan afanan chaca shinainyamaifoon Jesús icoinra huaifoon afanan ahuun yorafo Upa Diosin ato imatiro. Fana poshtushon afanan poyan tuchitiro cuscan atorifi huatiro ahuun yorafo inonfo. <sup>24</sup> Ifoancai ihui olivo fanamisima ahuun poyan shatushon fana futsaqui tuchini foaisharanon. Nanscarifi aquin man Diospan yora ipaonima. Ascan natian Upa Diosin mato ihuia man ahuun facufo inon. Ascacun mimacaiquin uhuun caifo afanan ihuitiro ahuun yorafo inonfo. Jesús icoinra huaifoon ahuun yorafo ato imatiro.

*Upa Diosin Israelifo numashqui ahuun yorafo inonfo*

<sup>25-26</sup> Uhuun yoramishtichin, tsain futsanhuunoo man shinanmisima un mato tapimai maton nomuran man shinanon. Nan tapianshu cacapaimisi man inonma. Icon natian uhuun caifo Israelifoon aton ointi curushu Diospan tsain shara Jesushuunoo nicacasmacani. Ascacia uhuun caifomafoan ahuun unutaqui Jesús icoinra huaifoon Upa Diosin ahuun yora imashquin. Nantianricai afanan uhuun caifoan nicacasmamisi ishcanima. Ascano nantifi Israelifoon Jesús icoinra huaifoon Upa Diosin ato numai ahuun yorafo inonfo. Nannori nocon shuni Isaías cununi isca huaquin,

“Nocon Numamisi Sión ano icaquin. Afin Israelifo numai oi afanan chaca huanonfoma. <sup>27</sup> Nantianri un yoini cuscan un aton chaca soashoshquiran,”

ishon Diosin yoini cuscan Isaías cununi.

<sup>28</sup> Uhuun caifofoan tsain shara Jesushuunoo nicacasmacani. A noicasmacaiquin. Ascacun Upa Diosin mato shara huashoan. Ahuun tsain shara Jesushuunoo man icoinra huanon. Mato shara huafiano uhuun caifoan nocon shunifo Abraham non Isaac non Jacob yoini cuscan ointiaquimama. Ascacun atohuunshon aton funa Israelifori ato noi.



<sup>29</sup> Upa Diosin nocon caifo inanonpacoai cuscan yoiyonishaquin afanan shinan futsanpacunacama.

<sup>30</sup> Mancai Upa Dios nicapaipaonima. Ascafiacun Upa Diosin uhuun caifo shara huapaiyai cuscan ato shara huatamarocon matohuun ramapaiquin mato shara huai. <sup>31</sup> Nan man nicacasmapaoni cuscarifi uhuun caiffo nanscarafosi. Ascafiano matohuun ramapaiyai cuscan aforifi chipo Upa Diosiqui nasoshceni atohuun ramapainon. <sup>32</sup> Upa Diosin yoini cuscan nantifi maniafotiton chaca huamisifo. Ascafiacun atohuun ramapaiquin ato numanon.

<sup>33</sup> ¡Aicho! Nocon Dios fasi sharacoin.

Nantifi yorafohuun ramapai unupacunacama.

Aafin apaiyai cuscan tapicoianquin.

Nantifi tapicoian inonpacoai cuscan tapifain aafin noco ashoai cuscan tapicoian.

Ahuun nomuran yorafohuunoa shinain cuscan non tapipaifiaquicai tsoanshta tapitiroma.

Aaton acai cuscan tsoan tapitiroma.

<sup>34</sup> ¿Tsoamun nocon Ifoan shinain cuscan tapitiroquin?

Tsoancai Dios tapimatiroma ahuun tapimamisi inon.

<sup>35</sup> Tsoancai Dios ahuara inantiroma ato nifinon.

<sup>36</sup> Arusu ahuun nomuran shinain cuscan nantifi onihuani.

Ahuun curushhuunoashufin nantifi itiro.

Nantifi ahuuna.

Nantifi onihuafotiton ahuunoa yoisharapacunacafo.

Ascacun, —Diosin sharacoinran, —huapanonfo.

Amen.

## 12

### *Ahuuscashumain Diospan ahuun yonomati non itiroquin*

<sup>1</sup> Uhuun yoramishtichin un mato yoisharapaiyai cuscan acapun. Upa Diosin matohuun ramapaiquin mato shara huamisi. Ascacun marifi matohuunoa inancahuun mato ifo inon ahuun yonomati ipashcaquin. Man ascaino afanan chaca maton ifo itiroa ahuunacoin man inon. Shinan-capon. Man cayacafi shinansharacoinquifin matohuun noiai cuscarimarifi man ahuun noitiroquin. Man ascaino Upa Diosin fasi matoqui unimacoin. <sup>2</sup> Ahuarafoan Upa Diosimaqui mato imapaiyai cuscan atama shinan futsancahuun Diosin mato imapaiyai cuscan aashquin. Man shinanpaoni cuscan afanan shinanyamacahuun. Natian Diosin maton nomuran shinan futsama sharapaiyai cuscan shinancahuun. Man ascaquin man tapitiro Upa Diosin mato imapaiyai cuscan sharacoin. Mato imapaiyai cuscan man aino matoqui unimacointiro. Ahua futsacai man yopatiroma.

<sup>3</sup> Upa Diosin uhuun ramapaiquin ua maton muran nichini un mato tapimanon. Ascan un nantifi mato yoisharapai. Cacapaimisi iyamacahuun. Diosin mato imapaiyai cuscan fusti shinancahuun. Ahua futsa ipaiyamacaahuun. Man Dios icoinra huatiro cuscan afin mato shinanmanaino cayacafi shinansharacaahuun. Man icoinra huua cuscan nan fusti Upa Dios ashocahuun. <sup>4</sup> Un mato ahuara futsa yoipai iscahuaquin. Nocon cayan fustifiano non pashcoi futsua. Afocai ascarafosima. <sup>5</sup> Nanscarifiai nocon Ifoan Jesús fusticoi. Nonfin ahuun yorafoquin. Non ahuun cayan cuscarafoshu non yopanoinquin.

<sup>6</sup> Upa Diosin nocohuun noiqui cashman noco imapaiyai cuscan non ahuunshon futsafo ashosharatiro. Noco imapaiyai cuscacai non ascarafosima. Upa Diosin man atirifi catoon ahuun shinanhuunshon icoinra huaa futsafori ahuun tsain yoinon. Mato catoncun man icoinra huashon mato yoia cuscan futsafori ahuun tsain yoicahuun. <sup>7</sup> Ratoranfo catoncun ahuun shinanhuunshon futsafori ashosharanon ato shara huashofafaincahuun. Ratoranfo catoncun ahuun shinanhuunshon ahuun tsain ato tapimasharacahuun. <sup>8</sup> Ratoranfo catoncun ahuunshon futsafo ointi fupi huamafafaincahuun. Ratoranfo catoncun yopaifo inanquin ato unimacain inansharacahuun. Ratoranfo ahuun shinanhuunshon futsafo yononon Diosin shinanma cuscan ato yonosharacahuun. Nan mato catoncun ahuun shinanhuunshon omitsiscaifoahuun ramapaiquin unimaquin ato ashosharacahuun.

### *Futsafohuun noicoincahuun*

<sup>9</sup>—Un mato noiran, —ificatan parayamacahuun. Atoqui shinanchacayamacahuun. Yorafokuun noicoincahuun. Ahuara chacafo noicas-macahuun. Ahuara shara fasi noicahuun. Afo potayamacahuun. <sup>10</sup> Nan man icoinra huafoti noinancahuun. Maton yoracoinfo man noimisi cuscan huafainri futsafo ya noinancahuun. Yoinansharatanancahuun. <sup>11</sup> Nocon Ifo yonoshoni shaniyamacahuun. Diospan Yoshin Sharahunshon unimacain yonoshosharacahuun. <sup>12</sup> Upa Diosin mato shara huashoshquiai cuscan shinancahuun. Nanfo shinain unimacahuun. Ascan omitsiscafiain funayamacahuun. Upa Dios cufinquin unuyamacahuun. <sup>13</sup> Diospan yorafo yopai cuscan ato inancahuun. Futsafo pimasharacahuun. Pushu yopaifoan maton pushu muran ato iquimacahuun. Ato cushusharacahuun.

<sup>14</sup> Mato omitsiscamaifoan ato copiyamacahuun. Ato roayamacahuun. Asca huatama ato shara huacahuun. —Upa Diosin mia shara huairan, —ishon ato yoicahuun. <sup>15</sup> Unimaifo ya unimacahuun. Uaicaifo ya uaicahuun. Omitsiscaifoan ato shinancahuun. <sup>16</sup> Ahuu iquinan tananquima. Upan Diosin mato shinanmapaiyai cuscan nanorisi shinancahuun. Oinanmitsapaimisi iyamacahuun. Niaifofo yasi rafucaquima. Ahuomafo yari rafucahuun. —Un tapia cuscacai futsafoan tapiafo-maran, —ishon anori shinanyamacahuun. Curafiyamacahuun.

<sup>17</sup> Mato chaca huafiainfoan ato copiyamacahuun. Aton ointaifi isharacahuun. <sup>18</sup> Nantifi yorafo ya rafupaisharacahuun. Man asca shara huapafiaino futsan matofu isharapaiyamainocai matohuun nuama. <sup>19</sup> Uhuun yoramishtichin, futsan mato chaca huafiainfoan ato copiyamacahuun. Upa Diosin yoini,

“Mato chaca huaifofofin unfin ato onaintimaicai,”

ishon Diosin yoini. Diosifin chacafo ato onaintimashquiquin. Mancai ato onaintimaima.

<sup>20</sup> “Ato copitama nan mato noicasmaifo fonaincaifoan ato pimacahuun. Nonmaincaifoan ato ayamacahuun. Man ascaiton oincani noco copimaran,”

icashu rafipainonfo. <sup>21</sup> Ascan futsafoan mato chaca huapaiyaifoan marifi copiquiri ato chaca huayamacahuun. Chaca ifo huayamacahuun. Ascata ma shara huafafaincahuun. Asca huaquin man chaca potatiro.

## 13

<sup>1</sup> Upa Diosin yononi cuscan manifoti anoafo niaifofo catononfo. Ascan nantifi niaifo uhuapafo yafi patasharifori nicacoincahuun. <sup>2</sup> Tsoan ato nicacasmaquin Diosinri nicacasmacani. Nan nicacasmaifoan ato onaintimashqui. <sup>3</sup> Non isharashucaí non niaifoqui musutiroma. Chaca huashufi non atoqui musutiroquin. Niaifoqui musushquinma isharacahuun. Man ascaiton mato chaca huatama matohuunoa yoisharanonfo. <sup>4</sup> Niaifofofin Upa Diosin oinmatifo cuscarafoquin mato shara huashcaquin. Ascafia chaca huaashu ratucahuun afocai cashman niaifoanma. Yorafo onaintimatirofo. Nanfofin Diospan oinmatifo cuscarafoquin chaca huaifoan onaintimashcaquin. <sup>5</sup> Asca mato yonoaifoan nicacoincahuun mato onaintimanonfoma. Maton nomuran isca huaquin shinannonfoma, —¡Ohuashta! Upa Diosin yononi cuscan un aamaran, —ishon shinanshcaquima.

<sup>6</sup> Diospan oinmatifo cuscara mato shafatifi yonoshcaquin man isharanon. Ascacun mato pui yocaifoan ato inancahuun ahuunshon mato shara huashononfo. <sup>7</sup> Man ato nifian cuscan inancahuun. Atohuunoa shinansharafain yoisharacahuun.

<sup>8</sup> Tsoa nifyamacahuun. Ascatama noinancahuun. Noinain unuyamacahuun. Nantifi non noiquin Upa Diosin yononi cuscacoin non huatiro. <sup>9</sup> Noco yoiqui isca huani, —Maton ahuinmafo ya iyamacahuun. Ainfofori mato funuma furi iyamacahuun. Rutumitsapaiyamacahuun. Ahuara onuyamacahuun. Futsana fipaiyamacahuun, —ishon noco yononi. Ahuara futsafori noco yoini. —Non yorafo noifin Upa Diosin noco yononi cuscan non aicain, —ishon noco yononi. <sup>10</sup> Non futsafo noicoishocai non ato chaca huatiroma. Ascan non nantifi noicoishofin Diosin yononi cuscan non atiroquin.

<sup>11</sup> Un mato yoiái cuscan acahuun. Nocon Ifo Jesús oti chaima. Non icoinra huaquin tau huani chain. Oshapaimisi cuscara iyamacahuun. Oshapaicai non yonosharatiroma. Nanscarifiai shanicaquima. Jesús yonoshosharacahuun itisharashcaquin. <sup>12</sup> Shafacuaino samamashta shafatiro. Nanscarifiai man chaca huai cuscan cuyocuanaino natianri nocon Ifo man oti chaimaquin. Ascashu faquish muran ica shinantsa ayamacahuun. Chaca shatucoincahuun. Jesús ica cuscan marifi shafacafi icahuun. Chaca huaquima.

<sup>13</sup> Isharacoincahuun. Shafatan non oinsharatiro pacushquima. Nanscarifi aquin Jesús tanashu non isharatiro chaca huatama. Ascan futsafo monoaifo muran atoqui foyamacahuun chaca huashquima. Chaca futsa futsatapafu huayamacahuun. Paunyamacahuun. Ascatari maton ahuinma chotayamacahuun. Ainfofoanri maton funuma chotamaya-macahuun. Ahuara chaca futsafo shinanyamacahuun. Fochishmanantananyamacahuun sinashquima. Futsa shutipaimisi iyamacahuun. <sup>14</sup> Ascatama nocon Ifo Jesucristo icai cuscan acahuun. Ahuarafoan mato chaca huamatiro afohuunoa shinanyamacahuun chaca huashcaquima.

## 14

*Jesús icoinra huaa futsafo tsain chaca huayamacahuun*

<sup>1</sup> Tsain futsari un mato yoi. Tsoan Jesús Ifo huafishocai ahuun tsain shara atirifi tapisharataima matofu ichanainton, —¡Aicho! No fu ichananhuun, —huacahuun. Man shinain cuscan shinanyamaiton afu

fochishmanantananyamacahuun. Aqui tsain chaca huayamacahuun. <sup>2</sup> Mato muran ishon futsan yoitiro isca huaquin, —Un Jesús icoinra huashon nantifi tushu shara un pitiroan, —ishon yoitiro. Ascan futsan yoiquin isca huatiro, —Unfin Jesús icoinra huaquin uncai nami pitiroa. Yonosifin un pitiroquin, —ishon yoitiroquin. <sup>3</sup> Man nantifi pitiroquin a yonosi pitirohuunoa shinanchacayamacahuun. Nanscarifi aquin man yonosi pimisiquin a nami pimisihuunoa isca huaquin shinaryamacahuun, —Atofin chaca huaquin, —ishon yoiyamacahuun. Upa Diosin nantifi nanscarafosi noco imani non ahuun facufo non inon. Ascacun futsaqui tsain chaca huayamacahuun.

<sup>4</sup> Jesús icoinra huafocai maton oinmatima. Upa Dios fustina. Ascacun atoqui tsain chaca huayamacahuun. Upa Diosin ato tapimatiro cayacafi shinaryamaraquimain amaquiri shinancaniquin. Afin ato tapimatiroquin isharanonfo.

<sup>5</sup> —Moisés nocon caifo yononi rato shafatamain non ichanantiroquin Upa Diosihuunoa shinanshquin, —atiriffain Jesús icoinra huafoan anori shinancani. Ascafia atiriffain anorisi shinancanima. Shafatifi ichananfo Upahuunoa shinanshcaquin. Ascacun nantifiton maton nomuran man shinain cuscan acahuun. <sup>6</sup> Atirifoan shinanfo rato shafatamain ichananti shafa shara itiroquin Upa Diosihuunoa shinanshquin. Nanfoanri nocon Ifon Jesús shara huapaicani. Ascan futsafoancai anori shinancanima. —Shafatifi nanscarafosi non Diosinhuunoa shinantiro. Ascatari nan ratoran shafatafin non nami pitiroquin. ¡Aicho! Upa Diosin min noco nami inanquin non pinon, —ishon shinantirofo. Nanfoanrifi nocon Ifo Jesús shara huapaicani. Ascashon futsafoan nami piyamaifoan yonofosi pitiro. Nanfoanri noco Ifo Jesús, —¡Aicho! —huatirofo. Nan rafutan Dios shinansharapaicani.

<sup>7-8</sup> Non niyoshocai nofin non apaiyai cuscan fusti non shinantiroa. Upa Diosin noco amapaiyai cuscan non shinantiro. Nonfin ahuunafquin. Nanfin nocon Ifonquin. Noncai nofin catontiroa rato shafatamain non naicain. Ascan niyoshon iyamarai non naitianri non nocon Ifonna. Niyoshon non nocon Ifo tanasharapai nocoqui unimanon. Non naitian non nocon Ifo shinantiro non ahuunacoin.

<sup>9</sup> Criston noco nashoni. Maia murannoashu funicainshquin. Ascacan natian man nia. Non niano yafi non nano nocon Ifo iishquin. <sup>10</sup> ¿Ahuuscain icoinra huua futsan ahuun ifo man ipaiyai chaca huayamaraquin shara huairan huashquin? ¿Ahuuscain futsahuunoa man shinanchacamun? —Acai ahuamaran, —ishon man shinan. Ointi-aquimayamacahuun nantifi non chipo Dios icano aqui nocoicain. Nantian noco yoishquin nonmain shara huayamaraquin non chaca huamisiquin. <sup>11</sup> Nannori Diosin tsain Isaías cununi isca huaquin,

“Iconcoin un niaquin. Iconcoinri nantiffain manifoanna anofo uqui nocoshceni ua ratoconun mai chachishon yoishceni, ‘Diosin, icon min Diosinran,’ ishon nantiffain ua yoishcaniquin.”

<sup>12</sup> Ascan nantiffain non Upa Diosin ointaifi non amisi cuscan noco yoifain non shinanmisi cuscan noco yoipacushquin.

*Futsafo chaca huamayamacahuun*

<sup>13</sup> Ascacun afanan icoinra huafokuunoa tsain chaca huayamacahuun. Noncai ahua chaca huaima noco oincashon arifi chaca huanonfoma.

<sup>14</sup> Jesús uhuun Ifocun un mato yoisharapai. Mun icoindra huacoinna nantifi yonosharafo non nami sharari non picucai noco chaca huamaima. Asafia tsoan ahuun nomuran shinanquin isca huai, —Un na tushu piquin un chaca huatiroran, —ishon shinanquin atocai tushu pitiroma. —Un pishon uhuun nomuranshon un shinanchacatiro, —ishon yoitiro. <sup>15</sup> Mi futan Jesús icoindra huaton ointaifi a nami min pitiroma piyamacahuun ahuun nomuran shinanchacanonma. A noishocai min ahuun ointaifi min pitiroma. Nocon Ifon Cristo ahuunoashuri nani. Ascan a pitiroma piquin min futsa shinanchacamatiro. Ascacun ahuun ointaifi piyamacahuun Jesús cachiquiri huanonma funoshquima.

<sup>16</sup> Man acai cuscan man shinanraca sharacoin. Ascan futsafoan oinquin shinanchacanonfoma shaturiscacahuun matoqui shinanchacanonfoma. <sup>17</sup> Ascano shinancapon. Non pifain aqui ayafain non huatocai nocon nomuran noco shinansharamatiro. Upa Diosin noco iquinano non ahuun Yoshin Sharahuunshon Jesús cuscara isharcain nocon ointi non unimacointiro. <sup>18</sup> Nocon Ifo Jesús non yonoshoraino Upa Diosin nocoqui fasi unimasharatiro. Yorafoanri nocohuunoa shinansharatirofo.

<sup>19</sup> Ascacun icoindra huaa futsafo ya icoinsharacahuun. Jesushuunoo shinanmatananchahuun a cuscara shara iishcaquin. <sup>20</sup> Icoindra huaa futsafoan tushu futsa piyamaiton aton ointaifi a tushu piyamacahuun. Diosin yoini nantifi tushu sharafiacun aton ointaifi piyamacahuun. Man piquin aton nomuran man shinanchacamatiroquin. Ascaquin man ato pacumatiroquin afanan Jesús tananonfoma. <sup>21</sup> Ascan icoindra huaa futsafoan shinanquin isca huaquin, —Diosin yononi cuscan un nami pitiroma. Un ahua paari ayatiromaran, —ishon shinanquin shatucahuun ato pacumashquima. Ahuarafoan ato pacumatiro shatucahuun pacunonfoma. <sup>22</sup> Ascano afohuunoa man icoindra huaa cuscan marusu maton nomuran shinanchahuun. Upa Diosin fustifin man yoitiroquin. Man man tapian nantifi man acai cuscan nanfo sharacoin. Ascafia ai atirifoan tapisharataicanima. Ascano pifain ayafain huaquin mato nomuran man shinantiro man chaca huaa cuscan. Asafia shatucioan-shufin maton nomuran man unimatiroquin. <sup>23</sup> Ascashon tsoan ahuun nomuran shinanquin isca huai, —Afo piquiraca un chaca huaicati, —anori shinanfiaquin piriaquin chaca huatiro. Tapishoma shara iyamarai chacafiacun un pia. Ahuara futsan tapishoma aquiraca, —Un chaca huaicati, —ishon shinantiro. Tapishoma aaqu chaca huai.

## 15

*Mafin man apaiyai cuscan huatama futsan apaiyai cuscan huashocahuun*

<sup>1-2</sup> Non icoindra huaitin Diosin noco yoini non nantifi tushu pitiro. Ascan icoindra huafoma non ato funaiquimashta yositiro atofu fochishmanantanantama. Nofin non apaiyai cuscan fusti non atiroma. Nan icoindra huaa futsafohuuri non ramapaitiro shinansharanon nocon Ifo non ato tanamasharatiro. <sup>3</sup> Shinancapon. Nocon Ifon Cristo afin apaiyai cuscan fusti shinanpaonima. Ascano ahuunoa Diospan tsain cunuquin isca huani, —Upan, un mia nicacoin. Ascan mia chaca huapaicaquin uari roacanian, —ishon cununi. <sup>4</sup> Nantifi Diosin tsain cunupacuni noco

tapimashquin. Cununiri non icoinra huashon ahuara chaca finonfi-aquin non tunucoinnon. Ahuun tsainhuunshon nocon ointi non fupi huamashon non tapitiro nocon Ifo fu nai muran chipo afu ipashquin afanan ahuara chaca finonshquima. <sup>5</sup> Upa Diosin non chaca finoainton noco mutsismatiro nocon ointi unimacain nocon Ifon Jesucristo man tanasharaino mato nannorisi shinanmati. <sup>6</sup> Ascano nannorisi shinanquifin non nocon Ifo Jesucristo ahuan Apa nan oi fusti nicatsa non ahuunoa yoisharatiro.

*Nan tsain shara Jesucristohuunoa Israelifoma yoini*

<sup>7</sup> Criston nocoqui unimaquin noco iquina ahuan yorafo non inon. Ascan marifi futsafo ya yorahuatanancahuun. Man ascaino Diosihuunoa futsafoan shinansharatiro. <sup>8</sup> Un mato yoicain Jesucristo mai ano oni Israelifoan aton oinmati cuscara iquiyoi. Ascano Upa Diosin nocon shunifo yoini cuscan iconcoincun non tapitiro. <sup>9</sup> Mani futsafoanri icoinra huashon yoishcani isca huaquin, —¡Aicho! Upa Diosin nocohuun ramapaiquin ahuan Furun nocoqui nichini. Noco numanon. Upa Dios shararan, —ishon mani futsanfoan yoishcani. Nannori Diosin tsain cununi isca huaquin,

“‘Ascan un mani futsafo mihuunoa un yoisharashquin. ¡Aicho Dios shararan!’ ishon un mihuunoa ato yoishquin. ‘Un mihuunoashu fanainsharashquiran,’ ”

ishon cununi. <sup>10</sup> Afanan Diosin tsain cunuquin isca huani,

“Mani futsafoan nan Israelifo ya unimatanancahuun. Marifi man atofu Diospan yora iishquicai,”

ishon cununi. <sup>11</sup> Afanan cununi isca huaquin,

“Mani futsanfoan, nocon Ifohuunoa yoisharacahuun. Nantifi manifoti anoashu nanscasi aqui fanain ishocahuun,”

ishon cununi. <sup>12</sup> Isaías arifi isca huaquin cununi,

“Nocon shuni Isaí ahuan funapan manifoti ato iquishquin. Shinanquin isca huashquin, ‘Nan fusti nocon Numamisi inonran,’ ishon yoishquicani,”

ishon Isaías cununi.

<sup>13</sup> Ascan Upa Diosin fustiton maton nomuran imasharafain mato unimamatiro man afu ipanon icoinra huashu. Ascano ahuan Yoshin Sharapan ahuan curushhuunshon noco yoini cuscan nantifi noco ashonon, ishon man fasi icoinra huapainon.

<sup>14</sup> Uhuun yoramishtichin, un icoinra huai un oianfin man noinantanancoianquin. Jesushuunoi tapishara futsafori ato tapimashquin. <sup>15-16</sup> Ascacun un ranotama afanan afohuunoa un mato shinansharamana. Diosin uhuun ramapaiquin ua catonni Jesucristo ahuan oinmati un inon nan tsain shara ahuunoa un mato tapimanon. Ascan ua nichini un mato Jesús icoinra huamanon. Diospan Yoshin Sharahuunshon maton chaca man shatua a cuscara shara iishquin. Ascano Upa Diosin matoqui unimacoinqui ahuan yorafo mato imai.

<sup>17</sup> Ascacun un fasi unimaicai nocon Ifo Jesucristo ua catonni Upa Dios un yonoshonon ahuunoa uhuun caifomafori un ato yoinon. <sup>18</sup> Criston ahuan curushu ua inan uhuun caifomaforan Diosin tsain nicacoinon. Un ato yoimisi cuscan Upa Dios nicacoinmisifo. Un Cristo yonoshona cuscan fusti un tapia. Futsafoan Criston yonoshonahuunoa uncai tapiama. <sup>19</sup> Ahuan Yoshin Sharapan ahuan curushhuunshon tsoan

oinyomisima cuscara un ato isma. Ascan un nan maitio Jerusalén anoshon yoifainquin Iliria ano un nantifi nan tsain shara Jesucristo-huunoa yoiquin rupian. <sup>20</sup> Uncai futsan Jesushuunoa yoimisi anori un capaimisi. Tsoan Jesushuunoa nicayomisima anorifi un capaimisi ato tapimashquin. <sup>21</sup> Nannori Isaías Diospan tsain cununi isca huaquin, “Tsoan ahuunoa nicayomisima nicacaquin tapinonfo,” ishon cununi.

*Pablonun Roma ano cashquin shinanni*

<sup>22</sup> Ascacun un mato ari capaimisi. Ascafia un mato oin capaifiain un camisima. Ahuara futsan finoanshu un nituri niturimisi.

<sup>23</sup> Ascafia natian mun cashcu futsa ato Jesushuunoa yoiqui anaitian. Ascan mun itishara mato ari cashquin. Un fari ichapa camisima. Nantishon tapiquin un mato ari capaimisi. <sup>24</sup> Un España ari caquin mato ano rutiashu un matofu tsainshquin. Non yoinonansharanon. Mato anoashu un caiton ua tushu inanshcaquin un España ari nocosharanon.

<sup>25</sup> Ascafia natian un Jerusalén ano cayoicai. Jesús icoinra huafoan ua nichini icoinra huaa futsafo un ato pui inanon. <sup>26</sup> Macedonia yafi Acaya anoafu unimacain icoinra huaa ahuuomafo Jerusalén anoafu pui inanpainifo. <sup>27</sup> Unimacaquin ato inanpaiquin. Yoinifo isca huaquin, —Jerusalén anoafu Jesushuunoa yoimisifoan nocoqui nichini. Noco nichiamacun na tsain shara non nicacuanama. Ascacun nan non aya cuscan nofiri non ato inanpai ato shara huaquin, —ishon yoiaifoan.

<sup>28</sup> Ascan un ato inanfaini un España ari caquin un mato oinfaini cai. <sup>29</sup> Mun tapian un mato ano nocoshon nocon Ifohuunshon un mato yoisharashqui maton nomuran man unimanon.

<sup>30</sup> Tsain futsari un mato yoipai. Man nocon Ifo Jesucristo noishon ahuun Yoshin Sharahuunshon uari noiquin ua Upa Dios cufishocahuun un yonosharashonon ahuaton ua nitun huanonma. <sup>31</sup> Ua cufishocapun Upa Diosin ua cushunon Judea anoafu icoinra huamafoan ua ahuusca huanonfoma. Ua cufishocahuun un icoinra huafo Jerusalén anoafu pui un ato inainno unimacoincai finonfo. <sup>32</sup> Nan ato inanquin anaititan Upa Diosin ua nichiano un unimacoin matoqui nocotiro. Ascacun non yoinonansharatiro nocon ointi non unimatananon. <sup>33</sup> Diosin nocon ointi noco shara huashomisi matofu isharanon. Nanscarari ipainon.

## 16

*Pablon ato tsain shara fomani*

<sup>1-2</sup> Nocon yorahuan Febe Cencrea anoashu matoqui nococun shara huacahuun. Nan ainfoan nocon Ifo tanasharacoianquin. Cencrea anoafu icoinra huaafu shara huamisiquin. Yorafo shara huamisiquin. Uari shara huamisi. Fasi nocon Ifohuunashu yonosharamisi. Ascacun yopai cuscan ashocahuun.

<sup>3</sup> Priscila futan Aquila u futan Jesucristo yonoshosharamisifo. Ua ato yoisharashocahuun. <sup>4</sup> Futsafoan ua rutupaiyainfoan nan rafutan ua numaifoan ato rutuqui rashquinifo. Uhuun caifomari Jesús icoinra huafoan ichanancashon yoimisifo isca huaquin, —Priscila yafi Aquila non fasi atohuun noiran, —ishon yoimisifo.

<sup>5</sup> Ato yushu ano ichananshori ua ato yoisharashocahuun.

Uhuun yorashta Epeneto ua yoishocahuun. Nantofin Asia anoshon Jesús icoinra huaquin tau huani.

6 María mato yonosharashomisiri ua yoishocahuun.

7 Uhuun yoran rafuri Andrónico yafi Junias ua yoishocahuun. Nan rafu ufu cunu muran iquinifo. Jesús fu rafumisifoan atohuunoa yoisharamisifo. Un Jesucristo icoinra huataima nan rafutan icoinra huaquin tau huanifo.

8 Ampliatohuun un noi. Arifi nocon Ifon catonni. Ua yoisharashocahuun.

9 Urbano u futan Jesús yonoshomisi nanrifi ua yoisharashocahuun uhuun yorashta Estaquiri ua yoisharashocahuun.

10 Apeles fasi nocofunu shara. Upa Diosin aqui unimai. Atori Jesús yonoshosharamisi. Nanrifi ua yoisharashocahuun.

Aristóbulo yafi ahuun yorafori ua yoisharashocahuun.

11 Uhuun yorashta Herodión ua yoisharashocahuun.

Narciso yafi ahuun yorafoan nocon Ifo icoinra huaafo atorifi ua yoisharashocahuun.

12 Trifena yafi Trifosa non nocon yorashta Pérsida ua yoisharashocahuun. Nan ainfofoan nocon Ifo fasi yonosharashomisifo.

13 Nocon Ifoan Ruforifi catonni. Ahua uhuun uhuacoin cuscara. Ua cushusharamisi. Nan rafuri ua yoisharashocahuun.

14 Asíncrito non Flegonte non Hermes non Patrobas non Hermas non icoinra huaa futsafo atofu icafo ua yoisharashocahuun.

15 Filólogo non Julia non Nereo yafi ahuun poi non Olimpás non nantifi icoinra huaa futsafo atofu icafori ua yoisharashocahuun.

16 Nantifi noinancanashu muninintanancahuun. Nantifi Jesús icoinra huafoan ichananshon maifoti anoashon mato yoisharanonfo.

17 Uhuun yoramishtichin oinfain. Mato fu ichananmisifo futsafoan mato shinanchacamapai afanan Jesushuunoa man nannorisi shinanonma. Non mato cayacafi tapima cuscan nanfoan anorima mato tapimapai. Mato amaquiri shinanmapai afanan icoinra man huanonma. Atomaqui icahuun. 18 Afoancai nocon Ifo Cristohuunshon yonomisifoma. Nanfoan ahuara fipaiyai fo fustisi shinanfo. Diosin tsain tapisharafoma aton tsain fustihuunshon ato parapaicani ato amaquiri shinanmashcaquin. 19 Nantifiton nicafo man nocon Ifo tanasharacoincun. Asca un matoqui unimacoinni. Ahuara sharafihuunoa tapicoincahuun. Manmain ahuara chacahuunoa tapiyamapainon. Afohuunoa shinaryamacahuun.

20 Upa Diosin nocon ointi isharamai cuscan nanton samamashta matomaquinoa Satanás anaiticoín mato afanan ahuusca huanonma. Nocon Ifo Jesús mato shara huashopainon.

21 Timoteo un futan Jesús yonoshomiton mato yoisharapai. Lucio non Jasón non Sosípater nanfo uhuun yorafoan mato yoisharacani.

22 Unquian, Tercio, un natian Pablo cunushoni. Urifi nocon Ifohuunshon mato yoisharapai.

23 Un Gayo pushu muran icun ua cushumisi. Icoinra huaa futsafori ahuun pushu muran ichanamisifo. Afoanri mato yoisharafa. Erasto yorafoan aton pui cushushomisi nocon yorahuan Cuartori mato yoisharapai.

*Ahuun unutaqui Dioshuunoa yoisharani*

24 Nocon Ifo Jesucristo matohuun ramapai. Nanscari ipainon.  
25-26 Upan Diosin mato cushusharanon. Un Jesushuunoa mato yoimisi



cuscan afi ahuun curushu mato inantiro man tanasharanon. Ipaoni tsoancai Jesucristohuunooa tapiyopaonifoma. Natian nantififain tapitirofo Upa Diosin nan nipanacaton noco nichini Furun Jesucristohuunooa non yoinon. Ishquiai cuscan Upa Diosin ato yononi cuscan nannoricoin cununifo. Manifoannatifoan Jesús icoinra huafain nicasharanonfo. <sup>27</sup>Nocon Diosin fustitofin nantifi tapicoianquin. Nocon Ifon Jesucristohuunshon nantififain ahuunooa yoisharapacunonfo. Nanscasi ipanon. Amen. Nanti uhuun tsain unutaqui un mato yoi.

Pablo

## Pablonun Corinto Anofo Cunu Fomani

*Pablonun Jesús icoinra huafo Corinto anofo ato cunu fomani*

<sup>1-2</sup> Uhuun yoramishtichin un mato cunu fomai. No futan Jesús tanamisi Sóstenes u futan mato cunu fomai. Upan Diosin ua catonpaiguin ua catonni Jesucristo fu rafunon ahuun tsain Jesucristohuunooa un yoifoanfafaion. Ascan Jesucristo ua nichini un ahuun tsain shara nantifi manifoti un ato yoifoanfafaion. Corinto anofoan manfin Diospan yorafoquin. Man ichananfafainmisi Diospan tsain tapisharashquin. Diosin mato catonni Jesucristohuunooashu man ahuun yora sharafo inon. Ascacun un mato cunu fomai. Mato fustisima un futsafori cunushoni. Nocon Ifo Jesucristo Ifo huacun un atorifi na cunu un ato tapimapai. Nan nocon Ifofin aton Iforiquin.

<sup>3</sup> Un fasi mato shinain. Diosin matohuun ramapaicain, maton nomuran shinanmasharanon. Upa Diosin futan Furun Jesucristo nanfo mato ashoni.

*Cristo ahuaara sharafo noco ashotiro*

<sup>4</sup> Mun tapian Jesucristo matohuun noiquin ahuaarafo mato tapimani ahuun ointi cuscara shara man inon. Nanscara tapishon un Upan Dios cufinquin isca huafafainni, —¡Aicho! Upa Diosin, min Corinto anofo ahuaara sharafo Jesucristohuunshon min ato tapimanan, —ishon un cufifafainni. <sup>5</sup> Icon Cristo matofu rafuaino ahuunshon man tapisharacoian. Ascan ahuun shinanhuunshon shafacafi man yorafo Cristohuunooa yoisharatiro. <sup>6</sup> Non mato Jesushuunooa yoini cuscan Diosin maton ointi fiananan huua ahuun ointi cuscara shara man inon. Ascacun man Jesús icoinra huashon man oinmana.

<sup>7</sup> Ascashu Upa Diosin Yoshin Sharahuunshon mato imapaiyai cuscan man man iquina. Icoinra huua futsafoan iquina cuscan marifi man man iquina maton nomuran Diosin shinansharamanon. Nantianri nocon Ifo man fasi oinpai afanan oaiton. <sup>8</sup> Aqui nocoaitian mato cushusharayoshquin. Ahuun curushu mato inanyoshquin man tanasharanon. Ascano nocoshon ratofomain afu ipacanicain yoifain ratofomain omitsiscapanacafo muran focanicaí nantifi yoipacushquin. Nantiantari mato yoishquin isca huaquin, —Un maton chaca soashoni. Ascano tsoancai “Manfofin chacaforan,” mato huatiroma. Ua cuscara shara un mato imairan, —ishon Jesús mato yoishquin. <sup>9</sup> Upa Diosin mato catonni Furun nocon Ifo Jesucristo fu man rafunon. Upan noco yoia cuscan man aicain.

*Jesús icoinra huua Corinto anofoancai anorifosi shinancanima*

<sup>10</sup> Uhuun yoramishtichin un mato yoisharapai. Nocon Ifo Jesucriston ua yonoaino un mato yoi nannorifosi man shinanon. Shinan futsacaquima Jesucristo mato shinanmapaiyai cuscan nannorifosi shinancahuun.

<sup>11</sup> Uhuun yoramishtichin Cloé ahuun yorafo uqui fucashon ua tapimanafo man fochishmanantanafainaiton. <sup>12</sup> Atirifoan yoiafo, —Nonfin Pablon tanamisifoquin non shinain cuscafin cayacaficoinquin. Futsafoancai cayacafi shinancanimaran, —ishon man yoia. Futsafoan

yoiafori, —Nonfin Apolos tanamisifoquin, —ishon yoiaifono. Fut-safoanri, —Nonfin Pedro tanamisifoquin, —ishon yoiaifonori. Fut-safoanri, —Nonfin Cristo tanamisifoquin, —ishon man yoifafaini.

<sup>13</sup> Uhuun yorafoan ascacai sharama. Cristocai nocon ointi rananya imapaima futsa futsa huaquin non shinanon. Cristo tsain caya-cafi fusti. Mato pashcanan huaima futsa futsa huaquin man shinanon. Uncai ihui coyan iquinanhuunoashu mato nashonima. Man unu muran iquimamupacunitian Jesús tanacoinshon man futsafo is-mashquin chaca shatushon Jesús Ifo huashquin. Uncai tsoa unu muran iquimanama ua tanafain ua ifo huanon. <sup>14</sup> Un unimai. Uncai tsoa futsa unu muran iquimanama. Crispo yafi Gayo nan rafusi un unu muran iquimani. <sup>15</sup> Ascacucái tsoan yoitiroma isca huaquin, —Un unu muran iquimamua Pablo tanamisi ishquiran, —ishoncai tsoan yoitiroma. <sup>16</sup> ¡Aira! Nantian mun shinain. Estéfanas yafi ahuun yorafori un ato unu muran iquimani. Un shinanfin un tsoa futsa unu muran iquimanamaquin. <sup>17</sup> Cristocai ua yononima un yorafo unu muran iquimacunon. Ua yonoa un ahuunoa tsain shara yoinon. Ufin shinanfaincai un mato yoiaima. Ufi shinanfaincai un mato Jesucristo icoinra huamatiroma. Uhuun shinanpan mato yoiaiton nancai Diosin ahuun curushma Jesucristo mato ihui coyan iquinanhuunoashu nashoni maton chaca soashoshquin. Nan tsain fustihuunshon Upa Diosin ahuun curushhuunshon mato numatiro.

*Upa Diosin nantifi tapicoian ahuara futsa apaiquin atiro Cristohuunshon noco oinmapacumisi*

<sup>18</sup> Ascashon Jesús ato nashoni nicacani a icoinra huaamafoan isca shinancani, —¿Tsoanco icoinra huatiromun Jesús ihui coyan iquinanqui noco nashoni nocon chaca soashoshquin? Na tsaincai ahuama, —ishon yoicani. Ascashu nanfo funocoinceni. Omitsiscapanacafo muran focani. Ascan nonfin icoinra huaicai. Ascano noco nimapacunaca non afu ipanon. Diosin ahuun shinanhuunshon Jesús noco nashoni nocon chaca soashoshquin. Ahua futsacai noco nimapacutiroma non afu ipanon. <sup>19</sup> Diosin tsain cunuquin isca huani,

“Nan ua icoinra huamafoan shinancaquin isca huacani, ‘Non tapicoian. Nocon mapon shinansharafain non ahuara huatiro nonfin tapisharaquin,’ ishon shinancani. Ascafiashon ahua tapiafoma. Unfin un ato oinmanicain. Afoan shinainfo cuscacai un ato huaimaima. Ipaitsi shinanforan,”

ishon Diosin yoini.

<sup>20</sup> Ascan cunu tapisharafiashon Diosin shinain cuscacai huacanima. Nanfofin Diosin atoti oinmaniquin amaquiri shinainfo cuscan. —Nonfin ahuamamishti tapisharaquin, —ifiafoan Diosin ato ismai afoancai ahuashta tapiafoma. <sup>21</sup> Tsoanshtacai aton shinanpan Dios onantirofoma. Diosin fustitofin nantifi tapisharacoianquin. Icoinra huamafoan yoiquin isca huafo, —Jesús icoinra huafoan ahuunoa yoiafo fasi amaquiriran, —ishon yoifiafo Diosin nocon chaca soashona non afu nipanon nonfin icoinra huaicai. <sup>22</sup> Ascano uhuun caifo Israelifo iscamisifo, —Diosin nai muranshon noco ahuamamishti oinmanaiton Jesushuunoa yoiafo cuscan non icoinra huatiroman, —ishon shinancani. Nan Israelimafori iscamisifo, —Noco Jesucristohuunoa yoiaifo cuscacai

non tapitiroma. Ascacun non icoinra huatiroma. Nan ahuara non tapi-afin non icoinra huatiroquin, —ishon yoimisifo.<sup>23</sup> Anori ifiainfoanno non isca huamisi, —Jesucriston ihui coyan iquinanqui noco nashoni nocon chaca soashoshquin, —ishon non yoimisi. Ascafiacun uhuun caifo Israelifoa yoiquin isca huafo, —Ihui coyan iquinanqui mastancai nocon Cristo itiomaran, —ishon shinancani. Israelimafoan Cristohuunoa nicacani aqui cashupaicani, —Tsoancai nanscara icoinra huatiroma. Futsan noco nashoni nocon chaca noco soashoshquin, —ishon yoimisifo.<sup>24</sup> Ascafiainfono nan icoinra huafoti Diosin noco catonni. Israelifo yafi mani futsafo Cristohuunshon nocon chaca soashonano non afu ipanon. Non tapia Cristohuunshon Upa Diosin ahuamamishti huamisi. Ahuun curushhuunshon noco numani. Atofin nantifi tapi-coianquin. Cristohuunshon noco numani non afu nipanon.<sup>25</sup> Icoinra huamafoan yoiqui isca huafo, —“Jesucristo noco nashoni,” ishon noco yoifiacaquin fasi amaquiricoi icoinra huafo. Yora mapo sharayatoncai anori shinantiroma, —ishon icoinra huamafoan yoimisifoquin. Anori yoifiafono Diosin ahuun shinanhuunoashu Jesucristo noco nashoni. Diospan ahuun shinancai a icoinra huamafoan aton shinan cuscarama. Atonfin fasi cayacafi shinanmisiquin. Icoinra huamafoan yoimisifo isca huaquin, —Non fasi tapicoianran, —ishon yoifiacaquicai icon yoicanima. Fasi amaquiri shinancani. —Non ahuamamishti huatiroan, —ifiamisishacaquin afocai afin numatiroma. Ascafiatan aforicai afin chaca soamutirofoma. Upa Diosin fustiton ahuamamishti huatiro.

<sup>26</sup> Uhuun yoramishtichin shinancapon. Diosin mato catoantaima ahuu cuscaramain man iyomisiquin. Man fustirasiton man cunu tapi-aino maton muranri niaifo fustirasi. Nan Jesús icoinra huamafoan yoiquin isca huafo, —Afocai ahuamaran, —ishon matohuunoa yoicani.<sup>27</sup> Nanfoan shinancai man ahuama. Ascafia Diosin mato catoan tapicanashu chipo rafipaitirofo. Shinanfo isca huaquin, —Nonfin ahuamamishti huatiroquin. Jesús icoinra huafoan futsa huaquin shinantiroforan, —ishon shinanfo. Ascatari yoirafo isca huaquin, —Non shinantiro cuscacai afoanri shinantirofoma, —ishon yoirafo. Anori shinanfiacashon chipo tapitirofo Dioshuunshon non ahuamamishti huatiro cuscan. Tapicanashu rafipaitirofo.<sup>28</sup> Ascafiactan shinancaquin isca huafo, —Afocai sharamafinquin non ato oinpaimaran, —ishon matohuunoa yoifiaifono Diosin mato catonni. Mancai ahuashtamaran mato huafiaifono Diosin mato catoan man ato oinmanon afocairoconfin ahuamaquin.

<sup>29</sup> Ascano tsoanshtacai Diosin ointaifi, —Un tsoa cuscaraman, —ishon yoitiroma.<sup>30</sup> Dioshuunoashu Jesucristo ahuun yorafa man inon. Cristohuunshon noco cayacafi tapimafain ahuun ointi cuscara noco imashquin noco nashoni nocon chaca soashoshquin non afu nipanon.<sup>31</sup> Ascashon non Jesús icoinra huashucal non cacapaimisi itiroma. Diosin tsain cunuquin isca huani, —Tsoancai yoitiroma isca huaquin, “Un ahuamamishti un tapiaran,” ishoncai yoitiroma. Anori itamarocon, “¡Aicho! Nocon Ifo Jesús ua numa. Ascacun natian ahuunshon un tapisharatiroan,” —ishon yoitiro.

## 2

*Cristo ihui coyan iquinanqui mastanifo cuscan yoinifo*

<sup>1</sup> Uhuun yoramishtichin un matoqui noco funashon Cristohuunshon Upan Diosin mato ashoni cuscan unfin shinansharafaincai un mato yoia. Diosin ahuun shinan fustihuunshofin un mato yoiaquin. Diosin ua shinanmanaino un mato yoia. <sup>2</sup> Un matoqui nocoataima un shinanquin isca huani, —Uncai ahua futsa ato yoishquima. Jesucristo noco ihui coyan iquinanhuunoashu noco nashoni cuscan. Nanhuunoa fusti un ato yoishquiran, —ishon un shinanni. <sup>3</sup> Ascano matoqui oshon uncai shinanqui isca huama, —Unfincoin un ato cayacafi yoitironan, —ishoncai un shinanma. Diospan Yoshin Sharahuunshon un mato yoiamaquicai un mato cayacafi yoisharacuanama. Un ahuun Yoshin Shara fasi yopacoian cuscan un mato cayacafi yoinon. Ascano un ratuyamua ua Diosin yonoa cuscan un ayamaishafain marifi man funocuana. Uhuun nomuran un shinanchacatana un ayamai shafain. <sup>4</sup> Ascashon un mato Jesucristohuunoa yoimisi cuscan uhuun mapon shinanfaini un mato yoitamarocon Diospan Yoshin Sharapan ua shinanmapaiyai cuscan un mato yoia. Un mato yoiaino ahuun curushhuunshon man icoinra huani maton ointi fianananhuashquin ahuun ointi cuscara iishquin. <sup>5</sup> Ascan nocofunun shinanpancai man icoinra huama. Diosin shinahuunshon man icoinra huama.

*Diosin Yoshin Sharahuunshon non shinansharatiro*

<sup>6</sup> Ascan Diospan tsain nicasharaifoan man tapiafo non Diospan Yoshin Sharahuunshon cayacaficoi yoiaiton. Ascan futsafoanri cunu tapisharafiashon Diosin shinain cuscaai tsoa anori shinainma. Aton shinanpancai non mato yoia. Aton niaifofoan shinainfo cuscaricai non mato yoia. Ascashufi afo funocaniquin. Nan shinainfo cuscan man cuyoi futsui. Ipaitsi shinancani. <sup>7</sup> Non mato Diosihuunshon yoimisi cuscan huafaincai tsoan tapiyopaonima. Cristo yorafotihuunoashu nashoshquiai cuscan Diosincai ato tapimayopaonima. Diosin mai onihuataima shinanquin isca huani, —Uhuun Furumun ato chipo nashoshquin nan a icoinra huafoti ato nimapacushquin, —ishon shinanoni. <sup>8</sup> Un na tsain mato yoia cuscaai niaifofoan tapiyopaonima. Ascashon Jesús rutunifo. Tapicashocai tsoan nocon Ifo Jesús Diospan furun sharacoin masta cuanifoma. <sup>9</sup> Ascan Diospan tsain cunuquin isca huani,

“Tsoan Dios noicoiainton ahuamamishti shara ato ashoin, tsoan oinyomisima cuscara sharafo ato ashofain tsoan nicayomisima cuscarari ashofain. Tsoanshta aton nomuran shinanoyomisifoma sharashtacoin ato itishara huashon,”

ishon Diosin tsain cununi. <sup>10</sup> Ascashon non Dios noiaiton ahuun Yoshin Sharapan noco tapimai. Ahuun Yoshin Sharapan nantifi tapicoian. Upa Diosin shinain cuscan ahuun Yoshin Sharapan tapicoian. <sup>11</sup> Yorafoan aton nomuran shinainfo cuscaai tsoa futsan tapitiroma. Arusu fusti tapitiro. Nanscarifiai Upa Diosin shinain cuscan ahuun Yoshin Shara fustiton tapicoian. <sup>12</sup> Nan Upa Diosin ahuun Yoshin Shara nocoqui nichini noco tapimapaiyai cuscan noco tapimanon. Nan icoinra huamafoan Diosin tsain shinancanima. Ascashori afoan shinain cuscaai Diosin noco tapimanima.

<sup>13</sup> Ascashon yorafoan noco tapima cuscan non mato yositamarocon Diosin ahuun Yoshin Sharapan nocon nomuran noco tapimana cuscan huafain non mato tapimai. Ahuun tsain iconcoin fusti. Ascan norifi ahuunshon non mato iconcoin tapimai. <sup>14</sup> Ascano ratoranfon Diospan

Yoshin Shara atofu iyamaino nanfoanfin Diosin Yoshin Sharapan yoia cuscan nicacasmacani. Ascashu iscatirofo,

“Tsoantsi nan tsain icoinra huaiquin. Nan tsain fasi amaquiriran,”

ishon shinancani. Diosin Yoshin Sharapan shinain cuscacai tsoan tapiama. Nanscacun atofu iyamainocai yoia cuscan tapiafoma. Diosin Yoshin Shara fustiton ato tapimatiro. <sup>15</sup> Ascaino ratoran futsa Diosin Yoshin Shara afu icaino Diosin ato tapimapaiyai cuscan tapitirofo. Rato-caimain chaca iyamarai sharaquin Diosin Yoshin Sharapan ato tapimai. Ascashi Diosin Yoshin Shara fu rafuamatocai a Jesús icoinra huaafo onantiroma. <sup>16</sup> Diosin tsain cunuquin isca huani, —Tsoancai nocon Ifoan ahuun nomuran shinain cuscan huafain tapitiroma. Tsoanricai Dios tapimatiroma, —ishon cununi. Ascfia nan non icoinra huafo Criston shinain cuscan huafainri noco tapimana.

### 3

#### *Nonfin Diospan oinmatifoquin*

<sup>1-3</sup> Facu rama caiantocai tsain tapiama. Yosishon tsain nicatiro. Nanscarifi aquin Jesús rama icoinra huafofin facu rama caian cuscarafuquin. Diosin aton Upafiacuca tsoan ahuun tsain atirifi tapisharataima. Manfin nanscarafuquin. Rama Jesús ifo huayamafishu man nanscasi aamisiquin. Diosin tsain man man nicafiaicai a yoia cuscan man aama. ¡Ohuashta! Uhuun yoramishtichin manfin Diospan tsain nicamisima cuscarafuquin. Rama Jesús icoinra huafo cuscara. Nan Diospan Yoshin Shara ato iquinafoanfin ahuun tsain nicasharatirofo. Mancai ascarafoma. Ascan un mato Diosin tsain yoipaiyai cuscacai atirifi un mato yoitiro. Facushtan shoma fusti aiyotiro namicai piyotiro. Nanscarifiai atirifi Diosin tsain man nicafiaquicai ahuun tsain man tapiyotiro. Nanscacun un ichapamashta mato yoyotiro. Ahuun tsain futsafori un mato yosipaifia mancai tapisharataima. Ascano mancai itisharama paratama nicashquin. Manfin Diospan Yoshin Shara fu rafuama cuscarafuquin. Ascashu futsafo ahuaraya cuscan man ato fuchipaifain fochishmanantanainsi man ica. Nanscarafocai Diosin tsain nicacanima. Marifi man nanscarafu. Ascashu Diospan yorama ointsa man aaquin. <sup>4</sup> Atirifi isca huafo, —Nonfin Pablo tanaquin. Ascan noncai Apolos non tanama, —ishon anori yoiaifoanno. Atirifiton yoicaquin, —Nonfin Apolos tanaquin. Ascan noncai Pablo tanama, —ishon anori yoiafo. Anori yoiquin man ato oinmanaquin nan Diospan Yoshin Shara matoya rafuama cuscarafu.

<sup>5</sup> Ahuscaimun atirifiton man isca huaquin, —Non Pablo yafi Apolos tanairan, —man ica. Apolos fucai un ahuama. Nonfin nocon Ifo Diosin ahuun oinmatiquin. Nocoahuunshonfin man Jesús icoinra huaniquin. Diosin noco catonni noco yonomapaiyai cuscan noco yonoshquin Furunhuunoa man tapinon.

<sup>6</sup> Un mato isca huaquin yosipai. Futsan tauhuaquin shuqui fanatiro. Futsari amaqui orotiro foaisharanon. Ascashiocai nan rafutan shuqui foaimatiroma. Diosin fustitofin shuqui foaimatiroquin. Nanscarifi aquin un mato tauhuaquin Jesucristo icoinra huamani. Chipo Apolos Cristohuunoa mato yosini ahuun tsain man tanasharacoinon. Non asca

huafiaino Diosin fustitofin maton nomuran mato shinansharamatiro ahuun tsain man tanasharacoinfafainon.

<sup>7</sup> Ascashon un mato yoiai cuscacai un Apolos fu ahuama. Diosin fustitofin yorafo aton nomuran shinanmasharatiro ahuun tsain tanasharacoinonfo. <sup>8</sup> Tsoaran futsan tau huaquin ato Jesús icoinra huamafin nan chipo ato yosiaitori ato tsain nannorifosi ato tanamasharanon. Nan rafutan nannori shinancani. Ato Jesushuunoa yoishcaquin a tanasharanonfo. Ascacufin Diosin a yonoshonaifo cuscan futsa paratama inanfain futsa ichapama shara inanshquin. Ahuuscamain yonoi aafuquin.

<sup>9</sup> Manfin Diosin ahuun mau cuscaroquin. Ahuun pushu cuscararifi. Mau ifo fustifiano futsafoanrifi yonoshotirofoquin. Aafin maton ifoquin. Nonfofin ahuun yonomatifoquin a futan non mato yonoshotiro. Nanscarifiai pushu ifo fustifiano futsafoanri yonoshotirofo. Nanscarifiai manfin Diosin ahuun mau cuscaroquin. Ahuun pushu cuscararifi. Diosin fustifin maton Ifoquin. Nonfofin ahuun yonoshomisifoquin. Noco yonoa cuscari non maton nomuran non mato shinansharamatiro ahuun tsain man tanasharanon.

<sup>10</sup> Pushu yonomisiton iquisi quishi mutsisipa shara fitiro. Chipo futsafoan pushu anaititiro. Nanscarifiai Diosin ua catonpai ua cashman catonni. Ascashon ua tapimashara cuscan un tau huaquin cayacaficoin un mato Jesushuunoa tapimamisi. Un mato tapimayoni cuscan futsafoan natian nannoricoinri paratama mato yosicani. Ascaiton futsafo un yoishquin isca huaquin, —¡Oinfain! Ato cayacaficoin yosisharacahuun, —ishon un ato yoishquin. <sup>11</sup> Un mato yoiquin tau huani cuscacai tsoa futsan mato yositiroma isca huaquin, —Un mato tsain futsa tapimai man Dios fu ipanon, —ishocai mato icon yoitiroma. Jesucristo fustitofin noco imasharatiroquin non Dios fu ipanon.

<sup>12-15</sup> Nocofunun ahuun pushu samamashta coatanfin amurannoashu ichocaintiroquin naashquima. Ascan ahuun pushu coaino amurannofo ahuun cuno shara cotiroma. Ascan ahua cunomafo coi anaitimui futsutiro. Pushu huaquin iquisi quishi curushu shara nichishon ahuun oro amuran nutafain atirifi cuno futsa oshopa sharashta non chicoin cuno mapash faca facaitsa nanfo fasi chicoin ahuun pushuhuun nutatiro. Ascafia coainocai afo cotiroma. Nanfo cotamarocon nuifutsutiro. Ascashon pushu huaquin cano mapofain shupa shuhuaafain pishin nutacuano pushu coaino afo cotiro. Afo munoi futsutiro.

Nanscarifiai nantifi Jesús icoinra huafo futsafo yonosharaifoanno atirifi yonosharamisima. Jesús icoinra huafoti nantifi noco ichanan huaitian noco ismaicai non ashomisi cuscan ipayamarain cuyoriscatiromainquin. A yonoshosharafocai aton yono funopacunacama. Ascan a yonoshosharafoma aton yono cuyoi anaitimui futsutiro. Tsoan yonoshoshara ato inansharacointiro. Asca nan yonoshosharama ato inainma. Afu ipatirofofiacanashu man maitsisi yonoi futsucani. Man funocani.

<sup>16</sup> ¿Asca man tapiamamun man Diosin pushu cuscaroquin? Ahuun Yoshin Shara matofu ica. <sup>17</sup> Diosin icanocai ahua chaca itiroma. Mato fu ipashquin Diosin mato catonni ahuun yorafo man inon. Nan icoinra huafoti ato imasharai. Ascan futsan ato amaquiri yoiaiton Diosin copiqui ato onaintimashqui.

<sup>18</sup> Mafiri paramuyamacahuun. Icoinra huamafoan ahuara tapiafo cuscaraca marifi man tapishara. Anori shinanyamacahuun. Icoinra huamafoan shinanqui isca huafo, —Nan Jesús icoinra huafoan fasi amaquiri shinanfo. Fasi nison cuscaracoinforan, —ishon nocohuunoa yoisifo. Matohuunoa anori shinanfiaifoanno Diosin mato cayacafi shinansharamapaiyai cuscan man shinantiro.

<sup>19</sup> Nan Jesús icoinra huamafoan shinanquin isca huafo, —Non cayacafi shinanshararan, —ifiaifoan Diosin yoia, —Afoancai cayacafi shinansharacanima. Ipaitsi shinanforan, —ishon Diosin atohuunoa yoini. Ascashon futsafo shinanmapaicani isca huaquin, —Afoanfin tapisharaquin, —ishon ato shinanmapai. Ascafia afoancai Dios paratiro. Ascan aton chanihuunshon ato onaintimai funononfo. <sup>20</sup> Diosin tsain cunuqui isca huani, —Nonfin fasi tapisharaquin, —ifiainfoan nocon Ifo Diosin ato onancoinshon yoiquin isca huatiro, —Nafancai ahuacayacafi shinantirofoma. Ipaitsi shinanncaniran, —ishon ato yoitiro.

<sup>21</sup> Ascacun afanan yoiquin isca huayamacahuun, —Na nocofunun nocon tapimamisi ahuun tsain fusti cayacaficoiran, —ishon afanan yoiyamacahuun. Diosin ato shinanmayamainocai tsoan cayacafi shinanncuanama. Diosihuunshonfin non mato cayacafi yositiroquin. Ascan Diosin mato inan nantifi man yopai cuscan huafain. <sup>22</sup> Un non Apolos non Pedro nonfin Jesushuunoashu ahuun oinmatifoquin ahuun tsain non mato yosishquin man nicoinsharanon. Naashu man afu ipanon. Nantifi ahuunafin matonariquin. Ahuara icai cuscan afohuunshon Diosin mato shara huashoi. Nan chipo icaifori mato shara huashoi. Nantifi Diosin onihuani cuscan mato shara huashoshquin. <sup>23</sup> Manfin Cristonafokin. Cristofin Upa Diosinaquin.

## 4

### *Cristo fu rafumisifoan a yonoshomisifo*

<sup>1</sup> Ascashon man nocohuunoa shinanquin isca huatiro, —Nafofin Cristo oinmatifoquin, —ishon nocohuunoa shinancahuun. Tsain Cristohuunoa tsoan nicayomisima cuscara Upa Diosin nocon nomuran noco tapimana cuscan non matori tapimanon. <sup>2</sup> Ascan non Cristo oinmatifocun Diosin noco yononi isca huaquin, —Un mato yoiai cuscan huafain ato yoicahuun. Yoiyamacaquima, —ishon noco yononi. <sup>3</sup> Diosin fustitofin tapicoianquin nan ua yonoa cuscain un aaquin. Man uhuunoa shinan cuscacai un shinainma. Futsafoanri uhuunoa shinan cuscacai un shinainma. Unricai tapiama. <sup>4</sup> Uhuun nomuran un shinain isca huaquin —Ua Diosin yononi cuscan un airan, —ishon un anori shinain cuscan nocon Ifo fustiton ua onancoian. Ascashon yoitiro, —Nan un yonoai cuscacoin airan, —ishon ua yoitiro.

<sup>5</sup> Jesús icoinra huafoti Upan Diosin noco ichanan huataima. Ascan isca huaquin yoiyamacahuun —Nacai Diosin yonoa cuscan aimaran, —ishon anori shinanyamacahuun. Oinyocaquin. Nocon Ifoan noco ichanan huaitian nantifi noco puashoshquin nantifiton ointaifi ratofoanmain icoinra huacayamarai icoinmaran huacayquin. Ascatari nan non ichanaintian nantifiton ointaifi nocon nomuran non shinanmisi cuscan huafain nocon Ifoan Jesucristo noco puashoshquin. Afancai nantiantan non ahuashta fomantiro ishquima. Diosinmain nantifi



onancoincufin. Nan non ahuara futsa shara huashopaifain onushta ahuara non chaca huafiamisi nanfori Diosin noco puashoshquin. Nantianri non shara huacun Diosin yoiquin isca huashquin, —¡Aicho! Un mia yonoa cuscan min amisi. Min shara huamisiran, —ishon noco yoihquin.

<sup>6</sup> Uhuun yoramishtichin uhuunoa yafi Apoloshuunoa un mato tapimana ahuara futsa man tapinon. Un mato yosipai man iscanonma, —Pablonun noco tapimana cuscan Apoloscai tapiamaran iyamarai Apolos noco tapimana cuscacai Pablonun tapiamaran, —ishon yoiyamacahuun. Diosin tsain noco cunushoni non anori yoinonma. Nan tsain nicaquicai non shinanquin isca huatiroma, —Na nocon yosimisi fasi sharacoin. Futsafocai a cuscaramaran, —ishon non shinantiroma. <sup>7</sup> Diosinfin nantifi noco onihuaniquin. Ascanofin Diosihuunshon non ahuara huatiroquin. Ascasho —Un acai cuscacai tsoan huatiromaran, —iyamacahuun. Ascashu curafiapaimisi iyamacahuun.

<sup>8</sup> Manfin shinanquin isca huaquin, —Non Diosin tsain tapicoian. Non futsafo fasi finoncoian. Ascan noncai tsoa futsa yopaima noco tapimanon. Nonfin niaifo cuscarafocoin, —ishon man shinan. Iconpainon. Man niaifocoin icaino nantian norifi non matofu niaifo icuana. Asca tsoatsi niaifocoin. Nonmaquian. <sup>9</sup> Cunu uhuapa cunu acua muran iquimanifo ato rutunonfo. Yora ichapafoan ointaifi rutumatiro oinonfo. Nanscarifiai norifi non Jesús fu rafumisifo non ato cuscarquin. Diosin noco yonoa non Jesushuunoashu omitsiscafaino nantifi yorafo non ahuun oinmati afu nai muran icafoanricai oincani. <sup>10</sup> Nonfin Cristo fu rafumisi. Ascacun noco isca huamisi, —Nanfoanfin fasi amaquiri shinanmisifoquin. Mutsisipamaforan, —ishon nocohuunoa icoinra huamafoan yoimisifoquin. Asca matohuunoacai yoiquin asca huamisifoma. Matohuunoafin man shinanquin isca huaquin, —Non fasi tapicoian. Nofinfin non isharamisiquin. Tsoan noco finontiomaran, —ishon maton nomuran man shinanmisiquin. Man non tapia non Jesús maisishocai non ahua huatiroma. Ascafia man shinanquin isca huamisi, —Ufinfin un ahuara huatiroquin, —ishon man shinanmisiquin.

<sup>11</sup> Ascan nonfin foniyanan nomicain sahuuti chococoin sahuufain noco coshafain pushuomacainri Diosin tsain fusti yoi non cahuancaimisi. Natianri non omitsiscai. <sup>12</sup> Ascashu non curushcai yonotiro non yopai cuscan ahuun rafanan fiishquin. Ascarifiatan yorafoan noco tsain chaca huafiaiton copitamarocon non isca huamisi, —Jesús mia shara huapainonran, —ishon non yoimisi. Noco omitsisca huafiaifoan non tunucointiro. <sup>13</sup> Ascashori noco roaifoan rahunmafain non tsain shara ato yoitiro. Ascacun natianri noco chaca huafocoin. —Manfin nan tanama cuscarafocoin, —ishon nocohuunoa yoimisifoquin.

<sup>14</sup> Ascacucacai un matoqui cunuai cuscan un mato rafimapaima. Ascan manfin uhuun facucocoin cuscarafocoin. Un matohuun fasi noi. Ascacun un mato yoi afanan man amaquiri shinanonma. <sup>15</sup> Yorafoan mato Cristohuunoa tapimatirofia ascan unfin tauhuaquin mato Cristohuunoa tapimaniquin. Ascanofin man Cristo icoinra huaquin. Uhuunoashuri man Diospan facufocoin. Ascatan un maton upa cuscaracoin. Futsafoan Cristohuunoa mato tapimatirofia afocai maton upa cuscara itiro. Urus fustifin un maton upa cuscaracoinquin. <sup>16</sup> Ascacun un mato yoi ua cuscara icahuun. Un Dios tanashara cuscan nanscarifi acahuun. <sup>17</sup> Ascacun un Timoteo matoqui nichicai. Un Timoteo Cristo icoinra

huamaquin tau huani. Ascafin nan uhuun facu cuscaraquin. Un fasi ahuun noi. Nocon Ifo Jesús yonoa cuscaicoian. Un Jesucristo tanai cuscan Timoteon arifi mato tapimashquin man ointiaquimanonma. Nan icoinra huafo pushufoti anoafu un ato tapimai cuscan nannori Timoteo matori tapimai.

<sup>18</sup> Mun tapia man atirifiton shinanquin isca huaa, —Pablonun Timoteo nocoqui nichi. Ascan afinmain nocoqui musuifin. Ascashufin afincoin nocoqui oamaran, —ishon man shinan. Manfofin curafiapaimisifoquin. <sup>19</sup> Anori man shinanfiaino ufcuin samamashta un mato ari caicain. Diosin ua yonoaino un samamashta mato ari cai. Nan un nocoaitian un tapicashquin nan curafiapaimisifoan Jesús ahuun curushhuunshon yoiyamarain afincoinmain yoicanicai. Ipaitsi yoicanimainquin. <sup>20</sup> Diosin nocon Ifo icaino non tsain fustimansi ipaitsi yoitamarocon ahuun curushpan non isharatiro.

<sup>21</sup> Ascashu un nocoaitian ahuun curushpan un matoqui nocoshquin. Ascashofin man ica cuscan huafain un tapitiroquin. Man chaca shatuyamacun Diosihuunshon un mato onaintimatiro. Asca maton chaca man shatucun un matohuun fasi noiquin un oi tsii huasharafain mato yoishquin. Ascan mafi catontiroquin ratocaimain un aquicai. Maton tsainhuunshon onaintimai iyamarai oi tsii huasharafain mato yoishquin.

## 5

### *Jesús icoinra huafiacashon chaca huafo*

<sup>1</sup> Mun nicamisi mafi ranan man fasi chaca huaa tanancun. Apa ahuin ahua futsafia afu icacaini. Nanscara chacafocai nan icoinra huamafoan tsoa ascamisima. <sup>2</sup> ¡Ai timafin! Nan tapifishu man curafiapaimisi. Nan nocofunun mato muranshon chaca huai ahuun rafipaitama, —Non sharacoinran, —man ica. ¿Ahuun rafitama man man tapiflashon man nocofunun chaca huamisi ahuuscai matofu ichanainton man potamamun?

<sup>3-5</sup> Un matofu iyamafishon un mato fasi shinain. Un anoyamafiano nan nocofunu ahuusca huaimancai mun tapicoian. Un mato anoshon yoiquin isca huacuana, —Afanan ichanainfoanno Jesucristo ahuun shinanhuunshon na nocofunun apa ahuin ahua futsa fu imisi matomaquinao potacahuun. Ascacucui afanan Diosin cushuima. Satanás a amapaiyai cuscan aashquin. Man asca huaiton Satanás nan nocofunu omitsiscamatiro. Ascashon omitsiscamaiton mui ahuun chaca shatupaitiro Jesusqui nasoshquin afanan omitsiscashquima. Ahuun chaca man shatuano ahuun yoshin Jesús fu ipatiroran, —ishon un matofu ishon un mato yoicuana.

<sup>6</sup> Timafin man iscamisi, —Non shararan, —man ifiamisi mancai na nocofunun chaca huamisi mato murannoa man potataima. ¿Man tapiamamun fustiton maton muranshon chaca huaiton man shatumayamaino nanhuunoashu nantifi man chacai futsutiro? <sup>7</sup> Ascaiton mato anoshon nan nocofunun chaca huai potacahuun. Ascanofin afanan Jesusqui nasotiroquin tanasharacoinshquin. Cristo Upan Diosin ahuun chashoan cahuashara cuscara noco nashoni non afanan chaca huanonma a cuscara shara non inon.

<sup>8</sup> Ascashon non chaca huapaoni cuscaicai afanan non shinantama Cristo ahuun ointi cuscara shara non iishquin. Ahuun tsain shara non

shinanon. Futsaqui afanan shinanchacayamafain tsoa afanan parayamafain tsain iconcoin fusti non yoinon.

<sup>9</sup> Ascacuin un matoqui cunui tsoa ahuun ahuinma fu icain ainfofo nanscarifiaifono aton funuma fu icaino afanan ascarafu fu rafuyamacahuun. <sup>10</sup> Jesús icoinra huamafohuunoacai un cunuima. Nanfofin Satanás aton ifoquin. Ascashocai aton chaca shatuaafoma. Chaca futsa futsatapafu huamisifoquin. Ascashon aton ahuinma fu imisifo. Ainfofo nanscarifiaifoanno aton funuma furi imisifo mafo ichapa fusti fipaifain. Atonama fipaicoimififo yomutsofo non nan diosicoimifofin, —Nocon diosiran, —icafoquin. Noncai atofu pashcanantiroma. Non icoinra huamafo fu pashcananpai nan maitio non cuyofotiro. Icoinra huamafoan acai cuscacai non ato futan atiroma. Ascacufin non atofu imisiquin.

<sup>11</sup> No futan icoinra huafohuunoa un mato cunushoni. Tsoan yoiquin isca huai, —Urifi matofu Jesucristo ahuun yoraran, —ishon anori yoiwatan ahuun ahuinma fu icaino ainfofori nanscarifiaifoanno aton funuma fu icaifoanno mafo ichapa fusti fuchipaifain atonama fipaimisifo icain diosicoimifin tanapaifain yora futsa chaca huamisi icain paunmisi icain yomutso icain. Ascarafu fu rafuyamacahuun. —Un Jesús icoinra huairan, —ifacatan ahua chaca huariaifo fu rafuyamacahuun.

<sup>12-13</sup> Nan icoinra huamafo non ato yonotiroma aton chaca shatunonfo. Ascarafocai Diospan yorama. Diosifin ato onaintimashquiquin. Ascacufin Diosin noco yonoa nan icoinra huafu futsan chaca huacun non ato yotiro aton chaca shatunonfo. Ascashon nan nocofunun mato murashon chaca huamiscun yoicahuun afanan matofu ichananonma ahuun chaca shatucioaintian matofu afanan ichanantiro.

## 6

*Jesús icoinra huafu futsan mato chaca huaiton nahua niaifo ano iyoyamacahuun*

<sup>1</sup> Ahuusaimun mafi ranan fochishmanantanafiashon man shara huapaimacain. Mafi ranan shara huatanantama nan icoinra huamafoan aton niaifo ano man iyopai, —Noco shara huashononran, —ishon. ¡Ai timafin! Ascarafo sharama. <sup>2</sup> ¿Ascacufin man tapiamamun nonfin Diospan yorafoquin? ¿Ascashon a futan non nantifi yora manifi chipo yoishquin ratofanmain chaca huamisifoquin ascashon ato onaintimanon? ¿Ascacufin ahuusain ichapama man fochishmanantanafiashon mafi ranan man shara huatanantiromamun? Man nanscasi amisi. <sup>3</sup> Man tapiamamun non Dios futan yoishquin ahuun oinmati afu nai muran icafomain chaca huafu iyamarai shara huafuquin. Non asca huainofin nuno mai anoafu fasi mimacai yoiquin finatiro ratofomain chacafo yafi sharafoquin. Nanscacufin non fochishmanantanashon nofin ranan non arotiroquin.

<sup>4</sup> Ascacufin man fochishmanantanain cuscan mafiran anrosharacahuun. Ascacufin ratoran futsafo catoncahuun a mato futan icoinra huama aquima. Nan mato futan icoinra huafu acahuun mato arosharashonon. Nan ahua yamafiacun man catontiro mato arosharashonon. <sup>5</sup> ¡Ohuashta! Un mato rafimapai man afanan ascanonma. ¿Manmun ratoran futsacai shinansharatiromamun a fochishmanantanainfo cuscan arosharashononfo? <sup>6</sup> Ascacufin mafi ranan man fochishmanantanashon man shara huatananyamacun. Ascacufin ranushumuafoan

aton niaifoqui man chani. Nan ahuama ointsa man aa. Nan icoinra huamafoan aton ointaifi man Jesús ahuun yora futsa man chaca huua. ¡Ai timafin! Nan fasi chacacoin.

<sup>7</sup> Mafin ranan man yoiti huatananshu ranushumua niaifoqui man chaniano. Man ascaifin ato ointaifi man ato oinmana mafi ranan noinantama. Ascashofin man Jesús tanasharamaquin. Man funocoiafo. Nan Jesús icoinra huua futsan mia chaca huacun ranushumua niaifoqui chaniyamacai man puusicama shara icuana. Jesús icoinra huua futsan ahuara mato onunshon nasocasmaiton man ranushumua niaifoquin chaniyamacain man puusicama shara icuana. Futsan mia chaca huafiacun icoinra huamafoan ointaifi min aha chaca oinmanama. <sup>8</sup> Man ascaquifin mafi ranan onunonquin man chaca huua. Ascan matofu Diospan yorafiadun man chaca huatanan.

<sup>9</sup> Man tapiamamun a yora chaca huamisifo Diosin niaifo ari itirofoma. Mafiri paramuyamacahuun. Nan maton ahuinma fu man icaino ainfofori aton funuma fu icaifoanno diosiyamafiadun fuchipaifain nan nocofununri afu nocofunu futsa fu icaino nanscarifiai afu ainfo fu futsa fuchinanpaiquin chaca huatananashu ainfofosi afo ranan iquinainfo icain <sup>10</sup> yomutsofo icain aton nama fipaifain paunmisi icain roanmitsamisi icain yoiti huamitsamisi icain ahuun ahuara futsan fiatianshon futsa sutufain. Ascarafocai Dios icano noconacafoma. <sup>11</sup> Atirifi man ascafiapaonishacaquin natian Jesucristo yafi Upa Diosin ahuun Yoshin Sharahuunshon maton chaca soashona. Maton chaca soashonano a cuscara shara mato ima. Ascasho ahuun ointi cuscara shara mato ima. Chaca huamisifoma cuscara man inon.

*Mafiri chaca huamuyamacahuun*

<sup>12</sup> Ascan man yoiaraca isca huaquin, —Cristo uhuun Ifono un apaiyai cuscan un huatiroquin, —ishon man yoi. Ai. Nannori. Ahuara sharafoti non huatirofiadun ahuara futsacai ua amatiroma nan un acai fusti un atiro. Uncai ahuara futsahuunoashu aton oinmati un ishquima. <sup>13</sup> Man futsan raca yoiquin isca huua, —Diosin nocon shaqui onihuashoan non tushu pinon. Ascashon tushuri onihua nocon shaqui muran non huanon, —ishon yoimisifo. Iconflashu non piyanhuanshuni itiroma. Chipo Diosin tushu yafi nocon shaquiri cuyoi. Icon Diosin noco onihuani non afu rafupacunon. Diosicai nocon ahuinma fu non inon ishoncai noco onihuanima. Ainfofori aton funuma fu inon ishoncai ato onihuanima. Ascatama Diosin nocon caya noco onihuashoni non afu rafupacunon.

<sup>14</sup> Nocon Ifo Jesús man nafiadun Upan Diosin ahuun curushhuunshon funimani. Nanscarifi aquin ahuun curushhuunshon nocori funimashquin. <sup>15</sup> ¿Man tapiamamun non Cristo icoinra huashu non ahuun yoracoin? Non Jesús ahuun yora mumacoin cuscara. Ascano non ainfo furoma chotashu Cristocai afin aca shinantsan non huamatiro. Asca huapayamacahuun. <sup>16</sup> Diospan tsain cunuquin isca huani, —Nocofunu ainfo fu icaino nan rafu yora fusti cuscaracoin, —ishon cununi. ¿Man tapiamamun man ainfo furoma fu icaino afu yora fusti cuscara itiro? Fusti cuscaracoin. <sup>17</sup> Ascafiatan tsoan nocon Ifo fu rafuaino nan rafu fusti cuscara itiro. Diosin Yoshin Shara ahuun shinanpan ahuun nomuran nanumashquin.

<sup>18</sup> Ascacufin maton ahuinma iyamaraiainfofori maton funuma fu ipaiyamacahuun. Ascara shinanyamacahuun. Man ascapaiyamai ichoriscatacahuun asca huashquima. Maton ahuinma fu iyamarai maton

funuma fu man icun nan chacapanfin. Maton nomuran fucashuni huafain matori omitsiscamatiro. Nan chaca futsafocai un yoiyai cus-carama. Man ascashufin maton yora mumacoin caya yafi maton nomuran maficoïn man chaca huamuaquin.

<sup>19</sup> ¿Man tapiamamun Diospan Yoshin Shara no fu ica? Nocon cayafi ahuun pushu cuscaracoinquin. Nanno ica. Upa Diosin ahuun Yoshin Shara matoqui nichini. Nan pushu ifofin fusticoïn. Nanscarifiai Diospan Yoshin Shara fusti maton Ifo. Mafincoïncai man ifohuamutiroma. Manfin ahuunafoquin. <sup>20</sup> Jesucristo mato nashoni maton Ifo iishquin. Ascan manfin ahuunafoquin. Ascano Diosifin nocon Ifoquin. Ascashu nocon caya ahuunari. Nan mato yoiyai cuscan acahuun. Maton cayahuunshon Diosin shara huamacahuun. Man ascaiton futsafoan oincaquifin, — Diosin shararan, —huatirofoquin.

## 7

### *Ahuuscashumain funu fu ahuin isharatirofoquin*

<sup>1-2</sup> Man ua cunu fumaita ua yocashquin. Ascacun man ua yoca cuscan nanfohuunoa un mato yoisharapai man tapinon. Nocofunun ainfo fiyamashu shara ifiatiro chaicushosi ainfo fu ipaiquin chaca huatiro. Ascashufin nan nocofunuti ahuinyatiroquin. Ainfori funuyatirofo. Nanscafin sharaquin.

<sup>3-4</sup> Nocofunun ainfo fiainocai afanan ahuun caya ahuuna fustima. Ahuun caya ahuinnari itiro. Nanscarifiaiainfon fununfiainocai afanan ahuun caya ahuuna fustima. Ahuun caya fununari itiro. Ascataricai ahuinin funu afu ipaiyaitocai funu ranintiroma. Nanscarifiai funu afu ipaiyaitocai ahuinin ranintiroma. <sup>5</sup> Raninonanyamacahuun. Ascashon man chipo shinanquin isca huatiro, —Natian non Upa Dios cufiyonon. Shafa ranan non iyoimacai. Chipo afanan non inon, —icashu man unuyotiro. Ascafiashon chai manariyamacahuun. Man ascariaino Satanás mato chaca huamatiroquin. Funu ainfo futsa fu ipaitiro. Nanscarifiai ahuin nocofunu futsa fu ipaiquin chaca huatiroquin.

<sup>6</sup> Un mato, —Fianancahuun, —ishon un mato yoiama. Ascan man fiananpafin man fianantiroquin. <sup>7</sup> Ascatan un shinanquin isca huaa. Nantifi nocofunufu ua cuscara ahuionmafo shara icuana. Diosihunoashu un ahuionma isharatiro. Un shinanchacaima. Un unimatiro. Ascafia Diosin ua ima cuscacai atifi ato imama. Futsafoan Diosihunshon ahuin fitiro. Futsafori ahuionmafiashu nan un icai cuscari unimatirofo. Non yopai cuscafin Diosin tapiaquin. Ascashon noco inantiro.

<sup>8</sup> Ascatan natian un funuomafo non ahuionmafo yafi ainfofoan aton funufo atonmaqui namisifohuunoa un mato ahuara futsa yoipai man tapinon. Ua cuscara icafo shara icuana. Nocofunun afanan ainfo fiyainocaiyainfoanri afanan funu fiyamashu shara icuana. <sup>9</sup> Ascafia man fasi fiananpaimancaiyainfoanri nocofunu fipai fianansharacahuun. Man ahuinya shara icuana. Nanscarifiai man funuomafiashu fasi nocofunu fu ipai ascaracai sharama. Ascacufin man funuya shara icuanaquin.

<sup>10-11</sup> Ascan natian un funuyafohuunoa yafi ahuinyafori un mato yoisharapai. Ufi un mato yonoima. Nocon Ifohuunshon un mato yonoi isca huaquin, —Ainfoancai funu unutiroma. Fununricai ahuin

unutiroma. Ascashon funun unuano afanan futsa fu fianantiroma. Afanan funucoin aqui nasoano shara itiroran, —ishon un mato yoi.

<sup>12</sup> Ascacun natian un mato yoisharapai. Nan na tsain un mato yoiiafocai Diosin ua yonoyamafiacun unfi cayacaficoi shinanfain un mato yoi. Asca man Jesús icoinra huaa futsacai maton ahuinin Jesús Ifo huataiyamafishocai funu potapaima. Ascatan rahuinmafain funu noi. Nanscarifiai fununricai ahuin potatiroma. <sup>13</sup> Nanscarifiai yainfoan Jesús Ifo huafishocai funun Ifo huayamafiacun ahuin potapayamain-ocai yainfoanri funu potatiroma.

<sup>14</sup> Nocofunun icoinra huayamafiano ahuinin icoinra huashon ahuin-huunshon Diosin nan nocofunu shara huamatiro. Ascashon funun ahuin oinquiraca ahuunshon Jesús icoinra huatiro. Nanscarifiai yainfoan icoinra huayamafiano funun icoinra huashon funuhuunshori Diosin nan ainfo shara huamatiro. Ahuinin funu oinquiraca a huunshon Jesús icoinra huamatiro. Ascan nan rafu ununainno aton facufoancai Jesús Ifo huaima. Ascafia nan rafu ununanyamaino aton facufoanri icoinra huatiro Diospan facu sharafo iishcaquin.

<sup>15</sup> Ascashon nocofunun Jesús icoinra huayamacun ahuinin icoinra huashon unupaicoi quin unutiroma. Capaicoi yaiton ato nitu huayamacahuun. Catanon. Man nitu huaino fucashni tapitiroquin. Nanscarifiai yainfoan Jesús icoinra huayamacun funun icoinra huashon unupaicoi quin unutiroma. Capaicoi ainton nitu huayamacahuun. Catanon. Man nitu huaino fucashni tapitiro. Diosin noco catonni nocon nomuran ahuashtaton fucash huatamarocon nocon ointi noco imasharacointiro. <sup>16</sup> Ainfoan Jesús icoinra huacun ahuun funu man Jesushuunoa yoi aitocai tapitiro main funun main icoinra huaicai. Nanscarifiai funun Jesús icoinra huacun ahuun ahuinin man Jesushuunoa yoi aitocai tapitiro main ahuin-main icoinra huaicai. Ascan mato potapayaiton inonquin ishon. Shinanchacayamacahuun.

<sup>17</sup> Nan nocon Ifo Jesús mato yononi cuscan nanscasi acahuun. Jesús mato yonoaitian Upa Diosin mato catonni. Ascantari nan icoinra huafoti Dios fu tsainti pushurasi anoafu yafi maifoti nanscaracoin un ato yononi. <sup>18</sup> Isca huaquin. Israelifo Diosin ato yononi cuscacoin aton furonanfacufo foshqui rupa shatupacunifo. Ascatan furonanfacu yosishon Jesús Ifo huatan chipo shinanquin isca huaraca, —Natian un Jesús Ifo huaa. Nan fusti un yopai uhuun chaca ua soashonano un ahuun yora iishquin. ¡Ohua! Un foshqui rupa shatumuyama shara icuanaran, —ishon shinanyamacahuun. Asca mia foshqui rupa shatufiani nanscanonquin. Shinanchacayamacahuun. Ascatan man Jesús Ifo huaa man foshqui rupa shatumumisima. Ascashon shinanquin isca huayamacahuun, —Un Israelifo aton shunifoan ato yononi cuscan un yopai. Un foshqui rupa shatumutiro Moisés yononi cuscan un airan, —ishon anori shinanyamacahuun. Mancai ascara yopaima.

<sup>19</sup> Man foshqui rupa shatumisi iyamarai man shatumisima nanscara rafuquin. Man ascaitocai mato shara huamatiroma. Man asca huayamaricai mato chaca huamatiroma. Nan Israelifo imisi cuscacai man yopaima. Ascaquimarocon Diosin mato yononi cuscan aashu nan fusti man yopacoin.

<sup>20</sup> Nan Diosin mato catoaintian man ini cuscan nanscasicoin acahuun. <sup>21</sup> Diosin mato catonnitian man futsan ahuun oinmati icashu shinanchacayamacahuun. Ascafian maton ifoan mato nichipai yaino

amaquinoashu fotocahuun afanan tsoan oinmati ishquima. <sup>22</sup> Man ratoran futsa Diosin mato catoaintian futsafoan aton oinmati man iquin. Ascafiashucaí afanan Satanás maton ifo itiroma mato chaca huamashquin. Atiri mato catoaintian tsoan oinmaticai man imisima. Ascanfiashu natianfin man Jesús ahuun oinmati.

<sup>23</sup> Upa Diosin Furun Jesucristo nichini noco nashonon noco Ifo iishquin. Ascashufin manfin ahuunaquin. Nan fusti maton Ifocoin. Nan fustiton mato cayacafi shinanmatiro. Ascacun futsafoan oinmati iyamacahuun mato yonononfoma. Jesús fusti tanacahuun maton Ifo inon. <sup>24</sup> Ascatan uhuun yoramishtichin Diosin mato catoanno ahuara man yonopaoni cuscan nanscasi acahuun. Upa Diosin mato futan aashquiquin.

<sup>25</sup> Ascacun natian afanan ahuara futsan un mato yoipai. Ainfofo nocofunu fu imisifomahuunoa un mato yoi. Un mato yoiai cuscan nocon Ifoan ua yonoyamafiacun uhuun ramapaicain ua yononi cuscan un amisi. Ascashon un mato yoiai cuscan man icoinra huatiro. <sup>26</sup> Natian ahuara ahuuscaraqui noco omitsiscamai. Nanscacun man ahuionmafo ica shara icuana. Icoinra huamafoan noco omitsiscamatirofo. <sup>27</sup> Ascacun ahuinyacashon mato ahuin unuyamacahuun. Ascafiacatan ahuionmashon ainfo funayamacahuun fipaiquin. Nanscanon. <sup>28</sup> Ascafiacaiyainfo finquin man chaca huaima. Ainfori funuya iyamafiamisishacaquin funuyainocai ahua chaca huaima. Ascafia man funuyafo yafi ahuinyafoan manfin fucashni tapiquin. Nan funuomafo yafi ahuionmafo ica finonmafain man ahuara futsa finoin. Nanscacun un mato yoisharapai man fucashni tapinonma.

<sup>29</sup> Ascadari uhuun yoramishtichin un mato isca huaquin yoipai. Nocon Ifo Jesús otichaima. Nocon Ifo yonoshogui non chai huaima. Nanscacun non nocon Ifo yonoshosharacoinpai. Ascacun maton ahuin shinanfaquin Jesuscairocon fasi finonmafain shinancahuun. Nocon Ifo yonoshosharacahuun. <sup>30</sup> Ascadari ahuara futsafoan mato omitsiscamafaiton nocon Ifo yonoshoguin unuyamacahuun. Omitsiscacaquima nanscasi unimacai nocon Ifo yonoshosharacahuun. Ahuara yopayamafiacuquin nocon Ifo cachiquiri huayamacahuun. Yonoshosharacahuun. <sup>31</sup> Nocon Ifo Jesús otichaima. Ascacun nuno mai anoshon yonosharafafaincahuun man yopai cuscan fiishcaquin. Ascashon mafo fustisi shinancaquima. Nocon Ifocairocon finonmafain shinancahuun. Nantifi mai anoafocai cuscan cuyoshquin. Nanscacufin Jesús shinanquin non finatiroquin noco yonopaiyai cuscan ashquin. <sup>32-35</sup> Un mato anori yoi maton nomuran ahuaton fucash huanonma. Un mato ahuinyacain funuyayamacahuun huaima. Un mato cayacafi imapai nocon Ifo fusti finacoinquin man shinanfainon. Ahuaton maton nomuran fucash huanonma.

Un mato yoisharapai. Un mato yoi maton nomuran omitsiscamashquimaquin. Ascaquimarocun un mato shara huapai Dios fusti man yonoshosharanon. Man ahuara futsa shinanonma. Ascashon un mato yoia cuscan nocofunun ahuionmaton ahuun Ifo unimamapaishquin. Ascan nocofunun ahuinyashon ahuinri unimamapai. Nan ahuinin ahuara yopai cuscan huafain fununri nannoricoin shinantiro. Nanscarifi aquin ahuun Ifo fustitocai shinantiroma. Ascashofin ahuun Ifo unimamapaifain nantianri ahuinri unimamapai. Ascacun ainfo

funuomaton ahuun Ifo Jesús fusti yonoshosharapai. Ahua futsacai shinainma. Ahuun Ifo fusti tanashquin. Diosin imapaiyai cuscan huafain nan fusti shinainquin. Ascan ainfon funuyashon ahuun funuri unimamapaiquin ahuara futsafori shinantiro ahuun Ifo fustisima.

<sup>36</sup> Ascatan nocofunun ainfo fu iyamafiamisishaquin fasi afu ipaiquin. Ascashu afu fianantiro. Ascaquicai chaca huacanima. <sup>37</sup> Ascafia nocofunu futsan shinanquin isca huai, —Uhuun Ifo Jesús un yonoshosharapaiyai cuscan un ainfo fishon un huatiroma. Nanscacucaí un ainfon fiimaran, —ishon anori shinanshara. Tsoancai curushcai ascahuu huama. Afincoín nannori shinansharashu ica. <sup>38</sup> Ascan nan ainfo tsoacai afu iyomisima nan nocofunu finquin shara huaa. Asca aquin nan ainfo fucái tsoa afu iyomisima nocofunu fiananyamafi nanscaquirocofin fasi shara huaquin ahuun Ifo Jesús yonoshokin finacointiro.

<sup>39</sup> Ascatan tsain futsari un mato yoi. Ahuun funu naamanocaiyainfoan funu unutiroma futsa fu fiananshquin. Ascashu funu naano futsa fu fuchinapai afu fianantiro. Ascafiacun ainfoan Jesús Ifo huashon nocofunun a Ifo huacuma fitiroma. <sup>40</sup> Ascatarí un shinanquin isca huaa. Funu naano afanan futsa fiyamano nanscarafin fasi sharacoin itiro. Un shinain cuscan huafain Diosin Yoshin Sharapan a nannoricoin mato yoi.

## 8

*Diosicoínma onihuacashon cufipaonifo. Nanscarafó yora ointsa iyamarai ahuara futsa cuscara ramihuacashon tushu inanpaonifo. Nanfohu-  
uonoa Pablon ato yosini*

<sup>1</sup> Ascatarí tsain futsa mato yoinon. Nan nocofunufóan Diosimafiácun yora ointsa iyamarai ahuara futsa cuscara ramihuacashon, —Diosiran, —icashon tushu inanfo. Ascashon piyamaiton oinquin afanan nan tushu ficashon inanmitsamisifo. Ascacun natian un mato yosi nan tushu inanmitsafo non pitiroma iyamarai non pitiroquin. —Nantifi man non tapiaran, —ishon man yoimisi. Ascan nan man icoinra huaa futsafoan man yoiquin isca huamisi, —Unfi tapiquin. Nan un shinain cuscafin un cayacafi shinainquin, —ishon shinancani. Ascarafo shinančanifin curanfiapaimisi itirofoquin. Ascara non shinancucaí noco imasharatiroma. Ascaquimarocon non yorafóhuun noishonfin non ato Jesús tanamasharacointiroquin a cuscara shara inonfo.

<sup>2</sup> Ascan tsoan shinanquin isca huai, —Unfi ahumamishti tapisharaquin, —ishon anori yoifiaquicai atirifi ahua tapiataima. <sup>3</sup> Asca tsoan Dios noicoíncunfin nanscarifi aquin Diosin ahuuonoa yoitiroquin isca huaquin, —Un na onancoian, Nanfin uhuun yoraquin, —ishon yoitiro.

<sup>4</sup> Ascashofin non Dios noicoiánton noco tapimatiro nan ahuara futsa ramihuacashon tushu inanfo non pitiromainquin. Ascacun man non tapia ahuara futsan ramihuafocai ahuama. Acai Diosincoínma. Nan aafin ramihuafóancai ahua tapiama. Acai ointiya iyamacain ahuun maponricai ahua shinantiroma. Nanscarafocai Dios itiro. Diosfin nan fustiquin. <sup>5</sup> Jesús icoinra huamafoan yoiquin isca huamisifo, —Dios ichaparasi. Nai murannoa yafi mai ano Dios ichaparan, —ishon yoimisifo. <sup>6</sup> Anori yoifiamisifocai anorima. Man non tapia nocon Upa Diosifin fustiquin. Futsa yamai. Nantonfin nantifi onihuani. Nocofori onihuani non ahuun facufo inon. Ascashu non Ifo fustiya. Jesucristo



fusti. Futsa yamai. Ahuunshon nantifi onihuani. Ahuunoashu non nitiro.

<sup>7</sup> Nan un mato yoiai cuscan atirifi yorafoan tapiafoma. Shinanfofin nan ahuafo futsa ramihuafo niaquin. Niamafiacun nannori shinanfo. Nan facushtashon nicainifoannafo nan ahuafo futsa ramihuafo niaquin. Ascatan isca huaquin shinanfo, —Nan tushu ahuafo futsafo ramihuashon inanfo. Ascacun un na tushu piatoraca un Diosicoín chaca huairan, —ishon shinantirofo. Ascatan pishon, —Un chaca huaran, —ishon afo aton nomuran shinanchacatirofo. <sup>8</sup> Anori shinanfiaifonocai non ahuafo piatocai Diosimaqui noco imatiroma. Nan tushu ahuafo futsafo ramihuacashon inanfo non piamatocai noco imasharatiroma. Ascatari non piatocai noco chaca huamatiroma. Nanscara rafu.

<sup>9-12</sup> Ascafia oinfain. Man shinanquiraca isca huaa, —Unfin nantifi pitiroquin. Ahuafo ramihuacashon Diosicoínma tushu inanpaiafo nanfori un pitiroquin. Un piquicai un Dios chaca huaima, —ishon man shinan. Man anori shinanfiaino Jesús icoinra huaa futsafoan anori tapiataima. Nan tushu min piaton oincaquin mihunri caocani. —Nantori Jesús icoinra huafishon ahuafo ramihuacashon tushu inanfo pitiro. Asca urifi un pitiroquin, —ishon shinantiro. Asca man tapifishon man piaton oinquin arifi man acai cuscan huaquin pishon nanscarifi huatiro. Ascan man pishonfin chipo ahuan nomuran shinantiro isca huaquin, —¡Ohua! Na tushu mun pishon uhuun Ifo Jesús chaca huaran, —ishon shinantiro. Ascashonfin ahuan nomuran afin shinanchacatiroquin. Man acaiton oinquin arifi aca. Ascacufin matohuun nuuaquin. Man man tapia ahuafo ramihuacashon tushu inanfo nan pishocai man chaca huama.

Ascano futsafoancai tapiafoma. Afoan shinanfin nan tushu pishon man chaca huatiroquin. Jesusri ahuunoashu nafianicun. Ascan matohuunshon shinanchacaquin. Man piainocai arifi picuanama. Shinanchacacuanama. Man man tapian piquin man chaca huai shafain futsa arifi shinantiro pishon man ahuan noicoianma shinantsain. Ascan man na tushu piyama shara icuana. Pishon man futsa chaca huamatana. Man asca huaquin Cristorifi man chaca huamai. <sup>13</sup> Ascacufin un tushu futsa piquiraca un Jesús tanamisi futsa un chaca huamatiro uncai na cuscara tushu afanan pinacama futsa chaca huamashquima. Un aca cuscan huaquin un toa chaca huamashquima. Un futan Jesús tana futsa un ahuan noiquifin un ahuafo chacashta shinanmapaima.

## 9

### *Jesús fu rafumisifoan atirofo cuscan Pablonun ato yosini*

<sup>1</sup> Dios fustifin uhuun Ifoquin. Nan ua yonopaiyai cuscan un atiro. Tsoanricai aton shinanpan ua yonotiroma. Jesús ua catonni un afu rafumisi inon. Nocon Ifo Jesús oincoinfain nan ua yonoa cuscan un mato yoimisi man Jesucristo icoinra huanon. Ascacun nocon Ifo yonoshonahuunshon man icoinra huaa.

<sup>2-3</sup> Futsafoan shinanquiraca isca huamisifo, —Diosincai Pablo nichinima Jesushuunshon noco tapimanon, —ishon anori raca shinanfo. Anori futsafoan shinanfiamicuncai man anori shinananyamapainon. Uhuunshon man nocon Ifo icoinra huaa. Ascacun nantifiton tapitirofo Jesús ua catonni un afu rafunon.

<sup>4</sup> Uhuun yoramishtichin shinancapon. Unrifi Jesús fu rafumisi. Ascan Jesús fu rafumisi futsafoanri amisifo cuscan urifi asca huapaiquin un acuanauquin. Afoan Jesús icoinra huaa futsafo ato Jesushuunoa yosiaiton nicacaquin cashman ato pimamisifo. <sup>5</sup> Pedro non nocon Ifo Jesús ahuun chipocufo non atirifi Jesús fu rafumisi futsafoanri ainfo Jesús icoinra huafo fu fianancashon Jesushuunoa ato yoifoanfafaainafono aton ahuin-fofori atofu foanscamisifo. ¿Nanfoan ainfo Jesús icoinra huafo fu fianan cuscari ai urifi ainfo Jesús icoinra huaa fu un finantiromamun unfu cahuacacainon? <sup>6</sup> ¿Ascan ahuuscain Bernabé futan non mato yosifain nofin yonocain ahuun rafanan non yopai cuscan non fia? Ascan atirifoan mato yosiquicai ahua yono futsa acanima. Mato yosiaifoan man yopai cuscan ato inancoian. Ascafi acun non yopai cusca ai man noco cashman inanmisima. Nan non ahua ra yopaitihuunshon non yonomisi fiishquin.

<sup>7</sup> Un iscara mato tapimapai. Ranushumua futsacai cashman yonomisima. Ahuun caifo cushucufin nan yorafoan aton pushurasihuunoa pui niaifoan ato inanmisiquin. Nanscarifi aqui mau fanamisiton ahuun mau foaisharanon afin ahuun yono pitiroquin. Chashoanfo cushumisitori ahuun chashoanfoan shoma ayatiro.

<sup>8</sup> Un mato yoiai cusca ai nocofunufano aton tsain fustisima. Nannorifi Diospan tsain cununiquin. <sup>9-10</sup> Moisés Diospan tsain cunuquin isca huani, —Moipan tarati huayacuquin mato yonosharashotiro. Shuqui roro cuscara machi acuaino atiri ahuun chacafo fuutan potaino shuqui roro cuscara ahuun shaca nanno manitiro. Ascaiton maton moi runushuyamacahuun nanno tarati huayacuquin acafiri pinon, —ishon cununiquin. ¿Diospan nannori yoiaino moi huunoa fusti yoinimun? Ma. Nan yonoshonaifo huunoa yoifain nocohuunoari yoini. Ratoranfoan mau chituquin shinantiro isca huaquin, —Un chitutan un yopai cuscan fitiroran, —ishon shinantiro.

<sup>11</sup> Nanscarifiai non mato Jesushuunoa cashman tapimafafainaiton copiquiri non yopai cuscan man noco cashman inantiroquin. <sup>12</sup> Futsafoan Jesushuunoa mato yosiaiton nicaquin nan yopaifo cuscan man ato inanmisi. Ascacun un mato tau huaquin yosimisi. Nanscacufin nococafin finonmafain iconquin man noco inantiroquin. Man noco inantirofiacuncai non mato ahua yocamisima. Ahuarafoan noco ahuuscara huafiaino non tunucoinmisi man Jesushuunoa nicasharanon. Un mato yosiain rafanan un pui fiaitonraca ua afanan nicapaicanimaquin. <sup>13</sup> ¿Man tapiamamun nan Dios fu tsainti pushu muran tushu fuafo nan murannoa yonomisifoan nan tushu cashman pimisifo? <sup>14</sup> Nanscarifi aqui Diosin yononi isca huaquin, —Tsoan uhuun tsain shara futsafo yosiaiton nicaquin nan nicafoan ato pimatiroran, —ishon Diosin yononi.

<sup>15</sup> Diosin ua yononi cuscan urifi mato ahua ra yocapaiquin un mato yocacuanaquin. Nannori Diosin yononifiacun un mato ahuashta yocamisima. Mato Diosin tsain yoifafainfiacin, —Un ato cunu fomai ua pui inanonforan, —ishoncai un shinanmisima. Ascarifi atacai tsoan yoiquin isca huatiroma, —Pablonun aton pui fianpaiquin ato Jesucristo-huunoa yoimisiran, —ishoncai tsoan uhuunoa anori yoitiroma. Ascan tsoan uhuunoa anori yoiaino un naafin shara icuanaquin. Nanscacufin tsoanshtacai uhuunoa anori yoinacama.

<sup>16</sup> —Un mato ahua yocatama Jesushuunoa yoimisishaqui un sharaquin, —ishoncai un yoitiro. Diosin ua catoncun ua yononi un Jesushuunoa yoifafainon. Asca un Jesushuunoa yoifafainyamaiteon Diosin ua onaintimatiro. <sup>17</sup> Un yoiquin isca huafiacun, —Upan Diosin, min Furunhuunoa un yoipairan, —ishon un yoicun Upa Diosin ua inantiroquin. Ascafiacai anorima. Diosifin afi ua catonquin tauhuashon ua yononi Jesushuunoa un yoinon. Nanscacufin nan ua yononi cuscan un aicai.

<sup>18</sup> ¿Asca un Diosin tsain yoimisishomun ahua un fiuquin? Ato yoishocai un ahua ato yocamisima. Ascashoricai un ato yoimisima isca huaquin, —Diosin mato yonocun Jesushuunoa un mato yoifafainaiton un yopai cuscan ua inanforan, —ishoncai un yoimisima. Nonri yoipaiquin un yoisharacuana. Ascafiacai un anori yoipaima. Jesushuunoa yoiquin un tsoa ahua yocamisimashaquin un fasi unimai. Un Diosin tsain yoiquin ahua un mato yocashma un unimai. Ahuun rafananri Diosin fasi uqui unimacoin. Nanscarifi aqui ua unimamafafaini.

<sup>19</sup> Uncai tsoa futsan oinmatima. Jesús fustifin uhuun Ifoquin. Uhuun Ifo futsa yamai. Ascafi nantifi yorafo un ato shara huapai ato Jesús icoinra huamashquin. Nanscacufin un nantifi yorafoan aton oinmati cuscaraquin. <sup>20</sup> Uhuun caiffo Israelifo ya un icashu nan icafo cuscan unrifi un ato cuscara ica afoan Jesús icoinra huanonfo. Nocon shuni Moisés nocon caifo yonopaoni cuscacai natian afanan yonotiromafia Moisés yonopaoni cuscan nicamisifo fu icashuri urifi ato futan Moisés yononi cuscain ato Jesús icoinra huamashquin.

<sup>21</sup> Nanscarifiai nan Moisés yononi cuscan tanafoma fu un atofu icaino un ato cuscararifi un Moisés yononi cuscan aima ato Jesús icoinra huamashquin. Un nanscafiamisicun Criston ua yononi cuscain un nicasharafafaini. Nan fusticai un cachiquiri huatiro. <sup>22</sup> Jesús icoinra huafo atirifi Jesús yononi cuscacai tsoan tapisharataicanima. —Non Jesús tanasharaino non na cuscarafo atiomaran, —ishon shinancani. Ascafiacucai Jesús noco anori yonoama. Un atofu icashu un ato cuscarari itiro. Jesús noco tapimana cuscan paratama un ato tapimashquin. Ascano ratoran futsafo fu un icashu un aton cuscarari itiro. Nanscashon un ratoran futsafoan uhuunshon Jesús icoinra huashu nipasharacani.

<sup>23</sup> Un asca huaquinfín un ato Jesucristohuunoa tapimasharashquincai. Icoinra huaifono urifi un atofu finacai unimacointiro.

<sup>24-25</sup> Man man tapiari nan pushcoaifo nannorasi ichofiacaquin fustiton shonontiro. Ascaifonfin yorahuanrasiton ato oiainfono pushcohuaifo ichocani. Shonononpaicani. Nan shonoanfin aqui unimaqui ahuaara shara futsa niaifon inanmisi. Ascacufin nantifi curushcai ichocaniquin futsafo shononpaicani. Tsoa ichoataima tauí afi ranan ichoyofafaino fuyahuashcaquin sumu ichosharashcaquin atsanashcaquima. Nanscarifi acaquin nocon Ifo Jesús curushcai yonoshosharacahuun. Ahuaara chacafo huayamafain Diosin mato yonoama cuscan ayamacahuun Jesús tanaquin fuyahuashcaquin man aqui nocoaitian mato ahuaara shara inanshquiquin.

Ascatari nan ichoaifoan niaifon ato inan cuscan cuyotiro. Asca Diosin noco ahuaara inancai cuyopacunacama. <sup>26</sup> Ascacuncai un Jesús yonoshoni un cuparamuima. Un ipaitsi cashman yonoshonima. Pushcohuaifo ichocani shonononpaicani cayacaficoín ichotirofo. Nanscarifiai un cayacafi ica. Uhuun Ifoan ua yonoa cuscacoian aqui nocosha-

rashquin. <sup>27</sup> Ufin un apaiyai cuscacai un aama. Uhuun Ifoan ua amapaiyai cuscan un aqui. Un tunupaifiaquin un tunuima Jesús tanasharashquin. Un atsanafiaquin un tunuima Jesushuunoa yoifafainquin. Jesús fustitofin ua yonotiroquin. Nanscacufin un futsafo yoifafainicai Jesús Ifo huashon yonosharashononfo. Ascafiashon Diosin ua yonoa cuscan un ayamai ufiri un funotiro. Un afanan Dios yonoshotiroma. Diosin afanan ua yonomatiroma. Un funopaima. Nanscacufin un apaiyai cuscan un aima. Uhuun Ifoan ua amapaiyai cuscan nan fustisi un aqui.

## 10

### *Israeliffoan Dios chaca huapaoni cuscan ayamacahuun*

<sup>1</sup> Uhuun yoramishtichin tapicahuun. Nocon shunifo Egipto anoashu fonifo. Ascatari Dios atoqui nai coinmahuan cuyama shara fotomapacufoanni tapinonfo atofu ica. Nantifi nocon caifo Israelifo nai coin cai cuscan acho fonifo. Diosin nan coinhuunshon ato iyopaiyaiquiri ato iyoni. Ian mahuanun ahuun anu Oshin ano nocotoshinifo. Ascashori nantifi nocon caifo Israelifo Diosin ato ian mahuan nushmancayan rafu ocuma rafu unufiano nan nushmancayan mai muto huatanaino ahuun pocufainifo. <sup>2</sup> Moisés ato rucun tanashoni. Nantifi nocon caifo Israelifo Moisés acho fonifo. Nan Moisés icoindra huacashon nantiffain tanacoinifo. Nantianri tauí Moisés aton niaifoanno nantiffain tanacoinnifo.

<sup>3-4</sup> Ascatari Diosin nai muranshon ato tushu potashoni nantiffain pinonfo. Nannoshori unu yamacoinyaino Moisés toquirininhuan ahuun poqutinín tsacaino unu tsosia sharacoin tohuashu furani nantiffain ayanonfo. Ascano Cristo ahuun Yoshin Shara atofu caino ahuunshon ayanifo. <sup>5</sup> Asca huafiainfoanno Upa Diosicai atifiquicai unimanima. Ahuun tsain nicapayamaifoan. Ascashufin tsoan istaipama foanfaincanisi nicayosmacani nai cuyonifoquin. Nan tsoan istaipama ato mai huaquin futsanifo. Diosin ato namaquin cuyoano.

<sup>6</sup> Ascashofin nanfoan chaca fuchipaipaonifoquin. Ascacufin nanfohuunoa Diosin Yoshin Sharapan noco tapimaniquin chacafo fuchipaipaonifo cuscan norifi non ascaran fuchipainonma inifo cuscan omitsiscashquima. <sup>7</sup> Afoan chaca huapaoni cuscan huayamacahuun. Ascashon nanfoanri ahuaara futsan ramihuacashon, —Nocon diosiran, —ishon yoipaonifo. Asca huacashon fuusi huashofain aqui pifain ayafain icashon ahuaara futsan ramihuafoan ointaifi chaca huacaquin pauncain mononifo.

<sup>8</sup> Ascan oinfain. Ato cuscara iyamacahuun. Atirifi aton ahuinma fu inifo. Nanscarifaiyainfofori aton funumafo fu inifo. Ascaifoan oinquin Diosin veintitres mil ato namariscatani. Nan shafatan fusti ato namariscatani. <sup>9</sup> Aton cuscara chaca huayamacahuun. —Diosincái nocoqui funa sinatiroma. Ascan un chaca huafiacucai ua onaintimaimaran, —ishon anori shinanyamacahuun. Nocon shunifoan Dios chaca huariainfoan Diosin afanan tunuyamacaiquin ato onaintimani. Ascashori rono paupafu ato muran nichini nanfoan ato nasano atirifi nani. Ascacun ¡Oinfain! Man Dios chaca huariaiton afanan tunuyamacaiquin matori onaintimatiro. <sup>10</sup> Ascashon nanfoanri tsain chipurifaifoan Diosin nai oinmatinín atirifi ato namani. Ascacun oinfain marifi tsain chipuyamacahuun matori onaintimanonma.

<sup>11</sup> Nan nocon shuni Israelifoan chaca huapaonifo cuscan noco cunushoni norifi non aton cuscara inonma omitsiscashquima. Natianri nocon Ifo Jesús oti chaima. Ascacun non itisharanoncahuun nocon Ifo nocoaitian non aton cuscara chaca inonma.

<sup>12</sup> Asca tsoan shinanquin isca huai, —Uncai aton cuscara chaca huatiroma. Unfi cayacafi fusti itiroquin, —ishon anori shinainno oinfain. Marifi man Jesús tanasharayamaino aton cuscara chaca man itiroquin. <sup>13</sup> Satanás mato chaca huamapayai cuscaai marus fusti man mumisima. Man muai cuscaari nantifi icoinra huafoan man mumisi. Ascafiacun Diosin mato yoimisi cuscan man icoinra huatiro. Matori cushusharatiro man chaca huanonma. Satanás mato chaca huamapayai cuscan Dioshuunshon mato atima huatiro man chaca huanonma. Ascashori Diosin mato tapimai ahuuscashomain man chaca huanonma.

<sup>14</sup> Ascacufin uhuun yoramishtichin ahuara futsa ramihuacashon, —Noco diosiran, —icashon icoinra huaifono atomaquinoashu pashcafaintacahuun. <sup>15</sup> Man shinansharatiromainquin un mato yoiai cuscan shinacahuun. Un mato iconma yoiamaraqun iconcoin un mato yoicai. <sup>16</sup> Man man tapia non Diospan tsain nicashquin ichananmisitian nan non ayai cuscan non shinanmisi Jesús noco nashonicun. Nan cucho fustiquinoa non ayapacumisi. Nantifiton ayaquin non shinantiro Jesús noco nashocain ahuun imi foni non afu nipanon.

Ascacun non yoitiro isca huaquin, —¡Aicho! Upa Diosin, min Furunmun noco nashoni non afu min facufo inonran, —ishon non yoitiro. Nanscarifi aqui misi torupacushon nofi ranan non uhuapamashta inanonanpacumisi Jesucristo ahuun caya nocohuunshon mastanifo non afu rafupacunaca shinanshquin. <sup>17</sup> Misi fusti torupacushon nantifiton pimisifo cuscan. Nanscarifiai Cristo fustifiano nantifi icoinra huaafo non ahuun yora fusti cuscara ishquin.

<sup>18</sup> Ascashon nocon caifo Israelifohuunoa shinacahuun. Nanfoan aton inafo rutucashon Dios inanmisifo aton chaca soapaiquin. Aton ichananti pushu murannoa yonoshomisifoan nan nami pimisifo. Asca huacanifin nan fusti shinantsa acaniquin. Piyanan Dios cufimisifo. <sup>19</sup> Ascacun un mato yoi nan ahuara futsa ramihuafocai nancai ahuama. ¿Ascatari ahuara futsa ramihuacashon tushu inanfomun ato shara huamatiro? <sup>20</sup> Ma. Anorima. Jesús icoinra huamafoan Diosicoin inantamarocon ahuara futsa ramihuacashon tushu inanpaicaquifin yoshin chaca inanpaicaniquin. Nanscacucaí un mato yoshin chaca ya imapaima.

<sup>21</sup> Man nocon Ifo Jesús fu rafupaicain a yoshin chacafo fu man rafutiroma. Ascashuri nan rafu man ositiroma. Man Jesús icoinra huafo fu ichanancashon man ato futan ayafain Jesús noco nashoni cuscan shinanshquin. Man asca huatacai nantianri aa Jesús icoinra huamafo fu man ichanantiroma nan yoshin chacafo shinanshquinma. <sup>22</sup> Nocon Ifo Jesús fu rafupaifiatan non yoshin chaca fu rafupai non asca huaquinfin nocon Ifo Jesús non sinamatiroquin. Non asca huaiton noco onaintimatiro. ¿Asca nonmun Jesús curushcai finontiomun noco onaintimanonma? Ma. Anorima. Jesús noco onaintimaitian tsoan noco numatiroma.

*Jesús icoinra huafo non noicoianshu nan fustiton yonoa cuscan non atiro*

<sup>23</sup> Icon non Jesús icoinra huashon Diosin noco yononi cuscan nantifi non pitiroquin. Nantifi nami shara non pitiro. Nan tsain iconfiacun Jesús icoinra huaa futsafoan shinantiro isca huaquin, —Un na cuscara nami pitromaran, —ishon shinaintonfin ato ointaificai nan cuscara nami non pitroma ahuara chaca shinanshquima. Non nantifi yorafo Jesusquiri shinanmapai. Non ato shinanmashara fustipai. <sup>24</sup> Ascacun man apaiyai cuscan fusti shinanyamacahuun. Futsafohuunoari shinan-sharacahuun. Ato shara huafafaincahuun.

<sup>25</sup> Ratoran futsan mato nami inanpaiyaiton man fitiro piishquin. —¿Rania min fiamun? —ishon yocayamacahuun maton nomuran shinanchacashquinma. Diosin tsain yoia isca huaquin, —Nantifi man pitiroquin, —ishon noco yoini. <sup>26</sup> Nocon Ifoan nantifi onihuani. Nantifiri ahuuna nan onihuaniti noco inanpai norifi non unimacai non aya inon.

<sup>27</sup> Ascan Jesús icoinra huamaton mato pimapaiyaiton a futan picahuun. Ascashon isca huaquin yocayamacahuun, —¿Rania na nami min fiamun? Ahuara ramihuacashon, “Nocon diosiran,” ishon ato nami inanfo. ¿Nan cuscara nami mian pimapaimun? —ishon yocayamacahuun. Man yocayamaiton unimacai pinon.

<sup>28-29</sup> Ascafiashon ratoran futsafoan mato yoiquin isca huai, —Un na nami mia pimai ahuara ramihuacashon inanqui tau huafo. Un chipo fiaran, —ishon mato yoiaiton nan nami piyamacahuun. Ascashon piquin isca huaquin aton nomuran shinantiro, —¡Aja! Na nocofunun Jesús icoinra huafiashon ahuara ramihuacashon aton diosin nan nami inanqui tau huafo man piaran. Asca nanton Jesús tanasharamaran, —ishon ahuun nomuran shinantiro. Marifi man pishonraca ahuun nomuran shinan, —Mun chaca huaran, —ishon. Manfin tapiaquin nanfo non pitiro. Ascan futsafoancai tapiataicanima. Afoan shinanraca ascaquin non chaca huatiro. <sup>30</sup> Man yoiquiraca isca huaa, —Un nantifi tushu pishon Dios, “¡Aichoran!” un huatiroquin. Un asca huacun ahuuscain futsan uhuunoa shinanchacatiromun, —ishon man shinanraca. <sup>31</sup> Un mato tapimasharanon. Ahuara man pifain ayafain man ahuarashta futsa huai cuscaro acafi futsafoan Diosihuunoa shinansharanonfo.

<sup>32</sup> Ascacun man acai cuscan huaquin tsoa shinanchacamayamacahuun. Nocon caifo Israelifo iyamarai mani futsafo nantifi Jesucristo icoinra huafo ato shinanchacamayamacahuun mato huunshon nocon Ifohuunoa shinanchacanofoma. <sup>33</sup> Nanscarifi aquin urifi nantifi yorafo un ato shara huashopai unimanonfo. Ascacuncai un apaiyai cuscan fusti un huaima. Futsafoan apaiaifo cuscan un ato huashopai Jesucristo man icoinra huacashon chaca shatucanashu afu ipanonfo.

## 11

<sup>1</sup> Un Cristo tanai cuscan marifi ufutan tanacahuun.

—*Ichananshon non Diosquiri shinainno nocofunu yafi ainfomain ahuuscatirofoquin, —ishon Pablón ato yosini*

<sup>2</sup> Man ua shinanfaimisicun. Un mato aicho huai. Un mato yosimisi cuscan huafain man nicafafaini. <sup>3</sup> Natian uhuun yoramishtichin un ahuara futsa mato shinanmapai man tapinon. Cristofin nantifi yorafoan nocon Ifoquin. Ascatai ainfofoan aton ifofin aton funufoquin. Ascan Cristo ahuun Ifofin Upa Diosiquin. <sup>4</sup> Ascashu man icoinra huafo ichananmision ratoran nocofunun Dios cuffain ahuun tsain yoipaiquin iquisi ahuun maiti pucatiro. Ascashon maton fuyamisi

cuscan ismashcaquin Diosihuunoa shinansharaquin. Ascacun maiti mapacumutan ismatiro Cristo fusti ahuun Ifocun. Ahuun maiti mapacumuyamacun futsafoan oinquin shinantiro, —Natocai Cristo Ifo huapaima, —ishon shinantirofo.

<sup>5</sup> Ascatari ainfoan Dios cufipai yamaraquin ahuun tsain yoipaiquin iquisi maiti nutatiro ismashquin nocofunu ahuun ifocun. Ascaqui maton fuyamisi cuscarari ismashcaquin aton funuhuunoa shinansharashcaquin. Ahuun maiti nutancasmaquicai funu ifoancoinnama cuscara itiro. <sup>6</sup> Nan ainfoan Dios cufipaiquin maiti nutancasmacun nocofunu cuscara marucumutiro. Ascafiashu ainfo marucumuashu rafipaitiro. Nan yorafoan oinquin yoitirofo isca huaquin, —Na ainfoan chaca huaran, —ishon yoitirofo. Ascacufin ainfoan Dios cufipaifain ahuun tsainri yoishquin maiti nutantiroquin.

<sup>7-9</sup> Ascafiashu nocofunun Dios cufifain ahuun tsain yoishquin maiti nutantiroma. Diosin nocofunu onihuani a cuscara inon. Ascacun uhuun yoramishtichin non Dios nicacoianshu ahuun ointi cuscara shara non itiro. Nanscarifaiyainfofoan aton funu nicacoincanashu Diosin ointi cuscara sharari itirofoquin. Diosifin nocofunu onihuaquin tauhuaniquin. Chipofin ainfo onihuaniquin. Nocofunuhuunoa Diosin ainfo onihuani. Ainfohuunocai Diosin nocofunu onihuanima. Nocofunuhuunoa nan ainfo onihuani afu rafucain afu yonosharapacunon unimayanan.

<sup>10</sup> Ascacun nocofunufaoan ainfo iquintiro. Ainfofoanri aton funu nicacointirofo. Ascashu icoinra huafo ichanainno ainfoan ahuun maiti nutatiro ahuun funu nicacoinshon ismashquin. Man asca huaiton Diosin oinmati afu nai muran icafoan oinquin yoitiro isca huaquin, —Diosin yononi cuscan nan na ainfoan ahuun funu nicashara. Nanfin sharacoinquin, —ishon yoitirofo.

<sup>11</sup> Ascashon Diosin noco onihuani ainfofo yafi nocofunufo yopanonanonfo. <sup>12</sup> Diosin tau huaquin nocofunun ahuun anu Adán onihuani. Ascashon ahuunoari ainfoan ahuun anu Eva onihuani. Ascataannaino ahuunoashu nocofunufo yafi ainfofo cainpacumisiquin. Ascafia nan ainfofo yafi nocofunufori nantifi Diosin onihuani.

<sup>13</sup> Nanscacun mafin shinancapon iconmainquin. ¿Ainfoan matofu ichananquin Dios cufipaiquin maiti nutashoma Dios cufia ascara sharamun? Ma. Ascaracai sharama. Man ascaquicai ato ifo nocofunufo oinmapaicanima. <sup>14</sup> Man man tapiari nocofunufo aton fo fasi chai huua chaca itiro. Nannori nantififain non shinanmisi. Nanscaifin rafipaitiroquin. <sup>15</sup> Ascatama ainfofoan aton fo chai huafin maiti sharashta ointsita itiroquin. <sup>16</sup> Un na mato yoiai cuscafin ratoran icoinra huua futsa ua fochishmapaiyaitocai un ahua futsa yoipaima. Ascashocai non ahua futsa yosimisima. Nan un mato yoimisi cuscari Jesús icoinra huua futsafo afi ranan ichanancashon nanfori nannori fusti yoimisisoquin.

*Nocon Ifoan noco nashonihuunoa shinain ichanancashon nantianri Corinto anofoan ahuarafu chaca huaifo cuscan Pablonun ato yosini afanan ascanonfoma*

<sup>17</sup> Ascashon ahua futsari un mato yoipai. Un nica man atirifi ichanansharama. Ascataमारoon man fasi chaca huai. <sup>18</sup> Futsafo mato anoashu uqui fucashon ua yoiafo nan man ichanainticai man futsa chaima man tsaopaitiroma. Man ichananshon nocon Ifo Jesús mato

nashoni shinanpaiflain mafi ranan man noinancasmatanain. Ascacufin un matohuunoa nicai cuscan un shinan atirifiracafin iconquin.

<sup>19</sup> Man shinanraca, —Nan man fochishmanantanquin man tapitiro ratofoanmain cayacafi shinancanicaí, —ishon man shinan. ¡Ohuashta! Anorima. Man fasi amaquiricoín shinan. <sup>20</sup> Man ichananshoncai Jesús mato nashoni man shinainma. Nan shinantamarocon man pifain ayafain nan fusti man shinain. <sup>21</sup> Un nica man ichananshon pifiaquin-caí a tushuomafori man pashcashomisima. Ato pashcashotama mafi ranancairocon ayafain ahuun man paunmisifo. ¡Ai timafin! Ascacufin fasi chacaquin. <sup>22</sup> Pipaquin ichananti ano man cataima iquisi maton pushu anoshon piyocahuun. Ascataamarocon Dios fu ichananti pushu ano oshon man ichapa pifafainmisi. Tushuomafo man rafimaquin. ¡Ai timafin! ¿Unmun matohuunoa yoisharaiquin? Ma. Uncai matohuunoa yoisharatiroma. Nan mato futan icoinra huaa futsafo man chaca huacun. Ascaracai sharamafinquin.

*Jesús noco nashoni cuscan pifain ayaquin non shinantiro*

<sup>23-24</sup> Ascataari nocon Ifo Jesús afincoín ua yoini cuscan un afanan mato yoinon. Ua tapimani cuscari un mato tapimai. Nocon Ifo Jesús Judaspan ato achimanataima afu rafumisifo fu ichananni. Ascashon ato futan piquin. Misi finifoantan Apa Diosin yoini isca huaquin, —Upa Diosin min fasi sharacoin. Mirifi min nantifi tapicoian. ¡Aichoran! —huatan misi torupacushon atoti inanni. —Naafin uhuun caya cuscaracoínquin. Unfin matohuunoashu chipo naicain. Nan man ichanaintian man misi piati ua shinanfafaicahuun, —ato huatan.

<sup>25</sup> Ascashon piyaifoan afanan cuchori finifoantan ato ayamapacuquin yoini, —Na ayatihuuunoa ahuara funa shara un mato yoiquin isca huai. Uhuun imi foyanan un matohuunoashu nai man ufu Upa Dios ari ipanon. Nan na non acai cuscan chipo nan man ichanainti ua shinanfafaicahuun, —ishon ato yoini. <sup>26</sup> Ascashori man ichanancashon Jesús mato nashoni cuscan shinancahuun. Misi pifain ayafain huacashon nanscasi huacaquin, —Nocon Ifoan noco nashoniran, —ishon shinanfafaicahuun. Nan Jesús afanan oaitian nanscasi huafafaincahuun.

*Ahuuscashomain Jesushuunoa nani cuscan shinantaqui non pitiroquin*

<sup>27</sup> Ascacufin nan man ichanain anoshon misi pifain ayaiti ayafiaquicai maton chaca shatucasmafain manri chaca huaa. Nocon Ifoan noco nashoni ahuun caya fasi omitsiscacain imi foyanan noco nashoni. Nanscarafo man tapiflashocai nocon Ifohuunoa shinantamarocon chaca huaquin man afanan nocon Ifo omitsiscamai. <sup>28-32</sup> Ratoranfoan misi pifain ayafain nocon Ifo omitsiscacain ato nashoni cuscan shinanyamaifoan Upa Diosin ato onaintimashquin. Atirifoan nan na un yoia cuscan asca huacani.

Ascashufin nanfo iramannashtafo atirifi isinin icain atirifi onihuani-fotifain. Nanscacun man ichanaintian oinfain. Misi pifain man ayataimari ahuara chaca huashon iquisi Upa Dios yoiyocahuun maton chaca soashonon mato onaintimanonma. Jesús icoinra huamafo Diosin ato onaintimai cuscacai noco onaintimaima. Afocai ahuun facufoma. Ascacun nanfo ato omitsiscapanacafo muran potashquin. Ascacun nanfo ato omitsiscapanacafo muran potatamarocon noco tapimashquin non afanan chaca huanonma. Nanscacufin man ichanaintian Jesús noco nashoni



shinanshquin pifain man ayataimari iquisi maton nomuran shinanc-ahuun manmain chaca man fomaincai. Ahuara chaca huashon shinanquin Upa Dios yoiyocahuun maton chaca mato soashonon. Ascashofin man pifain ayatiro Jesushuunoa shinansharashcaquin.

<sup>33</sup> Ascacufin uhuun yoramishtichin man ichananshon Jesús noco nashonihuunoa shinancaquin oinyocaquin atirifi icafofiacun. Ascashon misi torumishti yafi aqui ayaquin man shinantiro Jesús noco nashonihuunoa. <sup>34</sup> Ratoran futsa man fonainquin iquisi maton pushu anoshon ichananshoma man piyotiro. Man ascaitocai Diosin mato onaintimaima. Ascacun un matoqui nocoshon ahuara man fucashniaiton un mato shara huashoshquin.

## 12

*Diosin Yoshin Sharapan icoinra huafoti ato amatiro ahunshon icoinra huaafo futsafo shara huanonfo*

<sup>1</sup> Uhuun yoramishtichin natian ahuara futsa un afanan mato yoisharapai. Nan non ahuafo Diosin Yoshin Sharahuunshon non atirohuunoa un mato tapimai. Nanfohuunoa iconcoin man tapinon.

<sup>2</sup> Man manfin tapiaquin Jesús man icoinra huataima ahuafo rami huashon man icoinra huapaoni. Ascafia afoancai ahua shinantiroma. Ascashocai ahuashta mato yoitiroma. Nanscaquin nanfohuunoa man amaquiri shinapaoni.

<sup>3</sup> Ascatan futsafo matoqui nocoshon yoishquin isca huaquin, —Un mato Diosin tsain yoi oaran, —ishon mato yoiquin. ¿Ahuuscashomun man tapitiroquin Diospan Yoshin Sharahuunshon mato yoiyamaraquin afin shinanfain mato yoiaiton? Nanscacun un mato tapimai ahuus-cashomain man tapitiroquin. Tsoan Jesusqui tsain chaca huafin acai Diospan Yoshin Sharahuunsho ashu tsainquima. Ascashon, —Jesusfin uhuun Ifoquin, —ishoncai tsoanshta afin yoitiroma Diosin ahun Yoshin Shara fustihuunshon yoitiro.

<sup>4</sup> Upa Diosin nan icoinra huafoti ahun Yoshin Sharapan ato amapaiyai cuscan huaquin futsa futsa huashon arusu fusti noco shinanmatiro non ahunshon icoinra huaafo futsafo shara huanon.

<sup>5</sup> Ahunshon futsa futsa huaquin afiaquin nocon Ifo fusti non ashotiro.

<sup>6</sup> Ascano Diosin nan icoinra huafoti nocon ointi muran futsa futsa huaquin noco tapimai ahunshon non ahua ashonon. Ascatan nan Diosin fustiton nantifi nocon nomuran noco tapimafafaini non a cuscara inon.

<sup>7</sup> Ascano Diosin Yoshin Sharapan ahun yono ismatiro isca huaquin. Icoinra huafoti ato amatiro futsafo shara huanonfo. <sup>8</sup> Futsan Diospan Yoshin Sharahuunshon tsain fasi cayacafi shara noco yoiaino futsanri Diospan Yoshin Sharahuunshon Diosihuunoa noco yoisharaino.

<sup>9</sup> Futsanri Diospan Yoshin Sharahuunshon finonmacaifain icoinra huaquin finacoiyainno. Futsanri Diospan Yoshin Shara fustihuunshon yorafo caya huamaino. <sup>10</sup> Futsanri Diospan Yoshin Shara fustihuunshon tsoan atiroma cuscan atiro. Futsanri Diospan Yoshin Shara fustihuunshon nan Diosin yoiyai cuscan noco yoiaino. Futsanri Diospan Yoshin Shara fustihuunshon tapitiro futsamain noco Diospan Yoshin Sharahuunshon yoiyamaraquimain yoshin chacahuunshon noco yoicain.

Futsanri Diospan Yoshin Sharahuunshon nan tsain futsanman yoifain nan tsain futsaman yoiyai cuscan huafain futsan nicayoyamafiamisishaqui

Diospan Yoshin Sharahuunshon nan tsain yoia cuscari noco tapimatiro. <sup>11</sup> Nanfofin Diosin Yoshin Sharapan ahuun yonoquin. Nan icoindra huafotifin Diosin Yoshin Sharapan ato amapaiyai cuscan acaniquin. Naantofin nan noco amapaiyai cuscan noco huamatiroquin.

*No fin nocon caya fusti cuscaraquin*

<sup>12</sup> Nocon caya fustifiano non pashcoi futsua. Nanscarifiai Cristo fustifiano nonfin ahuun yora ichapaquin. <sup>13</sup> Cristo fustifiano nonfin nantifi ahuun caya cuscarafuquin. Atirifi non Israelifo non mani futsafori non nocofunufuon aton oinmatifo non atirifi nocofunufuon tsoa aton ifoma icaino. Nan non Cristo icoindra huafoti Diosin Yoshin Sharapan nocon ointi noco fianananhuano Cristo ahuun yorafo non itiroquin. Non ahuun caya cuscara. Ascfafia Diosin Yoshin Sharahuunshon nan icoindra huafoti ahuun cayacoin cuscara noco ima.

<sup>14</sup> Nocon caya fustifiano non pashcoi futsua. <sup>15</sup> Ascataari nocon taunca i yoiqui isca huai, —Uncai mucuma. Ascan uncai cayan pashcoi futsutiroma, —anori yoifiano nocon cayahuu nuua. <sup>16</sup> Ascataricai nocon pafinquinin yoiquin isca huai, —Uncai furoma. Ascan uncai cayan pashcoi futsutiroma, —ishon yoifiai nanri nocon cayahuu nua. <sup>17</sup> Nocon cayahuu furo fustiacumun ahuuscashon non nicacuanquin. Nanscarifiai nocon cayahuu pafiqui fustiacumun non ahuuscashon shutucuanquin. <sup>18</sup> Ascfafiaca Diosin noco ascara onihuanima. Nanfin apaiyai cuscan noco onihuaniquin. Ascashon nan noco tuchipaiyaino nocon cayahuu noco tuchihi futsani. <sup>19</sup> Nocon caya ahuara fusti ya icainocai shara icuanama. <sup>20</sup> Nan iconcoin. Nocon caya fustifiano non pashcoi futsuaquin.

<sup>21</sup> Ascan furoncai mucu isca huatiroma, —Uncai mia yopaima, —ishon yoitiroma. Maponricai tau isca huatiroma, —Uncai mia yopaima, —ishoncai yoitiroma. Ascan isca huaquin shinanyamacahuun, —Un mia yopaimaran, —ishon futsa yoiyamacahuun. Diosifin nan icoindra huafoti noco noicoquin. Nanscarifiai nofi ranan non noinanoncahuun. <sup>22</sup> Nocon caya pashcoi futsuafo mutsisipamafishu nanfori non fasi yopacoin. <sup>23</sup> Nan raniran futsan non pashcoashta nan non musu huatiro futsafoan oinonfoma. Nanfori non ihuasharatiro rafishquima.

<sup>24</sup> Diosin nocon caya noco onihua cuscan huafain fasi non cushushara. Ascashon non yoitiro isca huaquin, —Un na yopacoinran, —ishon. Nanscarifi aqui ratoran Diosin yorafofiacun nacai ahuamaran huafifo nancaifin Diosin ahuun fasi noiquin. Ascacun atohuunoa non yoisharafain non ato yopacoin. <sup>25</sup> —Diosifin noco onihuaniquin nan icoindra huafoti nantifi non yopanancoinran, —ishon shinanonfo. Ascacun nantifi non cushunonansharatiroquin isharashquin. Nannorisi shinanshquin. Nantifi cushunonansharacani. <sup>26</sup> Nofiri raniran non moshauqui chachishon non mutiro nantifi nocon caya non omitsiscainanhuun non isincointiro. Nanscarifiai Jesús icoindra huua futsa omitsiscainon nantifi nan non icoindra huafuon ahuunshon non mutiro afu omitsiscainon shinantsa. Nanscarifiai Jesús icoindra huua futsan futsafori shara huacun non nantifi afu icoindra huafori non afu unimacointiro.

<sup>27</sup> Ascashufi non Cristo ahuun caya cuscaracoquin. Nantifi non ahuun caya pashcoi futsua cuscarari. Nantifi non Diosin yoracoinfo. <sup>28</sup> Ascan nantifi nan Jesús icoindra huafoti Upan Diosin noco catonni ahuunshon ahuara futsa futsa huaquin non ashonon. Cristo nuno mai

ano niyoatian futsafo catonni afu rafunonfo. Ascashori ato nichini ahuun tsain ato yosifoanfainonfo. Cristo afu rafumisifo catonquin tau huani. Ascashon chipo Diosin tsain yoimisifo catonfain Diosin tsain tapimamisifo catonfain tsoan oinyomisima cuscara ahuunshon atirofo catonfain Jesushuunshon isinincaifori cayahuamafain futsafo ashofafainmisifo catonfain futsafo yonosharamatirofori catonfain futsafoan nan tsain futsaman ahuun Yoshin Sharahuunshon yoitirofo nanfori Diosin ato catonni. Nantifi catoan ahuunshon yorafo ashonsharonfo.

<sup>29</sup> Diosincai atifi noco yonoama non ascarasi huanon. Nantificai yonoama ahuun tsain yoifoanfainnonfo. Ascashoricaai nantifi yonoama tsoan oinyomisima cuscara ahuunshon atirofo. <sup>30</sup> Nantificai yonoama Jesushuunshon isinincaifo cayahuamanonfo. Nantificai yonoama nan tsain futsaman ahuun Yoshin Sharahuunshon yoinon. Nantificai yonoama nan tsain futsaman noco tapimanonfo. <sup>31</sup> Ascacun Diosin mato imapaiyai cuscan huafain nan icoinra huaa futsafo man shara huafafainon. Diosin Yoshin Sharapan noco amapaiyai cuscan nanfo fuchipaicahuun. Ascan nanfo sharafia un ahudara fasi shara finacaia natian un mato yoinon. Ua nicasharacahuun fasi shara finacaia Diosin noco imapaiyai cuscan huafain un mato tapimanon.

## 13

### *Non Diosinhuunshon futsafo noiafin nancai shara finacaiaquin*

<sup>1</sup> Un mani futsafoan tsainman yoifain Diospan oinmati afu nai muran icafoan yoia huaquin un yoifiatiro Diosihuunshon un futsafo noiamashucaai un ahudara. Ascashu uhuun tsain achacoin nicatsa itiro. Futsafo fucashni huai cuscara itiro. <sup>2</sup> Diosin futsafo yoipaiyai cuscan un tapicoinshon yorafoan ahudara tapipaifiaquicai tsoan tapimamafoan un tapishon un fasi Dios icoinra huaquin finacoian un na machi shucucaitahuun un huaino shucucaitiro un asca huafiashocai un futsafo noiyamainocai nancai uhuuna ahudara. <sup>3</sup> Nantifi un aya cuscan un ahuo-mafo un inancoifiaquicai un nan futsafo noiamashu nancai uhuuna ahudara. Un Diospan tsain shara yoiaiton nanscacun nicacasmacaquin ua coaifoanno un naafiashucaai un futsafo noiyamashu nancai uhuuna ahudara. Un ipaitsi natiro.

<sup>4</sup> Non futsafohuun noicoinceai non funatiroma. Non ahuun ramapaitiro. Ascatan futsafohuun non noiricai non futsafo shutiacufoan-paitiashu non sinamisi iyamacain cacapaimisi iyamacain nonricai curafiapaimisi itiro. <sup>5</sup> Non futsafohuun noicoinquricai futsafoan ahudara huapaifaiton non ato shutiacufoantiroma. Ascaquicai non ato rafimapaima. Ascashoricaai nofin apaiyai cuscan fusti non shinantiro. Fushnuicamitsamisi iyamacain futsan noco chaca huafiacun non shinanfafaitiro. Afo shinantamarocon rahuinmafain non ahuun noitiro. <sup>6</sup> Non futsafohuun noicai ahudara chaca oin non unimatiroma. Ahudara icon shara nicai non unimacointiro. <sup>7</sup> Ascatan ahudara ahuscarafiaino Dios noiquicai nocon nomuran non shinan-chacatiroma. Ascashon non tunucointiro. Futsahuun noicoinquricai ahunoa ahudara chaca nicafiaquin non icoinra huatiroma. Futsafohu-unoa chaca nicafishon non tapiyoshomacai non icoinra huayotiro. —Ascayamapainonran, —ishon non shinantiro ahuun noiquin. Non Diosin noicoinquricai ahudara ahuscara afaiton non tunucointiro.

<sup>8</sup> Noinain unupacunacama. Ascafianocai Diosin tsain yoimisifoancai ratoran shafatan afanan tsoan yoishcanima. Ascashori tsoancain ascara tsain nicayomisima afanan yoipacunacama. Tapimamisifoanri afanan noco tapimapunacama. Nanfocai nocon Ifo oaitian non afanan yopashquima. <sup>9</sup> Ascacun natian Diosin noco tapimapaiyai cuscacai atirifi non tapisharataima. Diosin tsain noco yoimisifoan tapiafo cuscan noco tapimasharafiatirocai atirifi tapiafoma. <sup>10</sup> Ascaino Jesucristo nocoaitian non a cuscara shara iishquin. Afifin nantifi tapiaquin. Afin tapia cuscan nocori tapimashquin. Ascano ahuara futsa futsa huaquin Diospan yorafoan noco ashomisi cuscan non afanan yopapunacama. Man nanfo cuyoshquin.

<sup>11</sup> Ascano un facuashu uhuun tsain facu tsain cuscara iyopaoni. Facufoan mutiro cuscan unrifi un muyopaoni. Facufoan shinantiro cuscan unrifi un shinanyopaoni. Ascafia un yosinishaquin facufoan shinantirofo cuscan un afanan shinainma. Facufoan ichapama tapia. Ascan un nocofunuaitian facufo itiro cuscan un afanan aama. Natian nocofunuafoan shinain cuscan un aaqi. Facufo itiro cuscan mun cachiquiri huacoinna. <sup>12</sup> Fuisiti matacoiannocai nocon fuso cuscarocoin non ointiro. Nanscarifiai natian Jesús icai cuscarocoincai non onancoiantaima. Chipa aqui nocoshon ahuun fusocoin non oincointiro. Nantiantari aficoimain ua onancoiaintofin urifi un onancoinyaino.

<sup>13</sup> Ascashon non Dios icoinra huai cuscacai cuyopacunacama. A icoinra huashucaí non amaqi ipanacama. Nanricai cuyopacunacama. Nan rafu sharacoinfia Dioshuunshon non futsafo noicoiainno nancaifin shara finacaiquin. Nanricai cuyopacunacama.

## 14

### *Diosin Yoshin Sharapan noco yonopaiyai cuscan Pablonun yoini*

<sup>1</sup> Ascan Diosin noco nojai cuscan huafairi futsafohuun noifafaincahuun. Nancairocon fuchipaicahuun ascashcaquin. Ascashon Diosin Yoshin Sharapan futsa futsa huaquin mato yonopaiyai cuscan nanfori fuchipaicahuun. Diospan Yoshin Sharahuunshon nan Diosin yoia cuscan fasi fuchipaicahuun icoinra huaa futsafo yoishcaquin. <sup>2</sup> Ascatan futsan tsain futsaman yoiaitocai nicatirofoma. Dios fustitofin nicatiroquin. Diosin Yoshin Sharahuunshon yoifiatocai tsoa futsan nicatiroma. <sup>3</sup> Ascashon tsoan Diosihuunshon ahuun tsain shara yoiquin noco tapimasharashon Jesús cuscara noco imafain nocon ointiri noco shara huashotiro ahuuscarafiaquin nocon ointi non unimacointiro. <sup>4</sup> Ratoranfoan tsain futsaman yoiquin afiri nicamutiro Diosin imapaiyai cuscan aquin. Ascafia nan ratoran futsan Diosihuunshon ahuun tsain yoiaiton nantifi Jesús icoinra huafoan nicatirofo Diosin noco yoipaiyai cuscan nicasharashu Jesús cuscara shara itirofo. <sup>5</sup> Manmain nantifiton nan tsain futsaman Diospan Yoshin Sharahuunshon man yoipainon. Nanscara sharafishu tsoan Diosin tsain mato tapimasharai nancaifin fasi shara finacaiquin. Nantifimain man ascapainon. Ratoran futsa nan tsain futsaman yoiaiton. Ascashon ichananshon futsan maton tsain futsanman yoifiatocai man nicatiroma futsan mato yoiyamaiton. Acai ahuama. Ascafiaton yoia cuscan futsan tapimaino nantifi unimatirofo. Diosihuunoa shinancani.

<sup>6</sup> Ascacun uhuun yoramishtichin un matoqui nocoshon tsain futsaman un mato yoi*ai* cuscan man nicayamacai acai matona ahua itiroma. Ascacun Diosihuunshon un mato tsaincoinman un mato yoi Diosin mato yoi*paiyai* cuscan man nicanon. Maton tsainman un mato tapimanaiton man nicacointiro. Ascashon Diosin mato imapaiyai cuscan man tapitiro. <sup>7</sup> Un iscara mato tapimai. Manuti amaquiri manulaiton non nicasharatiroma ratocaimain shafacafi manuicai. <sup>8</sup> Ranushumua futsan aton cushumisiton ahuan manuti manutiro ato chani huaqui afu ranushumua futsafo itisharanonfo ato noिकासमाifoan ato rutunonfoma. Ascafia manuti cayacafi manuyamaiton tsoancai tapitiroma itisharashcaquin ato rutunonfoma. <sup>9</sup> ¿Nanscarifi aqui nan tsain futsaman man futsafo yoiaino ahuuscashotsi man yoi*ai* cuscan tapitirofo? Man ascara tsain yoi*qui* ipaitsi man ato yoi. <sup>10</sup> Icon nan maitio tsain futsa futsatapafo. Nantifi tsain shara. Ascafia nan aton caifoansi aton tsain nicacatiro. <sup>11</sup> Ascan uhuun caifoan ua tsain futsaman yoi*aitocai* un tapitiroma. Nan uhuun caifoma cuscaracoin itiro. Un ahuan tsain nicayamaino un ahuan caifoma cuscaracoin itiro. <sup>12</sup> Ascacun Diosin Yoshin Sharahuunshon man futsa futsa huaquin mato yonopaiyai cuscan nanfo man fasi fuchipai. Man fuchipaiyaifo nan man Diosin Yoshin Sharahuunshon icoinra huafo aton ointi fupi huamatiro Jesús fasi tanasharanonfo. Nan cuscarafu fasi fuchipaicahuun Dios yonosharashoshaquin.

<sup>13</sup> Ascacufin nan tsain futsaman yoiquin Upa Dios cufihuun man yoi*ai* cuscan mafiri tapifain ichananfori ato tapimashquin shafacafi nicasharanonfo. <sup>14</sup> Ascashon un Upa Dios cufinquin ahuan Yoshin Sharahuunshon nan tsain futsaman uhuun nomuran cufifiaquicai un cufia cuscan un tapitiroma.

<sup>15</sup> ¿Ascacun unmun ahuuscaicain? Un isca huai. Un tsain futsaman Diospan Yoshin Sharahuunshon Upa cufifain nan tsain nantifiton nicanonfo un cufiaiton. Ascadari un nan tsain futsaman Diospan Yoshin Sharahuunoashu urifi fanainshquin. Nan tsain nantifiton nicatirofoanri un fanainshquin. <sup>16</sup> Man Diospan Yoshin Sharahuunshon nan tsain futsaman Upa Diosihuunoa man yoi*fi*aiton ahuuscashocai matofu ichananfoan yoiquin, —Ascapainon, —mato huatirofoma nicatsi huacani. <sup>17</sup> Man Dios, —¡Aichoran! —huasharafiaquicai futsanfo nicasharatirofoma aton ointi unimashquin. Maton tsaintsi nicaifoan.

<sup>18</sup> Uhuun yoramishtichin un Upa Dios aicho huai. Ascashon un yoi, —Upa Diosin, min Yoshin Sharahuunshon tsain futsaman un yoi*a* cuscan atirifiton yoi*fi*aquicai asca huafoa cuscan. Un minhuunshon tsain futsaman un ato finoinnifoan yoimisi, —ishon un Dios yoimisi. <sup>19</sup> Ascafia icoinra huaa futsafoya ichananshon un aton tsainman ichapamaton ato yoi*aiton* nicatirofo. Nanscafin sharaquin. Un ato ichapa tsain futsaman yoi*aitocai* nicatirofoma. Nanscaquin nicafo.

<sup>20</sup> Uhuun yoramishtichin, un mato tapimai cuscan tapisharacahuun. Facushtan ahua tapisharataima. Ascashon nanfoan shinain cuscan marifi shinanyamacahuun. Cayacafi shinancahuun. Ascafia iyoafoan shinanchacatiro cusca*ai* facufoan shinanchacayotiroma. Nanscashi ato cuscara icahuun. Chaca tapipaiyamacahuun. <sup>21</sup> Isaias Diospan tsain cununi isca huaquin,

“Nan Israelifo un ato yoifiaiton ua nicacasmamisifo. Ascacun un ato ipaitsicoín yoímisi. Ascaifoan caífo futsafo un ato muran nichishquin uhuun tsain ato yoishquin nicanonfo. Ato yoifiaífoanai ua nicayoshcanimaran,”

ishon Diosin yoini cuscan Isaías aquí cununi.

<sup>22</sup> Ascashon tsainmansicai a icoinra huaafo non ato yoima Diosin ahuamamishti huatiro cuscan tapinonfo. Ascatamarocon icoinra hua-mafo non ato yoitiro Diosin ahuamamishti huatiro cuscan huafain tapinonfo. Ascatan ichanancashon futsan aton tsainman Diosin tsain yoiaino nanfin man icoinra huafoansi Diospan Yoshin Sharahuunshon nicasharatirofoquin. Ascan nan icoinra huamafoancai tsoan nicas-harataicanima. <sup>23</sup> Ascashu ichanancanashu tsain futsa futsatapafoan tsaincafo man icoinra huamafo iyamarai man tapia cuscan tapiataifoma matofu ichanancashon shinantirofo isca huaquin, —¡Ohuashta! Na yorafo nisoncoinforan, —ishon yoitirofo.

<sup>24-25</sup> Ascafiakin man ichananshon mato tsainman Diosin tsain yoipacuaino icoinra huaama futsan iyamarai man tapia cuscan tapi-ataífoanmari mato nicacashon shinantirofo isca huaquin. —¡Ohua! Urifi Diosin tsain cununi cuscaí un aama. Diosin nantifi tapicoian. Nocon nomuran non ahuarashta fomanpaimisi nanfori Diosin man tapian. Chipo ua puashoshquiran, —ishon shinantirofo. Ascashon shinainfono aton nomuran nocotiro. Nannori shinancatan ratoconun mai chachitiro Upa Dios cufinquin isca huashquin, —Upa Diosin min fasi sharacoin. Min na icoinra huafo fu ica. Urifi mia yopacoinran, —ishon cufitiro.

*Man ichanainno nicatimayamacahuun*

<sup>26</sup> Uhuun yoramishtichin, un mato tapimapai isca huaquin. Man ichanainno futsan mato fanainmafain futsan mato Diosin tsain yosi-fain futsan Diosin ahuun nomuran yoia cuscan mato tapimafain fut-sari Diospan Yoshin Sharahuunshon tsain futsaman mato yoia cuscan huafain futsanri Diospan Yoshin Sharahuunshon mato tapimatiro a yoia cuscan huafain. Ascashon nan un yoiái cuscan non nansca huapaitiro nantifi nan ichananfoanno Diosin mato amapaiyai cuscan man huanon. Ascashu a cuscaracoin man inon. <sup>27</sup> Man ichanainno yora rafutan iyamarai rafu non fustifain tsain futsaman mato yoitirofo. Ascaiton nan futsan maton tsain futsan man yoia cuscan huafain futsan ma-ton tsainman mato shafacafi tapimatiro Diosin mato yoipaiyai cuscan man nicasharanon. <sup>28</sup> Nan tsain futsaman man yoipaiqui tsoan mato tapimayamaino a ichananfo murannoashu man pusitiroma. Ascatan maton pushu anoashu marus fusti nan tsain futsaman man Upa Dios fu tsaintiro.

<sup>29</sup> Ichananshon rafutan iyamarai rafu non fustifain Diosin aton no-muran shinanmanai cuscan huaquin mato yoitirofo. A yoiaí cuscan nicacashon nan Jesús icoinra huafoan shinantirofo isca huaquin, —Diospan Yoshin Sharahuunshon noco yoiaran, —ishon shinanyama-raquin. —Afin shinanfain noco yoia. Diosicai anori noco yoiamaran, —ishon shinantirofo. <sup>30</sup> Ascashon futsan mato Diosin tsain yoiaino futsan ahuun nomuran Diospan Yoshin Shara nanumanaino futsan yoiaí cuscan tsaoshon nicayotiro. Ascan na yoiquin tau huatan anaititiro futsan acafiri a ichananfo yoinon.

<sup>31</sup> Asca huacashon fustirasiton Diosin Yoshin Sharapan ato shinanmanai cuscan futsan yoicun futsan yoicun huapatirofo. Nan ichananfoan nantiffain tapinonfo. Ascashon aton ointi fupuanonfo. <sup>32</sup> Nan Diosin tsain yoimisiton ato yoipaiyai cuscan man ahuun tsain yoiquin anaitishon afin ahuun nomuran shinantiro isca huaquin, —Natian un ununon. Futsanri Diosin tsain yoipaiquin un manatiro. Aton yoiqui anaitiano unrifi ato yoitiroran, —ishon ahuun nomuran shinantiro. <sup>33</sup> Ascashu ichanainfo anoshon futsan ahuun tsain chai yoiriaino futsa mato tsain futsaman yoiai cuscan tsoancai mato tapimaima ipaitsi aton ointi fucash huacani. Ascaracai Diosin fuchipaima. Diosin fuchipai nan ichananfo anoshon aton ointi unimanonfo.

<sup>34</sup> Ascatan ahuara futsari un mato tapimasharapai. Nantifi icoinra huaa futsafo ichanainfono ainfofo tsaintiroma. Diospan tsain cununi isca huaquin. Nan ichanainfotiancai Diospan tsain futsan yoianocaiyainfo punitiroma. Tsaintamarocon Diosin tsain yoimisiton yoiai cuscan nicacointiro nan yoiai cuscan aashquin. <sup>35</sup> Nan nica cuscahuunoa yocapaiquin manatiro nan aton pushu ano nocoshon funu yocatiro funun tapimanon. Ascacun ¡Ai timafin! Man ichanaintian man tsaincaicai sharama.

<sup>36</sup> ¿Nantifi icoinra huaa futsanfoan ichanancashon amisi cuscan marifi man asca huapaimamun? ¿Man shinanmun Upa Diosin yoipaiyai cuscan mato fusti tau huaquin tapimani? ¿Ascan manraca marus fusti Diosin tsain mato fusti tapimanamun? Ma. Ascashon amaquri shinanyamacahuun. <sup>37</sup> Ratoranfo man futsan yoiquin man isca huatiro, —Non Diospan tsain yoimisi ascayamarai non Diospan Yoshin Sharahuunshon icoinra huaafo non ahuara ashotiroran, —man icun. Nanscarifi aquin man tapitiro nan nafo un mato cunushonai cuscan nocon Ifoan mato yonoi. <sup>38</sup> Tsoan anori shinanpaiyamaí afu ipaiyamacahuun.

<sup>39</sup> Ascacufin, uhuun yoramishtichin man ichanain anoshon Diosin tsain ato yoipaicahuun. Nan fasi shara. Ascafia futsan tsain futsaman Diospan Yoshin Sharahuunshon mato yoipaiyaiton shatumayamacahuun. <sup>40</sup> Ascatan man ichanannoshon futsan yoicun futsan yoicun huacahuun man yoiai cuscan nicasharanonfo. Man asca huaino ato ointi fucash huatirofoma.

## 15

### *Cristo nafanishaquin afanan funini*

<sup>1-2</sup> Uhuun yoramishtichin natian tsain shara Jesushuunoa un mato yoimisi cuscan un afanan mato shinanmapai. Un mato Jesushuunoa yoiaino man icoinra huani. Man icoinra huaiton Jesús maton chaca soashona man afu ipanon. Ascan un mato yoini cuscan mancai nan cachiquiri huamisima. Man cachiquiri huashon nanscaquin ipaitsi man icoinra huacuana.

<sup>3-7</sup> Diospan tsain yoini cuscan Cristo noco nashoni nocon chaca soashoshquin. Yoiari Cristo osha rafu non fusti maiyoni. Ascatan afanan funini. Funiashu Pedroqui noci tauni. Chipu afu rafumisifo docequi noconi. Ascayotan chipori quinientos icoinra huafoqui noconi. Ascan natian nantificuana niyoafo. Fustirasi naino. Ascashu chipori Santiagoqui noconi. Ascashu chipu afanan afu rafumisifo doce noconi. Nannori ua tapimani cuscan urifi matori tapimayoni.

<sup>8</sup> Ascashu ahuun unutani uqui Jesús noconi. Uncai ahuunoa ahuu niatriciamano afu rafumisi futsafoan icoinra huaquin tauhuanifo. Facu cainyama cuatan caintirofo cuscan un afiaiton. Ascashon uncai icoinra huacuanima. Samamashta ua icoinra huamariscatani.

<sup>9</sup> Icoinra huua futsafoancai un acai cuscan chaca huacaicaimisifoma. Un Jesús icoinra huafo omitsiscamayopaoni. Un Diospan yorafo chaca huayopaonificacun Jesús uhuun ramapaiquin ua catonni un afu rafumisi inon. <sup>10</sup> Diosin uhuun ramapaiyaino unrifi un afu rafumisi. Ascashon ua imapaiyai cuscacai un ayamama. Mun aca. Un nanscaquicai ua ipaitsi catonnima. Un ascashu un afu rafumisifoan yonoshonaifo cuscan uncaifin fasi yonoshocuin finacoinshonaquin. Ascafia uficai un ahuun yonoshomisi icama. Uhuun ramapaicai ua catonni un ahuun yonoshomisi inon. <sup>11</sup> Ascacun un iyamarai Jesús fu rafumisi futsafo futan nannorisi non mato Jesushuunoa yoimisi. Non mato yoimisi cuscan man icoinra huua.

*Nan naafo funishquiai cuscan*

<sup>12</sup> Non mato yoimisi isca huaquin, —Cristo noco nashofianishaquin man afanan funiniran, —ishon non mato yoimisi. ¿Ascan ahuuscai atirifiton man yoimisimun? —Yora naashu afanan funitirómaran, —ishon man yoimisi. <sup>13</sup> Yora naashu funiyamanicuncaí Cristori funicuanama. <sup>14</sup> Cristo funiyamanicun non mato ahuunoa ipaitsi yoicuana. Funiyamanicun marifi man ipaitsi icoinra huacuana.

<sup>15</sup> Ascatan Cristo funiyamanicun non mato Dioshuunoa paracuamisi. Non yoimisi isca huaquin, —Upan Diosin Furun Jesús funimaniran, —ishon non mato yoimisi. Yora naashu funiyamainocai Cristoricai Upa Diosin funimacuanama. <sup>16</sup> A naafo funiyamainocai Cristori funicuanama. <sup>17</sup> Cristo funiyamainocai man ipaitsi man icoinra huacuana. Maton chaca mato soashocuanama. <sup>18</sup> Ascashu Cristo funiyamainocai nan icoinra huafo nacanashu funocani. Omitsiscapashcaquin. <sup>19</sup> Nuno mai ano niyoshon non shinanquin isca huamisi, —Un naashu Cristo funini cuscan uari Diosin funimashquiran, —ishon non shinanfiashu iconyamaino non fasi funocuana. Ascashon non ipaitsi icoinra huacuana. Cristo funini iconyamacun tsoanmamishti aca finonmafain nocohuun ramapaitiro.

<sup>20</sup> Ascafia anorima. ¡Aicho! Iconcoín Cristo funini. Aafin funi tauniquin afanan nashquima. Ascan nantifi icoinra huafo funitirofo afu ipashcaquin. <sup>21-22</sup> Ascashon nocofunu Adán Diosin onihuaquin tauhuani. Adán tauhuaquin chaca huani. Ahuun chacahuunoashu nani. Ascan nan nocofunuhuunoashu nantifi napamisifo. Nanscarifiái nan nocofunu Cristohuunoashu nantifi icoinra huafo funitirofo afu nipashcaquin. <sup>23</sup> Ascashu Cristo funi tauni nipashquin. Afanan mai ano nasoaitian nantifi ahuun yorafo funimashquin afu nipanonfo.

<sup>24</sup> Ascainocai ahuara chacafoan afanan noco fucash huatirofoma nantifi cuyopacunaca. Nantianri nantifi Cristo noicasmamisifo yafi Satanás yoshin chacafoan aton niaifo non nantifi yoshin chacafo ato omitsiscapanacafo muran potai afanan tsoashta yonononfoma. Ascaiton Criston Apa Dios yoiquin isca huashquin, —Upan, natian min yorafo nantifi min ato yonomatiro. Afanancai tsoan mia nicacasmacupacunacama. Ato iquipacuhuun, —ishon Criston Apa yoishquin.

<sup>25</sup> Ascashon Criston nantifi nan noicasmamisifo ato finoaintian afanancai a noicasmamisifocai ahuashta ishcanima. Nantifitsi ato



iquiyamaiton. <sup>26</sup> Nan ahuun unutaqui a noicasmamisifo ato namaqui cuyoshquin. Ascashucaí afanan tsoa nanacama. <sup>27</sup> Ascacufin Diosin Furun Cristo yononi cuscan nantifi ato iquinon. Apa Dios fusticai Furunmun iquinama. Apahuunshon nantifi ato iquina. <sup>28</sup> Man nansca huatan Furunmun Apa yoishquin isca huaquin, —Upan uarifi mian yonotiroran, —ishon. Ascaiton Apa yoiai cuscan fustisi nicapaicoin. Ascashon Apa Diosin fustiton nantifi iquinaquin.

<sup>29</sup> ¿Ascashu yora naashu funiyamaifoannocai ahuuscain futsafo ato huunoashu unu muran iquimamumisishaquin? ¿Ascán ahuuscamun huacaniquin? ¿Ascashu yora naafo afanan funinacamanocain ahuuscain futsafoan ato unu muran iquimamisifomun? <sup>30</sup> Ascacun nocohuunoari natian non shinanon. ¿Naafu funiyamainocai ahuuscainmun shafatifi Cristohuunoashu non musuni tapiaquin?

<sup>31</sup> Ascacuri un futsafo matohuunoa yoisharamisi man nocon Ifo Jesucristo tanasharaino. Uhuun yoramishtichin iconcoinri ua Cristohuunshon shafatifi rutupaicani. <sup>32</sup> Nocofunufu Efeso anoafoanri ua rutucuanifo. Un naashu funiyamaicai un ipaitsi nacuani. Un nuno mai ano niyoai chain Jesús ua imasharai ahua musunicaí uqui nocoama. Ascatan un naashu afanan funiyamainocai acái uhuuna ahuama. Non naashu non afanan funinacama non apaiyai cuscan non huanoncahuun. Ascatacái chipo non afanan ahua ahuusca huanacama. Noncái tapiama ahutian non naimancái. Ascashon futsafoan yoia isca huaquin,

“Non pifain aquí ayafain non Dios shinantama non apaiyai cuscan non nataima non unimanoncahuun,”

ishon shinanfo.

<sup>33</sup> Asca anorimafinquin. Ascashon amaquri shinanfaiyamacahuun. Tsoa anori shinanfainaifo fu rafuyamacahuun. Yora chacafo fu non rafuaino nocori chaca huamatiro. <sup>34</sup> Man amaquri shinanmisi cuscan afanan anori shinanyamacahuun. Cayacafi shinancahuun. Chaca huaquin shatucahuun. Timafin man atirifitocai man Dios onan-sharataima. Ascashu man rafipaitiro.

*Non naashu afanan non funiaitianmain nocon caya ahuu cuscara ishquicain*

<sup>35</sup> Ascashon futsanraca yoishquin, —¿Ahuuscashumain man naashu non afanan funitiroquin? ¿Afanan funiashurimain ahuu cuscara yoraya non afanan iquicain? —ishon yoicaniraca. <sup>36</sup> Anori yocaino fasi amaquri shinantiro. Non ushu fana payocoyotiro. Chipó ahuun ushu foaifishuquin payocoyamashu foaitiro. <sup>37</sup> Non ahua fanaquicai non ahuun cayafoya fanatiro. Ahuun ushushta fusti non fanatiro. <sup>38</sup> Ascashon non ahuun ushu fanafia Diosin foaimatiro. Afi apaiyai cuscan fana futsa futsatapafo huaa. Nanscashori ahuun tashofo yafi ahuun caya cuscarafo ato onihua.

<sup>39</sup> Nanscarifiai nocon cayacai yoinaton caya cuscarama. Nocon caya futsa cuscarafo. Yoinana futsa cuscarafo. Puiyafonari futsa cuscarafo. Shiman nafari futsa cuscarafo. Nanscarafosicai Diosin noco onihuanima.

<sup>40</sup> Nai murannofoan ahuun caya futsa cuscarafo. Nuno mai ano non niyoano nocon cayari sharafiacaí nan nai murannofo na cuscarama. Nanri fasi sharashta finacoyain. <sup>41</sup> Nanscarifiai fari non oshu non fishifori sharashtafishu ascarafosima.

<sup>42</sup> Nanscarifiai yorafo naino aton caya payocotirofo. Afanan non funiashucaí nocon caya payoconacama. Nanscara sharasi non ipanaca afanancai non nanacama. <sup>43</sup> Nocon caya maiyaino chacacoin ishquin. Ascan non funiaitian sharashtacoin ipanaca. Non nuno mai ano niyoashu non iranmannapacuashu non natiro. Non afanan funiashucaí non ascara itama mutsisipa shara non ipanaca. <sup>44</sup> Non naanocai nocon caya nai murannofo nan cuscara itiroma. Ascan funiashu norifi Dios fu icafoanri non iishquin. Upa Diosin Yoshin Sharapan nocon caya mutsisimafain noco iquipacusharanaca. Non nuno mai ano niyonon ishon Diosin nocon onihuani. Ascatan non aqui nocoaitian noco caya futsa cuscara onihuashofain nocon furo yoshin afu ipanon. <sup>45</sup> Ascan Diospan tsainhuunoa cunuquin isca huani,

“Nocofunun Adán Diosin onihuaquin tau huani. Ahuun cayaqui

Diosin ashain tanaino nocofunun ninacahuani. Arifi ninon,” ishon. Ascan Cristo arifi Adán cuscarafiacun ahuun Yoshin Sharapan noco nimapacutiro. <sup>46</sup> Diosin nocofunun Adán onihuaquin tau huani arifi ninon. Chipó Cristo cainmani ahuun Yoshin Sharahuunshon noco nimanon. <sup>47</sup> Diosin nan nocofunun Adán onihuaquin tau huani. Mai mapohuunoa onihuani. Cristori nocofunufiacun afín nai murannoashu nocoqui ftoni. Tsoancai onihuanima. <sup>48</sup> Nantifi nuno mai anoashu non caianshu nocon caya Adán caya cuscarari. Ratoranfoan Jesús arifi Ifo huacanashu nan cuscarari ishcani. <sup>49</sup> Non nuno mai anoashu caini non Adán cuscaracoinfo. Ascan Jesucristo nanton Dios icariashu ftoni non a cuscaracoin inon.

<sup>50</sup> Uhuun yoramishtichin un mato tapimai nonmun ahucashquicain. Non noco yora mumacoin Diosin niaifo icano non afu itiroma. Nocon caya payocotiro. Ascacufin non na cuscara yora yashucaí Dios fu non itiroma. <sup>51</sup> Tsoancai nicayomisifoma cuscara tsain shara un mato yoi. Tapipaiquin ua nicasharacahuun. Asca noncai atifi naima. Ascafia non nantifi fiananain futsushquin. <sup>52</sup> Ascatan non fianananriscashquin. Futso itani cafiscái non fianananriscatashquin. Nocon mai cuyoaítian Diospan nai oinmatinin ahuun manuti chaan chaan acaino Jesús icoinra huaashu namisifo funiriscatanonfo. Ascashucaí afanan nanacafoma. Nantianri nantifi icoinra huafoti fianananriscatashquin. <sup>53</sup> Non natian naino nocon caya payocotiro. Ascafia Diosin nocon caya fiananan huashoshquin non afanan naima non afu ipanaca. <sup>54</sup> Diospan tsain cununi cuscan iconcain iishquin.

“¡Aicho! Afanancai Diospan yorafo nanacama. Cristohuunoashu non afu isharpacutiro,”

ishon cununi. <sup>55</sup> Ascashu afanancai ahuaton noco namatiroma. Afanancai non nai omitsiscatiroma. <sup>56</sup> Non chaca huamishiunoashu non nai non omitsiscatiro. Noco fiananan huatiancai afanan non chaca huatiroma. Non afanan chaca huayamafain nonricai afanan nashquima. Diospan tsainhuunshon non tapitiro non chaca huamisi. Ascantan non fianananshu Jesús cuscara shara non ishquin afanancai non chaca huatiroma. Diospan tsain afanan noco yoishquima isca huaquin, —Min chaca huaracai, —afanan noco huashquima. <sup>57</sup> Noco asca huaiton non yoitiro, —¡Aicho! Upa Diosin, nocon Ifo Jesucristohuunshon nocon chaca non shatutiro a cuscara shara ishquin. Ascashucaí afanan non nanacama, —ishon non yoitiro.

<sup>58</sup> Ascacun uhuun yoramishtichin futsa futsa huaquin shinanyamac-

ahuun. Diosin noco imapaiyai cuscan nan fusti shinansharacahuun. Jesús tanasharacahuun. Nocon Ifo Jesús yonoshosharafafaincahuun. Man man tapia nocon Ifo futan yonoicai ipaitsi non yonoshotiroma.

## 16

*Nan icoinra huafoan pui ichanan huashon icoinra huaa futsafo fomani*

<sup>1</sup> Natian ahuara futsanhuuonoa un mato yoi. Diospan yorafo Jerusalén anofo ahuuoma. Atohuun ramapaiquin man ato inansharapai. Ascan nan icoinra huafo Galacia anofo un ato yoia cuscan marifi nanscarifi acahuun. <sup>2</sup> Yonoshon ahuun rafanan pui fishon nan man fia cuscan ahuutiran Domingotifin ichananti muranshon pui huafafaincahuun. Chipó un Jerusalén ano nocoshon nan pui un ato foshotiro man ato inanon. Diosin mato inan cuscari atirifi inancahuun. Mato ichapamari inancun atirifi ichapamari man inantiro. Ascan mato ichapa inancun paratamari inancahuun. Ua manaquima pui ichahuafafaincahuun. Asca huafafainshocai un nocoaino man afanan fipaitiroma.

<sup>3</sup> Ascashon mafin nocofunu sharafo catoncahuun aya pui fomashcaquin. Ascan un matoqui nocoshon ufoicoi un ato cunushoshquin man ato foshotanon. Ascano Jerusalén anofoan man tapinon tsoan puimain mato foshoafuquin. <sup>4</sup> Diosin ua nichipaiyaino nan nocofunufo man catoanfo unfu fotirofo.

*Pablon cahuacacainna cuscan ato tapimani*

<sup>5</sup> Macedonia finonfaini cai un matoqui Galacia ano nocoicai. <sup>6</sup> Itsairaca un matofu iyotiro. Ascayamarai uraca oipacutian un mato muran iyonon. Ascashon un caiton un aya catanon un yopai cuscan man ua inanqui futsanon. Ascatan man ua nichian un casharanon. <sup>7</sup> Un mato atsamaiyofainnicai. Diosin ua nitumayopaiyaino un matofu iyotiro.

<sup>8</sup> Ascafia un nuno Efeso ano iyoi nan nocon fuyamisi ahuun anu Pentecostés icaitian. <sup>9</sup> Nunoa yorafoan nocon Ifohuuonoa nicapaicani. Ascacun un nunoshon nocon Ifohuuonoa yoisharai yoi. Ascano icoinra huanonfo. Un ascafiaton nantianri atirifiton ua shatumapaicani un Jesushuunoa yoinonma.

<sup>10</sup> Ascano un nocon Ifo yonoshona cuscari arifi Timoteo yonoshona. Ascan matoqui nocoaiton cushusharacahuun. Nocoaino aqui unimacahuun. Man ascaiton tapinon a man fuchipaiyai. <sup>11</sup>—Acai ahuamaran,—huayamacahuun. Caiton nichisharacahuun unimai uqui noconon. Icoinra huaa futsafo fu uqui nocoyoi. Un afanan atofu rafusharanon.

<sup>12</sup> Ascatari natian nocon yorahuan Apoloshuunoa un mato yoi. Un yoia isca huaquin —Corinto anofo oinyotahuun,—un Apolos huamisi. Ascafia ua yoimisi,—Un natian cayotiroma. Diosin ua nichipaiyaitian un catirotan,—ishon ua yoia.

*Pablonun ahuun tsain unutaquin Corinto anofo ato tsain fomani*

<sup>13</sup> Oinfain. Jesús shinanfafaicahuun chaca huacaquima. Nocon Ifo icoinra huacahuun. Cachiquiri huayamacahuun. Jesús icoinra huashu ahuara ahuusara afaiton oincani ratuyamacahuun. Diosihuunoashu fupuinifoancahuun. <sup>14</sup> Ahuarafo man acai cuscan nanfohuun noiquin ashosharacahuun.

15-16 Estéfanos ahuun yorafo Grecia mai anoafoan Jesús icoinra huaquin taucoïn huanifo. Man manfin ato oïnmisiquin. Man man tapia nanfoan Diosin ahuun yorafo shara huamisisifo. Nan cuscarafu nicasharacahuun. Nan atofu yonoafori nicasharacahuun.

17 Un fasi unimacoin Estéfanos non Fortunato non Acaico afo uqui no-coafono. Mancai ashotiroma man fasi chaicoin ica. Man ua ashotiroma cuscan nan rafu non fustifain ua ashoanfo. 18 Nan rafu non fustifain uhuun ointi ua fupuamafo. Maton ointi man fupuaca cuscan uari fupuamafo. Ascatan atohuunoa yoisharacahuun.

19 Nan Jesús icoinra huafo ichananmisifo Asia anoafoan mato yoisharapaicani. Nocon Ifohuunshon Aquila futan ahuin Priscila mato yoisharapaicani. Fasi mato shinancani. Aton pushu muran atofu ichananfoanri mato yoisharapaicani. 20 Nantifi icoinra huafo ufu nunoafoan mato yoisharapaicani. Ascacun yoinonnansharacahuun.

21 Unfin Pabloquin uhuun tsain unutaquin rafushtacoin uhuun mucuocoinnin un mato cunushoni man tapinon unfincoïn un mato yoisharashquin.

22 Tsoan nocon Ifo noiyamashon afin shinantiro, —Ufin un apaiyai cuscan un aicai. Ua Diosin amapaiyai cuscan nanscanonquin, —ishon shinantirofo. Nanscarafu Diosin ato onaintimapainon. Omitsiscapanacafo muran potashquin.

Ifo Jesús nocoqui ohuu. 23 Nocon Ifo Jesús matohuun noiai cuscan mafi rananri man noinanpainon.

24 Un nocon Ifo Jesucristohuunshon un nantifi matohuun noi. Nanscasi ipanon. Amen. Nanti.

Pablo

## Pablonun Corinto Anoafu Afanan Cunu Fomani

### *Pablonun Corinto anoafu yoisharani*

<sup>1</sup> Uhuun yoramishtichin un mato cunu fomai man tapinon. No futan Jesús tanamisi Timoteo futan un mato cunu fomai. Upan Diosin ua catonpaiquin ua catonni ahuun tsain Jesucristohuunooa un ato yoifoanfainon. Un Jesucristo fu rafumisi. Nantori ua nichini.

Icoinra huafo Corinto anoafuan yafi Diospan yorafo Acaya mai anoafori un mato nantifi yoisharai. <sup>2</sup> Nocon Upa Diosin futan nocon Ifo Jesucristo matohuun ramapaicain maton ointi unimamanon.

### *Pablon omitsiscani cuscan*

<sup>3-4</sup> Non Upa Dios yoisharanon. Isca huaquin, —Upa Diosin, min noco shara huafafaini. ¡Aichoran! —ishon non Upa yoinon. Nanfin nocon Ifo Jesucristo apaquin. Nanrifi nocohuun ramapai. Non omitsiscafiaiton nocon nomuran shinanmasharatiro. Ascano non mua cuscan huafain futsa omitsiscaiton non ahuun ramapaiquin ahuun nomuran non shinanmasharatiro. Ahuara futsan omitsiscamai cuscan non yoisharatiro ahuun nomuran shinanmasharanon. <sup>5</sup> Nocon Ifon Cristo no fu rafuano nan omitsiscani cuscan norifi non omitsiscatirofiashu nanton nocon nomuran noco shinanmasharatiro. <sup>6</sup> Ascacun non mato yoisharapai nocon Ifo Jesús icoinra huashu afu ipanon. Ascacufin noco omitsiscamafiaifoan noco Ifo Jesús nocon nomuran shinanmasharatiro. Man manfin oinquin Diosin nocon nomuran shinanmasharamisi. Ascacun man man oian nocon nomuran non shinansharaiton. Nanscacun norifi non maton nomuran shinanmacoian. Ascun non omitsisca cuscan marifi man omitsiscafiaquin man funaquima tunucoian. <sup>7</sup> Man non tapia non omitsisca cuscan marifi man nofu omitsiscafiaiton Upa Diosin nocon nomuran shinanmashara cuscan matona shara huaa man shinansharanon. Ascun non matohuunooa shinanmisi cuscan nannoricoin. Man omitsiscafiaquin tunuaiton maton nomuran shinanmashara.

<sup>8-9</sup> Uhuun yoramishtichin non Asia mai anoashu omitsisca cuscan un mato yoi man tapinon. Nocon ointi fasi ihuu ica. —Noncai tunutiroma. Non omitsiscai nairan, —ishon nocon nomuran non shinanni. —Nofincai non numatiroma. Upa Diosin fustitofin noco numatiroquin. Nantofin yora nacoinna funimatiroquin, —ishon nocon nomuran non shinanni. <sup>10-11</sup> Ascashu non fasi omitsiscai nacuafiaiton Upa Diosin noco numani. Afananri noco numashqui. Man non icoinra huacun noco numafafainshquin. Noco nansca huaino icoinra huaa futsafoan nocohuunooa shinanquin isca huashcani, —¡Aicho! Upa Diosin, min Pablo yafi afu rafumisifo min nica ato numashqui. Min fasi sharacoinran, —ishon ichapafuan Upa Dios cufishcani.

### *Pablon shinan futsashu Corinto ano canima*

<sup>12</sup> Man non tapia manifoti iconcoin yoimishashquin nocon nomuran non unimacoinni. Non mato murannoashu isharacoinmisi. Non Dioshuunooashu a cuscara sharacoin non imisi. Noncai mato paramisima. Icon fusti non mato yoimisi. Icoinra huamafoan shinanmisi cuscaai non mato ismamisima. Upa Diosin noco shinanmashara cuscan huafain non mato oinmana. <sup>13-14</sup> Un mato cayacafi icon fusti

cunushomisi. Un mato cunushona cuscan nannoricoin. Uhuun tsaincai rafuma. Mancai uhuunoa atirifain tapisharataima. Ascashiashon chipo ua onancoinshon man ua shinansharapainon. Ascatan nocon Ifo Jesús nocoaitian man yoitiro isca huaquin, —¡Aicho! Pablonun noco shara huamisiran, —ishon man yoitiro. Nanscarifi aqui un matohuunoa nantianri yoisharashquin.

<sup>15-16</sup> Un shinan man ua icoinra huaishafain Jesús ua nichini un mato tapimanon. Ascashon un shinanquin isca huani, —Un Macedonia ano un caitian un mato ano mapuyoshquin afanan un mato yoisharashquin maton ointi man unimamanon. Ascatan afanan Macedonia anoashu un nasoaitian afanan u mato ano maputiro matofu iyoshquin. Chipu ua Judea ano nichitiroforan, —ishon un shinanni. <sup>17</sup> Nannori un shinanfiacan man shinanquiraca isca huua, —¿Pablonun nannori shinanfiashu asca ahuuscai noco icon yoiaishuma oamamun? Noco ahuaa yoiflashu ahuan nomuran man shinan futsashon ahuaa huatiro. Icoinra huamafoan noco foman cuscan arifi nanscarifi huaquin noco fomain. Ointi rananyaran, —ishonraca man uhuunoa shinan.

<sup>18</sup> Ascacun anorimafinquin. Man Upa Dios icoinra huua cuscarifi un mato yoimisi cuscan man icoinra huatiro. Uhuun tsaincai rafuma. Un mato yoimisi cuscan cayacaficoín. Ahuacai un mato parayomisima. Uricai ointi rananyama. <sup>19</sup> Timoteo yafi Silas futan un mato Jesucristo Diospan Furunhuunoa un mato yoimisi. Nanton tsaincai rafuma. Ahuun tsain cayacaficoín. Icon fusti. <sup>20</sup> Upa Diosin noco yoiyotiani cuscan nantifi Cristo man noco ashomisi. Ascacun non nantifi yoimisi isca huaquin, —Non Jesús icoinra huashon. Noco yoia cuscan aquin non yoitiro. ¡Aicho! Nocon Ifo fasi sharacoinran, —ishon non yoimisi.

<sup>21</sup> Ascatarifi Upa Diosin mato yafi ua mutsismana non Cristo tanasharanon. Ahuun Yoshin Shara noco ya rafumana. <sup>22</sup> Ratoran futsan aton mafohuun aton anu nutatirofo nanfo ahuanacun futsan tapinon. Nanscarifi aqui Upa Diosin ahuan Yoshin Shara noco ya rafumacun nanhuunshon yora futsafoan noco ointirofo non ahuan yorafocun. Nanmain nocon Ifocun. Noco yoiyotiani cuscan ahuan Yoshin Shara noco ya rafumaquin tau huani. Ascacufin non tapitiroquin ahuaa futsa noco yoiyotiani cuscan iconcoin noco inanshquin.

<sup>23</sup> Ascacun man tapitiro Upa Diosin iconmisiquin. Nanscacun urifi un Diosin oinmaticun man tapitiro un mato icon yoimisi. Un mato yoiamua cuscan mato ari un capaifian un cataima. Upa Diosin ua onancoiainton un iconyamacun ua onaintimatiro. Un mato ari cacuana. Ascafia un shinan, —Un ato ari cashon un fasi ato asca huatiro, —ishon un shinan. Ascashon un mato ointi ihuumapaima un mato ari caama. <sup>24</sup> Un mato asca huapaitama urocon mato unimamapaisharai. Uncai maton ifo ipaima man mantsi a icoinra huayamacun. Icoinra huashon man man Jesús tanashara. Ascacun un mato futan Jesús yonoshopai man mimacai unimanon.

## 2

<sup>1-2</sup> Ascacun uhuun nomuran shinanquin un isca huayamua, —Un Corinto ari capaifiai un caima. Un cashon, “Man chaca huai cuscan shatucahuun,” ishon un ato yoiquicai un ato unimamatiroma unrocon aton ointi ihuumatiroan, —ishon un shinanymua. ¿Un maton ointi ihuumaiton tsoan futsancaimun ua unimamatiro? Marus fusti Corinto

anoafoan man ua unimamatiroquin. Ascafia un mato ointi un ihu-  
 icoñaiton tsoa futsacai ua unimamatiroma.

<sup>3</sup> Ascacun un mato cunushonai cuscan un matoqui nocoataima man  
 chaca shatunon man afanan uhuun ointi ihuumanonma. Man ua  
 noiñicacai uhuun ointi man ihuumaia uarocon man unimamatiro.  
 Iconcoñquin un shinan, —Un unimaino marifi man unimatiroquin, —  
 ishon un shinan. <sup>4</sup> Un mato cunushonaino un muyamua uhuun ointi  
 fasi ihuucuin. Uaiyanan un mato cunushoni. Ucai maton ointi ihuuma-  
 painima. Ascataa un mato cunushoni un fasi matohuun noicoiain  
 cuscan man tapinon.

*Tsoan noco chaca huaiton non rau huatiro*

<sup>5</sup> Nan nocofunun chaca huatocai ua fusti uhuun ointi ua ihuun-  
 manama. Nantifi man icoinra huafoti matori mimacai maton ointi  
 ihuumana. Ascafia uncai nan nocofunu onaintimaquin finapaima.  
<sup>6</sup> Ascafia man nantificuanaton man tapipaima nan nocofunun a chaca  
 huua cuscan. Nanscacun man man onaintima. Nanscanon. Man man  
 acaquin. <sup>7</sup> Ascatan man aca cuscan afanan huacaquima rau huacahuun.  
 Ascashon yoisharacahuun. Ahuun ointi unimamashcaquin afanan  
 omitsiscanonma. Man yoisharayamaino afanan fasi ahuun nomuran  
 omitsiscacai finacaitiro afanancai shinansharatiroma.

<sup>8</sup> Ascashon un mato yoiai cuscan ua nicasharacahuun. —Non mia  
 noicoñran, —ishon afanan yoicahuun tapinon. <sup>9</sup> Nantifi un mato  
 cunufoma cuscamain ua nicacoincai. Tapishquin un mato cunu fomaya-  
 mua. <sup>10</sup> Man futsa rau huacun unrifi un nan rau huatiroquin. Ua nantori  
 chaca huaiton Cristohuunshon urifi un rau huatiro. Un asca huaino  
 marifi man unimanon. <sup>11</sup> Non ascainocai Satanás noco fuparatiroma.  
 Ascatan non asca huayamaino nocohuunoashu nan nocofunu funoi  
 omitsiscacuana. Satanás noco amaquiri shinanmapai nan nocofunu rau  
 huanonma. Non rau huayamaino fasi omitsiscatiro.

*Pablo pushurasi Troas ano nocoflashon ahuun ointi unimanima*

<sup>12</sup> Ascan un mato uhuunoa afanan tapimai. Un pushurasi Troas ano  
 tsain shara Cristohuunoa ato yoicai un cani. Ahuunoa nicapaicoñnifo.  
 Ascano nocon Ifoan nanno ua atoqui nichini un ato yoinon. <sup>13</sup> Ascafia  
 no futan Jesús icoinra huua noco yora Titocai anoa un fuchinima.  
 Fuchiyamashu uhuun ointi un unimanima. Ascashon un fasi shinanni.  
 Ascatan, —Mun cairan, —ishon Troas anoa icoinra huafo un ato yoita oi  
 Macedonia ano un noconi.

*Cristohuunshon non nantifi finontiro*

<sup>14</sup> ¡Aicho! Upa Diosin, mihuushocai ahuaafoan noco shatumatiroa  
 min noco amapaiyai cuscan non anon. Un shinanfiquin uhuun no-  
 muran un shinanni Upa Diosin noco iyofanainai cuscan non Cristo  
 fu rafumisi. Ascatan Jesús noco Ifono ahuun curushhuunoashu non  
 isharatiro futsafori ahuunoa yoishquin. Ascashon nocohuunshon man-  
 ifotifain nocon Ifo Cristo onantirofo.

<sup>15</sup> Upa Diosin nocohuunoa shinanquin isca huua, —Nafu uhuun facu  
 Cristo cuscarafu. Ascashon nanfohuunshon uhuun facu Cristo onantiro-  
 foquin, —ishon shinan. Non nantifi Cristohuunoa ato yoimisi. Atiri-  
 fifain nocon tsain icoinra huaifan Jesús ato numa Dios fu nipanonfo.  
 Atirifiton icoinra huayamashu funoshcani omitsiscapananacafu muran  
 fooshcani. <sup>16</sup> Ascashon icoinra huamafoan noco nicaquin yoitirofo isca  
 huaquin, —¡Ohuashta! Nan na tsainmun iconcati non omitsiscapanacafo

muran catiro, —ishon shinancani. Ascafia nan icoinra huafoan noco nicaquin yoitirofo isca huaquin, —¡Aicho! Noco yoiaino cuscan non icoinra huashu non Upa Dios fu nipatirofan, —ishon shinancani. ¿Ascacun tsoan Diospan tsain Jesushuunoa futsafo yoisharatirofan?

<sup>17</sup> Futsafoan Diospan tsain yoiahuunshon puisi fipaicani. Ascan noncai ato cuscarama. Man non tapia non ahuun tsain yoiaiton Upa Diosin noco shafacafi oincoin. Nantofin afincoin noco nichiniquin. Ascan non ahuun tsain yoiquicai non tsoa fuparamisima. Non ato icon fustisi yoimisi.

### 3

*Jesús ato tsain funa yoiyotiani cuscan*

<sup>1</sup> ¿Ascan uhuunoacai un mato isca huaquin shinanmapaima? — Pablo fasi nocofunu shara. Fasi tapishararan, —ishoncai un mato anori shinanmapaimisima. Noncai ato cuscarama. Man manfin noco oinmisiquin non matofu itiani. Ascan nan cuscara cunucaai man noco-huunoa yopaima. ¿Iconmun? Non mato anoashu caitianricai non nan cuscara cunu yopaima futsafo ismashquin. <sup>2</sup> Ascan manfin nocon cunu cuscarafoquin. Ascashufin matohuunoa noco nomuran cunua cuscara. Nantiffain oinonfo non mato tapima cuscan man aiton. <sup>3</sup> Ascacun futsafoan mato ointirofo man nan Cristo aficoi cunua cuscarafo. Ascashon mato tapitirofo non mato tapima cuscan Jesús cuscara man inon. Toquiri sapaquí cunuaahuunshoncai ato oinmanama. Maton nomurancai ahuaton cunua. Upa Diosin nipamisiton ahuun Yoshin Sharapan mato imashara nantifiton mato oinonfo.

<sup>4</sup> Cristohuunshon non Dios icoinra huashon non mato yoiaino cuscacoin man ai. <sup>5</sup> Ascafiafashon uncai mato isharamatiroma. Uncai anori shinanmisima. Upa Diosin ahuun curushhuunshoni un futsafo tapimatiro isharanonfo. <sup>6</sup> Ahuun curushu noco inanno nan tsain funa Jesucristohuunoashu Dios fu nipatirofo non ato tapimatiro. Moisés cununi cuscahuunoacai non ato tapimamisima isharanonfo. Asca nonfin Diospan Yoshin Sharahuunoashu non isharatiroquin. Moisés cununi cuscan fusti tanashu non funotiro. Naashu omitsiscapanacafo muran non catiro. Ascan Diosin Yoshin Sharapan noco nimapacutiro non afu nipanon.

<sup>7-8</sup> Shinacapon. Upa Diosin nocon caifo Israelifo ato yonopaiyai cuscan toquiri sapaquí ato cunushoni. Ato yononi cuscan nicayamacanashu natirofo omitsiscapashcaquin. Upa Diosin ato yononi cuscan Moisés ato yoiaino Diosinhuunoashu ahuun fuso fasi chashaquí nocon shuni Israelifo ointima huani. Chashafiafashu funainquimashta nishmapacuni. Ascatan Upa Diosin Moisés yononi cuscan fasi sharash-tacoinfiashu natianfin ahuun Yoshin Sharapan noco yonoai cuscan fasi finacaia ahuun yono sharash-tacoin man noco ismaquin.

<sup>9</sup> Ascacun Moisés yononi cuscan fasi sharafiacun nicayamacanashu natirofo. Ascan natian Furun Cristohuunshon nocon chaca soashotiro non afu isharanon. Nan fasi shara finacaia. Ahua futsacai nan cuscara sharama. <sup>10</sup> Upa Diosihuunshon Moisés noco yonoquin tau huani cuscan fasi sharashta. Ascafia natiancai nan ahuama. Upa Diosin Jesushuunshon noco ashoni cuscan fasi shara finacaia. <sup>11</sup> Upa Dioshuunshon Moisés yononi cuscan sharafiashu itiashtashtafi man cuyoa. Ascano Upa Diosin Jesushuunshon noco ashoni cuscacai cuyopacunacama. Ascan nan fasi shara finacaia.



<sup>12</sup> Ascacufin man non tapia Upa Diosin Jesushuunooa yoini cuscacai cuyopacunacama. Ascacun ranotama non Jesushuunooa yorafo yoitiro. <sup>13</sup> Moisés ahuun fuso fasi chashatanaino fufopomuni nocon shuni Israelfoan oinonfoma. Ascashu fufopomuaino itiashtashtafi ahuun fuso chashai nishmapacuni. Noncai Moisés cuscarama. <sup>14</sup> Moisés fufopomuni cuscan uhuun caiffo nanscarafori. Ascashocai Diospan tsain oinsharatirofoma. Cristo fustitofin ato shinanmasharatiroquin afanan fufopomua cuscara inonfoma.

<sup>15</sup> Natianri futsan ato Moisés cununi cuscan yoiaino nan fufopomua cuscarafo. Ato ointi curushu anocai tsoan shinansharatiroma. Ascashon isca huaquin shinancani, —Moisés noco yononi cuscaïn non Upa Dios fu nipatiroran, —ishon shinancani. <sup>16</sup> Ascafia tsoancai natian afanan Moisés cununi cuscan shinantama nocon Ifo icoinra huashon ahuunooa tapisharatiro. Afanan fufopomua cuscara iishquima.

<sup>17</sup> Nanscacufin nocon Ifoan Yoshin Sharapan noco nimapacutiro. Nan nocon Ifoan ahuun Yoshin Shara no fu icanocai ahua futsa nocon ifo itiroa noco yonoshquin. <sup>18</sup> Ascan noncai fufopomua cuscarama. Nocon Ifoan tsain non oinsharatiro. Nonfin fuisiti cuscarafoquin. Futsafoan noco oinquin nocon Ifo Jesús fasi shara ointirofo. Ahuun Yoshin Sharapan nocon nomuran noco iquifain nocorifi fiananan huua non nocon Ifo cuscara shara non inon.

#### 4

<sup>1</sup> Ascashon Upa Diosin nocohuun ramapaiquin noco yononi non ahuun tsain shara Jesucristohuunooa yoifoanfafainon. Non ascaicain nocon ointi ihuu icama. <sup>2</sup> Noncai tsoa fomanmisima. Ascara chacafocai non tapipaima. Diosin tsain yoia cuscan fustisi non mato yoimisi. Noncai ahuun tsain amaquiri yoimisima. Cayacaficoïn non mato yoimisi. Ascan Upa Diosin noco oincoin maton nomuran non nocohuunooa mato shinanmapai isca huaquin, —Diosin tsain cununi cuscan Pablonun nantifi noco cayacaficoïn yoimisiran, —ishon mato nomuran non mato shinanmapai. <sup>3</sup> Nan tsain shara Jesushuunooa non yoimisi cuscan tsoan nicapayamainocai nafoan icoinra huafoma. Nanfofin nan fufopomua cuscarafoquin. Ascashu omitsiscapanacafo muran focani.

<sup>4</sup> Nanfofin yoshin chaca Satanás aton ifoshofin ato yonomisiquin. Ascashon aton nomuran fufopomua cuscara ato huamano tsain shara Jesushuunooa tapinonfoma. Jesús ato oinmapai arifi Apa Dios cuscara-coin icoinra huanonfo. Nan tsain fasi shara iconcoinfiacun Satanás ato fusho cuscara huama aton nomuranshonri icoinra huanonfoma.

<sup>5</sup> Ascan noncai nofirî nocohuunooa non mato yoimisima. Ascatamarocon non mato yoimisi Jesucristo maton Ifo inon. Noco Ifocun non ahuun noishon a yonoshorapai. Ascan nonfin maton oinmati cuscaraqui Cristohuunooa mato tapimashquin. Nannori non mato yoimisi. <sup>6</sup> Diosin shafa oni huataima yoiquin isca huani, —Faquishcun shafan inonran, —ishon yononi. Nanscarifiai non Jesús ifoantaimano nocon ointi nan faquish cuscara chaca ipaoni. Ascan Diosin Jesucristohuunshon nocon ointi muran chashamana non ahuunshon tapinon ahuu cuscara sharamainquin.

*Non Jesús icoinra huashu non isharatiro*

<sup>7</sup> Nan Diosin sharacoianshu no fu icaquin. Mai cuticai ahuashta ahuun nuama. Samamashta moshifiatiro amuran ahuara chicoïn non

nanutiro. Nanscarifiai noncai mutsisipamafia Jesús mutsisipashu no fu rafua. Nanscano Diosin ahuun curushpan futsafo ismatiro ahua-mamishti huatiro cuscan. Ascan nan curushcai noconama ahuuna fustifinquin.

<sup>8</sup> Ascashon non imisi cuscan natian un mato yoi man tapinon. Noco fucash huafafainfiaifono non unumisima. Non finoain cuscacai non tapiama ahuuscamain non aiquin. Noco asca huafiaifoancai non shinamisima isca huaquin. —¡Ohuashta! Noncai ahuuscatiroma. Man non funoarancai, —non imisima. <sup>9</sup> Noco omitsisca huafainfoancai Upa Diosin noco potapacunacama. Noco rutupaifiaifoanri Upa Diosin noco numa non nanonma.

<sup>10</sup> Jesús niyoano rutupaipaonifo cuscan nocorifi nanscarifi rutupaifaincani. Non ascaiton nantifiton noco ointirofo Jesús nocon muran ica. <sup>11</sup> Non Jesús yonoshonaiton shafatifi noco rutupaicani. Icon nanscacun non Jesushuunoashu nai. Non ascaiton ointirofo Jesús ahuun curushhuunoashu non nicun. <sup>12</sup> Ascacun Jesushuunoa non mato yoiaiton futsafoan noco rutupaifiaifoanno non mato yoimisi man icoinra huashu afu nipanon.

<sup>13</sup> —Un icoinra huai. Ascashon un matori yoiran, —ishon nan-nori Diospan tsain cununi. Nanscarifi aqui norifi Diosin tsain icoinra huashon non matori yoimisi. <sup>14</sup> Ascashon man non tapia nocon Ifo Jesús man nafiacun Upan Diosin afanan funimani afu ipanon. Ascacun Apan Jesús funimani cuscan mato yafi nocori funimashquin non afu ipanon. <sup>15</sup> Nanscacufin norifi non omitsiscacai mato icoinra huamaicain. Man icoinra huashon paratama man tapinon Upa Diosin nocohuun rama-paicain noco numani. Non mato yoiai cuscan tapishon yoitirofo isca huaquin, —¡Aicho! Upa Diosin, min noco shara huamisiran, —ishon yoitirofo. Nanscashon Diosihuunoa shinansharatirofo.

<sup>16</sup> Ascacun non omitsiscafiaquicai non shinanchacaima. Nocon Ifocai non cachiquiri huamisima. Icon non isinin ipashu nafiaiton nocon Ifoan nocon nomuran fiananan huafafaini ahuun ointi cuscara non inon. <sup>17</sup> Non natian niyoashu omitsiscacai cuscan fasi curushcoinma. Samamashta finontiro. Ascan non Jesushuunoashu omitsiscaiton noco fasi sharacoin imai cuscan tsoancai ascaran shara oinyomisima. Nanfori cuyopacunacama. <sup>18</sup> Ascano natian noco omitsisca huai cuscan non shinantamarocon nan non oinyomisima cuscara non shinain. Diosin icanoshon noco unimamapacunon non shinain. Ahuaraton noco omitsisca huai cuscan samamashta cuyotiro. Ascan Diosin chipo noco imai cuscan noco unimamai cuscacai cuyopacunacama.

## 5

<sup>1</sup> Ascano man non tapia non naashu Diosin noco caya funa onihuai. Iscara un mato tapimai. Pushu shuniaino paon icashu payocotiro. Nanscarifiai nocon caya non naino cuyotiro nocon yoshin afanan amuran itiroma. Asca tsoa futsacai noco caya funa oni huatiroma. Diosin icarishofin caya funa sharacoin afanan noco oni huashoshquin. Nan cayacai cuyopacunacama. <sup>2</sup> Natiancai nocon cayari fiananantaima. Nanscacun afohuunoa shinain non shacaina cahuatiro. Ascashon shinanquin non isca huatiro, —¡Ohua! Diosin ua imapaiyai cuscacai un ataima. Un fasi Dios ari capaicoan afanan omitsiscashquima caya funa sharacoin ua

onihuanon, —ishon non shinantiro. <sup>3</sup> Non Dios ari nocoashucaí non yoshin fustia ishquima. Diosin noco caya funari noco oni huashoshquin.

<sup>4</sup> Natian non mai ano niyoashu non omitsiscatiro. Ascafia noncai noco yoshin cayaoma ipaima. Non Jesús ari nocoriscaipai ahuun caya cuscara iishquin. Non niyoano nocon caya isinin itiro. Non naino nocon caya payocoi cuyoshquin. Ascafia Diosin noco caya funa shara chipo noco inanshquin. Nancai cuyopacunacama. Isharapacunaca. <sup>5</sup> Upa Diosin noco onihua non afu ipanon. Non caya funa yaitian Jesús cuscaracoin non inon. Noco yoyiotiani cuscan ahuun Yoshin Shara noco inan. Ascashon non tapitiro ahuara futsafori noco yoyiotiani cuscan noco chipo inanshquin.

<sup>6</sup> Nanscacufin non shinansharafafaini non nuno mai ano niyoashu nocon Ifo Jesús icari non nocoataima. Nan man non tapia. <sup>7</sup> Icon Jesús icano non oiantaimafiaquin nuno mai anoshon non icoinra huafafaini. Ascashon non chipo oinshquin. <sup>8</sup> Man non tapia naashu nocon Ifo fu non ipashquin. Nanscaifin sharaquin. Ascacufin non naicain non ratuima.

<sup>9</sup> Ascano nuno mai ano non niyoashu iyamarai Upa Dios icari non no-coaitian nocon Ifoan noco yonopaiyai cuscan non aiton oin nocoqui fasi unimacoinshquin. Nanfin non fasi ashopaicai. Non asca huashoiton oinfin nocon Ifo nocoqui unimaiquin. Nanquiri fustisi non shinain.

<sup>10</sup> Ascan nan non icoinra huafoti Cristoqui non nocoshquin. Nantianri noco yoipacushquin non mai ano niyoshon shara huayamaraquinmain non chaca huamisiquin. Non ahuara shara huamiscun ahuara shara-coin noco inanshquin. Asca non ahuarashta chaca huamiscun ahuara shara noco inanpaifiaquicai noco inantiroma. Ascashu funoshcaini.

### *Cristohuunoashu non Dios fu rafutiro*

<sup>11</sup> Ascacun Diosin noco yonoa cuscan non ayamashu non ratutiro. Ascatan futsafori non yoipai Diosin ato yonoa cuscan anonfo. Diosin noco onancoian nonmain cayacafi yoiaitofin. Noncai tsoa futsa fuparapaima. Marifi man man noco onancoian. Nonricai mato paramisima. Nocon tsain cayacafi fusti. Manmain nocohuunoa maton nomuran nannorifosi shinanpainon.

<sup>12</sup> Ascan noncai afanan mato shinanmapaima isca huaquin, —Pablo yafi afu yonoafo fasi sharaforan, —ishoncai non mato nocohuunoa yoimapaima. Non mato cayacafi fusti yoimisi. Man man tapia. Futsafoancai mato yoicoianma. Mato fuparapaicani. Mato yoia cuscaicai amisifoma. Ascashon aton nomuran shinanchacamisifo. Cacapaimisifo. Nonfin mato icon fusti yoimisiquin. Ascan man man noco onancoinmisi man nocohuuri noiquin man ato nocohuunoa yoisharatiro. <sup>13</sup> Icon Dios noiquifin un crushcaí yonoshofanfafainmisiquin ahuunoa futsafoan shinansharanonfo.

Ascan futsafoan nocohuunoa yoiafo isca huaquin, —Pablon yafi afu yonoafo nison cuscaraforan, —ishon nocohuunoa yoiafo. Man manfin tapiaquin non matohuun noiquin cayacaficoín shinanfain non Diosin tsain mato yoimisiquin marifi man cayacafi shinanon. <sup>14-15</sup> Cristo nocohuun noiquin noco yonoi non ahuun tsain shara mato yoinon. Cristo nantifi yorafohuunoashu naani. Ascashu nantifi non afu nai cafiscaí afanan non ipaoni cuscan aashquima. Cristo nafishu afanan nocohuunoashu noco noi funinaca huani. Norifi naashu ahuunoashu non afanan funitiro a cuscara iishquin. Ascan nofin non apaiyai cuscan

fustisicai afanan non shinantiroma. Cristo noco amapaiyai cuscan nan fusti non shinantiro nocoqui unimanon. Nanfo non icoinra huamisi.

<sup>16</sup> Ascacufin icoinra huamafoan futsafohuunoa shinainfo cuscaai un afanan atohuunoa anori shinanpacunacama. Unri anori shinanpaonifi-ashucaí un afanan ascapacunacama. Cristohuunoari un amaqiri shinanpaoni. Uncai afanan ahuunoa anori shinainma. <sup>17</sup> Ratoran Cristo Ifohuaashu afin fiananancoian yora funacoin ishquin. Ipaoni cuscaai afanan aima. Nantian Cristo ahuun nomuran afanan funacoin cuscara huai.

<sup>18</sup> Ascano Upa Diosin Cristohuunshon noco fiananan huaa afanan non noicasmanonma. Ascan natian Cristohuunoashu non ahuun yorafo inon. Ascatan noco yonoa norifi ahuunshon yorafo yoiquin isca huanon, —Cristo Ifo huacahuun. Afanan Diosimaquí iyamacahuun ahuun yorafo iishcaquin, —ishon non yoitiro. <sup>19</sup> Upa Diosin Cristohuunshon afanan nantifi yorafo a ya rafumapai afanan amaqi inonfoma. Cristo noco nashoniano Upa Diosin nocon chaca afanan shinainma. Nocon chaca soashona non afu ipanon. Upa Diosin noco yonoa cuscan nannoricoín non mato yoimisi.

<sup>20</sup> Nanscacun Cristo noco nichini non ahuun tsain mato yoinon. Non ahuun tsain mato yoiquifin nan Upa Diosicoínin mato yoia huaquin. Upa Diosifin nocohuunshon mato yoiquin. Cristo mato yoipaiyai cuscari non mato yoi. Ascacun noco nicacoínacun. Cristo mato nashoni chacafo mato soashoshquin. Ascacun maton chaca shatucahuun afanan Upa Dios fu rafushcaquin. <sup>21</sup> Cristocai ahua chaca huayamafiamisicun Apa Diosin nocon chacafo amuran cuyoimani. Ascan ahuunoashu nan cuscara shara non inon.

## 6

<sup>1</sup> Ascashon non Dios fu yonoi mato shara huamashquin. Nanscacun nicacoíncahuun. Diosin matohuun ramapai. Cristohuunshon man maton chaca soashoni a cuscara shara inon. Diosin matohuun noicoínfai-ton potayamacahuun funoshcaquima. <sup>2</sup> Nan Diosin tsain yoimisi Isaías ahuun tsain inonpacoai cuscan cunuquin isca huani,

“‘Noco numahuu,’ ishon man ua yoia. Un mato nicafain un matohuun ramapaicai un mato numaran,”

ishon Diosin yoini cuscan Isaías inonpacoai cuscan cununi. Ascacun nicasharacahuun. Diosin natian matohuun ramapaiquin. Cristohuunshon mato numanon. Natian nicasharacahuun.

<sup>3</sup> Noncai tsoan chaca ismamísima Diosin noco yonomapaiyai cuscan shinchacanonfoma. <sup>4</sup> Ascatararocon non nantifi Dioshuunshon non aca cuscan huafain non mato oinmana nonmain ahuun oimatifoshon. Ahuara ahuuscarafaiton non tunucoínmisi. Noco shinchacamapai noncai tapiama ahuuscaquimain noco chaca huacanicaí. Ascafaiton non tunucoín.

<sup>5</sup> Ascashon noco coshafain cunu muran noco iquimafain noco huamisifo nan sinamisifo nocoqui fucashon noco chaca huashcaquin nanscamisifoquin. Ascan nonrifi curushcain yonoi atsanacain yamu ichapa oshayamacai foniyanan non ascamisiquin. <sup>6-7</sup> Noco asca huafaino chaca huatararocon nocon nomuran non ahua chaca shinainma. Non Cristo fu rafuaiton noco yosimisi cuscan man non tapia. Noco chaca huafainfoancai non atoquí sinayamacai funaquima non tunucoínmisi.

Ascashon futsafohuun ramapaicain non ato shara huafafainmisi non Diospan Yoshin Sharahuunshon non ato nansca huamisi fuparatama non atohuun noicoimisi. Non icon fusti yoimisi. Non Diospan curshhuunshon Jesús yonoshomisi. Non nanfo nansca huafafainquin non mato nantifi ismatiro nonmain Diospan oimatifoshon. Satanás noco chaca huamapaifiaiton Upa Diosin ahuun Yoshin Sharapan nan Dios cuscara noco imaino ahuun curshhuunshon non ahuara chacafo potatiro.

<sup>8</sup> Ascashon futsafoan nocohuunoa tsain shara yoifiaino futsafoan nocohuunoa tsain chaca yoimisifo. Ascan futsafoanrifi, —Pablon nocofunu shararan, —ua huafiaifono futsafoan noco roamisifo. Un iconcoin yoifiamisicun, —Pablofin fuparamitsapaimisiran, —ishon uhuunoa futsafoan yoimisi. <sup>9</sup> —Pablocai ahuama. Noncai na nocofunu oinpaima, —ua huafiaifono Diosifin ua onancoinshon ua noiquin. Futsafoan ua namapaifiaifono un nia. Ua rutuquirashquifacaqui ua tsoan rutucoianma. <sup>10</sup> Uhuun nomuran un omitsiscafi ai uhuun Ifo Jesushuunoashu un unimamisi. Un ahuuomafishu un Dioshuunshon futsafo un imasharamisi. Un ahuuoma shinantsa afiai nantifi Diosinari uhuunari.

<sup>11</sup> Uhuun yoramishti Corinto anoafoan uhuun nomuran un muai cuscan un mato tapimamisi. Un mato fomanma. Nantifi uhuun nomuran un muai cuscan mato tapima man tapinon. <sup>12</sup> Ascacun uncai matoqui ointi mutomisima. Manfin uqui ointi mutomisiquin. <sup>13</sup> Nanscacun un mato yoi. Manfin uhuun facu cuscaracoinfoquin. Ascacun uqui ointi mutoyamacapun. Un mato noiai cuscan uari noicapun.

### *Icoinra huafoma fu rafufafainyamacahuun*

<sup>14</sup> Icoinra huafoma fu rafufafainyamacahuun. Sharafoan shinainfo cuscacai chacafoan anorisi shinancanima. Shafa yafi faquishcai osinantiro. <sup>15</sup> Nanscarifiai Cristo futan Satanascái anorisi shinantirofoma. Cristo icoinra huafoan fuchipaiyai fo cuscacai nan icoinra huamafoan fuchipaicanima. <sup>16</sup> Cristo icoinra huafo ichanancashon Upa Dios cufitirofo. Nantianricai icoinra huamafo atofu ichanantirofoma ahuara ramihuacashon cufishcaquin. Nan rafucaí ositirofoma. Futsafoancai Upa Dioscoin cufipaicanima. Ascan nonfin Diosin pushu cuscarquin. Nocon Diosfin natian niaquin. Diosin yoini isca huaquin,

“Unfin atofu iquicai. Ato fu rafucacaishquin. Un aton Dios icano. Nanfo uhuun yorafo inonfo. <sup>17</sup> Ascano icoinra huamafo icaifo cuscan ayamacahuun. Ato fu rafufafainyamacahuun. Ahua chaca huayamacahuun. Man ascaino un matofu iishquin. <sup>18</sup> Ascatan un maton Upa inon. Man uhuun facu nocofunufu yafi ainfofo inon,”

ishon nocon Ifo Diosin yoini. Nan onihuafoti ato iquinaquin.

## 7

<sup>1</sup> Uhuun yoramishtichin Upa Diosin noco nannori yoyotiani cuscan shara. Ascashu non isharanon. Nantifi nocon chaca non shatunon. Ahuarafoan nocon caya iyamarai nocon nomuran noco chaca huamatiro nanfo non shatucioianshu nan cuscara shara non itiro. Non Upa Dios noicoianshu a cuscara shara fusti non ipainon.

*Corinto anoafo Jesushuunoashu fiananansharafo cuscan*

<sup>2</sup> Noncai mato chaca huamisima. Ascashori non mato chaca is-mamisima marifi man chaca inon. Ahuara matona fipaiquicai non mato fuparamisima. Ascan maton ointinin nocohuunoa shinansharacapun.

<sup>3</sup> Uncai nan un mato yoiai cuscan un matoqui tsain chaca huashquin yoimisima. Urocon matohuun noicoin un matofu ipapai nan un naitian. Nannori un mato yoimisi. <sup>4</sup> Unfin mato icoinra huaicain nan un mato yoiai cuscatsi man ayamaiton. Un matohuunoa nantifi yorafo yoisharapai matohuunoa shinansharanonfo. Man uhuun ointi ua fupuashoan. Un omitsiscafiain matohuunoashu un unimacoinni.

<sup>5</sup> Non Macedonian ano nocoshocai non tununima. Nannoshon noco fasi fucash huanifo. Fochishmanantanacquin. Nocon nomuran non ratucoinni man Jesús tanasharatama man funoaiton oin. <sup>6</sup> Ascafia Upan Diosin nan nomuran ihuuaifo aton nomuran shinanmasharatiro. Ascacun noco Tito nichishoni nanton nocon nomuran shinanmasharanon. <sup>7</sup> Nocoqui nocoshon nocon nomuran shinanmashara. Noco yoia isca huaquin, —Corintofoan uhuun ointi ua unimamaran, —ishon Titopan noco tapimana. Ascara un nicaquin nocon ointi unima. Noco yoiari man uhuunoa yoia isca huaquin, —Non Pablo fasi noi. Nocoqui samamashta nocopainon. Noco cayacafi cunushoni nanton nocon chaca shatumanon. Ascashori nocon ointi non noco. Icon non chaca huaa. Noncai afanan asca huapaima. Non fasi Pablo shinainran, —ishon man yoia cuscan Titopan ua tapimana. Un nanscara nicaino uhuun ointi fasi finacai unimacoian.

<sup>8</sup> Un mato cunushona cuscan maton ointi ihuumana. Un mato cunu fomaiqui tau huaa mato ointi ihuu huamapaiquima. Cahuanquisi un mato ointi ihuumana. Ascafia uhuun cunu oinquin man chaca shatua. Ascacun un mato cunu foma cuscaicai un ramapaima. <sup>9</sup> Maton ointi ihuaiton nicaicain uhuun ointi unimaima. Man Diosqui afanan nasoaicon nicaifin un fasi unimacoianquin. Upa Diosifin maton ointi ihuumana man chaca shatunon. Nansacoinfin man man aquin. Ascan un mato cunushoni cuscahuunshocai un mato funomanama.

<sup>10</sup> Ascashon non shinanqui isca huai, —¡Ohua! Un chaca hua cuscan Diosirifi un chaca huaran, —ishon shinanquin non nocon chaca shatupaitiro Upa Diosqui nasoshquin. Non ascaiton Upa Diosin noco numatiro non afu rafupacunon. Ascashocai chipo non shinantiroma isca huaquin, —¡Ohua! Uhuun chaca un shatuyamashu shara icuana. Un Diosqui nasoyamari shara icuana, —ishoncai non anori shinanpacunacama.

Ascacun icoinra huamafoan non shinain cuscaicai tsoan anori shinanfoma. Isca huaquin shinanfo, —¡Ohua! Un chaca huaran, —ishon shinanfiacaquin aton ointi ihuu itirofiacai Diosquiri shinanpaicanima. Ascashu naashucai Upa Dios fu nipatirofoma.

<sup>11</sup> Ascan mancai ascarama. Shinanapon. Man maton ointi ihuuanon man Diosqui nasoshon. Shinanqui man isca huaa, —Non fasi Diosqui nasopai afanan a cuscara shara ishquin. Noncai afanan asca huaquin chaca huapaipacunacama. Ratoran no fu ichananmisiton chaca shatucasmai non potayotiro no fu afanan ichanainyononma. Non asca huayamaino Upa Diosin noco onaintimatiro. Norifi Pablo noicoin. Afanan no fu ipainon. Noco cunushoni cuscan ratoran non futsan chaca shatuaatama non onaintimatiro chaca shatunon non isharashquin, —ishon man yoia. Ascan afanancai tsoan yoitiro, —Chaca shatuafoamaran, —ishon tsoanricai ahua chaca matohuun nutatiro.

<sup>12</sup> Ascacun man tapitiro uncai nan apa ahuin ahua futsa fu ica nan nocofunuhuunoashu ointi ihuahuunoaricai un mato cunu fomanima. Upa Diosin ahuan ointaifi man nocohuun shinansharamisi. Nanscacun un mato cunushoni man tapinon. <sup>13</sup> Man nocohuun shinansharaiton nicaquin uhuun ointi un fupuasharacoinna.

Nocon yorahuan Tito arifi matohuunoashu unimacoinyamua. Ascan Tito unimaiton oin norifi non unimacoinyamua. <sup>14</sup> Ascano Titopan tapia un matohuunoa tsain shara yoiyai cuscan iconcoin. Un matohuunoa yoiyai cuscan nanscacoïn man huaa. Mancai ua rafimanama. Nantifi un matohuunoa yoiyai cuscan iconcoin afi tapitiro. <sup>15</sup> Tito matoqui nocoshon oian man iscaïton, —Titopan noco yoiyai cuscan nan Diospan tsain. Non nicacoïanmashu non omitsiscatiroran, —ishon man yoiyai. Yoitimashu man ratua. Man nicacoïnpaiyaiton oin Tito matoqui unimacoïn. Matohuun noi finacoïn. <sup>16</sup> Urifi un matohuun noicoïn. Un natian mato icoïnra huacointiro nan un mato yoiyai cuscan man aïton. Ascano un fasi unimai.

## 8

—*Ahuara ashon futsafori inansharacahuun, —ishon Pablonun Corintofo yoini*

<sup>1</sup> Ascan un tsain futsari mato yoi man tapinon. Icoïnra huafo Macedonia anoafu Upa Diosin aton nomuran shinanmashara futsafo inansharanonfo. <sup>2</sup> Nan ahuuomafo Macedonia anoafu fasi omitsiscafia-caquin Diosihuunshon unimacoïncaquin nan ahuuoma futsafori ato inansharafo. <sup>3</sup> Nan un oian cuscan un mato yoi. Nanfoan futsafo inantiro cuscan paratamacoin ato inancoïan. Nanfoanfin inanpaiquin ato inanquin. <sup>4</sup> Yoiiafo isca huaquin, —Jesús icoïnra huaa futsafo yopaïfo cuscan non ato inanpai. Ascacun Judea anoafu non ato pui fomaïcai noco foshocapun. Non nocon nomuran unimacoïnquin non ato inainran, —ishon noco yoinifo.

<sup>5</sup> Non shinanyamua noco pui fusti inainfoshafain non Judea anoafu foshocanon. Ascafiacai ascara iyamuama. Noco pui inantaïfoma ichanancashon noco ointaifi cufiyoyiamuafo isca huaquin, —Nocon Ifon, nonfin min yoraquin. Min noco yonopaiyai cuscan min noco yonotiro. Nonfin minaquin, —ishon yoyiamuafo. Nannori yoïcatan nocori yoyiamuafo isca huaquin, —Diosin matohuunshon noco yonopaiyai cuscan noco yonotiro. Norifi non mato nicacointiro, —ishon noco yoyiamuafo. <sup>6</sup> Titopan tau huaquin mato yoyioni isca huaquin, —Maton puïfo ichanan huacahuun ahuuomafo Jerusalén anoafu ato inanshcaquin, —ishon yoyioni.

Ascaïton non Tito yoyiamua, —Min yoïmisi cuscan afanan ato yoihuu nan ahuuomafo Jerusalén anoafu ato pui inanonfo. Man atohuun noiquin ato man inantiro. Corintofo ato yoihuu, —ishon non Tito yoyiamua. <sup>7</sup> Man fasi finacaiquïfin Jesús icoïnra huafain Diospan tsain caya-cafi yoïfain, ahuan tsain tapisharafain iconcoin Jesús yonoshosharafain man nocohuun noishara. Man nanscara sharafo huaa cuscan nanscarifi huaquin nan yopaïfori man ato inansharatiro. Diosihuunshon man ato noicoïnquin unimacain ato inansharacahuun. Asca huacaquin tapisharacahuun.

<sup>8</sup> Ufïcai un mato yonoïma man ahuuomafo pui inanon. ¿Un tapipai futsafoan ato fasi inanpaiyai cuscan marifi man ato inanpaimun? ¿Tsain

fustiton ato inainran ishon man yoyamaraquin atohuun noicoinquin man ato inanpaimun? <sup>9</sup> Man man tapiari nocon Ifo Jesucriston nai murannoashu mai ano fotoataima nantifi ahuuna ipaoni. Ahuacai yopa-paonima. Ascafia nocoahuun noicoinquin nantifi ahuunafo potayoni. Ascashu nocoahuunoashu ahuuoma iyopaoni non ahuunoashu isharapa-cunon.

<sup>10</sup> Ascan un shinain un mato shara huapaiyai cuscan nanfohuunoa un mato yoi man tapinon. Ascan manfin fari fusti finoanquin tsoa futsacai man afanan pui ichanan huashon man ato inantaima. Tau huaquin man ahuuomafo noiquin man ato fasi inanpaicoinquin ato inanqui tau huati. <sup>11</sup> Man tau huaquin unimacoincain ato inanqui tau huati cuscan natianri unimayanan ato inancahuun afanan yopanofoma. Man inan-paiyai ato inancahuun. <sup>12</sup> Ascacun man ato paratama inanpaifaiton man Diosin tapia. Man ascaino matoqui unimai man afanan ayashoma man ato inantiroma. Ahuatsi ato inanshquin.

<sup>13-14</sup> Uncai mato isca huaquin yoima, —Ato ichapa inancahuunca i un mato huaima. Nanfocai ayaino man yopaitiro, —ishoncai un mato yoima. Ascan natianfin man ichapayaquin. Ascacun yopaifo man ato inantiroquin. Manracafin chipo yopaicain nanfo ichapayashori mato inantirofo. Man ascaifin mafiranan cushunonansharashu man ascatiroquin tsoa futsa yopanoma. <sup>15</sup> Nannori Diosin tsain cununi isca huaquin, —Ratoran futsan ahuun yono ichapa chitunfiacai tushushotiroma ratoran futsari yopaimain inaintonfin. Ascan futsan ichapama chitufiashocai afanan yopatiromaran, —ishon Diospan tsain cununiquin.

### *Tito yafi afu rafuafo*

<sup>16</sup> Un matohuunoa shinansharai cuscari Titopan arifi ahuun nomuran shon matohuunoa shinain. Diosin ahuun nomuran shinanmana cuscan non, —¡Aicho! Upa Diosin min fasi shara min Tito shinan-mashararan, —ishon non yoimisi. <sup>17</sup> Ascashon non yoyamua isca huaquin, —Corintofo afanan ato oinyotahuun ato yoisharashquin, —ishon non Tito yoyamua. Non nannori yoiaino fasi unimaiyamua. — ¡Aicho! Unfin ato ari caicain. Un ato yoisharapai cairan, —ishon noco yoyamua. Un shinain nocon tsain fustihuunoashuca i caima. Afin matoqui capaisharai cai.

<sup>18</sup> Ascacun no futan Diosin tanamisi futsan yafi Tito non matoqui nichishquin. Nan nocon yorahuan fasi shara. Jesushuunoa arifi yoipaimisi. Ahuunoa nantifi icoinra huafoan shara yoimisifo. <sup>19</sup> Nan icoinra huafoti ichanancashon nan nocofunu catonnifo no futan nan pui yopaifo non foshonon. Non ato ismapai pui non ato inain cuscan nocon Ifo shararan huanonfo. Non ato shara huapaiyai cuscan tapinonfo.

<sup>20-21</sup> Nan ahuuomafo non ato pui fomasharapai. Ascacun nantifi yorafoan ointaifi non ato oinmasharapai nocoqui shinanchacanon-foma. Nan pui paratama non foshosharapai. Ascano noco isca huanon-foma, —Nocon pui atirifi noco onuanforan, —inonfoma. Ascano nocon Ifoan ointaifi nantifi yorafoan ointaifiri non ato oinmapai non cayacafi ica cuscan.

<sup>22</sup> Ascacun nan nocon yorahuan Jesús tanamisi futsan non mato ari nichishquin. Man nonfin nan nocofunu oinmisiquin fasi Jesús icoinra



huacoinnaiton. Noco futan Jesús yonoshosharamisi. Ascashon matohuunoa nicamisi man Jesús tanasharashon man ahuuomafo inan-sharaiton. Fasi mato ari capaimisi mato futan ato shara huashquin.

<sup>23</sup> Man manfin Tito onancoianquin. Nantonfin u futan mato yonoshosharamisiquin. U fu rafumisi Jesús yonoshosharashquin. Nan Jesús icoinra huaa futsafori afu mato ari focani. Nan Jesús icoinra huafo ichanancashon ato catonnifo mato ari fononfo. Nan futsafoan ato oinquin yoimisifo, —¡Aicho! Nan na yoran ahuu cuscaramain Cristoquin noco oinmana. Atohuunshon man non tapia Cristo fasi shararan, —ishon yoimisifo. <sup>24</sup> Ascacufin matoqui nocoifoan man ato ismatiro man atohuun noicoinquin. Man asca huaino un matohuunoa yoisharamisi cuscan iconcoin icoinra huafotifain tapitirofo.

## 9

*Icoinra huafo Corinto anoafoan nan icoinra huaa futsafo ahuuomafo ato pui fomanifo*

<sup>1-2</sup> Mun tapia Jesús icoinra huaa futsafo yopaifo cuscan man ato inanriscapai. Nannori un Macedonian anoafo matohuunoa yoia isca huaquin, —Corinto anoafo fari fusti iquisi itisharafo Jerusalén ano ahuuomafo ato inanshcaquin, —ishon matohuunoa un ato yoia. Man unimayanan ahuuomafo ato inanpaiyaiton nicacaquin arifi ato inanshquicaniquin. Ascacun mancai uhuun cunu fusti yopaima nan pui yopaifo ato fomashquin.

<sup>3</sup> Ascaciafucan un Tito yafi afu rafuafori matoqui nichishquin un matohuunoa yoisharamisi cuscan iconcoin tapinonfo. Uncai matohuunoa tapinonfo ipaitsi yoimisima. Un ato yoimisi isca huaquin, —Corinto anoafo man iquisi itisharafo. Man atoqui nocoaiton mato pui inanshcani nan ahuuomafo man foshonon, —ishon un matohuunoa ato yoia. Ascacun itisharacahuun maton pui inantaifoma.

<sup>4</sup> Ascan Macedonia anoa futsa ipaishoma ufu focaquin non mato oian man pui ichanan huayamacun un mato icoinra huashon un ato yoita cuscan man pui itishara huacuma un matohuun rafipaiyaino marifi man rafipaitiro. <sup>5</sup> Nanscacun un shinan Tito yafi afu rafua rafu iquisi rufofo un mato ari ato nichiqui tau huai pui ichanan huashon nan ahuuomafo fomashquin iquisi man itishara huanon. Ascan un chipo uficoin un matoqui nocoshon ufu foafoan tapitiro tsoan curushcai mato yonoama man ato pui inanno ishon. Ascata ma man ato inanpaisharaquin man ato inan.

<sup>6</sup> Ascacun ointiaquimayamacahuun. Tsoan fimi ushu fustirasi fana fustirasiri ahuan fimi fitiro. Tsoan ushu ichapa fana yono ichapari fitiro. Nanscarifiai tsoan futsafo ichapama inancun nanrifi Diosin ichapama inanshquin. Ascan tsoan unimaquin ichapa futsa inainton ichapari arifi fitiro. <sup>7</sup> Nantifiton aton nomuran shinainfo cuscan huafain futsafo inantirofo. Ascashocai yoitiro ma isca huaquin, —¡Ohua! Un paratama inanpaiyamafiaiton ua yocariaiton un inain.

Ascan un inanyamaino uqui shinanchacatiro. Un inain uhuunoa shinanchacanonfomaran, —ishon anori shinanyamacahuun. Asca huatama unimayanan inancahuun. Nan futsafo unimayanan inanmisi nanfin Diosin fasi ahuan noiquin. <sup>8</sup> Man ascacun nan man yopai cuscan paratama Diosin mato shara futsa futsatapafo inantiro man

yopanonma. Futsafo yopaifo cuscan man ato inanon. Diosin nantishon tapiquin mato shara huafafaintiro marifi man ato shara huapanon.

<sup>9</sup> Diospan tsain cunuquin isca huani,

“Nocofunu sharapan ahuuomafo ichapa inansharamisi.  
Atohuun ramapaiyai cuscan huafain nan nocofunuhuucal  
Diosin ahuun ointiaquimapacunacamaran,”

ishon cununi.

<sup>10</sup> Diosin nantifi ushu onihuani. Ascacun yoran ushu fanatiro. Chipó Diosin ahuun yonofó foaimashotiro pisharanon. Nanscarifai man yopai cuscan Diosin mato inanshquin. Paratama mato inantiro man unimaquin futsafori man shara huafafainon. <sup>11</sup> Icon Diosin mato ichapa inapacui manri futsafo ichapa inanon. Ascan nan yopaifo man ato inain cuscan non ato fomashquin fasi unimaquin yoiqui isca huashcani, —¡Aicho! Upa Diosin min fasi sharacoinran, —huashcani.

<sup>12</sup> Man ato shara huai cuscan nan ahuuomafoan fiishcani. Ficashon unimacai yoishcani, —¡Aicho! Upa Diosin min noco shara huamisiran, —ishon yoishcani. <sup>13</sup> Man ato shara huaa cuscan nan ahuuomafo fasi unimashcani man ato inansharano. Ascashon yoiquin isca huashcani, —¡Aicho! Upa Diosin nan noco inanfoan min tsain nicasharacoincani. “Jesús nocon Iforan,” mia huamisifo. Min ato yonoa cuscan noco inansharafo. Futsafori nanfoan ato inansharamisifo. Ascancunfin nofocoin man non oian iconcoian min Furun Jesús aton Ifocoinran, —ishon nan ahuuomafoan yoishcani.

<sup>14</sup> Ascan mato Upa Dios cufishoshcani. Man ato Dioshuunshon shara huaa cuscan. Ascashon yoiqui isca huashcani, —Upa Diosin, minhuunshon nafoan noco shara huaa. ¡Aicho! Upan non fasi atohuun noicoin. Atori shara huahuu, —ishon mato cufishoshcani. <sup>15</sup> ¡Aicho! Upa Diosin ahuun Furun Jesucristo noco inansharacoinni. Ascashon nocoqui nichini no fu rafupacunon. Afin fasi sharacoinquin. Paratamari ahuunoa yoipaisharafia noncai tapiama ahuuscashomain non yoisharatiroquin.

## 10

*Pablonun ato tapimana Diosihuunshon ato yonoshomisi Jesushuunoa yosishquin*

<sup>1</sup> Natian un tsain futsari mato yoisharapai. Uhuun yoramishtichin ua nicasharacapun. Cristocai tsain curushpan noco yoima. Noco huun noishon funainquimashta noco yoisharai non ahuun tsain nicasharanon. Nanscarifi aqui un Cristohuunshon mato funainquimashta yoisharapai man tapinon. Man atirififain yoiquin isca huamisi, —Pablon no fu icun non oinmisi ahuun tsain shacashta noco yoimisi. Ascacia noco cunushomisi cuscan ascaracaima ratutama cayacaficoian noco curushcain cunushomisan, —ishon uhuunoa yoimisifo. <sup>2</sup> Un matoqui nocoshocai curushcai mato yoipaima man ua nicanon.

Atiriffoan shinanqui isca huafo, —Pablonun nan icoinra huamafoan shinainfo cuscan noco yoi. Diosin ahuun shinanpacai noco yoiamaran, —ishon yoirafo. Un matoqui nocoshon un ato ismatiro nan icoinra huamafoan shinain cuscaai un mato yoimisima. Diosin shinain cuscan fusti un mato yoimisi. Nocoshon un ato tsain curushu yoishquin tapinonfo. <sup>3</sup> Icon nuno non mai ano ica. Ascafiahu icoinra huamafoan futsafo finonmapaiyai cuscan noncai asca huamisima noco noicasmaifo

finonshquin. <sup>4</sup> Nan icoinra huamafo ashi futan piyan rutunancani. Ascan noncai ascara ashi non piya non ahua futsafoyashon nan noco noicasmaifo yoshin chacafo non unumatiro. Ascatama Diospan curushhuunshon nan noco chaca shinanmapaiyaifo non ato cuyotiro.

<sup>5</sup> Ahuarafoan nocon nomuranshon noco amaquri shinanmapai non Diospan curushhuunshon non afo potatiro afanan noco anori shinanmanonma. Nanfoanfin Dioshuunao noco shinanmapaicanima. Non mato yosimisi cuscan nicasmaifo. Nanscarafon fu fochishmanantananpaicani. Noco Dios onanmapaicanima. Cacapaimisifoan Dios finonpaifia non Diosin curushhuunshon nanfo non potatiro afanan ascarafononma. Non nocon Ifo cufitiro isca huaquin, —Nocon Ifo Criston, nantifi uhuun shinanpan aton ifo ihuun. Un shinain cuscan mirus fusti ua shinanmahuu un mia tanasharanon, —ishon anori nocon Ifo Cristo non yoitiro. <sup>6</sup> Man Jesucristo nicacoinshon afanan ahua chaca huayamaino un afanan oaitian nan yoitimafo un ato oinmapacushquin. <sup>7</sup> Un mato muran imisi cuscan shinancahuun. Man futsa yoiqui isca huaa, —Pablocai ahua. Acai mutsisipamaran, —ishon yoiafo. Yoiafori, —Nonfin Cristo ahuan yorafocoin, —ishon yoia. Iconquin shinantirofo urifi Cristo yoracoinran.

<sup>8</sup> Nocon Ifo Jesús ua yononi cuscan un mato yonotiro mato chaca huamatama nocon Ifo un mato tanasharamafain maton ointi fupi humanon. Un anori mato yoimisi fashuca un cacapaimisi itama un mato shara huamapai. Un mato anori yoicai un rafipaiyama. <sup>9</sup> Uncai uhuun cunupan mato musmapaima. <sup>10</sup> Atirififoan uhuunao yoiquin isca huafo, —Pablonun nocoqui cunua cuscan fasi shafacafi mutsispacoin. Ascafia afincoin no fu icun man non oinmisi aacai ahua. Ahuan tsain ahuaaran, —ishon uhuunao yoimisifo.

<sup>11</sup> Nannori uhuunao yoimisifofiano un samamashta mato ari cashon uhuunao un mato tapimashquin. Un mato cunushomisi cuscan nannorico in un nocoshon un mato yoishquin.

<sup>12</sup> Futsafoan mato yoimisifo isca huaquin, —Unfin fasi ahua tapi coianquin. Un mato tapimasharatoran, —ishon yoimisifo. Ascarafon ichanancanashu afi ranan yoinancani, —Tsoa futsacai noco cuscara sharama. Norus fusti non tapisharacoianquin, —ishon nan cacapaimisifo ascamisifo. Nanscashon nanfoan fasi amaquri chaca shinanmisifo. Uncai yoitiro un sharacoin. Ascashu un aton cuscara itiro. <sup>13</sup> Noncai anori yoipaitiro. Diosin noco yonoa cuscan nan fusti non mato yoitiro. Noco yononi non mato ahuan tsain shara yoinon. Nan fustisi non shinanmisi. <sup>14</sup> Non yoia cuscan iconcoin. Noncai cacapaimisima. Diosin noco yonoa cuscan nan fustisi non mato yoitiro. Diosin noco yonoqui tau huani non mato ahuan tsain shara Jesucristohuunao yoinon.

<sup>15</sup> Futsafoan mato yonoa cuscacai, —Non mato yonoaran, —ishon non yoimisima. Nonfin mato yoiaquin nan non mato ashomisi fustihuunao. Futsafoan mato ashomisi huunao non yoimisima. Manmain parata mari Jesús icoinra huapainon. Ascan Diosin noco yonoaiton non mato paratama yositiro. <sup>16</sup> Man nanscaino nan tsain shara Jesucristohuunao nan chai icafori yoitiro. Nan chai icafon man futsan ato yoianocai un ato yoianon un itiro. Noncai futsa yono shutipaimisima.

<sup>17</sup> Ascan Diosin tsain cunuquin isca huani, —Ascan man ratoran futsa mafiri yoisharapaitama nocon Ifo Jesushuunarocon yoisharacahuun, —huani. <sup>18</sup> Futsan afiri yoisharaicai acai ahuama. Ascaiton nocon Ifo Jesús ahuunoa yoisharaino non icoinra huatiro na nocofunu shara imisi.

## 11

*Pablon Jesús fu rafucuinmisi futsafoancai Jesushuunoa tapiamafiacashon ahuunoa futsafo tapimapai*

<sup>1</sup> Un mato natian yoi. Nan yoran shinansharayamaiton shinantiro cuscan nannori un mato yoifiaquicai nanscaracoin un yoima. Ascacun man ua nicamisi cuscan natianri ua nicasharacapun. <sup>2</sup> Nocofunun ahuin futsa fu icun fasi fashicointiro. Un Cristo yoiyoni arus fusti maton funu cuscara mato iquinon. Manfin ainfo nocofunu futsa fu imisima cuscaraquin. Cristo fusti mato Ifo itiroran ishon un yoiyoni. Man ascayamaino urifi uhuun ointi nocotiro.

<sup>3</sup> Ascacun un matohuun musui Satanás Eva parani cuscan futsafoan matorifi maton nomuran parapaicani man Jesús afanan tanasharayamafain Cristo fusti man noinonma. <sup>4</sup> ¡Ohuashta! Futsafoan samamashta mato parapaicani. Non Jesushuunoa mato yoimisi cuscan futsafoan matoqui nocoshon ahuunoa yoicoianmafiaifoa mancai ato shatumpaitama manrocon ato icoinra huai. Non Diospan Yoshin Sharahuunshon tsain shara Jesushuunoa mato yoimisi cuscan nanfoan yoicoianmafiaifoa manfin ato icoinra huaquin. Jesushuunoa amaquiri mato yosifiaifoa man ato shatumanama. Man ato nicaquin yoimisi, —¡Aicho! Man nocofu ipainon, —man ato huamisi.

<sup>5</sup> Ascacufin nanfori afiri yoisharafiai nanfoancai ua finoanfoma. Ascashon mato isca huaquin yoicani, —Diosin noco nichian non mato yosinon, —ishon ifiacashoncai ua finoanfoma. <sup>6</sup> ¿Man shinanmun un mato Diosin tsain yoiquin uhuun tsainman mato yoisharatiroma? Ascafia unfin Diosin tsain tapisharaquin. Nan un mato yoiai cuscan cayacaficoin. Manfin ua onancoianquin. Man man tapian un mato Diosin tsain shafacafi yoimisi. Nanscara un mato ismafafaini.

<sup>7</sup> Un Diosin tsain yoiai chaincai un mato ahuashta yocamisima. Uncai mato ahua fiamisima. Ucai mato pui yocama. Ascan un mato chaca huaraca. Ascacia ascaracaima. Mancai ichananshon nan Diosin tsain yoimiscicai man inanqui fuya huamisima. Nanscaracai man tapiataima. Un mato Diospan tsain shara Jesushuunoa yoimisi mato shara huaquin man Diospan facufu inon. Un asca huaquicai un mato ahua yocamisima. ¿Ascan man uhuunoa shinanchacaimun? —Pablocai ahumaran, —ishon man uhuunoa shinanraca. <sup>8</sup> Un matofu icai chaincai nan icoinra huafo mani futsa arishon ua inannifo ahuun rafanan un yopai cuscan un finon. Maficairocon man ua inanshara icuana. Ua inanfo rafanan un yopai cuscan un fia aiyashon un mato Diosin tsain yoishquin. <sup>9</sup> Un matofu ipaoni chaincai un ahua yopafiaquin un mato fucash huapainima. Nantianri Macedonian anoa icoinra huafo nocoqui nococashon un yopai cuscan ua inannifo. Un mato ano ica chaincai un tsoa ahua yocamisima. Uncai tsoa ahua yocapacunacama.

<sup>10</sup> Ascacufin un mato Cristohuunshon icon fusti yoimisi. Nanscacun ahuun tsain iconcain uhuun nomuran un nanua. Tsoa Acaya mai anofoancai un mato yoiai cuscan ua shatumatiro. <sup>11</sup> ¿Un mato anori

yoiquinmun un mato noiama? Ma. Anorimafinquin. Diosin tapian un matohuun noicoin.

<sup>12</sup> Nanscacun un mato yonoshonai chaincai un mato ahua fiapaimisima. Natianricai un mato ahua yocaima. Nanscasi huaquin un mato yonoshonicai nan paramisifo afanan man icoinra huanonma. Nan un yonoai cuscan futsafoan yoimisifo isca huaquin, —Norifi non Pablon yonoai cuscan non yonoiran, —ifiamisifo nanfocai un yonoai cuscan tsoan yonomisima.

<sup>13</sup> Nanfoan paramisifo. Un icai cuscan apaifiacanicai tsoa ascacoianfoma. —Cristo noco yonoaran, —ishon mato shinanmapaifiacani nanfocai Cristo fu rafumisifoma. <sup>14</sup> Icon Satanás nocoqui nocotiro nan Diosin ahuun oinmati afu nai muran ica shara ointsa. Ascashon yoitiro, —Unfin mato shafacafi yositiroquin, —ishon noco fuparapaitiro. <sup>15</sup> Ascacun Satanás yonoshomisifori nan cuscara itirofo. Chacafofiacanashu Diospan yora shara ointsa itirofo. —Norifi non Dios yonosharashomisiran, —ishon noco shinanmapaicani. Ascafiifoan ahuun unutaquin Diosin ato onaintimaquin finacoinshquin. Nanfoan chaca huacanashu omitsiscapanacafo.

*Pablon Jesús fu rafumisi omitsiscani cuscan*

<sup>16</sup> Un mato yoia cuscan afanan mato yoinon. —Pablonun ahua tapiamaran, —ishon uhuunoa shinanyamacahuun. Ascafia uhuunoa shinanpaiqui ua nicayocahuun. Nan man yora futsa ahua tapiama man nicatiro cuscan uarifi nicasharayocapun. Ufiri un ichapama yoimusharanon. <sup>17</sup> Un mato yoiai cuscan ufiri un yoimuishara cuscacai uhuun Ifoan ua yonoama. Un mato yoishquiai cuscan nan ahua tapiamafoan yoimisifo.

<sup>18</sup> Icoinra huamafoan afiri yoimuishara cuscan futsafoanri mato yoimisifo. Ascacun nantian un mato yoi ufiri un yoimuisharai cuscan. <sup>19</sup> Mafi man shinanmun man tapicoian. Nanscashion nan ahua tapiafoma man ato nicatiro. Mato amaquiri yoifiaifoan mancai ato shatumanama.

<sup>20</sup> Nan ratoran futsan mato curushcai yonoai cuscan man nicacointiro. Man ahuun oinmatifo cuscaracun mato nanfoan yonoa. Ascashori mato yonocani man ato cushusharanon. Mato fucash huafain mato roamisifo. Mato asca huamisifo. <sup>21</sup> Mato asca huariaquin shinanfo racafi, —Nofin mutsisipafokin, —ishon shinanmisifo. ¡Ohua! Uncai anori shinanmisima. Ascan uncai icaifo cuscan ufiri yoimuisharatiroma. Man shinanracafin un mutsisipamaquin. Nanfoan mato aca cuscacai un mato asca huamisima. Ascacun un rafipaitiro. Ascafia nanfo afiri yoimushara cuscarifiai nanfoan mato ahua yoiafo cuscahuunoari ufin un yoimuisharatiro. ¡Ohua! Nan ahua tapiafoma cuscan afanan un mato yoi.

<sup>22</sup> ¿Nanfoan yoiafomun, —Non Hebreo sharafo, —ishon? Unrifi un Hebreoquin. ¿Nanfosimun Israelifo? Urifi un Israeliquin. ¿Nanfosimun Abraham ahuun funafo? Urifi un ahuun funaquin. <sup>23</sup> ¿Nanfosimun Cristo ahuun oinmatifo? Uncaifin ahuun oinmati shara finacaiquin. ¡Ohua! Un asca huaquin yoipaiyamafiaquin un mato yoiai cuscan shinancapon. Nan paramisifoan mato yoiquin isca huacani, —Nofi fasi curushcai Jesús yonoshonaquin, —ishon mato yoiafo. Uncaifin fasi yonoshocui finacaiquin. Nanfoanraca yoiqui isca huamisifo, —Jesushuunshon

noco cunu muran iquimanaforan, —ifiamisifo uacaifin cunu muran iquimaquin finacaimisifoquin. Uacaifin fichin coshaquin finacoinmisifoquin. Ua coshafoticaí un tanan huatiroma. Mun nari nari cuamisi.

<sup>24</sup> Uhuun yora Israelifoanfin ua mucu fustiti coshaqui huafuquin. Nan ua coshaifotifi ua treinta nueve huafain ua coshamisifoquin.

<sup>25</sup> Romanonfoanri ua coshaquin rafu non fusti huaafo. Ascashon uarifi uhuun caifan toquirinin tsacaquin fusti huanifo. Shashohuanun non pocufainaino man uqui shashohuan cashcui rafu non fustianino mun asa cuani. Man shashohuan ua ya cashcuano un yamu fusti non shafa fustiri unuhuan naquinoashu un ahuun naoti yatanni asashquima.

<sup>26</sup> Un cahuancacainaichain manifoti Jesushuunoa yoishquin nan unu coshicoiain fasi musucoin muran icain ua yomutsofoan achicashon ua musuni tapifain uhuun caifoncoinchí ua musuni tapifain nanscarifi aquin uhuun caifomafoan ua musuni tapifain. Pushurasifo anofoanri ua musuni tapifain tsoan istaipama anofoanri ua musuni tapifain unuhuan musuni muran futsafoan yoiquin isca huafo, —Norifi non Jesús Ifo huaran, —ificashon parafo. Nanfoanri ua musuni tapifain.

<sup>27</sup> Un isin mufiain fasi curushcai yonomisi nan un yamu ichapa osha tunufain un foniyanan nomicain piqui tunufain fasi un matsinacain sahuutiamá icain.

<sup>28</sup> Ascatarifi nantifi Jesús icoinra huafo ichananti pushu anoshon ahuaara ato fucashni huai cuscan urifi un atohuunshon uhuun ointi nocomisi. Shafatifi un ato shinanmisi. <sup>29</sup> Un nica futsan Jesús tanasharapaifain ratuaino urifi un atohuun ramapaitiro. Nan futsan chaca huacun un ahuunshon urifi mutiro. Futsan futsa chaca huamacun urifi uhuun ointi atohuunshon un nocotiro.

<sup>30</sup> Ascan un mato rama yoia cuscan un afanan yoimuisharainocai, — Un Jesusmaisi ahuaara huatiromaran, —ishon man tapinon. Un omitiscamisi cuscan un mato yoi. <sup>31</sup> Non isca huanon, —Upa Diosin min shararan, —non huapanon. Nan nocon Ifo Jesucristo ahuun Apa nannori non yoipacunon. Nantofin man tapiaquin. Uncai mato paraima.

<sup>32</sup> Nan pushurasi ahuun anu Damasco ano niaifoncoinnin Aretas ahuun niaifo patashari yononi nan pushurasi Damasco ano cushushon ua achinonfo. <sup>33</sup> Ascacun nan Jesús icoinra huafoan ua futanmanhuan muran onucashon cunu foman cayashon ua fotomanifo un casharanon.

## 12

### *Pablon ahuun namapan cuscara Diosin tapimani*

<sup>1</sup> Ufin un yoimuisharai. Ascara tsain uhuunoa un yoimuainocai ahuaconma. Nanscafiacun nocon Ifo Jesús ua oinmana cuscan un mato yoinon. Ascano namapan cuscara ua oinmana. Tsoan nicayomisima cuscararifi ua tapimana. Nannori un mato yoi. <sup>2</sup> Catorce fari man finoan Diosin nai muran icano ua ihuiriscatani. Un Cristo fu rafuaiton oinquin ua ihuiriscatani. Uncai tapiama uhuun yoshin fusti nai muran cani iyamarai uhuun cayafoya un caniraca. Diosin fustitofin tapiaquin nan un ini cuscan.

<sup>3-4</sup> Diosin nan icano ua ihuiriscatani. Un mato yoia cuscan afananri un mato yoi. Uhuun yora mumacoin iyamarai uhuun yoshin fustisimain caniquin uncai tapiama. Diosin fustitofin tapiaquin nan un ini cuscan Diosin icano ua ahuaara nicamani cuscacai un tsoa futsa yoitiroma.

Ascashon ua yoiquin isca huani, —Un icano min oian cuscan tsoashta yoiamahuu, —ishon ua Diosin yononi.

<sup>5</sup> Un oian cuscan huafain un futsa yoitiro isca huaquin, —Diosifin ua fusti nan icari ua oinmaniquin, —ishon un yoitiro. Ascafiacucai un anori yoipaima. Asca huaquin yoiashu un cacapaimisi itiro. Uncai ufiri yoimuisharapaima. Uruscai un ahua huatiroma. Unfin Diosinhuunshon un ahuara huatiroquin. Nanscacufin nan fusti un yoimisi. <sup>6</sup> Ufiri un yoimuisharapaifin un yoimuitiroquin. Un anori yoiquicai yora tapiamafoan yoitiro cuscan un yoima. Un iconcoin uhuunoa yoisharatiro. Ascafia uncai ufiri yoimuisharapaima uhuunoa shinanquin finacoinnonfoma.

<sup>7</sup> Upa Diosin icari ua ismani cuscan tsoa futsacai oinmisima. Ascano Diosin shinanni ua oinmanihuunoashu ufiri yoimuisharaino un cacapaimisi itiro. Ascacufin Diosin Satanás nitun huamayamaino yoshin chacan uqui nichini ua fucash huariamisi un cacapaimisi inonma.

<sup>8</sup> Ascacun un cufinquin isca huani, —Ifon, ua cayahuapun, —ishon un yocaquin rafu non fusti huani. <sup>9</sup> Un asca huafiaiton nocon Ifoan ua cumaquin isca huani, —Un mihuun noi. Uhuun curushhuunshon nan pau min tunutiro. Un mifu rafucacaini. Nan fusti min yopai. Min mutsispamafiacun un minhuunshon un ato ismatiro un ahuamamishti huatiroan, —ishon ua cumani. Ascacufin unimaquin un yoifafainicai isca huaquin, —Un mutsispamafiacun uhuun Ifo ahuun curushu ua inantiroan, —ishon un yoishquin. Ascano Cristo ahuun curushu ua inantiro.

<sup>10</sup> Ascano un mutsispamafiashu Cristohuunoashu un unimai. Ascashon ua roafain ahuara chaca finoin omitsiscamafain ahuafoan ua fucashni huafiaino un unimaquin tunutiro. Un asca huaquifin un mutsispamafiashon Cristohuunshon un ahuamamishti huatiroquin.

*Pablonun icoinra huafo Corinto anoafo fasi shinanni*

<sup>11</sup> Nan yora ahua tapiamafoan yoitiro cuscan un mato rama yoia. Un mato anori yoifiafin matohuun nuaquin. Asca ufiri yoimuisharatama mancairocon uhuunoa yoisharain shara icuanaquin. Nan futsafoan mato paran. —Nonfin Jesucristo fu rafumisisharaqin, —ishon mato parafiamisifo man ato icoinra huamisi. Ascan uacaifin man icoinra huaquin finacaitiroquin. Un ahuamafiucucai afoan ua finoncoianfoma. <sup>12</sup> Un Jesucristo fu rafumiscoinshofin un mato ismamisiquin. Un ahuunshon mato ahuara sharafo isma man Jesús icoinra huanon. Un ahuunshon mato isma cuscan yoiafo, —¡Airal! ¡Oincapon! Diosin ahuamamishti huatiroan, —ishon yoimisifo. Ahuunshori ascapainifo un mato isma Diosin ahuamamishti huatiro tapinonfo. Funaquima un afo mato ismacoinmisi.

<sup>13</sup> ¿Ascan ahuuscaquimun man isca huaquin shinanquin? —Pablonun icoinra huaa futsafo shara huaa cuscacai nocorifi shara huashoanmaran, —ishoncai man uhuunoa yoitiro. Un icoinra huaa futsafo ato shara huashoan cuscan nanscarifi huaquin un mato shara huafafaini. Uncai mato ahua fianpaimisima. Unricai mato fucash huamisima. —Ua pimafain ua sahumacahuuncai, —un mato huamisima. Ascacun ua rau huacapun.

<sup>14</sup> Munfin mato ano cai rafuaquin. Mun itisharashu natian afanan un mato ari cai. Un amisi cuscacai afanan un mato yocaquin fucash

huaima. Uncai matona fipaitama unrocon mato fuchipaicoín. Shinancapon. Facufoancai apa yafi ahua pimamisima. Ascan ahua futan apacaifin aton facufo pimamisiquin. Ascan manfin uhuun facucoinfo cuscarauin. Ascan uncaifin mato Diospan tsain tapimasharaquin uhuunoashu man isharanon.

<sup>15</sup> Ascancunfin nantifi un ahuara ya cuscan un mato inanfain ufiri un inanmui man Jesús tanasharanon. Ascacun un mato noiquin finacoinfiatocai man ua noiquin finacoinma. <sup>16</sup> Atirifoan uhuunoa yoiquiraca isca huafo, —Icon Pablon noco ahua yocayamafiaquin noco paran. Noco ahua fanyamafiashton noco fomanran, —ishonraca man yoimisi. <sup>17</sup> ¿Nan nocofunufu un matoqui nichini nanfohuunshon unmun mato paran maton pui fianshquin? <sup>18</sup> Un Tito yoini isca huaquin, —Corintofo ano catahuun, —un huani. Noco futan icoinra huaa futsafori un matoqui nichian. ¿Titopamun mato paran matona fianshquin? Ma. Man manfin tapiaquin Titopacai matona fianpaimisima. Un matofu imisi cuscan arifi matofu ica. Non nanscara rafu matohuun noiquin. Mato shara huashopai Diospan Yoshin Sharahuunoashu noco rafu non matofu imisi.

<sup>19</sup> —Man shinan raca un mato yoiai cuscan man uhuunoa shinansharanon, —ishon un mato yoi. Ma. Anoricaima. Upa Diosin nan un yoiai cuscafin ua nicaquin Cristo ua yoimai cuscan un mato yoiaiton. Uhuun yoramishtichin nan un mato yoia cuscan un mato shara huapai Jesús shinain cuscan huaquin marifi nannorisi man shinanon.

<sup>20</sup> Ascacun un matoqui nocoshon oinpai man chaca shatushon Jesús tanasharanon. Un matoqui nocoshon oian man chaca shatuyamacun uhuun nomuran un omitsiscatiro. Un matoqui chipo nocoaitian man raca fochishmanantanancai futsa finonmapai aqui sinacai samamashta sinacucahuanmisifo icai asca huaquiraca, —Norus fusti tapishara. Tsoa futsafoancai non tapishara cuscan tapiafomaran, —icain. Nannori yoiti-acanashu chaca huatanancain yoiti huatanancain cacapaimisi icain man nannorisi shinanquima. Man nansca huainofin un ratuicain. Man asca huaquin chaca shatuyamashu man ua oinpaiyai cuscaai un ascatiroma. Man uqui unimaquin ua oinpaifiaquin man chaca huaino un matoqui unimatamarocon un fasi mato shinain omitsiscatiro. Man nanscaiton un mato oinmanaquin.

<sup>21</sup> Man asca huainofin un matoqui nocoaitian un ratuicain. Maton nomuran man ahuarafo shinanchacafain maton nomuranshon man chaca huapaiyai cuscan huariaino. Nocofunufoan aton ahuinma fu icaifoanno ainfofori aton funuma fu icaifoanno. Nanscara chaca futsa futsatapafa huafain man maton chaca shatuashma Diosiqui man afanan nasoyamaino. Un matoqui nocoshon oian man asca huaino un ratutiro. Maton ointaifi uarifi Diosin matohuunshon ua rafimashquin. Man acai cusc-ahuunoashu un fasi omitsiscatiro. Ascacun un uaiyanan mato oinmai.

## 13

*Pablonun afanan chaca huanonfoma ishon ahuun unutaquin ato yoini*

<sup>1</sup> Mun mato oinqui rafu huaa. Natian un afanan mato oincai. Diospan tsain noco yoiquin isca huani, —Tsoan yoiquin isca huai, “Nanton chaca huaran,” ishon yoiaino. Rafu non fustiton nannorifosi yoiaino iyamarai rafutan nannorisi yoiaino non icoinra huatiro, —ishon Diosin tsain



cununi. <sup>2</sup> Un matofu iyoshon un mato yoini man chaca huanonma. Natianrifi un afanan mato yoi. Un matoqui nasoshon oian tsoan aton chaca shatucunma un ato oinماشquin. Tsoashtacai un finonماشquima.

<sup>3</sup> Manraca tapipaicai Criston uhuunshon mato yoiaton. Iconquifin man tapicai. Man samamashta tapitiro. Un mato shafacafi ismatiro. Uncai mato ipaitsi yoima Cristohuunshon un mato yoi. Cristocai mato fuparanima tapimanama mutsisipacoincain mato tapimai man maton chaca shatunon. <sup>4</sup> Icon Cristo nocohuunoashu ihui coyan iquinanqui mastaifono nocofunu fupashcoin ini. Nocohuunoashu naicain afin numanima. Nafianishaquin natian Diosin ahuun curushhuunoashu man afanan nia. Nanscarifiai nonricai mutsisipama. Afin omitsiscani norifi omitsiscatirofiashu Cristo mato shara huashoan cuscan norifi Diosin curushhuunshon mato shara huafafaini.

<sup>5</sup> Ascacun maton nomuranshon shinacahuun. ¿Iconmun man man Jesús icoinra huaa maton chaca shatucoianshu Upa Dios fu ipashcaquin? ¿Man tapicoianmun Jesucristo matofu rafua? ¿Man mumisimun? ¿Man mafiri fuparamuamun? —¿Unfin Jesús ahuun yoracoinquin, —ishon man yoifiashucaí man ahuun yoracoinmamun? <sup>6</sup> Man manfin ua oinquin tapiaquin un Cristo ahuun yoracoincun. Nan man icoinra huapainon. <sup>7</sup> Un mato Upa Dios cufishomisi man chaca huanonma. Nocohuunoa shinansharanonfo ishoncai un Upa cufimisima. Isca huaquin futsafoan nocohuunoa shinantirofo, —Pablón yafi afu rafuafoancaí ato yonoshosharafomaran, —ishon nocohuunoa yoifiacanashu. Ascacun marifi man Jesús tanasharaino fasi sharacoin itiro.

<sup>8</sup> Noncai ahuaa iconcain shatumatiro. Non asca huapaitamarocon Diospan tsain iconcain non afohuunoa futsafo yoisharapai. <sup>9</sup> Ascano non ahuamaran ishon shinanfiacaquin man Jesushuunoashu ishara-coiainno non fasi unimacointiro. Ascan non mato Upa Dios mato cufishona man nan cuscara sharacoin inon. <sup>10</sup> Ascacufin un mato isca huaquin cunushona cuscan. Un matoqui nocoshon oian man Cristo tanasharacoincun un ointoshinon. Uficoín un mato muran caya-maquin un mato cunushoquin isca huai man nicasharanon. Ascan un matoqui nocoshocai Diospan shinanhuunshocai un mato curushcain yoishquima. Diosicai un mato oimanon ua yonoama. Uroco mato Jesushuunoa shinansharamani.

<sup>11</sup> Uhuun tsain unutaquí un mato yoisharapai. Jesús cuscara shara fusti ipaichahuun. Ua nicasharacapun. Nannorisi shinancahuun. Isharacahuun. Man ascaino Diosin matohuun noicoincain mato imasharanon. Ascashon maton ointi unimamanon matofu ishon. <sup>12</sup> Nantifi yoinonansharacahuun. <sup>13</sup> Nantifi Jesús icoinra huafo ufu icafoan mato yoisharapai. <sup>14</sup> Nocon Ifo Jesucristo matohuun ramapai. Nocon Diosiri matohuun noicoín. Diospan Yoshin Shara matofu rafupacunon. Nanti.

Pablo

## Pablonun Galacia Anoafo Cunu Fomani

*Pablonun Galacia anoafo nan icoinra huafoti cunu fomani*

<sup>1</sup> Unquian Pablo un mato cunu fomai. Unfi Jesucristo fu rafumisi. Un mato ari caitocai nocofunufaoan ua nichinifoma Jesucristo futan Apa Diosin ua nichinifo. Man Furun naafiacun Apa Diosin funimani. Nan rafutan ua mato ano nichinifo. <sup>2</sup> Nan icoinra huafo nuno ufu icafoan nantiffain Jesús icoinra huafo Galacia anoafo mato tsain shara fomai. <sup>3</sup> Un mato fasi shinain. Nocon Upa Diosin futan Furun Jesucristo matohuun ramapai. Maton ointi mato unimamanon. <sup>4</sup> Ascacun non chaca huamisihuunoashu Jesús nani noco chaca soashoshquin. Nan maifoti ano yora chacafo muran non ica. Upa Diosin afin apaiyai cuscan nan chacafo murannoan natan Jesús noco numai. <sup>5</sup> Ascacun, —Dios sharacoinran, —huapanonfo. Amen.

*Jesús fustiton noco chaca soashonano ahuunoashu fusti non Upa Dios ari nocotiro*

<sup>6-7</sup> Ascan Cristo matohuun ramapaiyaino Upa Diosin mato catonni. ¿Upa Diosin mato catonfianicun tsain futsa nicaquin ahuuscain man samamashta Upa Dios potaimun? Nancai Jesucristohuunoa cuscarama. Nanscaracai tsain futsa sharama. ¡Ohua! Man ascaiton nicai un matohuunshon ointi noco. Un shinanraca futsafoan mato amaquri yoishonafo mato funomashcaquin. Nan tsain sharacai Cristohuunoa cayacafi mato yosiafoma. <sup>8</sup> Un nan tsain shara mato cayacafi yosimisi. Ascan tsoan mato amaquri yosiamun un iyamarai ratoran futsan iyamarai Diospan oinmati afu nai muran icaton amaquri yosiashu omitsiscapanacafo muran fopainonfo. <sup>9</sup> Un mato yoimisi cuscan un afanan mato yoi. Un na tsain shara Jesucristohuunoa un mato yoimisi cuscan man man icoinra huaa. Ratoranfoan mato amaquri yosipaiashu omitsiscapanacafo muran fopainonfo.

<sup>10</sup> Uncai ufiri curafia huamupaima. Ascata un Upa Diosin uhuunoa shinanmasharapai nanton ua amapaiyai cuscan huaashquin. Un yorafo uhuunoa shinanmasharapaiyaino uncai Cristo oinmati itiroma.

*Ahuuscashucon Pablo Jesús fu rafumisi inimun*

<sup>11</sup> Uhuun yoramishtichin un mato shafacafi tapimapai. Na tsain shara Jesucristohuunoa un mato yoimisi cuscacai nocofunufaoan aton shinanma. <sup>12</sup> Na tsain shara un mato yoimisi cuscacai nocofunun ua tapimaima. Tsoa futsacain ua yosiam. Ascatarocon Jesucristo uhuun nomuran ua shinanmana cuscan un mato yoimisi.

<sup>13</sup> Nocon shunifoan noco yonopaoni cuscan anunifo Judaismon. Urifi nan un tanacoinyopaoni. Nanfin man man nicamisi. Man man tapia nan Jesús icoinra huafo Dios tanasharapaiyaifo un fasi curushcain ato omitsiscamapaoni. Un ato cuyopaicoipaoni. <sup>14</sup> Noco shunifo nan Judaismon noco tapimapaiyai cuscan un fasi finonmafain tapifafainpaoni. Uncaifin fasi finonmafain tapifoanfafaipaoni. Uhuun faritiri un ato finonmacoipaoni. Un fasi tapiquin finacoipaipaoni.

<sup>15-17</sup> Un caiantaima Upa Diosin ua fasi ramapaiquin ua catonni un ahuun yonoshomisi inon. Upa Diosin ua yoimamapaiyai cuscan uhuun caifoma un ato Furun Jesucristohuunoa tapimanon. Uncai nocofunu

futsa fu tsainnima ua tapimanon. Upa Diosin afin ua catonnitian un Jesús fu rafumisifo ari catama. Unrocon Arabia mai ano caní. Nannoashu un chipo Damasco pushurasi ano nasoni.

<sup>18</sup> Ascano fari rafu non fusti finonyotan un Damasco anoashu ari caní Pedro oinpai. Un quince oshatan un afu iyoni. <sup>19</sup> Nan Jesús fu rafumisifo docecai un atoquí nocoyonima. Santiago nan noco Ifoan Jesús chipocu fusti un oinni. <sup>20</sup> Uhuun yoramishtichin ua Diosin oiainno un mato icoinra huamapaifain un mato cunushonai cuscan nan iconcain. Uncai mato paraima.

<sup>21</sup> Tapicahuun un chipo Siria yafi Cilicia mai ano caní. <sup>22</sup> Nan Cristo icoinra huafo Judea anofoancai ua oinyomisifoma. <sup>23</sup> Ua oinyamafiamisishaquin uhuunoa yoiainfoan nicamisifo isca huaquin, —Na nocofunun Pablonun noco omitsiscamapaoni non afanan Jesús icoinra huanonma ishon. Nocorifi cuyopaipaoni. Ascafia natian arifi man Jesús icoinra huaa. Ascashon futsafori icoinra huamapairan, —ishon yoinifo. <sup>24</sup> Ascashon uhuunoa yoinifo isca huaquin, —Pablonun man Jesús icoinra huaa. ¡Aicho! Diosin fasi sharacoin. Ahuamamishti huatiroran, —ishon yoinifo.

## 2

*Jesús fu rafumisi futsafoan, —Pablo no fu inonquin, —huanifo*

<sup>1</sup> Ascano fari catorce finontan afanan un Bernabé fu ari caní. Tito arifi no fu caní. <sup>2</sup> Diosin uhuun nomuran ua shinanmanai cuscan un atoquí noconi un nocon caifomari nan tsain shara Jesucristohuunoa un ato tapimani. Atirificai un yoinima. Aton niaifofu fusti un ato yoiyoni. Un ato yocani isca huaquin, —¿Un Jesushuunoa yoimisi cuscan man shinan cayacafimun? ¿Unraca ipaitsi yoimisi? Man shinain cuscan ua tapimacahuun, —ishon un ato yoini. <sup>3</sup> —Shara. Min ato yoia cuscan cayacaficoiran, —ishon ua yoinifo. Tito ufu oaiton Israelicuma, —Foshqui rupa shatuhuu, —tsoan huanima. <sup>4</sup> Futsafoan nannoshon yoinifo isca huaquin, —Norifi non Jesús icoinra huaran, —ifacashocai tsoan icoinra huacoinnafo inima. Nanfoanri yoinifo isca huaquin, —Tito arifi foshqui rupa shatutiroran, —ishon yoinifo. Anori yoyamafoannocai tsoan anori shinan icuanima. Nanfo no fu ichanannifo. —Norifi non mato cuscaran, —ishon noco shinanmapaicani. Ascashon noco fomanpaicani. Non Jesús icoinra huashu noncai ahua futsa yopaima isharashquin. Ascafia nanfoan yoinifo isca huaquin, —Noncai Moisés cununi cuscan ayamashu non Dios fu itiromaran, —ishon noco yonopaicani. Ascashon nanfoan afanan noco oinmati cuscara imapaicani non Jesucristo fustisi tananonma. Moisés yononi cuscan tananonfo ishon. <sup>5</sup> Nanfoan noco yonopaiyaifo cuscaai non ato tsain fusti non nicayoama man iconcain Jesucristohuunoa tapiai cuscan funonnfoma.

<sup>6</sup> Uncai catontan niaifofosi noima ahuamafori nanscari huaquin un noicoin. Nanscarifi huaquin Diosicai nocon fusohuunshon noco onainma noco shafacaficoín onancain. Ascacun Jesús fu rafumisifoan ua isca huacani, —Min Jesushuunoa yoimisi cuscan shara tsain futsa yopaimaran, —ishon ua yoinifo. <sup>7</sup> Ascan Diosin Yoshin Sharapan Pedro catonni Jesús fu rafumisi inon. Ascashon nocon caifo Israelifo Jesushuunoa ato tapimanon. Nanscarifi aquin uarifi catonni un afu rafumisi inon. Ascashon uhuun caifoma urifi un ato yoinon.

<sup>8</sup> Ascashon Upa Diosin Pedro catonni afu rafumisi inon. Nocon caifo muran nichini. Jesushuunoa ato yoiaiton Upa Diosin Pedro mutsismani ahuun curushhuunshon ato yoinon. Nanscarifi aquin ua catonni afu rafumisi inon. Ascan nocon caifoma muran nichini un ato yoinon. Un ato yoiaiton ua mutsismani ahuun curushhuunshon un ato yoinon. <sup>9</sup> Ascano Upa Diosihuunshon un nocon caifoma yoiaiton nicaquin nan Santiago non Pedro non Juan atishon ua Bernabé yafi muninifo. Ascashon noco yoiquin isca huanifo, —¡Aicho! Non nocon caifo Jesushuunoa yoimisi cuscan marifi futsafo yoitiro. Nocon Ifo yonoshosharatacahuun. Nonfin nocon caifo fusti ano camisi ato yoishquin. Ascan manfin caifo futsafo ari catiroquin. <sup>10</sup> Man nunoashu nasoaitian ahuuomafohuun ointiaquimayamacahuun. Nan pui non mucua foshotiroran, —ishon noco yoirafo. Nicaí un unimacoian. Untsi nanscari huapaiyamai.

*Pablonun Pedro Antioquía anoshon yoini, —Min chaca huairan, —ishon*

<sup>11-14</sup> Ascanfiashon Pedro Antioquía pushurasi ano nocotan chaca huatishoni. Noco caifoma futan piyoni. Chipa Santiago fu rafuafo Antioquía ariashu nocoqui funifo. Nocotoshiaifoanno Pedronun afanan ahuun caifofosiyashon pini. Pedronun ahuun nomuran shinanquin isca huani, —Uhuun caifo Santiago anoashu funifo. Ascashocai nocon caifoma futan piinifoma. Ascan uhuun caifoma futan un piyaino uqui shinanchacatirofo. Ascano un afanan ato futan pitiromaran, —ishon Pedronun amaquiri shinanni. Ascaiton oinquin un nantifiton ointaifi Pedro yoini isca huaquin. —Mirifi min Israelifishu nocon shunifoan yonopaoni cuscan man min aquima. Min nocon caifoma cuscara imisi. ¿Ascan ahuuscain natian min nocon shunifoan yonopaoni cuscan min nocon caifomafo min ato tanamapaiyain? —ishon Pablonun Pedro yoini.

*Israelifo yafi Israelimafoan ato chaca shatucanashu Jesús icoinra huacanashu Dios fu nipatirofo*

<sup>15-16</sup> Ascan noncai mani futsa cainnima. Nanfoanfin chaca huamisifo. Nonfin Israelifo cainniquin. Ascafia man man tapia Moisés noco yononi cuscahuunshocai non nocon chaca soatiroma noco Diosin onaintimanonma. Ascatama non Jesucristo icoinra huaiton nocon chaca soashotiro. Non ascaitocai noco onaintimashquima. Moisés yononi cuscan non aitoncai noco chaca soashotiro. Ascan non Jesucristo fusti icoinra huaiton noco onaintimashquima.

<sup>17</sup> Nonfin Cristohuunshon noco chacan soatiroquin noco onaintimanonma. Nanscara man non tapifishu nofiri non chaca huamisi. ¿Non chaca shatucoinyamacumun Cristo noco chaca huamapaiquin? Ma. Ascara shinanchacapacuyamacahuun. <sup>18</sup> Moisés noco yononi cuscan man non tapian. Ahuunoashucaí non Dios fu nipatiroma. Jesús fustiton nocon chaca soashotiro non afu nipanon. Nan non icoinra huai. Ascano Moisés cununi cuscan afanan nasopaiashu non funotiro Dios fu ipashquin. Non afanan nasoquin non oinmani non noco chaca shatucoinshoma.

<sup>19</sup> Ascan Moisés yononi cuscan ayamaquin mun tapini uncai afohuunoashu isharatiroma. Un ascainocai Upa Diosin uqui unimatiroma. Ascacun nanfohuunshon un tapini Cristo fusti un icoinra huaino Upa Diosin uqui unimatiro. Ascashu un ahuun yora itiro. Ascan natiancai

un afanan Moisés yononi cuscahuunoa shinanpainacama ua nimapacunon. Afanan ascara shinantama un Dios fusti fu rafui isharashquin.

<sup>20</sup> Nocon Ifo Cristo ihui coyan iquinanqui mastafanno nani cuscan urifi un afu naa cuscaracoin ini. Ascacuai natian un ipaoni cuscan un afanan aima. Un Jesús icoinra huataima un ipaoni cuscaai un afanan aima. Cristo Diospan Furunmun ua noicoin afin ipaiyai cuscan ua nashoni. Ascacun un icoinra huaino natian Cristo unfu rafucacaini a cuscara ua imashquin. <sup>21</sup> Ascan Upa Diosin Furunhuunshon uhuun chaca ua soashoni un afu nipasharanon. Uncai ahua futsa shinanmisima nipasharashquin. Nan fusti un shinanmisi. Moisés cununihuunshon nocon chaca non shatutiroanocai Dios fu nipanon Cristo noco nashocuanima. Ipaitsi noco nashoncuan.

### 3

*Moisés yononi cuscan tanayamaraquin non Jesús icoinra huacun noco chaca noco soashotiro*

<sup>1</sup> Uhuun yoramishtichin Galacia anoafoan manfin nison cuscarafokin. ¿Tsoan mato amaqiri yosiamun? ¡Ohua! ¿Tsoan mato paramun man afanan shinansharanonma? Ascan nonfin mato cayacaficoin yoimisi Jesucristo mastafanno matohuunoashu nani. Non mato tapimasharafiamisicun mancaifin tsain amaqiri shinanmisi.

<sup>2</sup> Nan fusti un mato yocapai man ua cumasharanon. ¿Moisés noco cunushoni cuscan tanashon man Diospan Yoshin Shara fia iyamarai nan tsain shara Jesucristohuunoa man icoinra huashon man fiamun? <sup>3</sup> Man Diospan Yoshin Sharahuunoashu Jesús mato imapaiyai cuscan man ayopaoni. Ascafia natian man shinanqui isca huaa, —Moisés noco yononi cuscan aashu non isharatiroran, —man íca. ¡Ohuashta! ¿Ahuuscain nisofoan shinanmisi cuscan man shinainmun?

<sup>4</sup> Man Jesús tanasharaiton mato omitsiscamapaonifo. Ascashon man Diospan Yoshin Sharahuunshon Jesús tanasharamisi. Natian afanan Jesús fusti tanayamaino man ipaitsi Jesushuunoashu man omitsiscapaoni. Ascayamapainon. <sup>5</sup> Man nicamisi cuscan man man icoinra huaa. Ascacun ahuun Yoshin Shara mato inanfain tsoan oinyonima cuscara shara mato ashomisi. Moisés cununihuunshomaquian.

<sup>6</sup> Nocon shuni Abrahamhuunoa shinancapon. Abrahamfin Diosin yoiyoni cuscan icoinra huaniquin. Ascaiton Diosin yoini, —Mian icoinra huacun un min chaca soashona min ufu ipanon, —ishon yoini. <sup>7</sup> Ascacun tapisharacahuun. Nan icoinra huafoti Abraham facu cuscarafu. <sup>8</sup> Upa Diosin inonpacoai cuscan tapiyoni nocon caifomafaoanrifi Dios icoinra huaifoan aton chaca soashofain ato imasharashquin. Ascaifoanno atoqui fasi unimacoinni. Diosin Abraham yoiyoni isca huaquin, —Un minhuunshon manifoti un ato shara huashquiran, —ishon Diosin tsain cununi. <sup>9</sup> Ascashon Abraham icoinra huamisisicun Upa Diosin a shara huashomisi. Nanscarifi aquin icoinra huafoti ato shara huashomisi.

<sup>10</sup> Ascan Diosin tsain cununi isca huaquin, —Moisés cununi cuscan ayamacanashu omitsiscaí unupacunacafomaran, —ishon cununi. Tsoacai Moisés cununi cuscacoin amisima. Ascacufin ratoran futsan shinanquin isca huai, —Moisés cununi cuscan un aino Upa Diosin uhuun chaca ua soashotiro un afu ipanon, —ishon anori shinanfiaicai ascacointiroma. <sup>11</sup> Tsoan Upa Dios icoinra huaitonfin ahuun chaca soashofain imasharatiroquin. Ascan tsoan Moisés yononihuunshon

aton chaca soapaiquin shinantiro isca huaquin, —Moisés yononi cuscan non ainton noco imasharatiro, —ifiafoancai Upa Diosicai Moisés yononi ahuunshon ato imasharatiroma. <sup>12</sup> Ascacun man nonfin tapiquin Jesús fusti non icoinra huashu non Upa Dios fu ipatiro. Ascان Moisés noco yononi cuscahuunoacai ascarama. Moisés noco tapimaquin isca huani, —Nantifi Diosin noco yononi cuscan nantishotapiquin non acacainyamai non Dios fu itiomaran, —ishon cununi.

<sup>13</sup> Ascان Moisés noco cunushoni cuscan non ayamaiton Upa Diosin noco onaintimashquiran ishon cunufiani nococairocon finonmacufoantant Furun onaintimani. Noco huunoashu omitsiscani. Diospan tsain cununi isca huaquin, —Ratoran futsa ihuiqui mastai fo nanrifi Upa Diosin onaintimai omitsiscanon, —ishon cununi. Ascان non chaca huamisiano Cristo nocohuunoashu ihui coyan iquinanqui nani. Noco nashoyamanicun non omitsiscapacuana. <sup>14</sup> Ascان Upa Diosin Abraham shara huani cuscan Israelimafori Jesucristohuunshon ato shara huashquin. Ascacun nan icoinra huafoti ato yoiyoni cuscan ahuun Yoshin Shara ato ya rafumatiro. Ascان Cristo noco nashoni Apa Dios fu non ipanon. Nantifi Diosin Abraham yoiyoni cuscan icoinra huaa Israelimafori ato inanshquin.

*Moisés yononi cuscan yafi Diosin Abraham yoiyoni cuscan*

<sup>15-16</sup> Ascacun uhuun yoramishtichin natian non amisi cuscahuunoa un mato iscara tapimai man tapinon. Afu nocofunu ahuara yoiyoshocai shinan futsatiroma manmain ahuun anu cunushon. Nanscarifiai Upa Diosin Abraham yafi ahuun funa fusti yoiyoni. Ahuun funa ichapafohuunoacai yoiyonima. Abraham funa Cristo fustihuunoa yoiyoni. <sup>17</sup> Un mato shafacafi yoinon. Upa Diosin Abraham yoiyoni cuscan cuatro ciento treinta fari finontan Diosin Moisés yononi. Diosin Moisés yonofiani Abraham yoini cuscan ointiaquimama. Nan yoini cuscafin aiquin. Ascashocai Upa Diosin shinan futsanima. Nan yoiyoni cuscafin man amisiquin. <sup>18</sup> Upa Diosin Abraham yoiyoni cuscan icoinra huaiton chipo Upa Diosin Abrahamhuun noicoinquin cashman ashoni.

<sup>19</sup> ¿Ascان nanscaracumun ahuuscai Moisés huunshon Upa Diosin noco yononimun? Un mato tapimanon. Upa Diosin Abraham yoioyquin tau huani. Ascashon chipo Upa Diosin yononi cuscan Moisés cununi nantiffain tapinonfo. Ascafia yononi cuscacai toa ascamisima. Ascátama yoitimashunifo. Ascafia nan Moisés yononi cuscafin tanamisifoqui nan Jesús oaitian. Nanhuunoafin Upa Diosin Abraham yoiyoniquin. Ascان Upa Diosifin ahuun oinmati afu nai muran icafo tapimaquin tau huani nanfoanrifi Moisés tapimanon. Nan ato yonopaiyai cuscan anonfo. <sup>20</sup> Ascafia Upa Diosicai Abraham ascara yoinima. Ahuun nai oinmatifohuunshon yoiyamafain yora futsafohuunshonricai yoinima. Upa Diosicoinin afi Abraham yoipaiyai cuscan yoini.

*Ahuuscashomain Upa Diosin Moisés huunshon ato yononiquin*

<sup>21</sup> ¿Ascان Upa Diosin inonpacoaifo yoiyoni cuscan yafi Moisés yononi cuscan ascaracoin shinainmamun? Ma. Upa Diosin tsaincai rafuma. Upa Diosin Moisés yononi cuscahuunshon noco nimapacutirocun nanfohuunshon nocon chaca soashocuana non a cuscara shara inon. <sup>22</sup> Ascafia Upa Diospan tsain cununi isca huaquin, —Nantifi manifotifoan man non chaca huamisi. Ascashu nantifi yorafo nocon

chacahuunoashu non cunu muran iquia cuscaracoin, —ishon cununi. Jesucristo non icoinra huacun arus fusti noco caimatiro afanan chaca nocon ifo inonma. Nanscaracoinfin cununi.

<sup>23</sup> Ascashon noncai icoinra huayonima. Ascacun Cristo oataima Moisés noco yononihuunoashu non cunu muran iquimamua cuscarafu. Ascan nan Cristo oaitian non icoinra huacun noco caimanano afanancai non cunu muran iquia cuscarafu itiroma. <sup>24</sup> Ascacun non tapitiro Upa Diosin apaiyai cuscan Moisés noco yononi nocon Ifo cuscara iyopaoni. Nanhuunshonri non tapiyoni non icoinra huacun nocon chaca soashofain noco imasharashquin. <sup>25</sup> Non ascafiapaoniano Cristocoin nocoanocai non afanan Moisés yononi cuscan nocon Ifo itiroma noco iquinon.

<sup>26</sup> Natian nantifi Jesús icoinra huafo Diospan facufo. <sup>27</sup> Man manfin unu muran iquimamuaquin maton chaca shatuashu Jesús cuscara shara iishquin afu ipashquin. <sup>28</sup> Upa Diosin Cristohuunshon nantifi manifoti anoafu noco nanscarafosi oin. Uhuun caifo Israelifo yafi Israelifoma non yonomatifo yafi yonomatimafori non nocofunu yafi ainfofori nanscarafosi noco oin. Jesucristo noco Ifo icaino non ahuunoashu yora fusti cuscara itiro. Ascan nantifi icoinra huafotifin non ahuun yorafo. <sup>29</sup> Ascan man Cristo ahuun yorashu marifi man Abraham funafo itiro. Ascaino nantifi Upa Diosin Abraham yoiyoni cuscan matonnari itiro.

## 4

<sup>1-2</sup> Ascatan un mato afanan ahuara futsa mato tapimanon. Apa naano furunmun nantifi fitiro. Ascafia facu yosiyocuma iyoafofoan yonotirofo. Nantifi apana ahuunarifiacun non facu yonomati cuscara iyotiro iyoafoan yonmayotiro. Apan mai cushumisifoan facu pushco yonoyotirofo nan apan yoini cuscan ahuun fari nocoano pushcoaitian. <sup>3</sup> Nanscarifi aqui non Cristo Ifo huataima norifi non facu cuscara. Nocon shunifoan noco yonopaiyai cuscan noco yonoyopaoni. Ascashu non aton yonomati cuscara non ipaoni. Nan icoinra huamafoan amisifo cuscan noco nanscarifi huamapaonifo non aton yonomati cuscara inon.

<sup>4-5</sup> Ascatan Upa Diosin nan yoinitian Furun nichini noco cuscara cainon. Ainfoan shaqui murannoashu cainni. Moisés nocon yorafo yononi cuscan arifi nicapaoni. Ascafia nanrifi nuno mai ano oni nocon shunifoan noco yonopaoni cuscan non afanan ato yonomatifo cuscara itamarocon Diosin ahuun facu iyoafofo cuscara noco imanon. Nanscacufin mai ano oniquin. <sup>6</sup> Icon manfin natian Diospan facufoquin. Nanscacun ahuun Yoshin Shara nocoqui nichini ahuunshon nocon nomuranshon Dios yoitiro isca huaquin, —Upashtan minfin uhuun Upacoinquin, —ishon non yoitiro. <sup>7</sup> Ascacucui man afanan yonomatifo cuscarama. Natianfin man ahuun facufoquin. Ascan Upa Diosin ahuun facufo inain cuscan matorifi inanshquin. Jesucristohuunshon noco inain.

*Pablon Jesús icoinra huamisifo ato shinanni*

<sup>8</sup> Man iscapaoni Diosicoin tapiyoashuma. Ahuarafo diosicoinmafiacun nanfoan aton yonomati man ipaoni. <sup>9</sup> Man ascafiapaoni natian man man Dioscain onancoian. Ascan Upa Diosin finacoinquin mato onancoian. Man man Dios onanflashu ahuuscain afanan man ipaoni cuscan man afanan aton yonomatifo man ipaicain. Nanfoancai mato

imasharatiroma. <sup>10</sup> Maton shunifoan yononi cuscan man man afanan amisi. Ascashu man aton fusiti shafa fusicain fusiti oshuri fusicain fusititian fusicain aton fusiti fari nocoano atofu man fusimisiquin. Man shinanquin isca huaa, —Non fusititi atofu fusiaton Upa Diosin nocoqui unimatiro nocon chaca noco soashoniran, —ishon man fasi amaquiri shinanmisi. <sup>11</sup> Ascacun ¡Ai timafin! Un matohuunshon shinancoin. Un mato curushcain yonoshopaoni. Un mato Jesushuunoa tapimafiani unraca ipaitsi mato tapimapaoni.

<sup>12</sup> Uhuun yoramishtichin ua nicasharacapun. Uncai Moisés cununi cuscan afanan tanaima uhuun chaca soanon Dios fu ipashquin. Man Jesús icoinra huaitian Moisés cunushoni cuscacai afanan tanatama Jesús icoinra huaa cuscan urifi nansca huaa. Un Jesús tanai cuscan uhuunri caocahuun. Un matofu ipaoni chaincai man uhuunoa shinanchacapaonima manrocon ua shara huafafainpaoni.

<sup>13</sup> Un isinin iquin matoqui nocoi tauni. Upa Diosin ua nitun huani un mato Jesushuunoa yoinon. <sup>14</sup> Un isin chacacoin fuchifianocai man umaquin ipainima. —Pablon ahuun isin suyacoin. Noncai afu ichanainmaran, —mancai anori imisima. Ascataka man ua noicoimisi. Un mato yoiái cuscan man ua nicasharapaoni. Ascashon nan Diosin oinmati afu nai muran ica nan Jesucristocoin noia huaquin man ua shara huamisi manri ua fasi cushusharapaoni. <sup>15</sup> Un mato yosini cuscan man fasi unimacoinpaoni. Ascan ahuuscaimun natian man ipaoni cuscan man unimaimacai. Man man shinainmun man ua noipaoni. Un ahuaara yopaishta man ua inanpaoni. Asca atisharacun maton furo futsucumutan man ua inancuapaoni. <sup>16</sup> ¿Un mato icon yoifiamisimun non noincasmatanaincai?

<sup>17</sup> Moisés cununi cuscan futsafoan mato yosipaicani. Nanfoan amaquiri shinainfo cuscan fasi matori amaquiri shinanmapaicani man ato cuscara inon. Nanfoan apaiyai cuscacai matona sharama. Ascashon nanfoanri noco pashcanan huapaicani man afanan ua nicatamarocon nanfoan mato yosiafo cuscan man fasi ato tananon. <sup>18</sup> Ratoranfoan mato shara huaifoanno shara itiro. Un matofu iyamafiano mato shara huafori fasi sharacoin itiro. Jesushuunshon mato shara huafori sharacoin itirofo.

<sup>19</sup> Uhuun facufoan un fasi mato shinancoin. Ascacun un mato tapimai. Ainfo facu caiantaima isin muyotiro. Ahuun facu caishocai afanan isin mutiroma. Unimai. Nanscarifi aquin man Cristo tanasharacoinyamaiton un matohuunshon isin mutiro. Criston ahuun Yoshin Shara maton nomuran man nanucoianno afanancai un matohuunshon isin mutiroma. <sup>20</sup> Un tapiama ahuuscaquimain man afanan amaquiri shinaincain. ¡Ohuashta! Un matofu ipainon un mato yoipaiyai cuscan cunun yoitamarocon uficoin un mato yoicoinnon.

*Agar yafi Sara inifo cuscan atohuunshon ahuaara futsan yosini*

<sup>21</sup> Moisés cununi cuscan tanapaimisifoan afanan ua nicacahuun un mato yoinon. ¿Moisés noco cunushoni cuscan man tapiamamun? <sup>22</sup> Isca huaquin cununi. Abraham facu rafuya ini. Futsa ahuun yonomati futan facu ani. Nan futsa ahuincoin futan facu ani. Nan ahuincoincai tsoan yonomati inima. <sup>23</sup> Nan yonomati ahuun anu Agarcai yoshafotai inima. Nantifi facu cainmisifo cuscari ahuun facuri caini. Abraham ahuincoin yoshafoshtan facu nanutiroma. Ascafiacun Upa Diosin Abraham



yoiyoni isca huaquin, —Min ahuinin chipo furonanfacu nanushquin. Ascashu cainsharashquiran, —ishon inonpacoai cuscan yoiyoni.

<sup>24-25</sup> Diosin ainfo rafuhuunoa noco ahuara futsa yosipai. Ato shara huashononpacoai cuscan ato yoiyoni. Nanscarifi aquin yorafoti shara huashopai. Ascano Moiséshuunshon Israelifo yonopaiyai cuscan ato yononi. Ascashon machi ahuun anu Sinain anoshon ato yononi ahuun tsain tanasharanonfo. Moisés yononi cuscan tanasharapaifiacani tsoacai ascacoinmisima. Ascashu ahuun yonomatifo cuscara icafo. Nanfo Agar cuscarafu. Nanrifi yonomati ipaoni. Nan machi ahuun anu Sinain Arabiafoan anu futsa tuqui huanifo Agar huanifo. Agar ari icafo ahuun facufo cuscara. Nanfoan Moisés yononi cuscan tanapaifiaguicai anifoma. Ascashu nanfo ahuun yonomati cuscarafu. Nan pushurasi Jerusalén ano icafoan aton ahua cuscara.

<sup>26</sup> Ascafia Upa Diosin icari anuqui futsan Jerusalén funaran ishon anunifo. Nanri Sara cuscara yonomatima. Ahuun facufoficai yonomatima. Nan Jerusalén funafin nocon uhua cuscaraquin. Nonfin ahuun facu cuscaraquin. Non ahuun facufo icainocai non yonomati itiro. Moisés yononi cuscaricai nocon ifo itiro. <sup>27</sup> Nannori Diospan tsain cununi isca huaquin,

“Ainfon minfin toosmaquin. Min facuoma. Miacai facu isin huaiton min mumisima. Ascafia natian min unimatiro. Min oi ashcafinin unimaquin min ato yoitiro. Un chipo mato facu ichapa inanshquin. Nan ainfo yonomati facufoyafia mincaifin finacaia facu ichapayacoin ishquiran,”

ishon cununi.

<sup>28</sup> Ascatan uhuun yoramishtichin manfin Isaac cuscaraquin. Upa Diosin Abraham yoiyoni cuscan ahuun facu Isaac chipo cainni. Nanscarificai Upa Diosin yoiyoni cuscan man ahuun facufo iishquicai. <sup>29</sup> Nan yonomati Agar yoshafotaime ahuun facu Ismael cainni. Ascano nan toosma Sarapan chipo yoshafoshtafishon Diospan Yoshin Sharahuunshon Abraham facu nanumanano Isaac cainni. Ascafia Agar ahuun facu Ismael iyoafishon Sarapan facu Isaac fucash huaquin omitsisca hupaoni. Nanscarificai non Diospan Yoshin Sharahuunoashu non Diospan facufo icaino futsafoan Diospan facumafoan noco omitsisca huatirofo.

<sup>30</sup> Ascun Diospan tsain cunuquin isca huani, —Min facu Isaac un inanshquiain cuscaai Agarpan facun fitiro. Ascacun mato anoshon ahua yafi ato nichicahuun afanan matofu inonfoma, —ishon Upa Diosin Abraham yoini. <sup>31</sup> Ascacun norificai non Moisés yononi cuscahuunoashu non ahuun yonomatima. Noncai nan ainfo ahuun yonomati cuscarama. Nonfin ainfo yonomatima nan Sara ahuun facu cuscara. Non Dios icoinra huashu non tsoa yonomati itiro. Non ahuun facufo itiro.

## 5

### *Cristohuunoashu isharacahuun*

<sup>1</sup> Ascacun Cristo nocohuunoashu naani afanan Moisés cununi cuscan non tananonma. Ascatacai afanan cununihuunoashu ato yonomatima. Cristo fustihuunoashu non isharatiro. Ascacun Cristo cachiquiri huayamacahuun. Man ipaoni cuscan afanan ayamacahuun. Nocon shuni-foan cununi cuscan afanan afoqui nasoyamacahuun ato yonomatifo iishcaquima.

<sup>2</sup> Un mato yoiai cuscan ua nicasharacahuun. Manraca shinanquin isca huai, —Un foshqui rupa shatucuma uhuun chaca ua soashotiroma un Upa Dios fu nipanon, —ishonraca man shinan. Man anori shinaintocai Jesús mato chaca soashotiroma Upa Dios fu man nipanon. <sup>3</sup> Afanan un mato shafacafi yoipai. Ratoran futsa man foshqui rupa shatupaimun Dios fu nipashquin. Tsoan anori shinanquifin nan Moisés cununi cuscan tanacointama onanshta amaquri shinan tanashucaí Dios fu nipatiroma.

<sup>4</sup> Moisés cununi cuscan fusti man tanaiton maton chacafo soashotiroma. Ascashu man afanan Cristo fu rafuima. Upa Diosin matohuun ramapaifaino man man Cristo pota. Ascacuai mato ahusca huatiroma mato chaca soashona man afu ipanon. <sup>5</sup> Ascata. Diospan Yoshin Sharahuunshon man non tapia Cristohuunshon nocon chaca soatiro Diosin nocohuun shinansharanon. Nan non icoinra huamisi. <sup>6</sup> Non foshqui rupa shatu iyamarai shatuama nanscara rafu. Afoancai nocon numatiroma Cristo cuscara non inon. Non Jesucristo icoinra huashon non futsafo noicointiro. Nan fusti non yopai.

<sup>7</sup> Man Jesús tanasharayopaoni. ¿Ascan tsoan mato amaquri shinanmamun un mato iconcoín tapimapaoni cuscan man afanan nicasharanonma? <sup>8</sup> Diosincai mato anori yosiyama. Diosin mato yoimana Furun man icoinra huanon isharashquin. <sup>9</sup> Mato muranshon fustiton amaquri mato yosiaino nan fustihuunshon nantifi mato shinanchacamatiro. <sup>10</sup> Un Diosin cufifain Jesús icoinra huaiton marifi un shinain cuscan afanan shinanshquicain. Tsoan mato amaquri yosiquin fucash huaifin Diosin onaintimashquiquin.

<sup>11</sup> Uhuun yoramishtichin atirifiton man uhuunoa yoiqui isca huaa, —Nan Pablorigi yosimisiquin non foshqui rupa shatuamashucaí Diosin yononi cuscaai non aimaran, —ishon yoiafo. Ma. Ascaracaima. Uncai anori yosimisima. Un anori yoiaiton ua omitsiscamacuanafoma. Ascafia un yoimisi Jesucristo ihui coyan iquinanqui mastanifo. Noco nashonihuunshon nocon chaca soashonon Upa Dios fu nipanon ishon un yoimisi. Atirifi nan nicaquin ua omitsiscamamisifo. <sup>12</sup> Ascan futsafoan mato yoimisifo isca huaquin, —Man foshqui rupa shatuyamashocai man Dios icoinra huaimaran, —ishon mato shinanchacamamisifo. Nannori yoiqui mato fucash huamisifo. Afanan matofu iyamapainonfo.

<sup>13</sup> Uhuun yorafoan Jesucristohuunshon ahuun tsain fusti natian tanacahuun. Ahua futsan mato yonotiroma man yonomatifo inon. Ahua futsan mato yonoyamafiaiton chaca huayamaquin. Jesús mato numafiano, —Natian nofin apaiyai cuscan non huatiroran, —iyamacahuun. Ascan noinancahuun. Ahuun noiquin shara huacahuun. <sup>14</sup> Non yorafo ya noinanshu nantifi Diosin noco yononi cuscan non aicai. Diosin noco yononi isca huaquin, —Mafiri man musu huamuai cuscan nantifihuun noicoincahuun, —ishon cununi. Nan man ascaifin nantifi Diosin yononi cuscan man aicai. <sup>15</sup> Man nantifia noinanyamashu chaca huamisi man iquin. Ascan oinfain. Yoiti huamitsayamacahuun. Chaca huaa tananyamacahuun. Man ascainocai afanan ichananpaitirofoma. Ascashon Jesús cachiquiri huatirofo. Chaca huatanashu man funocointiro omitsiscashquin.

*Noco nomuran non chaca huapaimisi cuscan yafi Diospan Yoshin Sharahuunoashu non isharatiro*

<sup>16</sup> Ascan un mato yoi Diospan Yoshin Shara nicacoincahuun ahuunoashu isharashquin. Afin mato yoitiro raqui cacaimain man ahuuscaicain. Nicacoinshocai afanan man apaoni cuscan maton nomuranshon ahuara chaca huapaiquaicai man aquima. <sup>17</sup> Non nocon nomuranshon non chaca huapaiyai cuscacai Diosin Yoshin Sharapan anori shinantiroma. Ascashon ahuun Yoshin Sharapan noco amapaiyai cuscan noco nomuranshon non shinanchacafiain noncai ascapaitiroma. Nocon nomuranshon non shinanpaoni cuscaracai Diosin Yoshin Sharapan ahuun shinan cuscarama. Asca nofin non apaiyai cuscacai non huatiroma. Non chaca shinanpaoni cuscan non ayamaquin Diosin Yoshin Sharapan nocon nomuran yoia cuscan non nicacointiro. <sup>18</sup> Ascafia Diosin Yoshin Shara no fu rafuaino Moisés yononi cuscan afanan nocon ifo itiroma noco yonoshquin.

<sup>19</sup> Noco nomuran non shinanchacamisi cuscan nantifi shafacafi ointiro. Nan chacafo non tanashu non chaca huaquin isca huatiro. Furomacoin icain ahuara chacafosi nocon nomuran shinanfafaicami icain rafitama ahuinma fu icain ainfori ascarifi ainfono aton funumafo ya imisifo icain <sup>20</sup> Diosicoinma, —Nan uhuun Diosiran, —ishon yoifain shointi fusti tapifain noincasmamitsacain yoiti huaquisi futsafo pashcaquin futsafain futsafo finonmapaimisi icain ipaitama sinacucahuamisi icai afi apaiyai cuscan fusti shinanmisi icain tsain chipumisi icain tsoa futsacain noco cuscaramaran ishon yoifain futsafo noisharayamafain. <sup>21</sup> Futsan ahuara fianpaifain, rutumitsamisi icain, paunmisi icain, monoyanan pauncain nanscarafansifin chaca huacaniquin. Un mato yoyomisi cuscan oinfain. Ascara chacafocai Upa Diosin nantifi iquina ano nocotiro ma afu iishquin.

<sup>22</sup> Ascafiaicai Diosin Yoshin Shara noco Ifo icaino non chaca huatarocon non ahuunshon futsafo noicoitiro unimacoincain ointi isharacain ahuara ahuuscarafaino non shinanchacatama tunufain futsafahuun ramapaimisi icain shara huapaimisi icain yoia cuscacoin amisi icain. <sup>23</sup> Ahuara tapifiahuu afiri curanfia huamuyamacai tso fu iquinanpaiyamacai tsain tsii huafain yoimisi icain futsafahuun shinansharafain afin apaiyai cuscan huatama nan Diosin amapaiyai cuscan fusti huamisi. Diosin Yoshin Shara fustihuunshonfin asca huatirofoquin. Tsoa ascaicai afanan tsain futsan yopaima. Nan Diospan Yoshin Sharapan yonoa cuscan man aiquin. Ahuatocai afanan yonotiro ma. <sup>24</sup> Cristo Jesús ahuun yorafoan chaca huapaonifo cuscan ihui coyan iquinanqui man mastanifo aton chaca nantifi cuyonon. Jesús ihui coyan iquinanqui noco nashoni nocon chacafori afu mastai cafisca non a cuscara shara inon. Non chaca huapaoni cuscacai non afanan asca huapaima. <sup>25</sup> Natian non Diosin Yoshin Shara fu rafuaino nanto noco yoiai cuscan non nicasharatiro. Ascashu noco amapaiyai cuscan non anon.

<sup>26</sup> Ascatan non Diospan Yoshin Shara fu rafuashuca non cacapaimisi iyamacain oinmupaimisi iyamacain non itiroma. Man ascaquin futsafo man shinanchacamatiro. Ascara man chacafo shinainno man finononapaitiro. Ascara fin chacacoinquin.

## 6

*Futsafoya ashononantanacahuun*

<sup>1</sup> Uhuun yoramishtichin man futsan chaca huaiton oincaquin. Diospan Yoshin Shara tanasharacaquin ahuun ramapaiquin oí tsii huafain yoihuu chaca shatunon. Oinfain. Tsain curushu iyamacahuun. Mafiri man chaca huamutiroquin. <sup>2</sup> Nantifia noinantanacahuun. Cufishonantanacahuun. Futsan ahuun nomuran omitsiscaiton ahuun ramapaiquin ointi unimamacahuun. Ascashu cushunonacahuun. Futsan omitsiscaiton nan cufishocahuun Jesusquiri shinanmashquin tanasharanon. Man ascain nantifi Cristo yononi cuscan man ai cain.

<sup>3</sup> Ascano futsan yoiquin —Unfin fasi sharaquin. Uncai tsoa futsa yopaima ua Dios cufishonon, —ishon shinain. Nan cuscara yoracai ahuama. Afiri paramui.

<sup>4</sup> Ascacia nofin nocon nomuran non shinantiro non Jesús yonoshosharaimun. Ascan non yonoshosharai tapiashu non fasi unimatiro. Ascaquicai non shinanquin isca huatiroma, —Futsan chaca huai cuscaai un huamisimaran, —ishon non shinantiroma. <sup>5</sup> Nantififain non chaca huamisi. Ascashori nantififain nocon nomuran non shinantiro non amisi cuscan. Tsoa futsacai Diosin noco amapaiyai cuscan noco huamatiroma. Nofin non atiro.

<sup>6</sup> Tsoan mato Diosin tsain yosiaiton nan ahuara yopai cuscan inansharacahuun.

<sup>7</sup> Mafiri paramuyamacahuun. Tsoan Diosin tsain potashu, —Diosin ua yoiyai cuscan nanscanonquin, —icafin Diosin ato onaintimaiquin. Ahuara non fana nanscaracoin foaicun nan non fitiro. Nanscarifi aquin non Diosin tsain nicasharayamatan non chaca huashu ahuara chaca ahuuscaraino non omitsiscatiro. Ascanfia Diosin noco yoia cuscaicin ashu non ishara tiro. <sup>8</sup> Ascan tsoan ahuun nomuran shon shinanachafafainquin chipo chaca huatiro. Ascashu omitsiscain finacointiro. Ascano Diosin Yoshin Sharapan amapaiyai cuscan tsoan nan fusti afafainni nanfin Diospan Yoshin Sharahuunoashu nisharapacunaca.

<sup>9</sup> Futsafo shara huafafainquin unuyamacahuun. Ascashon isca huaquin shinanyamacahuun, —Mun imafifo shara huayomisi. Natian un ascaina. Afanan un asca huapaima. Nanscanonquin, —ishon anori shinanyamacahuun. Non ascain unuyamacun Diosin afi noco inantipaiyai noco inansharashquin. <sup>10</sup> Ascan ahuuscarafifoan oinquin nantifi shara huafafaincahuun. Finonmafain Jesús icoinra huafo shara huafafaincahuun.

*Pablonun Galaciafo yoini cuscan huafain ahuun tsain unutaqui tsain shara ato fomani*

<sup>11</sup> Natian ufoicin un mato cunushoni. Maficoicin oincaquin uhuun cunu funupafo. <sup>12</sup> Futsafoan mato yosipaicani. Nanfoan mato isca huamisifo, —Man foshqui rupa shatuyamashu Diosin yononi cuscan man aimaran, —ishon mato yoimisifo. Nanfoancai yoipaicanima, —Jesuscristo ihui coyan iquinanqui mastanifo noco nashonon. Nan fusti non yopairan, —ishoncai yoipaicanima. Ascashon shinanquin isca huacani, —Non yoiquin Jesús fustiton nocon chaca soashotiro. Ascan noncaihua futsa yopaimaran, —ishon. Non yoiaton noco omitsiscamatiro. —Ascacucaí non anori yoima noco omitsisca huanonfoma, —ishon yoimisifo. <sup>13</sup> Nanfo man foshqui rupa shatufiashucaí Moisés cununi cuscan tsoa ascacoinmisima. Ascashon matorifi shatupaicani ato cuscara man inon. Marifi nan huamisifo cuscan man aiton nanfoan futsafo yoitirofo, —Nafon nocon tanamisifoquin, —ishon yoitirofo.

<sup>14</sup> Unmain anori shinanpacuyamapainon. Unfin tsain shara fusti-huunoasi yoipaifafainicain. Nan fusti yoisharapaiqui un isca huai, —¡Aicho! Jesucristo ihui coyan iquinanqui ua nashoni. Ahuunshon fustifi un chaca shinanpaoni cuscan afanan uhuun ifo itiro. Jesús ua nashoaintian nantianrifi uhuun chaca futsa futsatapafo huapaoni cuscan nantifi nan chacafo afu mastani cuscaracoin. Afanancai ua ahusca huatiroma, —ishon un shinantiro. <sup>15</sup> Jesucristo ahuun yorashucai non foshqui rupa shatuyamacai non ai futsutiroma. Ascaracai ahuama. Nonricai sharatiroma. Non Jesushuunoashu fusti non shara itiro. Jesushuunoashu fusti non fiananansharacoin itiro. Nan fustiton noco imasharatiro. <sup>16</sup> Diosin Yoshin Sharapan Jesushuunoa noco yosia cuscan man acun Upa Diosin mato ointi unimamafain matohuun ramapai. Ascashu man Diospan yoracoin.

<sup>17</sup> Ascan uhuun tsain unutaqui un mato yoinon. Uhuun Ifo Jesushuunoashu un omitsiscamisi. Uhuun yoratisho toa ichaparasi oinquin man tapitiro un Jesús yonoshonaiton ua isca huamisifo. Ascacun afanancai tsoan ua fucash huayamacahuun.

<sup>18</sup> Uhuun yorafoan nocon Ifo Jesucristo matohuun ramapaiqui mato shara huafafaini. Nanscasi ipanon. Amen. Nanti.

Pablo

## Pablonun Efeso Anoafu Cunu Fomani

*Pablonun Jesús icoinra huafo Efeso anoafu cunu fomani*

<sup>1</sup> Unquian Pablo, Efeso anoafuan manfin Diospan yorafoquin. Man Cristo Jesús tanasharamisi. Un mato cunu fomai man tapinon. Diosin ua amapaiyai cuscan ua catonni un Cristo Jesús fu rafumisi inon. <sup>2</sup> Nocon Upa Dios futan nocon Ifo Jesucriston matohuun ramapaiqui matohu-unoa shinanquin mato shara huafafaini. Ascashon maton nomuran unimamanon.

*Non Cristo icoinra huaiton noco shara huafafaintiro*

<sup>3</sup> Non Cristo ahuun yoracun Upa Dios icarishon a cuscara shara noco imano ahuun ahuara sharafoti nocori inanshquin. Ascano nocon Ifo Jesucristo Apa Dios non yoinon, —Upa Diosin min fasi sharacoin. Non mia aicho huairan, —ishon non yoinon. <sup>4</sup> Mai oni huataima Jesucristo-huunshon Upa Diosin noco catonni ahuun yorafo non inon. Ascacun nantifi nocon chaca soashofain nan Furun cuscara shara non inon. <sup>5</sup> Noco huun noicoinquin afin apaiyai cuscan noco huani Jesucristo-huunoashu norifi non ahuun facufo inon. Nanscara afi fuchipaiyoni. <sup>6</sup> Diosin Furunhuun noicoincain noco huunrifi ramapai. Ascashon noco nimasharapacunaca. Ahua futsahuunoashucai noco huun ramapaima. Aficoi noco huun ramapai. Ascacufi, —Upan Diosin min sharacoinran, —non huaicai. <sup>7</sup> Jesús noco nashoni ahuun imi foyanan. Ascan nantorifi nocon chaca soashonano ahuunshon Upa Diosin noco rau huatiro non afu ipanon. Ascacun non tapitiro Upa Diosin fasi noco huun ramapaicain noco shinanquin finacoinmisi. <sup>8</sup> Non yopai cuscan onancoian. Ascashon Furunhuunshon noco fasi shara huafafaini.

<sup>9-10</sup> Ascano Upa Diosin afi apaiyai cuscacai tsoa tapimayonima. Ascafia noco tapimana noco huun ramapaiquin nocoqui Cristo nichini. Ascano Upa Diosin afi shinayoni cuscan Furun Cristo nan nichipaiyaitian afanan nichishquin nantifi ahuun yorafo nai murannoafu yafi mai anoafori ato ichanan huashquin Cristo arus fusti aton Ifo inon.

<sup>11</sup> Cristohuunshon Upa Diosin nocorifi catonni non ahuun yorafo inon. Nannori noco huunoa shinayoni. Afi apaiyai cuscacoin huashquin. <sup>12</sup> Ascano non Cristo icoinra huaquin tau huashon non yoiquin isca huanon, —Upa Diosin min fasi sharacoin. Min noco shara huamisi cuscan fasi sharacoin. Tsoa futsacai mia cuscara sharamaran, —ishon non yoinon. <sup>13</sup> Marifi man Israeliyamafishon Diospan tsain icocoin nicaquin man man Cristo icoinra huaa. Ascacun maton chaca soashona marifi ahuun yorafo man inon. Upa Diosin yoiyotiani cuscan huafain ahuun Yoshin Shara matoqui nichini mato onanti huaacoinshquin man ahuun yorafocun tapishquin.

<sup>14</sup> Ascano nonfin Diosinafoquin. Ahuun Yoshin Shara no fu rafuaiton non tapitiro ahua futsamain noco yoiyotiani cuscan noco inanshquicain. Ratoran shafatafi nan icari noco ihui oshquiquin. Nannoshon ahuara futsa noco yoiyotiani cuscan noco inanshquin. Ascano afanan Upa Dios non yoiquin isca huanon, —Min noco shara huacoinna. Min fasi shara finacoianran, —ishon non yoinon.

*Pablonun cufini cuscan*

15-16 Ascano nan un matohuunoa nicaquin tau huanitian man noco Ifo Jesús icoinra huashon man futsafo noicoinfafainaiton. Ascacun nan un cufiati un matohuunshon noco Ifo aicho huafafaini. 17 Ascan nan nocon Ifo Jesucristo Apa Diosifin nocon Upa Diosiriquin. Afin sharacoinquin. Nanscacun un cufifafainmisi ahuun Yoshin Sharahunshon man shinansharafain ahuun tsainri man tapisharafain finacoinshon man Jesús onansharanon. 18 Ascan un mato cufishoquin isca huafafaini, —Upan, aton nomuran cayacaficoin ato shinanmahuu mihuunoa tapisharanonfo. Ato tapimahuun min ato catonniqui mifu ipanonfo. Ascashon min yoiyoni cuscan nan mia icoinra huafoti min icaria tsoan oinyomisima cuscara sharacoin min ato inanshquinran, —ishon un mato cufishomisi.

19-21 Diosin ahuun curushhuunshon tsoan oinyomisima cuscara ahuanmamishti noco ashotiro. Nan ahuun curushpan Cristo naitian afanan funimani afu nai ariashu niaifocoin inon. Nan Upa Dios icarishon Cristo nantifi niaifofo finoncoian. Nan natian niyoafo yafi inonpacoaifori non nantifi mai anoa icafoti non nai muran icafotiri Jesús ato finoncoianquin.

22-23 Ascan Upa Diosin Furun yononi cuscan nantifi mai anoa manifoti yafi nai murannoafori ato iquinaquin. Ascashon Furun catonni nan icoinra huafoti aton niaifo inon. Nan icoinra huafotin ahuun yoracoin cuscarafocoin. Criston aton mapo cuscaracoin. Nocon mapon non shinantiro. Nan fustiton icoinra huafo yonotiroquin. Noco iquina ahuunshon fusti non atiroquin. Nocon mapomaisicai non nitiroma. Nanscarifi aqui nocon Ifo Jesusmaisicai tsoa nipatiroma. Nantifi icoinra huafo no fu ica. Ascashu no fu rafucacaini noco imapaiyai cuscan non anon.

## 2

### *Diosin nocohuun noiquin noco nimapacunaca non afu ipanon*

1 Ascafia mato chacahuunoashucai man Diospan yora ipaonima afu ipashquin. Ascagama maton chaca soashonataima yora naa cuscarafocoin. Omitsiscapanacafo muran man focuana. 2 Manfin chaca huapaoniquin. Nan icoinra huamafoan chaca huamisifo cuscan marifi man ato tanapaoni. Yoshin chacafo nai muran icafoan aton niaifo Satanás man tanapaoni. Nanton natian nan nicayosmamisifoan ato nomuran ato shinanchacamamisi. 3 Nantifi non nicayosmamisi cuscarari ipaoni. Non ahuaara chaca huapaiyai cuscan non huapaoni. Non chaca shinanmisi cuscarari non huapaoni. Upa Diosin nantifi nicayosmamisifo ato onaintimacoin omitsiscapanonfo. Norifi non ato cuscara chacacafia nan icaifo cuscan non aiton nocorifi onaintimacuana.

4-5 Non nocon chaca shatuataima non Diosimaqui ifiano Upa Diosin nocohuun fasi noicoincain nocohuun ramapai. Nan Cristo afanan funimani cuscan ahuunshon nocori funimatiro non afu funi cafiscashu non afu nipanon. Non ahuaara shara huaa rafanancai noco numaima non omitsiscapanonma. Diosin afin nocohuun ramapaicain noco cashman numa. Ascashon nocon chaca soashona non afu nipanon.

6 Upa Diosin Cristo funimanitian norifi non afu funini cuscaracoin afu nipashquin. Ascacun non afu rafuano Cristo Jesús Diosin icarifia norifi non afu ica cuscaracoin. 7 Ascan Jesucristohuunshon Upa Diosin nocohuun cashman ramapaicain noco noiquin finacoinshon noco shara

huamisi. Ascashon nantifi yorafo ismapacushquin fasi noco huun noiquin noco shara huamisi.

<sup>8-9</sup> Asca afanan un mato yoi. Non ahua shara huahuu rafanancai noco Diosin numaima non omitsiscapanonma. Diosin afi noco huun ramapaicoishon noco cashman numai noco chaca soashoshquin. Ascan tsoacai iscatiroma, —Ufin Dios shara huamisiquin. Ascashufi un Dios fu ipatiroquin, —ishocai tsoan anori yoitiroma. Ascata ma non Jesús icoinra huaiton Upa Diosin noco numatiroma non afu ipanon. <sup>10</sup> Diosin noco onihuani non Jesucristohuunshon yonosharashonon. Noco oni huataima noco amapaiyai cuscan shinanyoni non futsafo shara huashonon.

*Cristo nocon ointi shara huashotiro*

<sup>11</sup> Ascan mancai Israelifoma. Uhuun caifoan mato huunoa yoimisifo isca huaquin, —Nafocai nocon caifoma. Nonfin Diospan yorafoquin. Nanfocai Diospan yorafoma. Diosin noco yononi cuscan nantifi furo nanfacufo foshqui rupa shatupacunon ishon. Diosin noco yononi cuscan non aiton tapinonfo non Diospan yoracun. Caifo futsafocai foshqui rupa shatupacuafoma. Ascan non tapitiro afocai Diospan yoramara, —ishon uhuun caifo Israelifoan yoimisifo.

Ascan man Jesús icoinra huataima man ipaoni cuscan ointiaquimayamacahuun. <sup>12</sup> Shinacapon. Ipaoni mancai Cristo fu iyomisima. Upa Diosin Israelifo catonni cuscan huafainricai mato catoantaima man atofu ahuan yorafo inon. Ahuan yorafo yoiyotiani cuscan huafaincai mato yoitaima. Man shinanqui isca huamisi, —¡Ohua! ¿Non ahucatiromun noco chaca soashonon non Dios fu ipanon? —ishon man shinanpaoni. Nantianri man icoinra huafoma muran iyopaoni man Dios fu rafuyamacain man onanyopaonima. <sup>13</sup> Ascashon mancai Diosihuunoa shinanyopaonima. Ascacia Cristo Jesús mato huunoa shu naino ahuan imi foni man afu ipanon.

<sup>14</sup> Ascashu Cristohuunoa shufin non noinantiromaquin. Uhuun caifo Israelifo yafi mani futsafo noco nannorifosi shinanmasharatiroma non ahuanoa shu noinantanancaim afanan non noincasmatananonma. Ahuatoacai afanan noco amaqui imatiroma. Natianfin non Cristohuunoa shu yora fusti cuscarafuquin. <sup>15</sup> Ascano noco huunoa shu naino noco shunifoan noco yonofain noco cunushoni cuscaim afanan noco yonotiroma non Dios fu ipanon. Ascano Upa Diosin uhuun caifo Israelifo yafi mani futsafori ahuan yorafo noco imashquin non funa cuscaracoimfo non inon. Ascatan afanan non noincasmatananonma. Ascatarocon natian isharacoimnonfo. Nanscarafi Upa Diosin noco huamapai yora fusti cuscara noco imashquin. <sup>16</sup> Uhuun caifo Israelifo yafi mani futsafori Jesús ato ihui coyan iquinanqui nashoni. Nanscacun Upa Diosin nan rafu man ato raunan huua afanan afu isharanonfo. Ascashu noincasmatananyamacai yora fusti cuscara ato imanon.

<sup>17</sup> Ascano mani futsafoancai Diosihuunoa tsoan shinanyopaonima. Uhuun caifo Israelifoan Dioshuunoa shinanmisifo. Ascan Jesús nan noco rafuhuunoa shu mai ano oni ahuanoa shu non Dios fu ipanon. Ato yoipaoni isca huaquin, —Natian Upa Diosin mato rau huatiroma man afu ipanon, —ishon ato yoini. <sup>18</sup> Ascano Jesús noco nashonicun ahuan Yoshin Shara fustihuunoa shu Israelifo yafi mani futsafori Upa Diosiqui funonfo afu rafupacushquin.



<sup>19</sup> Ascacun mancai afanan yora futsafo cuscarama. Natianricai man afanan Dios onanmisima cuscarama. Natianfin man Diospan yorafoquin. Nan mani futsafori Diospan yorafoquin. Ascacun ahuun facu futsafofin maton yorafoquin. Manfin nanscarafosiquin. <sup>20-22</sup> Upa Diosin ahuun yorafofin nan pushu shara huamua cuscarafuquin. Non pushu tau huaquin quishi mutsisipacoin non yopatiro. Chipu nantifi pushun canofo non ichanan huatiro. Nanscarifi aquin Jesús fu rafumisifo futan Diospan tsain yoimisiforifi nan pushu cano shara cuscarafuquin. Pushu cano shara yamainocai non ahuuscashon fomancayan shara huatiroma. Nanscarifiai Jesús fu rafumisifo non Diospan tsain yoimisifoanri noco yoyamainocai non ahuuscashon icoinra huacuanama Diospan yorafo iishquin.

Ascano Cristo Jesusfin nocon pushu quishi mutsisipacoin cuscaruquin. Pushu quishi yamainocai non pushu huatiroma. Nanscarifi aquin Cristo yamainocai non Diospan yora icuanama. Ahuunoashufin nan pushu shara huamua cuscarafuquin. Nonfin nocon Ifohuunoashu pushu mutsisipacoin cuscarafuquin ahuashtacai chaca amuran iquitroma. Pushu yonomisiton ahuafo fitiro pushu huashquin. Nanscarifi aquin natian Upa Diosin icoinra huafoti ahuun Furunhuunshon noco nannorisi shinanmaino non ahuun pushu cuscarafuquin shara inon ahuun Yoshin Sharahuunoashu non afu iishquin.

### 3

#### *Diosin Pablo yononi mani futsafo Jesushuunooa yoinon*

<sup>1</sup> Uhuun yoramishtichin unquian Pablo un mato yoinon. Mancai uhuun caifo yamafiacun un mato Jesucristohuunooa tapimamisi marifi man Diospan yorafo inon. Ascaiton oinquin Jesús icoinra huamafoan ua cunu muran iquimanifo. Ascan matohuunshon ua iquimanifo. <sup>2</sup> Upa Diosin mato shinanfain matohuun ramapaiquin mato tapimapai. Ascashon ua catonfain matoqui ua nichini un mato yoinon. <sup>3</sup> Upa Diosin ua tapimayoni cuscacain tsoa futsan tapiyomisima. Matohuun noicoinquin ua nichini marifi man ahuun yorafo inon. Ascan nanfohuunooa un mato ichapama cunushoni. Nan man man nicamisi. <sup>4</sup> Ascan un mato cunushona cuscan oinquin un Cristohuunooa tapia cuscan huafain marifi man tapitiroquin. Tsoashta tapiyopaonima. <sup>5</sup> Ascacuai Diosin tsoa tapimayonima. Ascan natian Diospan Yoshin Sharahuunshon nan Jesús fu rafumisi sharafo yafi Diospan tsain yoimisi sharafori man ato tapimana. <sup>6</sup> Ascan nan tsain sharacai tsoan Jesushuunooa tapiyopaonima. Ascan mani futsafori Upa Diosin yorafo itirofo. Ascacun natian matorifi Diosin tapimai. Israelifo yafi mani futsafo Jesushuunoashu Diospan yora fusti cuscarafuquin. Ascano Upa Diosin uhuun caifo Israelifo yoyiotiani cuscan Jesucristohuunshon manifoti nanscarifi huaquin inantiro.

<sup>7</sup> Upa Diosin uhuun ramapaiquin ua catonni ahuun yonomati un inon ahuun tsain shara Jesushuunooa un ato yoinon. Ascashon ahuun curushu ua inanni manifoti Furunhuunooa un ato yoinon. <sup>8</sup> Shinancapon. Uncai ahuama. Nantifi Diospan yorafoan ua finoncoianfo. Ascafia Upan Diosin uhuun ramapaiquin ua catonni mani futsafo un tsain shara Cristohuunooa un ato yoinon. Aafi ahuun yorafo inain cuscan fasi sharacacoin. Tsoancai ascara shara oinyomisima. Cristo noco shara huaquin futsai cuscacai tsoashta tapiyomisifoma. <sup>9</sup> Upa Diosin nantifi

onihuanonpacoai cuscan afin tapiyoni. Tsoashtacai Jesushuunoa tapiatama. Ascacun ua catonni manifoti Furunhuunshon un ato yoinon. Upa Diosin ua tapimani cuscacai atirifi tsoa tapimayoima.

<sup>10-11</sup> Upa Diosin shinanquin tau huani cuscan nocon Ifo Jesucristo-huunshon ani. Natian Jesús icoinra huafokuunshon niaifofoan nai muran icafo futan ahuun oinmatifo nan a fu nai muran icafoanri ato tapimashquin. Ascan nicacashon yoishquin isca huaquin, —¡Aicho! Nocon Upa Diosin aca cuscan fasi sharacoin. Arus fusti nantifi tapicoian. Nanton ahumamishti huatiroran, —ishon yoishcani. <sup>12</sup> Ascashon non Jesús icoinra huashu non ranotama Diosqui otiro afu tsainshquin. Ascashon non tapitiro non aqui oaitocai noco potaima. Ascano ratutama non Dios fu itiro. <sup>13</sup> Ascatan un matohuunoashu omitsiscaitian shinanchacayamacahuun. Maton nomuran omitsiscayamahuu. Nan un omitsiscasi marifi man afu isharanon.

*Cristo nocoahuun noi*

<sup>14-15</sup> Ascan Upa Dios cufishquin un ratoconun mai chachimisi. Ascacun nantifi icoinra huafo nai muran icafo futan mai ano icafoan nocon Upaquin. Nonfin ahuun facufoquin. Ascacufin ahuunoashu nan Jesús icoinra huafo non anu yai futsutiroquin. <sup>16-19</sup> Un mato Upa Dios cufishoquin isca huamisi, —Upa Diosin, nan ahudara sharafon minaquin. Ascan nan mia icoinra huafo Efeso anofo min Yoshin Sharapan aton nomuran mutsismainifoanhuun min Furun Cristo icoinra huashu mifu rafufafainonfo. Min fasi atohuun noimisi cuscan huafain ato tapimahuun.

Ihui tapo sharano fana foaisharatiro cuscan Cristofin Efesofoan aton tapo mutsisipa cuscarquin. Asca nan min atohuun noia tapicanashu nanforifi isharatirofoquin. Cristofin aton ihui tapo mutsisipacoin cuscarquin ahuunshon futsafo noicoionfo. Upa Diosin Efesofo nantifi mia icoinra huafoan aton nomuran ato shinanmasharahuu Cristo atohuun noicoionmisi cuscan tapinonfo. Criston nantifi nocoahuun noicoionmisi cuscan non tapifiatiro fasi finacoinquin nocoahuun noicoion. Upa Diosin, un mia cufia cuscan nantifi Efesofo tapimahuun. Ascashon min ato imapaiyai cuscan anonfo nantishotapiquin mifu rafuciononfo, —ishon un mato Upa Dios cufishofafaini.

<sup>20</sup> Non Upa Dios nocon nomuranshon shinain cuscan non yocafiamisi atofin fasi finonmafain noco ashotiroquin. Ahuun curushhuunshon nocon nomuran mutsismainifoanna cuscan huafain ahumamishti noco ashotiro. <sup>21</sup> Ascacun non Upa Dios yoiquin isca huanon, —Upa Diosin, min fasi sharacoin. Min Furun Jesucristohuunshon min noco shara huamisiran, —ishon nantishotapiquin non yoifafainon. Nantifi icoinra huayopaonifo yafi natian icafo non inonpacoaifoanri Dios yoisharapanonfo. Nanscasi ipanon. Amen.

## 4

*Diosin ahuun Yoshin Sharapan shinain cuscari icoinra huafoan nan-norifosi shinanmisifo*

<sup>1</sup> Ascan un nocon Ifo yonoshonaiton ua cunu muran iquimanifo. Ascacun uhuun yoramishtichin ua nicasharacapun. Un mato cayacafi shinanmapai. Upa Diosin mato catonni man Jesucristo tanasharanon. Ascacun nan mato amapaiyai cuscan acahuun futsafoan mato oinquin nocon Ifohuunoa shinansharanonfo. <sup>2</sup> Ascashu, —Tsoa futsacai ua

cuscaramaran, —ishon shinanyamacahuun. Ascataमारोcon icoincain futsafohuun ramapaicahuun tsoa ahuuatama icahuun. Funaquima manasharacahuun. Futsan chaca huamisi cuscan huafaiton ahuun noiquin ahuun shinanchacayamacahuun. <sup>3</sup> Diospan Yoshin Sharahunshon Jesús icoindra huaa futsafo fu isharacahuun. Unimayanan isharatanacahuun. Nantishotapiquin nanscasi huatanacahuun.

<sup>4</sup> Ascano Jesús icoindra huafosi Diospan yorafoquin. Ascan nonfin ahuun caya muma cuscarafuquin. Diosin ahuun Yoshin Shara fustiton. Afin noco cuna non Jesús icoindra huacun noco imapaiyai cuscan non tapia. Noco yoiyotiani cuscan Cristo oaitian noco inanshquin. Nan fustifin non manasharamisiquin. <sup>5</sup> Nanfin nocon Ifo fusti. Nan fusti non icoindra huaiton noco nimapacutiro. Non unu muran iquimamushon non yorafo ismano Upa Dios ahuun furumun Yoshin Shara fustiton noco iquitiro. <sup>6</sup> Nocon Dios fustifin. Nan icoindra huafoan nocon Upaquin. Arus fustitofin nantifi noco iquimisisiquin. Ascashu nantifi non ahuuna inon noco amapaiyai cuscan non anon. Nantishotapiquin nantifi nocofu rafucacaini. Aafin nantifiton nocon niaifo fustiquin. Ahuunoashu fusti nantifi non itiro.

<sup>7</sup> Ascafiata Criston nantifi nan non icoindra huafoti afi futsa futsa huaqui noco imapaiyai cuscan huafain noco ima non ahuunshon icoindra huashon futsafo non shara huanon. <sup>8</sup> Ascano Diosin tsain Cristohuunooa cununi isca huaquin,

“Mai anoashu Apa Dios ari nasonitian nan icoindra huafoti ato numani afanan Satanás aton ifo inonma. Ascata Jesús tanasharanonfo. Nantianri nantifi ahuun yorafo imapaiyai cuscan ato imani ahuunoashu shara huatananonfo,”

ishon cununi.

<sup>9</sup> Ascashon cunuquin isca huani, —Cristo afanan Apa Diosin icari nasoiran, —ishon aqui cununi. Nannori cununi non tapitiro Apa Diosin ari cataima iquisi na mai ano fotoyoni noco cuscara iishquin. Ascashu fasi omitsiscayoni. <sup>10</sup> Apa ariashu mai ano fotoyoni. Nanton nai ari icafo yafi mai anoafori ato finoinnifoanna. Ascatan nan nai ariafo futan mai anoafoan ato ifo iishquin.

<sup>11</sup> Nantonfin noco catonpacuni noco amapaiyai cuscan ashu non shara huatananon. Ascashon afu rafumisi futsafo ato imafain nocorifi nichini ahuunooa futsafo non ato tapimanon. Futsafori catonni afin yorafo yoipaiyai cuscan afohuunshon ahuun tsain shara ato yoinon. Futsafori catonni nan tsain shara ahuunooa yoinonfo icoindra huashcaquin. Futsafori catonni ahuun tsain shara icoindra huafo tapimafain ato cushusharanon ahuun tsain tanasharanonfo.

<sup>12</sup> Nantonfin nantifi ahuun yorafo itisharamanaquin ahuunoashu shara huatananonfo. Ascacufin finonmafain non Jesús tanasharaquin. Nofiri non pimamuaino nocon caya mutsisipa sharacoin itiro. Nanscarifiai non futsafo fu shara huatanaino Dioshuunoashu non mutsisipa sharacoin Jesús cuscara non itiro. <sup>13</sup> Ascano nannorisi non icoindra huafain non Diospan Furunhuunooa tapinon. Ahuunooa tapitacai non afanan facu cuscara itiro. Nan nocofunu mapo shara ya Jesús cuscaracoin non itiro. Ascashu nan Cristo noco imapaiyai cuscan sharacoin non itiro.

<sup>14</sup> Non ascatacai facufo cuscara afanan non itiro. Futsan facufo ahuafo yoiaiton icoindra huatiro. Futsan ato yosiaiton icoindra

huafain futsari chipo ahuarafu yoia cuscan nanforifi icoinra huatirofoquin. Ascashon futsa futsatapafu icoinra huatirofo. Ascacun noncai paramisifoan noco yosipaiyaifo cuscan non icoinra huatiroma. Noco yoicaquin, —Un mia icon yosiaran, —ishon noco yoipaifaiifoan Diospan tsain anorimacun noncai ato icoinra huatiroma. Noco fuparapaicani. <sup>15</sup> Noncai ascarama. Ascata ma nan icoinra huafu futsafu noicoquin non ato icon fustisi yoitiro. Non ascafin finonmafain nocon Ifo Cristo cuscara non icacainicain. <sup>16</sup> Ahuunoashu non ahuan caya muma cuscara itiro. Afin catontiro nonmain ahuan cuscaraquin. Ahuan curushuunshon afin noco amapai cuscan non atiro shara huan tananshquin. Non noinainno non shara huan tanantiro.

*Cristohuunoashu non yora funa shara itiro*

<sup>17</sup> Ascano nocon Ifohuunshon un mato shafacafi yoinon. Icoinra huafu icafo cuscan afanan ascayamacahuun. Nanfoanfin ipaitisi chaca shinanmisifoquin. <sup>18</sup> Ascashu yoitimashunifo. Aton nomuranshocai shinansharatirofoma Diosin ato imapaiyai cuscan aashcaquin. Afocai afu rafumisifoma ato nimapacunon. <sup>19</sup> Ahuara chacafosi huai fuyacanashucai afanan tsoa rafipaitiroma. Nanscaisai fuyafu, —Nanscanonquin. Ahuara chaca finonpaiquin finonon, —ishon anori fusti shinanmisifo. Chaca fustisi shinancani. Nocofunufu aton ahuanma fu imisifoquin. Nanscarifi ainfofo aton funumafu fu icaifono. Nanscara chaca futsa futsatapafu huamisifo. Tunuyamacaicani. Fasi finonmafain chaca huapaicani.

<sup>20</sup> Nanfoanfin nansca huamisifoquin. Ascafia Cristocai mato anori yosimisima. <sup>21</sup> Ascata ma Jesushuunoa mato ahuan tsain iconcoin yosaiton man man nicamisi. <sup>22</sup> Ascano mato yosimisi isca huafu, —Marifi man man chaca huapaoni. Chaca fustisi man fuchipaipaoni. Nan chacafu mato parafafaini. Afanan afo fuchipaiyamahuun. Afo potacoincahuun, —ishon mato yosimisi. <sup>23</sup> Ascacun man shinanpaoni cuscan afanan shinanyamacahuun. Natian shinansharacoinpacucahuun. Jesús shinain cuscan huafain maton nomuran marifi shinancoincahuun. <sup>24</sup> Diosin sharacoin fusti cuscara funa shara icaahuun. Jesús mato nashoni maton chaca soashonano Upa Dios cuscara shara man inon.

<sup>25</sup> Nonfin Cristo ahuan yorafuquin. Ascacun afanan chaniyamahuun. Mato fu icafo icon fustisi yoifafaincahuun. Non icoinra huafu fin Cristo ahuan caya muma cuscaraquin. Ascano noco murannoashu futsa chanicun ahuanshon nantififain non mutiro. <sup>26</sup> Man mua sinai matsiriscacahuun. Man ascayamaino man chaca huatiroquin. Ascacun fari cataima matsicahuun. <sup>27</sup> Man sinai unuyamacaiyaton Satanás mato yonotiro. Man sinafiai matsiriscaitocai mato chaca huamatiroma.

<sup>28</sup> Ratoran futsan mato murannoashu yomutsoaiton a yoisharacahuun afanan yomutsononma yonoquinsharacahuun ahuan rafanan fiishcaquin. Ascan nan ahuara futsa yopaitonfin man inantiroquin.

<sup>29</sup> Ahua chaca yoitamarocon shara fustisi yoifafaincahuun. Man ato yoiaiton nicashon futsafu non nan tsain shara nicaquin nocon Ifo finonmafain tanasharatirofo. <sup>30</sup> Diospan ahuan Yoshin Shara matoquin nichini matofu rafupacunon Jesucristo oaitian afu man ipanon. Ascacun ahuanshon tapitirofo non Diospan yorafocun. Ascano man natian icai

cuscan aquin Diospan Yoshin Shara ahuun nomuran omitsiscamaya-macahuun.

<sup>31</sup> Ascacun futsafohuunoa shinanchacayamacahuun. Tsain isininpaton iyamacahuun. Sinayamacahuun. Sinacani mucayamacahuun. Futsa roayamacahuun. Chaca futsa futsatapafu shinanyamacahuun.

<sup>32</sup> Ascatarocon mafin ranan noinancahuun. Nantifihuun ramapaicahuun. Upa Diosin Cristohuunshon mato rauhua cuscan huafain nanscarifiai rau huatanancahuun.

## 5

### *Ahuuscamain Diosin facufo atirofoquin*

<sup>1</sup> Manfin Diospan facufoquin. Fasi mato noicoïn. Ascacun Upa Diosihuun caocahuun. <sup>2</sup> Cristo nocohuun noicoïnquin noco nashoni nocon chaca soashoshquin. Upa Diosin ahuun facuhuun fasi noicoïnfi unimani futsafohuunoashu naiton oïn. Ascano Criston noco noimisi cuscan marifi nantifihuun noicoïnfacufoquin.

<sup>3</sup> Ascano ahuara chaca shinanyamacahuun. Ainfofoan maton funuma fu iyamacahuun. Nanscarifiai nocofunfoan maton ahuinma fu iyamacahuun. Ascatari yora futsan ahuun ahuara fianpaiyacahuun. Diospan yorafocai ascatirofoma. Ascaraya tsainyamacahuun.

<sup>4</sup> Ascariwatan tsain mutsama iyamacahuun. Cashu mutsamayamacahuun. Diospan yorafocai ascaraya tsaintiroma. Ascata Dios yoisharatirofo isca huaquin, —¡Aicho! Upa Diosin min noco shara huafafainiran, —ishon yoitiro. <sup>5</sup> Natian un mato yoiai cuscan man

icoïnra huatiro. Ratoran futsan shinanchacamisiton ahuinma fu icaino ainfofoi nanscarifiafono funuma furi icain yora futsana fipaimisi. Nan yora futsana ahuara fianpaiquin nan Dioscoïn fuchipaitama ahuara futsahuunsi nuuquin nancai fuchipaifaini. Afanan un mato shafacafi yoi. Tsoan chaca huaicai Jesucristo Apa fu icari nocotirofoma. Nan Jesús niaifo icaricai ahua chaca afu itirofoma. Ascaran chaca huamisifocai Cristo icari noconacafoma. <sup>6</sup> ¡Oïnfain! Atrifoan mato amaquri yosi-

paicani isca huaquin, —Nanfoan chaca huafiacanifin Dios niaifo ari afu ipatirofoquin, —ishon mato yoipaicani. Ascacun oïnfain mato paracani. Chaca futsa futsatapafu huaquin shatuyamaïfoan Upa Diosin atoqui sinai. Yoitimaïfoan oïnquin. Ato omitsiscapanacafu muran potashquin. <sup>7</sup> Ascan icaïfo cuscan ayamacahuun. Ato fu rafuyamacahuun mato chaca huamatirofoquin.

<sup>8</sup> Nan acaïfo cuscan marifi man chaca huayopaonifiashon natian man Diospan facufo. Ascashu ahuunoashu shafacafi isharacahuun. <sup>9</sup> Ascano Cristo matofu rafuaino icoïnsharacahuun. Maton nomuranshon caya-cafi shinansharacahuun. Diosin ica cuscan marifi icoïnsharacahuun. <sup>10</sup> Diosin fuchipaiyai cuscan huafain tapisharacoïncahuun. Nanscacoïn acahuun. <sup>11</sup> Nan Jesús icoïnra huamaïfoan chaca shinainfo cuscan atofu chaca huatananyamacahuun. Ascatarocon icoïnsharacuïfin a chaca huaïfo man ato oïnmacoïntiro.

<sup>12</sup> Ascan chaca huaïfo cuscarahuunoa tsainyamacahuun. Nan chaca huaïfo cuscan yoiquïfin marifi man chaca huatiroquin. Ascashu man rafipaitiro. <sup>13-14</sup> Faquish muran chashamashon non oïnsharatiro. Nanscarifi aquin yoran chaca huashon fomanpaïfaiaton Diospan tsainhuunshon aton chaca shafacafi tapitirofo. Ascano Diospan tsain yoini isca huaquin,

“¡Oinfain! Man Diosihuunoa shinanyamai man naa cuscara-coinfo. Afanan ascayamacahuun. Oshapacui cuscara iyamacahuun. Funinfoancahuun. Maton chaca shatucahuun Diosihuunoa shinashcaquin. Man ascaiton Criston maton chaca soashofain shafacafi mato oinmatiro Dios man tanasharonon.”

<sup>15</sup> Ascacun ¡Oinfain! Icoinsharacahuun. Diospan tsain tapiafoma cuscara iyamacahuun. Nan Diospan tsain cununi cuscacoin acahuun.

<sup>16</sup> Ascano natiantan nan icoinra huamafoan fasi ahuara chaca finon-quin finocoincaini. Ascacun nan man oiaini Dioshuunshon futsafohuun ramapaiquin ato shara huacahuun ato yoisharacoinfafaincahuun.

<sup>17</sup> Ascacun amaquiri shinanyamacahuun. Ascatarocon Diosin mato amapaiyai cuscan nan fusti tapicahuun.

<sup>18</sup> Ascashu paunyamacahuun. Pauncacaini man fasi chacacoin itiro. Pauncaquimarocon Diosin Yoshin Shara fu rafucain yonoshosharafafaincahuun.

<sup>19</sup> Ascatan Diospan tsain shara ichapa yoinonancahuun. Nocon shuni David fanain ini cuscan fanaincahuun. Diosihuunshon futsafo fanainshocahuun.

Maton nomuranshon nocon Ifo shinancahuun. <sup>20</sup> Ahuara ahuuscarafaiton nocon Ifo Dios yoiquin isca huafafaincahuun, —¡Aicho! Noco Ifo Diosin, min ua shara huafafainiran, —ishon Upa Dios yoifafaincahuun. Nocon Ifo Jesucristohuunshon anori Upa Dios yoifafaincahuun.

### *Ainfofo yafi aton funufohuunoa*

<sup>21</sup> Cristo nicasharapaifain mafi rananri nicanonancoincahuun. Nantifi icoinra huafo ya asca huatanancahuun.

<sup>22</sup> Ainfofoan man maton Ifon Jesús nicai cuscan huafain maton funuri nicasharacoincahuun.

<sup>23</sup> Nan icoinra huafoan nocon Ifofin Jesucristoquin. Nanton noco iquifain noco cushushara. Nanrifi nocon Numamisi. Nanscarifi aquin Diosin noco-

funufo yononi aton ahuinfo iquisharafain ato cushusharanonfo. <sup>24</sup> Nan icoinra huafoan Cristo nicacoianfo cuscan nanscarifi aquin ahuinfoan aton funufo nicacointirofo.

<sup>25-26</sup> Ascán nocofunufaan maton ahuinhuun noicoíncahuun. Cristo noco noiai cuscan huafain maton ahuinhuunri noicoíncahuun. Non icoinra huafoti nocohuun noicoín Criston omitsiscacain noco nashoni nocon chaca soashoshquin ahuun yorafo non inon. Non ahuun tsain icoinra huaiton noco catonni nan chaca huayomisima cuscara noco imashquin.

<sup>27</sup> Non ascaiton ahuutiaran nocoshon noco oinshquin non ahuun shinanshara cuscaracun. Nantifi noco chaca soashoshquin. Ascano tsoancai noco yoantiroma Jesús noco imasharano. Ascano Diospan yora sharafo Jesús noco oinshquin.

<sup>28</sup> Nan mafiri man musuhamuai cuscan maton ahuinfori cushusharacahuun. Tsoan ahuin noisharashofin afiri noimuaquin.

<sup>29</sup> Shinancapon. Tsoacai afiri chaca huamumisima. Non nofiri musu huamutiro. Fonainquin nofiri non pimai. Nanscarifi aquin Jesús ahuun yorafo cushusharamisi.

<sup>30</sup> Ascán nonfin ahuun yoraquin. Upan Diosin Furun cushua cuscan huafain nocorifi Furunmun cushusharamisi.

<sup>31</sup> Ascano Diosin tsain cunuquin isca huani,

“Ascacun nocofunun ainfo flashucaí afanan apa yafi ahua fu

itiro. Apa yafi ahuamaqui pashcatiro ainfo fii. Ascashu nan oshati fusti muran afu itiro. Ascano nan fusti cus-

cararan,”

ishon cununiquin. <sup>32</sup> Nan na rama un mato Diosin tsain yoia cuscan tsoancai atirifi tapitiroma. Ascafia nan un mato yoia cuscan un Cristo yafi nan icoinra huafohuunoa un yoi. <sup>33</sup> Ascafiahu funufoan mafiri man noiai cuscan maton ahuinfohuun noicoincuahuun. Ainfofoan maton funufohuunoiari shinansharacoincuahuun. Aqwi tsain chipuyamafain ato nicasharacoincuahuun.

## 6

<sup>1</sup> Facufoan maton upa yafi uhua nicasharacoincuahuun. Nocon Ifon Diosin yononi cuscan maton upa futan uhuan mato iquina. Ascan man ato nicasharacoianshu marifi man icoinsharatiro. <sup>2-3</sup> Ascashon Diosin Moisés yononi yorafo cunushoquin isca huanon,

“Maton upa yafi uhuahuunoa shinansharafain ato nicasharacoincuahuun. Atohuunoa yoisharacahuun,”

ishon cununi. Nan Diosin yonoquin tau huafain yoiyotiani isca huaquin,

“Upa yafi uhua man shara huacun urifi un mato shara huai.

Nuno mai anoashu man unimayopacunon,”

ishon Diosin yoiyotiani.

<sup>4</sup> Natiantan un apafori yoisharapai. Maton facufoqui tsain chipuyamafain curushcain yoiyamacahuun. Man tsain isininpaton ato yoiaino matoqui sinatirofo. Asca huaquimarocon ato tapimasharacahuun chaca huanonfoma. Nocon Ifon Jesús noco huun noiai cuscan maton facufo yosisharacahuun noco Ifo tanasharanonfo.

<sup>5</sup> Yonomatifoan maton ifofo nicasharacoincuahuun. Nuno mai anoshon maton ifofoan mato yonotirofo. Maton Ifo Criston fuchipaiyai cuscan man samamashta ashoriscapaitiro. Nanscarifi aqwi maton ifon nantori mato yonopaiyai cuscan shara huashoriscacahuun.

<sup>6</sup> Maton ifoan mato oiainnosi yonoshonsharaquima matohuunoa shinansharanonfo. Mato oianmafiaifono unimacai ato yonoshosharacahuun. Man ascaiton oin unimanonfo. Man mato ifo yonoshosharaquifin nan noco Ifo Criston yonoshoshara man huaicain. Ascan nan nuno mai anoashu mato ifo fusti man unimana cuscan huafainri noco Ifo Diosin mato amapaiyai cuscan ashocahuun. Ascashu noco Ifo Jesús ahuun yonomati iishcaquin. <sup>7</sup> Ascan mato ifofo fasi unimacain yonoshosharaquifin nan noco Ifo Dios man fasi unimacain yonoshoshara cuscan. <sup>8</sup> Ascan man man tapia yonomatifo iyamarai oinmatifomari nan yonoshosharaifoan nocon Ifo Jesús ato inansharacoinsquin.

<sup>9</sup> Nanscarifi aqwi ifofoan maton yonomatifo shara huafain ato omismati huayamacahuun. Man man tapia aton Ifon Jesús nai murannoashu nanrifi maton Ifo. Jesús noco oin nanscarafosi yonomatifo yafi ifofori atocai futsa ichapama noifain futsa fasi finonmafain noima. Ascatama nanscarafosi huaquin nantifi noco huun noiaquin.

*Criston nan icoinra huafu noco itishara huaa noco noicasmaifoan noco ahuusca huanonfoma*

<sup>10</sup> Ascano uhuun yoramishtichin uhuun tsain unutaquin un mato yoinon. Nocon Ifo fu rafucahuun ahuun curushu mato inannon. Man ascaifi ahuunoashu man mutsisipa shara itiroquin nan tanasharashu. <sup>11</sup> Un ahuara futsahuunoa un mato yoi man tapisharanon. Ranushu-muafo aton niaifoan ato yonotiro itisharanonfo futsafoan ato ahuusca huanonfoma. Ascashon nan yopaifo cuscan ato inantiro. Aton ashi

yafi piafo non ahuun cuno maiti inanfain ahuun cuno shofucumuti sahuufain ahuun cuno sapa ponutamucai ashin iquinonma. Nanscarifi aquin Upa Diosin mato inanpaiyai cuscan nantifi ficahuun yoshin chaca Satanás mato chaca huamapaiyai cuscan aashquima. <sup>12</sup> Non Jesús tanasharaitocai yorafoan noco unumatiroma. Ascatama nan yoshin chaca Satanás yafi yoshin chaca futsafoanri noco curushcain chaca huamapai. Nanfo non oinyamafiatiro noco asca huapaifafaini. Nanfoan icoinra huafoa yonofafaini chaca huanonfo. Nan yoshin chaca icha-pafoan.

<sup>13</sup> Ascacun Upa Diosin ahuun curushu noco inanpaiyai cuscan ficahuun mutsismashcaquin yoshin chacafoan matoqui nocoshon man itisharashu pacushcaquima. Ascano nan yoshin chacafoan mato chaca huamapaiyaiton Diospan curushhuunshon man finontiro mato chaca huamanofoma. Ascan Diosin mato amapaiyai cuscan nantifi man acoinnashu man isharatiro yoshin chacafo matomaquinoa potashcaquin. Asca Jesús fu rafushon man chaca huashquima.

<sup>14</sup> Mato yoia cuscan ranushumuafo itishara cuscan marifi itisharacahuun nan yoshin chacafo matoqui nocoshon mato chaca huamapaiyai cuscan huashquima. Upa Diosin mato imapaiyai cuscan fusti acahuun itisharashcaquin. Iquisi ranushumuafo ato nanushumuti yopacani aton camisa nonoaino pacushcaquima. Nanscarifiai man icocoiaino yoshin chacanun mato pacumatiroma. Ranushumuafoan ahuun cuno sahuuti shofucumua sahuumisifo nan noicasmaifoan aton ashin ahuun ointiqui tsacanoma. Marifi Diosihuunoashu isharacahuun yoshin chacafoan maton ointi chaca huanonma. <sup>15</sup> Ranushumuafo aton sapato shara sahuutirofo aya ichosharashcaquin ahuashta puamashquima. Nanscarifiai marifi itisharacahuun futsafoqui nocoriscashon Diosin tsain shara man ato yoiaino aton ointi unimanonfo.

<sup>16</sup> Ascan ranushumuafo sapa nituhuati pia yafi ashi iquinonma tso-matiroma nan noicasmaifoan aton piannonma. Nanscarifiai maton nitumati man yopai. Man noco ifo Jesús icoinra huaiton nan yoshin chacafoan maton nomuran shinanchacamapaiyai cuscacai man atiroma. Ascano non Jesús icoinra huaino nan nocon nituhuati cuscara itiro.

<sup>17</sup> Ranushumuafoan ahuun cuno maiti sahuutirofo aton mapo cushusharashcaquin nan noicasmaifoan ato mapoqui ahuusca huanonfoma. Nanscarifiai marifi man Jesús icoinra huashu Upa Dios fu man nipatiro. Man ascaitocai yoshin chacanun mato ahuusca huatiroma. Ranushumuafoanri aton nopo fitirofo nan ato noicasmaifo ahuun rutushcaquin. Nanscarifiai Diospan Yoshin Shara ahuun nopo cuscara ficahuun. Nan nopo cuscarafin Diospan tsainquin. Nanrifi man yopacoin nan yoshin chacafo matoqui nocotima huashcaquin.

<sup>18</sup> Ascacun Diospan Yoshin Sharahuunshon Dios unutama cufifafaincahuun. Aqini mutoi futsucaquima. Ahuara futsa ahuuscarai cuscan Upa Dios cuficahuun. Ointiaquimacaquima. Upa Dios cufifafaincahuun. Nantifi Jesús icoinra huafo ato cufishofafaincahuun.

<sup>19</sup> Ascashon uarifi cufishocahuun Diospan Yoshin Sharahuunshon ahuun tsain shara ranotama un ato yoifafainon. Nan uhuun caifomafohuunoashuri Jesús ato nashoni un yoinon. <sup>20</sup> Ascashon nan un mato yoiaicusan huafain un yoimisi. Ascacun Cristo ua nichini ahuunshon nantifi yorafo un yoifafainon. Ascacun ua cunu muran iquimanifo.



Ua Upa Dios cufishocahuun un ranotama Diosin atohuun noiai cuscan huafain un ato yoinon.

*Pablonun tsain shara ahuun unutaquin Efesofo ato fomani*

<sup>21</sup> Ascan nocon yorahuan Tiquicohuun un fasi noicoin. U futan nocon Ifon Jesushuunoa yonoshomisi. Ascacun Tíquico un mato ari nichishquin. Un icai cuscan huafain urimain ahuuscaiquin mato nanto tapimai. <sup>22</sup> Ascacufin un mato ano nan nichicai nonmain ahuuscaicain matorifi tapimafain maton ointi unimanon.

<sup>23</sup> Ascano nocon Upa Diosin futan nocon Ifon Jesucristo maton ointi unimanon Jesús icoinra huashu man nantifi noinain futsutiro. <sup>24</sup> Man nocon Ifon Jesucristo nantishon tapiquin man ahuun noi unupacuyamaino Upa Diosin nantifi matohuun ramapai. Unquian Pablo un mato cunushoni. Nanscari inon. Nanti.

Pablo

## Pablonun Filipos Anoafu Cunu Fomani

*Cunu muranshon Pablonun nan icoinra huafo Filipos anoafu cunu fomani*

<sup>1</sup>Uhuun yoramishtichin Filipos anoafuan manfin Diospan yorafoquin. Un mato yafi mato niaifofu non mato cushumisifori cunu fomai man tapinon. Timoteo natian ufu nuno. Nantori mato yoisharapai. Ascan nonfin Cristo Jesús ahuun yonomati rafuquin. <sup>2</sup>Nocon Upan Dios futan nocon Ifon Jesucristo matohuun ramapaiqui matohuun shinansharaicai mato shara huafafainpainon. Ascashon maton ointi unimamapainon

*Icoinra huafo Pablonun ato cufishofafainpaoni*

<sup>3-5</sup> Un mato fasi shinain. Nan un matohuunua shinaintifi unimacain un mato Upa Dios cufishomisi isca huaquin. —¡Aicho! Uhuun Upan Diosin, Filiposofoan min Furun icoinra huaquin tauhuanifotian yafi natiantan u futan min Furunhuunua futsafo tapimapaifafaincaniran, —ishon un matohuunua Upa Dios cuffafaini. <sup>6</sup>Ascano un icoinra huai man Jesús Ifo huaquin tau huanitian Upa Diosin maton ointi fianananshara huani cuscan natianrifi shafatifi mato fiananan huariai cuscan nan Jesucristo oaitian man nanscasi anon.

<sup>7</sup>Ascacun un fasi matohuun noiquin. Uhuun nomuranshon nannori un mato shinanfaini. Upa Diosin noco shara huamisi cuscan marifi man man u futan mumisi. Ascacufin ua cunu muran iquimaifotian Upa Diosin ua shara huafain uhuun ointi ua shara huashoni. Nan uhuun ointi ua shara huashoan cuscan marifi man man muumisi. Ascan futsafoan Jesushuunua amaquiri yoifaiton un amaquiri aton yositamarocon shafacaficoi un ato yoi tapisharanonfo. Un ato yoimisi isca huaquin, —Jesús noco nashoni nocon chaca soashonano non afu ipanon, —ishon un ato cayacafi yoinon. Upa Diosin ua shinansharamani marifi u futan un muai cuscan man munon. <sup>8</sup>Jesucristo nocohuun noi ai cuscan huafain urifi un matohuun noi. Ascacun un mato fasi shinain. Urifi un matofu ipaicoinquin. Un icon yoiai cuscan Diosin ua onancoian.

<sup>9</sup>Ascacun un mato cufishoni man Dios onancoinfain ahuara iconcoin fusti man tapisharaquin finacoinshon futsafo man noicoinnon. <sup>10</sup>Ascashon man tapitiro ahuamain shara iyamarai chacaquin. Ascano man Jesús fu rafuashu nan cuscara sharacoin man itiro. Tsoanshtacai matohuunua ahua chaca ointirofoma nan Cristo oaitian. <sup>11</sup>Nanscashi marifi nan Jesucristo shara huafafainai cuscan man huatiro. Man ascaiton futsafoan mato oinquin yoitirofo isca huaquin, —¡Aicho! Nafu icoinsharamisifo. Upan Diosihuunuaishu isharamisifo. Ascan Diosin fasi shararan, —ishon yoishquicani. Un nannori matohuunshon Upa Dios cuffafaini.

*Un Cristo fu rafupaipacunaca nan fusti un shinain*

<sup>12</sup>Uhuun yoramishtichin un afanan mato yoinon. Ua cunu muran iquimanifo un afanan ato Diospan tsain shara Jesucristohuunua ato yoiamaishafain. Ascaino yora paratamafain Jesús icoinra huafafaincaini. Nan ua chaca huafacashon nanfoanri uhuunshon nan tsain shara Jesushuunua nicacaquin man icoinra huafo. <sup>13</sup>Ascano

nantifi ranushumuafu futan nunoa yorafoanri man tapiafu un Cristohuunua yoiaton ua cunu muran iquimanifo. Un ahua chaca huayamafiaton. <sup>14</sup> Ascatan ua cunu muran iquimafafocai un funamisima. Ascatarocon ranotama futsafu Cristohuunua un ato yoifafaini. Un ascaiton oincani Jesús icoinra huafo paratamafain ranotama Diospan tsain shara futsafori ato yoifafainonfo.

<sup>15-17</sup> Ascano atrififain ua noicoinquin uhuunua shinanmisifo isca huaquin, —Pablon cunu muran iquimafafocai Upa Diosin tsain yoiacusan tsoan shatumanima ato Jesushuunua yoiacusan nicasharanonfo, —ishon uhuunua shinansharacani. Nannori Jesushuunua shinainfoan yoimisifo. Icon atrififain nan tsain shara Jesushuunua un yoiacusan yoifacashon nanfoan ua shutipaicani. Un icai cuscan ranotama Jesushuunua yoipaicaquin. Nanfoancai Cristo noicoianfoma. Ascashon shinanqui isca huafo, —Pablon cunu muran iquifashon Jesushuunua yoimisiran, —ishon non yoiaton nicaquin, —Ahuun ointi non isinmatiroran, —ishon uhuunua shinanchacamisifo. <sup>18</sup> Nannori uhuunua yoifiaifonocai un shinanchacatarocon un fasi unimai man futsafu Jesushuunua yoimisi cuscan. Ascashon futsafoanri shinansharafain cayacafi yoimisifo cuscan man rafucainta Jesushuunua yoiacusan un fasi unimacoinni.

<sup>19</sup> Ascacun mun tapian man ua cufishonai cuscan yafi Jesucristo Yoshin Sharapan ua ashoain cuscan un fasi unimai. Ascatan nan ahua ahuu cuscararan un finonfiashucain un shinanchacaima. Ascatarocon nan un finon huain cuscan ua shara huashoin. <sup>20</sup> Upa Diosin ua amapaiyai cuscan un fasi huapaicoincani un rafitiroma. Un rafitamarocon un niyoashu iyamarai un naicain un ratuima. Un ascaiton oinquin futsafoan Jesushuunua shinansharanonfo. <sup>21</sup> Cristo fustihuunoashu un afu ipapai. Ascashu un nairifi shara finacoin itiro unmain nanriashu afu fasi unimacoin cayamaifin.

<sup>22</sup> Ascafia un nataima iquisi futsafu Jesús icoinra huamayotiro afu ipanonfo. ¿Ascancan ratocaimun sharaquin? ¿Niyoashu iyamarai un naamun shara? ¿Ascacun ratomun un catontiroquin? Uncai tapiama. <sup>23-24</sup> Nan rafu shara. Asca uncai catontiroma. Urifi un Jesús ari capaicoincain afu ishquin. Nan fasi shara finacoinfiashu un shinan man ua fasi yopacoin un mato ahuan tsain shara yoinon. <sup>25</sup> Ascano man fasi ua yopafin mun tapiquin. Ascatare mun tapia un nayoataima un matofu iyoano man Jesús icoinra huaqui finacoianshu man fasi unimacointiro.

<sup>26</sup> Ascano un afanan matofu iyoaiton oin Cristo Jesushuunoashu man fasi unimacoinsquin. Ascashon man yoiquin isca huashquin, —¡Aicho! Jesucriston min afanan nocoquin Pablo nichian nocon cayacafi tapimasharanon, —ishon man yoishquin. Ascanshu man uhuunoashu fasi unimai finacoinsquin.

<sup>27</sup> Ascacun isharacahuun. Man isharaiton oinquin yoitirofo isca huaquin, —Jesús icoinra huafo isharacoinmisifo. Ascashon nan tsain shara Jesushuunua iconcoiran, —ishon yoishquicani. Ascancan un matofu iyoano iyamarai un chaicushon matohuunua nicaquin un tapitiro man Jesús tanashara. Man nannorisi shinainton Diospan Yoshin Sharahunshon futsafu man ato Jesús icoinra huamashquin. <sup>28</sup> Icoincan huamafoan mato tsain shatupaiifaino mancai atoqui ratushquina. Rahuinmafain man ato Jesushuunua yoifafainshquin. Ascashu man atoqui

ratuyamaiton oinquin tapitirofo mato Upa Diosin numa. Ascashu nanfo funofiainocai man funotama man Dios fu ipanaca.

<sup>29</sup>Upa Diosin mato shara huashoan man Cristo icoindra huafain marifi man ahuunoashu omitsiscanon. <sup>30</sup>Un nocon Ifo Jesushuunoashu un omitsiscamisi. Man man maficoin ua oinpaoni natianri man ua nica ahuunoashu un omitsiscaiton. Un ahuunoashu omitsiscaicai cuscan marifi nanscarifiai man omitsiscaicai.

## 2

*Cristo nocohuunoashu omitsiscafianishaquin natian Apa Dioshuunshon nantifi finoncoian*

<sup>1</sup>¿Man Cristo fu rafuaiton mato unimamaimun? ¿Matohuun noiquin maton ointi isharamamun? ¿Diospan Yoshin Shara matofu rafuimun? ¿Cristo matohuun shinaincain matohuunri ramapaiyaiton man man mumisimun? Icon nanfo man man mumisi. <sup>2</sup>Nanscacun ua unimamaquin finai cuscarí Cristo maton nanscarifi huaquin shinanmapaiyai cuscan nannorifosi mato nomuran shinancahuun. Ascashu noinancahuun Jesús mato amapaiyai cuscan fusti aashcaquin.

<sup>3</sup>—Ufin un apaiyai cuscan fustifin un huaicain. Ascan futsafoan apaiaifo cuscacai un shinanpaima. Ascano un acai cuscacun futsafoan uhuunoa shinansharapainonforan, —icashu cacapaimisi iyamacahuun. Anori itamarocon futsafohuunoa shinansharacahuun. Ascashon atohuunoa yoiquin isca huacahuun, —Nanfoanfin ua finontirofoquin. Ascan uncai ahuama. Jesús fustiton ua imasharatoran, —ishon futsafo finonmapaiyamacahuun. <sup>4</sup>Ascashon mafin man apaiyai cuscan fusti shinanyamacahuun. Futsafoan apaiaifo cuscarí shinanshocahuun. <sup>5</sup>Ascashon nocon Ifon Jesucristo shinain cuscan marifi nannori shinancahuun. <sup>6</sup>Aafin Dioscoinquin. Apa Dios imisi cuscan arifi onihuafiacun. Ascashocai yoiquin isca huapaonima,

—Urifi un Diosquin. Nantifi uhuun Upanari uhuuna. Ascano uhuun Upan nai murannoashu ica cuscariai un nuno mai ano itiroquin. Un ascaitocai ahuatón ua chaca huatiromaran, —ishoncai Jesús anori shinanpaonima. <sup>7</sup>Arifi Dioscoinfashion nan Apa Diosin ahuun curushu yafi ahuun ahuamamishti potayoni mai ano oshquin. Ascashu nocofunucóin noco cuscara ipaoni. Arifi nocofunu caintiro cuscan cainni yorafoan aton oinmati cuscara iishquin mai ano fotoni. <sup>8</sup>Ascano nocofunucóin cainfianishaquin nancaifin fasi omitsiscaicai finacoinquin. Nanscaiton Apa yoini isca huaquin,

—Nantifi yorafohuunoashu min ato nashoshquiran, —ishon Apa yoini. Ascashon Apa nicacoianshu ihui coyan iquinhhuunoashu noco nashoni. Ahuashta chaca huayamafiamisishaquin nai nan chaca huamisi ointsacai omitsiscacaini naani. <sup>9</sup>Ascafiacun Upan Diosin Furun afanan funimani afu niaifocóin inon. Ascacun tsoa futsacai Jesús finontiroma. Asca Upa Diosin Furun yoiquin isca huani,

—Mirus fustifi min ua cuscara. Nantifiton aton Ifo. Ascan minfin uhuun Facu Jesucristoquin. Tsoa futsancai mia finontiromaran, —ishon Apa yoini. <sup>10-11</sup>Ascanishaquin natian Jesús nantifi finoncoian. Nai muran icafo yafi mai ano icafo

non naamisifo non yoshinfoanri. Aqwi oshon nantiffain ratoconun mai chachishon yoishquicani isca huaquin, —Jesucristo minfin nantifiton noco Ifoquin, —ishon yoishquicani. Nannori Furunhuunoa yoicaquin nantianri Apa Diosihuunoa yoisharashquicani.

*Jesús icoinra huafoan a icoinra huamafo muranshon ato ismatiro ahuuscashumain isharatiroquin*

<sup>12</sup> Ascacufin uhuun yoramishtichin un matofu iyoshon un mato yoiponaoni cuscan man nanscasi huaquin nicacoinmisi. Natianri un matofu iyamafashon nan un mato yosipaoni cuscan unutama finacoinquin nicasharafaincahuun cachiquiri huacaquima. Jesús mato numafain maton chaca soashona man afu nipanon. Ascashon nunori shinanchahuun, —Nan ua yonopaiyai cuscan un ayamaifin musuquin. Ascashu un funotiroran, —ishon shinanchahuun. <sup>13</sup> Diosin maton nomuran mato shinansharamafaini mato amapaiyai cuscan man anon. Afin apaiyai cuscan huafain matorifi nannori shinanmatiro.

<sup>14</sup> Ascacun Diosin mato amapaiyai cuscan fusti huacahuun. Nantifi man acai cuscan huaquin tsain chipufain fochishmanantananyamachuun. <sup>15-16</sup> Man ascaiton oinquincai Jesús tanamafoan matohuunoa yoitirofoma isca huaquin, —Nan Jesús tanamisifofashon tsain chaca yoimisiforan, —ishocai matohuunoa yoitirofoma. Man ascaitocai mato tsoan ahuashta rafantiroma. Ascatarocon man isharaiton ointirofo man Diospan facuoinfoshon. Man ahua chaca huamisima. Nan Jesús icoinra huamafoanfin ahua chaca huamisifoquin. Ascashon shinanchaca fustimisifo. Ascasi acani man funofo. Ascashu faquish muran icafo shinantsafo. Mancai ato cuscarama. Ato cuscara itamarocon Dioshuunooasi ato yoifafaincahuun icoinra huacanashu Jesús fu nipanonfo. Ascan manfin ato muranshon nan chashamatinin chasha huaiquin ato ismashcaquin a chaca huamisifohan mato oinnonfo. Man ascaino Jesús afanan oaitian unfi unimashquicain. Ascashon uncai ipaiti mato Diosin tsain yoimisimaran, un nantifi yoitiro.

<sup>17-18</sup> Un mato yoisharamisi man Jesús icoinra huacoinnon. Asca Upa Dios un yoitiro isca huaquin, —Upa Diosin, mian yononi cuscan un Filiposofo min Furun Jesushuunoa yoimisi. Nan icoinra huanonfo min ato yoiai cuscan acoinonfo. Un ato mia icoinra huamahuunshon ua rutushquicaniran, —ishon un Upa Dios yoitiro. Ascano ua rutufiafo uhuunshon man Jesús icoinra huano un unimatiro. Ascacun marifi ufu unimacahuun Diosin ua shara huaino un matohuunooashu natiro.

*Timoteo yafi Epafrodito*

<sup>19</sup> Jesucristo apaiyaiton un matoqui Timoteo samamashta nichipai. Chipu u ano nasoaaitian matohuunoa ua tapimanon. Nocoshon matohuunoa ua yoiaiton nicai un fasi unimacointiro. <sup>20</sup> Timoteo mato noicoinquin matohuunoa tapipai man isharacaimain man Jesús tanasharaquin. Asca tsoa futsacai Timoteo cuscarama. Ascashu un matohuun noiai cuscari arifi matohuun noicoin. <sup>21</sup> Nantiffain afin apaiyai cuscan fusti shinanmisifo. Jesucristo ato yonomapaiyai cuscacai shinanmisifoma.

<sup>22</sup> Ascan Timoteocai ascarama. Maficoi man man onan. Nan uhuun facu cuscacoinshofin. Timoteo u futan Jesushuunoa yoimisiquin. <sup>23</sup> Ascacufin un Timoteo mato ano nichiriscapacain. Unmain ahuuscaicain un tapiatima. Ascan nan un tapiaintian un mato ari Timoteo

nichiriscatiro uhuunoa mato tapimanon. <sup>24</sup> Un nocon Ifon iconra huai uatsi mato ari nichiyamaiton. Ua nichiaino un samamashta un mato ari caicain.

<sup>25</sup> Ascano manfin uqui Epafrodito nichiniquin un yopai cuscan ua ashonon. Ascacun nanfin uhuun ushto cuscaracoinquin. U futan Diosin tsain yoifafaini. Afin fasi mato shinain. Ascan un shinanracafin afanan un mato ari nichishquin. <sup>26</sup> Epafrodito isinincai mato tapimapaiyamafiano man man tapian nicaquin matohuunshon shinanqui ahuun ointi nocoita. Ascashon yoyiamua isca huaquin. —Tapiamapainonforan aton ointisin ihuutirofoquin, —ishon matohuunoa yoyiamua. Ascashu natian matofu fasi ipaicoin. <sup>27</sup> Iconfinquin Epafrodito fasi isininqui man naqui rashquiyamua. Ascafia Diosin ahuun ramapaicain uhuunri ramapayaino man cayayamua. Ascan naanofin un fasi shinain omitsiscaifinacuanitaquin.

<sup>28</sup> Ascacufin un mato ari nichipaicain. Matoqui nocoaino man aqui unimanon. Man ascaino urifi un unimashquin. Mato ari Epafrodito nocoanocai un afanan shinain omitsiscashquima. Muma sharamain matoqui nocoyamaiton. <sup>29-30</sup> Cristo yonoshoni man naqui rashquiyamua. Ascan man chai icashucau uqui man oyamaino matohuun rafanan Epafrodito uqui oyamua. Ascafia matoqui nocoaiton fasi unimacain nocon Ifohuunshon ihui sharafain ahuun noiquin a ismasharacahuun.

### 3

#### *Ahuara iconcoïn shara finacoian*

<sup>1</sup> Uhuun yoramishtichin uhuun tsain unutaqui un mato yoi. Manfin nocon Ifon Jesucristo ahuun yorafoquin ascacun unimacahuun. Un mato cunushoni cuscan afanan un mato yoi. Man poshtutanonma nicafafainainfin sharaquin. Nan tsain shara man tanacucau yora futsafoan mato amaquri yositirofoma.

<sup>2</sup> Ascacun ¡Oinfain! A yora chaca huaifo fishtayamacahuun. Pashna pofu cuscarafokin. Nan yora chacafoan mato amaquri yosipaicani isca huaquin, —Man foshqui rupa shatuyamashucain man Dios ari nocotiroman, —mato huamisifo. <sup>3</sup> Asca non foshqui rupa shatuhuunshocai nocon chaca non soatiroma. Jesucristo noco nashoni nocon chaca soashoshquin. Arus fustifin nocon chaca soashotiroquin. Nan Furuhuunshori Diosin noco ahuun facufo imatiro. Ahuun Yoshin Sharahuunshon non Dios yoitiro isca huaquin, —Non mia fasi noi. Min sharacoinran, —ishon non yoitiro. Jesucristo noco nashoni nocon chaca soashoshquin. Ascacun non aqui unimacoinni. Arus fusti noco numatiro. Man non tapia non foshqui rupa shatuhuunshocai noco ahuusca huatiroma.

<sup>4</sup> Futsafoan yoiquiraca isca huafo, —Unfi shara fustisi huamisiquin. Ascashufin un Dios fu ipatiroquin, —ishon shinanfaifono urifi un nannori shinanpaiquin un nannori shinanquin finacuana. <sup>5</sup> Un caintan ocho oshatan ua foshqui rupa shatunifo. Asca unfin Israelifoan caifokin. Urifi un Benjamín nami. Uncai osiama. Unfin Israelicoïnquin. Diosin Moisés yoini cuscan urifi un nicacoianquin. Ascatarifi unfin Fariseoquin. <sup>6</sup> Diosin tsain tanasharapaicoïnquin nan Jesús tanamisifo un ato chaca huapaoni. Unfi nantifi Moisés tsain tanasharapaoniquin. Tsoancai uhuunoa yoiqui isca huatiroma, —Pablonunca Moisés tsain

nicacoinpaonimaran, —ishocai tsoan yoitiroma. Ascashon un shinanquin isca huapaoni —Nanfoan ua imasharatiroran, —ishon un fasi amaquiri shinanpaoni.

<sup>7</sup> Ascafia natian mun tapia afocai ahuama. Afoancai ua imasharatiroma. Nanfo mun potacoian Jesús fusti icoinra huashu afu ipashquin. <sup>8-9</sup> Ascano uncai afanan un ipaoni cuscan apaima. Nantifi un ipaoni cuscan mun potacoinni. Un ascai un funocoinpaoni. Ascacun natian un shinancai nanfo ahuama. Nan ahuara chaca potamua cuscarafu. Natian uhuun Ifo Jesucristo fusti un onanpaicoin. Nancaifin shara finacaiquin. Arus fusti ua imasharatiroma. Moisés tsain yonopaoni cuscaai un afanan ascatiroma ua imasharanon. Ascataamarocon un Cristo icoinra huaino Upa Diosin Furunhuunshon ua imasharatiroma a cuscara shara un inon. Ascan un Diosiqui nocoaitian uqui unimatiro un Cristo fusti icoinra huacun ua imasharanon.

<sup>10</sup> Un Cristo onanpaisharacoin afu rafushquin. Diosin ahuun curushpan Cristo afanan funimani cuscan urifi nan curushu un mupai a cuscara shara ua imanon. Cristo omitsiscapaoni cuscan urifi afu rafushon un mutiro. Unrifi ascapai nan cuscara ishquin. Ascashon ua nashoni un chaca huapaoni cuscan ua soashoshquin. Ascacufin un ipaoni cuscaai afanan ascapaima. Ascafia un nan Cristo fu naa cafiscapaoni. Ascashu natian a cuscara shara iishquin. <sup>11</sup> Ascano unrifi nan funini cuscan un funipai. Cristo naafiashu afanan funini. Ascanishaquin afanan nanacama. Nanscarifai urifi un afu funi cafiscapai. Nuno mai ano niyoshon afanan chaca huatama nan cuscara shara iishquin.

*Un fasi Jesús tanaqui tapicoinpai un aqui nocoaitian afu ipashquin*

<sup>12</sup> Un ipaiyai cuscaai un acoinnataima. Un Jesús cuscaracoin ipaifiaicai un icataima. Jesucristo uhuun ointi fiananan huani a cuscaracoin ua imashquin. Ascacun un Jesús tanasharafafaini a cuscarasharacoin ishquin. <sup>13</sup> Uhuun yoramishtichin un Jesús cuscaracoin icataiyamafiaicai un ipaoni cuscan afanan un shinainma. Un Jesús cuscara ipaiyai cuscan nan fusti un shinain. <sup>14</sup> Ascashon uncai ahua futsa shinainma. Nan Jesucristo fusti un tanapaicoin. Nan fusti un shinanfaini. Ascano Diosin ua catonni un afu ipanon. Jesucristohuunoashu Upa Dios ari un nocotiro. Nocoashu a cuscarasharacoin un itiro.

<sup>15</sup> Man Jesús tanasharai nan un mato yoia cuscan marifi nannori shinacahuun. Un shinain cuscan futsan shinanyamaiton afincoin Diosin ato cayacafi tapimatiro. <sup>16</sup> Ascashu Cristohuunoa man tapia cuscan nansacoincahuun.

<sup>17</sup> Uhuun yoramishtichin un Jesús tana cuscan marifi uhuun caocahuun. Non icai cuscaifori oincatan nanfohuuri caocahuun. <sup>18</sup> Un mato yoimisi cuscan nannoricoin natiantan afanan uhuun nomuran uaiyanan un mato yoi. Jesucristo noco nashoni nocon chaca soashoshquin non ipaoni cuscan afanan non shinanonma. Futsafoancai nan na un mato yoia cuscan nicapaicanima. Ato chaca shatucasmacani. Ascaifin Jesús noicasmafain icafoquin. <sup>19</sup> Jesús ato amapaiyai cuscaai shinantama nan afin apaiiafo cuscan fusti shinancani. Pifain ayafain huacaquin. Nan fusti shinancani. Ascashon nan nocofunfoan ainfofohuunoa fusti shinancani. Nanscarifi ainfofo aifono nocofunu futsafo yasi icaifoanno. Nanscara chacafosi huacani. Nanscaisi tapiafo. Non chacaforan itama noncaifin sharaquin icafo. Afanancai tsoa rafipaitirofoma. Nanscarafu nacanashu omitsiscapanacafu muran focani.

20-21 Ascafia noncai ascarama. Ascatarocon nonfin Diospan yorafoquin. Nonfin nai muran afu ipanacaquin. Nocon numamisi Jesucristo nanno ica. Nanfin non fasi manaicai. Unimayanan afanan Jesús nocoqui oaitian nocoqui nocoshon ahuun curushpan a cuscara sharacoin noco imashquin. Ascashu non nacun nocon caya chacanafiaino Jesús nocon caya fiananan huashotiro non afanan ahuuscatama isharacain funa sharacoin ahuun caya cuscara non inon. Nanscarifi aqui ahuun curushpan nantifi noco iquina.

## 4

### *Nocon Ifo Jesushuunoashu unimafafaincahuun*

<sup>1</sup> Ascacun uhuun yoramishtichin un fasi matohuun noicoin. Un mato fasi oinpaisharai. Nan un matohuunoa shinaintian un mua fasi unimacoinna. Un mato Jesushuunoa yoimisi cuscan natian man man icoinra huasharacoian. Man ascaino un fasi unimacoinni uhuun yonoricai funoima. Ascacun uhuun facufoshtan Jesús cachiquiri huacaquima tanasharacahuun. <sup>2</sup> Ascadari un nica Evodia yafi Síntique fochishmanantananafainaifoan. Ascacun un ato yoi achishta rafutan, Evodia yafi Síntique un mato yoisharapai. Ahuscai man fochishmanantananafainai. Cristohuunshon nannori rafu shinansharacahuun. Afanan ascayamacapun. <sup>3</sup> Uhuun yorashtan min u futan Dios yonoshomiscun un mia yoi. Nan ainfo rafu ato yosisharapun. Afanan rau huatananshu yorahuan tananonfo. Nan rafutafin u futan Jesushuunoa futsafo yoipaonifoquin. Ascano Clemente arifi u futan Jesushuunoa yoipaoni. Ascans natian yora futsanfoanrifi u futan Jesús yonoshonafo. Ascacun nanfofin Diosin ahuun libroqui nai muranshon aton anufo man cunuaquin afu nipashquinonfo. Nantifi ahuun yorafo Diosin aton anu cunua afu nipanonfo.

<sup>4</sup> Ascacun Jesús mato Ifoquin unimacahuun. Afanan un mato yoi futsai unimacahuun. <sup>5</sup> Nocon Ifo oti chaimaquin. Ascacufin isharacahuun. Futsafahuun noicoincahuun. Man ascaiton yorafoan mato oincaquin, —Isharaforan, —ishon matohuunoa yoinonfo. <sup>6</sup> Ascano shinachacayamacahuun. Ascatarocon ahuara ahuuscarafiaino Upa Dios cuficahuun. Man yopai cuscari a yoicahuun. Man cufiaino Upa Dios yoicahuun isca huaquin, —¡Aicho! Upa, min ua nicasharamisi un yopai cuscan min tapishon min ua ashosharamisiran, —ishon cuficahuun.

<sup>7</sup> Man ascaitofin maton nomuran Diosin maton ratufo potafain mato ointi isharamaiquin. Ahuara ahuuscarafiaino Diosin nocon ointi isharamatiroqui. Ascans noncai tapitiroma ahuuscashomain nocon ointi noco shinansharamatiroquin. Ascafia Jesucristo non icoinra huacun nocon ointi yafi nocon nomuran noco shinansharafafaini.

### *Ahuara sharafosi shinancahuun*

<sup>8</sup> Ascano uhuun yoramishtichin mun cunuquin anaiticuana. Un afanan mato yoi futsapai. Ahuara icon fusti shinanfain ahuara sharafosi shinanfain ahuara cayacafi fusti shinanfain ahuara noco shinansharatiro nan fustiri shinanfain ahuara yorafoan shara huaifo cuscan shinanfain Diosin noco ashoain cuscan nanfo fusti shinansharafafaincahuun. Ascashon nocon Ifo —¡Aichoran! —huacahuun. <sup>9</sup> Ahuara un mato yoia cuscan huafain un mato tapimana cuscan huacahuun. Ascashon ahuara futsan un acaiton man oian cuscan macafiri



acahuun. Man ascaiton oinquin Diosin maton nomuran isharamatiro. Ascashu matofu ipashquin.

*Filipos anoafoan pui ichanan huacashon Pablo fomanifo*

<sup>10</sup> Un unimacoin man ua shinanfiaguicai man ua pui fumayomisima. Man ua pui inanfiapaonishaquicai afanan man ua fumayomisima. Ua pui fumapaimisifiashucaí ahuuscashuco ua fumatiroma. Ascafia natian man man afanan ua fuma. Ascacun natian un nocon Ifo, — ¡Aicho! —huai. Uarifi afanan man ua cushusharamisi. <sup>11</sup> —Ascano un ahudara yopafiaquicai man ua ahua inanmaran, —un mato huamisima. Ahuarafo ahuuscarafiainocai shinanchacatarocon un unimacointiro. Diosifin nannori ua tapimanaquin. Ascashu un ahudara ichapaya iyamarai un ichapama ayafiashuri un unimatiro.

<sup>12</sup> Ascano mun tapiarifi ahuuscashumain ahuuoma non isharatiroquin. Nanri mun mumisi. Ascatan ahuuscashumain ahudara ichapayashuri non isharatiroquin. Nanrifi mun mumisi. Ascatan ahudara ahuuscarafiainori un unimacointiro. Ascacun uncai shinanchacamisima. Un pii manyashu iyamarai foniquiri nanscara un mutiro. Raniran futsanoashu ahudara ahuuscarafiainoricai un shinanchacatiroma. Ascatarocon un unimacointiro. <sup>13</sup> Cristo ahuun curushu ua inainton nan curushhuunshon ahudara ahuu cuscararan futsan un atiroquin.

<sup>14</sup> Ascafiacufin nan shara man uhuun ramapaicain ua shinan. Ascan manfin ua shara huaquin un omitsisca cuscan marifi man ua shinanquin ua shara huua.

<sup>15</sup> Man Filipos anoafoan man rama Jesucristohuunoa nicaquin tau huanitian Macedonia anoashu un caiton un yopai cuscan marus fusti man ua inanni. Ascan nan icoinra huua futsafoancai tsoan ua pui yafi ahudara futsa fumanifoma. Nan man man tapia. <sup>16</sup> Un Tesalónica ano icun un yopai cuscan man ua fumafafainpaoni. <sup>17</sup> Ascafia ufcain un maton pui fianfainmisima. Man ua inanshara cuscan Upa Diosin oinquin matorifi ahuun rafanan shara huafafainshquin. Mato shara huaino urifi unimacoinshquin.

<sup>18</sup> Ascano natiancai afanan un ahua yopaima. Munmain ayashufin. Epafrodito uqui nocoshon man ua fuma cuscan ua inantoshiyamua. Un yopai cuscan finonmafain man ua fumayamua. Nan man Diosihuun noiái cuscan huafain uhuunrifi noiquin man ua fumayamua. Man ua inainton oian cuscan Diosin matoqui unimacoinni. <sup>19</sup> Uhuun Diosin man yopaiti mato inanshquin. Upa Diosin ahuun ahudara sharacoinfo aya cuscaí ichapa cuyopacunacama. Furun Jesucristohuunshon mato inanshquin. <sup>20</sup> Ascacun nan nocon Diosifin nocon Upaquin. Nan fasi sharacoin. Arus fustifin sharacoinquin. Tsoancai a finontiro. Nan, —Nocon Ifocoinran, —non huapanaca. Nanscari inon.

*Pablonun ahuun tsain unutaquin Filiposofa tsain shara fomani*

<sup>21</sup> Nantifi Jesucristo icoinra huafo ua yoisharashocahuun. Nan icoinra huafo ufu icafoanri mato yoisharapaicani. <sup>22</sup> Nunoa nantifi Jesús icoinra huafoan mato yoisharapaicani. Nan niaifocoin Cesar ahuun pushu anoa yonomisifoanri mato yoisharapaicani.

<sup>23</sup> Nocon Ifo Jesucristo matohuun ramapaicain maton nomuran mato shara huapanon. Nanscasi ipanon. Amen. Nanti.

Pablo

## Pablonun Colosas Anofo Cunu Fomani

### *Pablonun Jesús icoinra huafo Colosas anofo cunu fomani*

<sup>1-2</sup> Uquian Pablo Diosin afin apaiyai cuscan ua catonni Jesucristo fu rafushon ahuun tsain un yoifoanfainon. Timoteo futan un mato cunu fomai. Arifi Cristo ahuun yora. Colosas anofoan manfin Cristo tana-coianshu Diospan yorafoquin. Nocon Upa Diosin matohuun ramapaiqui matohuunoa shinanquin mato shara huashofafainpainon. Ascashon maton nomuran maton imasharapainon.

### *Pablonun Jesús icoinra huafo cufishofafainpaoni*

<sup>3-4</sup> Un mato fasi ichapa shinain. Nan nocon Ifo Jesucristo Apa Dios non mato cufishofafaini. Ascan man non nica man Jesús icoinra huacoincun. Ascashon nan Jesús icoinra huaa futsafohuun man noicoianri man non nicamisi. Ascacun non nocon Upa Diosin yoiquin isca huamisi, —¡Aicho! Upa Diosin Colosas anofoan min Furun Jesús man tanasharaforan, —ishon mato cufishofafaini. <sup>5</sup> Nan tsain shara iconcoin Jesushuunoa cayacaficoin man man nicamisi. —Jesucristo icoinra huashu Dios icari man afu ipasharatiroran, —ica man man nicamisi. Nan tsain icoinra huashu man futsafohuun noicoimisi. <sup>6</sup> Nan tsain shara Jesushuunoa nicaquin tau huaquin man icoinra huani. Ascashon nicaquin man tapini nan iconcoin. Diosin matohuun ramapaiquin Jesucristohuunshon maton chaca soashoni man icoinra huanon. Ascacufin nan tsain sharahu-unoashu man fiananan. Nicacani arifi manifoti nanscarifi amisifo. <sup>7</sup> Nan Epafras nocofunu fasi shara. Un ahuun noicoin. Arifi no futan Cristo yonosharashomisi. Noncai matofu itiro ipaonima. Ascacun afincoin mato Jesushuunoa tapimayopaoni. <sup>8</sup>—Colosasfoan Diospan Yoshin Sharahuunshon futsafo noicoinran, —ishon matohuunoa Epafras noco tapimana.

<sup>9</sup> Ascacufin nan un matohuunoa nicaquin tau huaitian natianri un mato Upa Dios cufishoquicai unumisima. Ascacun un mato cufishoquin isca huafafaini, —¡Aicho! Upan Diosin, Colosas anofo min Yoshin Sharahuunshon min ato tapimapaiyai cuscan huafain ato tapimahuu. Min ato tapimanai cuscan aton nomuranshon tapicoinfain mia tanasharanonfo, —ishon un mato cufishomisi. <sup>10</sup> Ascashon nan mato amapaiyai cuscan man aiton oin Dios matoqui unimacoinshquin. Ascatan nan mato yonomapaiyai cuscan acai man isharashu ahuun facu cuscaracoin man itiro. Ascano man futsafo shara huashofafainquin. Man Dios onanquin finacoinfaintiro. <sup>11</sup> Ascan Upa Diosin ahuamamishti shara huatiroquin. Ahuun curush mutsisipacoin mato inantiro ahuaara ahuscarafiaino marifi ahuunshon man tunucoinnon. Nanscaciaquin man tunutiro funaquima unimasharacain.

<sup>12</sup> Ascano unimacain man Upa Dios aicho huatiro. Nantofin noco imasharafain ahuun yorafo inanpaiyai cuscan huafain nocorifi inain. Norifi non ahuun yorafocun noco inanshquin. A icano shafa fusti faquishicai imisima. <sup>13</sup> Ascacun noco numa non afanan faquishmuran inonma. Ascan nan Satanás icanofin fasi faquishcoinquin. Nannoashu funocani. Upa Diosin nannoa noco numa ahuun Furun shara fu non

ipanon. Nanto Furun fasi noicoin. <sup>14</sup> Nocon chaca soashona ahuunshon Upa Diosin noco rau huatiro afu non ipanon.

*Jesús noco nashonihuunoashu non Dios fu isharapacunaca*

<sup>15</sup> Ascan noncai Upa Dios non ointiromafiano Furun Jesús mai ano oni. Ascashon Furunmun noco tapimani ahuu cuscaramain Apa Diosiquin. Ascan Furun Jesusfin nan Apa cuscaracoin. Ahuun ointi cuscarari. Ahuashtacai oniataima Apa Dios fu nai muran iyopaoni. <sup>16</sup> Ascan Criston nantifi onihuan. Nai murannoafu yafi mai anoafori ato onihuapacuni. Nan non oinmisifo yafi non ointiromafori ascashon nantifi onihuan. Ahuun oinmatifo nan afu icafo onihuafain yoshinfoan aton niaifofori onihuan Upa Dios Furun Cristohuunshon nantifi onihuan. <sup>17</sup> Ahuashtacai oniataima Cristo iyopaoni. Ahuun curushpan nantifi cushusharamisi. Ascashon fishifo cushufain fari cushufain oshuri cushufain nocon mai cushufain. Ascan nantifi cushuyamaino cuyoi futsucuanafu. Nai yafi mai choquiqui futsucuanafu. <sup>18</sup> Tsoancai Jesús finontiroma. Ahuashta oniataima nantifi finonyopaonishaquin. Natianrifi nantifi finoncoian. Aafin ahuun yorafo nan icoinra huafo ato Ifocoinquin.

<sup>19</sup> Ascacun Upan Diosin yoiquin isca huani, —Un imisi cuscacoin nanscarifi uhuun facu imisiquin. Ascashu arifi ufu Dioscoin. Nonfin nanscara rafuquin, —ishon unimacain Upa Diosin yoini. <sup>20</sup> Jesús ihui coyan quinanqui mastafonno ahuun imi focain noco nashoni nocon chaca soashoquin. Ascacufin ahuunoashu non Upa Dios fu afanan isharatiro. Ahuunoashu nantifi mai anoafu yafi nai murannoafori afu isharatirofo.

<sup>21</sup> Maton nomuranshon man Dios noicasmafain man fasi chaca hua-paoniquin. Ascashucai man Dios fu rafuyamacai marificai man ahuun yorafo ipaonima. <sup>22</sup> Ascafiacun Furun Jesucristo nai muranshon mai ano nichini nocofunocoin iquiyonon. Ascashu ihui coyan iquinanhu-unoashu noco nashoni. Ahuunoashu natian Diosin matofu rafucain maton chaca soashotiro a cuscara shara man inon. Ascano man aqui nocoaitian matohuunoacai ahuashta chaca shinantiroma. Ascashocai mato yoitroma isca huaquin, —Min chaca huamisirán, —ishoncai mato yoipacunacama. <sup>23</sup> Ascano nan tsain shara Jesucristohuunoa icoinra huashon man ahuara futsa shinanyamaitocai Upa Diosin matohuunoa yoipacunacama isca huaquin, —Min fasi chaca huamisirán, —ishoncai yoipacunacama. Ascatarocon man icoinra huaquin unuyamaiton oinquin nan mato yoyotiani cuscaino mato ihuishquin man afu ipanon. Man Jesushuunoa tsain shara nicaquin tau huani cuscan nannoricoin un manifoti ato tapimani. Ascacun unquian Pablo un Upa Diosin tsain yoifoanfafainmisi Jesushuunoa ato yoishquin.

*Diosin Pablo yononi Jesús icoinra huafo yonoshonon*

<sup>24</sup> Ascacun un fasi unimai un matohuunoashu omitsiscamisi marifi man ahuara ahuscarafiaino Cristo tanasharanon. Cristo nocohu-unoashu omitsiscani cuscan urifi afu rafumisifo nan Diospan yorafohu-unoashu omitsiscamisi. Un matohuunoashu omitsiscaifin nantianri un Cristohuunoashu omitsiscaifin.

<sup>25</sup> Ascacun Diosin ua catonni maton oinmati cuscara un inon. Ahuun tsain shara un mato yoinon. Ascashon ua yonoquin isca huani, —Nan manifoti anoa yorafo uhuun tsain shara Jesucristohuunoa ato yoifoanfafainhuun, —ishon ua yononi. Ascashon nan uhuun caifomafo

muran ua nichini. <sup>26</sup> Nan tsain Jesucristohuunoacai noco shunifoan tapiyopaonifoma. Diosin tsoa tapimayopaonima. Natientan Diosin rama shara noco tapimani. Non ahuun yorafocun. <sup>27</sup> Upa Diosin Cristohuunooa yoiyotiani cuscan nantifi matori tapimashquin. Uhuun caifo fustisicai tapimanima nan uhuun caifomaforifi ato tapimai isca huaquin, —Uhuun Facu Cristo matofu rafucacaini. Ascacufin man icoinra huatiroquin un icano man unfu iishquin. Ascashu Cristo shara fustisi ica cuscai urifi un mato nanscara imashquinran, —ishon mato tapimai.

<sup>28</sup> Ascano Jesucristohuunooa non yoifoanfainmisi. Diosin ahuun shinanpan un ato yosifoanfainmisi. —Ascacun Diosin tsain nicas-haracoincahuun man funoshcaquimaran, —ishon un ato yoimisi isharanonfo. Ascan nan non Cristo icoinra huamisifo nantififain Diosin ointaifi non oinmapai a cuscara shara iishquin. <sup>29</sup> Ascacufin un Dios fasi yonoshofafaincain. Ahuun Yoshin Sharapan uhuun nomuran ua yosiain cuscan huafain un mato yonoshofafaini. Man Cristo cuscaracoin icai Upa Dios ari man nocoshquinon.

## 2

<sup>1</sup> Uhuun yoramishtichin, un mato tapimapai. Matohuunshonfin cusrushcain un mato Upa Dios cufishofafaini Laodicea anofo futan futsafoanri ua oianmafiamisifoan nanfori un ato Upa Dios cufishofafaini. <sup>2</sup> Ascashon un mato cufishomisi mato nomuranshon man shinan-sharafain mafiranman man noinancoinon. Asca huatananshu man Upa Dioshuunooa shafacafi tapisharatiro. Ipaoni tsoancai Cristohuunooa tapiyopaonima. Ascacun natian ahuunooa mato shafacafi tapimapai man onancoinsharanon. <sup>3</sup> Nantofin nantifi onancoinfain tapicoianquin. Apa Diosin tapia cuscan arifi ahuun nomuranshon tapicoianquin. Ascan Upa Dios ahuarafu shara aya cuscan Cristohuunshon marifi man tapitiroquin.

<sup>4</sup> Un mato nannori yoi futsafoan mato paranonfoma. Isca huaquin, — Non mato shafacafi tapimani, —iflancanashu nanfocai fin chanimisifoquin. Ascashon mato shafacafi yoicafiscamisifoquin fasi amaquri mato yosipaicani. <sup>5</sup> Ascacun un matofu iyamafishon shafatifi fasi un mato shinain. Mun nica matohuunooa man nannorifosi Jesushuunooa cayacafi shinanfain man Jesús icoinra huafafainaiton nicai un fasi unimacoinni.

*Cristo mato funa cuscara shara ima marifi man nan cuscara shara inon*

<sup>6</sup> Man Jesucristo icoinra huaquin tau huashon man Ifo huacoinna. Ascacun shafatifi afu rafufafaincahuun. Ahuun tsain nicacoincahuun. <sup>7</sup> Ahuara fimi fanano ahuun tapo chaicoin foanno cai fana tucuitiroma. Mutsisipacoin itiro. Nanscarifiai Jesusfin nan tapo cuscara sharaquin. Ascacun afu rafufafaincahuun chaca huatamarocon a cuscara shara ishcaquin. Epafra mato tapimamisi cuscan shafatifi finacoianquin Jesús icoinra huafafaincahuun. Ascashon shafatifi Upa Dios aicho huacahuun.

<sup>8</sup> Oinfain futsafoan mato paranonfoma. Amaquiri mato tapimashcaquin. Man cayacafi Jesús icoinra huai cuscacai mato ascara tapimapaicanima. Ascashon nan mato yosipaiyaifo cuscan man ato nicashu ipaitsicoin man icoinra huatiro. Ascan nanfoancai Diospan tsain Cristohuunooa yoicoianfoma. Ascashon nan aton fuyamisi cuscan mato

tapimapaifain nan icoinra huamafoan shinainfo cuscan fustisi mato icoinra huamapaicani.

<sup>9</sup> Ascano Cristo yafi Apa Dios nanscara rafu. Cristo noco cuscara noco-funucoinfiashu Dios imisi cuscan arifi nanscamisi. <sup>10</sup> Aafin nantifiton aton niaifocoinquin. Nantifi niaiffo yafi yoshinfori ato finoncoian. Ascashon ato iquimisi. Ascacufin man Jesús fu rafushocai man ahua futsa yopaima. Nan isharamisi cuscan marifi man nanscatiro. <sup>11</sup> Man Cristo Ifo huaitian maton nomuran mato fiananan huashoni man chaca huapaoni cuscan afanan man ascanonma. Ascan nocofunufaoan aton fuyamisi ipaoni. Ascafia man cunotinin foshqui rupa shatutocai maton chacan soashotiro. Cristo fustitofin maton ointi fiananan huashotiroquin. Ahua futsanmaquia. Nan fustitofin maton chaca soashotiro afanan man chaca huapaoni cuscan man atama nan cuscara shara man inon.

<sup>12</sup> Ascano man unu muran iquimamuaitian maton chacafo man chaca huapaoni cuscan nanfo mai huamua shinantsai. Ascan non Jesús mainitian man chaca huapaoni cuscan nan chacafori mai huamua shinantsatiro. Man unu muran iquimamuashu funinaca huanni man Jesús fu funi cafiscatiro a cuscara funa shara iishquin. Diosin ahuun curushhuunoashu Jesús afanan funini nan non icoinra huua. Ascano Jesús mai murannoashu funinitian marifi man afu funi cafiscatiro a cuscara funa shara iishcaquin.

<sup>13</sup> Man Jesús Ifoataima nan yora naa shinantsa man apaoni. Ascashon man chaca huapaoni. Ascafia Upa Diosin Cristo funimani afu nipanon. Nanscarifi aqui matorifi ahuunshon nimapacutiro. Ascashon nantifi non chacafo man rau huua. <sup>14</sup> Shinancapon. Nantifi non chaca huamisi cuscan noco chacafo Upa Diosin noco soashoni. Afanan afohuunoa Diosin shinanonma. Ascano Diosin yononi cuscan nicatama ahuara futsa non chaca huapaoni. Nanfo nantifi non chaca huamisifo cuscari cunupacua. Ascafia nan cunupacui cuscan ihui coyan iquinan ano Jesús mastanihuunshon nanfo noco soashoni. <sup>15</sup> Ascano Jesús ihui coyan iquinanhuunoashu noco nashonishaquin Satanás yafi nantifi yoshin chacafo finoncoian. Ascacucai afanan noco ahuusca huatirofoma. Nanforicai afanan noco ifo iyamacain noco iquitirofoma. Ascacufin Jesús ihui coyan iquinanhuunoashu naiton Diosin manifoti ismani nan yoshin chacafocai afanan ahuashta ahuun curushu ayamaran ishon ato ismani.

*Jesús icaria sharacoin nan fustisi fuchipaicahuun*

<sup>16</sup> Ascacufin ratoran futsan mato yosipai isca huaquin, —Nocon shunifoan yononi cuscan nantifi nanscacoicahuun. Ahua futsa piyamafain ahua futsari ayayamacahuun. Fuusititian fuusiyamashu man chaca huai. Ascan nan oshu ina funatianri fuusicahuun. Tunutitian fusti noco shunifoan yononi cuscan man atiroran, —ishon mato amaquiri yonopaiyaifo cuscan ato nicayamacahuun. <sup>17</sup> Cristo nocoataima nanfohuunoa noco tapimayopaonifo. Ascafia afincoin mai ano oanocai non afanan nanfo yopaima. Nan Cristo fusti non yopai.

<sup>18</sup> Oinfain. Futsafoan mato shinanmapaiyaifo cuscan man ato nicashu nan Upa Diosin mato inansharapaiyai cuscan man funotiro. Ascacun ato nicayamacahuun. Mato amaquiri yoipaiquin isca huacani, —Uhuun namapan cuscara Diosin ua isma cuscan fasi sharacoin. Uncai ahuayamafiacun Diosin ua isma cuscan tsoa futsacai oinyomisima. Ascan un

oian cuscan miarifi Diosin oinmanaino shara itiroran, —ishon cacapaimisiton mato amaqiri yoipaicani. Mato yoipairi isca huaquin, — Non Diospan oinmati afu nai muran icafo cufitiroran, —ishon mato parapaicani. Nanfoan aton nomuranshon futsa futsa huaquin shinainfo cuscan fusti matorifi yospaicani ato cuscara cacapaimisifori man inon. Diosin shinan cuscacain shinantama afin shinantirofo cuscan fusti shincani. Nanscashi nanfo curafiapaimisifo.

<sup>19</sup> Nanfocai Cristo fu rafuyamacai aton ifomari. Cristofin nan nocon mapo cuscarariquin. Nonfin ahuun caya nato cuscarariquin. Nocon caya nofiri non cushumusharashu non mutsisipacoin itiro. Ascan nocon nami pono uhuapafu yafi nami pono futsafo nocon cayahuu nannorasi ichanatirofo. Nanscarifi aquin Criston ahuun yorafo cushusharacoinmisi. Ahuuscayamacain isharacain mutsisipa non inon. Noco nannorifosi shara noco shinanmamisi. Non Cristo fu rafucoincun Upa Diosin finacoinquin Furunhuunshon ahuu curushu noco inantiro a cuscara non inon. Nanscarafin noco Diosin ashopaiquin.

<sup>20</sup> Cristo mato nashonitian marifi man afu naa shinantsapaoni. Ascan natiancai man chaca huapaoni cuscan afanan man ascaima. Ascatamarocon man isharacoinmisi. Man ascanocai nan icoinra huamafoan mato yonotirofoma. ¿Ascacufin ahuuscai man ato nicamun mato yonopaiyaifo cuscan aashcaquin? Ascacun ato nicayamacahuun.

<sup>21</sup> Ascashon nanfoan mato yonoquin isca huapaicani, —Mato tushu inainfo cuscan fiyamaafain nanrifi piyamacahuun, —ishon mato yonopai.

<sup>22</sup> Ascano nanfoan mato yospaiyaifo cuscacai Diosin ato yonoama. Nan nocofunufaan shinainfo cuscan fusti mato yonopaicani. Ascan nan mato yonopaiyaifo cuscan nanfo cuyoi futsushqui afanancai ascashquima. Ascacun ato nicayamacahuun. <sup>23</sup> Icon yorafoan shinanquin isca huacaquin, —Nanfoan ato yosiainfo cuscan shararan. Ascano nanfoan fasi tapicoianfo. Diosin noco yononi cuscari fasi tapicoianfo. Ascashon Diospan nai oinmatifo cufifafaincaini. Ascacashu tsoashatacai raqiri huamisima cuscarafu. Ascataricai aton caya afiri musu huamuafoma. Ascashu nanfo fasi sharacoinran, —ishon atohuunoa shinanmapaicani. Ascafia afocai isharacoinmisifoma. Ahuarafo chaca huaifo cuscacai shatutirofoma. Icon nanfofin cacapaimisi shunifo.

### 3

<sup>1</sup> Upa Diosin Furun Cristo funimani cuscan nanscarifi matori afu funimani cafisca huai man funa shara icain a cuscara shara icashu man afu rafunon. Cristo natian Apa fu ica a futan nantifi iquina. Ascacun ahuunoa shinanfain mato amapaiyai cuscan nanfohuunoi shinancahuun. <sup>2</sup> Ascacun Diosin fuchipaiyai cuscan nan fusti shinancahuun. Nanscacoinscaquin. Ascan nuno mai ano yorafoan chaca huapaiyaifo cuscan marifi asca huapaiyamacahuun.

<sup>3</sup> Afanan un mato yoi Cristo noco nashoni. Ascan manfin afu naa shinantsayoniquin. Natianfin man Cristo fu rafucain Upa Dios furi man icacaini. Nanscarifiai mato furi Upa Dios icacaini. Man ascafiaitocai tsoanshta ointirofoma man Cristo fu rafuai cuscan afu isharashcaquin.

<sup>4</sup> Ascano Cristo afanan mai ano oaitian nantifiton ointirofo non afu rafumisifo noco nimapacunaca. Ascashu Cristo shara fusti ica cuscain norifi non a cuscara sharacoin iishquin nantifi yorafoan oinshquicani.

*Non chaca iyopaoniflashu natian non funa sharacoin Jesús cuscara man non ica*

<sup>5</sup> Ascacun man chaca huapaoni cuscan afanan asca huayamacahuun. Ascarafo shinanyamacahuun. Ascatari maton ahuinma furi iyamacahuun. Nanscarifaiyainfofoan maton funuma furi iyamacahuun. Ascashon shinanchacayamacahuun. Nocofunufaoan maton ahuinma fuchipaiyamacahuun. Ainfofoan maton funumari fuchipaiyamacahuun. Ahuara chacafo fuchipaiyamacahuun. Mafin man fuchipaiyai cuscan fusti fuchipaiyamacahuun. Man ascaquicain Dios man noicoioma ahuaara futsa fusti man noicoi. <sup>6</sup> Nanscara chacafocai Diosin oinpaima. Ascacun nanscara chacafoqui Diosin fasi sinacoin. Nan yoitimamisifo ato onaintimashqui. <sup>7</sup> Ascano marifi man Dios nicacoiantaima man nanscara chacafo huapaoni.

<sup>8</sup> Man nansca huapaoniflashon natian nan chacafo shatucoincahuun. Ascatari afanan sinayamacahuun. Tsain fushnuicamitsamisi iyamacahuun. Futsafo noicasmacani aqui sinayamacahuun. Ascashon futsafori roayamacahuun. Tsain mutsama yoiyamacahuun. <sup>9</sup> Man chaca huapaoni cuscan man man potacoian. Ascashu paranonanyamacahuun. <sup>10</sup> Man ipaoni cuscan afanan atanma natian man Jesucristo catoon a cuscara shara iishquin. Ascan Upa Diosin mato nomuran onihua funa. A cuscara shara finacoinquin mato imafafainshquin ahunoa finonmafain onansharanon. <sup>11</sup> Non Cristo ifoacun Diosin nantifi nanscarasi huaquin noco oin. Israelifo yafi Israelifoma cunu tapiafo yafi cunu tapiamafori onicoinfo yafi nahuafo non yonomatifo yafi yonomatifomari Diosin nanscarafosi noco oin. Nantifi non Jesucristo ahuun yorafocun. Nan fusti non yopai.

<sup>12</sup> Ascashon matohuun fasi noiquin mato catonni ahuun yorafo man inon. A cuscara shara mato imashquin. Ascacun futsafohuun rama paicain ato shara huafafaincahuun. Iquisi futsafohuunoa shinanfain nan mafi man apaiyai cuscan shinantamarocon futsafoan apaiyaifo cuscari shinanshocahuun ato oi tsi huafainri yoifafaincahuun. <sup>13</sup> Futsan mato chaca huafiaiton ato copitamarocon yoisharafain rau huariscahuun. Nocon Ifoan mato rau huaa cuscan huafain futsafo ya rau huatanancahuun. <sup>14</sup> Ascano un mato yoia cuscacoin acahuun. Nanfo sharafiashu non nantifihuun noiainofin fasi shara finacayaquin. Ascatan non noinanshu non isharacointiro. Ahuara futsa sharafori nocon Ifoan yononi cuscan non noinanshu non nanscointiro.

<sup>15</sup> Ascacun Cristo nicacoinsharacahuun maton ointi sharamanocai man fochishmanantanantiroma. Ascataamarocon ahuunoashu ishara coincahuun yora fusti cuscara man itiroquin. Ascacun Upa Diosin mato catonni ahuunoashu isharacain futsafoqui man shinancha canonma. Ascaquin man Upa Dios yoitiro isca huaquin, —¡Aicho! Upa Diosin min uhuun ointi shara huashoran, —ishon yoifafaincahuun.

<sup>16</sup> Cristo noco tapimani cuscan huafain maton nomuran nanucoincahuun. Nantofin mato iquinaquin. Ascan ahuun tsain tapisharashon futsafo yari tapimatanancahuun isharashcaquin. Mato nomuranshon Diosin aicho huafain David fanainni cuscan fanain ishocain ahuun tsainhuunoari fanaincahuun. <sup>17</sup> Manfin nocon Ifo Jesús ahuun yorafoquin. Ascano nantifi man yoiai cuscan huafain man acai cuscan nantifiri yorafo ato ismacahuun matohuun caononfo. Ahuunshon Upa Dios

yoinonfo isca huaquin, —¡Aicho! Min ua shara huashomisiran, —ishon yoifafaincahuun.

*Non Jesús icoinra huafomain non ahuunoashu non ahuuscatiroquin*

<sup>18</sup> Ainfofoan nocon Ifoan mato yononi cuscan maton funufoan maton yoiyai cuscacoin acahuun.

<sup>19</sup> Nocofunufoan maton ahuinfohuun noicoincahuun. Ato tsain curushcain yoiyamacahuun.

<sup>20</sup> Facufoan maton upa yafi uhua nicasharacoinfafaincahuun. Man ascaino Diosin matoqui unimacoinon.

<sup>21</sup> Upafo yafi uhuafoan maton facufo tsain isininpaton yoiyamacahuun. Ascan maton facu man tsain isininpaton afafainnaino shinanquin isca huatiro, —¡Ohua! Uncai ahuuscatiroma uhuun upa yafi uhuun uhua uqui unimanon. Ua tsain isininpaton afafainnaino, —ishon facu shinantiro. Ascano upafo futan uhuafoan asca huaquifin mato facufo man aton ointi ihumatiroquin.

<sup>22</sup> Ascano yonomatifoan maton ifofo nicasharafain atori parayamacahuun. Ascan mato oiainfono fusti ato yonoshocaquima. Mato oianmafiaifono ato yonoshosharacahuun. Nan maton Ifocoin Jesucristohuun man noiaino matoqui unimanon ato yonoshosharacahuun.

<sup>23</sup> Ahuarashta yonocaquin nocon Ifoan curushhuushon yonoshosharacahuun. Nocofunufo fustihuunoashucaí man yonoima. Nocon Ifo Jesús nantifi noco oin. Ascan nocon Ifo yonoshosharacahuun. Anori shinanfain yonosharacahuun. <sup>24</sup> Ascashu ointiaquimayamacahuun nocon Ifo Cristo man yonoshosharaino afin chipo nocoqui nocoaitian mato inansharashquin. Nan aya cuscan huafain mato inain. Aafin maton Ifocoinquin. Ascan manfin nan yonoshoniquin. <sup>25</sup> Man chaca huaiton Diosin mato onaintimai. Diosin nanscarafosi noco oin. Ascan ratofoanmain chaca huaiquin nanfo ato onaintimai.

## 4

<sup>1</sup> Ascan ifofoan maton yonomatifo inansharafain ato parayamacahuun. Man man tapia marifi man ifoya. Maton Ifoan nai muranshon matori oinfainni.

<sup>2</sup> Ascacun Upa Dios cufinquin unuyamacahuun. Cufinquin ahua futsa shinancaquima. Upa Dios iconcoin fusti cufinquin isca huafafaincahuun, —¡Aicho! Upa Diosin min ua shara huafafainiran, —ishon cuficahuun. <sup>3</sup> Ascashori nocori cufishocahuun Upa Diosin mani futsafoanri noco nichiano non Cristohuunoa ato yoinon. Nannoa icafoancai tsoan Cristohuunoa nicayomisima. Ascan un Cristohuunoa tsain shara un yoiaiton ua futsafoan cunu muran iquimanifo. <sup>4</sup> Ua fasi cufishofafaincahuun Jesucristohuunoa shafacaficoín un yorafo ato yoinon.

<sup>5</sup> Ascashon Jesús icoinra huamafo fu icaquin ato ismasharacahuun man ishara cuscan. Ascashon man atoqui nocoaitifi Jesushuunoa yoisharafafaincahuun. <sup>6</sup> Ato fu tsaincaquin shara fusti ato yoifafaincahuun. Cayacaficoín ato yoicahuun aton nomuranshon shinanchacanonfoma. Man ascaquifin nantifi yorafo cayacaficoín man cumasharatiro.

*Pablonun ahuun tsain unutaquin Colosas anoafo tsain shara fomani*

<sup>7-8</sup> Ascano nocon yorahuan Tiquicohuun un fasi ahuun noicoín. Nanton u futan nocon Ifo Jesús yonoshomisiquin. Ascacun un Tíquico mato



ari nichicain un icai cuscan mato tapimafain urimain ahuuscaiquin mato tapimanon. Ascashon mato yoiaino shinansharafain maton ointi man unimanon. <sup>9</sup> Ascan uhuun yorahuan futsarifi Onésimo nanrifi mato ari nichí. Nanfin matofu ipaoniquin. Ahuunrifi un fasi noi. No futan nocon Ifo Jesús yonoshoqueicai unumisima. Nan rafu matoqui nococashon nonmain nunoashu ahuuscaiquin mato tapimanonfo.

<sup>10</sup> Ascano noco yora Aristarco yafi ua cunu muran iquimanifo. Nantonrifi mato tsain shara fomai. Ascan Marcos arifi mato yoisharapai. Nanfin Bernabé ahuan chaiquin. Ascacun nan Marcos matoqui nocoaiton un mato yoia cuscan ihuisharafain cushusharacahuun.

<sup>11</sup> Ascan nocon yorahua futsan ahuan anu Jesús nanrifi ahuan anu futsa Justo atorifi mato yoisharapai. Nanfoan uhuun caifo Israelifo u futan Dioshuunoa yoimisifo. Nanfoanri ua unimamamisifo. Ascan uhuun caifo futsafoancai u futan nunoshon Dios yonoshomisifo. Nan un mato yoiaifo futan Dioshuunoa un yoimisi.

<sup>12</sup> Epafra matofu iyopaoniton arifi mato yoisharapai. Nanrifi nocon ifo Jesucristo ahuan oinmati. Ascashon nanton mato Upa Dios cufishoqui isca huafafaini, —Upa Diosin min ato amapaiyai cuscan nantifi ato amahuu ahua futsa shinanonfoma. Ascashu min Furun Jesús ointi cuscara shara inonfo, —ishon nannori un mato Upa Dios cufishoquin huafafaini. <sup>13</sup> Ascacun un mato yoiai cuscan man icoinra huatiro. Epafra matofu yafi Laodicea anoafon Hierápolis anoaforifi mato fasi Upa Dios cufishofafaini. <sup>14</sup> Ascano nan nocon yorahuan Lucaspan yorafo cayahuamamisi. Nanhuunrifi un fasi noicoin. Nan Lucas futan Demaspan mato yoisharapaicani.

<sup>15</sup> Jesús icoinra huafo Laodicea anoafon ua ato yoisharashocahuun. Ascashon nan icoinra huafuta futsafo Ninfapan pushu muran ichananmisi-fori ua ato yoisharashocahuun.

<sup>16</sup> Ascan un na cunu mato fomai cuscan oinqui tau huashon nan icoinra huafuta Laodicea anoafon ato fomacahuun arifi oinonfo. Ascan nan un ato cunushona cuscari marifi oincahuun.

<sup>17</sup> Ascashon Arquipo ua yoiquin isca huaquin, —Upa Diosin mia yonoo cuscan acoinhuun, —ishon nannori ua yoishocahuun.

<sup>18</sup> Unquian Pablo un mato cunu fomai. Futsan ua cunushofiamisi natian uficoin ahuan unutaquin un mato cunushoni. Ascacun uhuun ointiaquimayamacahuun. Man man tapia ua cunu muran iquimanifo. Diosin matohuun ramapaicain matohuunoa shinansharapainon. Nanti.

Pablo

## Pablonun Tesalónica Anoafu Cunu Fomani

*Pablon futan Silvano Timoteo nan rafu non fustifain Tesalónica anoafu tsain fomani*

<sup>1</sup>Uhuun yoramishtichin Tesalónica anoafuan unquian Pablon un mato cunu fomai. Manfin Upa Diosin ahuun facufoquin Jesucristo maton Ifo. Ascan nuno Silas yafi Timoteo ufu icafo nan rafutan mato tsain shara fomai. Ascashon nocon Upa Diosin matohuun ramapaicain maton ointi shara huashonon.

*Tesalónica anoafuan Jesús icoinra huacoinnafo cuscan ato ismani*

<sup>2-3</sup>Un matohuunua shinaintifi Upa Dios cufinquin un isca huafafaini, —¡Aicho! Upa Diosin Tesalónica anoafu min ato shinanmashara. Ascan mia icoinra huacashon mia fasi noicoianfo. Ascashon mia yonosharashomisifo. Ascatan nocon Ifo Jesús funaquima manasharamisifo nocoqui afanan nasoshquiran, —ishon un shafatifi un mato Dios cufishofafaini. <sup>4</sup>Uhuun yoramishtichin Diosin matohuun fasi noicoinquin mato catonni man ahuun facufo inon. <sup>5</sup>Ascan noncai nocon tsain ipaitsi mato yoimisima. Ascatamarocon Diospan Yoshin Shara futan ahuun curushhuunshon non mato Jesushuunua tsain yoimisi. Ascacun man man icoinra huacoinni. Ascashon marifi man man tapian non mato muran matofu isharapaoni. Ascaiton marifi man Jesús icoinra huacoinni.

<sup>6</sup>Asca noco Ifohuun nocohuunri man caomisi. Mato futsafoan fasi omitsiscamafiaino non mato nan tsain shara Jesushuunua yoiaiton Diospan Yoshin Sharahuunshon man unimacoincain nicasharapaoni.

<sup>7</sup>Asca huacanashu nantifi icoinra huafu Macedonian anoafu non Acaya anoafori man ato oinmashara matohuun caotiro nocon Ifo Jesús tanasharanonfo. <sup>8-9</sup>Macedonia anoafu futan Acaya anoafuan matohuunshon nocon Ifoan tsain nicaquin tau huanifo. Non matohuunua ato yoiaima noco yoimisifo isca huacaquin, —Tesalónica anoafuan nocon Ifo Jesús fasi icoinra huacoinafo. Ascan Pablo yafi afu rafuafo fasi ato shara huafain yoiaifo cuscan ato nicasharapaicani. Ascashocai afanan ahuara futsa rami huacashon cufitirofoma. Nan Dios natian niacoin icoinra huafain man manayanan yonoshosharatiro. <sup>10</sup>Ascan nantian Apa Diosin nan chaca huamisifo manifoti ato onaintimaitiancai nan chaca huamisifo acai cuscan noco asca huaima. Ascatamarocon nocon numai norificai non atofu omitsiscaimaran, —ishon matohuunua nantififain yoiafo.

## 2

*Pablonun Tesalónica anoshon Jesús yonoshoni cuscan*

<sup>1</sup>Uhuun yoramishtichin man man tapia noncai ipaitsi matofu ipaonima. Non mato Jesushuunua tapimasharapaoni. <sup>2</sup>Man man tapia non matoqui nocoataima Filipos anoafuan noco omitsisca huafain noco roapaonifo. Ascashon noco shatumpafiaquicai Upa Diosin ahuun curush noco inanno non ranotiroma nan tsain shara Jesushuunua un mato yoini cuscan noco tsoan shatumanama. <sup>3</sup>Ascano man man tapia

un mato iconcoïn Diospan tsain yoiquicai un mato fuparamisima. Ascashon unricai mato yoïmisima isca huaquin, —Uhuunshon Tesalónica anoafon shinansharaforan, —ishocai un yoïmisima.

<sup>4</sup> Ascatamarocon Upa Diosin ua catonni un ahuun tsain shara Jesushuunoa mato yoinon. Ascacun noncai yorafo nocohuunoa shinansharamapaitiroma. Ascatamarocon Dios fusti nocohuunoa non unimapai. Nan fustiton nocon nomuranshon non shinain cuscan nantifi tapicoïan. <sup>5</sup> Man man tapia uncai matohuunoa tsain shara yoïmisima marifi man uhuunoa shinansharanon. Unricai mato fuparamisima ua ahudara inansharanonfo ishon. Un mato iconcoïn yoïmisi cuscan Upa Diosin tapicoïan. Nanto ua oïnfafainni.

<sup>6</sup> Noncai tsoa futsafo curafia huamapaipacunacama. <sup>7</sup> Ascacia non Cristo fu rafumisicun noco nichini ahuun tsain mato yoinon. Ascacufin non mato yonopaiquin non mato yono cuamisi man noco nicasharafain non yopai cuscan man noco inanon. Ascaciafai non asca huapaipaonima. Non matofu ipaoni nan facu yomushta ahuan cushusharatiro cuscan nanscarifi non mato huapaoni. <sup>8</sup> Non mato fasi noicoïnquin unimacain non mato Diosin tsain shara yoïfiai nan fusti non mato inanmusharapaoni fasi matohuun noiquin. <sup>9</sup> Uhuun yoramishtichin manmun oïntiaquimamanmun un mato murannoashu curushcain yonopaoni. Ascaciaqui un ahudara yopafiaquicai cashman un mato yocaquin fucash huapaonima. Ascatamarocon mato Diosin tsain shara yoïyanan shafatifi yafi yamuri un yonopaoni un yopai cuscan fiishquin.

<sup>10</sup> Ascano man Jesús icoinra huaa muran un matofu icai chain man man oïnyopaoni. Jesús cuscara isharacain unricai ahua chaca huapaonima. Un ascaiton maficoïn uhuunoa man man oïnpaoni. <sup>11-12</sup> Apan ahuun facufo noicoïnquin ato yoïsharatiro isharanonfo. Nanscarifi aquin un mato yoïsharapaoni man isharacain maton oïnti man unimanon. Ascashon Upa Diosin mato imapaiyai cuscan a cuscara man inon. Nantorifi mato catonni afu man Jesús cuscara shara ipanon.

<sup>13</sup> Un mato Diospan tsain yoïaino man yoïni isca huaquin, —Nan tsain shara min noco yoïai cuscacai nocofunun tsainma. Nan Diospan tsainran, —ishon man yoïni. Icon non mato Diospan tsaincoïn yoïmisi. Ascaiton ahuun tsain nicaquin man icoinra huaiton mato fiananan huaa Jesús cuscara man inon. <sup>14</sup> Uhuun yoramishtichin Diospan yorafo nan Dios fu tsainti pushu anoafo ichananmisifoti Judea anoafohuun man man caoa. Ascano matorifi maton caïfoan mato omitsisca huamisifo cuscan nanfoanrifi Jesucristo icoinra huaïfoan oïnquin aton caïfo Israelïfoan ato omitsisca huamisifo. <sup>15-16</sup> Ascashon nocon Ifo Jesús rutufain ahuun tsain yoïmisifori rutunifo. Ascano nocorifi atomaquishon potanifo. Noco asca huaïfoan oïncai Upa Diosin atoui unimaima. Nantifi yorafo chaca huapaïcaini. Nocori shatumapaïcaini non nocon caïfoma Jesushuunoa yoinonma ato numapaiquin Dios fu ipanonfo. Ascashocai Dios chaca huaquin unumisifoma. Ascaïfoan oïnquin Diosin afanan tunuyamacaiquin ato fasi onaintimai.

*Pablonun afanan Tesalónica anoafo oïnpaini*

<sup>17</sup> Uhuun yoramishtichin non matomaquinoashu canishaquin non mato fasi shinanfaini. Afanan matofu ipaiquin. Ascan afanan non mato oïncapafïain non catiroma. <sup>18</sup> Un mato ari fasi capaicacafïain

Satanás noco catima huamisi. <sup>19</sup> Non mato yosimisi Jesús cuscara shara man inon. Ascano Jesucristo nocoaitian nantifain tapitirofo man Jesús tanacoinmisi. Nantian Jesús ahuun ointaifi non matohuunoashu unimacoinshquin non mato yosipaoni cuscan man nicacoinmisi. <sup>20</sup> Icon noco huunshon man Jesús icoinra huacoincun non unimai. Ascano Upa Diosin arifi noco aicho huatiro.

### 3

<sup>1-3</sup> Un fasi matohuun noi. Mato ari fasi capaifiaquicai un tapinima ahuuscashumain un mato ari catiroquin. Fasi un mato ari capaifiaquicai afanan un tunutiroma matohuunoa tapipai. Ascan un shinan ufcuin Atenas ano un nituyoi. Ascashon Timoteo un matoqui nichishquin. Arifi no fu Diospan facu. Ascashon no futan Upa Dios yonoshquin tsain shara Cristohuunoa yoifoanfainmisi. Ascacun un Timoteo matoqui nichini mato yoisharanon man Jesús tanasharaquin finacoianshu man omitsiscafiquin man tunucoinnon.

<sup>4</sup> Asca tsoa futsan omitsisca huataima non mato yoini isca huaquin, —Non Jesús tanasharaiton nan Jesús noicasmaifoan noco omitsisca huashquiran, —ishon non mato yoiyoni. Non mato yoifafainpaoni cuscan man nansacoian. Nantian man man tapia non icocoin Jesushuunshon noco omitsisca huamisifo. <sup>5</sup> Ascacun un matohuunoa fasi tapipaifain. Un mato fasi shinancoinpaoni. Ascashon un Timoteo mato ari nichini man Jesús icoinra huapaoni cuscan nantianrifi man nansca huamun ua tapimashquin. Uhuun nomuran un ratuni Satanás mato chaca huamapaiyai cuscan man nansca huaimainquin. Ascashon man Satanás tanaino non mato ipaitsi yosipaoni itiro.

<sup>6</sup> Ascafia ascarama. Timoteo afanan mato anoashu nocoqui nocotoshishon matohuunoa tsain shara noco yoia. Man Jesús icoinra huafain man nantifihuun noicoin. Ascatan noco huunoaari man shinansharafain fasi nocorifi man oinpaicoian. Nanscarifi aquin norifi non mato fasi oinpaicoin. <sup>7</sup> Ascacufin uhuun yoramishtichin noco Jesushuunshon omitsisca huafain ahua futsafoanri noco fucash huapaifaifono man Jesús icoinra huacoinnaino non shinansharatiro. <sup>8</sup> Ascan man manfin Jesús tanasharaquin. Mancai ahua futsan afanan shinainma. Nan non tapiaitian non fasi unimacoincain non isharatiro. Ahuara ahuuscarafaino non tunutiro. <sup>9</sup> Non matohuunoa shinanquin non Upa Dios cufiaitian nocon nomuran non fasi unimacoincai. Non matohuunshon Dios cufinquin aicho huafafaini. <sup>10</sup> Shafatifi yafi yamutifi non mato Dios cufishofafaini noco mato ari nichiano non mato afanan oinon. Ascano man ahuafo tapisharatayamaiton un mato tapimashquin man Jesús icoinra huaquin finacoinon.

<sup>11</sup> Asca nocon Upa Dios futan nocon Ifo Jesucriston matoqui afanan noco nichipainon. <sup>12</sup> Nocon Ifoan mato shinanmasharaino man noinain finacoinschaquin. Futsafo man noisharanon. Non matohuun noicoian cuscan marifi nantifi yorafo man finacoinquin noisharapainon. Non mato noiai cuscan man nantifiri noicoinnon. <sup>13</sup> Man ascaiton Diosin maton nomuran mato mutsismai Jesús tanasharafain man ahua chaca huanonma. Ascaino nocon Ifo Jesús ahuun yorafoya oaitian marifi man a cuscara shara Upa Dios ointaifi man ishquin.

## 4

*Ahuuscashumain non isharatiroquin Upa Diosin nocoqui unimanon*

<sup>1</sup> Uhuun yoramishtichin uhuun tsain unutaqui un mato yoinon. Non mato yosipaoni ahuuscashumain man itiroquin Diosin matoqui unimanon. Nan non mato yosipaoni cuscan man man nanscacoian. Ascacun afanan non mato yoi noco nicacoincapun. Man Dios tanashara cuscan nocon Ifo Jesushuunshon fasi finacoinquin tanasharacahuun.

<sup>2</sup> Man man tapian nocon Ifo Jesús noco yononi cuscan nannoricoin non mato tapimapaoni. <sup>3-5</sup> Ascano noco Upa Diosin mato a cuscara shara imapaia man maton ahuinma fu iyamacain ainfofori aton funuma fu inonfoma. Ascan man ascaino nan Jesús icoinra huayamafain Dios onanmisimafoan chaca huamisifo cuscaai huatamarocon nan Diosin yononi cuscan maton ahuin fusti fu man isharatiro. <sup>6</sup> Nannori Upa Diosin yononi, —Futsafoan aton ahuin fu ipaiyamacahuun. Tsoa fomanyamacahuun futsan ahuin fu ishquin, —ishon Diosin yononi. Ascan non mato yosini cuscan tsoa ascayamaquin chaca huaiton Upa Diosin ato onaintimacoin. <sup>7</sup> Upa Diosicai noco catonnima non furoma inon. Ascatarocon noco catonni non a cuscara shara inon. <sup>8</sup> Ascacufin tsoan un mato yosimisi cuscan nicayamai atocai nocofunu fustisi nicacasmaima. Dioscoinrifi nicacasmamisi. Nanton ahuun Yoshin Shara mato inan mato amapaiyai cuscan man tapinon.

<sup>9</sup> Uhuun tsaincai man yopaima noinanshquin. Upa Diosifin afin mato tapimaicain man noinanon. <sup>10</sup> Man non tapia man nantifi icoinra huafo Macedonia anoshon man noicoian. Ascacufin non mato yoisharapaicain fasi finacoinquin man ato noicoinnon. <sup>11</sup> Ascacun isharacahuun maton nomuran ahuaton fucash huanonma. Futsan acai cuscahuunoa shinanchacashoyamacahuun. Diosin mato amapaiyai cuscan fustisi acahuun. Nannori non mato yoimisi. <sup>12</sup> Man asca huaiton icoinra huamafoan mato oinquin matohuunoa shinansharatirofo. Man yopai cuscan mafi man fitiroquin. Ascan mancai futsafona ato yocaima.

*Jesús afanan oaitian*

<sup>13</sup> Uhuun yoramishtichin, un mato yosiain cuscan huafain nicasharacahuun. Jesús icoinra huafo naashumain ahuuscacanimainquin un mato tapimai icoinra huamafoan ahuun yora naacun manoaifo cuscan marifi man ato cuscara iquima. Afoan shinancani ato yora naacun non afanan ato oinnacamaran icashu. <sup>14</sup> Jesús nafiashu afanan funini. Nan non icoinra huai. Ascan Jesús afanan oaitian icoinra huafo nan namisifo Upa Diosin atorifi funimashquin afu inonfo.

<sup>15</sup> Non mato yoia cuscan nan Diosin tsaincain. Nocon Ifo nai ariashu oaitian nan niyoafocai nocon Ifoqui nocoli tau canima. Ascafia Jesús icoinra huacanashu nan niyoafo yafi namisifo nannoranan nocon Ifoqui nocoshcaini. Nanscafin anonpacoiquin. <sup>16</sup> Ascashon noco nai muran ichanan huashquin. Tau huaquin Diosin ahuun manuti fasi chaan chaan aashquin. Chaan chaan acaino Diospan oinmatifo nan a fu imisifo aton niaifoan oi ashcafinin cunashquin isca huaquin, —Nan man Jesús icoinra huafoti nan namisifo yafi niyoafori fucahuun. Jesús fu nai muran ichananshquin, —ishon ato yonoshquin. Nanscatapaiyaino nocon Ifo Jesús nai murannoashu fotoriscashquin. Ascano nan Jesús icoinra huashu namisifo funitaushcaini.

<sup>17</sup> Ascan non nuno mai ano niyoafori non atofu funi caishqui nai coin muran nocon Ifo Jesús fu ichananshquin. Ascashu nantishotapiquin non afu ipanaca. <sup>18</sup> Ascacun nan tsain shara futsafo ya yoinancahuun maton nomuran unimashcaquin.

## 5

<sup>1-3</sup> Uhuun yoramishtichin ahuutianmain Jesús oshquicain tsoashtacai tapiama. Ascacun nanfohuunoa un mato tapimayoi. Man man tapia yomutson pushu muran iquiataimacain pushu muran icafo ato tapimayotiroma. Rato yamumain iquiriscatoshinica tsoancai tapitiroma. Nanscarifiai nocon Ifo Jesús mai ano oaitiancai tsoan tapiyotiroma. Nocoti chaima icoinra huamafoan isca huashcani, —Nonfin isharacoianquin. Ahuatocai noco ahuusca huatiromaran, —ishon yoishquicani. Anori yoiiafono nantianri samamashtacoin omitsiscariscatashcani. Ascan ainfoan facu nanuashu caiyaintian isin muriscatiro. Nanscarifiai omitsiscai nocoaitian tsoan futsancai nan omitsiscai finotiroma. Raquiricai onutiroma omitsiscashquima.

<sup>4</sup> Ascafia uhuun yoramishtichin mancai icoinra huamafo cuscarama. Man man shafacafi tapia nocon Ifo nocoriscai cuscan. Ascacun man iquisi itisharatiro. Ascashuca nan nocoaitian man mustairitiroma. <sup>5</sup> Icoinra huamafo faquish muran icafo cafiscái. Ascashon ahuafo chipo iishquiai cuscacai tapiafoma. Ascan mancai ato cuscarama. Marificai man faquish muran icafo cafiscaima. Ascatarocon manfin nan shafa muran iqui cafiscaiquin. Jesús inonpacoai noco yoipaoni cuscan man man tapia.

<sup>6</sup> Ascacun noncai itisharafoma cuscarama. Nanfoan niyoashu nan oshan muran cuscarafoma. Jesús oaitianhuunocai shinanfoma itisharashquin. Ato cuscara iyamacahuun. Nantishotapiquin Diospan tsain nicasharacahuun Jesús oaitian man itisharashcaquin. Ahua chaca shinantamarocon afin mato amapaiyai cuscan fusti shinancahuun. <sup>7</sup> Icoinra huamisimafoan yamu ifafainaifo cuscara. Nan oshamisifo yamu pauncani. <sup>8</sup> Ascafia noncai nan cuscarafoma. Nonfin yora nan shafatoca ishara cuscarafuquin. Ascano Diosin mato amapaiyai cuscan shinanfafaicahuun. Jesús icoinra huacoincahuun. Futsafohuun noicoincahuun. Man ascainocai yoshin chacafoan mato chaca huamatiroma. Jesús noco numani afanan chaca nocon Ifo itamarocon afin noco Ifo inon non afu ipaishquin. Nanfo man tapicoian cuscan huafain shinancahuun. <sup>9-10</sup> Diosicai noco catonnima nocoqui sinaquin omitsiscapanacafoma muran noco potashquin. Ascatarocon noco catonni Jesucristohuunshon nocon chaca soashoshquin non afu nipanon. Ascano nan noco nashoni oaitian non niashu iyamarai naashu non afu ipanon. <sup>11</sup> Ascacufin futsafoan aton nomuran unimamacahuun. Mun tapian manfin nanscacoimisiquin. Ascashon nanscasi huariacahuun. Jesús tanamatanacahuun.

*Pablonun ahuun tsain unutaquin ato yosisharani*

<sup>12</sup> Uhuun yoramishtichin un mato yosisharapai. Ua nicasharacapun. Upa Diosin nan tapimamisifo catonni ahuun tsain mato yosinonfo. Nanfoan mato curushcain yonosharashomisifo nocon Ifo man tanasharonon. Ascan atohuunoa shinansharafain ato nicasharacahuun. <sup>13</sup> Nocon

Ifohuunshon mato yonosharashomisifo. Ascacun atohuunoa shinan-sharafain ato noicoincuahuun mafiran an fochishmanantananyamacain isharacoincahuun.

<sup>14</sup> Uhuun yoramishtichin ua nicasharacapun. Nan shanimsisifo yoicahuun shaninonfoma yonosharashcaquin. Aqui tushcuimisisifori yoisharacahuun nocon Ifo mutsisipa tanasharanonfo. Nan samamashta chaca shinanmisifo ato oinmasharacahuun man atohuun noiquin man ato cufishotiro chaca huanonfoma. Nantifihuun noicoincuquin ato oitsii huasho yoisharacahuun. Ascatan ahua ahuuscarafiaino atohuun patsicain ato yoisharacahuun.

<sup>15</sup> Futsan mato chaca huaiton ato copiyamacahuun. Ascataमारocon nantishotapiquin shara huatanancahuun. Nantifi yorafo shara huacahuun.

<sup>16</sup> Unimafaincahuun. <sup>17</sup> Dios fu tsainfaincahuun. <sup>18</sup> Ahuara ahuuscarafiaino yoiquin isca huacahuun, —¡Aicho! Upa Diosin, min ufu icacainiran, —ishon yoicahuun. Manfin Cristo Jesús icoinra huamisiquin. Ascan Upa Diosin nannori mato shinanmapai. Man asca huaiton Diosin fuchipai.

<sup>19</sup> Diosin Yoshin Sharapan mato amapaiyai cuscan shatuyamacahuun. <sup>20</sup> Futsafoan Dioshuunshon mato yoiaiton, —Nanton yoiyai cuscacai ahuamaran, —ishon shinaryamacahuun. <sup>21</sup> Ahuara futsan mato yosipaiyaiton Diospan Yoshin Sharahuunshon a yocacahuun nan tsain yoiyai cuscain icon iyamarai iconmaquin. Ascano nan tsain icon fusti tanasharacahuun. Tsain iconma icoinra huayamacahuun. <sup>22</sup> Ahuara chaca fishtayamacahuun.

<sup>23</sup> Diosin fustiton nocon nomuran isharamatiro noco fucashhuanonma. Nantofin mato imasharacoinquin ahuun ointi cuscara man inon. Ascashon maton cushusharafain maton nomuranri cushushara ahua shara fusti man shinanon. Upa Diosin mato nanscaco huaino nocon Ifo Jesucristo afanan oaitian matoqui shinanasharashquin. <sup>24</sup> Diosin mato catonni man icoinra huanon. Diosin noco ahua yoiyai cuscacai noco paratiroma. Noco ashoshquin.

*Pablonun ahuun tsain unutaquin ato cunushoni*

<sup>25</sup> Uhuun yoramishtichin noco Upa Dios cufishocahuun.

<sup>26</sup> Nantifi yoinonansharacahuun.

<sup>27</sup> Ascashon Upa Diosin mato yonoa cuscan nicasharacahuun. Nan man icoinra huafoti un mato cunu fomaicai ato nicamacahuun.

<sup>28</sup> Nocon Ifo Jesucriston mato shara huamayai cuscan mato asca huamapainon. Nanti.

Pablo

## Pablonun Tesalónica Anoafó Afanan Cunu Fomani

*Pablonun Jesús icoinra huafo Tesalónica anoafó cunu fomani*

<sup>1</sup> Unquian Pablo un mato cunu fomaino Silvano futan Timoteo mato yoisharapaicani. Nan rafu nuno ufu icafo. Ascacun uhuun yoramishtichin Tesalónica anoafóan manfin Diospan facufoquin. Ascano Furun Jesucristo mato Ifocoin. Man ichananmisi ahuunoa shinanshcaquin. <sup>2</sup> Apa futan man yopai cuscan mato inantiro ahuun Yoshin Sharapan matohuun ramapaiqui mato nomuran mato shinansharamatiro. Mato asca huanon.

*Cristo nasoaítian nan icoinra huamafo Upa Diosin ato onaintimashqui*

<sup>3</sup> Uhuun yoramishtichin man Jesús icoinra huaquin tau huani cuscan natian man fasi finacoquin icoinra huashu fasi man noinancoinna. Ascan un mato Dios cufishonaitian un cufinquin isca huafafaini, —¡Aicho! Upa Diosin min yorafo Tesalónica anoafóan fasi mia tanasharacoianforan, —ishon un mato cufishomisi. <sup>4</sup> Ascacun un mai futsafo ari cashu nan icoinra huafo fu un ichanaintian matohuunoa un ato yoisharamisi isca huaquin, —Nan icoinra huafo Tesalónica anoafó ahuun caifo futsafoan ato omitsisca huamisifo. Ascafia ahuara chaça futsa finonfiacaquicai aton nomuranshon shinanchacatamarocon Jesús icoinra huacashon tunucoianfo, —un yoimisi. <sup>5</sup> Ascacufin Jesushuunoashu omitsiscaquin man tapitiro Diosin cayacafi shinanquin mato itishara huua afu man ipanon. Ascashu natian man omitsiscashiashu chipo man afu isharapacunaca.

<sup>6</sup> Diosin iconcoïn fustisi. Ascacufin ahuunoashu man omitsiscainquin nan mato omitsisca huaifofin aafin aton chipo onaintimaquin omitsiscamacoïnshquin. <sup>7-10</sup> Ascashu nocon Ifo Jesús mai ano nasoaítian noco numai oshquin non afanan omitsiscapanonma. Nan oaítianri ahuun oinmati mutsisipafori nai ariashu afu fotoshcani. Ascaino nantifi ahuun yora nan cuscara sharacoïnfo aqui unimacaquin ahuunoa non yoiquin isca huashquin, —¡Aicho! Nocon Ifo Jesús tosa futsacai mia cuscarama. Min nantifi finoncoian. Min sharacoïn. Non mia noiran, —ishon non yoishquin. Ascan non mato Jesushuunoa yoipaoni cuscan man man icoinra huua. Ascashu nan Jesús nocoaitian marifi man noco futan yoisharashquin. Ascan nantianri Apa Dios icoinra huayamafain ahuun tsain shara ahuunoa yoiaifo cuscan nicacasmamisifo omitsiscapanacafó muran ato potashquin. Anoashucaï tosa raqui fopanacama. Nocon Ifo Jesús icanoricai nocopacunacafoma. Ahuun curush shararicai tsoan oinnacama.

<sup>11</sup> Ascacufin non mato cufishoquin isca huafafaini, —Upa Diosin min ato imapaiyai cuscan ato imahuu. Mia icoinra huashon futsafori shara huapaiyaifo cuscan min curush ato inanhuun, —ishon Upa Dios un nantishon tapiquin mato cufishomisi. <sup>12</sup> Non mato nannori Upa Dios cufimisi futsafoan mato oinquin arifi nocon Ifo Jesushuunoa yoisharanonfo isca huacaquin, —Jesús ahuamamishti huatiro. Ascashon ahuun yorafo nan cuscara sharacoïnfo ato imaran, —ishon ahuunoa



yoisharanonfo. Ascano Upa Dios futan noco Ifo Jesucriston matohuun ramapaiyaino mato nanscara shara huatiroquin.

## 2

*Na nocofunu chacahuunshon Dios nicacasmamisifoquin ishon ato yoi*

<sup>1-2</sup> Ascán nocon Ifo Jesucristo afanan oaitian nantian nan icoinra huafoti non aquí noconain futsui afu ipashquin. Ascafia futsafoan maton parapaicani isca huaquin, —Jesús man oshon inonpacoai cuscan ua tapimanan, —ishon futsan mato yoiaraca. Ascán futsanriracan mato yoi isca huaquin, —Man non nica Jesús man oaran, —ishon futsan yoiaino futsanri yoi Pablonun noco cunu fuma, —Jesús man oaran, —ishon mato yoiflashucai icoinma. Ascacun mustairiyamacahuun. Un mato yoinon. Jesús mai ano nocoaino nantifi icoinra huafo afu ichanan-shquin. Ascashu afu ipanaca. Mato yoisharapaiyaiton nicasharacahuun. <sup>3</sup> Nan chanimisifo icoinra huayamacahuun. Jesús oataima iquisi nan manifoti anoshon Upa Diosin tsain potacani afanan nicapaicanima. Fasi finacaia yoitima ishcaquin. Nantianri nocofunun chaca finacoian yorafoan ointirofo. Nantocaifin Diosin yononi cuscan nicacasmacoinquin. Nanfin Satanás yoraquin. Ascafia chipo omitsiscapanacafo muran caashquin. <sup>4</sup> Ascán niyoshon nan nocofunun chaca yoishquin isca huaquin, —Un nantifi finoncoian. Nan man yoia, “Nocon Diosiran,” ishon cufimisifo. Ascán nancai Diosimaran, —ishon ato yoishquin. Ascatan Dios fu tsainti pushu muran iquishon ato yoishquin isca huaquin, —Ahuara futsa cufiyamafain ahuara futsari noiyamacahuun. Unfin Diosiquin, —ishon ato paranshquin.

<sup>5</sup> ¿Man ointiaquimanamanmun un matofu iyoshon nanfohuunoa un mato yoipaoni? <sup>6</sup> ¿Ascán man shinanmamun un mato yoini isca huaquin, —Nan nocofunu chacacoin Upa Diosin nitumayoi. Ascashon nan Upa Diosin nitun huayamaino caashquin yorafoan oinonfo, —ishon un mato yoini? <sup>7</sup> Nan noicasmamisi nitumayoicai oataima. Chipó Upa Diosin afanan nan nocofunu Satanashuunshon chaca huamisi nitun huayamaino nocoshquin. Acai nocoataimafia nan Satanashuunshon natianri chaca huafiacaquin fomanpaicani. <sup>8</sup> Chipó nan nocofunu chacacoin Satanashuunshon yonomisi nocoshquin. Ascaiton nocon Ifo Jesús ahuun tsainman rutushon omitsiscapanacafo muran potashquin. <sup>9</sup> Nan rutuataima Satanás curushhuunshon nan nocofunu chacacoinni tsoan oinyomisima cuscara Satanás yonopan nanscarafo huashquin yorafo parashquin. <sup>10</sup> Nan nocofunun icoinra huamafo aton parashquin. Ascashon chaca futsa futsatapafo huaiton oinquin nan icoinra huacanashu arifi nanfo omitsiscapanacafo muran foshquicani. Nanfoancai Diosin tsain iconcain nicapaiyamafain tsoanricai nan tsain shara noimisifoma Dios fu ipashcaquin. Ascashu omitsiscapanacafo muran foshcaini. <sup>11</sup> Ascacufin Diosicai afanan aton nomuran nitun huaima nan paramisifoan ato yoiafo cuscan icoinra huanonfo. <sup>12</sup> Ascashon nanfoanricai Diospan tsain iconcain fusti icoinra huayamafain tsoanri noipaimisima. Ascatarocon chaca fustisi fuchipaiyaifoan Upa Diosin ato omitsiscapanacafo muran potashquin nan paramisi futsafo fu ipanonfo.

*Diosin noco catonni nocon chaca soashu afu non ipanon*

<sup>13</sup> Ascafia uhuun yoramishtichin mancai ascarama. Nocon Ifo mato-huun noicoinguin Upa Diosin mato catonni. Ascano mancai omitsiscapanacafu muran catamarocon ahuun Yoshin Sharapan ahuun tsain iconcoin man man icoinra huaa. <sup>14</sup> Ascano ahuun tsain shara Jesucristohuunoa non mato yoiai cuscan nocohuunshon man man tapian. Ascashon marifi man icoinra huaiton Furun Jesucristo funimani cuscan matorifi funimashquin a icano man afu ipanon.

<sup>15</sup> Ascacufin uhuun yoramishtichin, non mato iconcoin yosimisi cuscan nan fusti tanasharacoincahuun. Ascans man oian ahua futsa ascarayamacun afo tanayamacahuun. Non mato yoipaoni cuscan nan fusti icoinra huafain non mato cunushoni cuscari nanrifi shinancahuun. <sup>16</sup> Nocon Ifo Jesucriston futan nocon Upa Diosinri nocohuun noifain nocohuun ramapaiquin. Nocon nomuran noco unimapacunaca. Ascacun non tapitiro nococai potapacunacama non afu ipanon. <sup>17</sup> Ascacun maton nomuran unimafain ahuun curush mato inanpainon ahua ahuuscarafaiino man yorafo yoisharafain ahua man ato ashosharafafainon.

### 3

#### *Noco Upa Dios cufishocahuun*

<sup>1</sup> Ascans uhuun yoramishtichin uhuun tsain unutaqui un mato yoinon. Ascano noco Upa Dios yocashocahuun nocon Ifoan tsain shara man nica cuscan huafain noco Ifohuunoa nantifi futsafori yoicahuun arifi onihuafoanricai futsafori samamashta yoiaifoan icoinra huanonfo. <sup>2</sup> Ascano atifitocai nocon Ifo Jesús icoinra huacanima. Ascacun noco Upa cufishocahuun noco numanon nan yora shinanchacamisifo futan nan isharamisifoanmari noco ahuusca huanonma. Ascashon Jesushuunoa non tsain shara yoiai cuscan noco shatumanonfoma.

<sup>3</sup> Ascafia nocon Ifo no fu icacaini. Ascashon nocon yoimisi cuscan noco huashoshquin. Nan yoshin chaca Satanás noco omitsiscamapafaiton nocon Ifoan noco mutsismafain noco cushusharafafaini. <sup>4</sup> Non mato-huunoa shinansharamisi cuscan non icoinra huai. Ascashon non mato yononi cuscan man nanscasi amisi. Natianrifi man nanscasiariai. Nan non icoinra huai. <sup>5</sup> Upa Diosin fasi matohuun noiai nocon Ifoan mato tapimapainon. Cristo ahua ahuuscarafaiino tunucoinni cuscan marifi ahuunshon man tapisharapainon.

#### *Nantifain non Jesús yonoshosharanon*

<sup>6</sup> Uhuun yoramishtichin nocon Ifo Jesucristohuunshon un mato yonoi. Icoinra huaa futsanfoan noco nicacasmatan yonocasmái shanimisifo fu rafuyamacahuun. <sup>7</sup> Man man tapishara non maton muran icashu non shanitamarocon non yonosharapaoni. Non yonoai cuscan marifi nocon fu yonosharacahuun. Nocohuun caoncahuun. <sup>8</sup> Non matofu icai chaincai maton tushu non cashman mato pianpaonima. Ascatarocon nantishotapiquin curushcain non yonopaoni ahuun rafanan pui fishon norifi piishquin. Ascans marifi marus fusti maton pui man ichapa potanonma. Non yonoi nanscapaoni.

<sup>9</sup> Diospan tsain yononi isca huaquin, —Nan mato Diosin tsain yoimisifo yopaifo cuscan ato inancahuun, —ishon cununi. Ascans un mato yocapaiquin iconcoin un mato yocacuana. Ascafia non mato oinmasharapaiquicai non mato ahua cashman yocamisima. <sup>10</sup> Man man

shinainmun non mato muran ishon non mato yoini isca huaquin, — Tsoan yonoshomacai pitiromaran, —ishon mato yoini.

<sup>11</sup> Ascashon matohuunoa noco yoiäfo isca huaquin, —Atirifi oni-huanifoti yonocasmacani. Ascashu cahuascaquin chani fusti yoifoan-fafaincaniran, —ishon matohuunoa noco tapimanafo. <sup>12</sup> Ascano nocon Ifo Jesucristohuunshon non mato na cuscaräfo non yoi man afanan ascanonma. Uncai uhuun tsain fustiton un ato yoi fustima. Unrifi mato yonoi. Ascacun afanan ascayamacahuun. Afanan foanfafainyamacahuun. Ascatarocon yonosharacahuun ahuun rafanan pui fishon man yopai cuscan fishcaquin.

<sup>13</sup> Ascacun uhuun yoramishtichin nan man yonosharamisifo un mato yoisharapai. Man futsäfo shara huamisi cuscan unupaiyamacahuun. <sup>14</sup> Ascän tsoan un mato yonöa cuscan nicacasmaiton oin afu rafuyamacahuun. Man ascaino rafipainon Diosin tsain nicacasmashu. <sup>15</sup> Nanscara yora fucäi tsoan rafutiroma. Ascäfia shinänqui isca huayamacahuun, — Un noicasma cuscararan, —ishon anori shinanyamacahuun. Ascashon nan mato yoracoinhuun man shinain cuscan atohuurifi shinancahuun.

*Pablonun ahuun tsain unutaquin ato cunushoni*

<sup>16</sup> Nocon Ifoan arus fusti nocon ointi unimamatiro. Shafatifi ahuara ahuuscarafiaino maton ointi mato unimapainon. Nocon Ifo nantifi matofu isharanon.

<sup>17</sup> Unquian Pablo nantian uficoïn uhuun mucupan un mato cunushoni. Ascano oinquin man tapitiro uficoïn un mato cunushoni. Ascän nan un cunüaiti un nansca huamisi. <sup>18</sup> Nocon Ifo Jesucriston nantifihuun matohuun ramapai. Nanti.

Pablo

## Pablonun Timoteo Cunu Fomani

### *Pablonun Timoteo cunu fomani*

<sup>1</sup> Unquian Pablo un mia cunu fomai min tapinon. Upan Diosin ua catonni Furu fu rafunon ahuun tsain Cristo Jesushuunoa un yoifafainon. Nan nocon Numamisi Jesucristo futan ua yononi manifoti isca huaquin un yoinon, —Jesucriston noco nashonishaquin arus fusti noco Upa Dios ari iyoshquinran, —ishon un ato yoinon. <sup>2</sup> Ascano un mia Jesucristohuunoa yoiaiton min icoinra huani. Ascacun min icoinra huahuunshon min uhuun facu cuscaracoin. Un mihuun fasi noi. Nocon Upa Diosin futan nocon Ifo Cristo Jesús mia noiquin mia cushusharafain mihuunrifi ramapaia. Ascashon min ointi mia main huamanon.

### *Futsan amaquri mato yosiaiton icoinra huafo yoihuu ato nicanonfoma*

<sup>3</sup> Ascan un Macedonia ano caquin un mia yoini isca huaquin, —Efeso anoashu cariyamahuun. Anoa futsafoan ato Diospan tsain amaquri yosimisifo. Ato yoihuu afanan asca huaquin yosinonfoma, —ishon mia yoini. <sup>4</sup> Non Diosin tsain yosiquin futsafo non yoitiro Jesús icoinra huanonfo. Ascan nan amaquri yosimisifoan asca huatamarocon shunipafo yafi aton shunifohuunoari yoiäfo. Non yosiqui asca huaitocai Diosin noco icoinra huamapaiyai cuscan tsoan tapitiroma. Nicafiacani afohuunoa fochishmanantantirofo. Ascashon ato yoihuu afanan shunipafo yoinonfoma. Aton tsain shatumahuu.

<sup>5</sup> Un nannori yonoo noinanfo. Ascashucaí non nocon ointi muran ahuashta shinanchacatamarocon shinanshara fustifain nocon nomuranshori non nocohuunoo ahuacai chaca shinanyamafain non Jesús icoinra huacoinnai cuscan non futsafo noicointiro. <sup>6</sup> Atiriffaincaí asca huacanima. Ascatarocon Diosin yonoo cuscan man cachiquiri huafo. Ascashon tsain ahuama ipaitsi yoimisifo. <sup>7</sup> Ascashon Moisés nocon yononi cuscan futsafo tapimapaicaqui nanfoan yoimisifo isca huaquin, —Moisés yononi cuscan man non fasi tapicoiran, —ishon yoifiamisishacaquicai yosipaiyaifo cuscan tapicoianfoma.

<sup>8</sup> Man non tapia Moisés yononi cuscan shara yosimainquin cayacaficoín futsafoan nicasharatiro isharashcaquin. <sup>9</sup> Man non tapia tsoa isharamisi Diospan tsain fusti tanasharashucaí Moisés yononi cuscan yopacanima isharashquin. Ascan nan Diosin yononi cuscan nicacasmamisifo tapimapai chaca huamisifo cuscan shatuyamaifoan ato onaintimashqui.

Ascashu nanfo isca huamisifo. Diosin yononi cuscan nicacasmamisifo icain Diosin ato shinanmapaiyai cuscan shinancasmafain chaca futsa futsatapafo huamisi icain aton apa yafi ahua chaca huafain rutumit-samisi icain. <sup>10-11</sup> Aton ahuinma non aton funuma fu icain nocofunufu yafi ainfofo chaca huatananmisi icain futsa curushcain aton yonomati imafain chanimisifo. Ascacanashu ahuara futsa Diosin noco sharacoin yononi cuscan nicacasmacani. Nanscaräfo Diosin ato nicamapai nan yononi cuscacoin anonfo. Ascäfia chaca huamisifo cuscan shatuyamaifoan ato onaintimashqui tapinonfo. Upa Diosin ua yononi cuscan ahuun tsain sharacoin nantifi yorafo un ato yoinon. Nocon Dios fasi sharacoincun.

*Diosin ahuun ramapaicun Pablonun aicho huani*

<sup>12-14</sup> Noncai Diospan Furun onanyopaonima. Ascashon un yoipaoni isca huaquin, —Jesucái Diospan facuma. Aafin chanimisicoinquin, —un huapaoni. Ascashon ahuun yorafori un fasi ato omitsisca huapaoni. Un nocofunu fasi musucoin ipaoni. Un tapipaonima un Diospan Furucóin chaca huafiaquin. Un asca huafiaiton uhuun ramapaiquicái ua onaintimanima. Cristo Jesús ua noiquin ua shara huashofain ua tapimani ahuuscashomain un icoinra huatiroquin.

<sup>15</sup> Un natian mato icon yoiai cuscan man icoinra huatiro. Cristo Jesús nai ariashu mai ano ftoni yora chacafo numashqui afu ipanonfo. Ascan unfi chaca huaqui finacaimisiquin. Tsoa futsacái asca huamisima. <sup>16</sup> Ascacun uhuunshon Upa Diosin nantifi yora ismatiro nan chaca finacaia ahuun chaca soashotiro afu ipanon. Isca huaquin shinantirofo, —Shinacapon, Pablonun fasi chaca huapaonifiacun Jesucristo fasi Pablo noiquin. Jesús uarifi noitiro. Pablo numaquifin uarifi numatiroquin un afu nipanón, —icashon shinantirofo. <sup>17</sup> Ascano nocon Dios Niaifocoin nipanaca. Arus fusti Dios futsa yamai. Tsoancai Dios ointiro. Nantififain non ahuunoa yoisharapacunaca isca huaquin, —Mirusu fustiton nantifi tapicoian. ¡Aicho! —ishon non yoipacunon.

<sup>18</sup> Timoteon min uhuun facushtan. Un mia yoiai cuscan nicasarahuu. Min Dios yonoshonataima mihuunoa iquisi inonpacoai cuscan yoisharayoni. Ascan natian afanan un mia yoisharai. Mihuunoa yoisharani cuscan nanscasi huafafainhuun. Satanás noco chaca huapaifaiton a nicatamarocon Dios fusti tanasharafafainhuun chaca huashquima.

<sup>19</sup> Min Jesús icoinra huacoinmisi cuscan unuyamahuu. Ahuunoa shinanfaihuun. Ahuara chaca huashon Upa Dios yoiriscahuun min nomuranshon ahu chaca afanan shinanshquima. Atirifiton chaca huafiacashon Upa Dios yoimisifoma arus fusti shinanfaiacuin shafacafi cainmacasmacquin. Ascashon tsoan Dios yoipaimisima aton chaca soashonon. Asca chaca huariaifoan afanan icoinra huacanima. ¡Ohua! Afanancai aton nomuran shinansharamisifoma. <sup>20</sup> Noco yora rafu nanscara rafuquin. Himeneo yafi Alejandro un ato Satanás inan ato onaintimanon. Ascashon tapinonfo afanan noco Ifo Jesús chaca huanonfoma.

## 2

*Ahuuscashomain non Dios cufitiroquin*

<sup>1</sup> Natian tsain futsa un mia yoinon. Ua nicasharapun. Upa Dios cufifaihuun. Nanfin fasi shara finacoianquin. Ahua futsacái ascarama. Nantifi yorafohuunshon Upa Dios cufihuun ahuun Yoshin Shara yopaifo cuscan ato cufishohuun. Diosin atohuun ramapainon cufishofain Diosin ato amapaiyai cuscan cufihuun nanscasi huanonfo. Atohuunoa Upa Dios yoihuu isca huaquin, —¡Aicho! Upa Diosin min na yorafo shara huashoshquiran, —ishon cufinquin nannori yoihuu. <sup>2</sup> Nannoricoin nan niaifocoin yafi ahuun niaifo patasharinoafori ato Upa cufishohuun noco iquisharanonfo ahuaraton noco fucash huanonma. Ascano Dioshuunoa non shinanfaiatiro a cuscara sharacoin iishquin.

<sup>3</sup> Ascacun nan nocon Numamisi Dios noco oian non isharaiton oin unimacointiro. Nanscara fuchipai. <sup>4</sup> Nantofin nantifi yorafo numapaiquin. Ascashon aton chaca soashona afu ipanonfo. Cristohuunoa iconcoïn tapisharanonfo. <sup>5-6</sup> Iconcoïn Diosifin fustiquin. Futsa yamai. Afin sharacoinquin. Yorafocai a cuscarafoma. Nantiffain man non chaca huamisi. Ahuara chacacai Dios fu itiroma. Nan Jesús nocon cuscara nocofunuquin. Arus fustitofin noco nashoniquin nocon chaca soashoshquin non Dios fu ipanon. Nantifi yorafo numapaiquin noco nashoni. Upa Diosin yorafo tapimapaiquin Furun Jesús mai ano nichini noco nashoshquinon. <sup>7</sup> Ascacun Upa Diosin ua catonni Jesús fu rafucain ahuunoa uhuun caifomafo un yoinon. Atorifi un Jesushuunoa icon yoiaiton icoinra huanon. Ascan uncai mia paraima. Icon fustisi mia yoi.

<sup>8</sup> Ascano nantifi manifotifainmain Upa Dios cufipainonfo. Ahuara chaca yoicani fochishmanantananyamacain sinatamari Jesús tanasharaqin mushainacahuan Dios cufipainonfo.

<sup>9</sup> Ainfori un yoisharapai non ichanaintian isca huaquin shinanonfoma, —Uhuun saya sharashtacoin sahuufain fusoqui cunucaïn uhuun foo shara huafain nantiffain ua oinonforan, —ishon ascacaquin man icai cuscan matohuunoa futsafo shinansharamapaiyamacahuun. <sup>10</sup> Ascatararocon ato futan ahua futsa shinancaquima Upa Dios fusti shinancoïncahuun. Man yoimisi isca huaquin, —Non Dios noicoïnran, —ishon. Manmain icoincain futsafo shara huashofafaincahuun. Un ainfofo anori yoisharapai.

<sup>11-12</sup> Ascano Diospan tsain nicashquin man ichanantiro. Ascacun mun yoimisi ainfofoancai nocofunufo yonotiroma. Diospan tsain yoimisiton yoiaiton puusiquima ainfoan nicasharatiro yoiái cuscacoin tapifain nan yoiái cuscacoin aashquin. <sup>13</sup> Diosin Adán onihuaquin tau huani. Chipó Evari onihuani. <sup>14</sup> Ascacufin Satanascai Adán parayonima. Eva paraquin tau huani. Nanto chaca huaquin tau huani. Diosin ato yononi cuscacai nicanima. Ascano ichanainfotian ainfofoan nica fustitirofo. <sup>15</sup> Ascafiacun ainfofoan facu caiyaintian isin muyotiro. Ascafiashon Jesús icoinra huashon noifain a cuscara shara icanashu Dios fu ipatirofo.

### 3

#### *Ahuu cuscaramain ichananfo cushumisifo itiroquin*

<sup>1</sup> Icon tsoan Diospan yorafo cushumisi ipaiquin yonoshosharafafainpaitiro. <sup>2</sup> Nan nocofunu cushumisi shara fusti itiro.

Ascano ahuara chaca ahuunoa shinainfocain cushumisi itiroma.

Ahuin fusti ya icain

pau fuchipaimisi iyamacain

ahuara ahuuscarafiaino shinansharamisi icain

ahuara shara fustisi shinanpaimisi icain

ahuun pushu muran yora iquimasharamisi icain

futsafo Diospan tsain tapimasharatiro icain.

<sup>3</sup> Paumisi iyamacain

sutumitsapaimisiri iyamacain

futsafo yoisharapaimisi icain.

Ascataricai fochishmanantanapaimisi iyamacain

pui noipaimisiri iyamacain.

Nan cuscara nocofunu catonhuun icoinra huafo ato cushumisi inon.

- <sup>4</sup> Ahuin yafi ahuun facufori ato ismasharaiton ahuun facufoan ahuunoa shinansharafain nicasharanonfo. <sup>5</sup> Ascano ahuin yafi ahuun facufo nicamasharayamaino ahuuscashomun nan Diospan yorafo ichananmisifo ato nicamasharatiroquin.
- <sup>6</sup> Ascacun nocofunun rama Jesús Ifoatocai ichananmisifo cushumisi itiroma. Nan cuscara man catoanfin shinanqui isca huatiroquin, —¡Aicho! Unfin fasi sharaquin. Ascan ua samamashta catoanfo un ato cushumisi inon. Ascan uncai futsafo cuscarama. Un ato finoncoianran, —icashon cacapaimisi itiro. Nannori Satanás noco shinanchacamapai.
- <sup>7</sup> Ascacun isharaiton oinmisishacaquin nan icoinra huamafoanri ahuunoa shinansharacashon catontirofo nan ichananmisifo cushumisi inon. Nanscara iyamaiton Satanás ahuun nomuran shinanmatiro nan chaca huamisi cuscan. Ascashon nan chaca huamisi-fohuunoa shinanquicai a ichananmisifo tapimasharatiroma.

*Ahuu cuscaramain ichananfo shara huashomisifo itiroquin*

<sup>8</sup> Nanscarifiai ichananfo aton shara huashomisifo isharamisifo futsafoan atohuunoa shinansharafain icon fustisi yoimisifo. Nan cuscarafo ichananfo aton shara huashomisifo itiroquin. Iscarari itirofo.

Paumisi iyamacain

pui noimisiforicai itiroma. <sup>9</sup> Ascashon tsoancai Jesushuunoa tapiy-opaonima.

Natian ahuunoa Diosin noco tapimanai cuscan tsoan nan icoinra huafoan shara huashomisi itiroquin. Ascano fasi finacaiquin Jesushuunoa tapipaicoian nan cuscarafin ichananfo aton shara huashomisi itiroquin.

<sup>10</sup> Tsoan ichananfo ato shara huashomisi ipaiyaiton iguisi oinsharayotirofo. Isharacoincainmain ahua chaca huamaquin. Ascan oianfo isharcaincainaiton nan cuscara ichananfo shara huashomisi itiroquin.

<sup>11</sup> Aton ahuinfori isharcainmisi icain yoiti huamitsapaimisi iyamacain paunmisiricai itiroma. Ahuara shara futsa aquifin Jesushuunshon asharamisi itiroquin.

<sup>12</sup> Nan ichananfo aton shara huamisifori ahuin fustiyafa itirofo.

Ascashon ahuin yafi ahuun facuforifi onihuaniti. Nanfoanri Jesús tanasharanonfo.

<sup>13</sup> Nanscara shara huashomisi ichananfoan ahuunoa yoisharatirofo. Ascashon nanton nocon Ifo Jesucristo icoinra huaquin finacointiro.

*Tsoan Jesucristohuunoa nicayopaonima cuscan Pablonun cunushoni*

<sup>14-15</sup> Uhuun facushtan Timoteo un mi ari cariscapaifiai un funa caiyamaquin un mia tapimai ahuuscashumain ichananmisifo isharatirofoquin. Uhuun cunuhuunshon un mia tapimayoi. Jesús icoinra huafo ichananmisifo nanfofin Diospan yorafoquin. Ascan nan Dios ipanaca. Ahuun tsain iconcain ahuun yorafo nan ichananmisifohuunshon futsafori tapimaiquin. <sup>16</sup> Icon atirifitocai tsoan Diospan tsain tapiatama isharashcaquin. Ascafia Jesushuunoashu non isharatiro.

Aafin Apa Dios icariashu mai ano ftoni nocon cuscara yoracoin iishquin.

Ascatarifi Diosin Yoshin Sharapan ismapaoni Jesuscai ahua chaca huamisima icon fustisi imisi.

Diospan oinmati afu nai muran icafoanri oinnifo.

Ahuunoashu manifoti futsafoan yoiqui isca huamisifo, —Jesús Upa Diosin facu. Ascashon arus fusti maton chaca soashotiroran, —ishon yoifoanfainmisifo.

Yoiaifoan nicacanashu atirifi manifoti anoshon icoinra huacani.

Ascashu Jesús naafiashu mai murannoashu funini.

Chipo afanan Apa icano nuinacahuani arifi nantifiton aton niaifocoin iishquin.

## 4

*Atirififain afanan Jesús icoinra huayamaftacashon futsafo iconma yoipaicani*

<sup>1</sup> Diosin Yoshin Sharapan noco cayacafi tapimayoni atirifiton Jesús potaifo cuscan. Ascashocai afanan icoinra huapaitama nan yoshin chacafohuunshon ato yoipaiyaifo ato tanacani funoshcaquin. <sup>2</sup> Nan paramisifoan chanihuunoasi shinanfafaimisifo cuscan nannorifi futsafori tapimashcani. Nanfoan chani fustisi yoifafaincaquicai afanan ahuaara iconcoin shinantirofoma. Chani fustisi tapiafo.

<sup>3</sup> Ascashon fasi amaquri futsafo yosicaquin isca huacani, —Mancai fianantiroma. Atirifi tushu man pitiromaran, —ishon ato parapaicani. Anori yosipaifiaifoan Upa Diosin nantifi tushu onihuani cuscan non nanfo unimacain pitiro. Ascashon piquin non Upa Dios, —¡Aicho! —huatiro. Ascans non Diospan tsain icoinra huashon ahuaara iconcoin non tapitiro.

<sup>4</sup> Ascan nantifi Diosin onihuani cuscan sharacoin. Non ahuaara potatiroma. Nantifi Diosin onihuafo non piquin, —¡Aicho! —huatiro.

<sup>5</sup> Diospan tsainhuunshon non Upa cufiaino nantifi Diosin onihuani cuscan sharacoin itiro.

*Jesucriston yonoshomisi shara*

<sup>6</sup> Uhuun facushtan Timoteo un mia tapimanai cuscan min icoinra huaa futsafo mirifi min ato tapimashu min Jesucristo yonomati shara itiro. Nan tsain shara Jesushuunoa min icoinra huamisi. Facushon min Diospan tsain icon nicamisi cuscan nanscacoïn min tanasharacoinmisi. Shafatifi nan tsain shara min nomuran nanuhuun futsafori tapimasharashquin.

<sup>7</sup> Ascafia futsafoan shunipafo cuscara ato tapimapaicani. Ascan nanfocai Diospan tsainma. Ascacun ato nicayamahuu. Aton nicatamarocon Diospan tsain fusti oinsharahuu a cuscara shara iishquin. <sup>8</sup> Non ejercicio huaino noco caya non shara huatiro mutsisipa iishquin. Nanscarifiai non Dios cuscara ipaiquin ahuan tsain nocon nomuran non nanuaiton ahuan curushu noco inanshquin. Nancaifin shara finacoianquin. Natian noco shara huatiro. Ascashon non Jesusqui nocoaiton noco imasharapacunaca. <sup>9</sup> Nancaifin min icoinra huatiroquin. <sup>10</sup> Ascano non fasi curushu yonoshofafaincain man non omitsiscamisi futsafo nan tsain shara icoinra huanonfo. Nonfin tapia nocon Dios nipanacaton nocori nimapacutiroquin. Afin nantifi yorafo nashoniquin. Ascafia icoinra huafoti afu nipatirofo.



<sup>11</sup> Nanfo un mia tapimanai cuscan huafain un mia yonoai cuscari futsaforifi tapimafain ato yonohuun Diospan tsain icoinra huanonfo. <sup>12</sup> Timoteo icoinra huaa futsafo ato ismahuu min Jesushuunshon ato yoisharafain mirifi isharacain min Jesús icoinra huashon atohuun min noitiro. Ascacun ahua chaca huapaitama Jesús cuscara isharahuu. Pushcofiashu min ascaitocai mihuunoa tsoa ahua chaca yoitirofoma. <sup>13</sup> Un miqúi nocoaitian atofu min ichananshon Diospan tsain yoia cuscan ato anushoquin yoisharafain yosisharahuu. <sup>14</sup> Ichananfo ato cushumisifoan mia manmanshon cufishonaifono nantianri Diosin mia amapaiyai cuscan mia ashoni min icoinra huaa futsafo tapimasharafain min ato cushusharanon. Ascan Upa Diosin mia cashman tapimani cuscan huafain futsafori shara huashofafainquin shatuyamahuu.

<sup>15</sup> Un mia yonoa cuscan nantifi huafafainhuun ato ashosharashquin. Ascafin min shafatifi itisharatiroqui. Ascaquin ahua futsa shinan-taquima nan min acai fustisi asharafafainhuun. Min ascaiton oin-quin yoitirofo man min fasi itisharacoian. <sup>16</sup> Ascacun oinfain. Nantishotapiquin min isharacain min ato cayacafi Diospan tsain tapimasha-ranon. Min ascaiton Diosin mihuunshon ato numatiro afu ipanonfo chaca huashcaquima. Mirifi min Jesús fu rafucacaintiro. Ascaquin min nomuran unimashquin.

## 5

### *Ahuuscashumain icoinra huaa futsafo fu non isharatiroquin*

<sup>1</sup> Ascashon nocofunu iyoafo tsain curushu yoiyamahuu. Ascataka min upa min yoisharatiro cuscan huafain iyoafo futsafo yoihuu. Min ushtocoinfo min yoisharatiro cuscan huafain nanscarifi chipocu futsafo yoihuu. <sup>2</sup> Ainfo mustufori min uhuacoin min shara huatiro cuscan huafain atorifi shara huahuun. Ascashon min chico yafi chipi min shara huamisi cuscan huafain shomayafori shara huahuun. Ato furi ipaiyamahuun. Ascataka atohuunoa shinansharahuun.

<sup>3</sup> Ainfo funuomacoin facuomacain fafaomacai nan icoinra huafo ichananfoan cushusharatirofo. <sup>4</sup> Ascafiacun funuoma futsan facufo ya iyamarai fafayashon nanfoan cushusharatirofo. Jesús tanashara-paiyaifoan nansca huatirofo. Diosin nanscara fuchipai. <sup>5</sup> Ainfo funuoma ahuun yoraomashon Dios fusti shinanquin. Isca huaquin cufitiro, —Upa Diosin ua cushusharahuu, —ishon cufitiro. Shafatifi yafi yamutifiri Upa Dios cufifafaintiro.

<sup>6</sup> Ascafia funuoma futsafocai ascatiroma. A futsan shinain cuscan huaquin shinantiroma. Futsa afin apaiyai cuscan fusti shinanfafaitiro. Ascaquicai Dioshuunoa shinansharatiroma. Ascashon pushuti chani yoifoanfafaifaitiro. Nan cuscarafon chaca huafafainicai Dios fu nipatiro-foma. Ascashu nifiashu man naa shinantsaafa. <sup>7</sup> Timoteon nanti un mia yoiai cuscan funuomafihuunoa ichananmisifori tapimahuu. Min ato tapimanai cuscan icoinnaifoan tsoancai atohuunoa yoitiroma isca huaquin, —Timafin. Nafon aton funuomafo cushusharayamaifoan ato chaca huacaniran, —ishocai atohuunoa tsoan yoitiroma. <sup>8</sup> Tsoan ahuun yorafo cushusharayamafain ahuun afocoinri cushusharaya-maicai Diosin tsain cununi cuscan aima. Nancafin Jesús icoinra huafoma cuscara finacaiquin.

<sup>9</sup> Ratoran funuoma futsa ahuun fari sesenta nocoataima ahuun funu niyoano furoma ipaonicai. Nanscaracai ichananfoan cushutiroma.

<sup>10</sup> Ascan funuoma isharamisi futsafoan ahuunoa isca huaquin yoitiro, —Nan ainfo funuomaton futsafo shara huafafainiran, —ishon ahuunoa yoifain ahuun facufo tapimasharamisiran huafain futsafo ahuun pushu ano nococun ato shara huamisi icain Jesús icoinra huafo shara huafain futsafoan ahuara chaca finoan atori shara huamisi icain futsafo ato shara huamiscain ascara funuomafo ichananfoan ato cushusharatiro.

<sup>11</sup> Ascafia funuoma yoshafaotaima nan ichananfoan cushutirofoma. Rucun yoiyomisi, —Cristo fustihuunoa shinanquin un yonosharashopairan, —ishon. Ascafia chipo anori afanan shinanyamaquin fasi nocofunu fipaiquincai a yoiyoni cuscan afanan shinainma Jesús yonoshosharashquin.

<sup>12</sup> Ascacanashu Jesús yoiyoni cuscan ayamashu omitsiscaquin. Aton nomuran shinantirofo isca huaquin, —¡Ohua! Un Jesús yoiquin tau huani cuscacai un aama. Natiancai uqui unimaimaran, —ishon shinantiro.

<sup>13</sup> Ascashon pushuti chani yoifoanfaini. Yonotama shafatishon funocointiro. Nanscara man fuyamisi. Chaca yoimisi cuscan yoiamia shara icuana. <sup>14</sup> Ascacufin ainfofo yoshafaotafoma un ato yoisharapai isca huaquin, —Man afanan shara itiro. Ascan man mato facucoin ayashon cushusharafain maton funuri pichasharashon man shara huashotiro-ran, —ishon un ato yoi. Man ascaitocai yoshin chacafoan matohuunoa tsain chaca yoitroma. <sup>15</sup> Ascafia atiriffoan Jesús potayoni Satanás tanashcaquin.

<sup>16</sup> Ratoran ainfoan Jesús tana amaqui funu nacun nan ichananfoan cushuamarocon ahuun yoracoinfoan cushusharatiro. Ascan nan ainfo tatuoma ahuun yorafomacun nan Jesús icoinra huafoan cushusharatiro.

<sup>17</sup> Ichananfoan cushumisifo ato inansharatiro. Nanfoanrifi tanasharamisifoma yonosharashomisifo. Nan Diospan tsain yoimisifo non ahuun tsain yosimisifori inansharatiro yopai cuscan finonfo.

<sup>18</sup> Nannori Diospan tsain cununi isca huaquin, —Moipan trigo camaqui puamafoanfaini ahuun shacafo tsosaiton a runushcaquima shara huacahuun. Ahuuscashon pitiromaquin. Asca huaquima piimacahuun, —ishon cununi. Ascashon cununi isca huaquin, —Tsoa yonosharaiton oinquin ahuun rafanan inansharacahuun, —icashon Diospan tsain cununi. Cununiri isca huaquin, —Mato cushumisifo non mato shara huashofafainmisifori ato inansharacahuun yopaifo cuscan finonfo, —ishon cununi.

<sup>19</sup> Futsan cushumisi yoiti huaiton a nicayamahuu. Ascano yora rafutan iyamarai rafu non fustifain nannorisi futsahuunoa yoiainfoan man icoinra huatiro.

<sup>20</sup> Ascan chaca huaa iconcun nan ichanaintian nantiffain ointaifi yoihuu. Man ascaiton nicai ratucani ahuun caononfoma.

<sup>21</sup> Timoteon nocon Upa Diosin futan Furun Jesucristo non ahuun oinmati shara afu nai muran icafoan noco oin. Ascacun aton ointaifi un mia yoinon. Nanti nan un mia yonoa cuscan ahuu. Nannorisi nantifi yoihuu. Isca huaquin shinanyamahuu, —Nan uhuun yoracoinfoan chaca huafo cuscacai un futsafo yoima. Ascashon cushumisiton chaca huacucai un tsoa tapimaimaran, —ishon anori shinanyamahuu. Ascaquima nantifihuunoa nannorisi shinanhuun.

<sup>22</sup> Ascano ichananfo aton cushumisi catonriscayamahuu. Iquisi oinsharayohuu Jesús tanasharamisi iyamarai tanasharamainquin. Tsoan ahuun chaca fomanpairiai cushumisi catonyamahuu. Ascaran

min catoanfin mirifi min ahuun chaca fomanshonni cafiscaiquin. Ascacun ascayamahuu. Jesús cuscara isharacoinhuun. Ahua chaca huayamahuu.

<sup>23</sup> Natian tsain futsa un mia yoisharapai. Min shaquipan imisi. Ascacun unu fustisi ayaquima ichapama pau fata ayahuum cayasharashquin.

<sup>24</sup> Ascano atirifi yorafoan chaca huamisi cuscan nantifiton tapishocai. Tsoan nanscarafo catontiroma cushumisi inon. Ascan atirififain chaca huamisi cuscan tsoan tapicuma. Nanscarafoan fomanmisifo. Ascafia chipo Diosqui nococun a chaca huamisi cuscan puashoshquin nantififain ahuunoa tapinonfo. <sup>25</sup> Nanscarifiai futsafoan futsafori shara huamisi cuscan nantififain nanhuunoa man tapiafo. Ascan futsafoan arus fusti oianmafiano futsa shara huaquin ashomisi cuscan nanforifi chipo Diosin puashoshquin nantififain tapinonfo.

## 6

<sup>1</sup> Ascan tsain futsa afanan un mia tapimanon. Nan yonomati Jesús icoinra huafoan aton ifo yonosharashofain ato nicasharacoinon. Asca huaifoan oinquincaicai icoinra huamafoan atohuunshon Diosqui shinanchacatirofoma. Ascashon non Jesushuunoa yosimisi cuscan shinanchacanonfoma. <sup>2</sup> Rato yonomatinin Jesús icoinra huano ahuun ifoan arifi Jesús icoinra huacun nicasharacointiro, —Nicayosma iyamacahuun. Ascatamarocon nicasharapaifafaincahuun, —ishon ato yoihuu. Nanscara yonomati yafi ifo Diospan facufo. Ascashu yora huatananfo. Yonomatinin ahuun ifo noiquin yonoshosharaino nan Upa Diospan facu sharacoin yonoshosharai.

### *Ahuaraton noco imasharacointiro*

Ascacun un mia tapimanai cuscan huafain futsafori tapimasharahuun. <sup>3-4</sup> Un mia tapimana cuscan cayacafi sharacoin. Nannorifi nocon Ifo Jesús yosipaoni. Ascan tsoan anori yosiama nanton amaquiri yosia. Nan cuscara cacapaimisi. Aatocai ahua tapiama. Ahuun nomuranshon shinanchacaquin samamashta futsa fu fochishmanantanapaitiro. Ascatacai unimatiroma. Ascaquin futsafo ahua ya cuscan fuchipaifain futsahuunoa tsain chaca huafain futsahuunoa shinanchacamisi. Futsan aqui oshon futsahuunoa yoiai cuscan samamashta icoinra huashon ahuun nomuran shinanqui isca huamisi,

—Nanto ua chaca huaaran, —ishon shinanchacafafainmisi. <sup>5</sup> Nan cuscara yorafoan chaca fustisi shinanfaimisifo. Ascatari fochishmanantanafaimisifo. Ascashon afanancai tsoan ahuaara icon yoitirofoma. Chani fustisi tapiafo. Ascashon isca huaquin shinanmisifo, —Non nan tsain shara Jesushuunoa tanaicai non afanan ahua yopatiroma. Non fasi ichapayatiroan, —ishon amaquiri chaca shinanmisifo.

<sup>6</sup> Ascano non aya cuscan ichapaya iyamarai non ahuuomafishori non unimacain Diosihuunoa shinanfaini nancaitofin pui finoan shara finacaiaquin. Nanfn iconquin unimacai non isharaino nocon nomuran non unimatiro. <sup>7</sup> Non caincai non pui yafi mafo ya cainima. Ascata hahuoma non caini. Nanscarifiai non naacun noco mai huafotiancai non ahuaara fotiroma. Nantianri nocon furo yoshincai ahua fotiroma. <sup>8</sup> Ascacun non tushu yafi sahuutiyashu non unimatiro. <sup>9</sup> Ascafia tsoan pui yafi mafo ichapa fipaiquin samamashta shinanchacatirofo. Pui ichapa fipaiquin futsafo chaca huaiton pui fiishquin. Ascashon Satanás

ato chaca huamaino amaquiri shinanchacafain atorifi omitsisca huatiro. Ascatan ahuun unutaqui omitsiscapanacafo muran nocoshcaini. <sup>10</sup> Ascatan pui noicaquin chaca futsa futsatapafo huatirofo. Atirifi fasi pui fipaicaquin Jesús cachiquiri huacoincaini. Asca huacanashu aton nomuran omitsiscaini finacoinmisifo.

*Pablonun Timoteo yononi cuscan*

<sup>11</sup> Ascafia Timoteon Upa Diosin mia catonni min ahuun yora inon. Ascacufin nanfoan pui fusti yafi chaca fustisi shinanfo cuscan shinanymahuu ato cuscara ishquima. Ascatarocon Upa Diosin mia imasharapaiyai cuscan nan fusti fuchipaihuu. Ascashu Jesús cuscara shara ipaicain a icoinra huafain Dios yafi futsafori noicoihuun. Ascashon ahuara ahuuscarafiaino Jesús icoinra huashon min tunutiro. Ascatan nantifi yorafohuun ramapaihuu.

<sup>12</sup> Ichananfo ano min ato cayacafi shara yoini isca huaquin, —Un Jesús icoinra huai. Afin uhuun Iforan, —ishon min ato yoini cuscan yora ichapafain mia nicanonfo. Ascacun ahuara ahuuscarafiaino nantishotapiquin Jesús icoinra huacoinhuun. Ahuarafoan mia shatumpaiyai cuscan nicasatama Jesús fusti icoinra huafafainhuun. Ascashu shafatifi Jesús fu rafuhuun. Jesushuunoashu min Dios fu nipatiro. Ascano natian nan min naitianri ahuara chacafo potahuu Jesús onancoinshquin. <sup>13</sup> Nan oni huati Upa Diosin nantifi ato nimai. Ascano Romanon niaifoan ahuun anu Poncio Pilato yocaiton Jesús ahuunoa yoisharani. Nan Dios futan Furun Jesusin ointaifi un mia yonoi.

<sup>14</sup> Un mia yonoai cuscacoin fusti acacainhuun. Ascashon ahuashta chaca huaquima un mia yonoa cuscan fusti noco Ifo Jesucristo oaitian huahuun. <sup>15</sup> Upa Diosin nichipaitian nocon Ifo Jesucristo afanan no-coqui nocoshquin. Nantianri non oinshquin. Nocon Diosin arus fusti nantifi iquisharafain nantifi niaifofoan aton niaifocoinri. Ifofoan aton ifocoinri. <sup>16</sup> Arus fusti niaifocoin ipanaca. Nancai napanacama. A icarifi chashacoianquin. Ascano tsoacai aqui nocotiro. Tsoanricai ointamari ointiroma. Ascacun non ahuunoa yoisharanon. Aafin curushcoin ipanacaquin. Nanscasiai.

<sup>17</sup> Nan pui ichapayafo yoihuu cacapaimisi iyamacain isca huaquin shinanonfoma, —¡Aicho! Un pui ichapayashu nantishotapiquin un isharacoincai, —ishon yoinonfoma. Ato yoihuu ascanonfoma. Tsoancai tapiama ahuutiamain aton mafo yafi ato pui cuyoriscaicai. Ascata Dios fusti non icoinra huacun noco nimapacusharatiro. Nanton ahuarafo non yopai cuscan noco inan non afoqui unimanon. <sup>18</sup> Ato yoihuu futsafo fasi shara huafafainonfo. Yopaifo ato fishcoyamafain unimacoincai ratoran shafatan ato cashman inansharanonfo. <sup>19</sup> Ascashu chipo Diosiqui nocoafotian ato inain cuscacai cuyopacunacama. Ascata Dios fu isharapacutirofo.

*Pablonun ahuun tsain unutaqui Timoteo yononi*

<sup>20</sup> Ascano Timoteon Diosin ahuun tsain sharapan mia tapimani futsaforifi min ato yoinon. Ascacun oinfain. Ahuun tsain oinsharayohuu futsafo cayacafi tapimashquin. Futsafocon Diosin tsain amaquiri yoisifo. Afiranon yoinonancaquin ipaitiscain yoaquin. Nanfoan yoisifo non tapicoianran ifiacashocai tapiafoma. Ascacun atofu iyamahuu. <sup>21</sup> Atirififain nanscara shinanfo, —Non fasi tapicoianran,

—ishon. Ascacashu Jesús noco icoinra huamapaiyai cuscan afanan tsoan icoinra huacanima.

Upa Diosin mihuun ramapainon. Nanti.

Pablo

## Pablonun Timoteo Afanan Cunu Fomani

### *Pablonun Timoteo yoisharani*

<sup>1-2</sup> Uhuun facushtan Timoteo unquian Pablon afanan mia cunu fomai min tapinon. Un Jesucristo fu rafumisi. Apa Diosin ua nichipaiyai cuscan ua nichini manifoti ato tapimashquin ahuunshon Furun icoinra huashu non Dios fu ipatiroquin. Nannori Upa Diosin yoiyoni. Nocon Upa Diosin futan nocon Ifo Jesucristo mihuun noiquin mia cushusharafain mihuuri ramapaia. Ascashon min nomuran mia unimamanon.

### *Pablonun Cristohuunoo yoini*

<sup>3</sup> Ascan uhuun shunifoan Upa Dios yonoshonifo cuscan huafain urifi nansca huamisi. Uhuun nomuranshon ahuashta uhuunoo chaca shinantama un yonoshoni. Ascashon un Upa Dios mihuunoo cufinquin un, —¡Aicho! Upa Diosin, —huafafaini. <sup>4</sup> Un mimaqui pashcaino min uaini. Ascan nancai un ointiaquimamisima. Ascacun un mia fasi shinain mia afanan oinpai uhuun ointi unimashquin. <sup>5</sup> Ascan min nocon Ifo Jesús icoinra huacoinna cuscan min chichi Loida yafi uhua Eunice nannoricoin icoinra huamisifo. Ascano nan rafutan icoinra huaqui tau huani cuscan mirifi min chipo icoinra huacoinni. Nanfohuunooacai un ointiaquimamisima.

<sup>6</sup> Ascacun un mia afanan shinanmapaiyai cuscan fusti shinanhuun. Un mia mayatasho Upa Dios cufishoni nantianri afin mia amapaiyai cuscan min huanon. Ascashon min ahuun Yoshin Sharapan ahuun tsain yoisharafain min ato cushumisi inon. Ascacun aqui tushcuyamahuu. Upa Diosin mia amapaiyai cuscan fusti unimacain ahuu. Non chi cutu huasharayamaino nocatiro. Nanscarifiai Upa Diosin noco amapaiyai cuscan non huayamai non funotiro. Ascashocai non afanan ahuun tsain yoisharaima. Ascafia non chi cutu huasharaino afanan urutiro. Nanscarifiai Diosin noco amapaiyai cuscan non afanan acaino non ato yoisharatiro.

<sup>7</sup> Ascafia Diosin ahuun Yoshin Sharapacai noco nichinima non rafipainon. Ascatarocon ahuun Yoshin Shara futan ahuun curushhuunshon ranotama ahuun tsain shara yoicai non yoraqui ratuyamacain atohuunrifi non noitiro. Ascashon norifi non shinansharatiro.

<sup>8</sup> Ascacun noco Ifohuunoo futsafo yoi rafipaiyamahuun. Un cunu muranfiano uhuun rafipaiyamahuun. Un ahuun tsain shara yoiaton ua omitsisca huashcani. Ascafia Diospan curushhuunooashu min ufu ahuunooashu omitsiscashotiro. <sup>9</sup> Ascano Upa Diosin noco numani non ahuun Furun cuscara shara inon. Non ahuara shara huaa rafanancai noco numanima. Afin apaiyai cuscan noco numani. Nocoahuun noiquin noco numani. Ahuarafo oni huataima Jesucriston nocoahuun ramapaicain nocoahuun noia. <sup>10</sup> Ascano nocon Numamisi Jesucristo noconi. Ascacun natian ahuunshon non tapitiro fasi nocoahuun noi ahuatoncai noco namapacutiroma. Ascacun ahuun tsain sharahuunshon non tapitiro nocon chaca soashonano non afu ipanaca.

<sup>11</sup> Upa Diosin ua catonni Jesucristo fu rafumisi icain ahuun tsain shara Jesushuunooa futsafo yosinon. <sup>12</sup> Ascan nan ua yononi cuscaoin un huamisi. Ascacun ua omitsisca huamisifoquin. Un omitsiscafi

un rafiama. Rafitamarocon un Jesús onancoinfain un icoinra huai. Ascan un Jesús yoini isca huaquin, —Ifon ua cushusharahuu. Un chipo mifu isharapacanon, —ishon un yoini cuscan natian nan oaitian ua ashoshquin. Nan un icoinra huacoinna.

<sup>13</sup> Un mia cayacafi tapimana cuscan icoinra huacoinhuun funoshquima. Nocon Ifo Jesucristo icoinra huafain ahuunri noicoinhuun. Ascacun ahuunshon nantifi noicoinhuun. <sup>14</sup> Upa Diosin min nomuran ahuun tsain shara mia nanumana cuscan afohuunoa shinanfaihuun funoshquima. Ascano ahuun Yoshin Shara nantishotapiquin no fu rafui. Ahuunshon Diosin mia tapimana cuscan min nomuranshon min mucusharatiro funoshquima. Futsafori tapimashquin.

<sup>15</sup> Man min tapian nantifi icoinra huafo Asia mai anoafoan ua potafo. Ascashocai tsoan afanan ua oin fupaicanima. Ascano Figelo futan Hermógenes nan rafutari ua potafo.

<sup>16-17</sup> Onesiforo cai ato cuscara inima. Acai uqui oi rafipainima. Ascashu Roma ano noconi. Nanno nocoshon funafafainquin cunu murannoa ua fuchini. Ascashon ua oinyoi ocacainmisi. Ascacun ahuun afofihuunrimain Upa Diosin ramapainonran. <sup>18</sup> Man minrifi tapishara un Efeso ano ipaonitian nanton ua shara huafafainpaoni. Ascano nocon Ifoan noco ichanan huaitianmain Onesiforo shara huacoinpainon.

## 2

### *Jesucriston ahuun yorafa nan ranushumua shara cuscara itiro*

<sup>1</sup> Timoteon uhuun facushtan Jesucristo ahuun curushhuunoashu min isharatiro chaca huashquima. <sup>2</sup> Un futsafori Jesucristohuunoa yoimisi cuscan mirifi man min nicamisi. Ascano nocofunufaoan min icoinra huaa cuscan arifi icoinra huafoan ato catonhuun. Min nicamisi cuscan atorifi tapimahuun nanfoan futsaforifi cayacafi tapimasharanonfo.

<sup>3</sup> Ranushumua shara omitsiscatirofia ahuun niaifoan yoiai cuscan nicasharatiro a yoia cuscacoin aashquin. Nanscarifiai mirifi min no fu Jesucristohuunoashu omitsiscatiro. <sup>4</sup> Ranushumua sharan ahuun niaifo ahuunoa unimamapaitiro. Ascan afu ranushumua foma fucai yonotiro. Ascashon ahuun niaifoan yonopaiyai cuscan fustisi nicatiro. Nanscarifiai Jesús fusti nocon Ifo icaino arus fusti noco yonotiro. Ascashon noco amapaiyai cuscan non aashquin.

<sup>5</sup> Afanan un iscara un mia tapimai. Tsoa futsafo fu cashupai iquisi yonoaifo cuscan nicafain itisharatiro. Ascan itisharayamashocai atirifi shonontiro. Nanscarifiai Upa Diosin noco inansharapaiyai cuscan fipaiquin iquisi ahuun tsain non nicasharatiro noco yoiai cuscacoin aashquin. Ascano itisharashu chipo non aqui nococun noco inansharapaiyai cuscan non fitiro.

<sup>6</sup> Mau yonomisiton fasi curushcain ahuun mau yonoshon ahi ahuun yono finquin tau huashon chipo futsafo inantiro. Nanscarifi aquin mirifi nocon Ifo Jesús curushcai yonosharashohuun mia inansharapaiyai cuscan fiishquin. <sup>7</sup> Un mia yoiai cuscan shinanhuun. Ascan min shinainton nocon Ifoan min nomuran mia tapimashquin.

<sup>8</sup> Ascacun ointiaquimayamahuu Jesucristo naafiacun Upa Diosin funimani. Nan David ahuun funa. Nannori nan tsain shara Jesushuunoa un yoimisi. <sup>9</sup> Nan un yoiaiton ua omitsisca huamisifo. Ua cunu muran

iquimaquin ua yoimisifo isca huaquin, —Min chaca huamiscun non mia cunopan munushiran, —ishon ua asca huamisifo. Ascafiacai Diospan tsain tsoan munushtiroma. <sup>10</sup> Ascashon Diospan tsain nicas-haratirofo. Ascaifoan atorifi Diosin catonshquin. Ascacufin nuno cunu muranshon un tunuicain futsafoan Jesucristo icoinra huanonfo afu ipashcaquin.

<sup>11</sup> Un mia yoiai cuscan iconcain.

Non Jesushuunoashu naashu  
non afu nipashquin.

<sup>12</sup> Non ahuunoashu omitsiscai.

Ascafia non chipo a futan futsafo iquimashquin.

Non yoiquin isca huaiton, —Jesucasai uhuun ahuamaran, —ishon non yoiaiton

arifi yoishquin norificai non ahuunama.

<sup>13</sup> Non afanan Jesús icoinra huayamafiatocai aacai ascarama.

Noco yoyiomisi cuscan afanan shinan futsatiroma.

Yoyioni cuscan iconcain fusti. Atocai chani yoitiroma.

Ahuun tsain iconcain fusti.

Aacai ointi rananyama.

*Afu yonoa cuscan aiton oin Diosin unimai*

<sup>14</sup> Nan un mia yoia cuscan mifu ichananfo yoifafainhuun nicas-harafain ointiaquimanonfoma. Nocon Ifohuunshon ato yoihuu tsain mutsamayamacain fochishmanantanonfoma. Ascaiton tsain mutsama yoicaquin ato shinanchacamatirofo. <sup>15</sup> Uhuun facushtan, Diosin tsain shafatifi oinsharahuu Dios yonosharashoshquin miqui unimanon. Min ascafin ahuun yonoshomisi shara min iishquicain. Ascashon ahuun tsain iconcain cayacafi shara futsafo min tapimatiro. Min ascacun Diosin mia oiainnocai min rafitiroma.

<sup>16</sup> Ascano yorafoan Dioshuunoa yoicoinyamafiaquin ipaitsi tsain mutsama yoiaifoanno atofu iyamahuu. Nan cuscarafaan aton nomuranshon fasi shinanchacaquin finacointirofo. <sup>17</sup> Nanfoanri futsafo tapimapaiyai cuscan fasi chacacoin. Ascano yorafoan ato nicacanashu aton ointi fasi isincointirofo. Nocon caya muran coo ichapacoinyashu nantifi nami payocotiro. Nanscarifiai tsain amaquri futsan yosiahuunoashu yora ichapafoan aton nomuran fucash huatirofo. Ascashocai afanan icoinra huapaitirofoma. Nan Himeneo yafi Fileto nanscara rafu. <sup>18</sup> Nan rafutan fai shara funoafu. Afanancai Diospan tsain iconcain yoiafoma. Ascashon yoimisifo isca huaquin, —Upa Diosin noco funimanai cuscan man finoan. Afanancai icoinra huafo funitirofomaran, —ishon amaquri yosiafo. Anori yoiaifoancai nicaquin atirififain afanan icoinra huacanima. Ascashon man cachiquiri huafo.

<sup>19</sup> Ascafia Diosin tsain iconcain. Toquirininhuancai tsoan rafutiroma. Diospan tsain nanscarari tsoancai fiananan huatiroma. Icon yoimisi cuscan nannoricoin. Toquirininhuanqui yora cunuacai tsoan soatiroma. Nanscarifiai Diospan tsain cununi isca huaquin, —Nocon Ifoan ahuun yorafo onancoian. Ascano ahuun yoracoinfoan chaca huamisifo cuscan potatiroforan, —ishon cununi.

<sup>20</sup> Nocofunun pui ichapayaton pushu uhuapa shara huaa. Amuran puratofu yafi cuchofo sharashtacoinfo. Ascano futsafo ahuun pushu ano nococun pushu ifoan nan purato yafi cucho sharashtafoquin ato



pimatiro. Ascafia ahuun pushu muranri nanno ahuun shihuati aqui chaca potati itiro. <sup>21</sup> Ascano mirifi min chaca potacoinyashu nan shihuati chaca aqui potati cuscara itamarocon min nan purato sharash-tacoin cuscara itiro. Ascan min Jesús cuscara shara icaino Upa Diosin mia yonosharamapaiyai cuscan min ahuunshon ahua futsafo shara huatiro.

<sup>22</sup> Ascan pushcofoan chaca huapaimisi cuscan mirifi asca huayamahuu. Nan chacafo huaifoan oin atomaquinoashu ichoriscatahuun chaca huashquima. Chaca huapaiquimarocon iscarafo fuchipaihuu. Jesús cuscara shara ipaiquin nan icoinra huafain futsafo noicoinfain isharacoinhuun. Futsaforifi Jesús aton chaca soashona aton nomuranshon shinansharaifoan Diosin tanasharapaiyaifo. Nanscarafo fu rafuhuun. <sup>23</sup> Ascatare futsafo tsain mutsama yoitiacanashu fochishmanantanancain samamashta sinatirofo. Ascarafo fu atofu iyamahuu mirifi ato cuscara iishquima.

<sup>24</sup> Nocon Ifoan ahuun yonomati sharacai fochishmanantanancain itiro. Ascatare nantifi yorafo shara huatiro. Ascashon funainquimashta oi tsii huafain nan amaquri shinainfo ato tapimasharatiro atohuunoa shinanchacanofoma. <sup>25</sup> Diospan tsain iconshara nicacasmaifori oi tsii huafain ato tapimasharahuun Diosin aton nomuran shinanma futsaino ahuun tsain iconcain tapinonfo. <sup>26</sup> Ascatare afanan amaquri shinantirofoma. Cayacafi shinantirofo. Ascano Satanasfin nan masharo cunu muran iquimana cuscan ato huamapaimisi ato chaca yonopaiyai cuscan anonfo. Ascafia nan cayacafi Diospan tsain nicaquin finacoianfofin. Nan masharo cunu muran iquimamua cuscara finontirofoquin iquishcaquima.

### 3

#### *Jesús oti chaimamain yorafo ahuu cuscara ishquicanicai*

<sup>1</sup> Un mia tsain futsari yoinon. Ascacun un mia yoiai cuscan min nomuran shinanhuun. Jesús oti chaima ahua chacocon finonshquin. Ascano non omitsiscatiro. Ascafia non icoinra huaafo. Noco musu huamapaifafainshcaini. <sup>2</sup> Chaca iscarafo huashcaini. Futsafo shinantama afiri fusti noicain futsafo noiama icain pui fusti noifain afiri fusti yoimusharacain curafiapaimisi icain roanmitsamisifo icain aton apa yafi ahua nicacasmamisifo iishquicanicai futsafoan ato shara huashoan cuscan ato, —¡Aicho! —huayamafain atohuunoa fusti shinanchacaquin. Ascaquicai Diosihuunoa ahua sharafo shinansharatiroma.

<sup>3</sup> Tsoa noiamafain futsafoan chaca huaa cuscan futsafo rau huayamai icain pushutifi cahuancacaini yoiti huamitsacahuancacaimisi icain ahuun nomuranshon shinanchacai cuscan shatuyamafain pofucon icain ahua sharafo noicasmafain. <sup>4</sup> Ascatare fuparamitsamisi icain afu rafumisifo fomanquin ato chaca huamisi icain ointi rochitimamisi icain cacapaimisicoin icain ascashofin Dios noicointama afin apaiyai cuscan fustisi shinancaini. <sup>5</sup> Futsafo fu ichananfiaquicai Diosin ahumamishti atiro cuscan icoinra huacanima.

Ascacun nanscarafo fu iyamahuu. <sup>6-7</sup> Ascatare ainfofoan chaca huamisi cuscacai Dios yoimisifoma ato chaca soashonon. Anoricai itama afananri ahua chaca futsa futsatapafo huapaicaquin shinanfaimisifo. Ascaquin ato ointi nocofo chaca huamisifo shinancaquin.

Ascashon nanscara ainfofoan yoimisifo isca huaquin, —Un tapipai ahuuscashumain un isharatiroquin, —ishon yoifiaquicai Jesucristohuunoa Diospan tsain iconcoin nicaflaquicai tapicoianfoma. Ascano nan yora chacafoan nanscara ainfofo ato pushu murashon iquimisifo ato tsain shara nicatsa yoiquin. Ascafia ato tsain shara yoiamaflaqui. Ascan ato yoiainfo cuscan fasi amaquiricoín. Ascashon ato iquipaicani.

<sup>8</sup> Nan nocofunufu nan Janes yafi Jambres cuscarafu. Nan rafu Egipcio shointian rafu. Ascano Moisés yorafu Diosin tsain tapimapaiyai cuscan nantianri nan rafutan ato yoini isca huaquin, —Moisés mato yoiainfo cuscan nicayamacahuun, —ishon yoinifo. Nanscarafoan Diospan tsain iconcoin futsafo nicamapaima. Ascashon aton nomuran fasi chaca fusti shinanmisifo. Ahua cayacaficai shinantirofoma. Nocon Ifo Cristo iconra huapaicanima. Ascashon Diosin potacoianfo. <sup>9</sup> Nan Janes futan Jambres ato amaquiri chaca yosipaiyaifoan tapinifo. Nanscarifi aquin nan chaca huamisifoan ato parapaiyaifoan tapishquicani. Ascashon tapitirofo nanfoan afi ipaitsicoín shinanmisifocun. Ascacun, —Ahua tapiafomaran, —ishon atohuunoa yoishquicani.

*Pablonun ahuun tsain unutaqui Timoteo yononi*

<sup>10</sup> Ascafia Timoteon min tapia uncai ato cuscarama. Un imisi cuscariman mian tapicoian. Un futsafo tapimana cuscan min nicamisi. Ascashon man min tapia nocon Ifo Jesús ua amapaiyai cuscan nan fusti un apaiyaiton. Min oinmisiri urifi un Jesús iconra huacoinshon futsafoan amaquiri shinanchacafainocai atohuunshon un shinanchacatamarocon un futsafohuun noicoínquin. Ahuara ahuuscarafaino un tunumisi.

<sup>11</sup> Ascashon uarifi omitsiscamamisifo. Un ahua futsa chaca finoainton mificoín man min oinni. Ascaquin uhuun nomuran un nocomisi ua omitsiscahuaifoanno. Ascan un finoan cuscan man min tapian nan Antioquia ano non Iconio ari yafi Listra anoashumain un ahuuscaquin. Ascafia nanfohuunoashu un omitsiscafiaiton nocon Ifoan ua numani. <sup>12</sup> Icon. Ratoranfo nocon Ifo Jesucristohuunoashu isharapaiyaifo omitsisca huashcani. <sup>13</sup> Ascano nan yora chaca huamisifo yafi paramisifori chaca finacoinya ishquicani. Futsafo paraifoan atorifi futsafoanri parashcani.

<sup>14</sup> Ascafiaifonocai min ato cuscara ishquima. Mia tapimamisifo cuscan yafi min iconra huacoinmisi cuscan nanscacoínrifi huafafainhuun. Nan mia tapimamisifo man min tapicoian. <sup>15</sup> Nan facushtashon min Diosin tsain shara tapinifoanna. Nanfoan mia shinansharamatiro min Jesucristo iconra huashu afu ipashquin.

<sup>16</sup> Nantifi Diospan tsain cununifo cuscan afin ahuun shinanpan futsafo shinanmana cayacaficoín cunushononfo. Ascano cununi cuscahuunshon noco tapimai ahuamain iconcoin fustiquin. Ascafia non chaca hwaiton Upa Diosin tsain cununihuunshon noco tapimatiro non afanan chaca huanonma. Ascan ahua ahuu cuscararan amaquiri non acaitori ahuun tsain sharanun noco cayacafi oinmatiro non tanasharaquin finacoinfain ahuuscashumain non a cuscara shara itiroquin. <sup>17</sup> Ascacun ahuun cunuunshonri noco tapimai non itisharashon nantifi ahuun yorafu ahua shara futsa futsatapafo non yorafu huashofafainon.

## 4

<sup>1</sup> Upa Dios futan Jesucriston noco oinfainni. Nantofin nantifi yora niafo yafi nan namisifori ato yoipacushqui niyoashumain ahuu cuscara imisiquin. Nanrifi chipo nocoqui oshon nantifi yorafo iquishquin. Ascacun un mia cayacafi yonoi ua nicasharahuu. <sup>2</sup> Diospan tsain futsafo yoihuu. Ascashuri itisharahuun nantishotapiquin ato yoishquin. A min oian nicapaisharaifoan ato yoihuu. Ascan min oianri nicacasmaifoan nanforifi yoihuu. Ato cayacafi yoisharahuu amaquri shinanonfoma. Ascashon ahuaara chaca huaifoan ato shafacafi yoisharahuu aton chaca shatunonfo. Ascataari ato tsain shara yoihuu aton nomuran unimanonfo. Ato oi tsii huashon yoifafainhuun unimasharanonfo.

<sup>3</sup> Ascacun ato yoisharahuu ratoran shafatacai tsoan afanan Diospan tsain iconcain nicapaishcanima. Ascataama nanfoan nicapayai fo cuscan fusti nicashcani. Ascashon tapimisi ichapafo funafafainshcani Diospan tsaincainma nicapayai fo cuscan ato yosinonfo. <sup>4</sup> Ascashocai Diospan tsain cunuma cuscan afanan nicapaishcanima. Shunipafo cuscara fusti nicapaishcani. <sup>5</sup> Asca huafiaifono Diospan tsaincain fustisi tanafain. Nan fustiri icoinra huahuun. Min omitsiscaitianri tunuhuu. Diospan tsain yoimisiton ato yoisharamisi cuscacain ahuan. Diosin mia yonomapayai cuscan nantifi ashosharahuun ahuan yonomati shara ishquin.

<sup>6</sup> Ascano natian uhuunoa un mia yoinon. Uncai afanan chai nipatiroma. Ratoran shafata Jesushuunoashu un naicain. Un samamashta mai anoashu Jesús ari cai. <sup>7</sup> Ascacun nantishotapiquin un Jesús tanasharapaimisi. Ua amapayai cuscacai unumisima. Natian ua yonomapayai cuscan nantifi mun icoinna. Un nantishotapiquin Jesús icoinra huamisi. <sup>8</sup> Nocon Ifo shara Jesús ua inansharapayai cuscan ua mucushona. Ascashon afin nocoahuunoa tapicoian. Ascan noco inanshquiain cuscan iconcain. Nan oaitian afu rafumisifo isharamisifo noco inansharashquin. Ua fusti inanshquima. Tsoan Jesús noicoinquin fasi oinpaifain manasharamisifo atorifi inansharashquin.

*Pablonun ahuunoa tsain futsa Timoteo yoini*

<sup>9-10</sup> Tsain futsari un mia yoi. Demas natian mafo yafi ahuaara futsafo yorafo aya cuscan noicoinquin ua potafaini Tesalónica ano man caa. Crescente arifi Galacia ano man caa. Tito arifi Dalmacia ano man caa. Ascacun uqui oriscahuu ufu iishquin. <sup>11-12</sup> Natian Lucas fusti ufu icai. Min uqui oaitian ua Marcosri ihuushohuun. Un Tíquico Efeso ano nichitan. Ascan min oquin ua Marcos ihuushohuun u futan nocon Ifo yonosharashonon. <sup>13</sup> Un Troas ano uhuun tsahuuti ashcapari chichia Carpo pushu muran un huayoni. Nanrifi oquin ua fushohuun. Uhuun librofori un yopai. Ascafia nanfo finonmafain uhuun documentofu un yopacoin. Ua nanfo fushohuun.

<sup>14</sup> Asca Alejandro nan ahuan cuno yonomisiton ua fasi chaca huacuscain Diosin nan onaintimashqui. <sup>15</sup> Non nocon Ifo Jesushuunoa yoimisi cuscan nanto fasi nicacasmamisi. Ascacun mirifi oinfain miarifi chaca huapaitiro.

<sup>16</sup> Ascan ua tau huaquin niaifofo ano iyonifo tsoancai uhuunoa yoisharanima. Nantifi ratucaquin ua potafaini focaquin. Ascacun Upa Diosin ato onaintimayamapainon. <sup>17</sup> Asca huafiaifoanno nocon Ifo ufu ica. Ahuan curush ua inan un fasi chai ahuan tsain shara uhuun caifoma

un yoiaiton cayacaficoïn nicasharanonfo. Ascashon nocon Ifoan ua numani masharofu muran ua potanonfoma. <sup>18</sup> Nanscarifi aquin ua chaca huafiaïfoan nocon Ifoan nantishotapiquin ua cushusharashquin. Ascashon ahuun unutaqui a icano ua iyoshquin ahuun yorafo fu un isharapacunon. Non ahuunoa yoisharapacunon. Nanscari inon.

*Pablonun ahuun unutaqui ato tsain shara fomani*

<sup>19</sup> Ascano Priscila yafi Aquila ua yoisharashohuun. Onesíforo yafi ahuun aforananri ua yoisharashohuun. <sup>20</sup> Nan Erasto Corinto ano nituni. Trófimo isinin icaino un Mileto ano nitun huani. <sup>21</sup> Oi pacuataïma uqui ohuu. Ascano Eubulo non Pudente non Lino non Claudia nanfo futan nantifi Jesús icoinra huafuoa mia yoisharafo.

<sup>22</sup> Nocon Ifo mifu icain. Mia shara huashofafainon mihuun rama-painon. Nanti.

Pablo

## Pablonun Tito Cunu Fomani

### *Pablonun Tito yoisharani*

<sup>1-2</sup> Unquian Pablo un mia cunu fomai min tapinon. Unfin Jesucriston ahuun yonomati yafi afu rafumisiquin. Ascashon ua nichini nan Diosin catoanfo un ato tapimanaino Ifo Jesús icoinra huanonfo. Nocon Upa Diosicai chanitiroma. Nantofi ahuara oni huataima yoiyoniquin isca huaquin, —Tsoan uhuun tsain iconcoin uhuun facu Jesushuunoa icoinra huaiton unfu ipatiroran, —ishon yoiyoni.

<sup>3</sup> Ascan afin yoipaiyaitian nan tsain shara Furunhuunoa ato tapimana. Ascano nocon Numamisi Diosin ua catonshon ua yononi un Jesucristo-huunoa futsafo yoinon. <sup>4</sup> Tito, un mia nocon Ifo Jesucristo icoinra huamani cuscan min Jesús icoinra huashu min uhuun facu cuscaracoin. Un Jesús icoinra huaa cuscan mirifi min nansca huani. Ascacun nocon Upa Diosin futan nocon Numamisi Jesucristo mihuun ramapaicain mia nomuran unimamanon.

### *Titopan Creta mai ano yononi cuscan*

<sup>5</sup> Un mia Creta mai tomahuan ano nichifaini non ato yonoshoni cuscan min anaitinon. Ascacun un mia yoini isca huaquin, —Nan pushurasifoti cushumisifo catonhuun ichananfo cushusharanonfo, —ishon un mia yoini. <sup>6</sup> Cushumisi iscarafu catonhuun. Nan nocofunu ishara fusticoimisi cushumisi itiro. Ahuunoa ahuara chaca yoiiafocai cushumisi itiro. Ahuin fusti ya icain ahuun facufoanri nocon Ifo Jesús icoinra huafo. Ascan tsoancai atohuunoa yoiquin isca huatiroma, —Cushumisiton ahuun facufoan fasi chaca huamisiforan, —ishocai yoitirofoma. Ascanocai ahuun facufo yoitimamisifori itirofoma.

<sup>7</sup> Ascano nan cushumisiton Diosin yonoshona. Ascashon nan Dios fu tsainti pushu murannofo ahuun yorafa cushushara. Ascacufin nantiffain ahuunoa yoisharafa aton cushumisi inon. Ascashu cacapaimisi iyamacain ointi rochitimani iyamacain paumisi iyamacain sutumitsapaimisi iyamacain futsafo parashon ato pui fianmisiricai itiro. <sup>8</sup> Ascatarocon iscara cushumisi itiro. Yora shara huashopaimisi icain ahuara sharafa fustisi noifain ahuara ahuuscarafiaino shinanchacatama shinanshara fustimisi icain isharashu Jesús cuscara Diospan tsain shara fusti tanafain. Ascano ahuara amaquirifo futan chacafoan ahuun nomuran shinanchacamapaiyai cuscan atamarocon nan Diosin amapaiyai cuscan fustisi amisi. Nanscarafu cushumisi shara itiro. <sup>9</sup> Ascacun Diospan tsain non icoinra huatiro nan iconcoin. Non Diospan tsain yoiaiton fasi icoinra huafafainmisi nan cuscara cushumisi shara itiro. Ascashon arifi futsafori nan tsain sharahuunshon aton ointi unimamatiro. Ascafia futsafoanri Diospan tsain nicacasmaifoan atorifi nan tsain sharahuunshon cushumisiton ato oinmatiro amaquiri shinainfo cuscan.

<sup>10</sup> Ascashon yora ichapafoan Diospan tsain nicacasmafain nan Dios fu tsainti pushu murannofo cushumisifori ato nicacasmafain. Ascashon tsain mutsama ipaitsi yoiayo. Nan Moisés yononi cuscan tanamisifo atirififo nanscarafu. <sup>11</sup> Pui fusti fipaicaquin futsafo fasi amaquiri chacacoin tapimacani. Ascacun atohuunshon ahuun yorafoyashon Jesús

cachiquiri huaafo. Ascacun aton tsain shatumahuu afanan futsafo amaquiri yosinonma.

<sup>12</sup> Nocofunun arifi Creta ano ica, —Nanto inonpacoai yoimisiran, —ishon ahuunoo ahuun yorafo yoimisifo. Ascacun nanton yoiquin isca huaa, —Uhuun yorafo Cretafofin chanimisifoquin. Yoina pofu cuscarafu. Piquri fustisi tapiafu. Pitsishunifo icain shanishuniforan, —ishon yoini. <sup>13</sup> Nan yoini cuscan icon. Ascacun ato cayacafi yoisharahuu afanan chaca huatamarocon Jesús icoinra huacashon tanasharanonfo. <sup>14</sup> Ascatan afanan uhuun caifo Israelifoan aton shunipafo cuscara tanayamafain nan Diosin tsain iconcoin nicacasmamisifoan futsaforifi yonomisifo cuscan nicanonfoma.

<sup>15</sup> Ascun ratoran futsa Jesús aton chaca soashona ahuun nomuran shinanshara fustiquin. Nantifi Diosin onihua cuscan shinantiro isca huaquin, —Nantifi ahuarafa sharacoinran, —ishon shinantiro. Ascafia nan icoinra huamafoan aton nomuranshon shinanchacamisifo. Ascashon nantifihuunoo shinanchacamisifo. Aton nomuranshon chacacoin fusti shinanfo. Ascashocai afanan shinansharatirofoma. Tapiafoma ratomain shara iyamarai chacacoin. Ascashon chaca fustisi shinantirofo. <sup>16</sup> —Nonfin Dios tapicoianquin, —ishon yoifiamisifo man acai cuscahuunshon non tapitiro nanfoancai Diosihuunoo tapicoimisifoma. Ascashon fasi chacacoin fustisi shinancani. Ascaquicai ahua shara huatirofoma.

## 2

### *Pablonun Tito cayacafi shara yosini arifi futsafo yosisharanon*

<sup>1</sup> Ascano Diospan tsain futsafo yosisharahuu isharanonfo. <sup>2</sup> Ascashon nocofunu iyoafofo yosihuu isca huaquin. Ahuara ahuuscarafiaino shinanchacatama shinanshara fustifain isharafo cuscan futsafoan atohuunoo yoisharatirofo icain ascashon cayacaficoi Diospan tsain tapi-coinshon icoinra huacoinnafo icain futsafohuun noicoinfain ascatan ahuaara chaca finoin omitsiscafashon tunucoinonfo. Nannori nocofunu iyoafofo yosihuu.

<sup>3</sup> Nansarifiyaiinfo iyoafofori ato yosihuu isca huaquin. Ainfo iyoafofo Jesús tanacoianshu isharanonfo. Ascashucafi futsafohuunooari chani yoifoanfafainmisi iyamacain paumisi iyamacain. Ascatarocon ahuaara shara fustisi futsafo tapimashquin. <sup>4</sup> Ascashon shomayafori yositiro aton funufo yafi aton facufori noisharanonfo. <sup>5</sup> Ascatancai ahuaara ahuuscarafiaino shinanchacatama shinanshara fustifain ahuaara chacafu shinantama aton nomuranshon shara fustisi shinansharatiro icain aton pushu ano yonoshara fustifain futsafo tsain shara fustisi yoiquin ahuun nomuran shinansharamatiro icain funun aton yoiaci cuscan nicasharatirofo. Ascun nan ainfo iyoafofoan yoiquin isca huaifoannocai atohuunshon tsoan Diosin tsainhuunooari tsain chaca huatirofoma.

<sup>6</sup> Ascatare pushcofori tapimasharahuu ahuaara ahuuscarafiaino shinanchacatama shinanshara fustinonfo. <sup>7</sup> Tito mirifi ato ismasharahuu nantifi min acai cuscan shara fustisi huahuu. Min ascaino minhuun caononfo. Min ato yosiaitian cayacaficoi shara ato yosihuu arifi isharanonfo. Ato yosiyanan cashuyamahuu. Cashutama ato yoi-coinhuun. <sup>8</sup> Ato cayacaficoi yosihuu ishacacoinnonfo. Ascano min ato yoiaci cuscaicai tsoancai min tsain chacacoinran huatirofoma. Ascatare

mia nicacasmashu rafitirofo. Ascashocai tsoan nocohuunoa ahua chaca yoitirofoma.

<sup>9</sup> Ascan yonomatifo yosihuu aton ifofoan ato yonoai cuscan nantifi nicasharanfo. Ascashon ato unimamafain ato tafiyamafain. <sup>10</sup> Ahuun ifo ahua onuntama nansca huaquin ato ifofo oinmatirofo ascaifoan ato icoinra huacointiro. Yonomatifo ascaifoan futsafoan yoitirofo isca huaquin, —jOincapon! Nan yonomatifo isharacoinmisi. Nanfoan Jesús ifoacoinnafo. Ascan aton Numamisi Diospan tsain sharacoin. Ascacun norifi ahuun tsain non nicanon, —ishon yonomatihuunshon Diospan tsainhuunoa shinansharatirofo.

<sup>11</sup> Ascan Upa Diosin nantifi tapimana atohuun ramapaiqui Furunhuunshon yorafoan aton chaca soashotiro afu ipashquin. <sup>12</sup> Ascano nan tsain non icoinra huaiton nocorifi tapimai non afanan Diosimaisi inonma. Ascashocai non chaca huapaoni cuscan non afanan atiroma. Ahuaraton noco shinanchacamapaiyai cuscacai non afohuunoa shinantiroma. Ascatama ahua ahuuscarafiaino non isharatiro. Natian Upa Diosin noco amapaiyai cuscan fusti non atiro.

<sup>13</sup> Non nanscara Diospan tsain tanasharashon man non tapia nocon Diosin ahumamishti huamisi nan nocon Numamisi Jesucristo chipo nocoqui oi. Nan oaitian nantifiton oinshquicani nocon Ifon ahuu cuscara sharamainquin nantifi finoncoian. Ascacun non fasi oinpaiquin non manasharai. <sup>14</sup> Nanto noco nashoni non afanan chaca huamisi iyamacain non yoitimamisi inonma. Afanan ahua chaca nocon ifo itamarocon nan noco imasharacoian cuscan ahuun yorafo non inon. Ascashu norifi a cuscara fasi shara huapaimisi non itiro.

<sup>15</sup> Nanfohuunoa futsafo yosihuu. Nocon Ifoan mia yonoa cuscan ranotama min ato cayacaficoi shara yositiro. Ascashon min aton nomuran unimamafain ahua chaca huaifoan min ato yonotiro afanan asca huanonfoma. Futsan mia yoiquin min ahumaran mia huafiaiton ato nicayamahuu.

### 3

#### *Nan icoinra huafoan atirofo cuscan*

<sup>1</sup> Ascano nantifi icoinra huafo ato yoihuu niaifofa nicasharafain yoitimamisifo inonfoma. Ascashon atorifi yoihuu itisharacashon ahuafo sharafo huafafainmisirifi inonfo. <sup>2</sup> Ascashon ato tapimahuun futsahuunoa tsain chaca huanonfoma. Ascatan fochishmanantananyamacain futsafohuunoa shinansharafain nantifi yorafo ahuun nomuranfo yora shara huafafainmisi iishquin.

<sup>3</sup> Norifi nocon nomuranshon non amaquri chaca shinanpaoni. Ascashu non yoitimacoin icain chaca futsa futsatapafo non huapaiyai cuscan huafain nocon nomuranshon non shinanchaca cuscan nannoricoiri non huapaoni. Nanfo nocon ifo ipaoni. Ascatarifi non iscara ipaoni. Non futsafohuunoa shinanchacafafainmisi icain futsafo aya cuscan fianpaitiashu non aqui shinanchacamisi icain non futsafo noicasmafain nofirananri non noicasmatananpaoni. Non nanscara chacafo huapaoni.

<sup>4-5</sup> Non asca huafiapaonishaqui Upa Diosin nocon Numamisi nocohuun ramapaicain nocohuun noiquin noco numani. Ascashon noco chaca soashoni non afanan chaca ipaoni cuscan inonma. Non ahua

shara huaa rafanancai noco numanima. Afifin nocohuun ramapaiquin nocon chaca soashoniquin. Noco ointi chocatsa cuscara non funa sharacoin inon. Ahuun Yoshin Sharahuunshon noco ointi oni ocomafain nocon nomuran onihua funa.

<sup>6</sup>Upa Diosin ahuun Yoshin Shara nocoqui nichini noco iquinon. Nocon Numamisi Jesucristohuunoashu nantifi yorafo fu rafucacaini. <sup>7</sup>Ascano Diosin nocohuun ramapaiquin yoini isca huaquin, —Uhuun facu mia nashoni. Min chaca mia soashoshquin. Ascacufin natiancai mihuun ahua nuamaran, —ishon yoini. Ascacun norifi non ahuun facufo icaino non afu ipatiroquin.

<sup>8</sup>Nan un mia yoi ai cuscan non icoinra huatiro. Ascan nanfo ato yoifafainhuun. Ascacun un mia yosia cuscan icoinra huaa futsafoan futsaforifi shara huashofafainon. Tsoan asca huaifn fasi shara huacoinquin. Ascano aton ointi unimamaquin isharanonfo. <sup>9</sup>Futsafo tsain mutsama yoitia canashu fochishmanantanamisifo. Ascatan aton shunifohuunoashuri fochishmanantananfain Moisés yononi cuscahuunoashuri fochishmamantanamisifo. Ascacanashu ipaitsi yoinancani. Tsoan anori futsa yoi qui shinansharamatiroma. Afo fu iyamahuu.

<sup>10</sup>Ascan futsan ahuun tsainhuunshon icoinra huafo pashcanan huamaiton nan ichananmisifo aton cushumisifoan yoitiro afanan ascanonma. Asca man yoi fia afanan ahuun tsainhuunshon ato pashcanan huaiton yoicahuun afanan asca huanonma. Man man yoi qui rafu huafia nicayamafain ato pashcanan huaiton nanscarafo fu afanan iyamahuu.

<sup>11</sup>Nanscara yoran ahuun nomuranshon amaqiri shinanchacamisi. Ascashon afiri man tapia a chaca huai cuscan.

*Pablonun ahuun tsain unutaqui yoini*

<sup>12</sup>Uhuun tsain unutaqui un mia yoinon. Un miqui Artemas iyamarai Tíquico nichiaitian uqui Nicópolis ano oriscahuu. Un nanno oipacutian iishquin. <sup>13</sup>Ascan Zenas nan abogado yafi Apolos nan min acai cuscan ato ashosharahuun yopaifo cuscan ato inanhun ahua yopatama fosharatanonfo. <sup>14</sup>Noco yorafo nan icoinra huafo yoi huu shara huafafainonfo. Ascacanashu futsafo yopaifo cuscan ato inansharatirofo. Ascayamaquicai futsafo shara huashotirofoma isharashcaquin.

*Ahuun unutaqui ato yoisharani*

<sup>15</sup>Nantifi ufu icaifoan mia yoisharacani. Nantifi uhuun yorafo nan icoinra huafo mia ari icafo nanfo ua yoisharashohuun. Nocon Ifoan mato nantifi ramapainon. Nanti.

Pablo



## Pablonun Filemón Cunu Fomani

### *Pablonun Filemón cunu fomani*

<sup>1-2</sup> Uquian Pablo un mia cunu fomai. Uhuun yorahuan Filemón un fasi mia shinancoin. Man min tapia un Jesucristohuunoa yoifafaini. Ascacun ua cunu muran iquimanifo. Nocon yora Timoteo ufu ica. Arifi mia tsain fomapai. Ascan minfin no futan Jesucristo yonoshomisiquin. Nan Jesús icoinra huafo min pushu muran ichananmisifo ua atori yoishohuun. Nocon shafo Apia yafi Arquipori nan Arquipo arifi noco futan Jesucristohuunoa yonoshomisi nan rafuri non ato tsain fomai. <sup>3</sup> Diosin matohuun ramapaiquin. Maton ointi unimamanon. Upa Diosin futan Furumun nocon Ifo Jesucristo mato asca huashonon.

### *Filemón Jesús icoinra huashu nantifi atohuun noini*

<sup>4-5</sup> Un nica min nocon Ifo Jesús icoinra huacoinfain min ahuun noicoin. Nantifi ahuun yorafari min atohuun noicoiainton un nicaquin un cu-fiaitian Dios un yoimisi isca huaquin, —¡Aicho! Upa Diosin, Filemón mia tanasharacoianran, —ishon un mihuunoa cufimisi. <sup>6</sup> Ascashon un mia cufishomisiri min Jesús icoinra huaa cuscan mirifi min futsafo tapimanaitan arifi icoinra huanonfo. Min asca huaquifin finonmafain Cristohuunoa non aya cuscan min tapitiroquin. Nannori un mia cufishona. <sup>7</sup> Uhuun yorashtan min ua noiai cuscan un unimacai unrifi mua uhuun nomuran un fasi unimacoinni. Ascashon min Diospan yorafari shara huafafaini mihuunshon arifi ato nomuran unimanonfo. ¡Aicho!

### *Pablonun Onesimohuunoa Filemón yocani*

<sup>8</sup> Min Cristohuunoaashu uhuun yorahua. Ascacufin ahuunshon un mia yoipaiyai cuscan ranotama un mia yonotiro. <sup>9</sup> Ascafiaquicai un mia yonomapaima. Un fasi minhuun noicoinquin mia yonotamarocon un mia yocai. Ufin Pabloqui natian un anifo. Un Cristohuunoa yoimisicun ua cunu muran iquimanifo. <sup>10</sup> Ascacun un mia Onesimohuunoa yocai. Nanrifi uhuun facucuin cuscaroquin. Un nuno cunu muranshon un Onésimo Jesús icoinra huamani. Ascashon natian Jesushuunoaashu un ahuun upa cuscara.

<sup>11</sup> Ascashon nantocai mia yonoshosharapaonima. Ascafia natian mia yafi ua shara huatiroquin. <sup>12-13</sup> Un Onésimo nitun huanpai ufu inon. Un fasi ahuun noi. Ascashon nichiqui un fasi shinanshquin. Ascan mincai ufu itiro ma nan tsain shara Jesushuunoa futsafo yoishquin. Un nuno cunu muranshon un shinan Onésimo mihuun rafanan ufu itiro u futan yonosharashquin. <sup>14</sup> Ascafia un mia yocayoataimacai un ahuaa huapaima. Ascashon min ahuaa ua shara huashoain cuscaai un mia curushcain yonotiro ma mianmain min apaiyai cuscan fusti min acaitonfin. <sup>15</sup> Itsairaca Onésimo mimaqui pashcayoni. Ascashu afanan chipo mifu ipashquin. <sup>16</sup> Un mia yoia cuscan un fasi ahuun noi. Ascano min finacoinquin ahuun noitiro. Ascafia natiancai min yonomati fustisi ishquima. Nanto arifi man Cristo icoinra huaa. Ascacun natian min ahuun yoracoin cuscara.

<sup>17</sup> Ascashon min shinan un mifu Jesushuunoaashu rafumisi. Ascacun Onésimo miqui nococun min ua shara huacuana nanrifi nanscarifi

huaquin shara huahuu. <sup>18</sup> Mia chaca huacun iyamarai mia nificun ua tapimahuu un mia inanon. <sup>19</sup> Ascan natian uficoín un mia cunushoni. Unquian Pablo Onésimo mia nifian cuscan un mia inanshquin. Ascafia man min tapia un mia Jesús icoinra huamani uhuunoashu min Jesús fu nipanon. Ascashu min nifian shinantsa aquin. <sup>20</sup> Uhuun yorashtan un mia yoca cuscan ua ashopun. Min Onésimo shara huaa cuscan urifi uhuun nomuran un unimashquin. Jesushuunshon nanscacoín ua huashopun.

<sup>21</sup> Man min tapia un mia yoca cuscan huafain mian ashoshquin. Paratama min ua ashoshquin. Ascan mia cunushquiain mun tapia min ashquiain cuscan. <sup>22</sup> Tsain futsari un mia cunushoni min tapinon. Min ua Upa Dios cufishomisi afanan un miqúi nocoshquinon. Ascacun min pushu ano ua cunu futsa itishara huashohuun. Ascan mian cufishona cuscan Diosin nica. Ascashon miqúi ua nichishquin. Ascapainon.

*Pablonun ahuun tsain unutaquin ato yoisharani*

<sup>23</sup> U fu rafumisi nuno cunu muran nan Epafra mia yoisharai. Nanto arifi Jesucristohuunoa yoiaiton cunu muran iquimanifo. <sup>24</sup> Ascano Marcos non Aristarco non Demas non Lucas nanfoan u futan Jesús yonoshomisifo. Ascashon nanfoan mia tsain shara fomapai.

<sup>25</sup> Nocon Ifo Jesucristo mia cashman shara huashofafainon. Nanti.

Pablo

## Jesushuunoa Futsan Hebreofo Cunushoni

*Diosin Furunhuunoashu no fu tsainni*

<sup>1</sup>Uhuun yoramishtichin un mato cunu fomai man tapinon. Upa Diosin noco shunifo yoipaiyai cuscan ahuun tsain yoishomisifo yoiyopaoni ato tapimanonfo. Namapahuunshon ato yoifain namapan cuscarahuunshon ato yoifain ahuun nai oinmatihuunshon ato yoifain ahuun oicoinin ato yoipaoni. <sup>2</sup>Asca huapaonifiashu natian noco yoipaiyai cuscan Furunhuunshon noco yoia. Furunhuunshon nantifi nai murannoafo yafi mai anoafori onihuan. Furun catonni nantifi nai murannoafo yafi mai anoafoti ahuuna inon.

<sup>3</sup>Nanton Apa Diosin cuscaracoin. Noco ismacoin ahuu cuscamain Apa Diosiquin. Apa shara imisi cuscan arifi nanscaracoin. Furunmun ahuun tsainmansi ahuamamishti huatiroquin. Ascan ahuun curushhuunshon ahuun tsainmansi onihuafofi yonotiro afin apaiyai cuscan anonfo. Ahuun tsainmansi nantifi onihuafofi cushusharafafainmisi. Nanfin nocohuunoashu nani nocon chaca noco soashoshquin non a cuscara shara inon. Ascashu Apa ari cani a futan nantifi iquifafainshquin.

*Upa Diosin Furumun ahuun oinmati afu nai muran icafo finoncoian*

<sup>4</sup>Afin Apa Dios ahuun Furuncoinquin. Oinmati afu nai muran icafofocai Upa Diosin furuncoinfoma. Furun Apa Dios fu niaifocoin. Oinmatifocai ascarafoma. Ascan ato finoncoian. <sup>5</sup>Upa Diosin ahuun oinmati afu nai muran icafofocai yoiqui,

“Man uhuun facunatoncoinforman,”

ato huamisima. Furun fusti yoiqui isca huani,

“Unfin min upaquin. Minfin uhuun facucoinquin,”

ishon Furun yoini. Ahuun oinmati afu nai muran icafohuunoacai anori yoimisima. <sup>6</sup>Ascashon Furun mai ano nichini yoracoin inon ahuun oinmati nan afu nai muran icafo yoini isca huaquin,

“Nantifi uhuun oinmati ufu nai muran icafoan, uhuun facu Jesús noicoincahuun. ‘Min uhuun Iforan,’ yoicahuun,”

ishon anori ato yoini. <sup>7</sup>Ascatan ahuun oinmati afu nai muran icafohuunoa yoiquin isca huani,

“Fuu foanriscatiro. Nanscarifiai uhuun oinmati ufu nai muran icafo un ato yoiai cuscan ua ashoriscatirofo. Nanfori chi urumanhuan cuscarafu. Un ato yonoa cuscan yorafo onaintimariscatirofan,”

ishon Upa Diosin yoini. <sup>8</sup>Ascashon Furu yoiquin isca huani,

“Minfin uhuunfin cacoinnaquin. Mirififin min Diosiquin. Min yorafo iquipacunaca. Min ato niaifocoin icainocai min un-upacunacama. Min ato iconcain yonosharapacunaca. Min icanori shara fusti ipanaca. <sup>9</sup>Ascashon minfin ahua shara fustisi noicoinquin. Ahua chaca min noicasmái. Ascacufin Diosin, nanrifi min Diosin, nanton mia catonni. Mia unimama cuscaai toa futsan ascara mumisima. Mirus fustiton min nantifi finoncoian. Min ato Niaifocoinran,”

ishon un mia yoini. Uncai mifu rafuafo anori yoimisima. <sup>10</sup>Afanan Upa Diosin Furun yoini,

“Minfin uhuunfin cacoinnaquin. Mirifi min nantififain ato Ifo. Ahuashta oniataima nan maitio yafi nai murannoafoti min onihuaquin tau huani. <sup>11</sup> Sahuuti chocanashucaí afanan shara itiroma cuyotiro. Nanscarifiai nantifi maitio yafi nai murannoafoti cuyoshcani. Ascafia mincai ascarama. Minfin ipanacaquin. <sup>12</sup> Sahuuti chocanacun potatirofo futsa funa fiishcaquin. Nanscarifiai maitio yafi nantifi nai murannoa afanan sharafocuma min ato cuyomatiro, afanan mai yafi nai fiananan huashquin afanan funa shara inonfo. Ascan mincai mai yafi nai cuscarama. Mincai fianananpacunacama. Nanscasi min apanacaran,”

ishon Upan Diosin Furun yoini. <sup>13</sup> Afanan Upan Diosin Furun yoiquin isca huani,

“Min ufu niaifoaitiancai nan mia noicasmafoan afanan mia ahuusca huatirofoma. Minfin nantifi ato iquiniran,”

ishon yoini. Asca anoricaí ahuun oinmati afu nai muran icafo yoimisima. Ascashon Furun fusti catonni nantifiton aton Ifo inon. <sup>14</sup> Ascano Upa Diosin nan ahuun oinmati afu nai muran icafo yononi noco cushusharanonfo. Ratoranfoan Jesús ifoancanashu afu ipatirofo. Diosin yononi nanfo ahuun oinmati afu nai muran icafoan ato cushusharanonfo.

## 2

*Jesús nocohuunoashu nanishaquin noco imapacunaca. Nanhuunoa shinanfafaicahuun cachiquiri huashcaquima*

<sup>1</sup> Ascacun nan tsain icocoin shara Diospan Furunhuunoa non nicamisi cuscan noco nomuran non nanucoinfafainon cachiquiri huashquima. <sup>2</sup> ¡Shinacapon! Diosin nocon shunifo oinmatifo afu nai muran icafohuunshon ato tapimani. Ascafia ato yoini cuscan tsoan nicayamaiton Diosin ato onaintimacoinni. <sup>3</sup> Diospan nai oinmatifoan ato yoini cuscan nicacasmaifoan ato onaintimani. Nanscarifi huaquin Furun nan nocon Ifo Jesús noco yoini cuscan non nicayamacaiyaiton mimacai huaquin noco onaintimashqui. Ascan nantorifi yoini nocohuunoashu chipo nashquiai. Ascashon noco chaca soashonano non afu ipanon. Ascano yoiaiton nicacashon afu rafumisifoan nannori noco tapimani. <sup>4</sup> Ascatari nanfohuunshon Upa Diosin futsafo ato ismani nanfoan yoinifo cuscan icocoincun. Ascashon tsoan oinyomisifoma cuscara isinincai futsa fut-satapafo ahuun curushhuunshon ato caya huapacuni. Ahuun Yoshin Sharapanrifi nanfo ato tapimani yonoshononfo. Ascashon afin ato catonpacuni ahuun yono futsa futsa huaquin yonoshononfo. Ratoranfo catonpai afin ato catonniquin ahuun yono anonfo.

*Jesucristo arifi Diosiflashu noco cuscara yoracoin ica*

<sup>5</sup> Non mato yoimisi Upa Diosin nantifi oni huanitiaí ahuun oinmatifo afu nai muran icafo yoinima isca huaquin, —Manfin nantifi mai anofoan ato ifo ishquiran, —ishoncai ato yoinima. <sup>6</sup> Ascacun David yoini isca huaquin,

“Upa Diosin, minfin nantifi yorafo onihuaniquin. Ascan non-caí ahuama. ¿Ascacun ahuuscaí min nocohuun noifain min noco shinanquin min noco cushusharamun? <sup>7-8</sup> Ascashon min yononi cuscacoin min oinmati mifu nai muran icafoan

noco finonyoni nan min Furun afanan nocoqui nocoaitian. Ascacun min yorafo onihuasharani mia cuscarari inonfo. Ascashon nan min onihuanifotifain ato ifo non iishquin.”

Min anori yonofianicai atirifi yorafoan aton ifo icataima. <sup>9</sup> Ascan Jesús arifi noco cuscara iyopaoni. Nantian Diospan oinmati afu nai muran icafoan Jesusri finonyopaonifo. Nocoahuunoashu omitsiscacain noco nashoni. Upa Diosin noco huun ramapaiyaino Furun Jesús nantifi manifiotihuunoashu nani. Ascano noncai afanan napanacama. Upa Diosin nantifi yorafo yononi ahuunoa

<sup>10</sup> Upa Diosin nantifi onihuani ahuunoashu nantifi ica. Ascashon yorafori onihuani ahuun facufo icain afu ipanonfo. Ascacun Furun Jesús nichini noco huunoashu omitsiscano non afu ipanon. Furun fusti noco huunoashu omitsiscatiro noco chaca soashoshquin. Nan iconcoin Upa Diosin yononi Furunmun noco omitsiscashoano noco Ifo sharacoin inon. Ascashon Apa Dios icari noco iyoano non afu ipanon. <sup>11</sup> Jesuscai ahua chaca huamisima. Ascashon nocori chaca soashona non a cuscara shara inon. Ascashon rafitama noco huunoari yoiquin isca huai, — Nanfo uhuun yoraforan, —ishon yoitiro. Ascatan Jesús ahuun Apa Dios nanrifi noco Upa. <sup>12</sup> Nan iconra huafihuunoa Jesús Apa Dios yoiquin isca huani,

“Upa Diosin, mi huunoa uhuun yorafo un yoisharashquin. Un atofu mi huunoashu fanainshquinran,”

ishon yoini. <sup>13</sup> Ascashon yoiquiri isca huani,

“Uhuun Upa Dios un iconra huairan,”

ishon yoini. Afananri yoiquin isca huani,

“Shinacapon Upa Diosin ua iconra huafo ua inan uhuun facufo inonfo,”

ishon Jesús yoini.

<sup>14</sup> Ascano facufo namiyacain imiya. Nanscarifiai Jesús arifi noco cuscara yoracoin cainni. Yoracoin cainnishaquin noco naashoni afanan Satanás noco ifo iyamacain noco namapacunonma. Noco huunoashu Jesús naitian Satanás ahuun curush shatuni afanan noco ahuusca huanonma. <sup>15</sup> Ascano noco huunoashu nataima yorafo napaicani ratucoinfafainpaonifo. Ascafia noco huunoashu naitian noco numani. Ascano non nashquaihuunoa shinaincai non afanan ratuima. Ascatacai ratu afanan noco ifo itiro. <sup>16</sup> Ascano man non tapia Jesuscai ahuun oinmati afu nai muran icafo ashoyoi onima. Ascatarocon Abraham ahuun funafo nan iconra huafoti ato ashoyoi oni.

<sup>17</sup> Ascacufin Jesús noco cuscara yoracoin ini. Nan non mumisi cuscan arifi muuyopaoni. Ascacun noco huun ramapaitiro. Nan Apa Diosin yonoa cuscacon amisi noco numashqui. Noco huunoashu nani noco chaca soashoshquin. Ascacun noco huunoa Apa Dios yoitiro isca huaquin, —Upan, un ato nashoni aton chaca soashoshquin. Ascan nan ua iconra huafo aton chaca soashofain ato rauhuahuu, —ishon Apa yoitiro. Ascashu noco huunshon Dios cufimisi niaifocoin itiro. <sup>18</sup> Nanscarifi aquin Satanás chaca huamapaipaoni. Ascan Jesús omitsiscafiacai chaca huamisima. Ascacun nocorifi Satanás chaca huamapaiyaitian Jesús noco huun ramapaitiro. Non muumisi cuscan arifi muuyopaoni. Ascashon noco numatiro non chaca huanonma.

## 3

*Jesusfin Moisés finoncoianquin*

<sup>1</sup> Ascacufin uhuun yoramishtichin matorifi Upa Diosin catonni ahuun yora sharafo icain man afu ipanon. Upa Diosin Furu Jesús nichini no fu ishon ahuun tsain shara noco tapimanon. Ascatan nocon numamisi icain nocohuunshon Apa Dios cufimisicoín. Ascacun maton nomuran Jesushuunoa shinanfafaicahuun. <sup>2</sup> Upa Diosin Israelifo tapimapaiyai cuscan tau huaquin Moisés yoiyoni. Ascacun arifi Moisés ahuun caifofo nan yoiyoni cuscan ato tapimani. Ascashu nan Upa Diosin yononi cuscacoin Moisés apaoni. Nanscarifi aquin Upa Diosin Jesús catonni ahuunoa ahuun yorafo tapimanon. Ascashu nan Apa Diosin yononi cuscacoin arifi Jesús acoinmisi.

<sup>3</sup> Pushu sharahuunoa yoisharatirofofia nan pushu huamisihuunoa finacoinquin yoisharatiro. Nanscarifiai Moisés huunoa yoisharatirofofia nan Jesushuunoa caifin finacoinquin yoisharatirofoquin. <sup>4</sup> Pushufo ratoran futsan afin oni huatirofia Upa Diosifin nantifi onihuaniquin. <sup>5</sup> Ascan Moisésfin Upa Diospan oinmatiquin. Upa Diosin ahuun yora nan Israelifo ato yonopaiyai cuscan iquisi Moisés yoiyoni. Ascacun arifi nantifi ato yoinon. Inon pacoai ato yoipaiyai cuscan Moisés tapimayoni ahuun caifori ato yoinon.

<sup>6</sup> Ascafia Jesuscai Upa Diospan oinmatima. Ascata nancairocofin Furuncoinquin. Ascashu ahuun yorafoan ato Ifocoin. Nan Apa yononi cuscan ahuun yorafo cusharacoinmisi. Ascacun Upa Diosin tapipai nonmain Jesús icoinra huashon noco yoiyotiani cuscan non ratutama manasharaicai nan Jesús afanan oaitian. Ascashu non nanscacoia shu non ahuun facufo ipatiroquin.

*Diospan yorafoan ahuunoa shu aton ointi unimatiro afanan fucashuni inonma*

<sup>7-8</sup> Ascan Diosin Yoshin sharapan yoiquin isca huani,

“Upa Diosin mato yoiyai cuscan nicasharacahuun. Tsoan istaipama mato shunifo icafotian un atohuunoa tapipaoni uamain nicasharafain ua nicacasmacaniquin. Ascashon nanfoan ua nicacasmapaonifo. Ascacun ato cuscara iyamacahuun. Maton ointi mutoyamacahuun. Ascata marocon Jesús mato yoiyai cuscan fusti nicasharafafaincahuun.”

<sup>9</sup> “Maton shunifo tsoan istaipamanoashu icaino yoitimafiaifoan funaquima uhuun yono un ato ismapaoni. Tsoan oinyomisima cuscara shara cuarenta fari un ato ahuamamishti ismasharapaoni.”

<sup>10</sup> “Un ato ahuara ismafiaitocai ua tsoan nicapaonima. Uarocon nicacasmapaonifo. Ascaifoan oinquin un mato shunifoqui sinapaoniquin. Nantianri un yoini isca huaquin, ‘Nanfoan aton nomuran amaquiri shinanchacamisifo. Ua tanatama. Un ato shinanmapaiyai cuscacai tsoan tapipaonima.’ <sup>11</sup> Ascano atoqui sinaquin un yoini isca huaquin, ‘Nan na Israelifoan ua nicacasmacani. Un aton nomuran unimamapaiyai cuscacai un ato ashopacunacamaran,’ ”

ishon Upa Diosin noco shunifohuunoa yoiniquin.

<sup>12</sup> Uhuun yoramishtichin oinfain. Nocon shunifo cuscara iyamacahuun. Maton nomuran man Jesús icoinra huayamashu man chacacoin

itiro. Man ascaicai nan Dios ipamisi fu man ipaima. Ascashon man cachiquiri huatiroquin. <sup>13</sup> Ascataमारोcon shafatifi yoinonansharafain noco Ifohuuñoa shinanmatanansharafaincahuun. Ahuara chacafoan noco paratirofo. Ascfia non shinanmasharatanainnocaí nocon ointi non mutotiroma. <sup>14</sup> Non tau huaquin Jesús icoinra huacoinni cuscan non nanscasi unuyamashu non afu ipatiroquin. <sup>15</sup> Ascano un rama mato cunushona cuscan afanan mato yoi,

“Upa Diosin mato yoiái cuscan fusti nicasharafafaincahuun. Maton shunifoan Upa Dios nicacasmacani aton ointi mutopaonifo. Ascacun ato cuscara iyamacahuun. Maton ointi mutoyamacahuun. Ascashu yoitimashuni iishcaquima,”

ishon Diospan tsain cununi.

<sup>16</sup> ¿Ascán tsoafoanmun Dios nicacasmafain ahuun tsain cachiquiri huapaonifoquin? Nantifi nocon shunifo Moisés ato Egipto mai anoashon iyoni. Nanfoanfin Dios nicacasmaapaonifoquin. <sup>17</sup> ¿Tsoafoquimun Upa Diosin cuarenta fari sinaniquin? Ascano nanfoanfin Dios nicacasmafain chaca huapaonifoquin. Ascaifoan Upa Diosin tsoa istaipamashon nantifi ato namapacuni. <sup>18</sup> Tsoacon Diosin yoinimun isca huaquin, —Un mato nomuran unimamapaiyai cuscaicai un afanan asca huapanacamaran, —ishon yoini. Nan nicayosma shunifo ato yoini. <sup>19</sup> Ascán Upa Diosicai tsoan icoinra huanima. Ascashu Diosin ato iyopai anocai tsoa iquinifoma yora futsafoqui musucani.

## 4

<sup>1</sup> Ascano Upa Diosin ato yoini cuscan norifi non icoinra huashu non afu rafucun nocon nomuran unimamatiro. Ascacun oinfain. Marifi Diospan tsain man icoinra huayamashu mato imasharapaiyai cuscan man funotiro. <sup>2</sup> Upa Diosin nocon shunifo tsain shara yoiquin isca huani, —Un mato numai. Mato fu mai shara ano ishquin un mato iyoicai. Nannoashu man ufu rafuaitocai afanan tsoa futsan mato ahusca huatiroma. Nannoashu man isharacoinon, —ishon ato yoini. Ato yoiái cuscan nicafishocai icoinra huanifoma. Nanscashofin ipaitsicoin nicanifoquin. <sup>3</sup> Ascfia non Jesús icoinra huacun Upa Diosin nocon ointi imasharatiro afu rafucain non isharanon. Ascán nocon shunifocai ascanifoma. Ascacun Upa Diosin ato yoini isca huaquin,

“Na Israelifoancai ua icoinra huacanima. Ascaifoanno un atoquei sinaquicai mai shara futsa ano ato imapacunacama anoashu isharanonfo,”

ishon ato yoini. Nannori yoifianishaquin Upa Diosin nantifi onihuaquin anaitishon tununi. Nanscarifiai nantian yafi natianrifi ahuun yorafa imasharapai afu isharanonfo. <sup>4</sup> Afanan Diospan tsain cununi isca huaquin,

“Siete oshatan Diosin yononi nantifi onihuaquin anaitishon tununiran,”

ishon cununi. <sup>5</sup> Ascano Upa Diosin nocon shunifo fu rafupaini ato mai shara futsa ano imapaiquin anoashu isharanonfo. Ascfia Diospan tsain afanan cununi isca huaquin,

“Un ato imapai aricai un afanan ato imapacunacama anoashu isharanonfo,”

ishon Upa Diosin yoini. <sup>6</sup> Ascano nannori yoifiani futsafoan chipo icoinra huafoan Upa Diosin ato iquimatiro afu rafucain aton nomuran

unimacain isharanonfo. Ascan nocon shunifoan icoindra huayamashuca iquinifoma. <sup>7</sup> Ascano Upa Diosinhuunshon afanan David yoini isca huaquin,

“Natian Diosin tsain man nicañiai maton ointi mutoyamacahuun. Ascashu yoitimari iyamacahuun,”

ishon David yoini. <sup>8</sup> Ascashon Josué ahuun caifofo aton mai ano iyoni nannoashu isharanonfo. Ascañia nan maicoihuunoacai Diosin chipo noco yoima. Nan Israeli maihuunoa yoiquicai isca huacuanima, — Natian man ua nicasharaquicai afanan man shinanchacaima. Ascata-maroccon maton nomuran unimacain ufu man rafucacaishquinran, — ishoncai yoi cuanima.

<sup>9</sup> Ascacufin natiari Upa Diosin ahuun yorafo aton nomuran unimapai isharanonfo. <sup>10</sup> Upa Diosin nantifi onihuaquin anaitishon unimayanan tununi. Nanscarifiai non Upa Dios fu rafuicai non iyopaoni cuscan non afanan ascapaitiroma. Non ipaoni cuscan nantifi non shatutiro. Ascashu non Dios fu rafuaiton nocon nomuran unimamanon. <sup>11</sup> Ascacufin non Dios nicasharashu a cuscara isharacain nocon nomuran unimai cuscan non muunon. Ascan nocon shunifo yoitimashuni. Diosin ato mai shara iquimapaiñiaquicai icoindra huayamaifoan ato iquimanima. Ascan noncai ato cuscara ipaima Diosin noco imapaiyai cuscan non funoshquinma.

<sup>12</sup> Upa Diosin nipanaca. Nanscarifiai ahuun tsaincai unupacunacama mutsisipacoin. Ahuun tsainhuunoashu non isharatiro. Nopu cunocoinnin ahura cashcushon amuran non oincointiro. Nopu cunocoinñia Diospan tsain mimacaya fasi cunocoin cuscara. Ahuun tsainhuunshon non imisi cuscan yafi non shinanmisi cuscan nantifi noco puashotiro. Ascashon nocon nomuran onancoian. Non shara iyamarai non chaca shinanmisi cuscan ahuun tsainhuunshon noco puashotiro. <sup>13</sup> Nantifi onihuani Upa Diosin onancoian. Tsoancai otayamafain tsoanricai fomantiroma. Nantifi non amisi cuscan huafain non shinanmisi cuscain Diosin onancoiaiton. Ascan chipo ahuun ointaifi non aqui nocoaitian nantifi non amisi cuscan huafain non shinanmisi cuscan noco puashopacushquin.

*Futsafoan nocon Upa Dios cufishotirofo. Ascañia Jesuscañin ato finoncoianquin. Nantorifi noco Apa Dios cufishomisi*

<sup>14</sup> Ascacufin Jesús Diospan Furun nocohuunshon cufimisi nai muran cani. Nantofin nantifi Upa Dios cufimisifo ato finoncoianquin. Ascashon non yoimisi isca huaquin, — Jesús noco Iforan, — ishon non yoimisi cuscacai non cachiquiri huapanacama. <sup>15</sup> Nantifi finoncoian nocohuunshon Dios cufimisi Jesusñin non muai cuscan arifi muyopaoni. Ascan ahuaraton noco shinanchacamapaiyai cuscan arifi nansca huayopaoni. Ascacun nocohuun ramapaitiro. Satanás nan yoshin chacapan noco chaca huamapaiyai cuscan nanrifi chaca huamapaiñiaitocai anima. Jesuscai ahua chaca huamisima. Nantifi non mutiro cuscan arifi muyopaoni. Non omitsiscamisi cuscan arifi muyopaoni. Ascacun nocohuun ramapaitiro.

<sup>16</sup> Ascacufin Diosiqui ranoquima non yoipaiyai cuscan non yoinon. Non yoiaiton Jesushuunshon Upa Diosin nocohuun ramapaicain noco ashoshquin.



## 5

<sup>1</sup> Israelifoa aton caifo futsa catonnifo Upa Diosin ato yoipaiyai cuscan ahuunshon ato tapimanon. Ascacun nanfoanrifi Upa Diosin yoipaiyaifo cuscan nan nocofunuhuunshon yoinonfo. Nanrifi ato cuscara nocofunu ini. Ascashon nan catonnifo atohuunshon Diosin yoimisi niaifocoin inon. Nanrifi Diosin yoishomisi futsafoan aton niaifo inon. Moisés ato yononi cuscan Israelifoa Dios fu tsainti pushu muranshon inafon inapacunifo. Ascashon nan Diosin yoishomisi niaifoa nan inafon ato rutushonaino ahuun imi foaiton oinquin Diosin aton chaca soashoni. <sup>2</sup> Nan Israelifoa yorafohuunshon Dios fu cufimisi niaifoa ato asca huashoitian atohuunri ramapaitiro. Ascafia arifi ato cuscara nocofunu. Ahuun caiffoan amaquiri shinanquin Dios tanasharamisifoma cuscan arifi nansca huamisi. Ascafiashon chaca huamisifo cuscan nicai arifi atohuun ramapaitiro. <sup>3</sup> Ascashon inafon ato rutushotiro Upa Diosin aton chaca soashonon. Arifi chaca huamisi. Ascafiashon arifi ahuun inarutuni Upa Diosin ahuun chaca soashonon.

<sup>4</sup> Tsoacai afiri catonmutiroma ahuun caiffoan ato Dios yoishomisi niaifo iishquin. Ascano Upa Diosin Aarón catonni cuscan atorifi catontiro. <sup>5</sup> Nanscarifiai Cristocai afiri catonmunima yorafohuunshon Dios cufimisi niaifocoin iishquin. Ascatama Apa Diosin catonquin isca huani, “Min uhuun facucoin natian un mia catoan nantifiton aton Ifo min inon,”

ishon Apa Diosin yoini. <sup>6</sup> Ascashon afanan yoiquin isca huani,

“Minfin nan niaifo Melquisedec cuscaraquin. Nantofin yorafohuunshon ua yoimisi ipaoni. Ascan mirifi min nanscasi apanacaran,”

ishon Apa Diosin furun Jesús yoini. <sup>7</sup> Jesús mai ano iyoashu omitsiscapaoni. Ascashu nocohuunoashu naitian oi ashcafinin uaiyanan Apa Dios cufinquin isca huani, —Upashtan, mian numapaiquin mian numatiro un nanonma. Ascafia un apaiyai cuscan huaima nan mian amapaiyai cuscan fusti ua huahuun, —ishon Apa Dios yoini. Ascashon nan Apa amapaiyai cuscan fustisi shinanquin cufiai cuscan nicacoinni.

<sup>8</sup> Ascashu Diospan facucoinfiashu omitsiscani. Omitsiscafiaquin Apa nicacoinni. Ascashori arifi muyopaoni ahua ahuuscarafiaino Apa nicacoinpaoni. <sup>9</sup> Nocohuunoashu omitsiscafiaquin Apa Diosin yoiai cuscan nicacoinni. Ascashon yorafo ismani ahua chaca huamisima. Ascashu ishara fustimisi. Ascashu nocon Numamisi sharacoin itiro. A nicasharaifoti Upa Dios fu ipatiroquin. <sup>10</sup> Ascano Upa Diosin Furun Jesús catonshon yoiquin isca huani, —Minfin nan Melquisedec cuscara iquicai. Ascashon yorafohuunoa ua cufimisi niaifocoin min ipatiro ato numashqui. Ascashon nantifi yorafohuunoa ua yoimisisifo min ato finoncoianran, —ishon Apa Diosin yoini.

*¡Oinfain! Man Jesús cachiquiri huaa fasi musucoin itiro*

<sup>11</sup> Ascan nan rama un mato yoia cuscan nanfohuunoa un mato paratama shafacafi tapimapaifiainocai man nicasharamisima. Ascashon man funa tapisharamisima. <sup>12-13</sup> Ascan mancai na rama Diospan tsain nicama. Man man fari ranan nicafiamisishaquicai man tapi sharataima. Man tau huaquin Jesucristohuunoa tapini cuscan man man ointiaquimamisi. Ascaquicai man futsafo tapimatiroma. Ascatama mancairocofin futsafo yopaiquin man tau huaquin Jesushuunoa tapini

cuscan afanan mato tapimanonfo. Ascashufin man facufo cuscaraquin. Facushta shoma fusti ayotiro. Shoma fusti acaiton non tapitiro yosaitaima. Tushucoincal piyotiroma. Nanscarifiai mancai atirifi Diospan tsain tapisharataima. <sup>14</sup> Ascan tsoan Diospan tsain shafatifi oinfafainni cununi cuscan aashquin. Nanton tapitiro ahuara shara afainmain ahuara chaca aquimaquin. Nan cuscarafoan fasi paratama Diospan tsain tapi sharatirofo.

## 6

<sup>1-2</sup> Ascan noncai facufo cuscarama. Facufoancai ichapa tapiama. Ascariyoafofoan paratama tapisharafo. Nanscarifiai non tau huaquin Jesucristohuunooa tapini cuscan nan fusticai non shinafainima. Ascasho non tapini non ahuara shara huahuunshoncai noco chaca soashotiroma Upa Dios fu non ipanon. Non tapiniri Dios icoinra huayamashuca non afu ipatiroma.

Ascatan non unu muran iquimamua nocon chaca soashonano non Jesús ifoashon futsafo ismatirohuunooa tapifain nan icoinra huafo futsafo non ato manmanshon cufishotiro Diosin ato yonomapaiyai cuscan anonfo nanrifi tapifain yora naashu funitirohuunooari tapifain icoinra huafo Diosin ato omitsiscapanacafo muran potashquiai nanfohuunooa man non tapiyoni. Ascan afanan noncai tapimamisi yopaima nanfohuunooa noco tapimanon. Ascano afanan ascata nificairocon non paratama Diospan tsain shara tapinon Jesús tanasharashquin. <sup>3</sup> Ascan natian Upa Diosin ahuara futsafo noco tapimapaiyai cuscan ahuun tsainhuunooa non nicasharanon nanscacoicai aashquin.

<sup>4-6</sup> Tsoan Diospan tsain shara Jesucristohuunooa tapiyoni Furun Jesús aqui nichini ahuun ifo icaino ahuun nomuran mumisi. Ascashori Diospan Yoshin Shara fu rafucain ahuun tsain shara noco cunushoni iconcoicai oinquin ahuun nomuran muumisi. Ascatan Jesús oaitian ahuun curushhuunshon ahuamamishti tsoan oinyomisima cuscarama aashquiai man ahuun nomuran muumisi. Ascan nantifi ahuara sharafo ahuun nomuran mufiamisishaqin Jesús cachiquiri huacoinshon nocon Ifo Jesús afanan masta cafisca huai. Ascashon futsafoan Jesushuunooa shinanchacatirofo. Ascaran yorafoancai afanan shinan futsatiroma aton chaca shatushon Jesús ifoashquin.

<sup>7</sup> Shinancapon. Diosin oi fumariaino oian mau fupuatiro yonofoi foai sharanon. Ascano mau yonomisifo unimatirofo yono foaisharano pisharashcaquin. Ascacufin na mau Diosin shara huaquin. Nanscarifiai tsoan Diosin tsain nicafafaini isharatiro futsaforifi shara huashoshquin.

<sup>8</sup> Ascafai mau futsan ifoan fanayamaino yono foaitamarocon tosh-moshafosi foaitiro. Nanscara mau chaca foaitiro. Ascashon afanan tsoan fipaiquima coatiro coonon. Nanscarifiai tsoan Diosin tsain nicafafaiyai yoia cuscan atama ahuun tsain cachiquiri huacoincun nanscarafo Diosin omitsiscapanacafo muran potashquin.

*Non tapitiro non Jesús icoinra huashuca non funotiroma*

<sup>9</sup> Uhuun yoramishtichin, un mato na rama cunushona cuscaai un anori matohuunooa shinainma. Ascan mancai ascarama. Un icoinra huai mancai nocon Numamisi Jesús cachiquiri huamaisima. A tanasharashon nan mato yoia cuscaoin man amisi. <sup>10</sup> Upa Diosin icon fustisi. Amaquiri ahuashta shinantiroma. Ascashon mato shinanfafaini. Man ahuun

noiquin ahuun yorafo man shara huashomisi. Ascaquin man Dios ismai man noiai cuscan. Ascashori man unutama ato shara huafafainmisi. Man ato shara huaa cuscan Upa Diosin mato oiainnocai ointi aquimapacunacama.

<sup>11</sup> Man yorafohuun noiai cuscan unupacuyamacahuun. Ato shara huafafaincahuun tushcuicaquima. Nan Jesús oai chain natianri Dios yonosharashocoinfaincahuun. Man ascafin nan man manamisi cuscan Upa Diosin mato inanshquin. Ascashu man Jesús cuscara shara iishquin. <sup>12</sup> Ascacun tushcuicaquima nan Diospan yora futsafoan Jesús icoinra huacoincashion ato yoiyotiani cuscan manasharamishacaquin man ahuun Yoshin Shara fiafo aton nomuran unimamanon. Ascan marifi atohuun caocahuun Jesús tanasharacoinshcaquin.

<sup>13-14</sup> Nocon shuni Abrahamrifi nanscaracoin ipaoni. Ascashion Upa Diosin yoiyoni isca huaquin, —Unfi Diosicoinquin. Tsoancai ua finontiroma. Urusu fustifin un iconmisicoinquin. Uncai chanitiroma. Ascacun un mia shara huaquin ahuaa yoipaiyai cuscan mian icoinra huatiro. Ascashion min funafo ichaparasi un mia ato cainmashoshquin. Ascan mincai ato tanan huatiromaran, —ishon Diosin Abraham yoiyoni. <sup>15</sup> Ascaiton nicaquin Abraham funaquima mana sharapaoni. Nan yoiyotiani cuscan furun Isaac ahua cainni.

<sup>16</sup> Ascacufin non tapitiro Diosin nan yoiyai cuscacoin huamisi. Ascan futsan noco ahuaa yoiquin icoinra huamapaiyai cuscan nan futsan finoncoiaiton nannoricoinrifi noco yoiiaihuunshon non icoinra huatiro. Ascan tsoancai, —Anorimaran, —ishon fochishmatiroma. <sup>17</sup> Ascacun Diosin noco tapimapai ahuun tsain iconcain fusti noco yoiquin isca huatiro, —Un mato yoiyotiani cuscan ashofin man ua icoinra huatiroquin, —ishon Diosin yoini. Ascacun non tapitiro noco yoiyotiani cuscan nannoricoincun. Ahuun tsain fiananantiroma. Ascashion yoiyotiani cuscan afanan yoiquin isca huani, —Unfin Diosicoinquin. Tsoancai ua finontiroma. Ascacun un mato yoiyai cuscan man ua icoinra huatiroman, —ishon yoini icoinra huanonfo. <sup>18</sup> Diosin nocon icoinra huamapaiquin nannoricoin noco yoiyoni. Ascacun non tapitiro nan shinain cuscan Diosin nannoricoin noco yoiaiton. Man non tapia Diosincai chanitiroma. Noco yoiyoni Furun nocoqui nichishquin noco numanon. Ascacun non icoinra huatiro nan yoiyotiani cuscan Furunmun noco numano non afu ipanon.

<sup>19</sup> Ascashu fianananyamacain afananricai shinan futsatiroma. Ahuara ahuuscarafiaquicai noco Jesusmaqui imatiroma. Ahuunoashu fusti non nai muran Upa Dios fu ipatiroquin. <sup>20</sup> Jesús tauí Apa Dios ari cani. Nannoshon nocohuunoa apa cufishofafaini noco numanon. Ascan Jesusfin nan Melquisedec cuscara noco Dios cufishomisi niaifo ipanacaquin.

## 7

*Nan Dios yorafohuunshon cufimisi ahuun anu Melquisedec*

<sup>1</sup> Ascatarifi natian un Melquisedechuunoa mato yoinon. Nanfin Salem pushurasi anofoan aton niaifo iniquin. Nanrifi nantifi yorafohuunshon Dios cufimisi futsafo finoncoian ini. Nanfin Abrahamqui noconiquin. Nan mucu fustiti niaifofo yomutso chacafo ato ichoshon ahuun piaca mafofo yafi futsafoan mafoforifi afanan ato fishotani Abraham oaino nan Melquisedec Abrahamqui fai pochinin noconi ahuun

pushu ano naso curani oaino. Ascashon isca huaquin yoisharani, — Abraham, Diosin mia shara huairan, —ishon yoini. <sup>2</sup> Nannori yoiaiton Abraham ahuun mafo yafi ahuun tushuforifi atirifi Melquisedec inancoinni. Tsain futsa *la décima parte* inancoinni. Nan Melquisedec ahuun anu futsafin iconcoin yoifain isharacoinmisiran huanifo. Nan Salem pushurasi murannoa aton niaifocoin ipaoni. Ascano nan Salem onicoinnin tsainmanfin aton nomuran unima sharairan huanifo. Nan Melquisedec ahuun anu futsari nomuran unima sharai niaiforan huanifo. <sup>3</sup> Naanfin uhuaomacain upaomari iniquin. Ahuun shunifohuunoacai tsoan tapiyopaonima. Tsoancai cainnitian yafi naitian tapipaonifoma. Aafin Diospan Furun cuscara Dios yorafohuunshon cufinmisi ipanaca.

<sup>4</sup> Uhuun yoramishtichin shinancapon. Nan Melquisedec niaifocoin. Tsoa cuscarama ipaoni. Ascan nan Abrahamfin Israelifoa aton shuni igui tauniquin. Nocofunu fasi sharacoin. Ascashon Melquisedec ahuun caifoyamafiacun ahuun mafofo yafi ahuun tushu *la décima parte* inancoinni. Ascacun non tapitiro Melquisedec Abraham finoncoian. <sup>5</sup> Israeli shoco futsafo Leví ahuun funafo. Nanfin Upa Diosin catonniquin ahuun yorafohuunoa ato cufishomisi inonfo. Nan Levifoansi aton caifohuunshon Dios cufifafainmisi ipaonifo. Ascacia Dioshuunshon Moisés Israelifo yononi cuscan nantifi ato tushufo non ato ahuarafori futsa futsa huaquin nan Leví ahuun funafo *la décima parte* inanpacunifo. <sup>6</sup> Ascano Diosin Abraham yoiyoni ahuun funafo chipo ichapacoin ishquiain. Ascacia Melquisedec Levipan ahuun funayamafiacun Abraham nantifi ahuun ahuaara futsa futsa huaquin Melquisedec *la décima parte* inancoinni. Ascacun Melquisedec Abraham yoini isca huaquin, —Abraham, mia Diosin shara huairan, —ishon yoini.

<sup>7</sup> Icon nantiffain man non tapicoian tsoan futsafo finoncoinshon ahuun tsainman ato shara huatiro. Ascacun non tapitiro Melquisedec Abraham finoncoian. <sup>8</sup> Ascacun ahuun caifo Israeli shoco futsafoan. Nan Leví ahuun funafo ahuaarafo futsa futsa huaquin *la décima parte* ato inanfanifo nanfo man naamisifo. Ascano arifi Melquisedec Abrahamna futsa futsa huaquin *la décima parte* fiini. Ascacun Diospan tsain cununi cuscan Melquisedec natian nia. <sup>9-10</sup> Levipan ahuun funafoan aton shuni Abraham. Ascashon Abraham Melquisedec ahuaarafo inaintian nantianrifi Levifoa arifi inain cafisca huanifoquin. Nan Abraham Melquisedec inaintiancai ahuun funa Leví caiantai inima. Chipa Abraham ahuun funa Leví cainni. Ascacun non tapitiro Melquisedec fustiton aton shuni Abraham yafi atorifi finoncoian.

<sup>11</sup> Uhuun yoramishtichin shinancapon. Upan Diosinhuunshon Moisés noco yononi cuscan yafi Leví funafoan nocohuunshon Dios cufimisi-foan noco numatiroanocai Diosin Furun nichicuanima nocohuunshon Apa Dios cufimisi inon. Cristocai Aarón nan Leví ahuun funa cuscarama. Aafin Melquisedec cuscaraquin. <sup>12-14</sup> Tau Leví ahuun funa Aarón. Nan Aarónfin yorafohuunshon Diosin cufimisi futsafoan aton niaifo ipaoniquin. Ascan nocon Ifo Jesuscai Leví ahuun funa shoco futsa. Ascashucaí Aarón cuscarama. Nocon Ifo Jesusfin Judápan ahuun funaquin. Nan Levipan ahuun chipocun Judá. Ascano Judápan yorafaonri yorafohuunshon Diosin cufimisifo itiroforan ishoncai Moisés yoimisima. Ascacun non tapitiro Upa Diosin Furun nichini

afanan ahuun yorafo yoi futsanon. Ascatarifi Moisés yononi cuscan fiananan huashquin. Ascashon yononi Judápan ahuun funa Jesús nocon cufishomisi niaifo inon.

<sup>15</sup> Ascacun afanan un mato cayacafi yoisharapai. Natian shafacafi man non tapishara Diosin ahuara futsa yononi cuscan nocon Dios cufishomisi funa Melquisedec cuscara nocoqui noconi. <sup>16</sup> Moisés yononi cuscacoin Leví ahuun funafo fustifin Dios cufimisifo itirofoquin. Ascafia Jesuscai Moisés yononi cuscahuunoashu noco Dios cufishomisi icama. Aafin Diospan curushhuunoashu nipanacaquin. Ascashu noco Dios cufishomisi ica. <sup>17</sup> Nannori David Diospan tsain Jesucristohuunoa cunuquin isca huani,

“Min Melquisedec cuscara yorafohuunshon Dios cufimisi ipanacaran,”

ishon cununi. <sup>18-19</sup> Ascacun non tapitiro Moisés yononi cuscacai non afanan tanaima. Nanfoancai noco ahuusca huatiroma noco imasharon non Dios cuscara isharashquin. Nanfohuunshoncai nocon chaca soashomisima non Dios fu ipanon. Ascan Jesuscai ascarama. Aafin fasi shara finacoian. Upa Diosin nocoqui nichini ahuunshon non tapinon non afu ipatiro.

<sup>20-21</sup> Ascadari Upa Diosin Furun yoini cuscacai Levipan ahuun funafo anori yoimisima. Ascacun Furun Jesús yoiquin isca huani,

“Unfi nantifiton aton ifocoinquin. Un mia yonoai cuscan min nantifi yorafo atohuunshon ua cufimisi ipashquin. Ascashon un mia yoia cuscacai un afanan shinan futsapacunacamaran,”

ishon Furun yoini. <sup>22</sup> Ascan Apa nannori yoinicun non tapitiro Jesushuunoashu non Upa Dios fu ipatiro. Ascano Leví ahuun funafocai ascarafoma. Nanfohuunoashucái non Diospan yora itiroma. Ascan Upa Diosin Moisés huunshon Levipan ahuun funafo yononi cuscan sharafishu nan furun Jesús yononi cuscan fasi shara finacoianquin.

<sup>23</sup> Nanfo ichapafafia aton caifohuunshon Dios cufimisifocai ipatirofoma. Nan futsa naitian futsarifi catontirofo arifi aton yorafohuunshon Upa Dios cufimisi inonfo. <sup>24</sup> Ascafia Jesuscai ato cuscarama. Aafin nipanacaquin. Nanrifi noco Upa Dios cufishomisi unupacuyamacain nanscasi apanaca. <sup>25</sup> Ascan non ahuunoashu Apa Dios fu ipapaiyaiton nocohuunshon Apa Dios yoifafaini isca huaquin, —Upa Diosin, un ato nashoni aton chaca soashohuun. Ascashon mi ano ato imahuu, —ishon nocohuunoa Apa yoishquin. Ascatan nocohuunoa Apa yoia cuscan nanscacin noco huashoshquin non afu ipanon. Ascaicai non funopacunacama.

<sup>26</sup> Ascan nan Jesusfin nocohuunoa Dios yoimisiquin. Yoimisi futsafo finoncoian. Aafin Diosin cuscara sharacoinquin. Tsoancai ahuunoa ahuashta chaca yoitiroma. Aatocai ahua chaca shinanyamafain yora chacafo cuscarama. Ascashon Apa Dios icanoafori finoncoian. Ascashon non yopai cuscarifi noco ashotiro. <sup>27</sup> Yorafohuunshon Dios cufimisi niaifo futsafofiashucái ascarafoma. Nanfoan shafatifi inafo rutupaonifo Upa Dios ismaquin ato chaca soashonon. Ascashon Upa Diosin aton chaca soashonano futsafohuunoari nanfoan inafo rutushopaonifo Upa Diosin atori chaca soashonon. Ascafia Jesuscai ato cuscarama. Ato fasi finoncoian. Atocai ina rututiroma aton chaca soashonon. Ascatamarocon nancaifin nantifi yorafohuunoashu nashoniquin nocon chaca

soashoshquin. Ascano nancai afanan ahua futsa yopaima noco chaca soashoshquin. Ascashon nan fustiton nocon chaca soashonano non Upa Dios fu ipatiroquin.

<sup>28</sup> Ascan Upa Diosihuunshon Moisés yononi cuscan yorafohuunoa Upa Dios cufimisifo non aton niaifofori catonnifo. Ascan nanfofin noco cuscarafuquin. Ascashon nanfoanri chaca huamisifo. Shara ipaifiaquin samamashta chaca huapaonifo. Ascacun Diosin ahuun tsain yoyoni cuscan Furun Jesús chipo catonni nocohuunshon Dios cufishomisi ipanon. Aatocai ahua chaca huamisima. Aafin shara fusti imisiquin.

## 8

*Upa Diosin ahuun tsain futsancai anori noco tapimayopaonima cuscan natian noco tapimani Jesús fustihuunoashu non afu ipatiro*

<sup>1-2</sup> Ascan nan Jesusfin Apa Dios niaifocoin icari afu icaquin. Ascashon non yopai cuscan nocohuunoa Apa yoipacushquin. Aafin noco yoishomisi niaifocoinquin. Nan icaricai tsoa futsan onihuanima. Dios fustiton nanri onihuani. Nanriashu nocohuunoa Apa fu tsaincaini. Nan ica ari Dios fu tsainti pushu cuscaracoin. Ascano un mato cunushona cuscan nanfo man shafacafi tapi.

<sup>3</sup> Nan nocon yorafohuunshon Dios cufimisi niaifocoin nantifi ato catonnifo ahuarafu Dios inanfain ina rutucashon aton chaca shoashonon. Ascano nocohuunshon Dios cufimisi nan Jesús arifi ahua futsan inanniquin. <sup>4</sup> Moisés yononi cuscan Leví ahuun funafosi Israelifoan aton Dios cufimisi itirofo. Nanfoanfin inafu rututirofo aton chaca soashonon. Ascano Jesuscai Levipan funama. Ascashu Jesús nuno mai ano icashucaí nocohuunshon Apa Dios cufimisi icuanama. <sup>5</sup> Ascano nuno mai anoshon nan Leví funafoan Dios fu tsainti pano pushu muranshon yonoshopaonifo. Nannoshon ahuun caifo Israelifo tapimapaicaquin Dios icarimain ahuu cuscaracoin. Ascafia ascaracoin tsoan tapiyonima. Ascacun Upa Diosin Moisés yononi isca huaquin, —Un mia tapimanai cuscan nansacoin ufu tsainti pano pushu huahuun. Man min shinainmun un mia machi anoshon tapima cuscan nansacoinrifi ufu tsainti pano pushu huahuun. Ascacun yonomisifo tapimahuun nan un mia yoia cuscacoin huanonfo, —ishon Upa Diosin Moisés yononi.

<sup>6</sup> Ascafia Diosin Furun Jesús yononi cuscan nan Moisés yononi cuscan finoncoian. Ascacun Jesús Apa icarishon nocohuunoa Apa cufifafaini nocon chaca soashonano non afu ipanon. Ascan Levipan funafoancai asca huapaonifoma. Upa Diospan Furun Jesús yoyiotiani cuscacai ato yoimisima. Ascano atorifi yoyiotiani cuscan sharafishu nan Furun yoyiotiani cuscacain fasi shara finacaiquin.

<sup>7</sup> Upa Diosin Moisés yoyiotiani cuscahuunoashu non isharacain ahua futsa non yopayamatirocucai nan Jesushuunoa ahua futsa fasi shara finacai noco yoicuanima. <sup>8</sup> Ascafia Upa Diosin yoini Moisés huunshon ato yoifianicai tsoa ascacoinmisima. Ascashucaí isharayamacain yoitimacoin imisifo. Ascacun nocon Ifo Diosin yoini isca huaquin,

“Un chipo Israelifo nan Judápan ahuun funafori tsain funa shara futsa un ato yoishquin. Nan un ato sharacoin ashoai cuscan

un ato tapimashquin. <sup>9</sup> Un ato shunifo Egipto anoshon iyoni. Nantianri un ato yoisharani uhuun tsain nicasharaifoan un ato cushusharafafainon. Un ato asca huafiaino uhuun tsain cachiquire huanifo. Ascaifoan un ato potayoni. Ascacun ato shunifo un yoini cuscacai un ato funafo anori yoishquima. Ascatarocon uhuun tsain shara futsa un ato yoishquin ua nicasharanonfo.”

<sup>10</sup> “Un Israelifo yoishquiai cuscacai cunu fustihuunshon un ato tapimashquima. Ascataka aton nomuran uhuun tsain shara nanumafain aton nomuran cunui cafisca huaano. Nan un ato yonoai cuscacoin anonfo. Ascano un ato Upa Diosincoin iishquin. Nanfo uhuun yorafo iishcani. <sup>11</sup> Nantiffain ua onancoinshcani. Yora ahuuamafoan ua onainfoanno ni-aifofoanri nansca huaquin ua onancoinshcani. Ascashon tosa futsacai uhuunoa aton yora futsafo tapimashquicanima. Aafimain nantifiton ua onancoinyainfoan.”

<sup>12</sup> “Un atohuun ramapaishquin. Chaca huafiainfoan un ato chaca soashofain un ato rau huashquin. Ascashocai chaca huafo cuscan un afanan afo shinanpacunacamaran,”

ishon Diosin yoini. <sup>13</sup> Ascacun Diosin afanan ato yoini isca huaquin, —Un mato tsain funa shara yoiran, —ishon ato yoini. Ascan Moiséshuunshon ato yononi cuscacai tosa afanan yopatiroma. Nan Moiséshuunshon ato yononi cuscan fasi tsain shunicoin. Tsoancai afanan afohuunoa yopaiyamaino nan tsain cuyocointiro. Ascashu nanfohuunoa shinanmaquipacunacafo.

## 9

*Pano pushu cunu futsa ocu murancoin Jesús iquitamarocon Apa Dios icaricoin iquini*

<sup>1</sup> Upa Diosin Moisés tapimani ahuuscashomain ahuun yorafoan nan na mai anoshon pano pushu muranshon cufitirofoquin. <sup>2</sup> Ascan nan amuranshon Dios cufiti pano pushu cunu rafuya iniquin. Nan cunu taua muran anuqui isca huanifo, —Nuno shara fustisi itiroran, —ishon anunifo. Nan muranrifi faro nia ini. Cuno chashna faca facaitsa tushpacua ahuun shoimishti muran shuni ocapacushon otapaonifo. Nannori sapa acamaquishon piti ini. Nan sapa camaqui misi sutu huashon huafafainpaonifo. Ascashon Diosin atofu ica cuscan ato oin-mashquin. <sup>3</sup> Pano cushtopan futsan fupoa cunu ocu murancoin anunifo isca huaquin, —Nuno fasi shara finacoianran, —ishon anunifo. Israelifohuunoa aton Dios cufishomisi niaifo fusti nan cunu futsa muran iquitiro ini.

<sup>4</sup> Nan Dios cufiti cunu muran nantio cuno chashna faca facaitsa sharaishtan puraishica ini. Ascashon nan cufiti camaqui ahuara coanifo ahuun coin tipoaino nohuu inin sharayacoin inon. Nan coin tipoaino Dios ismapaonifo a cufifafaincaquin. Nannori cashon uhuapa ini. Nan ihui casho cuno chashnanpan puraishacafo faca facaitsa sharacoin ini. Nan cashon muranri tutso chashna faca facaitsa muran misi torumishti anucaquin, —Mananran, —huapaonifo. Nan casho muranri Aarón ahuun poquiti yafi toquiri sapa rafu nanunifo. Nan poquiti casho muran nanuataifoma Upa Diosin charo shachoco onihuariscatani. Ascashon

nan toquiri sapa rafuqui Upa Diosin Israelifo yonopaiyai cuscan ato cunushoni.

<sup>5</sup> Ascan nan casho camaqui Diospan nai oinmati ointsa rafu nimanifo. Ato putaon rafutan aton mapo manaon mutiquinanfo. Ascano nan nai oinmati rafuhuunshon Diosin fasi sharacoin ato cushusharamisi ato ismanon. Ascacun nanno anuquin isca huanifo, —Nunoshon Diosin nocon chaca soashonaran, —ishon nan casho anunifo. Ascafia nanfohuunoacai un mato natian paratama yoiyotiroma.

<sup>6</sup> Ascashon nan amuranshon Dios cufiti pano pushu ocu murancoin iquisi itishara huacashon nan aton caifofohuunshon atohuunoa Dios cufimisifo cunu umainti cainifo nannoshon Upa Diosin ato yononi cuscan aashcaquin. <sup>7</sup> Ascano nan cunu futsa ocu murancoin ahuun yorafohuunshon ato Dios cufishomisifoan aton niaifocoin arus fusti nan faritifi iqui fustipaoni. Nanno iquicai moipan imimaisi iquipaonima. Ascano moipan ahuun imi foshon ahudara chaca huamisi cuscan ahuunoa afiri yoimucain ahuun yorafohuunshori yoiaiton Upa Diosin aton chaca soashoni. Ahudara chaca huafiaquin tapishoma acafo cuscan nanfori soashonon.

<sup>8</sup> Ascacun nanfohuunshon Diosin ahuun Yoshin Sharapan noco shafacafi tapimani nan pano pushu ipaonitian ahuun caifofohuunshon Dios cufimisi niaifon fusti cunu osa futsa ocu murancoin iquipaoni Dios fu tsainshquin. Ascano nan cunu ocu murancoin anunifo, —Nuno fasi shara finacoianran, —ishon. Nantiancai tsoan tapiatai inima chipo Jesushuunshon nantifi Diospan yorafo afu tsaintirofo. <sup>9</sup> Un na rama yoiyai cuscarafohuunoa natianrifi noco nanscara tapimatiro. Ipaoni Moisés ato yononi cuscan Dios fu tsainti pano pushu muranshon ahudarafo Dios inanfain moifori rutushopaonifo ato chaca shoashonon.

Ascafia afohuunshocai aton nomuran unimapaonifoma. Nanfoancai aton nomuran shinanmapaonima isca huaquin, —Natian Upa Diosin uhuunoa ahua chaca ointiroma. Un natian shara. Un natian Upa Dios fu itiro afu tsainshquin, —ishocai tsoan anori shinantiro ipaonima. <sup>10</sup> Ascan Moisés ato yononi cuscan ahuun caifofohuunshon Dios cufimisifoan ato nansca huashonifo. Ascashon ahudara futsafori ato tapimanifo. Ahua pifainmain ahuari ayatirofoquin. Ascatan ahuuscashurimain muchoquimutirofoquin Diosin ato nicacoinon. Ascafia nanfoancai aton chaca soashocointirofoma. Cristo oataima nannori Diosin ato yoiyoni. Nan Cristo naitian ahuunoaahu man nantifi fianananshara. Ascano cai Moisés ato yononi cuscan afanan tsoashta yopatiroma.

<sup>11</sup> Upa Diosin ahudara sharacoin noco yoiyotiani isca huaquin, —Un maton chaca soashoni man ufu isharacoinon, —ishon yoini. Ascano nan Israelifohuunshon Dios cufimisi niaifofancai noco nan yoiyotiani cuscan tsoan ascacoin huatiro ipaonima. Ascafia Cristo mai ano oaitian aficoi nocohuunshon Apa Dios cufimisi niaifocoin man ica. Ascashon nantifi ahudara sharacoin noco yoiyotiani cuscan noco ashoshquin. Ascana nan naashu pano pushu ocu murancoin iquitama. Cayacafi Apa Dios icaricoinrocon iquini. Nannocai Diosin mai onihuani cuscarama. Nocofunufocoin pano pushu onihuafianifo. Ascan Dios icaricaifin fasi shara finacoianquin. Ahuashtatocai ari finontiroma. <sup>12</sup> Ascan Cristocai chashoanfo futan moipan facufoan aton imi Apa Dios icari fonima. Ascatamarocon afincoi noco nashoaintian ahuun imi foni. Ascano cai Upa Dios icari ahuashta chaca iquitiroma. Ascafia Cristo noco nashoin



fustini nocon chaca soashoshquin non Apa Dios fu ipanon. Ascashucaí afanan nanacama.

<sup>13</sup> Ascan ratoran futsa Diosin yoiyoni cuscan ayamashu ahuun yorafo-huunshon Dios cufimisi niaifo yoitirofo ipaoni. Ascano nanfoan chashoanfo futan moipan ahuun imi fifain iquisi moipan facu coay-opaonifo. Ascashon ahuun maapo yafi imi osishon yoraqui fasha fashapaonifo ahuun chaca soashonano Diospan yora shara icashu afu iishcaquin. <sup>14</sup> Nanfo iconfia fasi mimacaia Cristo noco nashonihuunshon chaca noco soashotiro. Ascashon atocai ahuashta chaca hua-panacama. Ascan nan Diosin Yoshin Shara nipamisihuunshon Apa yoini isca huaquin, —Upa un atohuunoashu nai. Ascacun uhuunshon min aton chaca soashotiro min yorafo inonfo, —ishon Jesucriston Apa yoini. Ascan non chaca huamisi cuscan non unuyamashu omitsiscapanacafu muran non cacuana. Ascafia non afanan asca huatamarocon Cristo noco nashonihuunshon non afanan chaca shinanonma. Ascashu nocon nomuran chocatsa shara cuscara itiro. Ascashon Upa Dios nipanaca non yonosharashotiro.

<sup>15</sup> Moisés ato yononi cuscan sharañacucai tsoan nicafafainpaonima. Nantianri nantififain chaca huapaonifo. Ascano nanfoan chaca hua-panonifo cuscan Cristo fustiton aton chaca soashotiro. Ascafoancai Moisés ato yononi cuscan afanan ato yonotiro. Ascacun natian Cristo atohuunoashu nani ato chaca soashoshquin. Nanfin ato Numamisi sharaquin. Ascan Cristo icoinra huafoti Upa Diosin ato yoitiro isca huaquin, —Uqui fucahuun uhuun facuhuunoashu uhuun yorafo iishcaquin, —ishon yoitiro. Nanto noco yoyiotiani cuscan Furunhuunshon noco catontiro ahuun yorafo non inon.

<sup>16-17</sup> Natian ahuara futsa un mato tapimapai man tapinon. Noco-funun nataima cunutiro isca huaquin, —Un naanomai tsoan uhuun ahuarafo fitiroquin un mato iquisi tapimaiyoiran, —ishon cunutiro. Ascacun ahuun ahuarafo futsa inanpaiyai cuscan nataishoma iquisi nan yoyiomisi cuscan cunushotiro. Ascan nan nocofunu niyoanocai ahuun ahuarafo tsoan fianyotiroma.

<sup>18</sup> Nanscarifiai Diosihuunshon Moisés ahuun caifo Israelifo yononi moi yafi chashoanfo rutuaifono ahuun imi fonon. Ascan aton imi foyamainocai ato yoiyoni cuscacoin Diosin ato ashotiroma. Ascacun nan moi yafi chashoanfo rutucashon Dios ismafain tapipaonifo chipo Cristo ato nashoshquiai cuscan. Cristo atohuunoashu nataimacai Diosin aton chaca soashocoinpaonima afu ipanonfo. <sup>19-20</sup> Upa Diosin Israelifo yonoai cuscan nantificoin Moisés ato tapimafain ato yononi. Ascashon nantifi ato tapimaqui anaitishon nii uhuapamashta futsan ahuun anu hisopo ahuun ponya uhuapamashta fini. Fishon moipan facun ahuun imi yafi unu osishon nan hisopo ponyamishti pishtanufain chashoanun rani amuran pocotan Diosin yononi cuscan ahuun papio cunuaqui imin fasha fashafain Israelifoquiri imin ato fashacuni. Ascashon ato yoini isca huaquin, —Nan imihuunshon man tapitiro Upa Diosin noco yoyiotiani cuscacoin ashu non afu ipatiro. Ascashu non ahuun yorafo itiroran, —ishon Moisés ahuun caiffo yoini.

<sup>21</sup> Nanscarifi aqui Dios cufiti pano pushuqui Moisés moipan imi fasha fashafain nantifi amurannofoquiri imi fasha fashani. <sup>22</sup> Nan Upa Diosin Moisés yononi cuscacoin nantificuana ato imin fashacuni ato

chaca soashonano isharanonfo. Ascan imi foyamainocai Diosin noco rau huacuanama nocon chaca soashoshquin.

*Cristo nocohuunoashu nani nocon chaca soashoshquin*

<sup>23</sup> Dios cufiti pano pushu murannoa ahuarrafo nan Dios icaria cuscaracoinfo. Ascan nanfoqui Moisés imin fashacuni shara inonfo. Ascan amuran sharafia nan moifoan aton imifohuunshoncai nocon chaca soashocointiroma. Ascatamarocon nan Cristo nocohuunoashu nai fustinihuunshon nocon chaca soashotiro. Noco nansca huashoano non Dios icari catiro a cuscara shara afu ipashquin. Nannocai ahuashta chaca iquitiro. Ascatan nannoricai Dios cufiti pano pushu cuscaracoinma. Aricairocofin fasi shara finacoianquin.

<sup>24</sup> Ascan nan Dios fu tsainti pushufin nocofunufon onihuaniquin. Amurannoa ahuarrafo nan Diosin icaria cuscaracoin. Ascan Cristocai funinaca huatan amuran iquitama. Apa Diosin icaricoinrocon caya-cafi iquini nocohuunoa Apa Dios cufishofafainshquin. <sup>25</sup> Ascan nan ahuan yorafohuunshon Dios cufimisi niaifo pano pushu cunu futsan ocumurancoin arus fusti faritifi iqui fustipaoni amuran shon Dios cufishquin. Ascashon ahuan imicoin ya a muran iquitamarocon inapan imi ya iquipaoni. Ascan Cristocai a cuscarama. Aacai faritifi noco nashofafainmisima Dios icari caashquin.

<sup>26</sup> Ascamicucacai nan Diosin ahuarrafo onihuan chain nocohuunoashu omitsiscafainmisi icuana. Ascafiacai ascarama. Satanás ahuaa chacafo aton curush cuyomanaitian Cristofin nocohuunoashu nai fustini nocon chaca soashoshquin afanan chaca nocon ifo inonma. <sup>27</sup> Ascan nantifi yorafa non nai futsushquin. Noncai nofiri yoitiro ahuutian-main non naicain. Diosin fustiton yoitiro. Naashu nantifi non aqui nocoaiton niyoshon non amisi cuscan noco yoishquin. Noco yoiano nan Jesús icoinra huafoti afu ipasharatirofo. Nan icoinra huamisifoma ato omitsiscapanacafo muran potashquin.

<sup>28</sup> Ascashu Cristo aafiri inanmucain noco nashoin fustini. Yora ichapafohuunoashu omitsiscacai noco nashoni. Ascacia chipo afanan ahuan yorafocui mai ano nasoshquin. Ascanishaquin nantian afanan nocohuunoashu naima nocon chaca soashquin. Ascatamarocon ratoranfo aqui unimacai manaifoan ato numashqui afu ipanonfo.

## 10

<sup>1</sup> Diosin Moisés yononi cuscahuunshon non tapitiro Cristocafin noco ahuaa shara huashoshquin finacoinshquin. Ascacun Moisés ato yononi cuscacai noco ascacoin huatiroma. Nantorifi ato yononi cuscan nan faritifi atohuunshon Dios cufimisifoan moi yafi chashoanfo rutushomisifo aton chaca soanonfo. Ascano nan Moisés yononi cuscahuunshoncai ato numayamafain ato imasharamisima Dios fu ipanonfo. <sup>2</sup> Ascamicucacai Israelifohuunshon moi yafi chashoanfo ato rutushopaonifo cuscan tsoan unu cuamisima. Ascashon nan Dios tanapaicoinmisifori ato chaca soashoshquin fusti huacuanama, —¡Ohuashta! Un chaca huamisiran, —ishocai tsoan anori shinancuanafoma. <sup>3-4</sup> Ascafiacai ascarama. Nan faritifi moi funufo yafi chashoanfo ato rutushonaifotian nan chaca huamisifo cuscan fasi ato shinanmapaonifo. Ascafiaquicai nan inapan imihuunshon tsoan ato chaca soashopacunacama Dios fu ipanonfo.

<sup>5</sup> Ascacufin Criston Apa Dios icariashu mai ano fotoataima iquisi Apa yoiquin isca huani,

“Upan, mincai fuchipaima moipan imihuunshon chaca soanonfo. Ascacun mian chipo yorafoan caya cuscara onihuashoin un mia ufiri inanmunon. Ascashu yorafoti un naashoshquin ato chaca soashoshquin. <sup>6</sup> Min yorafoan moifo rutucashon cofain ahuara futsafori mia inancaquin. Nan miacoin inain cafisca huamisifo aton chaca soashcaquin. Ascan miancai ascarafo fuchipaima. <sup>7</sup> Upan, un mi ariashu nuno mai ano fotoa min ua amapaiyai cuscan aashquin. Nannoricoin uhuunoa min tsain cunuyoniran,”

ishon Cristo yoini. <sup>8</sup> Uhuun yoramishtichin, shinacapon. Cristo Apa yoiquin tau huani isca huaquin, —Upan, Moisés ahuun caifofo yononi cuscacai min afanan nanfo fuchipaima. Ascan nanton ato yonoquin isca huani, “Moi yafi chashoanfo rutuafono aton imi foaihuunshon min ato chaca soashonon,” huani. Ascashon ahuara futsafori mia inanpaifain ina futsafori rutushon cofain nan miacoin inain cafisca huamisifo aton chaca soashcaquin. Ascano nanfoancai mia unimamatirofomaran, —ishon yoiquin tau huani.

<sup>9</sup> Ascashon afanan yoiquin isca huani, —Upan, un mi ariashu nuno mai ano ftoni min ua amapaiyai cuscan ashquin, —ishon Jesucristo yoini. Ascan Cristo noco nashoni nocon chaca soashoshquin. Ascacun Moisés ato yononi cuscacai non afanan yopaima noco chaca soashonon. Nanfo Jesús man shatamani. <sup>10</sup> Ascashu Apa amapaiyai cuscan Jesucristo afiri inanmucain noco nashoni nocon chaca soashoshquin non a cuscara shara inon. Ascacun noncai afanan ahuara futsa yopaima. Nanton noco nashoin fustini. Ascanishaquicai afanan nanacama.

<sup>11</sup> Ascan nan atohuunshon Dios cufimisi Israelifoan shafatifi inafu rutupaonifo Upa Diosin aton chaca soashonon. Ascashon nanfoanrifi shafatifi aton yorafohuunshon ahuarafo Dios inanfafainpaonifo. Ascafiaquicai nanfoan ato chaca soashopacunacama. <sup>12</sup> Ascafiafono nan nocohuunshon Apa Dios cufimisi nan Jesusfin afiri Apa inanmuniquin noco nashoshquin. Ascashu nai fustini. Ascanocai non afanan ahuara futsa yopapacunacama nocon chaca soashonon. Ascan nocohuunoashu naacaini Apa Dios ari cani afu nantifiton aton niaifocoin iishquin. <sup>13</sup> Ascashu nan Apa ari noconitian yafi natianrifi ato manaiyoi nan noicasmaifo Apa Diosin aton curush shatumaitian afanan ahuushta inonfoma. Ascano nantianri Jesús fusti nantifiton aton Ifocoin iishquin.

<sup>14</sup> Ascashu afiri Apa inanmui fusticai noco nashoni nocon chaca soashoshquin. Nan icoinra huafoti non a cuscara shara inon. Ascashocai afanan Diosin nocohuunoa ahuashta chaca oinpacunacama. Manmain Furunmun noco chaca soashocun. Cristocai ahuashta chaca huamisima. Ascacun norifi non a cuscara sharacoin iishquin. <sup>15-16</sup> Nannori Diosin Yoshin Sharapan yoiquin tau huani isca huaquin,

“Uhuun yorafoan ua icoinra huacun aton nomuran uhuun tsain ato nanumafain aton ointi muranri uhuun tsain cunui cafisca huashquin ua ointiaquimaiyamacai ua tanasharanonfo,”

ishon yoini. <sup>17</sup> Ascashon afanan yoiquin isca huani,

“Man ahuara chaca huamisifo cuscan yafi uhuun tsainrifi man nicacasmamisi nanfocai un afanan shinanpacunacamaran,”

ishon Diosin Yoshin Sharapan yoini. <sup>18</sup> Ascashon noco chaca soashofain nanfohuunoa afanan noco shinanshonima. Ascacuai non afanan ahua futsa inantiroma noco chaca soashonon.

*Non Upa Dios fu rafucoinon*

<sup>19</sup> Dios icaricai ahuashta chaca itiro. Ascacun Jesús noco nashoni nocon chaca soashoshquin. Ascacun uhuun yoramishtichin, Jesushuunoashu ranotama non Dios fu itiro. <sup>20</sup> Ipaoni nocohuunshon Dios cufimisifoan pano cushto pochimua fupuacufoan nan faritifi iqui fustipaonifo Dios cufishcaquin. Ascafia noncai afanan asca huapacunacama. Natian ahua futsan funa sharacoin Jesús noco ashoni. Ascashon ahuan caya mastafotian nan pano cushtopan fashnui cafiscani. Ascacun Jesushuunoashu non Dios icano iquisharatiro. <sup>21</sup> Nocon Ifo Jesusfin nocohuunshon Apa Dios cufimisi niaifocoinquin. Ascashu aafin nantifi Diosin yorafoan aton Ifoquin. <sup>22</sup> Ascacun non Jesús icoinra huacun nan noco nashonihuunshon nocon ointi funa sharacoin huashotiro. Ascashocai non chaca huamisi cuscan afanan non shinantiroma nocon nomuran unimacoinon. Ascashon noco nan unu tsoi sharapan nashimana cafisca noco huatiro. Non afanan ahuashta chaca nocon nomuran shinanonma. Ascan nan iconcain Upa Dios fu rafuashu non afu tsainshquin.

<sup>23</sup> Ascan non yoiquin isca huamisi, —Jesús uhuun Ifo. Upa Diosin noco yoiyotiani cuscan noco ashoshquiran, —ishon non yoimisi. Nan iconcain. Ascacun ahua futsa shinanyamacahuun. Nan fustirocon shinanfafaicahuun. <sup>24</sup> Diosin noco shara huamisi. Ascacun norifi non shinanon ahuuscashumain futsafo non shinanmatiroquin noinantancain non shara huatananshquin. <sup>25</sup> Man man tapia Jesús oti chaima. Ascacun ichanain unupaifafainyamacahuun. Dios cufiyanan ahuan tsainri nicafain fananshofafaincahuun. Jesushuunoa man shinain cuscan futsafoya yoinonancahuun maton ointi unimashcaquin. Atirificai afanan ichananfafainmisifoma. Ascacun ato cuscara iyamacahuun.

<sup>26</sup> Ratoran futsafoan tapiafo Jesús ahuunoashu naani ahuan chaca soashoshquin. Nanscara man tapifashon chaca huariaquin nocon Ifo Jesús cachiquiri huacoincun. Ascarafocai afanan ahuan chaca soashotiro. Jesús fustiton nocon chaca soatirofia nanton man Jesús cachiquiri huacoinna. <sup>27</sup> Nanscarafo Diosin ato onaintimacoinshquin. A noicasmamisifocafin fasi onaintimaquin finacoinshquin. Nantianri nan cachiquiri huamisifo fasi omitsiscapanaca. Ascashu Diosin ointaifi nococani fasi ratucoinfiafoan Diosin ato yoiquin isca huashquin, —Umaquinoashu omitsiscapanacafo muran fotocahuun, —ishon ato yoishquin. <sup>28</sup> Ipaoni yora rafutan iyamarai rafu non fustifain nannorisi futsahuunoa tsain chaca niaifofa yoicaquin isca huapaonifo, —Natocai Moisés noco yononi cuscan acama. Fasi chaca huaran, —ishon yoiaiton niaifoan nicaquin iconcaincun ahuan ramapaitama yononi nan rutumanifo.

<sup>29</sup> Ascano nan Moisés yononi cuscan nicacasmamisifo rutumapaonifo cuscan nanscarifi huaquin ratoranfoan Jesús nicacasmamisifocun ato onaintimaquin finacoinshquin. Ascashon nanscarafoan shinanquin isca huanmisi, —Mun nicamisi Jesús ua nashoni. Nan naino ahuan imi foni. Ascashon ua catonni ahuunoashu un Diospan facu inon. Ascan un shinan nanfocai ahua. Ascacun uncai Jesús icoinra huapaimaran, —ishon anori shinain nantonfin Jesús nicacasmamisicoquin. Ascara

tsain yoiquin Diospan Yoshin Sharaqui tsain chaca huamisi. Ascafia nan Diosin Yoshin Sharapan yorafohuun ramapaiquin Jesushuunshon aton nomuran fianan huashotiro a cuscara shara inonfo. Ascafia nan nicaiyosmashunifocai fin fasi ato onaintimaquin finacoishqui quin omitsiscapanonfo.

<sup>30</sup> Ascan man non tapia Diosin aficoi yoiquin isca huani, —Tsoan futsa chaca huaiton unfin ato onaintimaquin, —ishon yoini. Afanan Diospan tsain cununi isca huaquin, —Nocon Ifoan ahuun yorafoan chaca huaifoan nanfori Diosin ato onaintimashquiran, —ishon cununi.

<sup>31</sup> Ascan ratoranfoan nocon Ifo Jesús cachiquiri huashon chaca huariaifo fasi musucoi. Ascacun nanscarafo nan Diosin nipanacaton achishon ato fasi onaintimacoinshquin.

<sup>32</sup> Shinancapon uhuun yoramishtichin. Man tau huaquin Jesushu- unoa tapifain man ifo huapaoni cuscari ointiaquimayamacahuun. Futsafoan mato Jesús tanatima huafaino manrocon nocon Ifo Jesús man tanasharacoinpaoni. Ascashon mato omitsisca huafiainfono nanscara tunufain man nocon Ifo tanasharacoinmisi. <sup>33</sup> Ascashon man Jesús tanasharaiton futsafoan ato ointaifi mato roafain mato omitsisca huamisifo. Nanscarifiai man muumisi cuscan Jesús tanamisi futsafo arifi omitsiscaifoan oin atofu rafucain man ato tsain shara yoitiro ato ointi unimamashquin.

<sup>34</sup> Jesús icoinra huaa futsafo cunu muran iquimanifo. Ascacun atohuun noicai man atohuunri ramapaiquin cunu muran ato oincai man cani ato shinansharamapaifain aton ointi unimamashquin. Ascan nantianri nan icoinra huamafoan maton mafo onuquin cuyocoinnifo. Mato asca huafiafocai shinanchacatamarocon man man tapini Upa Diosin nan icarishon mato ahuara shara finacoianfo mato mucushona nanfocai funopacunacama. Nanscara tapiashu man unimacoinni.

<sup>35</sup> Ascacun man Jesús icoinra huaa cuscan cachiquiri huayamacahuun. Man cachiquiri huayamacun Upan Diosin mato fasi shara huashquin. Ascashon mato inain cuscan tsoan ascara shara oinyomisima. <sup>36-37</sup> Ascan Diospan tsain cununi isca huaquin,

“Jesús oti chaima. Matoqui samamashta nocoshquin. Nantonfin afin tapiaquin ahuutianmain nocoqui ooshquicain. Ascashu oicai ichaipacushquima,”

ishon cununi. Ascacun man Jesús tanasharai cuscan omitsiscafiaqui tunucahuun. Unupaiyamacahuun Diosin mato amapaiyai cuscan ashon nan mato yoiyotiani cuscan man fiishquin. <sup>38</sup> Ascashon afanan Diospan tsain cununi isca huaquin,

“Nan un imasharaiton ua icoinra huamisi. Naantofin ua tanasharashqui quin. Ascan tsoan ua cachiquiri huacucui un aqui unimashquimaran,”

ishon Diosin yoini. <sup>39</sup> Nanscarafoan Jesús cachiquiri huacoincanashu omitsiscapanacafo muran focani. Ascan noncai ascaima. Ascatemala non Jesús icoinra huacoincun noco numa non afu ipanon.

## 11

### *Icoi nra huamisifohuunoa*

<sup>1</sup> Ascan non Upa Dios icoinra huacoinshon noco yoiyotiani cuscan noco ashoataiyamafi acun non icoinra huai. Chipomain noco ashoaiton. Nanscarifiaquin noco yoiyoni cuscan non oiantaiyamafiaqui ahuun

tsainhuunshon non icoinra huai. Non nanscara shinanquifin non icoinra huaiquin. <sup>2</sup> Ascacun nocon shunifoan Diosin ato yoini cuscan fasi icoinra huacoinpaonifo. Upa Diosin atoqui unimacoinquin atohu-  
 uoa tsain shara yoini.

<sup>3</sup> Ascan icoinra huashon non tapitiro Diosin ahuun tsainmansi nantifi nan mai yafi nai ariafori onihuani. Non ointiro cuscarafohuunoacai Diosin ahuarrafo onihuanima. Ascatama ahuun tsainmansi nantifi onihuani.

<sup>4</sup> Nocon shuni Abel Dios icoinra huashon chashoanun facu inanquin nan Dioscoin inain cafisca huani. Ascan Diosin aqui unimacoinni. Ascan ahuun ochin Caincai ascara inima. Nan Caín icoinra huayamaitocai nantori inanpaiyai cuscan Diosin fuchipainima. Ascan ahuun ushto Abel icoinra huacoincun ahuunoa Diosin yoiquin isca huani, —Min ua inanshararan, —ishon yoini. Abel man Dios icoinra huashu man naafianicun non ahuun caoaino nocoqui Diosin unimacointiro.

<sup>5</sup> Nocon shuni Enoc arifi Dios icoinra huacoinnashu afu rafucoinpaoni. Ascan nayamafiadun nan icari Diosin ihuiriscatani. Ahuunoa Diospan tsain cununi isca huaquin, —Un Enoc yoiyai cuscan ua nicacoinmisi. Ascacun un aqui unimacoinran, —ishon Diosin yoini. <sup>6</sup> Ascan non icoinra huayamaquicai non Dios unimamatiroma. Ratoran futsan Dios fu ipaicoinquin icoinra huatiro natian Dios nia. Ascashori tsoan fasi onanpaicoinquin icoinra huaiton naanfin aqui nocoaiton Dios fasi shara huashquiquin.

<sup>7</sup> Nocon shuni Noé arifi Dios icoinra huacoinpaoni. Ascan iquisi Diosin Noé yoiquin isca huani, —Un oihuanrasi fumai faitahuan foran fucuaينو asai futsunonfo. Ascacun shashohuan pushu ya huahuun. Min non min ahuin non min facu rafu yafi min fanfanhua rafuya asashcaquima. Un mia yoiyai cuscan huahuun, —ishon Diosin Noé yoini. Ascan tsoancai ascara oinyomisimafia Noén icoinra huafain shashohuan huani ahuun facufo ya asashcaquinma. Nantonfin Dios icoinra huafain ishara-  
 coinmisiquin. Ascan nan icoinra huamafocai ascanifoma. Ascatama nanfoan chaca huafafainpaonifo. Ascacun Noéhuunshon non tapitiro icoinra huamisifo isharaifonocai nan icoinra huamafo isharamisifoma. Ascashon Dios fu Noén rafuaiton a cuscara sharacoin imani.

<sup>8</sup> Nocon shuni Abraham arifi Dios icoinra huacoinpaoni. Ascan Diosin Abraham yoiquin isca huani, —Nan un mia iyopaiyaiquiri min catiro. Ascan min cainni anoashu catahuun. Nanno un mia mai inain min inon, —ishon Upa Diosin yoini. Ascaran tapiataima ini raquiricaimain caiquin. Ascafia nan Diosin yoia cuscacoin ani.

<sup>9</sup> Ascashon nan Diosin yoiyotiani cuscacoin icoinra huashu nan Diosin nichian mai ano nocoashu Abraham nan mai futsa aria yora futsa ahuun caifo cuscarama iyopaoni. Nannoashuri pano pushu tapasi cuscara muran iyopaoni. Ascan ahuun facu Isaac yafi ahuun shota Jacoborifi nanscara muran iyopaonifo. Upa Diosin Abraham yoini cuscan nan rafu nannoricoini ato yoini. <sup>10</sup> Diosin Abraham yononi cuscan nan mai ano iyoflashon tapipaoni chipo Dios icari afu ipashquiain cuscan. Nanno Diosin nantifi onihuani sharashtacoinfo nanfori ahuunari ipanaca. Diosin icaricai ahuashta cuyopacunacama. Nanscasi apanaca. Ascacun Abraham manayopaoni chipo nanno afu ipashquin.

<sup>11</sup> Diosin Abraham yoini isca huaquin, —Min ahuin Sarapan chipo furonanfacu nanushquin. Ahuunoaashu min funafo ichaparasi

iishquiran, —ishon yoini. Nannori yoifiano Abraham anifoshta ahuin yoshafoshta toosma ini. Ascacun Abraham ahuun nomuran shinanquin isca huani, —Upa Diosin ua yoiyoni cuscan ua ashoshquin. Nantonfin nan yoia cuscacoin huamisi, —ishon Abraham Dios icoinra huani. Ascashu ahuin Sarapan facu caianno Abraham facuya ini. <sup>12</sup> Ascano Abraham anifoshta afanancai chai nitiromafia ahuun funafo fasi ichaparasicoin. Tsoancai ato tanan huatiroma. Fishifo yafi mai furomishticai non tanan huatiroma. Nanscarifiai Abraham ahuun funafocai tsoan tanan huatiroma.

<sup>13</sup> Nantifi na rama yorafohuunoa mato yoia cuscan afanan atohuunoa un mato yoi. Diosin ato yoiyoni cuscan fiashuma naanifo. Fiataiyamafiaquin Dios icoinra huanifoan chipo fiishcaquin. Ascacun Diosin ato yoiyoni cuscan aton nomuranshon oincoin cafiscas unimacoinnifo. Ascashon yoinifo isca huaquin, —Nunocai non ipanacama. Na mai anoashu nan mai futsa aria yora futsa cuscarafu nonran, —ishon yoinifo.

<sup>14</sup> Ascans nannori yoiaifoan non tapitiro nanscara yorafu nuno mai ano ipaitama Diosin icari capai afu ipashcaquin. <sup>15</sup> Ascans aton mai ipaoni shinantacani nasopai ari naso cuanifo. <sup>16</sup> Ascans ari nasopaitama Dios icarirocon fasi shinannifo ari nocopaicaquin. Nanfoan tapinifo nanno fasi shara finacoian. Ascashon Upa Diosin nan icari ato itishara huashoano afu ipanonfo. Ascacufin atohuunoa ranotama yoini isca huaquin, —Unfin ato Diosiquin, —ishon yoini.

<sup>17-18</sup> Afanas Abrahamhuunoa un mato yoinon. Upa Diosin tapipaini Abraham icoinra huafainmain nan yoia cuscacoin aiquin. Ascashon yoiquin isca huani, —Min ina ua rutushotamarocon min facu fustishta Isaac ua rutushoan, —ishon Diosin yoini. Upa Diosin iquisi tapimani ahuun facu fusti Isaachuunshon ahuun funafo ichapa iishquiai cuscan. Ahuara sharafo Diosin Abraham yoiyoni cuscan ahuun facu Isaachuunshon nantifi ashoshquin tapimaiyoni. Nannori Upa Diosin Abraham yoiaiton ahuun facu fustishtacoinfia rutushon Dios inancuani. Ascano Dios icoinra huacoinshon nan yoini cuscacoin ani.

<sup>19</sup> Ascashon ahuun nomuran shinanquin isca huani, —Upa Diosin ua yoia isca huaquin, “Min facu Isaac ua rutushoan,” ua huaiton un shinan Diosintsii ahuamamishti huatiroquin. Ascans uhuun facu naafiacun Upa Diosin samamashta funimatiroquin, —ishon shinanni. Icon ahuun facu naa cuani. Ascacun Abraham shinanni, —Uhuun facu man naafiacun Diosin funimana shinantsairan, —ishon shinanni.

<sup>20</sup> Ascans Isaac arifi Dios icoinra huacoinpaoni. Ascacun Diosin ahuun nomuran shinanmani furun rafu chipo ato shara huashononpacoai cuscan icataima yoiyoini.

<sup>21</sup> Nanscarifiai Jacob arifi Dios icoinra huacoinpaoni. Ascacun nataima Diosin ahuun nomuran shinanmanai cuscan ahuun shota nan Josépan facu rafu Diosin ato shara huashononpacoai cuscan ato yoini. Ato yoitan ahuun poquitiqui cocusamushon Dios cufini.

<sup>22</sup> Ascans José arifi Dios icoinra huacoinpaoni. Ascashon natichaima ahuun yorafu yoiquin isca huani, —Chipo Upa Diosin nocon funafo nan Israelifo Egipto anoshon ato iyoshqui. Focaquin uhuun shaofori foshcaquin. Nan man icaino afanas ua mai huashcaquin, —ishon ato yoiyoni.

23 Moisés apa futan ahuari Dios icoindra huacoinpaonifo. Moisés cainyaintian apa futan ahua oianfo aton facu sharastacoin ini. Ascashori tapinifo Moisés nocofunucoiaintian Upa Diosin yonosharashoshiquiai cuscan. Ascacun Egipcio niaifoan ato yononi Israelifoan aton facu yomumishti nantifi rutunonfo. Ascafiainocai nan Moisés apa futan ahua ratuquimarocon Diosin icoindra huashon oshu rafu non fustitan aton facu onunifo niaifoan ato Moisés rutumanonma.

24 Ascashon Moisés arifi Dios icoindra huacoinpaoni. Egipciofo futan ahuan caifofo atirififain shinanpaonifo Moisés Faraón ahuan chata. Ascacun Faraón facu shomayatón ahuan facuran, huapaonifo. Ascafia Moisés nocofunucoiaintian Dios icoindra huashon ato yoini isca huaquin, —Uncai niaifon Faraón ahuan chatama. Ahuan facuricai uhuun uhuaconmaran, —ishon yoini.

25 Ascan Moisés aafin tapini Egipcio niaifo icashu fasi isharacain arifi ato futan fari ranan unimacain chaca huatiro. Ascafiagai Moisés ascainima. Ascapaitamarocon shinanquin isca huani, —Uncai Egipciofo futan chaca huapaima. Ascataka uhuun caifo nan Diospan yorafo omitsiscaifo cuscan urifi un atofu omitsiscairan, —ishon shinanni.

26 Ascashon tapiyopaoni chipo Cristohuunoashu omitsiscafiashu Upa Dios ari nocoaiton ahuaara sharacoin inanshquin afu ipanon. Ascacun Egipciofo ato ahuaara ichapa fiapaiquin ato fia cuani. Ascafiagai anori shinantama shinanquirocon isca huani, —Un Cristohuunoashu omitsiscacun ua fasi imasharatiro. Ascan un Egipto anoashu ahuaara ichapayatirofia nanfocai uhuuna ahumaran, —ishon shinanni.

27 Ascan Dios icoindra huafain Egipto anoashu ahuan caifofoya Moisés cani. Egipciofoan aton niaifo aquí sinafiainocai aquí ratutama nan niaifoan ahuan mai anoashu cani. Dios tsoan ointromafia Moisés mupaoni Dios afu rafucocin. Nan oincoincafisca huapaoni. Ascashon nan Diosin yononi cuscan huaqui unupaonima.

28 Ascan Egipto anoashu Israelifo foatama iquisi Diosin Moisés yoiquin tau huani isca huaquin, —Min caifofo yoihuu chashohuanun facu rutunonfo. Ascashon ahuan imin aton pushuti ahuan caincaiti ocuma rafu yafi amanaonri raishaquin futsanonfo. Man asca huacun Diospan nai oinmatinin Egipciofoan aton facu iyoafofo namaitian mato facufo finonmanon nanonfoma, —ishon Diosin yoini. Ascacun Moisés arifi nan Diosin yoiatón nica cuscan icoindra huashon ahuan caifo Israelifo yononi. Ascanocai Israelifoan facu iyoafofo fustishta naanima.

29 Ascacun Israelifoan Dios icoindra huanifo. Ascan nan unuhuan anunifo isca huaquin, —Unuhuan Oshinran, —ishon anunifo. Ascashon nan unuhuan oshin pocufainifo. Upa Diosin unuhuan nushmancayan mai muto sharacoin ato huashoriscatanaino Israelifoan pocufainaifoanno ato cachiori Egipciofoan ato rutupaiquin ato mufainifo. Arifi ato futan pocupaicaquin. Ascashu man nushmancayan caiyainfoan Diosin atoqui unuhuan tiantanaino asai futsunifo.

30 Ascashon Upa Diosin Israelifo yononi pushurasi ahuan anu Jericó cachiori siete oshatan tarati huayacunonfo. Nan pushurasi cachiori toquiri cunu fasi cuyacoin masoa cunuacua ini. Ascan Israelifoan ahuan unutani cahuacuainfoanno nantifi toquiri sapa cunuacuafopainquiran ishon Diosin ato yoini. Ascacun nan Diosin ato yoiacusan icoindra huafoan nanscacoian cunufopainqui futsunifo.



<sup>31</sup> Ascan nantifi Jericó anoafo nai futsunifo. Ascafia nan Rahab ainfo furoma fusti ahuun yorafoya nanima. Ahuun caifoancai Dios icoinra huanifoma. Arus fusti Dios icoinra huacoinni. Ascan Jericó anoafoan aton toqiri cunu paoincataima. Israelifoan ato niaifo Josué onanti huanmisi rafu Jericó ano ato nichini atohuunoa tapishquin. Nan onanti huanmisi rafu Rahab ahuun pushu muran ato iquimani ato shara huaquin. Ascacuai ahuun caifo rutucaquin Rahab rutunifoma.

<sup>32</sup> ¿Ascan ahua futsamun un mato yoitiroquin? Yora ichapafaoanri Upa Dios icoinra huapaonifo. Nanfohuunoa un mato yoipaiquiaicai un mato yoiqui nocotiroma. Nan Gedeón non Barac non Sansón non Jefté non David non Samuel non Israelifo Dios yoia cuscan yoimisi futsafahuunoari un mato yoipanan uncai yoiquin nocotiroma. <sup>33</sup> Ascashon nanfoan Dios icoinra huacashon ahuun ranushumuafu yononifo ato noicasmaifo rutunonfo. Ascacun ato noicasmaifo rutuqui finconcoinnifo afanan ato ahuusca huanonfoma. Atirifi niaifo ishon ahuun yorafo cushusharapaoni isharanonfo. Diosin ato yoiyoni cuscan ficoinnifo. Ascano atiri nan icoinra huamafoan ato masharofu muran potafiacun Diosin masharofu cotushcuru imano ato ahuusca huanonma.

<sup>34</sup> Ascan atirifi niaifo chacapan futsafo yonocun ato chi uru muran potamafiafo Diosin ato cushushara coinni coononfoma. Atirifi ato nopun rutupaifiaquicai tsoan ato anima. Ascano atirifi shaca fuacai isininfiaifoan Diosin ato mutsismani. Ascanocai nan ato noicasmaifoan ahuun ranushumuafu atoqui fufiaifoan nanfoancairocon Diosin curushhuunshon ato ichonifo ato ahuusca huanonfoma.

<sup>35</sup> Ainfofoanri Dios icoinra huacun aton yorafo man naafiacun Diosin ato funimani afanan ninonfo. Ascano futsafoanri Dios icoinra huacoinnafoan nan icoinra huamafoan ato omitsisca huanifo nan naifotian. Ascashon ato yoiquin isca huanifo, —Man Upa Dios potaiton non mato ahusca huaima man casharatanon. Asca man Dios potayamaiton non mato rutuiran, —ishon ato yoinifo. Ato asca huafiafoancai tsoan Dios potapainima. Ascacun ato rutunifo. Ato rutuafotaima shinanquin isca huanifo, —Noco rutufiafo Upa Diosin samamashta noco funimatiro non afu ipasharanon, —ishon shinannifo.

<sup>36</sup> Ascano icoinra huaa futsafoquiri atoqui cashu mutsamacain fichi ato coshafain atirifi cunopan munushfain onushfain ato cunu muran iquimanifo. <sup>37</sup> Ascashon atirifi toquirinin tsacaqui ato rutufain atirifi nisatinin ato shatufain nopurifi ato rutunifo. Atirifi ahuuomafoan chashoanun fichi sahuuti huasho sahuunifo. Ato omitsisca huaquin nansca huanifo. <sup>38</sup> Ascashu tsoan istaipama ano yafi machi ano non mahua quini muran non mai quini muranri iquifaifainifo. Ascan nan icoinra huafoan icoinra huamafo shara huafiafashon copiquiri ato fasi chaca huafafaipaonifo. Ascan sharafo cutsi Diosin ahuun yorafoya ato ima.

<sup>39</sup> Ascashu nanfo omitsiscafiaquicai Dios icoinra huacoinpaonifo. Ascacun Diosin atohuunoa yoiquin isca huani, —Nafoan ua icoinra huacoinnafo. Ascacun un atoqui fasi unimacoinni. Omitsiscafiaicani fasi isharacoinmisiforan, —ishon Diosin atohuunoa yoini. Ascafiaquicai Diosin ato yoiyoni cuscan tsoan fiatai inima. <sup>40</sup> Ascashon Upa Diosin ato manamayopaoni. Ascacun norifi non icoinra huashu non atofu Jesús icari nocoshquin. Nantianri yora fusti cuscara non iishquin a cuscara

shara noco imaino. Ascano unimaquin nanfocai no fu ahua futsa afanan yopapacunacafoma.

## 12

### *Non Jesushuunoa shinanfafainon*

<sup>1</sup> Ascán noco shuni ichapafohuunoa rama non nica. Nanfoan Dios icoinra huapaonifo. Ascacun norifi non atohuun caononcahuun. Ascashon ahuarashta noco nitumapaiyai cuscan nanfo non cachiquiri huacoinnon. Ascatan ahua chacafoanri samamashta noco curushcain chaca huamapaitiro. Nanfori non cachiquiri huacoinnon Diosin noco amapaiyai cuscan fustisi huashquin. Ascacun funaquima non ashofafainon.

<sup>2</sup> Ascacun non Jesús fusti shinanfafainoncahuun. Nanfin noco Ifocoin noco tapimamisicoinquin. Ascan nanton noco ismaquin tau huani ahua ahuascarafaino non Dios icoinra huacoinnon. Ascashon Apa yoia cuscacoin huacoinpaoni. Ascacun norifi non ahuun caononcahuun. Ascashon nan mastacaquin yorafoan ointaifi rafini huanifo. Asca huafiaifoanno fasi omitsiscafiyaquin tunucoinni manmain tapiashu chipo nocon Numamisi icain. Nanscara tapiashu fasi unimacoinni.

<sup>3</sup> Yora chacafoan fasi chaca huafiaifoan tunucoinni. Ascashu nocohuunoashu omitsiscani cuscan man shinanquicai matorifi omitsisca huaifotian man shinanchacayamafain man ointi mutotiroma. Ascaquicai Diosin mato amapaiyai cuscan man unutiroma.

<sup>4</sup> Curushcain maton nomuranshon man chaca shinanquin man potapaifafainmisi ointiaquimashon chaca huashquinma. Man asca huafafainaino Jesucristo nocohuunoashu naani noco chaca soashoshquin. Ascan mancai ascamisima. Ascatarocon shafatifi curushcain man chaca shatufiashucai Jesús ini cuscan toa nataima.

<sup>5-6</sup> Ascafia nan noco yoia cuscacoin non ayamaiton oinquin Upa Diosin nocohuun noiquin noco onaintimatiro noco tapimashquin. Ahua futsa shinantama nancarocon non tanasharanon. Ascashon nantifi ahuun yorafo ato nansca huashoan. Ascacun nanfoan tapinonfo Diospan facufocun. ¿Man man ointiaquimanamun Diosin maton nomuran unimapai man ahuun facufocun mato tapinonfo? Ascan ahuun tsain cununi isca huaquin,

“Uhuun facushtan unfin min Ifocoinquin. Ascacun un mia onaintimai min tapinon afanan mian tanasharanon. Ascacun nan mato onaintimaitian tapicahuun afanan ascashaquima. Mato asca huaitian mato nomuran shinanchacayamacahuun. Mato cayacaficoin tapimapaiquin,”

ishon cununi.

<sup>7</sup> Upa Diosin mato tapimapaiyai cuscan funaquima tapicahuun. Ascashu omitsiscafiyaquin shinanchatarocon tunucoincahuun. Ascano omitsiscaquin man tapitiro man Diospan facufo. Apafoan ato facu tapimatirofo cuscan nanscarifiyaquin Upa Diosin noco cayacafi tapimani. ¿Rato facumun apan onaintimatiromaquin tapimasharashquin?

<sup>8</sup> Nantifi facufoan aton apa ato onaintimaiton man muumisifo. Nanscarifiai Upa Diosin noco tapimayamainocai non ahuun facucoin iyamacain nonricai ahuun yoracoinfo itiro.

<sup>9</sup> Nocon upafoan non facufocun noco onaintimapaoni. Ascacun non atohuunoa shinansharafain nonrifi ato nicacoinmisi. Ascan nocon Upa

Diosin noco onaintimaiton non tunuquin finacointiro. Ascashon noco tapimapaiyai cuscaín non fasi unimacain non isharatiro. <sup>10</sup> Nocon upafoan afi shinanshara cuscan aton facufo onaintimamisifo a nicasharanonfo. Ascan non yosiatiancai afanan noco asca huamisima. Nanscarifi aquí Upa Diosin cayacafi fustisi shinanquin noco shara huapaiquin noco onaintimamisi non a cuscara shara inon. <sup>11</sup> Nan icon noco onaintimaitiancai non musharatiroma. Non isincoín mui non pashapaitiro. Ascashon chipo ointi nocoshon non shinantiro Diosin noco tapimasharapaiqui nocon nomuran unimamafain Furun Jesús cuscara shara noco imai.

*Non Dios nicacasmai fasi musucoin*

<sup>12</sup> Ascacun ahuara ahuuscarafaino shinanchacayamacahuun. Upa Diosin mato tapimapaiyai cuscan nan fusti tapicahuun. Ascashon Jesús tanaquin unupaitama nicasharafafaincahuun. Ascatari ahuun tsain sharaquin mutoyamacahuun. <sup>13</sup> Ascashu cayacafi isharacoincahuun Jesús tanasharashcaquin. Man ascaiton oin nan icoinra huasharafoma matohuun caopaitirofo Jesús cuscara shara iisharashcaquin.

<sup>14</sup> Ascacun fochishmanantanapaitamarocon nantifi yorafo fu ishara-paifafaincahuun. Ascatari Jesús cuscara shara ipaifafaincahuun. Ascan tsoa Jesús cuscara shara iyamaino nantocai nocon Ifo oinnacama. <sup>15</sup> Upa Diosin nocohuun ramapaiquin Furunhuunshon noco shara huafafainmisi. Ascacun oinfain Diosin noco shara huapaiyai cuscan huafafaincahuun funoshcaquima. Ascatari oinfain mato ointi mutoyamacahuun. Ascan mato nomuran man mutocacaiquin futsafori man chaca huamatiro arifi nanscara inonfo.

<sup>16</sup> Ascatan maton ahuinma fu iyamacahuun. Ainfofoan maton funuma furi iyamacahuun. Ascashon Diosin mato inanpaiyai cuscan fiicasmaquima nancairocon fiicahuun. Ascashu Esaú ini cuscan ayamacahuun. Aatocai Diosihuunoa shinanpaonima. Diosin Esaú inansharapaifaiton fasi fonicoínquin ahuun ushto inanni ahuun rafanan tushu fiishquin. Nan piai fustihuunshon nantifi Diosin inanpaiyai cuscan funocoinni. Ascacun marifi ascayamacahuun. <sup>17</sup> Man man tapia apa inansharapaiyai cuscan fipaifiaquin finima. Ascashon apa yocaquin isca huani, —Upashta, mian inanpaiyai cuscan ua inanpun, —ishon uaishofiaitocai inannima man main chipocuton fiamacun. Ascacun oinfain Diosin mato inanpaiyai cuscan maton chaca man shatuyamashu marifi man Esaú cuscara itiro. Ascashon Diosin mato inanpaiyai cuscan man funocointiro.

<sup>18</sup> Upa Diosin noco shunifo yononi cuscaí mato yonomisima. Ato yoini machi ahuun anu Sinaí tunanman fotanonfo. Nannoshon ahuara futsa ato yoishquin. Ascashu nan ato yoia cuscan nocoafono Upa Diosin oi uhuapacoinin ato yoinquin isca huani, —Nan machi ano mapuyamacahuun. Man mapuashu man nariscairan, —ishon ato yoini.

Nantianri nan machi ano chi urumanhuan oinfain shafatafia nannori faquishihuancoín icain ninhuunhuan yafi cana piishicain <sup>19-20</sup> manuti fasi chaan chaan icain Diospan ahuun oi uhuapacoinin ato yoiaí cuscan nicacani fasi ratuocoinnifo. Ascacun Moisés yoinifo isca huaquin, —Non afanan Diospan oi nicapaima. Ipaishoma non nariscatiro. Ascan Upa Diosin noco yoiquin isca huaa, “Mato inafa machi ano mapuáifoan toquirinin tsacacahuun naanonfo,” ishon noco yoia. Ascacun Dios yoihuu

noco yoipaiyai cuscan noco yoitama miarocon yoiquin tau huanon. Min chipo noco yoitiro. Aafin noco yoiaino non nariscatiroquin, —ishon Israelifoa Moisés yoinifo. <sup>21</sup> Moisés arifi oian cuscan ato yoini isca huaquin, —Urifi un fasi ratucoin taritari iquinran, —ishon yoini.

<sup>22</sup> Ascafia mancai Dios fu tsainpai na machi Sinaí ano man oima. Ascata ma nan machi Sión ano man cai. Nan Jerusalén futsa Dios icari. Ascan nan Diosin ipamisi. Nannoashu ahuun oinmati afu nai muran imisifo ichanancashon Dios shararan huafafaincani. Nan ahuun oinmatifocai tsoan ato tanan huatiroma fasi ichapacoinfo. <sup>23</sup> Nannori nantifi Jesús icoinra huafo afu icafo. Ascan nan Dios icari aton anufo cunupacua afu ipanonfo. Ascacufin marifi man Diosiqui oquin. Ascan nanton yoishquin ratotomain icoinra huacoinnashu afu ipanaca iyamarai icoinra huamisimaquin. Ascashu icoinra huashuma afu ipanacama. Nan icoinra huafotisi ato a cuscara shara imai chaca huamisima cuscara inofo.

<sup>24</sup> Ascan man man Jesusqui fua. Nanton noco nashoantaimacai toa futsan noco nashonima. Ascacun natian ahuunoashu non Dios fu ipasharatiro. Nocon shuni Cain ahuun ushto Abel rutuni. Ascacun Upa Diosin Caín yoini isca huaquin, —Cain, ahuuscaquimun min ushto rutuaquin. Natian un mia curushcai onaintimairan, —ishon Diosin yoini. Ascafia Jesús rutuaifotiancai anori yoinima. Afimain nocohuunoashu naiton noco chaca soashoshquin. Ahuunoashu non Dios fu ipasharatiroran ishon noco yoini.

<sup>25</sup> Ascacun ¡Oinfain! Diosin mato yoipaiyai cuscan nicatimayamacahuun. Nan mai anoshon nocon shunifo Moisés ato yoini cuscan nicayamaifoa Upa Diosin ato onaintimani. Ascashu na mai anoashu Moisés noco cuscara cainni. Ascan Jesuscai ascarama. Apa Dios icariashu nocoqui fotoni. Nanton noco yoiyai cuscan non nicayamaino fasi musucoin. Ascan non Furun nicayamacaiyaiton Upa Diosin noco onaintimaquin finacoin. <sup>26</sup> Ascan Upa Diosin Moisés yafi noco shunifo machi Sinain anoshon ato yoiaitian ahuun tsainmansi mai nayanaiyaimani. Ascashori yoini isca huaquin, —Chipocai un mai fustisi nayanaiyaimaima. Un mai yafi nairifi fasi curushcai un nayanaiyaimairan, —ishon Diosin yoini. <sup>27</sup> Ascacun nan noco yoini cuscahuunshon non tapitiro nan ahuara ipatirofoma Diosin nanfo cuyoriscatashquin afanan ahua inonma. Ascan nan ahuara Diosin imapacunacafo fusti itiro.

<sup>28</sup> Ascataricai Diosin icari mai nayanaiyaitiroma. Nannoshocai ahuashta non chaca finontiroma. Ascashu nanno non afu ipasharatiro. Ascacun non Diosin aicho huafafainon. Nantonfin ahuamamishti huatiroquin. Ascacun ahuunoa non shinansharafain non cufifafainon. Ascashon noco amapaiyai cuscan non ashoaino nocoqui Upa Diosin fasi unimacoinshquin. <sup>29</sup> Ascan man man tapiari nocon Diosin nan chi urumanhuan cuscara. Ascan tsoan ahuun tsain shara cachiquiri huacoincun Diosin ato chi urumanhuan muran potashquin amurannoashu omitsiscapanonfo.

## 13

*Ahuuscashomain non Dios unimamatiroquin*

<sup>1</sup> Manfin Cristo ahuun yorafoquin. Ascashu noinanfafaincahuun.  
<sup>2</sup> Diospan yorafo mai futsa ariashu matoqui nococun ato shara huacahuun. Ascan futsafoan Diospan yorafo atoqui nococun oinyamafiamisishaquin ato shara huaquin tapinifoma nanfo Diospan oinmati afu nai muran icafofiacun.

<sup>3</sup> Nan cunu muran iguiafo shinancahuun. Ascashu atohuun rama-paicoincahuun. Marifi atofu cunu muran iquimamua shinantsa acahuun. Futsafo Jesushuunoashu omitsiscacoinnafo nanfohuunri rama-paicahuun. Ascashu marifi atofu omitsiscamuai shinantsacahuun.

<sup>4</sup> Nocofunufaoan maton ahuinfofoya noinancahuun. Ascashu shinan-masharatanancahuun. Ascatari maton ahuin non maton funu fusti fu icahuun. Ascafia ratoran futsa aton ahuinma non aton funuma fu icaifaoan Diosin nanscarafafo ato onaintimashqui.

<sup>5</sup> Pui noiyamacahuun. Man aya cuscan fustia unimacahuun. Upa Diosin yoini isca huaquin,

“Uncai matomaqui ipayamacai uricai mato potanacamaran,”  
 ishon yoini. Ascacun nan tapiashu non fasi unimacointiro. <sup>6</sup> Ascan iconcoin non yoitiro isca huaquin,

“Un ahuara huaiton uhuun Ifoan uari ashomisi. Ascacufin un ratuima. ¿Upa Diosin ua cushuainocai nocofunufaoan ua ahuusca huatiromun?”  
 ishon non yoitiro.

<sup>7</sup> Dios fu tsainti pushu muranshon Diosin tsain yoimisifoan mato yosinifo cuscan atohuunoa shinancahuun. Nanfoan futsafo shara huafafainmisi. Ascashon fasi noco Ifo Jesús icoinra huamisifo. Ascacun atohuun caocahuun Jesús tanasharafafainshcaquin.

<sup>8</sup> Ascashu Jesucristo ipaoni cuscan natian icai cuscan yafi ishquiai cuscari nancai fianananpacunacama. Nanscasiyacunaca.

<sup>9</sup> Ascan atiriffoan mato amaquiri yosipaicani. Tsoancai anori nicay-omisima cuscarafafo mato yosipaicani. Ascacun ato tanayamacahuun. Mato yosipaicani isca huaquin, —Nocon shunifoan noco yononi cuscan non nami futsafo piaino nocon nomuran noco shinanmasharatiroran, —ishon mato yoimisifo. Ascafiaicai tushucai nocon nomuran noco shinanmasharatiro. Ascatama Diosin noco noiahuunshon noco imasharatiro non a cuscara inon.

<sup>10</sup> Ascacun nan non icoinra huamisi Jesucristo ihui coyan iquinanhu-unoashu noco nashoni nocon chaca soashoshquin. Tsoan Jesuscairocon icoinra huatama nan Moisés yononi cuscan fustisi icoinra huafo. Nanfoancai no futan aton chaca soatirofoma.

<sup>11</sup> Ascan Moisés ato yononi cuscan ahuun yorafohuunshon Dios cu-fimsi niaifon fusti nan cunu futsa ocu murancoin iquipaoni. Nan muran inapan imi focun nan imi oinquin Upa Diosin ato chaca soashonon. Ascashon inafaoan ato caya pushurasi pasoato foshon coa-paonifo. <sup>12</sup> Nanscarifiai Jesús Jerusalén pasoatonoashu noco omitsis-cashocai ahuun imi focai ahuun yorafohuunoashu nani nocon chaca noco soashoshquin non a cuscara shara inon.

<sup>13</sup> Ascan norifi Jesús ipaoni cuscan non anoncahuun. Ascashon ahuun yorafoan nan potanifo cuscan huaquin nocorifi noco yorafoan noco potatiro. Ascashon Jesús roanifo cuscan nocorifi ahuunshon noco roatirofo. Ahuunoari shinanchacamisifo cuscan nocorifi ahuunshon nocohuunoari shinanchacatirofo. <sup>14</sup> Nuno nan mai anoashu non omitsiscafiaquicai non shinanchacaima. Man nonmain tapiashu nuno nan

mai ano non ipanacama. Ascatan man non tapiari chipo Dios icari nocoashu non afu ipashquin. Ascacun nan non manasharamisi.

<sup>15</sup> Nocon shunifoan apaonifo cuscacai afanan Diosin fuchipaima. Noncai afanan inafu rutuima nocon chaca soashonano Upa Diosin nocoqui unimanon. Ascatarocon Jesús noco nashonihuunshon non Upa Dios aicho huai. Ascan non yoiquin isca huanon, —¡Aicho! Upa Diosin, min Furun Jesús uhuun Ifo. Ahuunshon un mia aicho huairan, —ishon non yoifafainon. <sup>16</sup> Yoiquin asca huatan yora futsafohuun ointi-aquimayamacahuun ato shara huashquin. Ascan Jesushuunshon man yorafo shara huafain man aya cuscan futsan yopaiton man inanquin. Asca huaquifin man Dios unimamacointiroquin.

<sup>17</sup> Ichananti pushu anoshon maton Diosin tsain yoimisifo nicasharacoinfafaincahuun. Ascashu mato yoiainfo cuscacoin acahuun. Nanfoanfin mato cushufafainiquin man Jesús tanasharanon. ¿Ascan nanfoanri tapiafo chipo Diosqui nocoainfoan ato yoishquin isca huashquin, —Man man uhuun tsain ato tapimasharamisimun? —ishon ato yoishquin. Ascacun ato nicasharacahuun man ato nicasharaino unimanonfo. Ascan man ato nicayamaino aton ointi ihuu itiro. Ascashu marifi man funocointiro.

<sup>18</sup> Nocori Upa Dios cufishocahuun. Diosin noco amapaiyai cuscacoin man non huamisiquin. Ascashocai nocon nomuran non ahua chaca shinainma. Non isharapai fusti. <sup>19</sup> Uarifi Dios cufishocapun matoqui ua samamashta nasomanon.

*Ato Dios cufishotan ahuun tsain unutaqui ato yoini*

<sup>20-21</sup> Upa Diosin nocon ointi unimamamisi nocon nomuranshon non ahuashta shinanchacanonma. Nocon Ifo Jesús noco huunoashu man naafiadun Apa Diosin funimani. Nantifi finoanshu nocon Cushumisi shara inon. Jesús noco nashonihuunoashu non Upa Diosin ahuun yorafo ipashquin. Ascacun man ahua shara yopai cuscan Upa Diosin mato inantiro mato amapaiyai cuscan man anon. Furun Jesucristohuunshon nocon nomuran noco shinanmasharashu nocoqui unimacoinshquin. Ascacun nantififain non Jesushuunoa yoisharapacunaca. Nanscari inon.

<sup>22</sup> Uhuun yoramishtichin un mato cunushona maton nomuran mato shinansharamashquin. Un mato chitoshta cunushona. Ascacun funaquima un mato cunushona cuscan ua nicasharacapun. <sup>23</sup> Un mato tapimapai nocon yorashta Timoteo natian man cunu murannoashu man caian. Ascan samamashta uqui nocoashu u afu mato ari cai.

<sup>24</sup> Nantifi ichananto maton Diosin tsain yoimisifo non cushumisifo non nantifi Diospan yorafo ua yoisharashocahuun. Italia anoafanri mato yoisharafo.

<sup>25</sup> Upa Diosin mato huun noiquin nantifi mato shara huashofafainon. Nanti.

## Santiago Icoinra Huafo Cunushoni

*Santiago ato tsain shara yoini*

<sup>1</sup> Uhuun yoramishtichin man manifoti pashcananni. Unquian Santiago un mato yoisharapai. Ascan un mato cunu fomai man tapinon. Upa Dios futan nocon Ifo Jesucriston un ato yonomatifin unquin.

*Upa Diosin noco cayacafi shinanmasharatiro*

<sup>2-3</sup> Uhuun yoramishtichin ahuaara ahuuscarafiaino man shinancha-catamarocon man Jesús icoinra huaquin finacoinshon funaquima man tunutiro. Man asca huaino Jesús mato imapaiyai cuscan man atiro. Ascan ahuafoan mato chaca huamapafiaino unimacoincahuun. <sup>4</sup> Man ascashu Jesús cuscara ahuan tanamisicoin shara man itiro. Ahua fut-sacai man yopaima isharashquin.

<sup>5</sup> Ratoran man futsan man ahuashta tapishoma Dios yocacahuun mato tapimanon. —Ua fucashni huayamacahuun, —ishoncai mato Upa Diosin yoinacama. Man tapipaiyai cuscan nantifi unimacainrocon mato tapimashquin. <sup>6</sup> Ascan man Dios yocafiatan ointi rananya iyamacahuun. Shinanquin isca huayamacahuun, —Un Dios yoca cuscan ua tapimai iyamarai itsairaca ua tapimaimaran, —ishon anori shinanyamacahuun. Ascata ma icoinra huacoincahuun. Tsoan icoinra huacoinyamashu nan futas ihui focuatiro cuscan. Ascashu fuuhuanquin ihui focuacaiton non tapitiro ma raquiricaimain focuacica. Nanscarifi aquin tsoan Dios yocafiaquin icoinra huacoinyamashon futsa futsa huaquin shinantiro. <sup>7</sup> Man ascaiton, —Nocon Ifoan noco ahuarashta huashoinran —ishon shinanyamacahuun. <sup>8</sup> Ascan, —Uncai tapiama Diosin ua ashoyamaraquinmain ua ashoicain, —ishon shinanyamacahuun. Ascarafocai Diosin ato ahuashta huashoshquima. Nanfoan ointi rananyashon futsa futsa huaquin shinanmisifo.

<sup>9</sup> Ascan atirifi Diospan yorafo nan ahuuomafohuunoa icoinra huamafoan shinantirofo isca huaquin, —Nan ahuuomafocai ahumaran, —ishon atohuunoa shinantirofofia nanfocafin Diospan facufoquin. Ascafia nan ahuuomafoan shinantirofo isca huaquin, —¡Aicho! Unfin Diospan facucoinquin. Un Jesús yafi Dios fu ipashquiran, —ishon shinantirofo. <sup>10</sup> Nanscarifi ratoran Jesús icoinra huaa futsan mafo ichapayashon shinantiro isca huaquin, —Uhuun mafocai ua imasharatiroma. Urifi un Jesús fasi yopacoin uhuun Ifo inon ua imasharanon. Jesús ua numayamaino urificai un ahuashta itiomaran, —ishon shinantiro. Charo samamashta tsasiashu niriqui futsutiro. Nanscarifi yora mafo ichapaya samamashta natiro. <sup>11</sup> Farin fanafa tsacaino samamashta tsasitiro. Ascashu niriqui futsutiro afanancai shara itiroma. Nanscarifi nan mafo ichapaya ahuan mafo inanmitsapaifiai samamashta nariscas amaqui cachitiro.

*Ahuara chaca non finonfiainton Diosin noco tapipai nonmain tanasharquin*

<sup>12</sup> Tsoan omitsiscafi aquin tunucoianfin nanfin unimacoin itiroquin. Ascacun Upa Diosin ahuuunoa yoiyoni isca huaquin, —¡Aicho! Mian nicasharafain niyoshon mian noimisi. Ascashufin natian min ufu

ipatiroquin, —ishon yoini. <sup>13</sup> Tsoancai yoitiroma isca huaquin, —Un chaca huapayai cuscan Upa Diosin afin ua chaca huamapairan, —ishocai yoitiroma. Tsoanshtaricai Dios chaca huamatiroma. Arificai tsoa chaca huamapacunacama.

<sup>14</sup> Ascatarocon ratoranfoan chaca huapayai cuscan atohuun nua. Afin ahuun nomuranshon chaca huapayai cuscan nanscacoïn huatiroquin. <sup>15</sup> Un mato ahuara futsa yoi. Tau huaquin nocofunun ainfo facu nanumana. Funainquimashta ahuan shaqui murannoashu yosiacutiro. Caiyaintian facu caintiro. Nanscarifi aquin tau huaquin nocon nomuranshon non ahuara chaca shinanfawaitiro. Ascashon chipo non chaca huatiroquin. Ascatan chaca huariaicai non Dios fu rafutiroma. Nocon chacahuunoashu amaqin non ipanaca.

<sup>16</sup> Ascacun uhuun yoramishtichin mafiri paramuyamacahuun. <sup>17</sup> Nocon Upa Diosin nai muran ifiashon nuno mai ano noco shara huashofafaini. Nantofin nantifi noco oni huashosharaniquin. Fari non oshu non fishifo non nantifi chashaifoti Upa Diosin onihuani. Ahuara shara futsaforifi nantifi noco onihuashoni. Noco shara fustisi onihuashoni. Nanscarifiai fari tsacaino nocon yoshin samamashta fiananantiro. Asca Diosincai fianananpacunacama. Ascataricain ointi rananya ipanacama. Nanscasipacunaca. <sup>18</sup> Upa Diosin noco catonni ahuun tsain iconcoïnhuunshon noco cainma futsa a cuscara shara non inon. Nonfin Jesús icoinra huaquin tau huaniquin. Ascashu Diosin nantifi onihuanifotihuunoashu non ahuun facu iyoa cuscara.

*Diosin tsainfin cayacaficoïnquin nicashu nanscacoïncahuun*

<sup>19</sup> Uhuun yoramishtichin un mato yoiai cuscan nicasharacahuun. Futsan mato ahuara yoiaiton funaquima nicasharayocahuun. Tsain ichapa yoimisi iyamacahuun. Samamashta sinayamacahuun. <sup>20</sup> Upa Diosin Furun cuscara shara noco imapaifiaino non sinaitocai noco imapaiyai cuscan noco imatiroma. <sup>21</sup> Ascacun ahuara chaca maton nomuran man shinanmisi cuscan huafain ahuara man chaca huamisifori shatucahuun. Ascatan Diospan tsain mato nomuran man nanushon. Mato yoini cuscan nicasharacoincahuun. Man Diosin tsain nicasharashufin man afu ipasharatiro.

<sup>22</sup> Diospan tsain nica fustiquima. Nan cununi cuscacoïn acahuun. Man nicafiai ascayamashufin man mafiri paramuquin. <sup>23-24</sup> Futsan ahuun fuso fuisitinin oïnfiashu samamashta oian cuscan ointiaquimai. Nanscarafiai man Diosin tsain oïnfiashu nan oian cuscacoïn aima. Ato yononi cuscan man tapifiashucai ascacoianfoma. <sup>25</sup> Futsafocai ascarama. Diosin tsain shara fustisi oïnsharashu nan yoia cuscacoïaino. Shafatifi Diosin tsain tanacoïancai ahua futsa afanan ahuun ifo itiro. Ascashu ishara fusticoïncaïn ahuun ointi unimatiro.

<sup>26</sup> Ascan tsoan yoiquin isca huai, —Unfi Diosin tsain nicacoïnmisiquin, —ishon anori yoïfiqui tsain chaca yoiquin shatuamashu nanscara yorafin afiri paramutiro. <sup>27</sup> Ascacia nan facu uhuaomacoinfo yafi ainfo funuomafo non cushusharaicai. Nan icoinra huamafoan acaïfo cuscan non huaima non ascaino Upa Dios nocoqui unimai.

## 2

*Nantifi yorafohuunoa nannorifosi shinansharacahuun*

<sup>1</sup> Uhuun yoramishtichin nocon Ifo Jesucriston Upa Diosin cuscaracoïn. Nanfin man icoinra huamisiquin. Ascacun yorafohuun nannorifosi



shinansharacahuun. Nan man futsafori shara huamisi cuscan huafainri futsafohuun shinanchacayamacahuun. Shara huacahuun. <sup>2</sup> Itsairaca nocofunu mafo ichapaya matofu ichanainno anio chashna shara sahuufain sahuuti sharacapacoin sahuufain matofu ichanantiro. Ascan nantantari nocofunu ahuuoma sahuuti chocashta sahuuashu arifi matofu ichanantiro. <sup>3</sup> Ascaiton nan nocofunu mafo ichapaya samamashta man yoitiro isca huaquin, —Uhuun yorashtan, nuno tsaoti shara ichananti pushu muran tsaoyohuun, —ishon man yoiaino nantianri ahuuomashta nocotiro. Ascashon man yoiquin isca huai, —Min cachiori nitiroran huayamaraquin tapa camaqui tsaohuu, —ishon man yoiquin chaca huai. <sup>4</sup> Man asca huaquicai yorafohuun nannorisi man shinainma. Ascaquin man chaca shinain. Nan yora mafo ichapaya man shara huafiaquicai yora ahuuomashta man chaca huamisi. Ascaicai mafi ranan man nannorifosi shinanonainma.

<sup>5</sup> Ascacun uhuun yoramishtichin ua nicasharacapun. Un matohuun noicoishon un mato cayacafi shinanmasharapai. Yora ahuuomafohuunoa nan icoinra huamafoan shinanmisifo isca huaquin, —Nan ahuuomafocai ahuamaran, —ishon shinancani. Upa Diosincai atohuunoa anori shinainma. Nanfin yora ahuuomafo catoan Jesús icoinra huacoinonfo. Ascacun nan ahuuomafoan Upa Diosin noicoiainfoan ato yoiyoni cuscan nantifi ahuunafori atona iishquin. <sup>6</sup> Nannori Diosin yoifiano mancai ahuuomamishtifo sharacoin huamisima. Shinanapon. Nan ahuuomafoan mato chaca huamaforocon nan mafo ichapayafoan mato paramisifo. Ascashon mato curushcain ranushumufoan aton niaifocoin ano iyomisi. <sup>7</sup> Nanfoanrifi nocon Ifo Jesusqui tsain chaca huamisifoquin.

<sup>8</sup> Ascan nocon Niaifocoin Diospan noco yononi cuscan man ashufin man cayacafi isharatiroquin. Noco yononi isca huaquin, —Mafiri man noimuai cuscan huafain futsafohuunri noicoincahuun, —ishon Diospan noco yononi. <sup>9</sup> Ascafia man asca huatamarocon nan mafo ichapayafosi man shara huamisi cuscacai nan ahuuomafo man shara huamisima. Man ascaicain Diosin yononi cuscan man aima. Ascaquifin man chaca huai. <sup>10</sup> Ascashon mancai shinanquin isca huatiroma, —Diosin noco yononi cuscan atirifi un nicacointiro. Asca fustishtacai un tanapaimaran, —ishon anori man shinainno yoitimacoin man itiro. Ascashu nantifi Diosin yononi cuscan man nicacasmai cafiscatiro. <sup>11</sup> Upa Diosin yononi cuscan, —Nocofunufocoin aton ahuinma fu iyamaifoanno ainfori nanscarifi aton funumafo fu itiomaran, —ishon yonofain Diosin yonoquirifi isca huani, —Tsoa rutuyamacahuun, —ishon noco yononi. ¿Ascashon maton ahuinma iyamaraiyainfoforifi maton funuma fu iyamafiacashon man futsa rutua nanmun shara? Ma. Man futsa rutuacai Diosin noco yononi cuscan man aima. Ascashu man yoitima itiro.

<sup>12</sup> Diosin noco yononi cuscan noco imasharapai afanan ahua chaca noco Ifo itama non afu isharacoincacainon. Non chipo Diosiqui noicoaiton noco yoishquin nonmain nicasharamisi iyamarai nonmain nicacasmamisiquin. Nannori noco yoishquin. Ascacun oinfain. Shinansharafain isharacoincahuun. <sup>13</sup> Ascashon Diosin nantifi yorafa puashoshquin. Ascan niyoshon man futsafohuun ramapaipaonimacun Diosiri matohuunri ramapaishquima. Ascan niyoshon man futsafo-

huun ramapaipaonicun Upa Diosin matohuunri ramapaishquin. Ascashocai mato onaintimaima. Ascataka manrocon afu ipasharatiro.

*Tsain fustisi yoicaquima nan man yoimisi cuscacoin acahuun*

<sup>14</sup> Uhuun yoramishtichin un mato yoisharapai. Man futsafo yoiquin isca huamisi, —Un Jesús icoinra huairan, —ishon yoifiashocai futsafo man shara huamisima ipaitsicoin man yoimisi. Un Jesús icoinra huairan ishon yoifiashu maton nomuracai fiananancoianma. ¿Nanscarafu Dios fu ipatiromun? <sup>15-16</sup> Natian iscara un mato tapimapai man tapisharanon. Itsairaca mato yorahua sahuutiromacun tushuomacuri oinquin man yoitiro isca huaquin, —¡Aicho! Uhuun yorashtan Diosin mia shara huaiquin. Sahuuti shara sahuuhuu matsinashquima. Ascatari pisharahuun. Un chipo mia shafa futsan oinshquinon. Casharatahuun, —ishon yoifiaqui yopai cuscan man inanyamaino nancai ahuama. Mancai ashosharama. <sup>17</sup> Nanscarifi aqui man yoiquin isca huai, —Un Jesús icoinra huairan, —ishon yoifiatan man futsa shara huayamaino acai ahuama. ¿Tsoanco mato icoinra huatiromun a man Jesús icoinra huacun?

<sup>18</sup> Itsai raca futsan yoitiro isca huaquin, —Min Jesús icoinra huai min ahua futsa yopaima Upa Dios fu ipashquin, —ishon yoitiro raca. Ascafia man futsafo shara huayamacun tsoancai tapitiroma man Jesús icoinra huua. Unfin Upa Dios yonoshona cuscan nantiffain man ointiro un Jesús icoinra huacoinnamainquin. <sup>19</sup> Nan Dios fustifin man icoinra huamisiquin. Nanfin sharaquin. Ascan yoshin chacafoanri man tapiafo Dios fusticoin. Ascashu fasi aqui ratuocoincani tari canani.

<sup>20</sup> Man ratoran futsan icoinra huafiashon Diosin yononi cuscan man ayamashuca mancai ahuama. Ascan Diosin yononi cuscan man ayamashuca man icoinra huacoinnama. Tatimafafinyamacahuun. <sup>21</sup> Shinancapon. Upa Diosin nocon shuni Abraham yononi cuscacoin ani. Ascashon nicasharacoincun Diosin yoini, —¡Aicho! Un mia yoia cuscan min aa. Min fasi shararan, —ishon yoini. Diosin yononi cuscan Abraham ahuun furun Isaac rutucuan Dios inanshquin. <sup>22</sup> Abrahamfin Dios icoinra huafain yoia cuscan aniquin. Diosin yoini cuscan huacoinshon non tapitiro a icoinra huacoinshon. <sup>23</sup> Icoinra huacoincun Upa Diosin ahunoa yoini, —Abraham minfin sharaquin. Ascashu min ufu isharaতিরান, —ishon yoini. Diosin Abraham yoiniri, —Abraham minfin ufu rafusharacoinmisiquin, —ishon Diosin yoini.

<sup>24</sup> Ascashon man tapitiro non icoinra huua fustihuunoashuca non Dios fu ipatiroma. Non icoinra huacoinfain noco yoia cuscan acoinnashu non afu ipatiro.

<sup>25</sup> Nanscarifiai nan ainfon furoma ahuun anu Rahab. Nan Israeli rafu Rahab ahuun caifoan pushurasi muran noconifo ahuu cuscaramainquin tapipaicani. Ascashu chipo Rahab ahuun pushu murancoin iquinifo. Ascacun nanton ahuun pushu muran nocon caifo rafu onuni ato ahuusca huanonfoma. Ahuun pushu muranshon ato fai futsan nichini ahuun caifo futsafoan ato fuchinonfoma. Upa Diosin Rahabhuunoari yoini, —Min ua icoinra huashon nan rafu min shara huua. Ascacun un mia imasharairan, —ishon Upa Diosin Rahab yoini. <sup>26</sup> Afanan un mato iscara tapimasharanon. Nocon furo yoshin nomaqui caanofin nocon caya natiroquin. Afanancai shara itiro. Nanscarifi aquin non Diosin icoinra huafiashon noco yononi cuscan non futsafo shara huayamainocai nancai ahuama. Non ascaicai non shara itiro.

## 3

*Nocon tsainhuunoa cununi cuscan*

<sup>1-2</sup> Uhuun yoramishtichin un mato ahuara futsa yoinon. Maton muranfin tapimamisi fustirasi itiro. Nantifinton man non ahuara amaquiri chaca huafafainmisi. Ascafia Diospan tsain tapimamisifoan amaquiri yosicun Upa Diosin ato onaintimaquin finacoinshquin. Ascan nan ahuara chaca yoimisima nancaifin isharacoinmisiquin. Ascashu shara fustisi itiroquin.

<sup>3</sup> Un mato afanan ahuara futsan tapimapai. Nan caballo ahuun cunopan anushushon fichiqui rusfi chichishon cayacafi casharai canon non ninifoanfafaftiro. Caballo uhuapacoinfiacun nan ahuun anushu-mutinin uhuapamashtacoinfiashon nan non niniaiquiri catiro.

<sup>4</sup> Shinancapon. Shashohuan uhuapafiadun ahuun chifishtati uhuapamashtafiashon nan non iyopaiyaiquiri iyotiro. Fuuhuanun shashohuan catima huafiatiro ahuun chifishtatinin nan non iyopaiyaiquiri iyotiro.

<sup>5</sup> Nanscarifiai nocon ana uhuapamafiashon nocon tsainmanri non fut-safo fasi chaca huatiro. Nofiri non chaca huamutiro. Ascan parito ushu uhuapamashtacoinfiano mau uhuapacoin cotiro. <sup>6</sup> Nanscarifiai nocon ana uhuapamashtacoinfia chi cuscara. Nocon tsainhuunoashu nofiri non chaca huamucoitiro. Ascashucai non afanan isharacointiroma. Nocon tsainhuunshon non nantifi chacana huatiro. Yoshin chacahuunshon non ahuara chaca yoitiro futsafori omitsiscamashquin.

<sup>7-8</sup> Asca yoina futsa futsatapafo yafi puiyafu non mupash cuscara non unu muran icafori non onaonma huatiro. Ascafia noco anancai tsoanshta non onaonma huatiroma. Ascashon nocon tsainman non chaca futsa futsatapafo yoitiro. Nocon tsainfin nan rono pau cuscaraquin. Nocon tsain chacahuunshon non futsafo namatiro.

<sup>9-10</sup> Nanhuunri nocon Ifo Upa Diosihuunoa non tsain shara yoitiro. Nantofin yorafo onihuaniquin a cuscara inonfo. Ascafia nan noco anari non futsafo tsain chaca yoimisi. Nanhuunri non tsain shara yoitiro. Ascacun uhuun yoramishtichin ascaramafinquin. <sup>11</sup> ¿Unu rufoquinoashu tsoi afainocai unu saoya ositiromun? Ma. Ascaracai itiroma. <sup>12</sup> ¿Uhuun yoramishtichin non manian fanamun shopa foaitiro? Ma. Ascaracai foaitiroma. Non ahuara fanafin nanscaracoin foaitiroquin. Nanscarifiai unu rufoquinoashu afainocai sao ya afatiroma. Ascatari tsain shara yafi chaca ositiroma.

*Diosin noco iconcain shinanmati*

<sup>13</sup> Tsain futsari un mato yoinon. Nan mafi ranan man cayacafi shinanmumisi cuscan. Futsafori man ashosharamisi. Ascashon man ato ismasharatiro. Tsoa chaca huamisima nan Diosin yonoaiyai cuscan fustisi huamisi. Man ascaiton nantiffain ointirofo man Dioshuunshon cayacafi shinansharacun. <sup>14</sup> Ascan man isharatamarocon maton nomuran fucashcain icain futsa aya cuscan fipaifain man shinanchacafain mafi man apaiyai cuscan fustisi futsafo yonoquin. Anori shinanquin isca huayamacahuun. —Un Diosin tsain tapicoian. Un ahuun ointi cuscaracoinran, —iyamacahuun. Anori yoiquifin man futsafo paraincain maton nomuran man chaca shinain cuscan fusti huafain man ato fomanpai. Ascashufin man cacapaimisicoinfoquin.

<sup>15</sup> Anoricai Upa Diosin mato tapimamisima. Jesús icoinra hua-mafoan shinanchacamisifo. Man ascashon Satanás yoshin chacapan

mato amaquiri shinanchacamamisi. <sup>16</sup> Isca huaquin mato shinanmatiro. Futsa aya cuscan fipaifain futsaqui shinanchacafain mafi apaiyai cuscan fustisi shinanfain futsafo matohuunoa man shinanmapai ato yonoshquin. Ascashufi man cacapaimisifoquin. Man ascain fasi man fochishmanantanantiroquin. Ascaquin man ato fucash huatiro chaca futsa futsatapafo huaquicai tsoan cayacafi shinantiroma.

<sup>17</sup> Ascan Upa Diosin cayacafi shara shinanmisi cuscan matori shinanmapai isca huaquin. Maton nomuran shinanshara fustifain futsafo fu shara huatanancain fochishmanantanapaitama futsafo shara huashofain futsafoan mato yoia cuscan nicasharafain futsafo shutiacufoanpayamafain futsafohuun ramapaiquin ato shara huashofafainmisi icain, nantifiton nannorisi shinansharafain ointi rananya iyamacain formanpaimisiri itamarocon cayacafi fustisi yoimisi. <sup>18</sup> Ascashon nannorifosi man shinainno futsafori man shinanmasharatiro isharacoinnonfo Jesús cuscara shara ishcaquin.

## 4

### *Icoinra huamafoan apaiyai fo cuscan noiyamacahuun*

<sup>1</sup> ¿Ahuuscain mafi ranan man fochishmanantanantiashu man sutunainmun? Maton nomuran shinanchacashufin man ascacain. Chaca fusti fuchipai. <sup>2</sup> Man ahuafo fuchipaifiaquicai man fitiroma. Ascashon fasi fuchipaiquin man futsa rutupaitiro fianpaiquin. Ascashu man fochishmanantanain tsain isininpaton man iquinonain. Ahuafo fipaiquin man fipaiyai cuscaai man Dios yocamisima mato inanon. <sup>3</sup> Ascashon Dios cuffiaquin man amaquiri yocaitocai. Asca Diosin mato ahua inantiroma. Mafi man apaiyai cuscan fustisi amupaimisi. Man ascaitocai mato ahua inantiroma.

<sup>4</sup> Afin mato amapaiyai cuscaai nancairocon shinantama nan mafi ranan man apaiyai cuscan fustisi man shinanmisiquin. Ascaquicai man Dios noicoianma. ¿Man tapiamamun nan icoinra huamafoan fuchipaiyai fo cuscan marifi man fuchipaya. Ascaqui man Dios noicasmamisi itiro? Asca man icoinra huamafo cuscara icashufin Diosin noicasmamisi man itiroquin. <sup>5</sup> Diospan tsain cununi isca huaquin, —Uhuun Yoshin Shara un mato ya rafumaniran, —ishon cununi. ¿Man shinanmun ipaitsi noco cunushoni? Man ahua futsafo noiaiton oinquin ahuun Yoshin Shara fasi ahuun ointi isincointiro. <sup>6</sup> Ascan afanan Diospan tsain noco cunushoni isca huaquin,

“Ratoran futsan Upa Dios nicasmai afin apaiyai cuscan fustisi huai nanfin cacapaimisicoinquin. Ascaraquicai Diosin unimaima. Ascashon ato onaintimashqui. Ascafia nan ratoran futsan Jesús cuscara ipaicoinquifin nantonfin tapiaquin fasi Jesús yopacoin isharashquin. Nanscarafohuunfin Diosin ramapaiquin ato shara huashoshquin finacoinshquin ahuun curushu ato inanshquin tanasharanonfo,”

ishon cununi.

<sup>7</sup> Ascacun Upa Diosin mato yoimisi cuscacoin acahuun. Nan yoshin chaca Satanás mato amapaiyai cuscan nicayamacahuun. Ascashon yoiquin isca huacahuun, —Satanás, Jesucristo uhuun Ifoquin. Umaquinoashu catahuun, —ishon yoicahuun man asca huaino matomaquinoashu ichoriscatanon. <sup>8</sup> Ascatari Dios fu rafucahuun a cufifaincahuun. Man ascaino matofu rafucacaitiro. Man chaca huamisi

cuscan shatucahuun. Ascashu afanan ointi rananya iyamacahuun. Man Dios tanafiashon nantianricai nan icoinra huamafoan acai cuscan man huatiroma. Ascaquicai man tanasharatiroma. Ascashon maton nomuran man shinanchacamisi cuscan shatucaincahuun.

<sup>9</sup> Man chaca huamisi cuscan shinancasmacahuun. Ascashon man chaca huamisi cuscan shinantani uaicahuun. Afanan afo shinancani shuchitamarocon uaicahuun. <sup>10</sup> Ascashon nocon Ifo Jesús yoiquin isca huacahuun, —Ifon un fasi mia chaca huamisi. Ascacun ua numahuu, —ishon yoicahuun. Man ascaiton Upa Diosin matohuun ramapaiquin maton chaca soashotiro man afu ipanon.

### *Futsahuunoa yoiqui chaca huayamacahuun*

<sup>11</sup> Uhuun yoramishtichin Diospan tsain noco yoiquin isca huani, —Noinancatan yoiti huatananyamacahuun, —ishon cununi. Man ascayamacai Diosin noco yononi cuscan man aima. Ascaquifin, —Diospan tsain amaquiriran, —ishon man yoicai. Ascashon mancai yoitiro, —Diospan tsain cayacafi iyamarai amaquiriran, —ishon yoitamarocon ahuun tsain man nicacointiro. <sup>12</sup> Diosin fustiton noco yonopaiyai cuscan noco cunushoni. Arus fustifi tapicoianquin tsoamain isharacoian iyamarai chaca huaquin. Nanton arus fusti tapia noco numa iyamaraimain noco omitsiscapanacafo muran potaicai. ¿Ascán ahuuscain man futsafuunoa yoiqui chaca huamisimun?

### *Ahuara ahuuscara afiaitocai non tapitiroma*

<sup>13</sup> Natian un mato tsain futsa yoiaton ua nicasharacahuun. Atiriffain man yoimisi isca huaquin, —Na shafata iyamarai funamanri non pushurasi futsa ari canon. Nannoshon non fari fusti finonyoicanon ahuara inanmitsashon ahuun rafanan non pui ichapa finon, —ishon man yoimisi. <sup>14</sup> Ascafiashocai man tapiama funamanrimain ahuuscataniquin. Nan man cainitian yafi man naitian nishfo cuscara. Man oinfaiino samamashta yamafoaintiro. Nanscarifiai mancai chai nipatiroma.

<sup>15</sup> Ascacun anori shinantamarocon man shinanquin isca huatiroma, —Upa Diosin ua nimapaiyaino un niyotiro. Nantonfin ahuara apaiyai cuscan ua huamatiroquin, —ishon man yoitiro. <sup>16</sup> Ascafia mancai ascara shinannisima. Ascatamarocon man yoiquin isca huamisi, —Ufin un apaiyai cuscan un huatiroman, —ishon man shinannisi. Ascashu man cacapaimisi. Man ascafin fasi chacacoinquin. <sup>17</sup> Ascashon ratoran futsan Diosin amapaiyai cuscan tapifiashon futsa ashosharayamaino nantofin chaca huaiquin.

## 5

### *Mafo ichapayafo Santiago ato yoini ascanonfoma*

<sup>1</sup> Mafo ichapayafoan ua nicasharacahuun un mato cayacafi yoinon. Ascan natian man ahuashta yopayamafiai chipo man fasi omitsiscashquin uaiquin. <sup>2</sup> Man ichapa aya cuscan chipo payocoi futsui. Maton sahuuti sharacapacoinfo coroisifoan piquin futsashcaini. <sup>3</sup> Maton puiri afanan ahuashta ahuun nuima. Man maton pui ichapacoin mucua oinquin futsan yoitiro, —Mifin min yoashicoin. Mina fusti min shinain. Ascashocai man futsafuun ramapaimisima. Ascacun Diosin mato onaintimashqui. Maton ointi ihuucain mui. Man ahuuscampaishquin.

Man fasi ratucoin nan tapiashu chipo man omitsiscashquiran, —ishon ato yoi. Nanfin ahuun unutaniquin.

<sup>4</sup> Shinacapon. Mancai maton yonomamisifo inansharamisima. Man ato fuparamisi finonmafain fiifiaquin. Upa Diosin ahuamamishti atiroquin. Man ato chaca huamisi cuscan nanton oian. Fasi yonoi atsanacani piniaifoan Diosin man ato nica.

<sup>5</sup> Mato yonomisifo omitsisca cuscan mancai ascatarocon man niyoashu man fasi isharamisi. Ahuashtacai man yopamisima. Moipan ichapa pii shoatiro. Tapiama shoacun ifoan rututiro pinonfo. Nanscarifiai mancai niyoashu isharamisi. Unimacain ahuaara apaiyai fustisi man amisi. Man tapiama ascara chaca huafishu samamashta man nai omitsiscai futsushquin. <sup>6</sup> Yora tatimamishtifiacun man ato chaca huamisi. Atohuunoa tsain chaca man huai niaifo ato achimashquin. Man ato chaca huaino ahuuscashucaí afinri numatirofoma. Ahua chaca huayamafishu nan maton tsainhuunshon man ato rutumani.

*Omitsiscafiacquin tunufain Dios cuficahuun*

<sup>7</sup> Uhuun yoramishtichin man omitsiscafiacquin tunuyocahuun nan nocon Ifo Jesús oaitian. Funayamacahuun. Natian un mato ahuaara futsa yoipai. Mau fanashon ifoan funainquimashta manasharatiro nan funusharaitian. Oi pacutian manasharatiro funushonaitian. <sup>8</sup> Nanscarifi aquin manayocahuun. Nocon Ifo man oti chaimaquin. Ascacun ahuun tsain cachiquiri huacaquima tanasharacahuun.

<sup>9</sup> Uhuun yoramishtichin nocon Ifo man oti chaimaquin. Tapicahuun nan chacafo onaintimayoi oiquin. Ascacun futsaqui tsain chipuyamacahuun matori onaintimanonma. <sup>10</sup> Nocon shunifoan nan nocon Ifo ahuun tsain yoimisifoan fasi omitsiscafiacquin funatama nocon Ifohuunoa ato yoipaonifo. Nan ipaonifo cuscan atohuun caocahuun. <sup>11</sup> Man man tapiá nanfoan omitsiscafiacquin funatama tunucoinpaonifo. Nanscarafon unimatirofoquin ishon non yoimisi. Nocon shuni Jobhuunoa man man nicamisi. Fasi omitsiscafiacquin nocon Ifon icoinra huacoinni. Ahuun tsaincai cachiquiri huanima. Ahuun unutaqui Upa Diosin fasi shara huashoni nan funoni cuscan afanan inancoinni. Ascan non tapitiro nocon Ifon nocohuun ramapaicain nocohuun noicoin.

<sup>12</sup> Ascan man man tapia Upa Diosin nocohuun noiquin noco cushusharamisi. Ascan Diosin noco shinanmafafaini nan man tapicoian cuscan futsafo ismacahuun. Maton tsainhuunshon ato ismacahuun. Man futsafo matohuunoa icoinra huamapaiqui isca huaquin yoiyamacahuun, —Diosin ua oiainno un mato icon yoiran, —ishon yoiyamacahuun. Mato tsain, —Ai iyamarai ma, —ishon yoicahuun. Icon fustisi yoicahuun. Man ascaiton maton tsainhuunshon man chaca huatiroma Diosin mato onaintimanonma. Ascara shinacahuun.

<sup>13</sup> Asca man ratoran futsan chaca finonshon Upa Dios cuficahuun. Man ratoran futsan unimaquin Dios fanainshotiro isca huaquin, — ¡Aicho! Upan Diosin min shararan, —ishon fanainshocahuun. <sup>14</sup> Nan ratoran futsa isinincaiton nan ichananmisifo aton cushumisifo cunacahuun a cufishononfo. Nocon Ifo cufishquin ichapamashta shuniyashon fumanfain nocon Ifo Jesús anuhuunshon Upa Dios cufishocahuun. <sup>15</sup> Man icoinra huacoinshon isinincaino man cufishonaino cayasharatiro muma shara itiro. Nanton chaca huamiscun Upa Diosin

a caya huafain ahuun chaca soashotiro. <sup>16</sup> Ascacun man chaca huaa cuscan yoinonacahuun Upa Diosin maton chaca soashonon mato caya huanon. Ratoran futsan Jesushuunoashu isharashon nanton mato Upa Dios cufishonaiton nicasharashquin nan cufiai cuscan ahuamamishti huashotiro.

<sup>17</sup> Ascan nocon shuni Elías nan nocofunu noco cuscarari ipaoni. Non muai cuscarari arifi mupaoni. Ascafiaшон Upa Dios fasi cuficoiainno fari rafu non fusti nushmancayan oi fuyonima. Cufinquin isca huani, —Upa Diosin uhuun yorafoan mia cachiquiri huafoquin. Ascacun oi fumariamahuu uhuun yorafoan afanan mia tanasharanonfo, —ishon cufini. Asca huano fari rafu non fusti nushmancayan oi fuyonima. <sup>18</sup> Ascan chipo afanan cufiaino oihuanrasi funi. Nantianri yonofa foaisharani.

<sup>19-20</sup> Uhuun yoramishtichin mafin ranan Diosin tsain tanacashon futsan Diosin tsain cachiquiri huacun afanan Jesús tanayamaiton futsan yoiquin, —Min chaca huamisi cuscan shatuhuu Jesús afanan tanasharahuu, —ishon anori man yoiaino nicashon ahuun chacafo shatucoianshu Jesusqui afanan nasotiro. Omitsiscapanacafo muran cacuana futsan numayamaino. Asca huashon ahuun chacafo cachiquiri huamacoishon Diosin ahuun chaca rau huashotiro futsan numacun. Ascacun afanan Diosincai ahuun chaca ahuunoa shinainma manmain ahuun chaca shatumacoishonfin. Nanti.

Santiago

## Pedronun Icoinra Huafo Cunushoni

*Pedronun ato tsain shara fomani*

<sup>1-2</sup> Unquian Pedro un Jesucristo fu rafumisishon ua yonopaiyai cuscan un ashoshquin. Un mato cunu fomai man tapinon. Man Jesús tanaino maton mai Jerusalén anoshon mato potanifo. Ascan man maitio pashcai futsufaini. Atirifi man Ponto ano foaino atirifiri man Galacia ano foaifoanno atirifi Capadocia ano foaifoanno atirifi Asia ano foaifoanno atirifiri man Bitinia ano foni. Upa Diosin inonpacoai cuscan mato catonni ahuun facufo man inon. Jesucristo mato nashoni maton chaca mato soashoshquin ahuun Yoshin Sharahuunshon mato chaca shatufain man tanasharanon. Ascano Upa Diosin matohuun ramapaiquin maton nomuran fasi unimafafaini.

*Non Diospan facufoshon non tapitiro non afu ipashqui cuscan*

<sup>3</sup> Ascacun nocon Ifo Jesucristo Apa non aicho huapanon. Upa Diosin ahuun Furun Jesús mai murannoa funimani ahuunoashu nocon nomuran fiananan huai a cuscara funasharacoin non inon. Ascan ahuunoashu non nipai aqui non nocoaitian afu ipashquin. <sup>4</sup> Ascashon Upa Diosin noco yoini cuscan noco numapacunaca non afu ipanon. Diosin ica cuscarifiai norifi non aqui nocoaitian a cuscara shara iishquin. Noco imapacuai cuscan unupacunacama icain chacapacunacama icain sharapacunaca fusti. Charofo sharashta iyoflashu chipo tsasi futsutiro. Ascan noncai charo cuscarama. Chipu noco Diosin imashquin cuscacai fianananpacunacama. Non afu isharapacunaca. <sup>5</sup> Ascan non icoinra huacun Upa Diosin ahuun curushhuunshon noco cushusharafafaini Jesús oaitian. Nantianri noco imashquiai cuscan nantifi noco inanshquin ahuashtacai non funoshquima.

<sup>6</sup> Ascan natian niyoashu man omitsiscafiai man chipu Jesús fu ipasharashquin. Ascacun omitsiscafiai fasi unimacoincahuun. <sup>7</sup> Diosin nocohuunoa onanpai nonmain Jesús icoinra huacoinnaquin. Un mato ahua futsa tapimapai. Cuno nan oro chi muran coashon non tapitiro nan orocoinmainquin. Nan orocoianshucai cotiroma. Nanscarifiai omitsiscafiaqui man Jesús cachiquiri huayamacun Diosin onantiro man Jesús icoinra huacoinnamainquin. Nan oro chicoinfia man Jesús icoinra huacoinna nancaifin fasi shara finacoianquin. Ascan Jesús oaitian omitsiscafiaquin man icoinra huacoinmisticun mato yoiquin isca huashquin, —¡Aicho! Min omitsiscafiai min isharamisi. Ascacun un miqui unimacoinni. Min ufu rafusharapacushquinran, —ishon mato Jesús yoishquin.

<sup>8-9</sup> Man nocon Ifo Jesús oinmisimafishon man ahuun noi. Nantianri man oiantaimafishon man icoinra huacoinna. Ascashu man fasi unimacain maton ointi roama roamamisi. Ascashon man icoinra huacun Diosin mato imasharapacunaca.

<sup>10-11</sup> Nocon shunifoan nan inon pacoai cuscan Diosin tsain yoimisi-foan ahuun Yoshin Sharahuunshon Jesushuunoa yoipaoni isca huaquin, —Nocon Numamisi nocoqui oshqui. Mato omitsiscashoshquin man ahuunoashu isharanon, —ishon cununi. Ahuunoa cunupaoni cuscan nanfoanri fasi tapipai tsoamain nocon Numamisi iishquicain ahuutiarimain oshquicain. <sup>12</sup> Diospan Yoshin Sharapan ato tapimani man inonpacoai yoini nanfoan niyocashon oinyotirofoma. Ascatarocon



afaoan oinyamafiaino mancaifin oinshquiquin. Ascan nan tsain shara Jesushuunoo nantiffain man non nicamisi. Upa Diosin icanoshon ahuun Yoshin Shara nichini ahuun curushhuunshon mato Jesushuunoo yoimisi. Nan man nicamisi cuscari Diospan oinmati afu nai muran icafoanri tapipaicoincani.

*Upa Diosin noco yononi non Cristo cuscara shara inon*

<sup>13</sup> Ascan maton nomuran cayacafi shinansharacahuun. Jesucristo oaitian Upa Diosin mato shara huashoshquiai cuscan itisharacahuun mato yoini cuscan fiishcaquin. Ascacun ahuara futsan shinanyamacahuun. Afin mato amapaiyai cuscan fustisi shinacahuun. <sup>14</sup> Manfin Diospan facufoquin. Ascan Upa Dios nicasharacahuun. Mato amapaiyai cuscacai man tapiyopaonima. Man chaca huapaoni cuscan afanan shinanyamacahuun. <sup>15</sup> Ascataamarocon natian Upa Diosin mato isharamapaiyai cuscan fustisi acahuun. Nanfin shara fustiquin. Ahuacai chaca huamisima. Ascacun marifi a cuscara shara icaahuun. Nan man afafainnai cuscan isharacahuun. <sup>16</sup> Diospan tsain cununi isca huaquin, —Unfi isharamisiquin. Ascan marifi isharacahuun, —ishon Diosin yoini cuscan cununi.

<sup>17</sup> Ointiaquimayamacahuun man nocon Upa Dios cuffafainai cuscan nanton noco nantifi oinfafainni nanscarafosi. Nanscacun Diosin nanscasi huaquin nocohuun noi. Upa Diosin nan yonoshomisifo cuscan atoti inanpacushquin. Nan yonoshosharamisifosi ato paratama inanpacushquin. Ascan nan yonosharamafo funoshceni. Ascacun oinfain. Nuno mai ano niyoshon Diosquiri shinansharacahuun mato yonomapaiyai cuscan ashocahuun funoshcaquima. Man nonfin tapiaquin non nuno mai ano ipanacama. Non chipo Diosqui nocoshquin.

<sup>18</sup> Man manfin tapiaquin nocon shunifoan noco tapimapaoni cuscacai afoan noco numapacutiroma non afanan chaca inonma. Nan pui paratamacoinfiashocai noco numatiroma non afanan chaca huanonma. Nan pui chicoinfiahu nanfori cuyoi futsushquin. <sup>19</sup> Cristo fustitofin noco numatiroquin. A fustitocai ahua chaca huanacama. Nan chashoan facu muma sharacoin cuscara. Jesús aficoi noco nashoni ahuun imi fonihuunshon noco numashqui non afanan chaca inonma. <sup>20</sup> Upa Diosin mai oni huataima Furun Jesús catonni noco Numamisi inon. Ascfia futsafoancai tapiyopaonima natiantan Diosin mato tapimana. <sup>21</sup> Cristohuunshon man Diosin icoinra huamisi. Criston naafianicun Apa Diosin funimani afu nantifiton aton niaifocoin inon. Ascan manfin Dios icoinra huafain man man tapia chipo man afu ipashquin.

<sup>22</sup> Man non Jesús icoinra huashon ahuun tsain iconcain cununi cuscari man nicacoinmisi. Ascashu man a cuscara shara imisi man icoinra huafutsafori noicoinmisi. Fomanonantama noinainshara finacoincahuun.

<sup>23</sup> Man chaca ipaoni cuscacai man afanan ascaima. Diospan tsainhuunshon mato fiananan huaa. Ahuun tsainhuunoashu non ipasharatiro. Ahuun tsaincai cuyopacunacama. Nocon upa futan nocon uhua noco cainfiani non chipo natiro. Ascfia Diospan tsainhuunshon noco cainma funa. Ascashu ahuunoashu non afu ipatiro.

<sup>24</sup> Un mato ahuara futsa tapimapai man tapisharanon.

“Faasi tau foaisharafiashu chipo samamashta tsasitiro. Charofori tau sharashtacoin iyofiahu chipo samamashta tsasitiro afanancai non ointiro. Nanscarifiai nantifi yoraforicai chai nipatirofoma. Nantifi non nai futsushquin. <sup>25</sup> Ascfia

nocon Ifoan ahuun tsaincai ascarama. Nocon Ifoan noco yoia cuscan nan iconcoin cuyopacunacama.”

Nan tsain shara Jesushuunoa futsafoan mato yoimisi.

## 2

<sup>1</sup> Ascacun nantifi man chaca huamisi cuscan unūcahuun. Futsafohuunoa shinanchacayamacahuun ato chaca huafain ato parayamacahuun atori fomanyamacahuun. Futsa aya cuscan fipaiquin ato noicasmafain ato yoiti huayamacahuun. Atohuunoari tsain chaca yoiyamacahuun. <sup>2-3</sup> Ascatarocon Diospan tsain shara fuchipaicahuun. Facu rama caianton shoma apaitiro cuscan huaquin marifi Diospan tsain shara fuchipaicahuun. Man man mumisi nocon Ifoan noco shara huashoaiton. Ascacun mato imapaiyai cuscan fustisi tapisharacahuun.

### *Cristofin nan toquiri mutsisipa cuscaraquin*

<sup>4</sup> Ascan man toquiri pushu huaino toquiri ichapa yopafain nan uhuapa shara fusti man yopai pushu mutsisipa huashquin. Atirifi uhuapamafo afuchi putsainicani. Nanscarifiai nocon Ifo Jesúsfin nan toquiri uhuapa shara nia cuscaraquin. Icoinra huamafoan nocon Ifo fuchipaicanima shinanquin isca huacani, —Aacai ahuama. Noncai a yopaimaran, —ishon yoifiaifoan Upa Diosin nocon Ifo Jesús catonni. Fasi ahuun noicoinquin. —Tsoa futsacai a cusarama, —ishon Diosin yoini. Ascacun aqui fucahuun maton toquiri mutsisipa cuscara shara imanon.

<sup>5</sup> Man aqui oashu nan toquiri uhuapama nia cuscarafo man itiro. Nan Diosin pushu huatiro cuscai. Iquisi toquiri mutsisipa uhuapa shara fia. Nanfin nocon Ifo Jesús. Apan catonquin tau huani chipo nocorifi catonni Jesús cuscara shara non inon. Ascan Jesushuunoashu norifi non Diospan pushu cuscara. Tsoa na pushu muran opai isharacointiro. Ascan nonfin ahuun pushu anoa ahuun yonomatifoquin. Ascashon noco amapaiyai cuscan fusti non Jesushuunshon ashosharatiro. Non Diosin Furuhuunshon isharamisi. Ascacun non yonoshonai cuscan Upa Diosin nocoqui unimacacaini. <sup>6</sup> Ascan Diospan tsain cununi isca huaquin,

“¡Oincapon! Un Cristo oian arus fustifin sharacoinquin. Ascacufin un catoanquin uhuun yorafoan ato ifo inon. Afin pushu quishi toquiri mutsisipa cuscaraquin. Ascacun uhuun yorafo afu isharanonfo. Tsoancai Cristo icoinra huashon shinan futsapacunacama. Ascatarocon afu unimacacoinnaccaran,”

ishon Diosin yoini.

<sup>7</sup> Icon tsoan Cristo icoinra huashon ahuunoa shinantiro isca huaquin, —Tsoa futsacai Jesús cuscara sharama. Un fasi ahuun noicoiran, —ishon yoitiro. Asafia tsoan icoinra huayamaino Diospan tsain atohuunoa cunuquin isca huani,

“Pushu yonomisifoan quishi toquiri uhuapa shara potaifoan pushu ifoan yoiquin isca huatiro, ‘Nan quishi toquiri fasi shara. Un fuchipai nahuun uhuun pushu shara huashquin,’ ishon yoitiro. Nanscarifi aqui nan nicayosmashunifoan Cristo potafianifo Diospan catonni ahuun yorafoan aton Ifo ipanon,”

ishon yoini. <sup>8</sup> Afanan Diosin tsain yoini cuscan huafain un maton yoi isca huaquin,

“Toquiri uhuapa fai namancaia racafiano oinsharatamacai otiscaini non pacutiro. Nanscarifi aqui tsoan nocon Ifo Jesús icoinra huacoianshma pacui cafiscashu funotiro Upa Dios icari nocopaiyai omitsiscapanacafo muran focaniran,”

ishon Diospan yoini. Diosin yonofiani Cristohuunoa nicacasmafain yoitimashu funopacunacafo. Nannori Diospan tsain yoiyoni.

<sup>9</sup> Ascafia Diosin noco catonni ahuun yorafo non inon. Afin niaifocoinquin non yonoshotiro futsafori cufishoshquin Jesushuunoa ato tapimashquin. Noco a cuscara sharacoin imaino non ahuun yoracoinfo itiro. Ascashon ahuunoa futsafo yoisharashquin. Non faquish muran ica shinantsa apaoni. Ascafia afincoin noco catonni ahuun yoracoinfo non inon afu shafacafi shara ipashquin. <sup>10</sup> Mancai ahuashta nicayopaonima. Ascafian natian man Diospan yoracoinfo. Diosin matohuun ramapaifaiton mancai muyopaonima. Ascafia natian Diosin matohuun ramapaiyaitofin man man mumisiquin.

*Diosin yonomati sharafo icahuun nantishotapiquin*

<sup>11</sup> Uhuun yoramishtichin un mato yoisharapaiyai cuscan ua nicasharacapun. Non icoinra huamafo muran ifiashucaí non atofu ipanacama. Noncai aton yoracoinfoma. Ascafia nan icoinra huafoma icaifo cuscan ayamacahuun. Mato amaquri shinanchacamapaiiaifoan ascara shinanyamacahuun. Nanfoan maton nomuran mato chaca huamapaicani. <sup>12</sup> Ascacun ato murannoashu Jesushuunoashu icoinsharacahuun. Nan man niyoano matohuunoa tsain chaca yoifiamisifo chipo Diosin nantifi noco ichanan huaitian nanfoan tapitirofo mancai ahua chaca huatama man icoinsharamisi. Ascashon yoitiro isca huaquin, —¡Aicho! Nanfoan Dioshuunshon futsafo shara huashomisi. Ascacun Dios sharacoinran, —ishon yoishquicani.

<sup>13-14</sup> Nocon Ifoan apaiyai cuscan nantifi niaifofaan mato yonoaiton nicasharacahuun. Niaifocoin nicasharafain niaifo patasharinoafori nicasharacahuun. Nanfo Upa Diosin nichini chaca huamisifo onaintimatan a nicasharaifo aton yoisharanonfo. <sup>15</sup> Ascan futsafo fasi tatimacoinshon amaquri shinanmisifo. Ascashocai Diospan tsain tapipaicanima. Ascan ahua tapiamafiacashon mato isca huaquin yoipaicani, —Man Jesushuunoa yoimisi cuscan amaquricoiran, —ishon yoimisifo. Ascan Upa Diosin mato yonopapaiyai cuscan futsafo man shara huashofafainaihuunshon man ato shatumatiro.

<sup>16</sup> Jesús fusti maton Ifocoin. Ascan ahua futsa shinantama isharacahuun. Diosin mato amapaiyai cuscan fustisi huafafaincahuun. Ascashucaí ahua futsa maton ifo itiro. Ahua chaca huatama Diospan yonomatifo ifafaincahuun. <sup>17</sup> Ascacun nantifi yorafohuun shinan-sharacahuun. Nantifi Jesús icoinra huafo noicoincahuun. Diosihuunoa shinancahuun isca huaquin, —Un Dios noicoinquin ua yonopapaiyai cuscan un nicapaicoin. Uncai yoitima ipaima ua onaintimanonma, —ishon Diosihuunoa anori shinancahuun. Mato niaifofa nicacasmaquima ato nicasharacahuun.

*Cristo noco omitsiscashoni cuscan norifi non ahuunoashu omitsiscatiro*

18 Yonomatifoan maton ifo nicasharacahuun mato yoiainfo cuscan ashcaquin. Ato nicascamaquima atohuunoa shinansharacahuun. Nan mato chaca huamisifori aton ismasharacahuun,<sup>19</sup> Man chaca huayamafiacun mato ifoan mato omitsiscamafiaino Diosihuunshon shinanquin tunucahuun. Man tunuaiton Upa Diosin matohuunoa yoisharashqui.<sup>20</sup> Ascacun man chaca huahuunshon maton ifoan mato coshaino man tunuanocai matona ahuama. Man shara huahuunoashucaí man omitsiscaima. Ascan man shara huafiacun maton ifoan mato coshaino man tunucun nocon Ifo Diosin matohuunoa shinansharashquin.<sup>21</sup> Cristofin nocohuunoashu omitsiscacoinniquin. Ascacun norifi non ahuunoashu omitsiscatiro. Non ahuun caotiro a cuscara shara iishquin.

<sup>22</sup> “Ascan nantocai tsoa chaca huayamafain tsoa paramisima.”

<sup>23</sup> Futsafoan roafiainfoanocai pusinima. Omitsisca huafiainfoancai ato yoiquin isca huanima, —Un mato chipo copishqiran, —ishocai yoimisima. Ascatarocon Apahuunoa shinanquin isca huani, —Upan man min uhuunoa onancoian. Nanscarifi huaquin min ato onancoian. Ascan min ato ashquiai cuscan iconcoiran, —ishon shinanni.<sup>24</sup> Jesusfin noco ihui coyan iquinanquinoashu noco nashoniquin. Nantifi nocon chacafo amuran cuyoinanni non afanan chaca huatarocon non a cuscara shara ipanon. Nan isi muahuunshon noco caya huamai non afu ipanon.<sup>25</sup> Ascan manfin nan chashoanfo funoa cuscarafu ipaoniquin. Ascafia natian man mato cushumisi Jesusqui nasoa mato cushufafainshquin man afu rafupacunon.

### 3

#### *Ahuuscashumain funu fu ahuin isharatiroquin*

<sup>1</sup> Ascan nanscarifiainfoan maton funufo nicasharacoicahuun. Atirifi mato funufoan Diospan tsain icoinra huayamafia ato nicasharafain ato Jesushuunshon shara huashofafaincahuun ipaishomari arifi nanto nocon Ifo icoinra huatiroquin.<sup>2</sup> Maton funufoan mato yoiainfo nicitimacaquima nicasharafain man Jesús cuscara isharaiton oin atirifoan nocon Ifo icoinra huatirofo.<sup>3</sup> Foaromucai tuhuuti sahuufain sahuuti sharacapacoin sahuuahuunshoncaí maton funu man icoinra huamatiroma.

<sup>4</sup> Ascatarocon maton nomuran shinansharafain man futsafo tsain tsii huafain yoisharamisicun nanscarafu Upa Diosin fasi fuchipaicoin. Nanscarafu oinquin, —Nan fasi shararan, —ishon yoitirofo. —Na cuscara ainfofin ahuun ica sharacoicoinquin, —ishon Diosin ahuunoa oinquin yoitiro.<sup>5</sup> Nanscara nocon shunifo ainfofoan Diosin icoinra huafain isharamisifo. Diosin ato nomuranshon shinanmasharaino aton funufori nicasharapaonifo. Ascashon aton funu nicasharacoianfoanno ato funufoan atohuunoa shinantirofo isca huaquin, —Uhuun ahuinua shara huashofafaini. Ascafin fasi sharacoicoinquin, —ishon funufoan shinantirofo.<sup>6</sup> Nocon shuni Abraham ahuun ahuin Sara nanscapaoni. Ascashon ahuun funu fu tsainquin isca huapaoni, —Uhuun iforan, —ishon yoipaoni. Marifi ratutama isharacain nan Sara ipaoni cuscan man shinainno ahuun facufo cuscara man itiro.

<sup>7</sup> Nocofunufufoan marifi nanscarifiainfoan maton ahuinshtafo fu isharacain shara huafafaincahuun. Atohuunoa shinansharacahuun. Ainfofocai nocofunu mutsisipa cuscarafoma. Ascashon ato cushusharacahuun. Diosin matohuun ramapaiyaino man afu ipanaca. Maton

shara huaa cuscari Upa Diosin maton ahuinfori nanscarafosi sharashta huashoshquin afu ipanonfo. Ascan ato shara huacahuun man Dios cufiain cuscan mato ashonon.

*Man futsafo shara huafaiton mato omitsiscamacani*

<sup>8</sup> Ascan nan un mato yoia cuscan. Nantiffain nannorisi shinan-sharafain futsafoan ahuaa finoncun atohuun ramapaiquin noicoinc-ahuun. Shara huatanacahuun. Cacapaimisi iyamacahuun futsafohuun ramapaiquin shara huafafaincahuun. <sup>9</sup> Ascan futsafoan mato chaca huafain mato roafiaiton ato copitamarocon ato shara huacahuun. Nanscara Diosin noco yononi. Non futsafo shara huaiton oinquin Upa Diosin noco fasi shara huashquin. Noco Diosin catonni noco shara huaquin. <sup>10</sup> Diospan tsain cununi isca huaquin,

“Man isharapaiquin ahuaa chacafo yoyamafain futsafo parayamacahuun. <sup>11</sup> Ahuara chaca huaifo muran foyamacahuun mato chaca huamatirofoquin. Ascatarocon futsafo shara huafafaincahuun. Futsafo fu fasi isharapaicoincahuun. Fochishmanantanancuima. Maton nomuran tsii huatanacahuun. <sup>12</sup> Ascashu man isharaiton oinquin Upa Diosin matoqui fasi unimaicain mato cushusharashquin. Ascashon man ahuaa yocaiton mato nicatiro. Man yocai cuscan mato ashoshquin. Ascan tsoan chaca huamicun Upa Diosin ato nicaima ato shatumashquin,”

ishon huani.

<sup>13</sup> ¿Non futsafo shara huamapaiyaitomun tsoan noco chaca huamatirofoquin? <sup>14</sup> Ascafia ipaishoma man isharaiton mato omitsiscamatirofofia Upa Diosin mato shara huashquin. Diospan tsain cununi isca huaquin,—Icoindra huamafo musua cuscan musuyamacahuun. Ratuyamacahuun,—ishon noco yoini.

<sup>15</sup> Ascataka maton nomuranshon nocon Ifo yoiqui isca huacahuun,—Criston minfin uhuun Ifocoinquin. Mincai ahuashta chaca huamisima. Minfin shara fustiquin,—ishon yoicahuun. Ascatari futsafoan mato yoiquin isca huai,—Ahuuscashocon min tapiain min Dios fu ipashquai,—ishon mato yocaiton iquisi itisharacahuun ato tapimasharashquin. <sup>16</sup> Ascashon ato oi noma cumasharacahuun. Ato fu fochishmanantanancuima ato nicacoinsharacahuun. Man ahuaa chaca huaa cuscan man fomainno mancai futsafo Jesushuunoa cayacafi yoitroma. Ascashon man chaca huashon Dios yoiriscacahuun Jesushuunoa yoisharashcaquin. Mato chaca huafiacanashu man isharaiton oinfin rafipaitirofoquin.

<sup>17</sup> Ascan non chaca huahuunoashu non omitsiscacai sharama. Man nonmain chaca huashufin nonfin omitsiscatiroquin. Ascan non shara huaashu Upa Diosin noco amapaiyai cuscan non omitsiscacai nanfin sharaquin. <sup>18</sup> Cristocai ahua chaca huamisima. Nan fustifin sharaquin. Nantiffain man non chaca huamisi. Cristo ahua chaca huayamafiamishashquin nocohuunoashu nani nocon chaca noco soashoshquin. Afanacai nanacama. Noncai afanan ahua yopapacunacama nocon chaca soashonano. Man naafishu Apan ahuun Yoshin Sharahuunoashu funini. Ascashon Apa Dios icari noco iyoshquin.

<sup>19</sup> Ascan Jesús naino ahuun Yoshin Shara nan a namisifo icano cani. Nanfo nan cunu muran ica shinantsa apaonifo. Ato ano cani ato ahuun tsain shara yoishquin. <sup>20</sup> Ascan nan Noén shashohuan huai chain Diosin funaquima yorafo manayopaoni aton chacamain shatucaniquin ahuun tsain icoinra huashcaquin. Ascan Noén fustiton ahuun yorafo yashon nicacoinnifo. Ocho yora shashohuan muran iquinifo asashcaquima. Ascaino atirififoancai tsoanshta Dios nicapainima. Ascaino faitahuan nocoaino asai futsunifo. Cristo funiataima aton yoshin icafo muran cani ahuun tsain ato yoishquin.

<sup>21</sup> Noé unu faitahuaino shashohuan muran iquiashucaí asanima. Faitahuan nocofianocai Noé yafi ahuun yorafo shashohuan muran-noashu asanifoma. Nanscarifiai futsan noco unu muran iquimanaino funishon non yorafo ismai Cristo Jesús noco funimaní non afu ipanon. Nan unu muran non iquiainocai non yorafo ismáima noco caya non nashimana afanan choshta inonma. Ascatarocon non ato ismai nocon chaca soashocun Cristofin noco funimaniquin noco numashqui. Ascan non afanan shinanchacatarocon non Jesushuunshon shinansharanon Dios fu ipashquin. <sup>22</sup> Ascan natian Criston Apa fu ica niaifocoin ipashquin. Tsoashtacai finontiroma. Ahuun oinmati afu nai muran icafo non nantifi yoshinfo non aton niaifofori nantifi ato yoiai cuscan aashcaniquin.

## 4

*Upa Diosin noco ahuun curush inain cuscan huafain non futsafo shara huashoshquin*

<sup>1</sup> Criston niyoashu omitsisicapaoni. Ascacun nanton shinanni cuscan marifi nannori shinancahuun. Arifi omitsisca cuscan marifi man omitsicatirofia ahuun curushhuunoashucaí chaca afanan mato ifo itiroma. <sup>2</sup> Anori shinanquicai man afanan chaca shinainma Upa Diosin mato amapaiyai cuscan fustisi man huapaitiro. <sup>3</sup> Fari ichapacoin man man funoa Jesús icoinra huamafoan amisifo cuscan man huapaoni. Man chaca huapaiyai cuscan fustisi man huapaoni. Yamutifi monocain ayafain maton nomuran shinanchacafain maton ahuinmafo ya ipaicain ainfofori aton funumafo ya ipaiyaifono paunmisicoin icain futsafo ya ichananshu atofu monoshquin mucayanan Dios noitama ahuafo futsafo man noipaoni. Nan chacafofin Upa Diosin noicasmacoianquin. Ascacun afanan ascayamacahuun.

<sup>4</sup> Ascan nan man chaca huapaoni cuscan man shatuano matofu rafupaonifoancai ahuuscashon tapitirofoma. Ascashu matohuunoa yoiquin isca huatirofo, —¡Aira! ¿Ahuuscain afanan na yorafo no fu ichanapaicanimamun monoyanan non atofu paunpaoni? ¿Ahuuscain afanan ascapaicanimamun? —ishon yoicanashu mustairscatirofo. Ascashon mato roatirofo. <sup>5</sup> Anori shinanfiatirofo Diosifin noco niaifocoinquin. Nan muma niafo futan naafoan. Nantifiton ahuun ointaifi yoiquin isca huashquin, —Ahuuscain uhuun facu man icoinra huayamafain niyoshon man chaca huapaiyai cuscan fustisi man huamisimun, —ishon ato yoishquin. Ascashon ato onaintimacoishquin. Futsafoan yoishquin isca huaquin, —Min uhuun facu icoinra huacoinmisiquin. Ascan natian min ufu ipatiroan, —ishon ato yoishquin.

<sup>6</sup> Ascacun Upa Diosin ahuun tsain yoishomisifo nichini nantifi yorafoan ahuun tsain shara Jesucristohuunoa nicasharanonfo. Nan naamisifoanri niyocashon man nicayopaonifo. Nantifi man nai futsumisifo. Ascafia nan ratoran futsafoan Jesús icoinra huacun Upa Dios nia cuscan atorifi nimapacushquin afu nipanonfo.

<sup>7</sup> Ascacun tsain futsari un mato yoinon. Shinancon. Nantifi manifoti man cuyoti chaima. Ascacun cayacafi shinansharacahuun. Ahua chaca shinantamarocon Upa Diosin mato shinanmapaiyai cuscan nan fusti shinacahuun. Ascashon Upa Dios cufifafaincahuun.

<sup>8</sup> Ascashu noinancoincahuun. Nan non noinancaifin sharacaiquin. Futsan noicoishon non ato rau huatiro noco chaca huai cuscan afanan shinanonma. <sup>9</sup> Futsafo maton pushu ano nocoaiton aqui unimacai mato pushu muran iquimasharahuu. Mato nomuran aqui mutoquima.

<sup>10</sup> Ascan Upa Diosin noco ahuarafu futsa futsa huaquin tapimashara cuscan nan icoinra huaa futsafori non ato shara huashofain non atorifi curafia huanon. Man ascaiton oinquin Upa Diosin ahuun yorafo noicoiain cuscan huafainri man atohuun noicoitiro. Ascai unuyamacahuun.

<sup>11</sup> Ascan ichananshon Diospan tsaincon ato yoicahuun. Diosicoinchi yoicafisca huaquin. Ascan Diospan curushhuunshon futsafo shara huashocahuun. Ascacun nantifain Jesucristohuunshon Upa Dioshuunoa yoisharanonfo. Man ascaiton oinquin nantifi yorafoan yoitirofo isca huaquin, —¡Aicho! Upa Diosin fasi shara. Furun Jesucristohuunshon ahuamamishti huatiroman, —ishon yoishquicani. Nocon Ifo Jesucristo arus fusti shara huamisi. Nantocai ahuashta chaca huapanacama. Arus fusti ahuun curushhuunshon ahuamamishti huapanaca. Asca huapacuquicain ununacama. Nanscasi huapanaca.

*Jesús icoinra huafo omitsiscatiro. Futsafoan ato omitsiscamamisifo*

<sup>12</sup> Uhuun yoramishtichin omitsiscafiai mustairiyamacahuun. Shinanchacayamacahuun. Man tunucoiainton oinquin Upa Diosin tapitiro man Jesús tanacoian. Ascacun shinanqui isca huayamacahuun, —Ahuuscain un omitsiscaimun, —ishon anori shinanyamacahuun.

<sup>13</sup> Anori shinantamarocon unimacahuun. Man Cristo fu omitsiscacafiscacai. Natian marifi man mua ahuunoashu omitsiscafiashu chipo man aqui nocoaitian nan isharamisi cuscan marifi man afu ipasharapacunaca. Ascacun omitsiscafiain fasi unimacoincahuun.

<sup>14</sup> Ascan man Cristo tanacun Upa Diosin mato shara huashoin. Ascashon ahuun Yoshin Shara mato ya rafumapacushquin. Ahuunshon man mutiro Jesús matofu ica. Ascan mato roafiaifoanno unimacoincahuun. <sup>15</sup> Ascan futsafoan chaca huamishhacaqui ato chacahuunoashu omitsiscatirofo. Ascashu rutumitsamisifo icain yomutso icain pofucain icain ahuunoamafia futsanhuunoa ahua yoipaimisi. Ascacashu ato chacafohuunoashu omitsiscatirofo. Ato cuscara iyamacahuun omitsiscashcaquima. <sup>16</sup> A man mua nocon Ifo Jesús icoinra huashu rafiymacahuun. Ascaquima. Upa Dios yoicahuun isca huaquin, —¡Aicho! Upa Diosin un min Furun Jesús ahuun yora. Ascacun nan icoinra huamafoan ua omitsiscamaifoanno un Jesushuunoashu omitsiscamisi. ¡Aicho! —ishon yoicahuun.

<sup>17</sup> Ascan nonfin Diospan yorafoquin norifi natian non omitsiscayoi. Non omitsiscaiton nocon Ifo Criston noco yoipai isca huaquin, —¿Uhuun

yorashtan ua mian noicoianmun? —ishon noco yocatiro. Ascafia natian non omitsiscafiaiton Upa Diosin tapitiro nonmain Jesús icoinra huacoinnaquin. Chipó nantifi nan maifoti cuyoaition nan Diospan tsain Jesushuunoa nicacasmamisifo Upa Diosin ato onaintimashqui. Ascan natian norifi non omitsiscayoflashu chipó nan Jesús icoinra hua-mafo mimacoincani omitsiscapanacafaquin. <sup>18</sup> Diospan tsain yoini isca huaquin,

“Nan icoinra huafo isharamisifo Dios ari nocoatama omitsiscayotirofo. Ascafia Dios ari nocoashucaí afanan tsoa omitsiscapanacama. ¿Ascashon Dioshuunoa shinantama chaca huamisifo ahuuscacanimun? Nanfofin fasi omitsiscapanacafaquin,”

ishon cununi. <sup>19</sup> Ascacun Diosin mato yonoai cuscan omitsiscafiaacaquin shinanchacayamacahuun. Nanton mato onihuaniquin. Ascacun nan yoiquin isca huacahuun, —Upan Diosin min ua amapaiyai cuscan shara fustisi un huapai. Mirus fustifin min ua yonotiroquin, —ishon Dios yoicahuun. Ascashu ishara-fafaincahuun. Nantofin mato yoimisi cuscacoin huamisiquin.

## 5

### *Pedronun icoinra huafo yosisharani*

<sup>1</sup> Ascan natian ichananfo cushumisifoan un mato yosipai. Ua nicas-haracapun. Ascashon maton nomuran uhuun tsain nanuocincahuun. Urifi Jesús icoinra huafo un ato cushumisi. Nocon Ifo Cristo omitsis-caiton un oinni. Chipó afanan nasoshquiaitian urifi un afu ishara-pacushquin tsoan oinyomisima cuscara sharashtacoin nantifiton oin-shquicani. Ascan nantifiton nocon ifon iishquin.

<sup>2</sup> Ascacun un mato yoi nan Jesús icoinra huafo ichanainno Diosin mato yononi cuscan ato cushusharacahuun. Ato Diosin tsain yoisharacahuun isharononfo. Ascashon shinanquin isca huayamacahuun, —¡Ohua! Un ahudara futsa huapai-fiaiquin un Diosihuunshon ato cushuiran, —ishon shinaryamacahuun. Ascatarocon yoiquin isca huacahuun, —¡Aicho! Diosin ua amapaiyai cuscan un ahuan yorafo cushusharairan ahuan tsain tanasharononfo, —ishon anori man shinainno Upa Diosin matoqui unimacoinni. Ascafia maton nomuranshon man shinanquin isca huai, —Un ato cushuaihuunshon ua pui inantirofo, —ishon anori shinarya-macahuun. Pui fustihuunoa shinaryamacahuun. Ascataka Dios fasi yonoshosharapaiquin ato cushusharacahuun.

<sup>3</sup> Ascacun ichananfoan ato niaifo cuscara iyamacahuun. Ato yonoyamacahuun nan mafin man apaiyai cuscan arifi huanonfo. Ascataka ato Jesushuunshon ismasharacahuun matohuun caononfo. Man ascaino arifi Jesús cuscara inonfo. <sup>4</sup> Nan nocon cushumisicoifin nocon Ifo Jesucristoquin nan nocoaitian mato yoishquin isca huaquin, —¡Aicho! Man mai ano niyoshon ua icoinra huafo man ato cushusharamisi. Ascan nantifi un iquinafo ya man ufu ipatiro niaifo patashari iishquin. Man ufu ipaiyai cuscaí unupacunacamaran, —ishon mato yoishquin.

<sup>5</sup> Nansarifiái pushcofoan iyoafofo nicasharacahuun mato yoiáifo cuscan aashcaquin. Pushcofoan iyoafofoya shara huatanancahuun.



“Upa Diosicai cacapaimisifo cuscara tapipaima. Ascashon nan cacapaimisifo ato onaintimashqui. Ascan nan tsii huatananmisifofin shara huashoshquiin. Nan cuscarafohuun Upa Diosin atohuun ramapaiquin ato shara huashofafainshquin,” ishon Diospan tsain cununi. <sup>6</sup> Ascacun nan Upa Diosin fustiton ahua-mamishti atiro. Nanton mato amapayai cuscan unimacai acahuun. Shinanqui isca huacahuun, —Un Upa Dios fasi yopai. Diosinmaisicai un isharatiromaran, —ishon anori shinancahuun. Man ascaiton Diosin nan apaiyaitian mato amasharashquin man afu ipanon. <sup>7</sup> Ascashon mato hu-unoa shinanfaini mato cushusharashquin. Ascan man ahua-rafo shi-nanchaca cuscan Upa Diosin yoicahuun maton nomuran unimamanon.

<sup>8</sup> Masharo fonainquin cahuancacaiquin ahua-rafo funafoanfainni piishquin. Nanscarifiai nan nocon noicasmamisi yoshin chaca Satanás cahuancacaini tsoan Diosihuunoa shinanyamaifo ato chaca huamafain ato omitsiscamashquin afanan Diosihuunoa shinanonfoma. Ascacun oinfain. Ahuara chacahuunoa shinanyamacahuun. Upa Diosin mato shinanmapayai cuscan nan fusti shinancahuun Satanás mato chaca huamanonma. <sup>9</sup> Nan man omitsiscacai cuscan icoindra huua futsafo manifoti anoafori omitsiscacani. Ascacun Satanás mato chaca huama-paiyaiton nicayamacahuun. Maton Ifo fustisirocon icoindra huacahuun. Ahuara chaca tunufafaincahuun.

<sup>10</sup> Ascan man omitsisca cuscan anaitiano Upa Diosin a cuscaracoin mato imasharafain ahun curush mato inanshquin. Diosin mato huun ramapaicoin. Ascashon mato mutsismanaino nan ahua-ra ahuuscarafi-aino man Jesús icoindra huacoinnon. Ascashon nan fustisi man shinain-ton mato catonni man afu ipanon. Nannoshon nantififain ointirofo no-con Ifo Jesús sharacoincun nanrifi nantifiton ato niaifocoin. Nantianri man afu ipashquin. <sup>11</sup> Nantofin ahua-mamishtifo huapanacaquin. Nan fustiton atiro cuscacai tsoa futsan huatiroma. Nanscasi huapanaca.

*Ahuun unutaquin Pedronun ato yoisharani*

<sup>12</sup> Unfi Silvanohuunoa shinansharamisiquin. Unfi nan icoindra hu-atiroquin Diosin amapayai cuscan huamasicun. Un tsain ichapama cunua maton nomuranshon man shinansharanon. Un mato cunushona cuscan Upa Diosin mato huunoa shinansharamisi. Ascan ahua-ra ahuus-carafiaino Dios fustihuunoasi shinansharacahuun.

<sup>13</sup> Jesús icoindra huafu ichanamisifo murannoa Babilonia anoafoan mato yoisharafo. Uhuun facushta Marcos arifi mato yoisharapai. <sup>14</sup> Marifi man noinantain yoinonansharatanancahuun. Manfin Cristo yorafoquin. Ascacun maton nomuran unimacahuun. Nanti.

Pedro

## Pedronun Afanan Icoinra Huafo Cunushoni

### *Pedronun ato yoisharani*

<sup>1</sup> Unquian Simón Pedro un mato cunu fomai. Unfi Jesucristo ahuun oinmatiquin. Un afu rafumisi. Ua nichini un futsafo ahuun tsain shara yoinon. Un mato shinain. Nocon Diosin nan nocon Numamisi Jesucristo un icoinra huaa cuscan marifi nanscarifi aquin man icoinra huamisi. Ascashon icoinra huacashon man mumisiri nan fasi shara finacojan. Diosin fasi sharacoin matori icoinra huamani. <sup>2</sup> Ascan man Upa Dios yafi Furun Jesús nan nocon Ifo man onancoincun matohuunoa shinansharaquin matohuun ramapaiqui maton ointi unimamatiro.

### *Cristo ahuun yorafo icafo cuscan*

<sup>3</sup> Jesús noco catonni a cuscara shara icain non afu ipanon. Nantofin ahumamishti huatiroquin. Non Jesús onancoincun non yopai cuscan ahuun curushhuunshon noco inanshquin. Ascashon noco imapaiyai cuscan non anon. <sup>4</sup> Noco yoiyotiani cuscan ahuun curushhuunshon ahuara futsafo sharacoin noco ashoshquin a cuscaracoin non inon. Ascan nan icoinra huamafoan afin chaca huapaiyai cuscan huamisifo. Ascafiacun Jesús nocori numai non aton cuscara chacafo inonma. <sup>5</sup> Ascacun nan mato imapaiyai cuscan fusti ipaicaahuun. Icoinra huashu a cuscara sharacoin ifafaincahuun. A cuscara shara man icaino Dioshuunoashu finonmafain mato amapaiyai cuscan fustisi tapicaahuun. <sup>6</sup> Ascan mafi man apaiyai cuscan fusti shinancaquima ahuunoashu isharafain ahuara ahuuscarafiaino tunufain Dioshuunoa fusti shinanfafaicaahuun. <sup>7</sup> Ascadari nantifi yorafo shara huafain ato oi tsii huashon ato noifafaincahuun.

<sup>8</sup> Man asca huafafaini nocon Ifo mimacaiquin man onancointiro. Ascashon mato amapaiyai cuscan man yonoshosharatiro. <sup>9</sup> Ascafia man ascayamai nan fusho cuscara man iishquin. Mato amapaiyai cuscaai man ointiroma. Ascacun man chaca huapaoni cuscan Jesús mato chaca soashonano man man ointiaquima.

<sup>10</sup> Ascacun uhuun yoramishtichin Upa Diosin mato amapaiyai cuscan nantifi acahuun. Ascashon man tapicointiro mato catonnicun ahuun yorafo man inon afu ipashquin. Ascashucaí man chaca huapaoni cuscan man afanan nasopacunacama. <sup>11</sup> Ascan nocon Numamisi Jesucristo ahuun yorafo iquina ari marifi man nocotiro. Man nococun mato isca huashquin, —¡Aicho! Iquiyohuu. Min niyoshon uhuun tsain nicocoinmisiquin. Ascan natian min ufu isharapacuiquin, —ishon Jesús mato yoipacushquin.

<sup>12</sup> Nan un mato yoia cuscan man man tapicoian. Un icon yoimisi cuscan. Ascashon nantishotapiquin nanfohuunoa un mato shinanmashquin man ascapacunon. <sup>13</sup> Un niyoatian nannori mato shinanmafafainshquin. Uafin nocon Ifoan yonoaquin un mato yosinon. <sup>14</sup> Nocon Ifon Jesucristo ua cayacaficoín tapimana un samamashta nai. Ascacun un mato nanfohuunoa nantishotapiquin shinanmai marifi man u futan nannorisi shinanon. <sup>15</sup> Un mato yoiri mun nafiano un mato yosimisi cuscan man ointiaquimanonma.

—*Cristo Diospan Furun chashapacucahuanaiton non oinniran, —ishon Pedro yoini*

<sup>16</sup> Ascacun nonfin mato tapimamisi nocon Ifo Jesucristo ahua-mamishti huatiro, —Afin chipo nocoqui nasoshquiran, —ishon non mato yoimisi. Non mato yoimisi cuscan nocofunufoan aton nomuranshon shunipafo onihua cuscacai non mato yoimisima. Noficoi non oinmisi cuscan non mato tapimana. Upa Diosin Jesús chashamapacufoannaiton man non oinni. <sup>17</sup> Nantianri Upa Diosin nai muranshon Furunhuunoa yoini isca huaquin, —Nanfin uhuun facucoinquin. Un ahuun noicoi. Un aqui unimacoinniran, —ishon Upa Diosin nan ahua-mamishti huatiroshaquin Furunhuunoa yoini. Tsoa futsacai a cuscara sharama. Arus fustifi icoinsharamisiquin. Furun ahuu cuscara sharamainquin ishon nan machi anoshon Upa Diosin noco ismani. <sup>18</sup> Nan machi ano norifi non afu ini. Nan machi Upa Diosin catonni nannoshon ahuun yono shara noco ismani. Nai muranshon Furunhuunoa yoiai cuscan norifi ahuun oi non nicacoinni.

<sup>19</sup> Ascan Diospan tsain yoimisifoan inonpacoai cuscan Jesushuunoa cununi cuscan natian non icoinra huaquin finacointiro. Ascacun marifi icoinra huacoincahuun. Nan tsainhuunoa shinanfafaicahuun. Natian man faquish muran ica shinantsa ain. Ascafia Jesús mato chashamashotiro nantishon tapiquin man tanasharanon. Nan yamutishon man manamisi afanan shafaitian faquish inonma. Nanscarifiai Jesús afanan nocoaitian man manai afanan faquish cuscara muran ishquima. Nantianricai afanan ahua chaca shinantama maton nomurancairocon man fasi unimai finacoinshquin. <sup>20-21</sup> Ascacun tapicahuun isca huaquin. Diospan tsain yoimisifoancai afin aton nomuranshon shinanfain cunupaonifoma. Ascatama Diospan Yoshin Sharapan ato shinanmana cuscan nannoricoi cunupaonifo. Ascashon Diosin ato yonoa cuscan cunushonifo.

## 2

### *Futsafoan chani fusti ato yosipaonifo*

<sup>1</sup> Ascafia nantianri futsafoan Diosihuunoa amaquri yoipaonifo isca huaquin, —Upa Diosin noco yoia cuscan non mato yoiran, —ifacashon parapaonifo. Nanscarifiai nan cuscara paramitsamisifoan mato muranshon yoishcani isca huaquin, —Upa Diosin mato yoipaiyai cuscan noco tapimana non mato yoinon, —ishon mato yoificani chanimisifo. Mato fomanpaicani. Mato amaquri yosiaifono afanan nannorisi cayacafi man shinanonma. Ascacun un mato yosin tsoan ato tanashufin funotirofoquin omitsiscapashcaquin. Nocon Ifo Jesús ato nashoni afanan chaca aton ifo inonma. Ascafia nocon Ifoan noco tapimapaoni cuscacai icoinra huafoa. Nanfoan Jesús ifoacasmacani. Ascacun nanfo ascaifoan Upa Diosin ato onaintimariscashquin omitsiscapanonfo. <sup>2</sup> Nanfoan fasi chacacoin ato tapimanai cuscari yora ichapafaon ato tanashcani. Ascashon Diospan tsaincoihuunoa shinanchacatirofo. Ascacashu Diosin ato shinanmapaiyai cuscan funofo. <sup>3</sup> Nan chanimisifoancai futsafo shara huapaicanima. Nanfofin yoashicoinfoquin. Diospan tsaincoi aton tapimatamarocon aton nomuranshon amaquri shinainfo cuscan fusti mato tapimashcani. Ascashon maton pui fiashcani. Ascatan mato parashquicani. Ascafia Diosin ato oin chaca huaifo cuscan

ointiaquimashquinma. Ratoran shafata ato onaintimashqui omitsiscapanonfo.

<sup>4</sup> Upa Diosin ahuun oinmati afu ica atirififoan chaca huapaoni. Ascaifancai Diosin ato rau huanima. Ascafia Diosinmaquinoashucaí tsoa raquishita ichotirofoma. Ascashon ato faquishihuan muran potani raqui fononfoma. Nanno faquishihuan muranshon mananonfo Diosin nantifi nan Jesús icoinra huafoma onaintimaitian atorifi fuopacufoannafo muran potashquin. <sup>5</sup> Nanscarifiai nan yorafo Noé niyoatian Diosin tsain nicacasmapaonifo. Ascan Noé ato yoini isca huaquin, —Dios sharacoin. Ascan maton chaca shatucahuun a cuscaran shara inonran, —ishon ato yoini. Ascafiahucaí tsoan Dioshuunoa nicacasmapaonifo. Ascacun Diosin yonoo faitahuanun nantifi yorafo manifoti anoafu ato cuyoni asai futsunonfo. Noé yafi ahuun yorafo siete tushunifo. Diosin ato numaino asanifoma.

<sup>6</sup> Nanscarifi aquin nan Sodoma yafi Gomorra ano icafoan fasi chacasi huapaonifo. Ascacun Diosin yoini, —Un ato onaintimacoinshquiran, —ishon yoini. Yoitan nai muranshon chi urumanhuan potani ato coaino nai cuyononfo. Nanno chi mapo fusti ini. Nanscarifi aquicai Diosinhuunoo futsafoan shinanmisifoma. Nanscacun ato musu huapaifaiaino atirififain chaca shatuyamashu omitsiscapashcani.

<sup>7-8</sup> Ascan nan Sodoma yafi Gomorra coataima nan nocofunun Lot Diosin yononi cuscan tanacoianshu isharapaoni. Ascan nanno icafoan chaca fustisi shinanpaonifo. Ascaifooan shafatifi Lotpan ato oinni chacanisi tapiaifoan. Ascaifoanno ahuun nomuran fasi fucash mupaoni. Nocofunufooan shafatifi tsain mutsama yoifafainafaino nicai ahuun nomuran fasi ihuucuin muuni. Ascacun Diosin nan fusti numani chaca huamisifoya nanonma.

<sup>9</sup> Nanscarifi aqui nocon Ifoan ahuun yora sharafotisi numatiro ahuarafaan noco chaca huapaifafainnai cuscan non anonma. Ascashon nan chaca huamisifori ato onaintimashqui ahuun unutaqui ato omitsiscapanacafo muran potashquin afanan ariashu funonfoma. <sup>10</sup> Nan aton nomuran shinanchacamisifoan ahuaara chaca fusti huapaiyaifo cuscan huamisifo. Nanfoan noco Ifo Cristo nicacasmamisifo. Ascan nan cuscara yorafo Diosin ato onaintimaquin finacoinshquin. Nan cacapaimisifoan shinanquin isca huamisifo, —Tsoancai noco yonotiroma, —ishon shinanfaimisifo. Diospan nai oinmati sharafori roafiaicai tsoa musutirofoma.

<sup>11</sup> Asca huafiaifoanno Diospan oinmatifo nan Dios fu icafocai ato cuscarama. Nanfoanfin ato finoncoianquin. Nan cacapaimisifocai Dios oinmatifoan ato curush cuscarama. Ascafia Diospan oinmatifoancai Diosin ointaifi nan yoshin chacafoqui tsain chaca huamisifoma. <sup>12</sup> Nan chaca huamisifocai Diosin nai oinmatifo cuscarama. Ahuarafahuunoo tapiamafiacanashu roanmitsapaimisifo. Nanfoanfin nan yoina pofu cuscarafuquin. Nan cuscara yoinatocai shinansharatiroma. Ahuaara chaca huapaiyai cuscan fusti nanscasi huafafaintiro. Nan yora chacafofin nanscarafoquin. Ascacufin Diosin ato achishon namashquin omitsiscapanonfo.

<sup>13</sup> Nanfoanfin futsafo omitsiscamamisifoquin. Ascan Diosin copiquiri ato omitsiscamapacunaca. Shafatifi nanscara yorafoan faquishiataima chaca huapaiyaifo cuscan fusti huacani. Ascan manfin noinancoianquin ichananshon pishcaquin. Ascan nan paramitsamisifori

matofu ichananfo. Jesús icoinra huacoianmafiacanashu mato muran iquiaofo mato futan pianan mato parapaicani. Nantianri nan chaca huamisifo cuscari huacani. Nanscara fusti fasi fuchipaicani. <sup>14</sup> Nan ratorashta ainfo ointani afu ipaitiro. Chacasi huapaifafaini. Ainfoan Jesús tanasharayamashon ato chaca huamai atofu iishquin. Atonama fuchipaimisifo. Nanscasi aifin fuyamisifoquin. Diosin nan cuscara yorafo onaintimai omitsiscapanonfo.

<sup>15</sup> Nanfofin Balaam cuscarafuquin. Balaam Beorpan furumun Dios cachiquiri huani. Pui fiishquin yorafo ato chaca huapaoni. Nan chaca huai cuscan fusti noipaoni. Nanscarafoan mato paramisifoquin. <sup>16</sup> Diosin yonoafin Balaam ahuun burro nan yora tsaintiro cuscan ani. Ascashon ahuun ifo yoini, —Ahuuscaquimun min ua coshaiquin, —ishon nan muropan Balaam yoini. Ascaino Balaam nan yora nison cuscaracoin ini. Fasi amaquiricoïn shinanni.

<sup>17</sup> Nanscara nocofunufocanai Diospan tsain noco tapimacoin sharama. Isca atohuunoo mato yoinon. Nanfofin pozoa nutsoa cuscarafuquin. Pozo ano nocoquin nonmaincoïnquin nan pozoa nutsofiashu non nomi shatutiroma. Nanscarifi aquin atohuunshon non Dioshuunoo tapitiroma. Coin fisopan oïnquin non shinantiro, —¡Aicho! Natian oi fui. Nocon mai mutocoincun muchana huashoin nocon yonofu foai sharanon, —ishon non shinantiro. Ascan coin fiso fuuhuanquin noco finonquin nocon mai muchana huatiroma. Nanscarifi ai nan yorafoan noco shinanmapai Dioshuunoo noco tapimaifiai atohuunshon non ahua tapitiroma.

<sup>18</sup> Nan chanishunifo fasi cacapaimisifo. Ascashon yoitirofo isca huaquin, —Non tapia cuscacai tsoa futsan tapiama. Nan futsafoan atirofoma cuscafin non huatiroquin, —ishon ipaitsi yoifiacanashu chanimisifoquin. Futsafoan ato chacan ramashta shatufiacanashu nan paramisifoan ato yoitiro isca huaquin, —Min futsan ahuin fu ipaiyai cuscafin sharaquin. Ahuunfin min fasi unimatiroquin. Non anoncahuun, —ishon futsan iyotiroquin futsa afanan chaca huamashquin.

<sup>19</sup> —Man ahua shara huahuunooashucaï man Dios fu ipatiroma. Ascacun nan man ahua chaca huapaiyai cuscan huacahuun. Man apaiyai cuscan tsoa mato shatumatiroquin. Unimacai acahuun, —ishon ato yoifiaquin ato fasi amaquiri yosiafo. Ascafia naforicai isharamisifoma. Afiri paramucani. Nan chaca fustifi ato ifoquin. Nanfo Satanás ahuun oinmatifo. Ahuarafo iyamarai tsoaran futsa nocon ifocun non ahuun oinmati itiro.

<sup>20</sup> Tsoan nocon Ifo nan nocon Numamisi Jesucristo icoinra huashocai nan icoinra huamafoan chaca huamisifo cuscan afanan chaca huaima. Nan chacafomaquinoashu pashcatiro afanan ato ifo ishquima. Ascafia afanan ahuun chaca aqui nasoaino nan ipaonima cuscara fasi chaca finacoian iishquin. <sup>21</sup> Man Jesús fu rafumisifiashu chipo man cachiquiri huashu afanan man aqui nasocasmai. Ascacun man Jesús tanayamamisifin shara icuanaquin. Nan Jesús icoinra huamafo Diosin ato onaintimashqui. Ascafia tsoan Jesús Ifopaonifiashu chipo cachiquiri huafoan ato onaintimaquin finacoinshquin.

<sup>22</sup> Nanscarifi ai nocon shunifoan iconcoïn Diosin tsainhuunoo cununifo isca huaquin,

“Pashnafin nan pashnacoinquin ahuara futsama. Pashna nan imisi cuscan anantiro. Ascashu chaimashta cayotiro. Ascatan afanan nasocuratan ahuun anan afanan pitishotiro. Yahuarifi nan yahuacoinquin ahuara futsama. Yahua nan imisi cuscan michanpan ipaitiro. Nashiflashu afanan michan ano nasotiro nannoashu afanan michanashquin,”

ishon cununifo. Nanscarifiai tsoan Diospan Yoshin Sharahuunshon ahuun ointi fiananan huataimashufin Satanás ahuun yoracoinquin. Ahuara futsa cuscarama. Ahuun chaca shatuyotirofia nan chaca huamisi cuscan afanan ahuun chacaquin nasotiro.

### 3

#### *Nocon Ifo Jesús afanan nasoshquin*

<sup>1</sup> Uhuun yoramishtichin afanan un mato cunu foma futsai. Nan na cunun un mato shinansharama futsapai man afanan ointiaquimanonma.

<sup>2</sup> Diosin tsain yoimisi sharafo nan nocon shunifoan yoipaonifo cuscan norifi nocon Numamisi Jesús non afu rafumisicun noco yonopaoni cuscan huafain un nanfohuunoa mato shinanmapai.

<sup>3</sup> Iquisi un mato tapimapai Jesús man oti chaimacoín. Nantianri atirifi yorafoan chaca huapaiyaifo cuscan fusti huashquicani. Nanscarafofin matoqui cashu mutsamatirofoquin. <sup>4</sup> Ascashon mato yoiquin isca huacani, —¿Diosin yoini cuscamun a Jesús oa raniquin? Nocon shunifo nayopaonitiancai ahuashta fianananma nanscara fustisi. Diosin mai onihuani chaincai ahuashtari fianananma. Nanscasi airan, —ishon yoishquicani. <sup>5</sup> Man tapificashocai tsoan shinanpaicanima Diosin unuhuan nushmancayan mai onihuani. Ascashu unuhuansi iyopaoni. Ascafia Diosin ahuun tsainmansi unuhuan nushmancayan mai onihuariscatani.

<sup>6</sup> Unuhuanunri mai fupoaino nantifi yorafori asai futsunifo.

<sup>7</sup> Nanscarifi aquin ahuun tsainmansi nai yafi mai yoiai cuscan mucuyotiro chipo nantifi coashquin. Nantianri Jesús icoinra huamafo nan chaca huamisifo Diosin ato onaintimashqui omitsiscapanonfo.

<sup>8</sup> Ascacun uhuun yoramishtichin ointiaquimayamacahuun man non yoimisi mil farifi fasi chaicoinquin. Ascafia nan shafa fusti non yoimisi chaimashtacoin. Ascashon non shinain cuscaai Diosin shinainma. Diosin nanscarasi nan rafu oinfafainni. <sup>9</sup> Ascafia atiriffoan shinancaquin isca huacani, —Nocon Ifoan yoyiotiani cuscan icataima. Ascafia man yoini cuscan finonpacuoinran, —ishon shinancani. Ascaquimaroc Diosin nocohuan ramapaicoin. Tsoacai omitsiscapanacafo muran potapaima. Funaquimafin ato mana sharamisiquin nantifiton aton chaca shatunonfo ahuun tsain nicasharashcaquin omitsiscapashcaquima.

<sup>10</sup> Ascafia nocon Ifoan Jesús samamashta nocoriscai. Yomutso yamu noco pushuano nocoriscaitocai tsoan tapitiroma ahuutiacaímain nocoriscacain. Nanscarifiai tsoancai tapiama ahuutianmain nocon Ifo nocoriscatanicain itisharafoma mustairiscatani. Nan nocon Ifo no-coaitian achahuancoín iishquin. Nantiantan nai murannoafu cooi cuyotanaino yamariscatashquin. Mairifi nantifi mai anoafori cooi cuyotanaino yamariscatashquin.

<sup>11</sup> Na rama un mato yoiai cuscan nantifi ishquiai tapicashon nocon Ifo nicasharacoíncahuun. Nanscara shara icahuun. Non itisharashucai

non ipaoni cuscan non afanan ashquima. Afin noco imapaiyai cuscan fusti non anon. <sup>12</sup> Jesús ratoran shafata nocoriscataniquin shinanfafaicahuun. Ascacun futsafo Jesushuunoa yoicahuun icoinra huanonfo aton chaca shatunonfo Jesús samamashta oiquin. Icon Jesús oaino nantifi nai muran cooi chii huancoinni fasi mushan mushancoin huai. <sup>13</sup> Ascafia Diosin yoini cuscan nanfo coano nai yafi mai funa futsa oni huashquin icoinra huafo fusti nanno iishquicani. Ahuara chacacai ano itiroma. Shara fustisi itiro. Ascacun nan non mana sharanoncahuun.

<sup>14</sup> Uhuun yoramishtichin man Jesús manaquin maton nomuran shinansharafafaincahuun. Ahuara chaca shinanyamacahuun. Man ascaiton Diosin mato ointiro ahuun Furunhuunoashu man sharacoin icun. Diosiqui ratuquimarocan shinanquin isca huafafaincahuun, —Upan Diosin ahuun Furunhuunshon ua noi. Unrifi un Dios noi afu rafupacushquin —ishon nannori shinancahuun. <sup>15</sup> Ascacun ointiaquimayamacahuun. Nocon Ifo oataima funaquima non manasharanoncahuun. Non futsafo ahuunoa yoiaiton aton chaca shatucashon Jesús ifoanonfo afu ipasharashcaquin. Nan nocon yorashtan Pablon nannori Upa Diosin a tapimanicun noco cunushoni. <sup>16</sup> Nan cunuaiti ahuun cunu Pablonun nannorisi cunumisi nocon Ifo afanan oshquiai cuscan ahuunoa cununi. Non atirifi a cununi cuscaai non funa tapiyotiroma. Non fasi nan fusti shinainno Diospan Yoshin Sharahuunshon non tapitiro. Ascafia nan Diosin tsain tapiafoma shinan futsamisifoan Pablonun cununi cuscan amaquiri yosiafo. Nanscarifiai Diosin tsain futsafori amaquiriri yosimisifo. Ascacanashu omitsiscapatirofo.

<sup>17</sup> Un mato yoia cuscan man man tapia. Ascacun oinfain marifi nan Diosin tsain nicacasmafoan mato amaquiri yosiaino man nicanonma. Man Jesús icoinra huacoinnaiton mato cushusharatiro. Ascafia nan amaquiri yosimisifo man nicaino marifi man funotiro. Ascashon man afanan amaquiri shinantiro. <sup>18</sup> Ascatarocon nocon Ifo Jesucristo ahuun tsain nicacoinfafaincahuun nan onanquin finacoinshcaquin. Mato shara huamapaiyai cuscan a cuscara shara ishcaquin. Maton nomuran tapisharaquin finacoinshcaquin. Nan fusti non Jesucristo yoiquin isca huatiro, —Minfin nocon Ifo. Minhuunshon fusti non ahuaara shara huatiro. Mirus fustifin min sharacoinquin, —ishon natian yafi nan inonpacoai cuscan non yoipacunon. Nanscasi ipanon. Amen. Nanti.

Pedro

## Juanpan Icoinra Huafo Cunushoni

### *Diosin tsainman noco nimapacutiro*

<sup>1</sup> Unquian, Juan, un mato cunu fomai man tapinon. Jesucristohuunoa un mato tapimani. Un nicafain un oinyanan un mucuman mucoinmisi cuscan un ahuunoa mato yoi man tapinon. Ahuashta oniataima Jesús apa Dios fu iyopaoni. Upa Diosin ahuun tsain noco yoipaiyai cuscan Jesús noco tapimapaoni. Ascashon ahuunshon non Diosin tsain tapitiro noco nimapacuai. <sup>2</sup> Apa Dios fu ifiashu nocoqui ftoni. Nanton noco nimapacutiro. Ascashon non oian cuscan un mato yoi.

<sup>3</sup> Upa Dios futan Furun Jesucristo shinainfo cuscari norifi atohuunshon non shinanmisi. Shinainfo cuscan non huai. Non atofu rafumisi. Ascashon non oian cuscan huafain non nica cuscari un mato yoi marifi nannorifosi man shinanon. Ascashu man no fu rafusharatiro. <sup>4</sup> Un mato cunu fomai non unimai cuscari marifi man unimanon. Non natian unimayofiai man marifi nannorifosi shinainno non fasi mimacai unimatiroquin.

### *Jeshuunshon chacapan afanan nocon ifo itiroma*

<sup>5</sup> Ascan Diospan Furun yoini cuscan nicashon non mato yoi. Noco isca huani, —Farin chashainocai faquishtiroma. Nanscarifiai Diosin shara fustisi icanocai ahua chaca afu itimaran, —ishon noco yoini. <sup>6</sup> Ascacia non yoiquin isca hua, —Non Diosin shinain cuscari norifi nannorifosi non shinanmisi. Non afu rafuaran, —ifiashon non chaca huashu non chania. Diosin iconquin yoimisi cuscan non aima. <sup>7</sup> Ascatamarocon ahuun tsain yoini cuscacoin non aafin fasi sharacoin itiroquin. Nanton shinain cuscan norifi nannorifosi shinanshqin afu rafushqin. Non ascaiton nocon chaca noco soashotiro. Jesús Upa Diospan Furunmun ahuun imi foyanan noco nashoni nantifi nocon chaca noco soashoshqin.

<sup>8</sup> Ascacia non yoiquin isca hua, —Uncai chaca huama, —ifiatan non nofiri paramumisi. Jesús iconquin yoimisi cuscan nocon nomuran non nanucoianma. <sup>9</sup> Ascatamarocon nocon chaca non yoiaton Upa Diosin yoini cuscan noco rau huatiro. Non chaca huamisi cuscan afanan Upa Diosin shinantiroma Furunmun noco nashoni nocon chaca soashoshqin. Upa Diosin sharacoinshon noco yoini cuscan nansacoin huai. Nantifi nocon chaca noco soashotiro non chaca huamisima cuscara non inon. <sup>10</sup> —Nantifi yorafoan chaca huamisiforan, —Diosin huani. Ascacia non yoiqi, —Uncai ahua chaca huamisimaran, —ishon non futsafo shinanmatiro —Diosin noco pararan, —ishon anori yoiquicai noncai ahuun tsain icoinra huacoinnama.

## 2

### *Criston Apa Dios nocohuunoa yoisharatiro noco onaintimanonma*

<sup>1</sup> Uhuun yora mishtichin, un mato cunushoni man oinshon ahua chaca huanonma. Ascacia ahua non chaca huacun Jesucristo apa noco yoishotiro nocon chaca soanon. Yoiquin isca huatiro, —Upa, un ato nashoniqin. Aton chaca soashohuun, —Apa huatiro. Atoncai ahua chaca huamisima. Afin shafacafi icaquin. Ascan Apa Dios noco



yoishotiro nocon chaca soashonon. <sup>2</sup> Noco nashonishaquin nocon chaca noco soashotiro. Noco fustima. Nantifi manifotihuunoashu noco nashoni nocon chaca soashoshquin.

<sup>3</sup> Ascan Jesús noco yoimisi cuscan aquin non tapitiro non afu rafui. Nanton shinain cuscan non tapitiro norifi nannori shinanquin. <sup>4</sup> Futsan shinanquin isca huatiro, —Un Jesús fu rafuiran, —ifiatan yoitimacoin. Ahuun tsain nicacasmai. Nan cuscara yorafin chanimisiquin. Jesús icon yoimisi cuscan ahuan nomuran nanucoianma. <sup>5</sup> Ascan ratoran yoran ahuan tsain nicacoinquifin Dios noicoinquin. Ascashofin tapitiroqui afu rafucoian. <sup>6</sup> Ascan futsan shinanquin isca huai, —Un Jesús fu rafucoiran, —icafin Jesús icai cuscari arifi itiroquin.

*Noco yononi cuscan tsain funa shara*

<sup>7</sup> Ascan un mato cunushonai cuscan man man nicamisi. Jesús maton ifo iqui taunitian mato yononi man man nicamisiquin. Mato yonoa cuscan mato tapimani. <sup>8</sup> Ascafia ahuan tsain tsoan nicayomisima cuscara un mato cunushoni. Noco yonoquin isca huani, —Yorafohuun noicoincahuun, —noco huani. Man ascaicai man chaca huapaoni cuscan afanan man atiroma. Jesús shafacafi ica cuscan marifi ahunoashu man shafacafi itiro.

<sup>9</sup> Ascafia ratoran yoran yoiquin, —Un Jesushuunoashu shafacafi icaran, —ifiatan yora noicasmashu aacai shafacafi icama. Atoncai Diosin tsain nicacoiantaima. <sup>10</sup> Tsoan yorafohuun noi aafin shafacafi icaquin. Oinsharaicai non pacutiroma. Nanscarifi aquin tsoan shafacafi ishoncai ahua chaca huafafaintiroma. <sup>11</sup> Ascafia ratoran futsan futsa noicasmaicai aacai shafacafi icama. Chaca huafafaini. Chaca huafafainquicai ahuan nomuran shinantiroma ahuan chaca shatushquin. Ascafia tapiama man fasi funocoian.

<sup>12</sup> Uhuun facumishtichin maton chaca Jesushuunshon Upa Diosin man soashona afanan afo shinanshquima. Ascacun un nannori mato cunushoni.

<sup>13</sup> Ahuashta oniataima Upa Dios iyopaoni.

Anifomishtichin, ahua cuscaramain Upa Diosiquin man man tapia. Tapishon man icoinra huamisi. Ascan un matori cunushoni.

Pushcohuaifoan Satanás mato amapaiyai cuscacai man amisima Jesús tanasharashquin. Ascan un matori cunushoni.

Uhuun facufoan marifi nocon Upa Dios ahua cuscaramainquin man man tapia. Tapishon man icoinra huai. Ascan un matori cunushoni.

<sup>14</sup> Anifomishtichin, un cunua cuscan ahua oniataima Upa Dios iyopaoni. Nanmain ahua cuscaraquin man man tapia. Ascan un nannori mato cunushoni.

Pushcohuaifoan, Satanás mato amapaiyai cuscacai man amisima. Jesús tanasharashquin. Ascan Jesushuunoashu man mutsisipacoin. Diospan tsain maton nomuran man man nanua icoinra huafafainshcaquin.

<sup>15</sup> Ascatan ahuafoan Upa Diosimaqui noco imapaiyaifo afo noiyamacahuun. Ahuafoan yora chacafoan aton nomuran shinainfo cuscan afo noiyamacahuun. Afo noiquicai man Dios noicointiroma.

<sup>16</sup> Ahuara chacafo aton ifono yorafo imisi cuscan un mato tapimai.

Ahuara chaca fuchipaifain ahuaara chaca oinquin mupaimisi icain — Un ahuarayashufin un isharaquin un futsafo finoncoian. Uncai fut-safo cuscarama, —icashu cacapaimisi. Ascara chacafocai Upa Diosin noco amapaima. Ascara chacafocan yoshin chacahuunshon noco amapai. <sup>17</sup> Ascafia ahuaara chacafo cuyoi futsui. Ahuaara chacafo yorafoan fuchipaiyaifo cuscari nanfori cuyoi futsui. Asca Diosin noco amapaiyai cuscashu nanfo Upa Dios fu ipashquicani.

*Iconmisihuunoa yafi chanimisi*

<sup>18</sup> Ascan uhuun yoramishtichin un tsain futsari mato yoi man tapinon. Diosin nantifi maitio nan chaca huamisifo onaintimayoi. Man nocoti chaima. Man man nicamisiri nan nocofunun Cristo noicasmái arifi oshquin. Natianri Cristo noicasmái nococani. Ascacun non tapitiro Upa Diosin nan chaca huamisifo onaintimaitian nocoti chaima. <sup>19</sup> Nan yorafoan no futan Cristohuunoa nicayofiapaonishaquin noco potafo. Ascafoan non tapitiro no futan Cristo icoinra huacoinmisima. Noco potafo. Ascaiton non tapitiro afocai no fu Cristo yorama.

<sup>20</sup> Ascafia mancai ato cuscarama. Upa Diosin ahuun Yoshin Shara matogui nichini matofu rafupacunon. Asca ahunshon man iconcoin tapia. <sup>21</sup> Mancai icon tapiamama. Ascacucái un mato cunushonima. Ahuaara icon iyamarai iconma man Diospan Yoshin Sharahuunshon tapicoian. Man tapiari nan chanimisifoancai noco icon yoitirofoma. <sup>22</sup> Ratofomain chanimisiquin un mato tapimai. Tsoan isca huai, —Jesuscai Cristoma. Diospan Furunmafinquin, —icafin chanimisiquin. Nanscarafoan Cristo noicasmacani. Upa Dios yafi Furun icoinra huafoa. <sup>23</sup> Ascatan tsoan isca huai, —Criston Diospan Furunmaran, —icacai Upa Diosin yora itiroma.

<sup>24</sup> Ascatan Jesushuunoa man nicaquin tauhuani cuscan cachiquiri huayamacahuun. Shafatifi ahun tsain maton nomuran nanusharacahuun. Man ascafin Upa Dios yafi Furun fu man rafupacunacaquin. <sup>25</sup> Noco yoyotiani cuscan non afu ipasharatiroquin.

<sup>26</sup> Futsafoan mato amaquri tapimapai. Ascan un atohuunoa mato cunushoni man tapinon. <sup>27</sup> Ascafiaquin Upa Diosin ahun Yoshin Shara matogui nichini matofu rafupacunon. Natianri ahunshon man iconcoin tapia. Nan fusti non yopai noco tapimanon. Afin mato tapima cuscan shafatifi maton nomuran ahun tsain nanuocincahuun afu rafushquin.

<sup>28</sup> Uhuun yoramishtichin, Jesús mato tapima cuscan cachiquiri huayamacahuun. Shafatifi nicacoincahuun yoia cuscan aqui. Ascan Jesús no-coaino man aqui rafipaitiroma. Ascataमारoon ahun ointaifi ahuaara chacafo man huamisi shinanshma man Jesús fu isharatiro. <sup>29</sup> Dios isharamisi nanfin Upa Diosin imapacunacaquin ahun facu inon. Nanri man tapia.

### 3

*Diospan facufo*

<sup>1</sup> Upa Diosin nocohuun fasi noicoin. Nocohuun shinansharamisi. Ascanshon noco yoiquin isca huatiro, —Manfin uhuun facufoquin, —ishon yoitiro. ¡Aicho! Shinancapon. Iconcoin nonfin Diospan facufoquin. Ascafiaashon icoinra huacoinyamashon Upa Dios onanmisifoma.

Ascan non Diospan facufofiacun tapiafoma. <sup>2</sup> Uhuun yoramishtichin icon natian nonfin Diospan facufoquin. Noco chipo imai cuscan tsoan tapiataima. Ascafia Jesús oaiton oin non a cuscaracoin ishquin. Nan man non tapian. <sup>3</sup> Tapiashu non a cuscara sharacoin ipaitiro. Ascashon nocon chaca non potatiro a cuscara sharacoin iishquin.

<sup>4</sup> Tsoan chaca huafafainicai Diosin noco yononi cuscan aima. Noco yonoa cuscan ayamashu chacacoin iqui. <sup>5</sup> Man man tapia nocon Ifo Jesús noco cuscara nocofunuri ini nocon chaca noco soashoshquin. Atocai chaca huamisima. Apa Diosin yonoa cuscan fustisi huapaoni. <sup>6</sup> Tsoan afu rafushocai chaca huafafaintiroma. Jesushuunoa tapiama. Ahuunoa onancoiantaima.

<sup>7</sup> Uhuun yoramishtichin, futsafoan mato amaqiri yoipaicani nocon Ifo tanatima huaquin. Ato nicayamacahuun. Tsoan isharamisi nocon Ifon cuscara shara itiro. Noco imasharatiro a cuscara isharamisi non inon. <sup>8</sup> Upa Diosin yora oni huataima yoshin chaca Satanás chaca huayopaoni. Ascan tsoan chaca huafafaini arifi Satanás ahuun yoraquin. Ascacufin Diospan Furun oniquin Satanás ahuun yono cuyoi futsunon.

<sup>9</sup> Upa Diosin noco nimapacunaca ahuun facufo non inon. Ascan tsoa ahuun facushocai chaca huafafaintiroma. Non ahuun yora ipaiguicai non chaca huamisi itiroma. <sup>10</sup> Ascan ratofomain Diospan facufo iyamarai Satanás ahuun yorafuquin non tapitiro. Tsoa Diosin yoia cuscan aimacai ahuun facu itiroma. Tsoan futsafo noiamacai arifi Diospan facu itiroma.

#### *Nantifi noinantanacahuun*

<sup>11</sup> Jesús ifoaquin tau huashon man nicamisi isca huaquin, — Noinanacahuun, —ica man man nicamisi. <sup>12</sup> Caín cuscara iyamacahuun. Cainfin Satanás yora iniquin. Chipocu isharamisicun afi ascayamaquin chipocu rutuni.

<sup>13-15</sup> Non futsafo noishon non tapitiro Upa Diosin noco fiananan huua non afanan omitsiscapanaca muran catanmarocon non afu ipanon. Tsoan futsafo noiyamashu omitsiscapanacafo fu ipatiroquin. Tsoan futsa noicasmái aafin rutumitsamisi itiroquin. Man man tapia rutumitsamisicai Dios icano nocotiroma. Ascan icoinra huamafoan mato noicasmaino mustairiyamacahuun. <sup>16</sup> Jesucriston fasi nocohuun noiquin noco nashoni. Afi nocohuunoashu napai noco nashoni. Futsafo noicoin atohuunoashuri non natiro. <sup>17</sup> Ascatari futsa ahuara yopacoinfiaton non atohuun ramapaiyamashucaí Upa Diosin ato noiai cuscan non ato noiama. <sup>18</sup> Ascan uhuun yoramishtichin, futsafo noicoincahuun. Non isca huashu, —Un minhuun noiran, —ifiatan yopaifo cuscan non inanyamacai sharama. Non ato shara huacoinshon non ato noicointiro.

<sup>19</sup> Ascaquin non tapitiro Jesús iconcoin noco tapima cuscan non ai. Ascan ahuun ointaifi ratutama nocon nomuran unimatiro. <sup>20</sup> Ascafia nocon nomuran non shinanquin isca huai, —Un ahua chaca huamaran, —non ifiaton Diosin nocon nomuran nantifi tapicoian. <sup>21</sup> Ascan uhuun yoramishtichin, nocon nomuran non shinain cuscan non chaca huayamashucaí Diosqui rafipaitiroma. Non aqui ranotamarocon non afu isharapai. <sup>22</sup> Non anori shinainfin Upa Diosin noco yonoi cuscan non aicain. Non ascaino nocoqui Upa Diosin unimatiro. Ascatan non yocai cuscan noco inantiro. <sup>23</sup> Noco isca huani, —Uhuun Facu Jesucristo icoinra huacahuun. Noinanacahuun, —noco huani. <sup>24</sup> Ascan tsoan Upa

Diosin yononi cuscashu afu rafumisi itiro. Upa Diosin ahuun Yoshin Shara nocoqui nichini. Ahuunshon non tapitiro Upa Diosin no fu icacainaiton.

## 4

*Ratomun Diospan Yoshin Shara iyamarai Satanás yoshin chaca non tapitiro*

<sup>1</sup> Uhuun yoramishtichin, ratoran futsafoan mato yoiquin isca, —Un mato Diospan tsain yoiran, —ifacaquin atirifoan paramisifo. Ascaiton ato nicashon man Diosin tsain ointiro. Aton tsain ascacoinyamaiton man tapitiro Diospan Yoshin Sharahuunshon mato yoiama. Diosin ato yonoama. <sup>2</sup> Ascan tsoan yoiquin isca huaquin, —Jesucristo nan Diospan Furun Apa ariashu mai ano oni nocofunucoin ishquin, —ishon mato anori yoiaiton Diospan Yoshin Sharahuunshon mato yoiaiton man tapitiro. <sup>3</sup> Ascan tsoan mato Jesushuunoa yoipaiyamaiton man tapitiro aacai Upa Diospan yorama. Diosihuunshon mato yoitamarocon Jesús noicasmaifohuunoa mato yoi. Man man nicamisi nan cuscara yorafo manifoti foanfafaicanani. Natianri nantifi mai ano icafo ascacani. Yoshin chacapan Jesús noicasmaquin ato yonoa.

<sup>4</sup> Mancai ascaranma uhuun yoramishtichin. Manfin Diospan facufoquin. Diospan Yoshin Shara matofu ipanaca. Atofin Satanás finoncoianquin. Ascacun marifi ahuunshon Jesús noicasmafoti man finoncoianquin. Nanfo Satanás ato iquina. Mato amaquri tapimapaicanani. Ascafiainfoan ato tanatamarocon Jesús tsain man nicaquin finacoian. <sup>5</sup> Nanfoancai icoinra huacanima. Diosin shinain cuscaai shinancanima. Jesús icoinra huamafoan shinainfo cuscan futsafori tapimapaicanani. Ascan icoinra huamafoan nannorisi shinanquin ato nicapaicaquin. <sup>6</sup> Ascashon non tapitiro ratofoanmain Diospan Yoshin Sharahuunshon noco icon yoiyamaraquin yoshin chacahuunshon noco parapaicain. Non tapitiro isca huaquin. Nonfin Diospan yorafoquin. Tsoan noco nicapai afin Diospan yoraquin. Ahuun Yoshin Sharahuunshon noco icon yoi. Ascan tsoan noco nicapaima aacai Diospan yorama. Yoshin chacahuunshon noco parapaitiro.

*Non futsafo noicoinquin tapitirofo non Diosi fu rafumisicoïn*

<sup>7</sup> Uhuun yoramishtichin, Upa Dioshuunshon non yorafo noitiro. Ascashu non noinanoncahuun. Tsoa Diospan facuashu afu rafui. Ascashon futsafo noicointiro. <sup>8</sup> Upa Diosin noimisiquin. Ascan tsoan Dios noiyamaquin onancoiantaima. <sup>9</sup> Upa Diosin nocohuun noiquin noco ismani isca huaquin. Ahuun Furun fusti manifoannatihuunshon nichini ahuunoashu non afu nipanon. <sup>10</sup> Mai ano nichini nocohuunoashu noco nashonon nocon chaca soashoshquin. Nan shinanquin non tapitiro Upa Diosin noco noicoïnmissi. Noiaicoïn futsacai ascaranma. Noncai futsafo noifiai ascatiroma.

<sup>11</sup> Ascan uhuun yora mishtichin, Upa Diosin noco fasi noicoïn norifi non noinanoncahuun. <sup>12</sup> Tsoan Upa Diosin oinyamafiamisishaquin noinanquin non tapitiro no fu ica. Non asca huafafainquin Diosin noco noiai cuscan norifi ahuunshon futsafori non noitiro. <sup>13</sup> Ahuun Yoshin Shara nocoqui nichini. Ascacun non tapitiro no fu ipanaca. Ascarifiai non afu ipanaca. <sup>14</sup> Non oinni cuscan non mato yoi. Upa Diosin Furun nichini manifoannati aton numamisi inon. <sup>15</sup> Ascan tsoan

yoiquin isca huai, —Jesusfin Diospan Furunquin, —huafin Upa Diosin afu ipanacaquin. Ascarifiai Upa Dios fu ipatiroquin.

<sup>16</sup> Ascan noco noicoianton non mumisi. Natianri noco noiyaiton non icoinra huatiro. Diosin nantifihuun noimisiquin. Tsoan afu rafushon futsafori noicoimisi. Ascarifiai Upa Diosin afu rafupacunaca. <sup>17</sup> Non afu rafuashu noco amapaiyai cuscan non noinancointiro. Ascatan non Upaqui nocoaitian non ranotiroma. Noco yoia cuscan non ratutamaron non unimatiro. Nantianri Upa Diosin manifoannati ato yoishquin ratofoanmain chaca huayamaraquin nicasharamisiquin. <sup>18</sup> Noco noiai tapiashucai non ratutiroma. Non noiyamashu, —Upa Diosin ua onaintimairan, —icashu non ratutiro. Tsoan anori shinaincai Diosin noco noiai cuscan aima. Ascafiashu Diosin noco noiai cuscan aquin non ratu potatiro.

<sup>19</sup> Non Upa Diosihuun noiataima afincoin nocohuun noitauni. Noco-huun noiaino norifi natian non Upahuuri noicointiro. <sup>20</sup> Tsoan yoiqui isca huai, —Un Upa Dios noicoiran, —iflashon futsa noicoianma. Aafin chanimisiquin. Futsa oinfiaquin noiyamashocai Diosiri oinyamaquin noicointiro. <sup>21</sup> Upa Diosin noco isca huaqui yononi, —Ua noishon futsafori noicoincahuun, —ishon yoini.

## 5

### *Non Jesús icoinra huacoinquin non ahuunshon futsafo noitiro*

<sup>1</sup> —Jesús Diospan Furun. Diosin catonni nocon Numamisi inon, —tsoan icoinra huaiton Upa Diosin ato funa cuscara imatiro ahuun facufo inonfo. Ascan tsoan Upa Dios noiquin ahuun facuri noitiro. <sup>2</sup> Ascan non Dios noishon noco yonoa cuscan aquin non tapitiro ahuun facufori non noicoi. <sup>3</sup> Upa Diosin noco yoia cuscan aquin non ahuunshon Dios noicointiro. Noco yonoa cuscacai curushma. Upa Dios noiashu noco yonoa cuscan non unimatiro. <sup>4</sup> Non Upa Diosin facushoncai ahuaara chacafoan noco shinanchacamapaiyai cuscan afoancai noco funomatiroma. Diospan Furun Jesucristo icoinra huashu ahuaarafoan noco chaca huamapaiyai cuscan non finontiro. <sup>5</sup> Ahuaara chacafoan noco funomapai Diosin noco imapapai cuscan non anonma. Ascafia Jesucristo Diospan Furun non icoinra huashon ahuunshon na chacafo non finontiro chaca huashquima. Nan icoinra huafoansi finontiro.

<sup>6</sup> Man non tapia Diospan Furun nocofunu ini. Un oinmisi cuscan un mato yoi man icoinra huacoinnon. Nan Jesús unu muran iquimamuaino Upa Diosin yoini isca huaquin, —Naafin uhuun facuquin, —ishon yoini. Jesús naitianri ahuun imi foaino Apa Diosin noco tapimani nanton ahuun Furumun. Ahuun Yoshin Shara iconmisi arifi nocon nomuran yoimisi Jesús Diospan Furun.

<sup>7</sup> Ascan rafu non fustiton nannorisi yoiquin Jesús nocofunu nan Diospan Furuquin. <sup>8</sup> Jesús unu muran iquimanitian yoifain naitian ahuun imi foni cuscan tapimafain Diospan Yoshin Sharari noco yoimisi. Nannori fosi yoiquin rafu non fusti huani. <sup>9</sup> Ascan yorafoan noco ahuaara yoiaiton icoinra huatan Upa Diosin noco yoiai cuscan mima huaquin non icoinra huacointiro. Acai yora cuscarama. Aafin Dioscoinqin. Ascan ahuun Furunhuun noco yoiaiton non icoinra huacointiro. <sup>10</sup> Tsoan Diospan Furun icoinra huashon Apan Diosin ahuun noco yoini

cuscan ahuun nomuran icoindra huatiro. Ascafiaqui ahuun Furunhu-  
 unoa yoimisi cuscan tsoan icoindra huayamashon nanton, —Dios chani-  
 ran, —ishon yorafo shinanmapai.

<sup>11</sup> Isca huaquin Upa Diosin yoini, —Uhuun facuunshon un  
 mato nimapacutiroran, —ishon yoini. <sup>12</sup> Tsoa Furun fu rafuafin  
 nipanacaquin. Ascacia tsoa Furun fu rafuamacai nipatiroma.

*Ahuun unutaqui ato yoisharani*

<sup>13</sup> Jesús Diospan Furun man icoindra huaa. Ascan un mato nanfo  
 cunushoni man nipanaca man tapinon.

<sup>14</sup> Non Upa Dios cufiai cuscan arifi asca huapaiquin noco ashontiro.  
 Ascaino ranotama non Upa cufitiro. Noco ashoain cuscan tapicoi-  
 shquin. <sup>15</sup> Noco nicaiton non tapisharatiro ahuara non yoca cuscan noco  
 ashoaiton.

<sup>16</sup> Ascan tsoan Jesús icoindra huafashon chaca huaiton oinquin non  
 Upa cufishotiro chaca shatunon. Ascan Upa Diosin ato numatiro  
 nipanonfo ato imasharatiro. Ascacia futsafoan ipaitsi Jesús ifoan-  
 coinna ointsa iyofashon chipo potacoian. Chaca shinanfainquin Dios  
 cachiquiri huacoinnafo. Ascarafocai tsoashtan numatiroma nipanon.  
 Naashu omitsispacunacafo muran focani. —Ahuun Upa cufishoc-  
 ahuun, —ishoncai un mato anori yoima. <sup>17</sup> Upa Diosin noco amapaiyai  
 cuscan ayamashu chacacoin itiro. Nan chacafo huaifoan non Upa  
 cufishotiro aton chaca shatunonfo Upa Dios fu ipashquin.

<sup>18</sup> Ascan non tapia ratoranfo Upa Diosin ahuun yoracoinshocai chaca  
 huafafaintiroma. Diospan Furunmun ato cushusharatiro nan yoshin  
 chacanun ato achinonma chaca huamashquin. <sup>19</sup> Man non tapiari non  
 Diospan facufo. Nan icoindra huafoma ahuun facufoma. Manifoannati  
 nan yoshin chaca ato iquina. <sup>20</sup> Diospan Furun oni Dios iconmisiton  
 noco tapimanon. Ahuunoashu non Upa Dios nan iconmisi fu non  
 ipatiro. Furunri Diosicoi no fu ipanaca. Ascan noco nimapacutiroquin.  
<sup>21</sup> Ascano uhuun facufoan, ahuarafa Diosicoi ma shinanyamacahuun.  
 Nanti.

Juan

## Juanpan Afanan Icoinra Huafo Cunushoni

### *Juanpan ato yoisharani*

<sup>1-2</sup> Unquian, Juan, un fari ichapa icoinra huafo un aton cushumisi. Un mato cunu fomai man tapinon. Tsain icon non nicamisi cuscan nocon nomuran non nanupacunaca. Ascan nanno ichananfo Upa Diosin mato catonni urifi matohuun noicoin. Urus fustima. Jesús icoinra huaa futsanfori matohuun noicoin. <sup>3</sup>Upa Diosin Furun Jesucristo futan iconquin nocohuun noi. Ascan noco cashman shara huafain nocohuun ramapaicain nocon nomuran shinanmashara nocon nomuran non unimacoinon.

### *Upa Diosin noco yononi non nantifi noicoin*

<sup>4</sup>Upa Diosin noco yononi ahuun tsain iconcain tanasharanonfo. Atirifi Upan yononi cuscan aiton nicai un fasi unimai. <sup>5</sup>Uhuun yoramishtichin, na un mato cunushonaicai tsain funama. Man Jesús icoinra huaquin tau huani cuscan man man nicamisi. Nocon Ifoan noco yoimisi cuscan un afanan mato yoi non noinanoncahuun. <sup>6</sup>Noco yononi cuscan non ahuun noicain non futsafohuunri noicoinnon. Man tau huaquin nicamisi cuscan noco yononi isca huaquin, —Shafatifi non noinanoncahuun, —ishon yoini.

### *Ratofomain Jesucristo icoinra huai*

<sup>7</sup>Ascan tsain futsari mato yoi. Fuparapaimitsamisi manifoannati pashcanain futsucani, —Jesucristo nan Diospan Furun apa ariashu mai ano oni nocofunucoin ishquin, —ishoncai yoipaicanima. Ascarafoan mato fuparapaimisifo Cristo noicasmafain icafo. <sup>8</sup>¡Oinfain! Atohuun caoyamacahuun. Man funotiroquin. Upa Dios yonoshofiaqui man atohuun caohuaino mato inanpaiyai cuscan man funotiroquin. Ato nicayamacahuun nantifi Upa mato inanpaiyai cuscan fishcaquin.

<sup>9</sup>Tsoan Cristo yoini cuscan atama futsa tanashu acai Diospan yorama. Ascan Cristo yosini cuscan nan fusti tanacoin Apa Diosin yafi Furun fu rafui. <sup>10</sup>Tsoan Cristo tsain cayacafico yosiyamaiton maton pushu muran iquimayamacahuun. Aqui unimayamacahuun. <sup>11</sup>Maton pushu muran iquishon futsafori amaquiri yosiaino matohuunri nutiroquin.

### *Ahuun tsain unutaqui*

<sup>12</sup>Un mato paratama cunushopaiifiain unfincoin matoqui nocopai non yoinonanon. Ascan non natian unimafiai un matoqui nocoaino fasi mimacai non unimanantantiro.

<sup>13</sup>Nan pushu futsano ichananfo Upa Diosin atori catonni ahuun facufo inonfo. Nanfoanri mato yoisharapaicani. Nanti.

Juan

## Juanpan Gayo Cunushoni

### *Juanpan Gayo tsain shara yoini*

<sup>1</sup> Uhuun yorashtan Gayon, unquian, Juan, un fari ichapa icoinra huafo un ato cushupaoni. Un mia cunu fomai min tapinon. Un mia noicoïn.

<sup>2</sup> Uhuun yorashtan un mia Upa Dios cufishona min nomuran shinan-sharafain min muma shara ipainon. Min isharapainon. <sup>3</sup> No futan Jesús icoinra huaa futsafo mia anoashu uqui nocofo. Nocoshon mihuunoa ua yoiafo, —Gayon nocon Ifo tanacoinfafaini. Shafatifi nocon Ifoan tsain icon yoini cuscan nannori imisiran, —ishon mihuunoa ua yoiafo. Nicaï uhuun nomuran fasi unimai. <sup>4</sup> Uhuun facufoan Jesús tanacoïanton nicaï un unimacoinni. Ahua futsancaï ua unimamaquin ascacai huatiroma.

<sup>5</sup> Uhuun yorashtan, un nica min icoinra huaa futsafo oinyamafiamisishaquin min ato cushufafaini. Ato cushuquin min unumisima. <sup>6</sup> —Gayo noco noisharamisiran, —ishon mihuunoa ichananshon yoiafo. ¡Aïcho! Upa Diosin ato shara huapayai cuscan mirifi min ato asca huafin sharacai itiroquin. Nan yopaïfo cuscan min ato inantiro fosharatanonfo.

### *Nan paramisifo*

<sup>7</sup> Nanfo foanscamisifo Jesushuunoa yoïfoanfafaïncaï. A ahua ra yopaï fiaquicaï icoinra huafoma yocanifoma. <sup>8</sup> Jesús ahun tsain iconquin yoïmisifo. Ascacun non ato futan ashquin.

<sup>9</sup> Min icoinra huafo fu ichanan ano un mato cunu fomayamua. Ascashiashon Diótrefes ua nicacasmaquin. Aafi icoinra huafo iquïnpaï. Fasi cacapaimisi. <sup>10</sup> Matoqui nocoshon man ichanan muranshon noco chaca huamisi cuscan un mato tapimashquin. Noco huunoa tsain chacari yoïfain chaniri yoïfain. Nocon yorafori matoqui nocofiaçun ato iquïmapaima Diosin tsain mato yoïnonfo. Futsafoan ato iquïmapaïfaiaton atorifi pota. Afañan atofu ichananonfoma.

<sup>11</sup> Uhuun yorashtan, Diótrefes chaca huamisi cuscan ahun caotamarocon ahua ra shara fustisi min huapaitiro. Tsoan shara huamisi nan Diospan yora. Ascan tsoan chaca huamisi Diosquiri shinanmisima.

<sup>12</sup> —Demetrio nocofunu shararan, —ishon nantifi yorafoan yoiafo. Aafin iconmisiquin. Norifi ahunoa non yoisharamisi. Man min tapia non icon yoïmisi.

### *Ahun tsain unutani*

<sup>13-14</sup> Un mia paratama yoïpaïfiaquin un afañan mia cunushotamarocon un miqúi nocopaï non yoïnonantananon.

<sup>15</sup> Min nomuran unimanon. Nocon yorafoan nunoshon mia yoisharapaïcaï. Min icanoa uhuun yorafo ua yoïshopacuhuun. Nanti.

Juan



## Judaspan Icoinra Huafo Cunushoni

### *Judaspan ato tsain shara fomani*

<sup>1</sup> Uhuun yoramishtichin unquian Judas un mato cunu fomai. Unfin Jesucristo ahuun yonomatiquin. Un Santiago ahuun ushto. Nocon Upa Diosin matohuun noiquin mato catonni. Ascan nocon Ifo Jesucristo mato cushufafaini. <sup>2</sup> Nocon Ifoan matohuun ramapaicain maton nomuran unimamanon. Ascatari matohuun noicoinnon. Mato mima huaquin asca huanon.

### *Nan chanimisifo chaca hua cuscan Judas ato asca hua*

<sup>3</sup> Uhuun yoramishtichin nocon Ifoan noco nashoni cuscan yafi nantianri noco imapaiyai cuscan non chipo afu ishquiai cuscahuunoari fasi nanfohuunoa mato cunushopaifiai mun nica man tsain futsa yopacoin. Ascacun un mato cunushoni man Jesucristo icoinra huaí cuscan man shinanfafainon. Nannori Upa Diosin Furuhuunshon noco tapimani. Furunhuunoa noco tapimani cuscan nan fusti non yopai tanasharashquin. Ascan tsain futsa mato amaquri yosipaiyaifoan aton tsain nicatamarocnon nan mato tapimamisi cuscan nan fusti icoinra huacahuun.

<sup>4</sup> Futsafoan mato muran nocoli tau cashon man tapicama mato fomanfo chaca huamisificashon. Ascashu nanfocai Diospan yorama. A furicai imisifoma non chaca huamisi cuscan non yoiaiton Upa Diosin Furunhuunshon noco soashona non afu ipanon. Nan fusti non yopai isharashquin. Ascafia nanfoan fasi amaquri chacacoin mato tapimapaicani. Isca huaquin mato yoipai, —Man Jesús icoinra huashon man apaiyai cuscan man atiroqui. Maton ahuinma fu icain ainfofori aton funuma fu itirofo. Ascashon ahuara chaca futsafo man huapaiyai cuscan man atiro. Non asca huaitocai Dios noco onaintimaimaran, —ishon fasi amaquri mato yosipaicani. Nocon Ifo Jesucristo fusti nicacasmacani. Nan cuscarafihuunoa Diospan tsain cunuyoni. Ato onaintimaicoinshquin.

### *Diosin chaca huaifo onaintimai*

<sup>5</sup> Un natian mato cunushoni cuscan man man tapiyofanicun un afanan mato yoi futsai nan chacafihuunoa man tapinon. Nocon Ifoan nantifi nocon shunifo Egipto anoshon caimafanicun atirifiton icoinra huayamaifoan nan icoinra huaformati chipo namaqui cuyoi. <sup>6</sup> Ointiaquimayamacahuun Diospan oinmati afu nai muran icafori tau cani isharacoinyopaonifo. Ascashu Diosin ato yonoai cuscan acoinyopaonifo. Ascafiaшон chipo Diosimaqui ipanifo. Ascacun Upa Diosin ato faquishihuan muran munushushon ato manamayoi. Ascashon chipo nantifi icoinra huaforma onaintimaitian ichanan huashon omitsiscapanacafo muran ato potashquin. <sup>7</sup> Diospan oinmati a fu nai muran icafoan chaca huapaonifo cuscarí Sodoma yafi Gomorra chaimashon nanscara chaca huapaonifo. Nocofunufon aton ahuinma chotaifoanno. Ainfofoanri aton funumafo chotamapaonifo. Noco-funufori afi ranan chotananpaiyaiifoanno ainfon tanatama. Ascacani chacanisi tapipaonifo. Ascacun atohuunshon non tapitiro nan

chaca huamisifo omitsiscapanacafo muran focani. Nanhuunoari ointi-aquimayamacahuun.

<sup>8</sup> Nanscarifiai nan chanimisifoan chaca fustisi huafafainceni. Ascanashu futsafo fu chaca huatananmisi icain niaifofori nicacasmafain. Diospan nai oinmatifori roamisifo. <sup>9</sup> Ascashon nai muran icafo Diospan oinmati niaifo patashari ahuun anu Miguel nantocai chaca huaifo cuscan asca huamisima. Ascashu Satanás fu fochishmanantananni Moisés naitian Satanás Miguel nitun huapaini Moisés ahuun caya mai huanonma. Ascafiacai Miguelcai nan Satanás roanima. Roatamarocon yoini isca huaquin, —Nocon Ifoan mia asca huairan, —ishon yoini. <sup>10</sup> Ascafia nan chanimisifoan ahuarafa tapiyamacun nanfohuunoa atoqui tsain chaca huamisifo. Ascatari afi apaiyai cuscan fusti huafafainmisifo. Yoinaton shinansharatiroma cuscan. Ascacashu afiri chaca huamuafokuin omitsiscapashcaquin.

<sup>11</sup> ¡Ai timafin! Fasi omitsiscapashcaquin. Caín chipocu rutuni. Nanfori nanscarafo. Balaam cuscarafori. Nan Balaam pui fusti shinanquin chaca huani. Nanfoanri nansca huamisifo. Coré cuscarari. Nan Coré ahuun niaifo Moisés nicacasmapaoni. Ascacufin Diosin nan nananiquin arifi nicacasmacashu nai omitsiscapashcaquin.

<sup>12</sup> Ascan manfin noinanshu ichananmisiquin nocon Ifohuunoa shinanfain pishcaquin. Nanfori ranotama matofu ichananfiacashon nocon Ifohuunooacai shinancanima. Futsafokuunoiricai shinantama afcairocon shinanmufustiafo, —Non mato yosiquin mato cushusharatiroman, —ifiaquin tsoa ahua yosisharamisifoma.

Nan coin oi maisinincal mai muto muchana huatiroma fanafo foaisharanon. Mai mutoano coin choshtacuashu oi fuaino fanafo foaimasharati. Nanscarifiai nanfo coin oi maisi cuscarafu. Nan cushumisi ointsafiacashocai nocon Ifohuunoa tsoacai tapiafoma. Fana ahuun tapofo ya tsucucain tsasiashu fimioa itiro. Man nai rafua cuscara. Nanscarifiai nan chanimisifoancai tsoan Jesús icoinra huamatiroma nipanonfo.

<sup>13</sup> Ascashu unuhuan fuchomanhuan cuscarafu ahua sharaçai mainfin ano potatiroma. Fuchoquin facosh cusmun cutsispotiro. Ascashu chipo fuarasiqui futsutiro. Nanscarifiai nan chanimisifoancai ahua shara huashotiroma. Fishi pacui chashapacucahuatan faquish acunchatuati. Ascaitocai non afanan oinshtatiroma. Nanscarifiai nan chanimisifoan Dios cachiquiri huacanashu faquishihuan muran focani. Diosin nanscarafo chipo onaintimacoinshquin omitsiscapanonfo.

<sup>14</sup> Ascan Adán nan Diosin onihuaquin tau huani. Anoashu siete facu pacuafu. Ascano ahuun unutani ahuun anu Enoc ini. Nan Enoc nan chanimisifokuunoa inonpacoai cuscan yoiquin isca huani, —¡Oincapon! Nocon Ifo oi. Nan afu nai muran icasharafu ichapacoin afu fucani. Tsoancai ato tanan huatiroma. Nantian nantifi yorafu yoipacushquin niyoshon man amisi cuscan. <sup>15</sup> Nantifi manfoti anofoan noco Ifoqui fucani. Ratofomain ahuun yorafu afu ipanacafo iyamarai ratofomain icoinra huayamashu omitsiscapanacafo muran focaniquin. Nan afu rafumisifomacai ahuun yorafoma. Ascan nan chaca huafoti ato yoifain niyoano Dios maisi ipaoni cuscan yoifain nantifi nan tsain chaca aqui huamisifori ato yoishquin.

<sup>16</sup> Nanfoanri tsain chipumisifo icain futsahuun ahua chaca nuutapaimisifo. Nan chaca huapaiyai cuscan fusti tanafafainmisi icain afiri yoimusharamisifo. Ascacashu cacapaimisifo icain futsahuunoa tsain

shara yoiamafiacquín futsa cuncun huapaimisifo, “Ua shara huanon,” ato huamapairan, —ishon Enoc huani.

*Nan icoinra huafo ato yoini isharononfo*

<sup>17</sup> Asca huafiafoan nocon Ifo Jesucristo fu rafumisifoan mato yoinifo cuscan ointaquimayamacahuun. <sup>18</sup> Ascan mato yoini isca huaquin, — Jesús oti chaima icoinra huamafoan mato cashu mutsama huapaicani. Nanfoan tanatama afi chaca huapaiyaifo cuscan fusti tanafafaincaniran, —ishon yoinifo. <sup>19</sup> Nan cuscara nocofunufanoan mato pashcanan huapaimisifo. Ahuara chacafo fusti fuchipaicaquin. Ascarafo fucai Diospan Yoshin Shara icama.

<sup>20</sup> Asca chaca huafiacanashu. Uhuun yoramishtichin man Jesús icoinra huaa cuscan Upa Diosin mato shinanmana. Ascacun ahuunshon finacaiquin tapicahuun man icoinra huahuunoashu nan cuscara shara ishcaquin. Diospan Yoshin Sharahuunshon Upa Dios cuficahuun mato imapaiyai cuscan tapishcaquin. <sup>21</sup> Jesús tanasharacahuun Upa Diosin mato noicoiain cuscan man mufafaintiro. Nocon Ifo Jesucristo nocohuun ramapaiquin non naafiacun noco nimapacuaino non afu ipanon. Ascacun funaquima manasharacahuun afu ipashcaquin.

<sup>22</sup> Futsafoan isca huaquin shinantirofo, —Jesús ua nimapacutiro icon iyamarai iconmaran, —ishon. Nanscarafohuun ramapaicahuun. <sup>23</sup> Ascan futsafohuunoa un mato yoinon isca huaquin. Ahuara non coapaiyamafiaino chi muran pacuaiton non nushfiriscatiro cononma. Nanscarifi aqui futsan chaca huafafainmisi cuscan shatuataicuma numariscahuun. Ascashon ato yoicahuun aton chaca arifi shatuyamashu chi muran iquinonfoma. Ascan futsafoanri fasi chacacoin huamisifo. Nanscarafohuunri ramapaicahuun. Ascafia oinfain marifi man ato cuscara chaca huamisi iishcaquima. Atohuun ramapaitan nan ahuarashta chaca huaifo cuscan noicasmacoincahuun.

*Ahuun unutaqui Dioshuunoa yoisharani*

<sup>24</sup> Ascan uhuun tsain unutaqui nocon Dioshuunoa un mato yoisharapai. Nanton mato cushusharatiro man chaca huanonma. Unimacoincain ahuun ointaifi mato imasharatiro. Nannoshocai tsoan matohuun ahua chaca nuutatiroma. Ascashu unimacoin man aqui nocoshquin. Nantofin mato nansca shara huashotiroquin. <sup>25</sup> Nan fusti noco Dios. Nantonrifi nocon Ifo Jesucristohuunshon noco numani. Ascashon nantifi finoncoian tsoa futsacai a cuscarama. Arusu fusti niaifocoincain manifoti iquina. Ascashon ahuaamishti huatiroquin. Ahuashta oni huataima nanscaracoin iyopaoni. Natian ishquiai cuscari. Nansca huapanaca. Nanscasi ipanon. Amen. Nanti.

Judas

## Jesucriston Juan Oinmani Cuscan (Apocalipsis)

*Ahuara ahuuscaran ashquiai cuscan Jesucriston Juan tapimani*

<sup>1</sup> Uhuun yoramishtichin natian un mato cunu fomai man tapinon. Unquian Juan un mato cunu fomai. Upa Diosin Jesucristo yonoa samamashta ahuara ahuuscaran huariscashquiai cuscan ahuun yorafo tapimashquin. Ascacun iquisi ua oinmayoa. Jesús ahuun oinmati nan nai muran ica uqui nichian. Upa Diosin ahuun yorafo tapimapaiyai cuscan ua tapimayoa. Ascacun nan ua tapimana cuscan un mato yoi. <sup>2</sup> Upa Diosin Furun Jesucristohuunoa yoia cuscan nan iconcoin. Ascashon nan ua yoia cuscan ua oinmana cuscan huafain nantifi un cunua. <sup>3</sup> Ascafia un cunua cuscan icataima. Inon pacoi cuscan iquisi un mato cunushona. Un cunua cuscan futsafo yoi arifi unimaino nan nicaifori iconra huafain nanfori unimashcani. Un mato cunushonai cuscan samamashta iishquin.

*Juanpan Diospan yorafo siete mai futsafo aria ichananmisi ato cunu fomani*

<sup>4-5</sup> Ascan Asia mai ano man icati pushurasi siete nan Jesús iconra huafo ichananmisifo un mato cunu fomai cuscan nicasharacahuun. Nocon Upa Diosin niyopaonishaquin natianrifi nicain nipanaca. Ahuun Yoshin Sharari afu ipamisi. Nan Upa Diosin yafi ahuun Yoshin Sharapan non Furun Jesucriston matohuun ramapaiyaino maton nomuran mato shinansharamapainonfo. Ahuaton maton nomuran fucash huanonma. Nocon Ifo Jesucriston Diospan tsain noco yoimisi cuscan non iconra huatiro. Nan Diospan Facucoinfiacun rutunifo. Rutushon mai huafiafo Apa Diosin funimani afu ipashquin. Tsoa futsacai ascayomisima. Ascan Apafu ishon nantifi niaifofu maifoti anofo ato iquishquin. Nanton noco noicoin. Ascashu ahuun imi focain noco nashoni ahuara chaca afanan nocon ifo inonma.

<sup>6</sup> Ascacun ahuara chaca nocon ifo itamarocon ahuunoashu Apa Diosin ahuun yorafo man non ica. Ascashon noco yonomapaiyai cuscan non anon. Ascan non ahuun yorashon futsafori non Upa Dios cufishotiro. Nanscarafo nocon Ifo Jesucriston man noco ima. Ascacun nantifi yorafoan ahuunshon isca huaquin yoipacupainonfo, —¡Aicho! Tsoa futsacai Jesús cuscara sharama. Arus fusti nocon Ifo ipanaca. Arus fustiri nantifi yorafo ato iquipacunaca, —ishon yoipacupainonfo. ¡Amen!

<sup>7</sup> “Shinancapon. Nocon Ifo Jesús cooin camaqui afanan oaiton nantifi yorafo niafo futan namisifoanri oinshquicani. Nan mastamisifoanri oinshquin.

Ascashu nocoaiton nantifi manifestofain ratucaquin yoishcani isca huaquin,

‘¡Ohuashta! Diospan Furun Jesús non chaca huamishshaquin non aqui ratucoinran,’ ishon yoishquicani.

Nanscafin aashquiquin. ¡Amen!”

<sup>8</sup> Jesús yoiquin isca huani, —Unfin ahuara oniataima iyopaoniquin. Urifi un ipamisi. Ahuutiamain nocon mai cuyoicai urus fusti un ato

yoitiro. Unfin ahuamamishti huatiroquin. Un niyopaoni cuscan un ipanacaran, —ishon nocon Ifoan yoini.

*Nocon Ifo Jesucristo afoicin Juan oinmani*

<sup>9</sup> Unquian Juan un matofu Jesús ahuun yora. Ascacun man uhuun yorafo. Nantifi non icoinra huafo noco iquinashu no fu rafupacunaca. Man Jesushuunoashu omitsiscafiaquin man tunumisi. Man mumisi cuscan urifi un mumisiquin. Un Diosin tsain yoifain Jesushuunoari ato yoimisi. Ascacun aton niaifofan ranushumuafu yonoa ua achicashon ua mai futsan ahuun anu Patmos ano ua nichinifo. Nan mai unu toomanhuan ano. <sup>10</sup> Nanno domingo futsaino Diosin Yoshin Sharanpan ua iquifain nan tapimapaiyai cuscan ua tapimashquin. Ascashon ahuara namapan cuscarahuunshon man ua ismacoian. Ascaiton uacchiorinoa tsain achacoin un nicariscatana. Nan manuti nicatsa un nica.

<sup>11</sup> Ascashon ua isca huaquin yoia, —Min oiain cuscacoin futsafo cunushohuun. Nan cunu Jesús icoinra huafo ichananmisifoti ato fomahuu. Nan ichananmisifo Efeso anoafu fomafain Esmirna anoafu fomafain Pérgamo anoafu fomafain Tiatira anoafu fomafain Sardis anoafu fomafain Filadelfia anoafu fomafain Laodicea anoafu min oiain cuscacoin cunushon ato fomahuu, —ishon ua yoia.

<sup>12</sup> Tsoamain ufu tsainquicai nicatan ifiacucahua oinpaquin un oian lamparina cuscara otati siete oro ointsa un oian. <sup>13</sup> Nan otafo nushmancayan nocofunu ointsa nanno nia. Ahuun sahuuti ofan ofaicai sahuufain ahuun nanushumuti putacoin ahuun shochi ano nuua oshin oro ointsa faca facaitsa sahuua. <sup>14</sup> Ahuun foo oshopacoin yoa rama furoa ointsa. Ahuun furorifi chi shahuacai ointsa. Ascan faquishfiano chi uruaino non oinsharatiro. Nanscarifiai yorafoan fomanpaquin ahuara onupaifiaitoti Jesús onatiro. <sup>15</sup> Ahuun taurifi cuno faca facaitsan ointsa. Ahuun oi uhuapacoin shushan tuporo iqui nicatsa. <sup>16</sup> Ahuun mucu mumihuuri fishi ointsa siete tsoma. Ahuun ashfan muranri nopu ocuma rafu cunocoin asuonmua ointsa. Ahuun fusorifi fari chashaquin finai ointsa. Nanscara nan nocofunu un oian.

<sup>17</sup> Nan ointani un ananman pacua nan naa shinantsai. Ascaiton ahuun mucu mumihuurishon manmainyanan ua yoiquin isca huua, —Ratuyamahuu. Ahuara oniataima un iyopaoni. Nanscarifiai un ipanaca. Uncai unupacunacama. <sup>18</sup> Unfi ipamisiquin. Mun nafianishaquin un afanan funini. Ascashu un nipanaca. Yorafo naitian urus fusti un ato numatiro. Un shafi cuscara aya. Un fupotiro omitsiscapanacafo muran fotamarocon Upa Dios icari fononfo. Ascafia ascayamaifon un fupotiro omitsiscapanacafo muran fononfo. Unfin nipanacaquin.

<sup>19</sup> Ascacufin rama min oiain cuscan huafain chiporifi un mia oinmashquiain cuscan cunuhuu. <sup>20</sup> Ascashon natian min oian cuscan un mia yoi min tapinon. Nan fishi siete non nan lamparina siete oro ointsa nanfohuunoa un mia tapimanon. Nan fishifo un tsoma nanfofin nan ichananfo Diosin tsain ato tapimamisi cuscarafuquin. Ascan nan lamparinafo oro ointsafo nanfofin ichananti pushu ano Jesús icoinra huafo cuscarafuquin, —ishon Jesús ua yoia. Nan siete ichananti pushu ano icoinra huafo ato tsain shara fomani.

## 2

*Jesús Efeso ano icoinra huafo ichananti pushu murannoa ato yoini cuscan*

<sup>1</sup> Ascatan Jesús ua yoiqui isca huaquin,

—Ua icoinra huafo Efeso anoa aton Diosin tsain yoimisi un yoipaiyai cuscan ua cunushoquin isca huai. “Unquian maton Ifo Jesús un nantifi Uhuun Upa Diosin tsain yoimisifo un atofu icacaimisi ato cushusharashquin. Ascacun un mato yoipaiyai cuscan ua nicasharacahuun. <sup>2</sup> Man imisi cuscan mun tapia. Man manfin uhuunoashu fasi yonosharamisiquin. Ahuara ahuuscarafaino man tunucoinmisi. Yora chaca huamisifo fu man rafucasmamisi. Ascan ratoran futsan yoimisi isca huaquin, ‘Cristo ua nichian. Ascacun un mato yosinon,’ ishon mato yoiaifoan. Man yoimisi isca huaquin, ‘Non tapinon. Aton tsain non nicayonon iconmainquin,’ man huamisi. Ascashon ato nicacaquin man ato onanmisi uhuun tsain mato yositama aafin chaniaifoan.

<sup>3</sup> “Ascan uhuunoashu omitsiscafiaquin man tunucoinmisi. Mancai ua tanaquin unupaimisima. <sup>4</sup> Man asca sharafiamisi un tsain futsan mato yoisharapai. Man fasi ua noiquin tauhuani cuscacai natian man ua noiquin asca huaima. Man mutoi futsui.

<sup>5</sup> “Man ua noiquin tau huani cuscan shinacahuun. Nanscacoïn huaquin ua noicahuun. Man noinain tauni cuscan afanan noinancoïncahuun. Chii tsoan tanama samamashta nocatiro. Nanscarifiai marifi man chi nocacuana cuscara. Ascashon man ua tanasharayamaiton oinquin tsoan afanan mato tanaima. Ascashu man ichanainno afanan tsoa matofu ichanainma. Man chaca huai cuscan shatupaiyamafain uquiri man nasopaiyamaino un matoqui oshon un mato shatumatiro. Man afanan uhuun tsainyoimisi inonma. Man ascaitocai tsoan afanan matohuunshon ua tanapaishquima. <sup>6</sup> Asca huafiaquin ahuara futsan man shara huamisi. Nan Nicolaítafoan amaquiri yosiaifoan atirifiton mato muranshon tanafo nanfoan chaca huamisi cuscan un noicasma. Un nan chaca noicasma cuscan marifi man noicasmal.

<sup>7</sup> “Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun. Ascan Satanás mato chaca huamapaimisi. Ascfia tsoan uhuun curushhuunshon Satanás yafi ahuara chacafori finoncoian naantofin ua cachiquiri huatamarocon ua tanasharacoianquin. Naanfin Upa Dios icano un iquimashquiquin ufu ipasharanon,” —ishon Jesús nan icoinra huafo Efeso anoafo yoia.

*Jesús Esmirna ano icoinra huafo ichananti pushu murannoafu ato yoini cuscan*

<sup>8</sup> Ascatan afanan Jesús ua yoiqui isca huaa,

—Ua icoinra huafo Esmirna anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Ahuara oniataima un iyopaoni. Urifi ipanaca. Uncai unupacunacama. Mun nafiacun Upa Diosin ua funimani. Ascashucaí un afanan napanacama. Unrocon nipanaca. Ascacun un mato yoiqui isca huai.

<sup>9</sup> “Man omitsiscái cuscan mun tapia. Mun tapiari man ahuuoma. Man ahuuomafia un matofu icano man ua cuscara shara itiro. Ascacun un maton nomuran fupuashotiro man unimanon. Uricai mato potapacunacama. Ascano uhuun Upa Diosin ica ari nantifi un aya cuscan nanfori matona iishquin. Ascacufin man ahuuomafu ointsafia manfin ichapayaquin. Ascfia mun tapia futsafo Judio cainflanishaquin ua icoinra huafoma. Ascacufin nanfocai Diospan yorafoma. Ascashon matohuunoa tsain chaca yoimisifo. ‘Norifi non Diosin tanamisiran,’

ishon yoifiafocai iconma. Ascashu nanfoan Satanás tanacanashu ahuun yoracoinfo ica.

<sup>10</sup> “Ascano inon pacoai cuscan un mato yoiyonon. Satanás atirifi mato cunu muran iquimashquin manmain ua cachiquiri huamainquin tapipai. Ascacun ahuutiaran man omitsiscashquiain cuscan ratuyamacahuun. Ua cachiquiri huatamarocon isca huaquin shinacahuun, ‘Ua rutufiaifoannocai un ratuima. Ua chaca huafiainfoanri un tunucointiro. Uncai uhuun Ifo potapacunacama. Ascacun uhuun Ifo un tanaqui finacoinfafaini,’ ascashu man naiton un mato nimapacunaca man ufu ipanon.

<sup>11</sup> “Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun. Ascan tsoan omitsiscafiaquin ua cachiquiri huayamai nantofin Satanás uhuunshon finoncoianquin. Ascatan naashucái omitsiscapanacafu muran canacamaran,” —ishon Jesús nan icoinra huafo Esmirna anoafu yoia.

*Jesús Pérgamo anoafu nan icoinra huafo ichananti pushu murannoafu ato yoini cuscan*

<sup>12</sup> Ascatan afanan Jesús ua yoiqui isca huaa,

—Ua icoinra huafo Pérgamo anoafu aton Diosin tsain yoimisi un yoipaiyai cuscan ua cunushoquin isca huai, “Unquian un maton Ifo Jesús, un mato yoisharapai man tapinon. Uhuun tsain nan nopusocuma rafu cunocoin cuscara. Ascashon uhuun tsainmansi uhuun yorafo cushusharafain nan ua noicasmamisifo un ato onaintimatiro. <sup>13</sup> Mun tapia man pushurasi Pérgamo ano ica. Nannoshori Satanás yorafo iquimisi. Ascafiaino rafitama man ua tanasharamisi. ‘Jesús uhuun Iforan,’ man ato huamisi. Nannori ua tanamisi futsan ahuun anu Antipas nanton uhuunoa ato yoifafainmisi. Ascacun nan man rutuafo. Nanscara man tapiflashocai man ua potama. Manricai ratuima. Ascashon maton nomuran man shinanquin isca huaa, ‘Noco rutufiaifoannocai nocon Ifo Jesús non icoinra huaquin shatuimaran,’ ishon man shinanmisi.

<sup>14-15</sup> “Nanscara shara. Ascafia ahuaa fustirasi man chaca huamisi cuscan un mato yoimisi man afanan asca huanonma. Shinancapon. Ahuscashomain Israelifo non chaca huamatiroquin ishon niaifo Balac nan nocofunu Balaam yocani. Ascaiton Balaam nan yosini. Ascacun nan Balac Israelifo chaca huamani aton ahuinma chotamafain ainfori aton funumafuya ato imani. Ascashon nan ua icoinra huamafoan ahuaa futsafo rami huacashon nocon Diosiran ishon tushu inanmisifo. Nan tushu Israelifo atofu ichanancashon nan piinifo. Nanscarifiaquin matofu ichananmisi atirifi nan Balaam chaca yosini cuscan nanfoanri natian nansca huacani.

<sup>16</sup> “Ascacun nan Balaam ato chaca huamani cuscan marifi afanan ascayamacahuun. Ascan ratoranfoan chaca shatuyamacaiyaino un atoqui samamashta nocoriscashquin. Ascashon uhuun tsainmansi un ato onaintimashqui. Uhuun tsain nan nopusocoin cuscara.

<sup>17</sup> “Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun. Ascafia Satanás mato chaca huamapai. Tsoan ua cachiquiri huatama uhuunshon Satanás finoncoian nantonfin ua tanasharacoianquin. Ascacun un cushusharashquin. Un Israelifoan aton shunifo fariña cuscara fata shara nai muranshon shafatifi un ato niriashopaoni. Nan anuquin manánran

huapaonifo. Ascan tsoancai tapipaonima ahuuscashomain un ato niriashoicain. Nanscarifi aqui un nan manán futsa cuscara un ato inanshquin nancai tsoan ointiroma. Nanfohuunshon un ato shara huapanaca. Ascatare tsoan chaca huatama ua tanafafainnaiton un ato toquiri osho sharashtacoin inanshquin. Tsoa futsacai nan anu onantiroma. Ascan nan toquiri fiafin ufu ipasharatiroquin,” —ishon Jesús nan icoinra huafo Pérgamo anoafu yoia.

*Jesús Tiatira anoa nan icoinra huafo ichananti pushu murannoafu ato yoini cuscan*

<sup>18</sup> Ascatan afanan Jesús ua yoiqui isca huaa,

—Ua icoinra huafo Tiatira anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Uhuun furo chii shahuacai cuscara. Ascacun un mato onancoian. Uhuun tau nan cuno façacitsan cuscara. Ascacun un mato yoiquin isca huai. <sup>19</sup> Mun tapifain mun onancoian man shara huamisi cuscan. Ascashu man noinancoian. Ua icoinra huafain man ua tanacoinmisi. Uhuunshori futsafo man shara huamisi. Ascatan omitsiscafiquiri uhuunshon man tunucoimisi. Ascacufin man ua icoinra huaquin tau huanitian man futsafo shara huamisi. Ascafia natiancaifin mima huaquin man ato shara huafafainiquin.

<sup>20</sup> “Ascashon man ato shara huamisi. Ascafia ahuaa futsan man chaca huamisi cuscan un mato yoi man afanan asca huanonma. Nan ainfon Jezabel ipaoni cuscara matofu ichananmisiton yoimisi isca huaquin, ‘Unfi Diosin tsain mato yoitiroquin,’ ishon mato yoifiamisi nantocai uhuun tsaincoim yoimisima. Aafin chanimisi. Ascashu nan ainfo fasi chacacoin. Mato amaquiri yosimisi. Ascafiaitocai ahuun tsain man shatumamisima. Ascashon ua yonoshomisifo paramisi aton ahuinma chotanonfo. Nanscarifi huaquin ainfofo aton funuma chotamamisi. Ascashon mato yoimisi isca huaquin, ‘Ahuara futsa non rami huanon nocon dios inon. Nan non tushu inanon. Ascano marifi man atofu ichananshon nan tushu man pitiroran,’ ishon nan ainfoan mato chaca yoimisi.

<sup>21</sup> “Ascafia nan ainfoan chaca huamisi cuscan un yoifafainmisi uamain icoinra huashon ahuun chaca shatuicai. Ascafiaicai ahuun chaca shatupaimisima. <sup>22</sup> Ascacufin un isininmaquin finacoinquin racashu omitsiscanon. Ascano ratoran futsafo a cuscara furomacoinshon aton chaca shatuyamaiffoan nanforifi un ato onaintimaquin finacoin omitsiscanonfo.

<sup>23</sup> “Ascano ahuun tanamisifori un namaquin cuyoshquin. Un asca huaiton nantifi ua icoinra huafo maifoti anoafon tapitirofo un nantifi yorafo onancoian. Ascashon aton nomuran shinainfo cuscan un onancoian. Tsoancai ahuashta ua fomantiroma. Ufimain un nantifi onancoincun. Ascacufin nan shara huamisi urifi un ato shara huashquin. Ascan ratoran futsan chaca huamisi nanrifi un onaintimashqui.

<sup>24</sup> “Uhuun yoramishti Tiatira anoafon mancai atirifiton nan ainfoan mato chaca yosipaiyai cuscan man tanamisima. Ascan nan ainfoan ahuun nomuran Satanás shinanchacamanai cuscan ahuun tanamisifo fustisi ato tapimamisi. Ascafia mancai anori tapipaimisima. Ascacun un mato yoisharapai. Ahuaa futsacai un mato yonoima. <sup>25</sup> Ascacun uhuunshon man tapimisi cuscan nanfohuun ointiaquimayamacahuun. Un mato ihuiyoaitian nanfo cachiquiri huapayamacahuun.



<sup>26</sup> “Tsoan Satanás finoncoinfain nan ainfoan chaca yosiai cuscan tanatama nan naitian uhuun tsain tanasharacoianshu unfu ipashquin. Ascan naanfin niaifo patashari itiroquin. Nan maifoti anoafoto ato iquishquin <sup>27</sup> Ascano Upa Diosin tsain uhuunoa cununi isca huaquin, ‘Cristo maifoti anoafoto ato iquina. Ascan tsoan ahuun tsain shara nicacasmaiton ato onaintimashquin. Mai cuti curushcain non potaino moshi futsutiro. Noncai afanan ahuuscashon shara huatiroma. Nanscarifi aquin nan yoitimamisifo ato onaintimanaitiancai tsoashta ato numatiroma naanonfoma,’ ishon uhuunoa cununi. Upa Diosin ua yononi cuscan nanscarifi huaquin un mato yonoi maifoti anoafoto aton niaifo man inon. Ascashon man ato yoiai cuscacoin anonfo. <sup>28</sup> Shafaino ishtumanhuan fustiton chashaiton nantififain ointirofo. Nanscarifiai un afanan oaiton nantififain ua oinshcani. Ascano nantianrifi un ato yonoshquin afanan tsoashta chaca huatama uacairocon tanasharanonfo. Ascashu ufu isharapacunacafo. <sup>29</sup> Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun,” —ishon Jesús nan icoinra huafo Tiatira anoafoto yoia.

### 3

*Jesús Sardis anoa icoinra huafo ichananti pushu murannofo ato yoini cuscan*

<sup>1</sup> Ascatan afanan Jesús ua yoiqui isca huaa,

—Ua icoinra huafo Sardis anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Diosin Yoshin Shara ufu rafumisi. Ascacun nan Diosin tsain yoimisifo un iquimisi. Ascacun un mato yoia isca huaquin. Man amisi cuscan mun tapicoian. Yorafoan matohuunoa yoimisifo isca huaquin, ‘Nan Sardis anoafoto Jesús icoinra huafain isharacoinmisiforan,’ ishon matohuunoa yoimisifo. Man isharamisifo ointsacun. Ascfia mancai matohuunoa yoiaifo cuscan man amisima. Mancai ua tanacoianma.

<sup>2</sup> “Ascashu man uqui ointi mutoa. Afanan ascayamacahuun. Man shinanyopaoni cuscan nannori afanan shinancahuun. Ascfia mun tapia Upa Diosin mato imapaiyai cuscan man ascacoiantaima. Ascashon un mato yonoa cuscan afiaquin atirifi man ascacoianma. Ascacun maton nomuran afanan shinansharacahuun man uhuunoa tapimisi cuscan nantifi funononma.

<sup>3</sup> “Ascacufin man uhuun tsain icoinra huafain man nicapaoni cuscan afanan nannori shinancahuun. Man chaca huaa cuscan afanan asca huatama uarocon tanasharacahuun. Ascan afanan man uqui nasoyamacaiyaino un matoqui samamashta nocoriscatiro mato onaintimashqui. Pushu muran icafoan tapitirofoma ahuutianmain yomutso aton pushu muran iquiriscatiroquin. Nanscarifiai mancai tapiama ahuutiaran un matoqui nocoriscatashquin mato onaintimashqui.

<sup>4</sup> “Ascfia matofu ichananmisifo fustirasi Sardis anoafoto chaca huamisifoma. Nocon sahuuti choshtacoincun non pucatiro futsa funa shara sahuushquin. Nanscarifiai atirifi man chaca shinanpaoni cuscan man potacoinshon uhuunoa fusti man shinanfainaino un matoqui nocoaitian sahuuti oshopa sharashtacoin un mato inanshquin man ufu ipanon. Ascan isharamisishaquin man unfu ipanaca ua cuscara shara iishcaquin.

<sup>5</sup> “Ratoran futsafori maton cuscara uhuun tsain cachiquiri huatama ua tanasharafain uhuunshon Satanás finoncoincun nanfofin unfu isharpacunacafo. Ascashu ua cuscara shara iishcani. Nanforifi un ato sahuuti oshopa sharashtacoin inanshquin ufu ipanonfo. Ascan Uhuun Upa Diosin nan ua icoinra huafoti aton anufo man libro muran cunua nantififain tapinonfo ufu ipashquiaifo. Ascan nanfo fusti afu nipatirofo. Asacashocai un aton anu soapacunacama. Uhuun Upa Diosin futan ahuun oinmati afu nai muran icafoan ointaifi un ato yoishquin isca huaquin, ‘Nafofin uhuun yoracoinfoquin,’ ishon un ato yoishquin. <sup>6</sup>Ascacun man pafiquiyaquin Diosin Yoshin Sharapan nan icoinra huafo ato yoi ai cuscan nicasharacahuun,” —ishon Jesús nan icoinra huafo Sardis anoafo yoia.

*Jesús Filadelfia anoa nan icoinra huafo ichananti pushu murannoafo ato yoini cuscan*

<sup>7</sup>Ascatan afanan Jesús ua yoi qui isca huaa,

—Ua icoinra huafo Filadelfia anoa aton Diosin tsain yoimisi un yoipaiyai cuscan ua cunushoquin isca huai. “Unquian un maton Ifo Jesús, un mato yoisharapai man tapinon. Unfin ishara fustimisiquin. Uhuun tsainrifi iconcoin. Pushu ifo shafiya arus fusti pushu fuputiro yorafo iquimai iyamarai fuputiro futsafo iquinonfoma. Nanscarifiai maton niaifo David shafi cuscara ipaoni. Tsoa ahuun mai ano imapai iyamarai ato nitun huapaoni iquinonma. Nanscarifiai unfi David funaquin. Urus fusti un yoitiro upa Dios icano tsoa iquitiro iyamaraimain iquitiro. Ascacun un mia yoi isca huaquin. <sup>8</sup>Man amisi cuscan mun tapicoian. Un mato yonoa cuscan man futsafo uhuunoa yoimisi. Ascacuai un mato yonoa cuscan tsoan mato shatumatiroma. Man ascaiton futsafoan matohuunoa yoi afo nafocai ahuamaran mato huafiaifoanno mancai uhuun tsain cachiquiri huamisima. Ua cachiquiri huatamarocon Jesús nocon Iforan man huamisi.

<sup>9</sup>“Futsafo arifi Judio cainfianishaquicai ua icoinra huafoma. Ascan nanfocai Diospan yorama. Nanfo chanimisifo. Ascacun un ato yonoshquin mato fuoshopacufoan yoinonfo isca huaquin, ‘Icon. Diospan Furun matohuun noicoin,’ ishon matohuunoa yoishcani. <sup>10</sup>Ascano omitsiscafi ai un mato yonoa cuscan funaquima man tunucoinmisi. Uhuun tsain nicafain ua tanasharashori man ua cachiquiri huamisima. Ascacun chipo nantifi yorafo manifesti anoashu fasi omitsiscaifotian ratofomain Diospan ahuun yoracoinfoquin tapishcani. Ascashu nantifi icoinra huamafo omitsiscaitian un mato cushusharashquin nanfo omitsiscascai cuscan man omitsiscanonma.

<sup>11</sup>“Ascacun un samamashta oshquin. Ascan man ua icoinra huaa cuscan potayamacahuun. Ascatarocon Upa Dios tanasharacahuun mato inansharapaiyai cuscan futsan finonma. <sup>12</sup>Tsoan omitsiscafi aquin uhuun tsain cachiquiri huatama tunucoinfain ua tanasharacoinshon nantonfin Satanás finoncoianquin. Ascashufin uhuun Upa Dios icano un ato imapacusharashquin. Nannoashu raqui canacafoma.

“Ascacun un nantifi tapimashquin nanfo Uhuun Upa Diosin ahuun yorafocun. Ascashon un ato yoi quin isca huashquin, ‘Nan nuno uhuun Upa icano man no fu ipanacaran,’ un ato huashquin. Diospan yorafo Jerusalén ano ipaonifo. Asca natianrifi Upa Diosin icano ahuun anu Jerusalén funa. Chipa nan Jerusalén funa Upa Diosin icariashu nocoqui

fotoshqin. Ascan tsoan ua cachiquiri huamisima nanno ipanaca. Ascashon uhuun anu futsa tsoan nicayomisima nanrifi nan un ato anu tuqui huashoshquin. Ascashu un isharapacunaca cuscan arifi ufu isharapacunacafo.

<sup>13</sup> “Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun,” —ishon Jesús nan icoinra huafo Filadelfia anoafu yoia.

*Jesús Laodicea anoa nan icoinra huafo ichananti pushu murannoafu ato yoini cuscan*

<sup>14</sup> Ascatan afanan Jesús ua yoiqui isca huaa,

—Ua icoinra huafo Laodicea anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Upa Diosin ua amapaiyai cuscan fustisi huamishaqin uhuun tsain un mato yoinon. Urifi nan icon fustisi un yoimisi. Ascan Upa Diosin nantifi onihuanifoti aton niaifofin unquin. Ascacun un mato yoiquin isca huai.

<sup>15-16</sup> “Man amisi cuscan mun tapia. Ua cachiquiri huacoinyamafishon un mato amapaiyai cuscacai man fuchipaicoianma. Ascashu ichananfiaicai ichananpaitocanan man ichananma. Man fasi mutoi futsua. Ascaracai sharama. Ahuara matsisharacoin niscaquin non unimacai ayatiro. Ahuara shana shara matsinaqui non unimacai ayatiro. Ascafia ahuara catsacai non unimacain ayatiro. Catsa muquin non michotiro. Nanscarifiai atirifi yorafo nan ahuara shana cuscarafu. Ua tanasharacoianfo. Ascan atirifi ahuara matsi cuscarafu. Uhuun tsain tapisharataicanima. Ascacun un atohuun ramapaicoin. Ascafia mancai shana yafi matsi cuscarama. Ascara itama manfin nan ahuara catsa cuscaroquin. Man uqui mutocoian. Ahuara catsa muuquin non michotiro cuscan urifi un mato nansca huai. Ascashon un mato potashquin.

<sup>17</sup> “Ascan man yoimisi isca huaquin, ‘Diosin ua tapimapaiyai cuscan nantifi mun tapia. Uncai ahua futsa yopaimaran,’ ishon man anori shinanfiai mancai tapiama man chacafo huamisi. Ascacun un mato yoi. Timafin. Ua yopafiai man fasi cacapaimisi. Diosin Yoshin Sharapan mato imapaiyai cuscacai man tapiama. Manfin ahuuoma cuscarofoquin. Man imisi cuscari mun tapia. Ascan uncai ascara fuchipaima. Ascafia un matohuunoa shinain cuscacai man tapiama. Manfin nan fusho cuscarofoquin. Fushocai ahuara ointiroma. Nanscarifiai man chaca huai cuscacai man tapiama. Ascashu man yora chitoria cuscarofofihocai man tapiama. Nanscarifiai ua yopafiaquicai man tapiama.

<sup>18</sup> “Ascacun un mato yoisharapai man chaca huamisi cuscan huafain afanan chaca huaquima. Ua yocacahuun un mato tapimanon ahuscashumain man ua cuscara shara itiroquin. Ascafia man chitoria cuscara. Ascacun un mato sahuuti sahuumasharai man afanan rafinonma. Nanscarifiaquin man chaca huamisi cuscan un shafacafi oincoian. Ascacun uhuunoashu fusti man maton nomuran fiananan huatiro ua cuscara shara iishquin. Man fusho cuscaracoinrifi imisi. Ascacun ua yocacahuun un mato cayahuamafain uhuun tsain mato tapimasharanon. Ascan oinsharafain ua tanasharashcaquin.

<sup>19</sup> “Ascan un mato noiyamaquicai anori un mato yoicuanama. Ascafia nan un noicoiainfo fusti un ato onaintimashqui chaca shatunonfo. Ascashon nanfori un ato yoisharapai ua tanasharanonfo. Ascacun

man chaca shinanmisi cuscan afanan anori shinanyamacahuun. Natian uhuun tsain nicacoincahuun un mato yoiái cuscaquin. <sup>20</sup> Shinancapon uhuun yoramishtichin. Un matofu rafupaicoín un matoquí nocoa. Yora pushu muran iquipaiquin iquisi pushu ifo cunatiro iquimanon. Nanscarifiai un matoquí nocoa mato yoiquin isca huashquin, ‘Un mifu rafupairan,’ ishon un mato yoipacumisi. Ascano tsoan ahuun nomuranshon ua nicaquin ua yoiquin isca huai, ‘Ifon, uqui ohuu. Un mia fuchipaifain un mia yopacoinran,’ ishon yoiaino un afu rafui. Arifi ufu rafuaino.

<sup>21</sup> “Ascano tsoan chaca huamisi cuscan shatufain ua tanasharacoian naanfin uhuun Upa Diosin icari ufu ipasharatiroquin. Ascafia un niaifocoin icaino nanfin niaifo patashari itiroquin. Unfin Satanás yafi yoshin chacafo finoncoianquin. Uhuun Upa Dios icariashu uhuun Upa fu un niaifocoin ica. Nanscarifiai tsoan ahuun chaca cachiquiri huafain ua tanasharacoianshu un icanoashu arifi ufu niaifo ipatiroquin. <sup>22</sup> Ascacun man pafiquiyaquin Diosin Yoshin Sharapan nan icoinra huafo ato yoiái cuscan nicasharacahuun,” —ishon Jesús nan icoinra huafo Laodicea anofo yoiá.

## 4

### *Dios icarishon ahuunoa yoisharapacunacafo*

<sup>1</sup> Ascashon nannori ua yoifain Diosin Yoshin Sharapan ahuara futsa ua oinmanaino nan namapan oian un huaa. Ascashon un oian Upa Diosin icaria caincaiti nan un oinyaino nan oi un nicaquin tau huaa nanrifi un afanan nica. Nan manuti nicatsa achacoin. Ascano ua yoiquin isca huaa, —Nuri uqui ohuu. Ahuarafo chipo ahuusara aashquiai cuscan un mia oinmayoiran, —ishon ua yoiá. <sup>2</sup> Ua yoitapaiyaino samamashta Diosin Yoshin Sharapan ua shinanmatana. Ascashon ua iquipaiyai cuscan ua iquina. Ascatari nan oi un nica ari ua iyoa. Nanno niaifocoin tsaoti uhuapa shara un oian. Nocon Ifo Diosin tsaotan.

<sup>3</sup> Nan nocon Ifo fasi sharashtacoin iscara un oian. Toquiri rafutan aton anu jaspe yafi cornalina nan rafu sharashtacoin faca facaitsa rafu. Nan jaspe oshoshara. Ascan cornalina oshin chushushara. Nanscarifiai nocon Ifo sharashtacoin faca facaitsa ointsa. Nahuan fai tonan shara cuscaratón a tsaotano tarati huaa. <sup>4</sup> Nannori nocon Ifon tsaotano veinte cuatro nocofunufocoin tsaoti tarati huashu tsaonifo. Nan nocofunufocoin Jesús tanamisifo. Nanfoan icoinra huafo aton cushumisi ipaoni. Sahuuti oshopa sharashta sahuufain maiti oro faca facaitsa sharashta maiáfo.

<sup>5</sup> Ascatan nocon Ifo tsaotano canan facaiqui ointsa icain turuica nicatsari un nica. Nanscara nicaquin non tapitiro Diosin ahuamamishti hutatiro. Tsoa futsacai ahuun curush cuscarama. Ascatan nan Upa Diosin tsaotano siete lamparina uruaiton un oian. Nanfo uruai cuscan huaquin Diosin Yoshin Sharapan nan siete icoinra huafo ichananti pushufoti murannofoan futsafo tapimafain oinmatirofo ahuu cuscaramaín Diosiqui arifi tapinonfo. <sup>6</sup> Nannori un oian ununhuan ointsa tsosi sharacoin. Ascano nocon Ifoan ahuun tsaoti anori nan onihuani rafu non rafuri niafo. Furo ichapaya. Fusoqui yafi puchihuuri furo ichapaya.

<sup>7</sup> Futsarifi masharo ointsa icaino futsa moi funu ointsa ica. Ascano futsan ahuun fusori nan nocofunun fuso ointsa icain futsari nan tutumanhuan noyai ointsa ica. <sup>8-10</sup> Nan cuatro putao ya seis putao ya. Nan ato putao ocuma rafu furo ichapayari. Shafatisho yafi yamutishori nan rafu non rafuri fanainquin isca fafaincani,

*“Nocon Ifo Dios fasi sharacoin. Shara fustisi huapanaca. Nantofin ahuamamishti huatiroquin. Iyopaonishaqui natianri ipamisi. Ascashuri ipanacaran,”*

icashu nan rafu non rafuri fanainriacani. Ascashon yoiafori isca huaquin,

*“Nocon Ifon Diosin mirus fusti min nocon Ifocoin. Tsoa futsacai mia cuscara sharama. Min isharapacunaca. Ascacufin non mia fasi noiquin aicho huai. Min noco shara huafafaini,”*

ishon nan rafu non rafuriton yoiriaifoanno nan icoinra huafo cushumisifo veinte cuatrofain nocon Ifo Diosin ahuun tsaoti camaqui tsaoo naman fuoshopacufaoan aton maiti oro ointsa sharashtacoin nocon Ifo tsaoo afofori nannosi huacashon yoiafo isca huaquin,

*“Nocon Ifo Diosin min noco maiti inan cuscan non mia afanan nasoin. Man min noco inanfiacun non mia fasi noicoinquin noco maitifo non mia afanan nasoin. Ascan mirus fustifin min noco iquitiroquin. Min nocon Numamisi. Ascashu mirus fusti min nocon Ifocoin. <sup>11</sup> Ascan minfin isharamisiquin. Ascacun mihuunoa fusti non yoitiro isca huaquin. Min nocon Ifocoin. Min nocon Dios. Tsoa futsacai mia cuscara sharama. Min isharapacunaca. Ascacufin non mia fasi noicoinquin. Ascan minfin min shinanpasi ahuamamishti huatiroquin. Min nantifi ahuamamishti onihuani. Min apaiyai cuscan fusti nantifi min onihuani. Ascacun minhuunoashu fusti nitiroforan,”*

ishon nan Jesús tanamisifo veinte cuatro yorafoan yoiafo.

## 5

*Jesús nan chashoan facu cahuashara cuscaratón cununi cuscahuunshon noco tapimani*

<sup>1</sup> Ascatan afanan un oian cuscan un mato tapimai. Nocon Ifo Diosin ahuun tsaoti camaqui tsaoshon ahuun mucu mumiori papel ocuma rafu cunua sufishon tsoma. Ascashon siete tashna huatinin tashna huaa. <sup>2</sup> Ascashon un oian Diosin oinmati mutsisipacoin nan afu nai muran ica. Nantori oi ashcafinin cunaquin isca huaa, —Na cunu non oinpai. Ascan chaca huamisima fustiton na tashna huatifo fuputiro na cunu non oion. ¿Ascan tsoan chaca huamisimamun na cunu ahuun tashna huatifo noco fupushona non oion? —ishon oi ashcafinin yoia. <sup>3</sup> Ascafia nan nai murannofo futan mai anofo non Diosin oinmatifo afu ifiashocai tsoashtacai cunu fupushotiroma amuran oionfo.

<sup>4</sup> Ascacun uaiyanan un yoia, —¡Ohuashta! Chaca huamisimacai tsoan fuchiana na cunu noco fupushonon amuran non oion, —ishon un shinan. Ascacun un fasi uairia. <sup>5</sup> Ascaiton nan veinte cuatro icoinra huafo aton cushumisi futsan ua yoiquin isca huaa, —Uaiyamahuu. Oinpon. Nocon Ifo nia. Cristo nanfin nocon niaifocoinquin. Rato yoinacai nan masharo uhuapa cuscara mutsisipacoinma. Nanscarifiai Cristo Israelifoan aton niaifo mutsisipacoin. Nanton ahuamamishti huatiro. Tsoa futsacai a cuscarama. Ascacun anu futsamisifo isca huaquin, “Judápan funafo nan masharo curush cuscaracoinforan,” huamisifo. Ascacufin nocon yorafoan aton niaifo David ipaoniquin. Ascan nan David ahuun funa natian nuno Upa Dios fu ica. Ascacun nanton nan

siete tashna huamua noco fupushotiro nan cunu non oinon. Ascacun afanan uaiyamahuu, —ua huua.

<sup>6</sup> Ascatan nannori chashoan cahuashara fustifia ahuun masho siete nantirifi ahuun furo un oian. Rutuafo ointsafia Diospan tsaoti ano nia ica. Nannorifi nan rafu non rafuri Diosin onihua yafi nan veinte cuatro icoindra huafu cushumisifoan tarati huayacunafo. Tsoa futsacai a cuscarama. Nanton ahuamamishti huatiro. Diosin Furun manifoti ano nichian ahuun Yoshin Sharahuunshon nantifi yorafo onancoinon.

<sup>7</sup> Ascan Upa Diosin nan cunu ahuun mucu mumiori tsomacun nan Jesús chashoanun facu cuscaraton man fia. <sup>8</sup> Fishon nan rafu non rafuri Diosin onihuani yafi nan veinte cuatro icoindra huafu cushumisifoan fuoshopacufoan manuti guitarra cuscarafu yafi tutsofo nanfoan tsoafo. Nan tutsofo oro faca facaitsa. Nanfo muran fiin otano ahuun coin tipoi ininsharayacoin. Nanscarifiai Diospan yorafoan a cufiaiton Upa Dios nan icarishon ato nicamisi.

<sup>9-10</sup> Ascano nantianri nanfo fanainti funapan fanainquin iscafo, “Min chaca huayamafiamisicun mia rutunifo.

Ascashu nantifi yorafo manifoti min noco nashocai min imi foni Satanás afanan nocon ifo itama  
Upa Diosin ahuun yorafo non inon.

Ascacufin mirus fusti nan cunu Upa Diosin tsoma min fitiroquin.

Ascashon ahuun tashna huamuafo  
min noco fupushotiro  
amuran cunua cuscan noco tapimashquin.

Mihuunshon mia icoindra huafoti  
Diospan yorafo itirofo.

Ascano nanfoanri futsafo  
min tsain shara ato tapimanano min ato amapaiyai cuscan anonfo.  
Ascacun non maifoti anoafon  
niaifo patashari iishquiran,”

icashu fanaincafo.

<sup>11</sup> Ascatan un oianri Diosin oinmatifo afu nai muran icafo ichaparasicoin tsoancai ato tanan huatiroma. Nanfo fanaincaifoan oinfain un ato nica. Diosin tsaoti ano tarati huayacunafo nan Diosin onihuani rafu non rafuri non nan Jesús icoindra huafu cushumisifo veinte cuatro naqui huayacunafo. Ascashu nanfo ya osiashu Diosin oinmatifo fu fanaincaifoan un nica. <sup>12</sup> Fasi oi ashcafinin fanaincani iscafo, “Diospan facu Jesús chashoan cahuashara cuscara sharashtacoin man rutunifo.

Ascafia natian nantifi manifoti ato iquifain  
nantifi nai murannoafoti yafi mai anoafori ahuuna iquin.

Naantofin nantifi tapicoianquin

ahuun curushhuunshon ahuamamishti huatiro.

Ascacun nantifiton min sharacoinran mia huapanonfo.

Mirus fustifin min nocon Ifo iquicain.

Ascacun ¡Aicho! Min nocon Ifo ishara fustipacunacaran,”

icashu fanaincani.

<sup>13</sup> Ascatafin un nica nantifi nai murannoafu fanaincaino mai anoafori fanaincaino unuhuan anoafori fanaincani iscafo, “Upa Diosin ahuun tsaoti ano tsoa.

Furun Jesús chashoan facu cuscara sharashta  
nan rafu nocon Ifo ishara fustipacumisifo.

Ascacun nantifiton man sharacoinran ato huafain

man fusti nocon Ifocoin  
 ahuamamishti man huatiroran, ishon yoipacunonfo,”  
 icashu fanaincani.

<sup>14</sup> Ascatan nan rafu non rafuri Diosin onihuanifoan yoiquin isca huafo, —¡Aicho! Nanscasi ipanon. Amen, —icaifoanno nan veinte cuatro Jesús icoinra huafo cushumisifo nan Dios yafi Furun nanman fuopacufoannafo. Nanfoanrifi Upa Dios yafi Jesushuunoa yoisharafo.

## 6

### *Nan tashna huati siete*

<sup>1</sup> Ascatan un oian nan Jesús chashoan facu cuscaraton nan cunu tashna huamua siete tsoma. Ascashon fusti fupua. Fupuaino un nica nan rafu non rafuri Diosin onihuanu futsan ahuun oi ashcafinin yoiai cuscan nan turuica nicatsaton yoia, —Ohuu, —yoni. <sup>2</sup> Ascacaino caballo oshopa ua chaima nocotoshiaiton un oian. Nan caballo camaqui tsoaran piyacati tsoashu tsaocun niaifoan maiti maimana. Man maimanano nannoashu caballo camaqui man caa. Nantorifi futsafo iquipaiyai cuscan man iquini caa. Ascaitocai tsoashta nitun huatiroma. Nantomain nantifi finoncoincun.

<sup>3</sup> Ascatan Jesús Diospan facu nan chashoan facu cuscaraton afanan nan cunu tashna huamua futsan fupua. Fupuaino un nica nan rafu non rafuri Diosin onihuanu futsan afanan yoia isca huaquin, —Ohuu, —yoni.

<sup>4</sup> Ascaino caballo futsari oshininpa nocotoshia. Nan caballo camaqui tsaocun nopu chainipa inanfain yonoa mai ano catanon. Ascatan nocoshon maifoti anoa ato shinanmana afanan unimasharatamarocon noicasmatanancanashu rutunanonfo.

<sup>5</sup> Ascatan Jesús chashoan facu cuscaraton afanan nan cunu tashnahuamua futsari fupua. Nan fupuaino un nica nan rafu non rafuri Diosin onihuanu futsan afanan yoia isca huaquin, —Ohuu, —huaino caballo futsa fisopari nocotoshiaiton un oian. Nan caballo camaquiri tsoanra tsaoshon ahuun ihuu tananti tsoma ica. <sup>6</sup> Ascaino nantianri un oi nica nan rafu non rafuri Diosin onihuanu nastumai un nica yoiquin isca huaiton, —Tushu yamaicuana iishquin. Nan aya cuscafia fasi chicoin. Nocofunun shafa fusti yonoshon ahuun rafanan trigo kilo fusti fitiro ascayamarai arroz kilo rafu non fustisi fitiro. Afanan fipaifia ahuun pui tushuama ahuara futsa afanan fiapanan. Ascacun shuni yafi nan fimi uva ahuun unu chacana huayamahuu, —ishon yoia.

<sup>7</sup> Ascano afanan Diospan facu nan chashoanun facu cuscaraton afanan nan cunu tashna huamua futsari fupuaino un nica nan rafu non rafuri Diosin onihuanu futsan afanan yoiquin isca huaa, —Ohuu, —huaa. <sup>8</sup> Ascan caballo futsa fasi pashicoin nocotoshiaiton un oian. Nan caballo camaqui futsari tsoa ahuun anu Namamisi. Nanton yorafo namatiro. Ascashon nantori yoia isca huaquin, —Un yorafo namapairan, —huaiton Diosin yoia, —Ai. Min atiroran, —huaa. Nan Namamisi cachiori futsan oa. Ahuun anu Namisifoanno ica. Ascano nan namamisihuunashu mani futsafoya futsafo rutunancani atirifi tushuoma fonicani naifoanno atirifi pau futsa futsatapafoan ato namaino atirifi yoinafoan ato rutua nacani. Ascashu fasi yorahuanrasi nashcani. Tsoan ato tanan huatiroma un oian.

<sup>9-10</sup> Ascatan afanan Jesús nan cunu tashna huamua futsa fupua. Fupuaino un oian nan Jesús icoinra huashu namisifo. Niyopaonifotian

Diospan tsain futsafo yoifain Jesushuunoari yoifoanfainpaonifo. Ascaifoan ato rutunifo. Ascashu nanfo Jesushuunoashu nani. Natian un oian aton furo yoshinfoan Dios cufiti ano ichanancashon oi ashcafinin yoiafo isca huaquin, —Nocon Ifo Diosin, min nantifi onancoian. Min ahuamamishti huatiro. Min isharafustimisi. Mincai ahuashta chaca huamisima. Min iconmisi. Nan mia icojnra huamafoan mai anoshon noco rutunifo. Ascacun ahuutianmun min ato onaintimaicain, —ishon yoiaifoan. <sup>11</sup> Ato yoiqui isca huaquin, —Manayocahuun. Funacaquima. Futsafo mato cuscarafori uhuunshon uhuunoa yoimisifo iishcani. Ascacun nanfo mato cuscara uhuun oinmatifo arifi iishquicani. Nanforifi uhuunshon yora chacafoan ato rutushcani. Ascan ahuun unutaqui ato rutuafono mato ano nocoshcani, —ishon nocon Ifoan ato yoia. Yoitan sahuuti osho chainipa sharastacoin ato inan. Nanfoanmain mai ano niyoshon Upa Diosin tanasharamisicun ato inanyama.

<sup>12</sup> Ascatan Jesús nan chashoan facu cuscaraton afanan nan cunu tashna huamua futsari fupuaiton un oian. Fasi curushcai mai nayanaiyaicain farin afanan chashayamaino nan sahuuti cushto fisopaton fupoa cuscara faquishcoincain oshu oshicoincain imi ointsa icain. <sup>13</sup> Nihuu curushpacoin nocoquin fana higuera ahuun fimi oshianfo unutaquin niriatiro. Nanscarifiai fishifo nai murannoashu mai ano pacuafo. <sup>14</sup> Nainhuan miscoacunfoanni ointsa yamariscatanaino machihuan yafi mai toomanhuan naiyanaiyaicaino futsa ano shucucaina.

<sup>15</sup> Ascaino nantifi mai anofo ratucoianfo. Manifoti aton niaifofo non niaifo patasharifo non ranushumuafaoan ato niaifofo non mafo ichapayafo non yora mutsisipafo non oinmatifo non ifomaisifori nantifi ratucoianfo. Ascano atirifi mahua quini uhuapa muran ichofo onupaicani. Atirifiri machi cuya ano ichofo toquirininhuan ananmanri onupaicani. <sup>16-17</sup> Ascatan fasi fiisiyanan yoiafo isca huaquin, —¡Ohuashta! Upa Diosin nai murannoaton ahuun Furun Jesús nan chashoan facu cuscara natian nocoqui sinacoin. Ascacun non ahuuscatiromun omitsis-cashquima. Tsoashtacain Diosin numatiroma noco onaintimanonma. Ascacun na machi cuyafu yafi toquirininhuan noco camaqui pacupainon Diosin noco fuchishon noco omitsisca huanonma, —ishon nan nicacasmamisifoan yoiafo.

## 7

*Diosin ciento cuarenta y cuatro mil ahuun yorafo cushushquiai cuscan*

<sup>1</sup> Ascatan afanan un oian cuscan un mato tapimai. Diosin ahuun oinmati rafu non rafuri afu nai muran imisifo un oian. Futsa fari oaiquiri niaino futsari fari caiquiri nia. Ascan futsa fari oai istafari niaino futsari fari cai istafari nia. Ascaino nihuu nishmapacufoanna. Afananricai nantifi maifoti anoa nii puifo puri puricama. Unuhuanri afanan fuchoima pusi-quima raca. <sup>2</sup> Nan rafu non rafuri Diosin ato yonoa mai yafi unuhuan chacana huatirofo. Ascano Diosin oinmati afu nai muran ica futsari nan fari oaiquirinoashu oaiton un oian. Nocon Upa Diosin nan nipanacaton ahuun sello ya oa. Nan Diosin yonocun ahuun yorafotihuun nutatiro nantiffain tapinon Diospan ahuun yorafocun.

<sup>3</sup> Nan oquin Diosin oinmati rafu non rafuri ato oi ashcafinin yoia isca huaquin, —Manayocahuun. Diosin tanamisifo iquisi fumananqui un ato Diosin anu nutayonon nanfo Diospan yorafocun nantiffain



tapinonfo. Ascacun non acataima ahuaa mai anoafo yafi unuhuan anoafori chacana huariyamacahuun, —ishon ato yoia. <sup>4</sup> Uun nica 144,000 Israelifoa aton fumananqui Diosin oinmatinin Diosin ahuan anu man ato nutan. <sup>5-8</sup> Nocon shuni Israeli ahuan facufo doce furonan-facufo cainni.

Iyoaton ahuan anu Judá.

Judá cachiori Rubén.

Rubén cachiori Gad.

Gad cachiori Aser.

Aser cachiori Neftalí.

Neftalí cachiori Manasés.

Manasés cachiori Simeón.

Simeón cachiori Leví.

Leví cachiori Isacar.

Isacar cachiori Zabulón.

Zabulón cachiori José.

José cachiori chipo facucoin Benjamín.

Nan doce fustirasi pashcanain futsuashu icafo. Ascan nan shoco futsafo anoashu caiafo aton funafo doce mil Diosin ato catonni.

*Yorahuanrasifain ato sahuuti oshopa sahuuafo*

<sup>9</sup> Ascatan Upa Diosin yafi Furun nan chashoanun facu cahuanshara cuscara tsoaano yorahuanrasi niafo tsoancai ato tanan huatiroma. Nan maifoti anoafo manifotifain sahuuti oshopa chainipa sahuucashon upu tsoafo. <sup>10</sup> Nanfoan oi ashcafinin yoiafo isca huaquin,

“Nocon Upa Diosin futan Furun Jesús noco nimapacuafo. Nocon Ifo Jesús nan chashoan facu cahuanshara cuscara nocohu-unoashu nani nocon chaca soashoshquin non afu nipanon,”

ishon yoiafo. <sup>11-12</sup> Ascatan Nocon Ifo tsoaano ahuan oinmatifo afu nai muran imisifo non Jesús tanamisifo ato cushumisifo yafi nan rafu non rafuri Diosin onihuani nanfo nanno niafo. Ascashon ratoconun mai chachishon fuoshopacufoantan Dios yoisharaquin isca huafo,

“¡Aicho! Mirus fusti min icocoin. Min isharapacumisi. Mirus fustirifi min noco imasharatiro. Min nantifi onancoian. ¡Aicho! Non yopai cuscan min noco ashomisi. Ascacun nantiffain min sharacoinran mia huapanacafo. Minfin ahuaamamishti huatiroquin. Min nanscasi huapanaca. Nanscasi ipanon. Amen,”

ishon yoiafo.

<sup>13</sup> Ascacun Jesús tanamisifo aton cushumisiton futsan ua yoca isca huaquin, —¿Na yorafo sahuuti osho chainipa sahuuafo raniashu fuafomun min tapiamamun? —ishon ua yoca. <sup>14</sup> Ascaiton un cuma, —Ma. Uncai tapiama. Minfin tapiaquin. Minfin ua yoitiroquin, —un huaiton. —Nanfo fasi omitsiscani. Ascaifoa Diospan Furun nan chashoan facu cahuanshara cuscaraton ato nashonihuunshon ato chaca soashona ato imasharanon. Nanscacun ato sahuuti oshopa shara sahumana.

<sup>15</sup> Ascashu Upa Diosin icano afu imisifo. Afu ishon nan Upa Diosin ato yonoa cuscan ashopacunacafo. Ascacun ato cushufafaini ahuaa chachafu atocui nocononma. <sup>16-17</sup> Diospan Furun nan chashoan facu cahuanshara cuscara Upa Dios fu imisi naanfin ato cushumisi ipashquiquin. Ascanocai afanan tsoa foniyamacai nomipacunacafoma. Afananricai

farin ato tsacaima. Ascashon Jesús ato iyoaino unimapacunacafo. Ascacun Upa Diosin aton ointi fupuashoshquin afanan uainonfoma, —ishon yoia.

## 8

*Nan tashna huamuafo Jesús ahuun unutaqui fupua*

<sup>1</sup> Ascatan ahuaara iishquiai cuscan ua oinmayoa. Jesús Diospan facu nan chashoanun facu cahuanshara cuscaraton cunu tashna huamua siete man fupuquin tau huayoa. Ascan natian ahuun unutaquin futsari fupuaiton un oian. Diosin icano nai murannoashu nantifi media hora puusiyoafoma.

<sup>2</sup> Ascatan Diosin ahuun oinmati siete afu nai muran icafoan atoti manuti inanpacua chipo ato yoiaitian chaan chaan ashquinonfo.

<sup>3</sup> Ascaino Diospan oinmati futsan paran uhuapamashta oro faca fa-caitsa tsomashu Upa Dios cufiti ano nia un oian. Nan paran uhuapamashtanun ahuaara inin shara coaino fia. Ascan nantifi Diospan yorafoan cufimisifo cuscan osishon Dios cufiti camaqui huaa. Nannori chaima Diosin tsoa. <sup>4</sup> Ascano nan oinmati Dios fu nai muran imisi paran uhuapamashta tsomashon ahuun coin tipoi inin shara nai muran man foa. Nanscarifiai Diospan yorafoan cufiaifo cuscan Upa Diosin nan icarishon nicatiro. <sup>5</sup> Ascacun Upa Diosin man itishara huaa maifoti anofo nan icoinra huafoma ato onaintimashqui. Ascashon ahuun oinmati yonoa afanan paran uhuapamashtanun cufiti sapa muran chi fospi huanon. Fospi huatan nai muranshon mai ano man pota. Ascaino mai ano fasi curushcai turuica achacoin nicafain canan piishicain mai nayanaiyaica.

*Oinmati afu icafoan manuti chaan chaan acani*

<sup>6</sup> Ascatan Diosin ahuun oinmati siete afu nai muran icafo atoti manuti inan itishara huafu chaan chaan ashcaquin.

<sup>7</sup> Ascan futsan ahuun manuti chaan chaan acaino unu matsi tocoromishti yafi chii imia osia mai ano pacua. Ascaino mai cashcu futsa man coi cuyoa. Un tercero del maitio man coi cuyoa. Nantifi mai anoa fasifo yafi ihuifo man coi cuyoari.

<sup>8</sup> Ascatan Diosin oinmati futsanri ahuun manuti chaan chaan acaino machi uhuapa chi urumanhuan ointsa Diosin nai muranshon potaino unuhuan muran pacua. Ascano unuhuan cashcu futsa imi ica. La tercera del unuhuan imi ica. <sup>9</sup> Ascaino atirifi unuhuan muran icafo man nai cuyoafo. Atirifi la tercera de shashohuanfori man coi cuyoafo.

<sup>10</sup> Ascaino Diosin oinmati futsan arifi ahuun manuti chaan chaan acaino fishi uhuapacoin chi uruai cuscara nai murannoashu pacua. Atirifi unufo muran man pacua. Fishihuan chi uruai cuscara la tercera unufoqui man pacua. Ascashu unu tsosia sharafoquiri man pacua.

<sup>11</sup> Nan fishihuan ahuun anu mocacoinran huamisifo. Nan unu muran pacuano la tercera unu moca ica. Ascacun yora ichaparasi nan unu ayacanashu nai futsuafu.

<sup>12</sup> Ascatan Diosin oinmati futsan arifi ahuun manuti chaan chaan acaino farin la tercera afanan chashasharama oshuri la tercera afanan chashama. Ascaino la tercera fishifoanri afanan chashafoma. Ascashu shafata cuatro horas faquishia. Yamuri cuatro horas fasi faquishcoin.

<sup>13</sup> Nanfo un oiainno un oianri Diospan oinmati tutumanhuan cuscara fasi cuya noyaiton un nica. Naanton oi ashcafinin yoiquin isca huaa, — ¡Ohuashta! Diosin oinmati afu nai muran icafo rafu non fusti futsan aton

manuti chaan chaan acaino mai ano icafo fasi mimacaia omitsiscashani. Ascacun ¡Ai timafin! —ishon yoia.

## 9

<sup>1</sup> Ascatan Diosin oinmati futsan arifi ahuun manuti chaan chaan acaino Diospan tsoara futsa nai muranshon mai ano nichian. Ascan fototan nan yoshin chacafo quininhuan faquish muran icafo ano caa. Nan quininhuan fupotiya. Ascan amurannoafocai ahuuscashu caintirofoma. Ascafia nan nai murannoa fotomana Diosin shafi inan quininhuan faquishi murannoa ato caimanon. <sup>2</sup> Ascashon ato cainmatanaino nan mai quininhuan murannoashu coinmahuanfoya nai muran foafo. Ascaino fari chasharayoama. Nantio nai faquishcoin iyoa. <sup>3</sup> Ascatan nan coinmahuan murannoashu ocutsuru cuscarafo ichaparasi mai ano nichian. Diosin ato fasi pofucuin ima inapapia cuscara inonfo.

<sup>4-5</sup> Ascashon ato yonoa isca huaquin, —Mai anofo fasifo yafi fanafo non ihuifori chacana huayamacahuun. Ascan tsoan uhuun yorafoma aton fumananquiri uhuun anu nutamuafoma nanfo fusti man ato tucatiro. Ascafia ato rutuyamacahuun. Ato rututama mucu fustiti oshu man ato omitsiscahuatiroran, —ishon ato yonoa. Ascacun ato tucafoanno nan icoinra huamafo inapapia muutsa mucani fasi omitsiscafo.

<sup>6</sup> Mucu fustiti oshu nanscara mucani nan icoinra huamafo tunuyamacaicani aafin napaiabo. Ascashon yoiqui isca huafo, —¡Ohuashta! Uncai tunutiroma. Un naafin shara itiroquin, —ishon yoiafo. Ascafia ahuuscashucai natirofoma.

<sup>7</sup> Ascan natian nan ocutsurufo ahuu cuscaramainquin un mato tapi-mai. Caballo iquisi itishara huatirofo futsafo rutuifoshcaquin. Nanscarifiai nan ocutsurufo nan caballo cuscara ointsafu. Ato maiti oro cuscara sharashtacoin maiabo. Aton fusorifi nan nocofunun fuso ointsafu. <sup>8</sup> Aton foo ainfoan foo ointsafu ato shutarifi masharonun shuta ointsafu icain <sup>9</sup> Aton shochi ano cuno ointsaton shofucumuafu ahuaraton ato tsacapaiyaino amuran iquinonma. Ascashon aton putao pua puaquin achacoin nan caballofoan ahuun taramuti tarafoaino futsafoya rutunain nicatsa. <sup>10</sup> Ascatan nantifi tsitsisiyafu. Naanton yorafo chachiano isin mutiro inapapia mutsa. Ascashon ato tsitsisinin yorafo omitsiscahuatiro. Mucu fustiti oshu ato isinmumatiro. <sup>11</sup> Nan quininhuan faquish muran yoshin chacafo icafoan aton niaifoan ahuun anu Israeli tsainman Abadón. Griego tsainmanri ahuun anu Apolión. Onicoinnin tsainman yorafo rutumisi.

<sup>12</sup> Ascan man chaca finonquin tau huaa. Ascan nan rafu nocoatama.

<sup>13</sup> Ascatan Diosin oinmati afu ica futsan ahuun manuti chaan chaan acaino. Anoshon Dios cufiti acamaqui nan rafu non rafuri moi masho ointsafu oro sharashtacoin nan nushmancayanoa oi un nica. Cufimisifo ano un oi nica. <sup>14</sup> Nan oin Diosin oinmati afu icaton manuti tsoma yoiatun un nica isca huaquin, —Nan rafu non rafuri yoshin chacafo Upa Diosin ato munushua nan unu uhuapa ahuun anu Eufrates anofo ato muputahuun fononfo, —ishon yoia. <sup>15</sup> Nanno nan yoshin chaca rafu non rafuri afin itisharamisifo. Ascan rato hora yafi rato shafatan non rato oshu non rato farimain ato caimanaitian atirifi yora mai anofo la tercera yorafo ato rutushcaini. <sup>16</sup> Ascashon un nica yorahunrasi dos cientos millones ranushumuafu caballo camaqui tsaofo futsafo rutui foshcaquin.

<sup>17</sup> Ascatan Upa Diosin ua ismani nan ranushumuafu yafi ato caballofo un oian iscara, Nan caballo camaqui tsaofoan aton shochi nan chii rucun cuscara cuno oshin shara non tonancoin non chashnanpan shofucumuafu. Ascan nan caballofoan aton mapo masharo mapo ointsa. Aton ashfan murannoashu coin yafi chii uruaino azufre ashfacanun siiquin. <sup>18</sup> Nanfoan yora ichaparasi man namafo. La tercera manifoti man ato namafo. <sup>19</sup> Aton ashfa futan ato inan yorafo rututiro. Aton ina nan rono paupaton ina cuscarafo. Nanfoan yorafo omitsisca huafo nanonfo.

<sup>20</sup> Atirificai afohuunoashu nayamafiacani aton chaca shatuafoa Upa Dios tanashcaquin. Ascatamarocon yoshin chacafo tanamisifo cuscan shatuyamafain oro iyamarai cuno oshopa sharashta non cuno futsan ahuun anu bronce non toquiri non ihuirifi ramihuafo. Asafia nanfoancai ahua oinyamafain nicatirofoma raquiri cahuascatirofoma, —Nan nocon Dios. Non ahuun noiran, —ishon yoimisifo cuscan shatuafoa. <sup>21</sup> Ascashon chaca futsa futsatapafo huamisifo cuscan shatuafoa. Rutumitsamisifo cuscari shatuyamafain shoiantian cuscan shatuyamafain nocofunufu aton ahuinma fu imisifo cuscan shatuyamafain ainfofori nanscarifaifono. Onumisifo cuscari shatuafoa. Ascashu nanfo chaca-coinflashon tsoan aton chaca shatuafoa nocon Ifo Jesucristo tanasharashcaquin.

## 10

*Upa Diosin ahuun oinmatinin nan afu ica papel uhuapama cunua sufia tsoma*

<sup>1</sup> Ascatan un oian Diosin ahuun oinmati afu ica futsa mutsisipacoin nai murannoashu fotoaiton. Coin camaqui fotoaiton ahuun caya un oian iscara. Maiti nanhuanfai ointsa maia. Ahuun fuso fasi chashacoian fari ointsa. Ahuun quishi rafu chi ointsari. <sup>2</sup> Ascashon papel uhuapama cunua sufia tonoshon tsoma. Ahuun tau mumiori ununhuan fumancayan paicain ahuun tau mushquiori mai ano paia. <sup>3</sup> Ascatan oi ashcafinin cuna nan masharo uhuapaton ahuun oi nicatsa. Ascaiton nan siete turuica curushcain oi uhuapaton futsan cuma. <sup>4</sup> Ascacun nan yoirafo cuscan nicashon un cunucuna. Asafia nai ari Dios icarishon oi futsan ua yoiqui isca huaa, —Min rama nica cuscan cunuyamahuu. Aton tsain tsoa tapimayamahuu, —ishon ua yoia.

<sup>5-7</sup> Ascatan Diosin ahuun oinmati afu nai muran icaton mutsisipacoin unuhuan yafi mai ano paishon ahuun mucu mumiori mushainacahuan yoia isca huaquin, —Upa Diosin nipanacaton nai yafi nantifi nai muran icafo onihuafain mai yafi mai anofo onihuafain ununhuan yafi unuhuan muran icafori onihuani. Nanhuunshon un yoiquin isca huai, Upa Diosicai afanan ato manaima. Ahuun yoishomisifo tapimapaoni cuscacai futsafoan tapipaonifoma. Asafia natian Diospan oinmati afu ica futsan ahuun unutaqui manuti chaan chaancaino ato tapimayoni cuscan nantifi nansacoinshquinran, —ishon Diosin oinmatinin ua yoia.

<sup>8</sup> Ascan nan oi nai murannoa un nicaton afanan ua yoia isca huaquin, —Nan Diosin oinmati afu ica unuhuan yafi mai ano nia. Nanno aqui catahuun. Ascashon nan papel sufia tonoshon tsoma fianhuun, —ishon ua yoia.

<sup>9</sup> Ascan cashon Diosin oinmatiqui nocoshon un yoia, —Nan papel sufia uhuapamashta ua inanhuun, —un huaiton. —Fihuu. Ascashon pihuu. Piqui min mui min ashfa muran fata sharacoin fona cuscara. Ascan man

shuashon min mui min shaqui murannoashu mocacoin iquin. Ascashon min tapitiro Diosin tsain shara iconcain. Ascadari min tapitiro nan tsain yoia cuscacoin yorafo omitsiscashcani. Mirifi min tapiaino min fasi shinantiroran, —ishon ua yoia.

<sup>10</sup> Ascacun un papel sufia uhuapamashta fitan un pishon uhuun ashfa muran un mua fata shara fona mutsa. Ascafiacun un shuashon uhuun shaqui muran un mua mocacoin. Nanscarifiai ua yoia cuscan huafain ua isma cuscari uhuun nomuran un nanuashu un unimacoinna. Ascfia nan tsain inon pacoai yoia cuscan yorafo omitsiscashcani. Nan oinquin un fasi shinan. <sup>11</sup> Un asca huano afanan ua yoia, —Diosin ahuun yorafo yoipaiyai cuscan afanan ato yoihuu. Ahuarafo iishquiai cuscan yorafohuunoa yoifain manifotihuunoa yoifain niaifofohuunoaari ato yoihuu, —ishon ua yoia.

## 11

*Nocon Ifo Jesús yorafo yoipaiyai cuscan nocofunu rafutan ato yoishquicani*

<sup>1</sup> Ascatan tsiquiti cuscara tananti ua inan. Ascashon ua yoia isca huaquin, —Dios fu tsainti pushu ahuun chainipa yafi ahuun nashfa muranri tanantahuun. Anoshon Dios cufitiri tananfain ahuun yorafoan ahuutitomai nocon Ifo Dios noiquin fanainshocain a cufiafori ato tanan huahuu tapishquin. <sup>2</sup> Ascashon Upa Diosin yonoa cuscan Israelimafo pushu umainti fusti nocoshcani. Fari rafu non fusti nushmancayan Israelimafoan Jerusalén chacana huashcani. Ascan nan Israelimafoancai Jesús icoinra huafoma ascashucaí Dios fu tsainti pushu muran tsoa iquitirofoma. Ahuun unmainti fusti fotirofo. Ascacun unmainti tananyamahuun. <sup>3</sup> Ascacun nantianri un nocofunu rafu Jerusalén ano nichishquin. Nanno icafo un ato yoipaiyai cuscan nan rafutan ato yoishquicani. Fari rafunon fusti nushmancayan atohuunshon nan Jerusalén ano icafo un ato yoishqui. Ascashon nan rafutan sahuuti chocashta sahuucashon atohuun ramapaicoinquin ato ismashcani. Uhuun curushhuunshonri ahuamamishti huashcaniran, —ishon Diosin ua yoia.

<sup>4</sup> Ascashon Diosin ahuun yorafo yoipaiyai cuscan nan rafutan yoimisifo. Nan rafu nii ahuun anu olivo cuscara. Nan olivo shuni ichapaya. Nanscarifi aquin nan rafutan Diospan Yoshin Shara nanuafu. Nan rafu lamparina ota cuscara. Faquishiaíno lamparina otacun non shafacafi oincointiro. Nanscarifiai futsafoan nocon Ifoan tsain shara tapiyamaífoan nocon Ifoan ato yoipaiyai cuscan nan rafutan ato tapimatiro. Ascashu man itisharamisifo ahuun Ifoan tsain shara yorafo yoishcaquin. <sup>5</sup> Tsoara futsan nan Diospan tsain yoimisi rafu noicasmafain chaca huapaiyaiton nan rafutan aton ashfa muranshon chii siatanaino ato namashquin. Ascacun tsoan ato chaca huapaiyai nan yorafin naashquiquin.

<sup>6</sup> Ascashon Upa Diosin ato yonoaino nan rafutan Diospan tsain futsafo yoiaítian aton tsainmansi yoitirofo afanan oi fuyononma. Ascatan unufo yafi íanfo non unuhuan nanfori aton tsainmansi unu fiananan huariscatiro imi non. Asca huapaiquiri aton tsaimansi pau futsa futsa-tapafo yorafo fuchimatiro.

<sup>7</sup> Ascano Diosin ahuun yorafo yoipaiyai cuscan nan rafutan ato yoiquin anaitiano nan yoshin chaca quininhuan faquish murannoashu atoqui nocoshon ato rutupai oa. Ascashon man ato rutua. <sup>8</sup> Ascatan nan rafu Jerusalén anoashu naacanashu aton caya fai ano racafo. Nan-noshorifi noco Ifo mastanifo. Ascacun Jerusalén ano icafo yoitirofo nan Sodoma yafi Egipto anoafo cuscara. Nannoshon fasi chaca huapaonifo. Dios yafi ahuun yorafo noicasmapaonifo. Asca Jerusalén anoafofin nanscarafoquin. Ascacun nannoashu nan rafu naacanashu aton caya fai ano racafo.

<sup>9</sup> Ascacun maifoti yafi manifoti tsain futsa futsatapafafo nan Jerusalén ano ichananfo nan rafutan aton caya oinpai fuafo. Ascafia niaifofoan yonocun tsoancai aton caya mai huatiro icama. Osha rafu non fusti nushmancayan aton caya racacun oinriafo. <sup>10</sup> Ascano nantifi yorafo fasi unimacaquin yoiafo isca huaquin, —¡Aichofain! Nan Diosin tsain yoimisi rafutan nocon omitsisca huamisifo cuscan afanan noco asca huacanimaquin, —icashu yoinanfo. Ascatan unimacaquin ahuarafo cashman afiranan inanonanfo.

<sup>11</sup> Ascafiaifoanno osha rafu non fusti nushmancayan finontan Upa Diosin ato nimariscatanaino funinaca huanafafo. Ascaiton oincani fasi ratucoincani fiisicani. Taritaricafo. <sup>12</sup> Ascan nai muran Upa Dios icariashu fasi oi ashcafinin ato yoiaton. Nan rafutan nicafo. Ato yoiquin isca huaiton, —Nuri fucahuun, —ato huatapaiyaino ato noicasmaifoan oiainfoan nan rafu atomaquinoashu coin muran Upa Dios icari foafo.

<sup>13</sup> Fotapaiyaifoanno mai ano fasi curushcain naiyanaiyaishquin. Ascaino atirifi pushu Jerusalén anoafo maocomushquiai cuscan un oinyoa. Ascaino siete mil yorafo man naafo. Nan tushuafo fasi ratucoianfo, —Shinancapon. Upa Diosin nai muran icaton ahuamamishti huatiroan, —icashu yoinanshcani.

<sup>14</sup> Ascatan nan mai anoashu omitsiscayoi rafufiashu samamashtacoin afanan omitsiscashquin.

*Diosin ahuun oinmati afu nai muran imisiton ahuun unutaquin manuti chaan chaan aca*

<sup>15</sup> Ascaino Diosin oinmati afu ica futsan ahuun manuti chaan chaan acaino nai muran Upa Dios icarishon oi ashcafinin yoiafo isca huaquin,

“Natian nocon Ifo Diospan Facu nantonfin nantifi yora manifoti ato iquina. Ascashu arusu fusti aton niaifo unupacunacamaran,”

ishon yoiafo. <sup>16-17</sup> Ascatan nan Jesús icoinra huaa cushumisifo veinte cuatro nocofunufu aton tsaotifoqui Dios icano tsoafo. Ascashon fushonpacufoantan Upa Dios yoiafo isca huaquin,

“¡Aicho! Min nocon Ifo Dios min ahuamamishti huatiro. Min curushhuunshon natian nantifi manifoti min ato iquina. Ahuashta min oni huataima min iyopaonishaquin. Natianrifi min ipanaca. <sup>18</sup> Manifoti miqui sinamisifofia. Ascan natian mirifi min atoqui sinaquin min ato onaintimashqui. Nantianrifi mia tanamisifo min ato ahuara inansharashquin. Ascashori nan min tsain yoimisifori inansharafain mia icoinra huafoti nan min ato yoia cuscacoin amisifo inanfain ahuamafashon mia tanamisifo yafi niaifofoan mia tanamisifori nanfo min ato inanshquin. Ascashon nantifi mia tanamisifo min ato inansharashquin mifu ipanonfo. Nantianri nan

yora chaca huamisifori min ato onaintimashqui omitsis-capanacafo muran fotononfo,”

ishon yoia.

<sup>19</sup> Ascaino Diosin icaria Dios fu tsainti pushu fupucuaiton un oian. Nan Upa Diosin Israelifo yononi cuscan cunuacua cashon muran nanuaiton un oiainno canan facaicain nai turuica curushcoin icain mai nayanaiyaicain unu matsi tocorofo nai murannoashu mai ano pacui.

## 12

*Ainfonyafi famanhuan cuscara nai murannoa Juanpan oinni*

<sup>1</sup> Ascatan afanan uhuun namapan cuscaraton ua oinmana cuscan un mato tapimai. Nai murannoa ahuara tsoan oinyomisima cuscara un oian. Ainfoan ahuun saya chashacoin fari ointsa sahuuashu oshu camaqui paia ointsa. Ascatan doce fishi ointsafo ahuun maitihuun nua maia. <sup>2</sup> Nan ainfoan facu nanuashu man facu isinhuaicaino fasi fiisica.

<sup>3</sup> Ascatan nantianri nai murannoa ahuara tsoan oinyomisima cuscara un oian. Nan Satanás yoshin chaca famanhuan cuscarafishu oshicoín siete mapoya. Ascashon ahuun mapotifi niaiffoan maiti maia. Ascatarifi mucu rafuti mashoya. <sup>4</sup> Ahuun ina sharafoaino atirifi fishi nai murannoashu mai ano pacua. Nanscarifiai Upa Diosin ahuun oinmatifo Satanás atirifi ato chaca huamani. Ascan ahuunoashu a cuscara yoshin chacafori ato imano nai muranshon Upa Diosin ato potafain mai ano ato nichini. Ascacun nannoshon nan Satanás famanhuan cuscaraton ainfo facu caiyainton cushua caintanaiton facu piishquin. <sup>5</sup> Ascashu furonan-facu caian. Nan facu nantifi manifatifain aton niaifo iqui. Ato cushusharashquin tsoashta yoitima inonfoma. Ascacun Upa Diosin icano ahuun facu ihuiriscatana afu niaifo inon. <sup>6</sup> Ascacun tsoan istaipama ano Diosin nan ainfo ati shara huashoni nanno ichonon. Nan mai ano fari rafu non fusti nushmancayan Upa Diosin nan ainfo cushusharafain pimasharani ahuuscanonma.

<sup>7</sup> Ascashori un mato tapimai ahuuscashomain nai muranshon nan yoshin chaca Satanás famanhuan ointsaton nocon Ifo Diosin finon-paiquin. Ascaiton Upa Diosin ahuun oinmati afu nai muran icafoan aton niaifo ahuun anu Miguel Diosin nichian. Satanás yafi yoshin chacafu Miguel ahuun oinmatifoya potananpainifo. <sup>8</sup> Ascafia Miguel futan Diospan oinmatifoan Satanás yafi ahuun yoshin chacafu ato finon-coinnifo. Ascashon nai arishon ato potapacuni afanan ari inonfoma. <sup>9</sup> Ascacun Miguel futan Diospan oinmatifoan ato nai muranshon mai ano potani. Nan famanhuan cuscara nan rononhuan shuni ahuun anu futsa Satanás nantifi manifoti ato parafafainmisi.

<sup>10</sup> Ascatan oi uhuapa nai murannoa un nica. Isca huaquin yoiaiton, “Nan yoshin chaca Satanás nai muranshon man potafo. Nanton Dios ano cashon Jesús icoinra huafohuunoa tsain chaca yoi isca huaquin, ‘Mia icoinra huafoan fasi chaca huaran,’ ishon nocohuunoa shafatifi yafi yamutifiri yoifafaini. ¡Aicho! Ascafia natian Upa Diosin Satanás ahuun curush man shatumaticoinna afanan nan yoshin chaca nocon ifo inonma. Ascan ahuun Facu nan nocon Numamisi Cristo afincoin nantifi man ato isma ato iquishquin. Ascacuai afanan Satanás Jesús icoinra huafoan aton ifo itiroma.

- 11 Ascacun nocon yorafoan fasi icoinra huacoinshon yoimisifo isca huaquin, ‘Nocon Ifo Jesús Diospan facu nan chashoan facu cuscara nocohuunoashu nani nocon chaca soashoshquin,’ ishon yoifoanfafaincani. Ascashon Jesushuunoa yoimisifo cuscan yafi ahuun imi focain ato nashonihuunshon Satanás finoncointirofo afanan ato ahuusca huanonma. Ascacun yoitirofo isca huaquin, ‘Nan icoinra huamafoan noco rututirofia noncai ratuyamacai nocon Ifo Jesús potapacunacamaran,’ ishon nan icoinra huafoan yomisifo.
- 12 Ascacufin man nai muran Dios ari icafo unimacahuun. Nan icoinra huafoan Jesushuunshon man Satanás finoncoian. Ascashon Satanás nai muranshon man potafo. Ascafia nan mai ano icafoqui man noco. ¡Ohuashta! Mai anoafo yafi unuhuan anoafori fasi omitsiscashcani. Satanás man tapia ahuutian-ran Jesús mai ano nocoriscashon omitsiscapanacafo muran a potashquin tsoa afanan chaca huamanonma. Nanscara man tapiashu Satanás fasi sinacoinquin nantifi manifoti ato omitsiscamapai Jesús fu ipanonfomaran,”

ishon yoia.

<sup>13</sup> Ascatan a mai ano potafo man tapishon Satanás shinanquin isca huaa, —Nan ainfo furonanfacu caian un mufoicai aqui nocoshon omitsiscahuashquin, —ishon shinan.

<sup>14</sup> Ascacun Diosin nan ainfo tutumanhuanun pui chainipa cuscara inan ahuun noyacaini cashu tsoan istaipama ano iyonon. Nannoshon Upa Diosin fari rafu non fusti nushmancayan cushusharayoa nan yoshin chaca rononhuan cuscaratón ahuusca huanonma. <sup>15</sup> Ascano nan rononhuan ahuun ashfapan unuhuan nachian fai tahuain cuscara ainfoqui nocoshon asanon. <sup>16</sup> Ascafia Upa Diosin yonoa nan ainfoqui faitahuan nocotama mai muran man foa ainfon asanonma. <sup>17</sup> Ascacufin Satanás famanhuan cuscara sinatapacoin ainfo yafi ahuun funafo rutupai caa. Ascashon nan Diosin yonoa cuscan amisifo yafi Jesús noco Ifoan noco nashoniran huamisifo nanfofin ainfoan ahuun facufo. Nanfo Satanás ato cuyopai caa. <sup>18</sup> Ascan unuhuan cusumunri nan famanhuan cuscara Satanás nishon ato manai.

## 13

### *Unuhuan murannoashu yoina cuscara musucoin cainacahuana*

<sup>1</sup> Ascan uhuun namapan ointsa ua oinmana cuscan afanan un mato tapimai. Unuhuan cusumun un niano yoina cuscara musucoin unuhuan murannoashu cainacahuanaiton un oian. Ahuun caya fustifiashu siete mapoya. Ascan ahuun mashori diez ya. Nan ahuun mashoti niafoan maiti maia. Ascanshon Upa Diosiqui tsain chaca huaquin ahuun fumananfoqui cunu futsa cuscarafu nutan. <sup>2</sup> Nan yoina cuscaratón ahuun caya masharo leopardo ointsa. Ahuun tau rafu oso masharona ointsa. Ascan ahuun ashfa masharo leonna ointsa. Ascan nan Satanás yonoa ahuun curushhuunshon nan yoina pofu cuscaratón tsoan atiroma cuscan nanto huatiro. Ascashu ahuun yorafo aton ifo itiro ato yononon.

<sup>3</sup> Ascaiton nantifi yorafo manifoti anoafoan oianfo ahuun mapo futsa amaquinao rutuafo shinantsafishu man caya. Ascacun yoiafo isca huaquin, —¡Aira! ¡Oincapon! Ahuuscashutsi ahuun mapo futsa man



rutucoinfiafo natian afanan man niaran, —icashu yoinanfo. Yoiquin asca huacatan nanton yoia cuscacoin tanafo. <sup>4</sup>Ascan tanacashon yoiafo, —¡Aicho! Satanás ahuun shinanhuunshon na yoina pofu cuscaraton tsoa futsan atiroma cuscan huatiro. Ascacun ahuunoashu nantifi yorafo yonotiro. Ascan Satanás nocon Ifocoin. Noco yoipaiyai cuscan non nica-cointiro. Nan yoina pofu cuscarari nocon Ifo. Tsoancai a finontiro. Tsoa futsacai na yoina pofu cuscarama. Tsoancai a rututirofomaran, —ishon yoiafo.

<sup>5</sup>Ascashu nan yoina pofu cuscara fasi cacapaimisi ica. —Tsoa futsacai ua cuscaramaran, —ishon yoia. Nantori Diosiqui fasi tsain chaca huamisi. Ascashon Satanás yonoa fari rafu non fusti nushmancayan nan yoina pofu cuscaraton nantifi yorafo ato iquina. <sup>6</sup>Nantianri Dios roafain ahuunoa tsain chaca yoifain nan icanoahuunoa tsain chaca huafain nan icanoafoquiri tsain chaca huai. <sup>7</sup>Ascan Satanashuunshon Jesús icoinra huafo mai ano icafo ato rutumashquin. Ahuunshon nantifi manifoti yafi nantifi tsain futsa futsatapafa yoimisifoan aton niaifocoin inon.

<sup>8</sup>Ascan nanfoan nantiffain nan yoina pofu cuscara noishcani. Ascashon yoiquin isca huashcani, —Minfin nocon Diosiquin, —huashquicani. Ascaifoancai nocon Ifo Jesús aton anu ahuun libro muran cunuima afu nipanonfo. Mai oni huataima Jesús nantifi icoinra huanonpacoaifoan ato anufo ahuun libro muran iquisi cunuyoni afu ipanonfo. Ascashu nan chashoanun facu cuscarashu noco nashoni noco nimapacushquin.

<sup>9</sup>“Man pachoyaquin ua nicacahuun. <sup>10</sup>Nan yoina pofu cuscaraton Jesús icoinra huamisi futsafo cunu muran iquimapaiquin iquimashquin. Ascan ato rutupaiquiri ato rutushquin.”

Ascacia uhuun yoramishtichin shinanchacayamacahuun. Nan non Jesús icoinra huafoti non omitsiscafiaquin non tunucoinshquin nocon Ifo Jesús cachiquiri huashquima.

<sup>11</sup>Ascatan un afanan oian yoina pofu futsa cuscara mai murannoashu caiyainton un oian. Chashoan facu cuscarafiashu masho rafuya. Nan Satanás famanhuan cuscaraton ahuun tsain fasi pofucocin. Nanscarifiai nan yoina futsa cuscaraton ahuun tsain pofucocinri. <sup>12</sup>Nan yoina pofu unuhuan murannoashu cain tauaton ahumamishti huafain yorafoti iquina cuscan nan yoina pofu futsari nanscara huaa. Ascashon nantifi maifoti anoa ato yonoa isca huaquin, —Nan yoina cuscara mapo ruranfo man naacoinfiashu afanan man nia. Nancai noco iforan nocon Diosiran huacahuun, —ishon ato yonoshquin. <sup>13</sup>Ascashon ahumamishti tsoa atiroma cuscan ato isma. Yorafoan aton ointaifiri nai murannoa chii pacumana. <sup>14</sup>Satanashuunshon nanscara huariaquin yorafo man paran Diosiran huanonfo. Ascashon ato yonoa, —Nan yoina pofu cuscara nopo cunopaton man rutufiafo afanan nimisi nan ointsa uhuapacoin ramihuacahuun, —ishon ato yonoa.

<sup>15</sup>Ascacashon ato yonocun Satanashuunshon man ramihuafo nan yoina pofu cuscara ointsa man shacaimana. Ascano shacaitan nan ramihuafoan tsaincoinin yoia isca huaquin, —Ua ifocahuun. Min Diosiran ua huacahuun. Tsoan ua noicasmaquin nannori yoicasmaiton nan rutucahuun, —ishon ato yonoa.

<sup>16</sup>Ascatan nan yoina pofu cuscara futsa nan mai murannoashu oaton yoiqui isca huaa, —Maton mucu numiori iyamarai mato fu-

mananqui nan yoina pofu cuscara futsa unuhuan murannoashu oaton ahuun anu iyamarai ahuun numero nantifi sellopan ato nutacahuun. Facufo nutafain iyoafofori nutafain mafo ichapaya nutafain ahuo-mafo nutafain oinmatifomari nutafain oinmatifo nutacahuun. Ascan tsoashta finonmayamacahuun. Nantifi nan yoina pofu futsan ahuun anu sellopan nutacahuun matoquin, —ishon ato yonoa. <sup>17</sup> Ascan tsoa sellopan anu nutama atocai ahuara fipaifiaquicai fitiroma. Ascashuri ahuara inan mitsatiroma ahuun rafanan tushu yafi sahuuti ahuara futsa yopai cuscan fishquin.

<sup>18</sup> Ascacun shinansharacahuun. Ratoranfoan Diosihuunshon shinansharaqui tapitirofo nan yoina pofu cuscaratón ahuun numero tapifain ahuun anurifi tapitiro. Ascan nan yoina pofu ointsafishu noco-funucoin. Ahuun numero 666.

## 14

### *Jesús icoinra huafoan 144,000 fanainshocani*

<sup>1</sup> Ascatan uhuun namapan ointsa ua oinmana cuscan afanan mato tapimai. Chashoan facu cuscara nan Jesús machi ahuun anu Sión ano nia un oian. Nanno 144,000 ahuun yorafo afu nia. Ahuun anu yafi Apa Diosin ahuun anuri aton fumananqui cunua. <sup>2</sup> Nantianri un nai murannoa oi uhuapacoin nica. Unuhuan ponoain nicatsa nicafain turuica achacoin nicatsa. Nan oi uhuapa un nica yora ichapa fanaincani manuti ichapari manuafo. Nan manuti ahuun anu arpa guitarra cuscara.

<sup>3</sup> Fanainti funa tsoan nicayomisima Upa Diosin ahuun ointaifi fanainshofo. Ascaifoanno nannori nan rafu non rafuri Diosin onihuani yafi Jesús icoinra huafoti cushumisifo veinte cuatrofoanri arifi nicafo. Nan 144,000 Jesús fu machi ano niafo. Ascan nanfoansi nan fanainti funa tapianfó. Jesús ato nashoni aton chaca soashoshquin Satanás afanan aton Ifo itamarocon nan aton ifocoin inon. Tsoa futsacai nan fanainti funapan atofu fanaintiroma.

<sup>4</sup> Nan 144,000 yorafoan nocon Ifo Jesús nan chashoan facu cuscara tanacoinmisifo. Chaca shinantamarocon Jesushuunoa shinanfaimisifo. Afin ato numani ato nashonishaquin Apa Diosin yorafo non ahuun yorafori inon. Ato catoan ahuun yorafo icaino ato yoia cuscan anonfo. Nanfoancaiyainfoqui chaca huamisima. Jesús caiquiri afu foanfainmisifo. <sup>5</sup> —Nanfoan chani yoiaran, —ishoncai tsoan atohuunoa yoitiro. Jesushuunoaishu isharamisifo.

### *Diospan Furun yafi ahuun oinmati mucu fustiti non mucu foshca fusti a fu nai muran imisiton yoirafo cuscan*

<sup>6</sup> Ascatan un oian Diospan oinmati futsan afu nai muran ica fasi cuyacoin noyaino nantifi yorafo maifoti anoafó tsain shara ato yoinon. Caiuoti yoifain shoco futsafoti yoifain nantifi tsain futsa futsatapafo yoimisifoti yoifain manifotiri ato tsain shara yoinon. Upa Diospan tsain nipanacahuunoa ato yoia. <sup>7</sup> Oi ashcafinin ato yoia isca huaquin, —Diosquiri shinacahuun. Mato yonoa cuscan man ayamashu aqui ratucoincahuun. Nicacoinsharacahuun. “Min sharacoin min ahua-mamishti min atiroran,” huacahuun. Natian Diosin nantifi chacamisifo onaintimai. Nanton nai onihuafain mai onihuafain unuhuan saoya onihuafain unu tsosi sharari onihuani. Ascan a noicahuun. A yoihuu

isca huaquin, “Min sharacoin min ahuamamishti atiro. Min nocon Ifo Dios shararan,” huacahuun, —ato huaa.

<sup>8</sup> Ascatan Diospan oinmati futsan afu nai muran ica ahuun tsain anaitishon futsan nocotoshishon isca huaquin yoia, —Nan pushurasi uhuapa ahuun anu Babilonia. Yorahuanrasi nan pushurasi uhuapa ano ica. Nan yorafoan fasi chaca huamisi. Nanfoan chaca huamisi cuscan manifotiri chaca huama. Asca huaifoan Upa Diosin ato onaintimai afanan ipanonfoma. ¡Aichofain! Diosin ato onaintima afanan pushurasi Babilonia yamairan, —ishon Diosin oinmatinin nai muran icaton yoia.

<sup>9-11</sup> Asca huatan afanan Diosin oinmati futsari nai muran icaton nocotoshishon oi ashcafinin yoia isca huaquin, —Tsoan na yoina pofu cuscara yafi ahuuna ointsa ramihua nicacoiainno yoimisi isca, “Nan uhuun Dioscoinran,” ishon anori yoiquin aton mucu iyamarai aton fumananqui na yoina pofu cuscara ahuun anu cunua Upa Diosin atoqui sinacoinshquin. Naafoanno Diosin ato fasi curushcai onaintimacoinshquin. Chi muran ato potafiacai cuyonacama. Jesús nan chashoan facu cuscara yafi ahuun oinmatifo afu nai muran icafo aton ointaifi ato omitsiscapanacafo muran potashquin. Isin muuqui unupacunacafoma. Tsoan ato numatiroma. Nan yoina pofu cuscara yafi ahuuna ointsa ramihua ifoanfo ahuun anu aton mucu iyamarai fumananqui cunua. Ascacun shafatifi yafi yamutishonri omitsiscapacoinshcani. Tsoan tunupacunacafomaran, —ishon Upa Diosin ahuun oinmati nai muran noaton yoia.

<sup>12</sup> Ascancunfin uhuun yoramishti maton ointi fupuima sharacahuun. Omitsiscafiaquin tunucahuun. Diosin noco yononi cuscan acahuun. Nocon Ifo Jesús cachiquiri huayamacahuun.

<sup>13</sup> Ascatan un nica oi nai muranshon ua yoiaiton, —Un mia yoiiai cuscan cunuhuu. Ratoranfo nocon Ifo Jesushuunoashu nai unimacoinshcaniran, —ishon ua yoia. —Ainfain. Iconfinquin. Naacanashu afanan omitsiscatirofoma. Upa Diosin ato ama cuscan acoinnafo. Nantianri unimacoinshcani. Nanfoan futsafo shara huashomisi cuscan Diosin nanfo ointiaquimamisima. Ascan Upaqui nocoifoan ato inansharashquinran, —ishon Diospan Yoshin Sharanun yoia.

<sup>14</sup> Ascatan uhuun namapan ointsa oian cuscan afanan mato yoinon. Un oian nai coin oshopa camaqui nan Diosin catoan Jesús ointsa un oian. Niaifon maiti orocoin maifain nupu ushtia cunocoin tsoma. <sup>15</sup> Ascan ahuun oinmati futsan afu nai muran ica Dios icanoashu caa nocon Ifo yoishquin. —Natian man ica. Nan maifoti ano man fanafu oshian. Natian chituaintian. Ascan min nupu ushtia tsoatan tashtushon ichahuahuu, —huaa. Nannori yoifiaquin fanacoinhuunooa yoiama. Diospan yorafohuunooa yoicoian isca huaquin, —Natian nantifi Jesús icoinra huafo ihuihuu Upa Dios icano ichananshu afu ipanacaforan, —ishon yoicoian. <sup>16</sup> Asca huatan nan nai coin camaqui tsaoshon ahuun nupu curushcai fucoa. Diosin mai anoafu tashtua cuscan huaquin aton icha huashquin. Nopucoinhuunooacai yoiama ahuun tsainhuunooa yoia. Afn yoiaitian ahuun yorafo ichanan huai.

<sup>17</sup> Ascatan un oian Diosin oinmati futsari afu nai muran icanoa caa. Arifi nupu ushtia cunocoin tsoma. <sup>18</sup> Ascatan afanan Diosin oinmati futsari Dios cufiti anoashu caa. Nanton Diosin yonooa cuscan chihuunshon yorafo onaintimatiro. A oinmati nupu ushtia cunocoin tsoamashon oi ashcafinin yoia, —Nan fimi ahuun anu uva nantifi oshiancoin. Ascan

mushtushon icha huahuu, —ishon yoia. Nanscarifiai Upa Diosin ahuun oinmatihuunshon a nicacasmamisifo ichanan huashquin.

<sup>19</sup> Asca huatan nan oinmati ahuun nopy ushtia cunocoin tsoomashon uvatifin shatushon prensa muran pota ahuun unu fonon. Nanscarifiai Diospan oinmatifo afu nai muran icaton Diosin tsain nicacasmamisifo ichanan huai. Ascan Diosin atoqui sinacoin ato onaintimai. <sup>20</sup> Diosin icanoshon ato onaintimanama. Futsafoan ato rutushcani aton imi ichapa foshquin. Ascaran tsoan oinyomisima. Aton imi noacoin caballo fasi tusanancoian. Ahuun chai trescientos kilometro.

## 15

*Upa Diosin ahuun oinmati siete a funai muran imisifo afanan ato yonoa mai anoafu onaintimanon*

<sup>1</sup> Ascatan uhuun namapan ointsa un ahua futsan un oian. Tsoan oinyomisima cuscara nai muranno a un oian. Oin uhuun nomuran, — ¡Uru! — un ica. Natian un oian cuscan mato tapimanon. Nicacahuun. Diosin yora yoitimashunifoqui fasi sinaiquin. Ascacun ahuun oinmati siete afu icafo ato yonoa nantifi mai anoafu onaintimai omitsiscanonfo. Nan ahuun unutaqui Upa Diosin ato onaintimai. Afanancai atoqui sinaiquin ato onaintimashquima.

<sup>2</sup> Un oian unuhuan pusiquima raca unuya chi osian ointsa. Nanno yorahuanrasi nia. Na yorafoancai yoina pofu cuscara yafi ahuuna ointsa ramihua ahuun numero atoqui cunu nutanmisima. Nanfoan ato shuhuincoianfo. Nan unuhuan pusiquima raca unuya chi osian ointsa fumancayan maniafo. Upa Diosin atoti manuti inanpacua. Nan manuti guitarra cuscara ahuun anu arpa. <sup>3</sup> Aton arpa tsoamacashon Diospan oinmati Moisés yafi Jesús nan chashoanun facu cahuanshara cuscara fanainmisi cuscan atorifi nannori fanaincani isca huaquin, “Ifon, mincaifin Diosiquin.

Min ahumamishti atiro.

Min amisi cuscan sharacoin.

Tsoan futsacai atiroama.

Min manifoti nantifi aton niaifocoin ipanaca.

Min shinanmisi cuscan cayacafi iconcain.

<sup>4</sup> Ifon, nantififain miqui musucaquin

mia nicasharapainonfo.

Min ahumamishti tsoan oinyomisima min atiroquin.

Nantifi yorafoti anori yoipacunonfo.

Mirus fusticai min chaca huamisima.

Nantifi manfoti miqui funonfo.

Min shara fustisi huamisi.

Nantififain oinquin isca huashquin,

‘Min sharacoin. Min nocon Ifocoinran,’ ”  
ishon mia yoishcani.

<sup>5</sup> Ascatan afanan un nai muran Diosin icano oian. Ua fupushona Diosin icanocoin un oionon. <sup>6</sup> Dios ica murannoashu ahuun nai oinmati siete nantifi chifi ichananfo. Nanfoan mai anoafu onaintimai omitsiscanonfo. Sahuuti oshopa chainipa chashai sahuufain oro cuscara nonushumua sahuuafu. <sup>7</sup> Nan rafu non rafuri Diosin onihua futsan Diosin oinmati afu nai muran icafo siete atoti oro tutso inanca. Diosin nan nipanacaton icoinra huafoma mai anoafu sinacoinquin nan

cuchanfo muran ahuara chacacoin fospihuamua atoqui ocano omitsiscashcani.

<sup>8</sup> Ascatan nantian Diosin chashaiton ahuamamishti atiro cuscan ato ismaino nan ica muran coinmahuan fospia nashfiain. Ascan mai ano nan Dios nicacasmamisifo Diosin oinmatifo afu icafoan ato onaintimai omitsiscanonfo anaitiataimanocai tsoa Dios icano iquiyotirofoma.

## 16

*A nicayosma shunifo Diosin ato onaintimai omitsiscapanonfo*

<sup>1</sup> Ascatan Dios icaricoian oi ashcafinin un nica. Diosin oinmatifo nan siete afu nai muran icafo ato yoia isca huaquin, —Diosin a nicacasmamisifo mai ano icafo atoqui sinaquin nan tutsofo ahuara chacafo fospihuamua atoqui ocacahuun, —ishon ato yonoa.

<sup>2</sup> Nicacashon Diosin oinmati futsan tauhuaqui ahuun tutso nai muranshon mai ano oca. Nan yoina pofu cuscara ahuun anu aton mucu iyamarai aton fumananqui cunuafo yafi afin ramihuamua ointsa ifoanfono nanfo aton yoratiso coo suyacoin fuchiriscata isincoin tunutirofoma.

<sup>3</sup> Ascatan afanan Diosin oinmati futsan ahuun tutso nai muranshon unuhuan muran oca. Ocaino unuhuan fianananriscatana nocofunu rutuano ahuun imi foa ointsa. Ascanofin nantifi nan unuhuan murannoashu nai futsuafo.

<sup>4</sup> Ascatan afanan Diosin oinmati futsan ahuun tutso nai muranshon unufoti yafi mai murannoashu unu afaifotiqui oca. Ocano unufoti yafi mai murannoashu unu afaifotiri fianananriscatana imi ica.

<sup>5-6</sup> Nantianri oinmati futsan Dios fu tsaincaiton un nica. Nan unu cushumisiton isca huaquin yoia,

“Upa Diosin tsoa min oni huataima min iyopaoni. Min ipaoni cuscan nantianri min nipanaca. Min shara fustisi imisi. ¡Aicho! Nantianri mia nicacasmamisifo min ato onaintimai cuscan iconcoin. Aton chaca shatucanashu min Furun Jesús Ifocoianfo non min tsain aton yoimisifori nan icoimaran huafoan ato rutuafo. Ascacufin min icoinra huafoama namai cuscafin iconquin. Min yorafo fasi omitsiscamamisifo ascan min nan icoimaran huafo onaintimai omitsiscanonfo. Min cayacafi iconcoin ato onaintimaran,”

ishon Diospan oinmatinin yoia.

<sup>7</sup> Asca huashon Dios icanoa nai muran nan cufiti ano fustishosi Upa Diosin cufinmisifo anoa un futsanfo nica yoiquin isca huaifoan, —Nocon Ifon Diosin, min nai oinmati yoia cuscan iconcoin. Mia nicayosma shunifo min ato icon cayacafi ato onaintimairan, —ishon yoiafo.

<sup>8</sup> Ascatan Diospan oinmati afu ica futsan Dios icarishon ahuun tutso muranno ahuara chaca fari camaqui ocashquin. Ocano farihuunoashu yorafo coa. <sup>9</sup> Farin fasi shanacoquin yorafo coa. Coaino omitsiscafo. Man tapiamisifo Diosin ato onaintimai aton chaca shatuafo. Dios ifoantamarocon. —Diosin noco chaca huai. Ahuun cuscaramain Diosiquin. Chacacoinran, —ishon yoiafo. —Diosifin sharaquin. Nantofin ahuamamishti huatiroquin, —ishoncai tsoan anori yoipaicanima.

<sup>10</sup> Ascatan Diosin oinmati futsan Dios icarishon ahuun tutso muranno nan yoina pofu cuscara chacacoin yafi afu icafo ato camaqui oca. Ocano nan yoina pofu cuscara chacacoin ifofo icano faquishcoin ica.

Ascan nantiffain isincuin muafo tunutiroma. —Aripun, —iriafo. <sup>11</sup> — Diosin noco asca huua. Ascan nocon yoratisyon coo suyacoin non isin tunutiroma. Nan nai murannoa Dios chacacoinran, —ishon yoiflashu aton chaca shatuafo.

<sup>12</sup> Ascatan Diosin oinmati futsan nai muranshon ahuun tutso murannoa unu uhuapa ahuun anu Eufrates amuran oca. Ocano nan Eufrates nutsoriscatana man mutocaina. Nan niaifo rafu non fusti fari oaiquirinoashu fucani. Ascan Eufrates nutsocoian aton ranushumuafu ya pocufaitirofo. <sup>13</sup> Ascano un yoshin fasi chacafo rafu non fusti fushco ointsafu un oian. Futsan famanhuan ointsa nan Satanás ahuun ashfan murannoashu caincaina futsan nan yoina pofu cuscara ahuun ashfan murannoashu caincaina futsan nan fuparapaimisiton, —Unfin Diosin tsain mato yoimisiran, —iflashu chanimisi yoshin chaca ahuun ashfan murannoashu caincaina. <sup>14</sup> Nan rafu non fusti fushco ointsa yoshin chacafoan ahua tsoan oinyomisima cuscara ahuamamishti yorafo is-mafo. Nantifi niaifofo manifoti ano focani ato ichanan huamai nocon Ifo Jesús ahuun yorafo rutunonfo. Nantianri nocon Diosin ahuamamishti amisiton ahuun yono ismashquin.

<sup>15</sup> Asca huaifoan nantianri nocon Ifo Jesús noco yoipaiyai cuscan un maton yoinon. Isca huaquin yoia, —Ua nicacahuun. Yomutson tsoan tapimaima pushu muran iquinon. Samamashta pushu muran iquiriscatiro ahua onushquin. Nanscarifiai un tsoa tapimaima nan un matoqui nocoriscaitian. Un matoqui samamashta nocoriscashquin. Tsoan itisharacacaini ua tanasharashon manasharacoian fasi unimashquin. Ascan tsoan ascata ma itisharayamaino un matoqui nocoriscaitian nantifi yorafoan ointirofo tsoan ua tanasharama. Ascashu fasi rafipaitiroran, —ishon yoia.

<sup>16</sup> Nannori nocon Ifon Jesús yoiflashu nan rafu non fusti yoshin chacafoan nantifi niaifofo maifoti anofo ichanan huua Diospan yorafo rutupaiquin. Ato ichanan huamai nan mai ahuun anu Israelifo tsainman Armagedón.

<sup>17</sup> Ascatan Diospan oinmati futsan ahuun tutso nai muranshon oca. Asca huatan Diosin icarishon Upa Diosin fasi oi ashcafinin yoia, —Mun aca. Natian man anaitiaran, —ishon yoia. <sup>18</sup> Ascatan fasi curushcain canan pishiiriai icain ahuafo achacoinfo yafi fasi nai turuicacoin icain mai nayanaiyaiqui curushcain. Ascacai tsoan mumisima. Nocofunu onihuaquin tau huanitian natianri mai nayanaiyaiqui ascaitocai tsoan muyomisima.

<sup>19</sup> Ascan nan pushurasi uhuapa ahuun anu Babilonia ano nayanaiyaicaino mainhuan nantiocoin rafu non fusti toshamanhuan cainni. Maifoti anori aton pushurasifo nan mai nayanaiyaiquin maocomua. Diosin na pushurasi Babilonia anofo chaca huamisifo cuscan ointiaquimamisima. Ascan atoqui fasi sinamanhuanquin ato onaintimacoin omitsiscanonfo. <sup>20</sup> Nantianri unu potofotin yamariscatashquin ano icaforti nai futsuafu. Nantifi machifotiri yamariscatashquin. <sup>21</sup> Nantianri unu matsi tocorofo uhuapacoin aton ihuu cincuenta kilos cuana nai murannoashu yorafo fuchi pacua. Ascafia aton chaca shatutamarocon, —Diosin fasi chacacoin. Nan unu matsi tocorofo uhuapacoinun noco omitsiscamairan, —ishon yoiafo.

## 17

*Mai futsan anoafo ainfon furoma cuscarafu*

<sup>1</sup> Ascatan uhuun namapan ointsa ahuaara ahuscaran ariscashquiain cuscan afanan ua oinmayoa. Nan Diosin oinmati afu nai muran icafo siete tutso tsmacashon futsan ua yoia, —Nuri ohuu. Nan pushu ichaparasi unufo chaimashta anoafo fasi chacacoin. Ainfo furomacoin cuscarafu. Ascano Upa Diosin ato onaintimashquin. Oinyopon. Mia oinmanon. <sup>2</sup> Nantifi niaifofo maifoti atofu inanmitsamisifo. Ascan atohuunoashu afori fasi chacacoin icafo. Nan ainfo furomacoin cuscarafu. Ascan Diosin ato onaintimashquiain cuscan mia ismaran, —ishon ua yoia.

<sup>3</sup> Asca huashon tsoan istaipama ano Diospan Yoshin Shara ua iyoa. Nannoa un oian nan ainfon yoina pofu cuscarafu oshicooin camaqui tsoa. Nan yoina pofu ahuan yoratishton anu ichapa cunua. Nantifi nan anufo Diosqui tsain chaca cunua. Nan yoina pofu mapo siete ya. Masho mucu rafutiya. <sup>4</sup> Nan ainfon saya chainipa shonan yafi oshin sahuua. Oro facafacaitsa macush cuscarafu sharashtan yafi futsan ahuan anu perla oshopa nanri sharashtacoin sahuua. Tutso oro tsoa amuran ahuaarafo chacacoin. Amuran nanua cuscan yorafa ahuaara chacacoin futsa futsatapafo chaca huama. Aton nomuran shinanchacamana. Paunmafain chanimisi imafain aton ahuinma chotamisifo imafain aton funuma chotamamisifo imafain nanscara chacafosi ato imapacumisi. <sup>5</sup> Ahuan fumananqui cunua cuscan tsoan onanmisima. Isca huaquin cunua,

BABILONIA  
NAN PUSHURASI ANOAFU  
TSOAN FUTSA ATO CUSCARAFU.  
AINFOFU FUROMACOIN CUSCARAFU  
YAFI NANTIFI MAI ANOAFU CHACAMISHTIFO  
ATON UHUA CUSCARAFU,

ishon cunua.

<sup>6</sup> Nan ainfon furoma cuscarafu Jesús icoinra huafo ichapa nan Jesús uhuun iforan huamisifo ato rutumamisi un oian. Un na ainfo oin un mustairia. Un yoia, —¡Ajaa! Ascaran ainfon chaca un oinyomisimaran, —ishon un yoia.

<sup>7</sup> Un ascaino Diosin oinmati afu nai muran icaton ua yoia, —¿Ahuuscain min mustairimun? Nan ainfo yafi nan yoina pofu camaqui cahuamisi nanton siete mapoya non masho mucu rafutiya tsoan atohuunoa tapimisima. Ascan natian un mia tapimai. <sup>8</sup> Nan yoina pofu min oian yoinacoinma. Afin niaifo uhuapa chacacoin. Nanscacun Dios noicasmamisi. Niyopaoni. Natian niyamafiashu chipo nan yoshin chacafo icanoashu cainshquin. Nannoashu cainfiacun Upa Diosin omitiscapanacafo muran potashquin afanan anoashu canacama huaquin. Tsoan Jesús icoinra huamacai aton anu ahuan libroqui cunuama afu ipanon. Nanfoan na niaifon yoina pofu cuscarafu oincashon mustairitan, “¡Aira! ¡Oincapon! Man nafiacanashu afanan oaran,” ishon yoishquicani.

<sup>9</sup> Ascan tsoan ahuan nomuran Diosihuunshon cayacafi shinantiro nanton un rama cunua cuscan tapitiro. Na yoina pofuhuunoa mato yoinon ua nicasharacahuun. Ahuan mapo siete mapocointamarocon nanfohuunshon siete niaifohuunoa noco tapimai. Nanfo icano siete machifo. Nannori nan ainfo furoma cuscarafu ica. <sup>10</sup> Mucu fustiti nan niaifofo yamai. Man nanifo. Fusti natian nia. Futsan chipo iishquin.

Chipo ifiashucaí chai ipashquima. <sup>11</sup> Nan yoina pofu cuscara oshicoín un mia yoia cuscan arifi yoinacointamarocon niaifon chaca futsan. Nan iyopaoni cuscan natiancai icama. Arifi nan siete fu ipaonifo. Chipo afanan ifiashu omitsiscapanacafo muran cai afanan anoashu canacama.

<sup>12</sup> Ascan nan masho mucu rafuti min oian mashocoinma. Nanfohu-unshon mucu rafuti niaifofu noco ismapai. Nanfo niaifofu icataifoma. Chipo mani futsanfo mucu rafuti aton niaifofu itirofo. Na yoina pofu cuscara fu niaifo iishquicani. Ascanfiacai chai niaifo ipashquicanima. Samamashta unuriscashquin. <sup>13</sup> Ascacia unuataima nan siete niaifofu nannorisi shinanmisifo. Nan nocofunun yoina pofu cuscara apaiyai cuscan nannorisi shinancani. “Min noco yonopaiyai cuscan non atiroran,” ishon nan mucu rafuti niaifofuan nan nocofunu yoina pofu cuscara yoishquicani. Afin nantifi niaifofu aton niaifocoin iishquin.

<sup>14</sup> Ascacashon nan nocofunun yoina pofu cuscara futan nan mucu rafuti niaifofuan nocon Ifo Jesús ahuun yorafoya noicasmacani. Jesús ahuun yorafu cunani ahuun tanamisifo inonfo. Ascashon ato catoan. Nanfo ahuuscarafiaino nocon Ifon cachiqiri huamisima. A tanacoinmisifo. Nan yoina pofu cuscara nan mucu rafuti niaifofu futan Jesús chashoan facu cahuan sharashta cuscara nan nocon Ifo yafi ahuun yorafu rutumapaishcani. Rutupaiyaifoan atorocofin Jesús ato namashquin. Nantianri ahuun tanamisifo afu iishquicani. Nocon Ifon nantifi niaifofu uhuapafu non niaifofu patashariri aton niaifocoinshon ato iquitiro. Nocon Ifon Jesús aton Ifocoinshon ato iquitiro. Nantifi niaifofu yafi ifoafori manifoti anoafu ato iquitiro. Ascan tsoancai nocon Ifon Jesús shuhuintiroma ahuun tanamisifocai ato tsoan cuyotiroma, —ishon nan Diosin oinmati afu nai muran imisiton ua yoia.

<sup>15</sup> Ascan afanan ua yoia isca huaquin, —Min oian nan ainfo furomacoin cuscara unu fumancayan tsoa. Nan unucaí unucocoinma. Nanhuunshon caifofu non yorafu non mani futsafo non tsain futsa futsatapayafo nan ainfon furomacoin fu icafo noco ismapai. <sup>16</sup> Nan mucu rafuti niaifofu yafi nan niaifo yoina pofu cuscara ainfo furoma cuscara noicasmacoinshcani. Nantifi ahuuna man fiishquin afanan ahuuomacoin iishquin. Ascan afanan tsoacai na ainfo furoma cuscara fu ipaishquima. Ascaiton nan mucu rafuti niaifofu yafi nan niaifon yoina pofu cuscara noicasmacoincaquin omitsiscamacaquin chi muran ainfo furomacoin cuscara potashcani afanan inonma. <sup>17</sup> “Min noco yonopaiyai cuscan non atiroran,” ishon nan mucu rafuti niaifofuan niaifo yoina pofu cuscara yoiafo. Ascacia Diosin nannorisi ato shinanmana afin apaiyai cuscan atohuunshon anon. Ascatan Diosin yoiyomisi nan anon pacoai cuscan nanscara huashquin. <sup>18</sup> Na ainfon furomacoin cuscara ainfo-cointamarocon naanfin pushurasi uhuapacoin. Nanfoan manifoti aton niaifofu iquinaran, —ishon Diospan oinmatinin afu nai muran imisiton ua yoia.

## 18

*Diosin oinmatinin afu nai muran ica yoia isca huaquin, —Natian Babilonia anoafu nai futsucani, —ishon yoia*

<sup>1</sup> Ascatan Diosin oinmati futsan nai murannoashu mai ano fotoaiton un oian. Upa Diosin yonoa niaifo patashari nanton ahuamamishti atiro. Ahuunshon maifoti chashacoian. <sup>2-3</sup> Oi ashcafinin cunaquin isca huaa,



“Babilonia ano icafoan fasi chaca huamisifo. Chaca fustisi shinanmisifo. Nocofunufoan aton ahuinma chotamisifo ainfofoan aton funumari chotamamisifo. Man amisifo cuscan caifo futsanfori atohuun caofo. Ato chaca huamamisi Upa Dios tanatamarocon chaca fustisi tananonfo. Man chaca huamisifo cuscan caifo futsafori aton niaifofaan nanscarin huaquin chaca huamisifo. Nan Babilonia ano icafoan fasi mafo ichapaya. Ascan ahua yopacaquima mai futsa anofo aton mafo inan ahuun rafanan pui fiishcaquin. Ascano futsafoanri mafo inanmitsacashon ahuun rafanan pui finonfo. Asca huacanashu Babiloniahuunoashu afori mafo ichapaya icafo. Asca huacaquin Upa Dios shinanmisifoma.”

“Ascacufin Upa Diosin nan Babilonia anofo fasi onaintimai afanan tsoan ano inonma. Ato namaquin cuyoshquin. Afanan ano yora itamarocon yoshin chaca futsan futsanta-pafo tsain mutsama yoifafainaifo ano icaforan,”

ishon Upa Diosin oinmatinin nan afu nai muran icaton ua yoia.

<sup>4-8</sup> Yoiquin asca huatanaino nai murannoashu un oi futsan nica isca huaquin,

“Babilonia ano icafoan fasi chaca huamisi finacoianfo. Nan chaca huamisifo cuscan Upa Diosin ato oinshon ointiaquimanama. Ascashon ato onaintimacoinshquin, Upa Diosin, nan Babilonia anofo futsafo chaca huamisifo cuscan mimacoin huaquin ato onaintimahuu omitsiscanonfo. Man yoiafo isca huaquin, ‘Noncai Dios yopaima. Non ahuashta yopatiroma. Nonfin isharamisiquin. Nonfin ainfon niaifocoin isharamisi cuscara. Noncai man funu amaqui naa ainfo funuoma cuscarama. Nanscara ainfo manoi omitsiscatiro. Noncai manotamarocon non isharapacunacaran,’ ishon cacapaimisifoan yoiafo.”

“Ascan, Upa Diosin, ato fasi onaintimahuu omitsiscai tununonfoma. Icoinra huafoan ua nicasharacahuun. Upa Diosin ato samamashta onaintimacoinshquin afanan isharatamarocon atirifi namafain omitsiscamafain aton tushu cuyomashquin fonainquin naanonfo. Tsoan atiroma cuscan Upa Diosin ahuamamishti huatiro. Nanton ato onaintimai ato cooi cooi futsunonfo. Ascano Upa Diosin mato yoi isca huaquin, ‘Uhuun yoramishtichin, Babilonia anofo cuscara iyamacahuun. Ato fu rafuyamacahuun. Ato futan chaca huayamacahuun un ato onaintimai cuscan un matori onaintimanonma,’ ”

ishon Upa Diosin mato yoi.

<sup>9</sup> Ascan Babilonia coaino mai futsafoti aton niaifofaan oincani uaicaquin manoshceni. Nanfoan Babiloniafo futan Upa Dios potacani chaca huanonfo. Babilonia anoafohuunshon mafo ichapa fiafo. <sup>10</sup> Nanfo coaino oincani niaifofa fasi ratushquicani.

“¡Ohuashta! Babiloniafoan rato caifo futsancai mato cuscarama. Man tapicoinsharafiacun samamashta Upa Diosin mato onaintimai man coi futsunon. ¡Ai timafin!”

ishon ratucoincaquin niaifofaan yoishquicani.

<sup>11</sup> Nanscarifiai manifoti aton inanmitsamisifo uaishceni. —¡Ohuashta! Babilonia man coi cuyoa. Natian tsoan futsacai nocon mafo non no-

con ahuara futsafo fitiroma. <sup>12</sup> Nocon oro sharashtacoin fianmafain nocon torofo oshoshtacoin fianmafain nocon toquirifo faca facaitsa chicoin fianmafain nocon toquiri futsan ahuun anu perla fianmafain nocon pano futsa futsatapafao fianmafain nocon ihui inin sharashtacoin futsa futsatapafao fianmafain toquiri curushcain oshopa sharashtacoin ahuun anu marfilhuunshon ahuarafao onihuafain ihui chicoinhuunshon ahuarafao onihuafain cuno ahuun anu broncehuunshon ahuarafao onihuafain cuno futsan ahuun anu fierohuunshon ahuarafao onihuafain toquiri ahuun anu marmolhuunshon ahuarafao onihua nanfo afanan fianmafain.

<sup>13</sup> Nocon pitiri ahuun anu canela non yochi non nan fimi ahuun anu uva ahuun unu non shuni non harina roroshta non trigori fianmafain inin shara aton anu incienso yafi futsan ahuun anu mirra non inin futsafori fianmafain nocon inafao nan moifo non chashoanfo non caballofo fianmafain taramutiya fianmafain nocon oinmatifori noco afanan fiantirofoma.

<sup>14</sup> “¡Ohuashta! Babiloniafoan nan ahuarashta sharashtacoin futsa futsatapafao man fasi fuchipaimisifo afanan man fitiroma. Nantifi man aya cuscan man funocoian afanan man fipanacama. Man ahua yopapaonima. Man acai afanan ascanacama. Nantifi matona man funoi cuyocoianran,”  
ishon nan inanmitsamisifoan yoishquicani. <sup>15</sup> Babiloniafo fasi omitsiscaian nan Babilonia anoafao yamafashon aton mafo fimisifo atohuunshon mai futsa inanmitsashon pui ichapa fimisifo fasi ratucoincani. Fasi uaishcain manocaquin yoiquin isca huashcain,

<sup>16</sup> “¡Ohuashta! Rato futsafocai Babiloniafo cuscarama. Ahuun yorafo sahuuti sharashtacoin sahuumisifo. Sahuuti shonan shara non oshin shara non oro toquiri faca facaitsa chicoin non toquiri futsa ahuun anu perla sahuutihuan nuu nanscara sahuuafao. <sup>17-19</sup> Fasi ishara fiamisishacaquin samamashtacoin nantifi man funoafao. Afanan aton pushurasi yamai. Man coi cuyoi futsua. ¡Ohuashta!”  
ishon nan inanmitsamisifoan yoishquicani. Nanscarifiai nan shashohuan ifofo non amuran fomisifo non shashohuanun camisifo pui fiishquin afoanri fasi shinain. Babilonia coaiton chaicushon oincani manocani fasi uaicani.

“¡Ohuashta! Rato pushurasi futsancai Babilonia cuscarama. Nanno fustishon shashoan ifofoan pui ichapa fiafo. Ascanfiacanashu samamashtacoin nantifi man aya cuscan man funoaforan,”

ishon shashoan yonomisifoan yoishquicani.

<sup>20</sup> “Ascafiaifoanno nantifi Upa Dios fu icanoafoan unimacahuun. Babiloniafoan Jesús icoinra huafo man omitsiscamamisifo. Ascancufin Upa Diosin ato fasi onannitimana omitsiscapanacafo. Nantifi Jesús icoinra huafoan non Jesús fu rafumisifoan non Diosin tsain inon pacoai yoisimisifoanri unimacahuun,”

—ishon yoia. <sup>21</sup> Ascatan Upa Diosin ahuun oinmati afu nai muran icaton futsan mutsisipacoin toquiri uhuapacoin finifoantan unuhuan muran potaquin yoia isca huaquin,

“Un na toquiri curushcai pota cuscan nanscarifiai Upa Diosin nan pushurasi anoafao Babilonia curushcai ato

onaintimashqui coi munononfo. Cuyoriscatashquin afanan tsoan oinñacama. <sup>22</sup> Ascan afanan Babilonia ano manutifo nan shainti non manuti futsafori pusicanima. Tsoancai afanan ato nicanacama. Yonomisi afanan ano iyamacain afanan naniainfo nicayamafain <sup>23</sup> afanan lamparina ano otapacunacafoma. Nocofunun ainfo fiaino unimaifoan man nicamisi.”

“Ascan afanan tsoan ascaran nicapacunacama. Babilonia anoa inanmitsamisifoan fasi tapicoincani. Nanfoan fasi ichapa fiafo. Aton shointihuunshon manifoti paramisifoquin. <sup>24</sup> Babiloniafoan Diosin tsain yoimisifo non Jesús icoinra huafo futsafori rutumamisifo. Manifoti anoa ato rutunifo,”

ishon Diospan nai oinmatinin yoia.

## 19

<sup>1-2</sup> Ascatan nai muran icafo ichapacoin aton oi un nica. Oi ashcafinin un ato nica isca huaquin,

“Tsoan chaca huamisi Upa Diosin ato onaintimai. Iconquin ato onaintimai. ¡Aicho! Nocon Ifon Diosin fasi sharacoin non yoipacunon. Nanton nocon chaca soashona non afu nipanon. Ahuunoa fusti non yoitiro isca huaquin, ‘Min nocon Ifocoin. Tsoa futsacai mia cuscarama. Mirus fusti min sharacoinmisiran,’ ishon nantifishon yoipacunonfo. Ahuun shinanhuunshon ahumamishti huatiro. Upan Diosin Babilonia anofo atohuunoa isca huaquin yoia, ‘Nan Babilonia anofo ainfo furomacoin cuscarafu. Man chaca huamisi-fohuun manifoti anofo ato chaca huama. Ascancufin ua Babiloniafoan fasi ua chaca huafo. Uhuun yorafori man omitsiscamacani naanonfo. Ascan un ato omitsiscamapacunacaran,’ ”

ishon Upa Diosin yoia. <sup>3</sup> Afanan oi ashcafinin nai murannofoan yoia isca huaquin,

“¡Aicho! Nocon Ifon fasi sharacoin non yoisharapacunon. Chaca huamisifo iconquin ato onaintimai. Ato chií urumanhuan muran potai. Nan chiicai nocapacunacamaran,”

ishon yoiafo. <sup>4</sup> Ascanori Upa Diosin tsoa ano nan Jesús icoinra huafo aton cushumisifo nan veinte cuatro nocofunufo yafi nan Diosin onihuan rafu non rafuri anaman fuoshonpacufoantan isca huaquin yoiafo  
—¡Aicho! Nanscasi ipanon. Amen. Nocon Ifon Jesús fasi sharacoin, non

*yoipacunon*

—ishon yoiafo.

<sup>5</sup> Ascatan Upa Dios tsoa ano un oi futsan nica isca huaquin,

“Upa Diosin oinmatifo non niaifofoanri man Diosin mato yoia cuscan nicacoinmisi. Marifi Upa Diosihuunoa yoisharacahuun isca huaquin, ‘¡Aicho! Upa Diosin min fasi sharacoinran,’ ”

huacahuun.

*Jesús nan Diospan chashoan facu cahuanshara cuscara ahuan yorafo aqui ihuutiro afu fusi huanonfo*

<sup>6</sup> Ascatan yorahuanrasi aton oi unuhuan ponoin achacoin cuscara yafi nai curushcain turuica nicatsa un nica yoiaifoan,

“Nocon Ifoan Diosin tsoan atiroma cuscan ahuamamishti hu-  
atiro. Nanfin nantififain nocon Niaifocoinquin. Manifesti  
anoa noco iquinan. ¡Aicho! Nocon Ifoan Diosin fasi sharacoin  
non yoipacunon.”

7-8 “Nocofunun ainfo fiaino ainfo unimacoin itisharatiro ahuun  
funu fu fianain. Nanscarifiai nocon Ifo Jesús nan chashoan  
cahuanshara cuscara natian ahuun yorafo afu imapacui.  
Ascan ahuun yorafo man itisharafo afu ipashcaquin. Ain-  
foan ahuun funu unimamai nashitiro. Nashishon saya  
funa sharashtacoin patsashon sahuutiro afu fiananshquin.  
Nanscarifiai ahuun yorafoan itisharashon Upa Diosin aton  
chaca soashonon Jesús fu ipasharanonfo. Ascacun non uni-  
manon. Tsoa futsancai mia cuscara sharamaran non nocon  
Ifo huanon,”

ishon yoiafo. Diospan yorafoan Jesushuunshon futsafo shara huamisi.  
Ascan Diosin ato sahuuti sharashtacoin sahumana Jesús fu ipashara-  
nonfo.

<sup>9</sup> Ascatan Diospan oinmati nan afu ica ua yoia, —Un mia yoiai cuscan  
cunuhuu isca huaquin, “Uhuun Facun Jesús chashoan facu cuscara  
natian nantifi ahuun yorafo ichanain afu ipashcaquin. Ascan ohuu.  
Uhuun Facu ahuun yorafo pimai minrifi ato futan pitiro afu ipashquin,”  
ishon Upa Diosin nannori yoi fasi unimatiro. Nannori Upa Diosin ahuun  
tsain. Ahuun tsain man icoinra huatiroran, —ishon ua yoia.

<sup>10</sup> Ua yoiaino un anaman fuopacua, —Min sharacoinran, —ishon  
yoishquin. Ascafishon ua yoia, —Asca huayamahuu. Ua anori  
yoiyamahuu. Unrifi nan mi futan Jesús icoinra huafo cuscarari. Jesús  
mato yoia cuscan man cachiquiri huamisima. Un matofu ahuun oin-  
matiri. Nan fusti non fuoshopacutiro yoishquin, “Min fasi shara. Min  
uhuun Iforan,” ishon min nan fusti yoitiro. Diospan tsain yoimisifoa  
yoiafo cuscan unrifi un mia yoia nanscasi huaquin non Jesushuunoa  
non yoinon, —ua huua.

*Cristo afanan mai ano oshquiai cuscan yoia*

<sup>11</sup> Ascatan uhuun namapan ointsa ua oinmana cuscan afanan un mato  
tapimai man tapinon. Upa Diosin nai muran icanoa un oian. Fupoti  
fupumua pushu muran non ointiro. Nanscara Upa Diosin icari un  
cayacafi oian. Nanno caballo oshopa un oian. Nan caballo camaqui  
tsaoaton ahuun anu ichapa. Ahuun anu rafuhuunoa mato yoinon.  
Yoia cuscan acoinmisi. Ascan ahuun anu futsan Iconmisi. Nanton  
iconcain yora chacafo onaintimai. Nan Diosin tsain nicacasmamisifo ato  
potashquin omitsiscapanacafo muran. <sup>12</sup> Ahuun furo chi uruai cuscara  
rafu. Chi uruaino faquishfiacun yoran oinsharatatiro. Nanscarifiai  
nocon Ifoan yorafoti aton nomuran shinain cuscan onancoian. Niaifo  
maiti sharashtacoin ichapa maia. Ahuun fumananqui anu cunua. Arus  
fusti nan anu onan.

<sup>13</sup> Sahuuti chainipa sahuua. Nan sahuuti imiqui pocoa. Ahuun anu  
futsari Diospan Tsainran. <sup>14</sup> Ahuun yorafo nai ariashu caballofo oshopa  
camaqui aton Ifo cachiori focani. Ahuun ranushumua cuscarafo. Aton  
sahuutifo yufan oshopa sahuuafo. Na sahuuti oshopa rama patsamua  
cuscarafo. <sup>15</sup> Ahuun tsain nopu cunocoin cuscara. Ahuun tsainmansi  
manifesti yoitimamisifo ato onaintimai. Manifesti ato iquina ratofomain  
yoitimamisiqi ato curushcai onaintimaquin finacoin. Ahuun tsain

nicacasmamisifocun nan Diosin ahuamamishti huatiro fasi atoqui sinacoin. Ascan Jesushuunshon ato onaintimai omitsiscapanacafo muran ato potashquin. <sup>16</sup> Jesús ahuun anu futsan ahuun sahuuti chainipa mananquirinoa yafi maiguirinoahuun cunua isca huaa,

NIAIFOFO MANIFOTI ATON NIAIFOFOIN ANUFAIN IFOAFO  
MANIFOTITON ATON IFOCOINRAN

ishon cunua.

*Jesús nan yoina pofu cuscara finoncoinyaino chii urumanhuan muran potani*

<sup>17-18</sup> Ascantari un oian Diosin oinmati afu nai muran ica futsan fari tsacaino nishon oi ashcafinin puiyafo noyaiton cuna, —Fucahuun. Upan Diosin mato pimapai. Niaifocoinfo non ranushumua aton niaifocoinfo non aton niaifo patasharifo non nocofunufu mutsisipacoin non caballofo non caballo catu camaqui tsaocao non nantifi Diosin tsain nicacasmamisifoti niaiffo non yora ahuamari nantifi Diosin ato namashquin. Ascacufin puiyafoan aton nami pi mayanshquincaniran, —ishon nan oinmatinin puiyafo yoia.

<sup>19</sup> Ascatan un afanan nocon Ifo Jesús ahuun noicasmamisifo nan yoina pofu cuscara yafi manifoti aton niaiffo uhuun namapan ointsa un ato oian. Man ichanancoan Jesús ahuun caballo camaqui tsaocun ahuun yorafoya rutupaicani. <sup>20</sup> Aton rututamarocon Jesús ato achia chi muran ato potashquin. Nan yoina pofu cuscara yafi nan fuparamitsamisiton, —Unfin Diosin tsain mato yoimisiquin, —ishon yoiflashu chanimisi. Nanton yoina pofu cuscarahuunoa tsoan atiroma cuscan Satanashuunshon huamisi. Ascan nantifi cunua yorafo nan yoina pofu cuscara ahuun anu atoqui nua. Nanfoan yoimisi isca huaquin, —Min uhuun dios. Un mia noiran, —ishon yoimisifo. Ascarafofin nan yoina pofu cuscaraqui. Ascan nan paramitsamisiton tsoan atiroma cuscan ahuamamishti acai cuscan man oianfo. Ascaquin ato paracoian. Nan rafu nan yoina pofu cuscara yafi nan paramitsamisi niyoa Jesús ato chi urumanhuan muran pota.

<sup>21</sup> Nan rafutan yora tushuafo Jesús ahuun caballo camaqui tsaoshon ahuun tsainman nopu cunocoin cuscarahuunshon ato rutumana nai futsuafo. Naafoanno puiyafo atoqui ichanancashon aton caya piqui mayafu.

## 20

*Jesús Satanás achishon nusha mil fari*

<sup>1</sup> Ascatan Diospan oinmati Diosin icariashu fotoaiton un oian. Shafi cuscara tsoma. Nan yoshin chacafo quininhuan faquish muran icafoqui atoqui fupoti fupoa. Nanno Diosin oinmati fupoti ahuun shafi cuscara yafi cuno pono uhuapa cuscara tsoma. <sup>2</sup> Tsomashon nan famanhuan cuscara achia. Diosin mai oni huataima nan rononhuan iyopaoni. Paramitsamiscoin. Naanfin yoshin chacacoin Satanás. Achishon cuno pononun nusha. <sup>3</sup> Ascashon quininhuan faquish muran pota. Potatan aquí fupocoian amuran mil fari inon afanan caifoti paranonma. Nan mil fari anaitiano cainmayoi ahuutishotama afanan mai ano cahuanca-cayonon.

<sup>4</sup> Ascatan niaiffoan tsaotifo Upa Diosin icanoa un oian. Jesús ahuun yorafo nan tsaotifo camaqui tsaocao. Jesús yonoano a futan futsafo yonoshquin. Ascashon nannori un oian nan Jesús icoinra huaa futsafo.

Nanfo niyoano nan yoina pofu cuscara yafi ahuuna ointsa rami huati nanfoan ifoanmisima. —Minfin uhuun Ifo. Un mia noiran, —ishoncai yoimisifoma. Aton anu aton mucu iyamarai aton fumananqui cunumisifoma. Ascatamarocon yoimisifo isca huaquin, —Jesús fustifin nocon Ifoquin, —huamisifo. Diospan tsain fustisi tanamisifo. Ascan nan yoina pofu cuscara atoqui sinaquin ato tushtumana. Nai futsufiafo Diosin ato funimani. Funishon Jesús futan mai ano mil fari yorafoti iquina.

<sup>5</sup> Nanfo funi yoi. Ascan nan mil fari anaitiano futsanfori funimashquin. <sup>6</sup> Shinancapon uhuun yoramishtichin un mato yoiai cuscan. Nacorifi Upa Diosin noco funimaqui tau huashquin. Nocon catoan ahuun yorafo non inon. Upa Diosin yafi Criston noco yonoma-paiyai cuscan non futsafohuunoa non Upa Dios cufimisi. Non Jesushu-unoashu omitsiscafiamisishaquin naashu non omitsiscapanacafo muran canacama. Ascatamarocon non Cristo icanoshon a futañ futsafo iqishquin. Ascashu Jesús cuscara shara icashu non fasi unimacoinshquin.

<sup>7-8</sup> Ascatan nan mil fari anaitiano Satanás quininhuan faquish muranno afanan cainmayoshquin nan manifoti anofo parayonon. Ascatan Dios nicacasmafo manifoti ano ato ichanan huai Diospan yorafo rutumashquin. Ichananfoanno fasi ichaparasi. Nan Dios nicacasmafo tsoan tanan huatiroma. Aton anuquin Gog yafi Magog man huamisifo. <sup>9</sup> Manifoti cunua ato ichanan huashquin Diospan yorafo icano ato cufuacufoanifo ato rutushquin. Ascafiacun Upan Diosin ahuun yorafo fasi noiquin ato numashqui. Nan yorafo Satanás ichanan huaa nai muranshon ato camaqui chi urumanhuan potai nai futsunonfo.

<sup>10</sup> Ascatan nan yoshin chaca Satanás nanton yorafo fuparapaimit-samisicoin Upan Diosin chi urumanhuan muran pota. Nanno omitsiscapanaca. Nannori nan yoina pofu cuscara yafi a futañ yonopaoni, —Unfin mato Dioshuunoa yoimisiquin, —ishon yoifiamisishaquin Satanashuunoa ato yoimisi. Fasi paramitsamisicoin. Nan rafu non fusti chi urumanhuan muran omitsiscapashquin. Isin muuquin unupacucacafoma.

*Jesús icoinra huafoa ato onaintimashquiai cuscan*

<sup>11</sup> Ascatan tsaoti oshopa uhuapacoin un oian. Nanno Upa Diosin tsaoran. Ahuunoashu nantifi mai anofo non nai murannori cuyoi futsui. Ascashu nantifi yorafo nai futsui. Diosiqui onupaifiai tsoan onutiroma. <sup>12</sup> Ascatan un oian nan niaiffo non yora ahuamafori naacanashu Upa Diosin tsaoran ano niafo. Nanno niafoanno Upa Diosin ahuun librofo fupua. Libro futsari fupua. Nan libro ahuun anu nipamisifo aton anu cunua. Nan naafoan amisi cuscan librofo muran nantifi Upa Diosin man cunua. Ascan nan chaca huapaonifo cunupacua cuscan ato ismashon iconcoincun ato onaintimacoinshquiran ishon ismatiro.

<sup>13</sup> Nan asafu yafi mai anoashu naamisifo nan omitsiscapanacafo muranri nantifi nan naamisifo Upa Diosin ahuun ointaifi fuafo. Nan chaca huafo cuscan atoti Upa Diosin onaintimacua. <sup>14</sup> Nantiffain nan Diosin tsain nicacasmamisifo Upa Diosin ato chi urumanhuan muran pota. Man naafiafoan natian ato chi urumanhuan muran pota. Nannoashu omitsiscapanacaforan ishon ato anupacua. <sup>15</sup> Ascan nan libro ahuun

anu nipamisi. Tsoa ahuun anu nan libro muran Upa Diosin cunumisima nanfo chi urumanhuan muran pota.

## 21

### *Nai yafi mai funacoin Upa Dios afanan oni huashquin*

<sup>1</sup> Ascan uhuun namapan ointsa Upa Dios noco ashoain cuscan ua oinmana. Un oian nai yafi nai murannoafoti maifoti funacoin Diosin onihua. Nan nai yafi mai tauhuaquin onihuani yamariscatana. Nan ununhuanri yamariscatana. <sup>2</sup> Ascan un oianri Diospan yorafoan Jesús tanasharamisifo nai murannoafoti Upa Dios icariashu fotocani. Nanfo icano ahuun anu Jerusalén funa. Nan Jerusalén funaya fotoashu nanno icani. Fotoaiton un oian fasi sharashtacoin. Ainfon ahuun saya sharashtacoin sahuua itisharashquin funu fu fianain. Nanscarifi aquin Upa Dios nan Jerusalén funa atishara huua sharashtacoin inon. Ahuun yorafo nanno afu nipasharashcani.

<sup>3</sup> Ascan Upa Dios tsoa ano oi ashcafinin un nica. Yoia isca huaquin, —¡Aicho! Natian Upa Dios yorafo fu iishquin. Ato muran iishquin nanfo ahuun yorafo inon. Aafin aton Diosiri iishquin. <sup>4</sup> Ato cushusharashquin afanan tsoa omitsiscatiroma. Atohuun ramapai tsoa uaicai ato shinanmasharatiro aton fuon turuashontiro afanan shinanchacai cuscan pusitama unimanon. Ato cushuaino tsoashta afanan nayamacain manoyamacain uaiyamacain isin mucanimaran, —ishon yoia. Ahuara chacafo iyopaoni cuscaai afanan ascanacama.

<sup>5</sup> Asca huatan Diosin ahuun tsaoti camaqui tsaoshon yoiquin isca huua, —Un nantifi funa onihuairan, —ishon Dios yoia. Ascashon futsan ua yoia, —Min nicaai cuscan cunuhuu nan tsain nantiffain icoinra huanonfo. Iconcoina nan tsain yorafoan icoinra huatirofo, —ishon ua yoia.

<sup>6</sup> Ascashon afanan Diosin ua yoia isca huaquin, —Mun aca. Natian mun yoiyoni cuscan man anaitia. Ahuara oni huataima un iyopaoni. Ahuutiamain maifoti cuyoicai urus fusti un yoitiro. Un nantifi iquina. Ufin ipamisiquin. Tsoan naaqui nomicoinquin yoitiro isca huaquin, “Unfin fasi unu yopacoincai nashquima,” ishon yoitiro. Nanscarifiai tsoa ipasharapaiquin yoitiro isca huaquin, “Un fasi numamisi yopai. Un Dios yopacoinran,” ishon anori yoiaiton un unimaquin cashmancoina nan nimapacutiro ufu nipanon. <sup>7</sup> Tsoan ua cachiquiri huatamarocon nan naitian ua tanasharacun nantonacaifin nantifi un mia yoia cuscan ahuunari iishquiquin. Naanfin un cashman inanshquin. Unfin ahuun Dios iishquin. Aafin uhuun facu iishquin.

<sup>8</sup> Ascan ratoran futsan ratutan cohuuqui uhuunoashu omitsiscapayamacun ua cachiquiri huashquin uhuun tsain icoinra huayamafain chacacoin futsa futsatapafo shatucasmafain rutumitsamisi icain aton ahuinma chotamisi icain ainfofoanri aton funumafo chotamamisi icain shointi nan yoshin chacafo fu tsainmisi icain Ucai noitamarocon ahuara futsan finaquin noicoiain icain ascarafa yafi nantifi chanimisifori ufu ipatamarocon chi urumanhuan muran nan omitsispacunacafo muran ipashcani. Anoashuca fonacafoma, —ishon Upan Dios ua yoia.

### *Jerusalén Funa*

<sup>9</sup> Ascatan Diosin oinmati afu nai muran icafo nan siete nanfoan tutso muran ahuara chacacoin fospihuamua maifoti camaqui ocacaquin ato

omitsiscamacani futsan uqui oshon ua yoiquin isca huai, —Ohuu. Un mia ahuaa sharacoin ismai. Nocofunun ainfo fii cushusharashquin. Nanscarifi aquin Jesús nan chashoanun facu cahuanshara cuscaratoin coinra huafo fia ahuun yorafo inon. Ohuu. Un ato mia ismanon, —ua huaa.

<sup>10-11</sup> Ascan Diospan Yoshin Sharapan ua iquiniton Diospan nai oinmati ua machi uhuapa cuyacoin camaqui iyoa nantifi un oinnon. Jesús icoinra huafo nan Dios icanoafo aton chaca soashona nanfo nai murannoa Upa Dios icariashu fotoaifoan ua isma. Nan machi cuyacoin anoshon ua isma. Nanfo icano ahuun anu Jerusalén funa. A muran icafo Jesús tanasharamisifo. Upa Diosiri atofu ica. Nanno fasi faca facaitsa. Toquiri faca facaitsa cuscara. Fasi sharashtacoin. Nan toquiri ahuun anu jaspe tsosia shara toquiri futsan ahuun anu cristal. Faca facaitsa cuscara.

<sup>12</sup> Cunu cushto mutsipipan cuyacoin nan Jerusalén tarati huayacuna. Nan cunu cuyacoin doce fupotiya. Fupotiti ano Diospan oinmati afu nai muran icafo doce nia cushusharashquin. Israeli ahuun facu doce facufo aton funafori tiri futsan pashcanifo. Nan fupotifoti aton anu doce nutanfo.

<sup>13</sup> Nan cunu rafu non rafuri cuyacoin iyacuna cuscan fupotiya doce fari oaiquiri rafu non fusti non fari oai istafari rafu non fusti non fari cai istafari rafu non fusti non fari caiquiriri rafu non fusti fupotiya.

<sup>14</sup> Nan cunufu cuyacoin toquirininhuan doce camaqui onihua. Jesús nan cashoanun facu cahua sharashta cuscara afu rafumisifo doce aton anu toquirininhuantiqui nutan.

<sup>15</sup> Diospan nai oinmati futsan nan unfu tsainquin tananti tsuma Jerusalén funa non ahuun cunufu cuyacoin uhuapan non ahuun fupotiri tananshquin. Nan tananti facatahua chainipa cuscarafishu oro sharashtacoin. <sup>16</sup> Nan Jerusalén funa ahuun cunu rafu non rafuri cuyacoin nantishon fosi. Ahuun chainipa non ahuun ashfanri nantishon rafu. Ahuun cuyari nantio fosi. Diospan nai oinmati futsan tanan dos mil dos cientos kilometros ahuun chainipa non ahuun ashfan non ahuun cuyari. <sup>17</sup> Ahuun cunufu cuyacoin ahuun cushto sesenta y cinco metros tanan. Nan oinmatinin afu nai muran icaton yorafoan tananmisi cuscari arifi metronun tanan.

<sup>18-20</sup> Jerusalén funa sharashtacoin. Ahuarafo amuran vidrio botica cuscara cushtocoin ocu rafu oinquin non nocotiro. Vidrio botica cuscarafishu oro. Nanhuunoa Upa Dios onihua. Ahuun cunufu cuyacoin non cushtocoinri. Toquiri ahuun anu jaspe tonan shara ahuun cuno oshin shara faca facaitsaya osian. Toquiri sapa cushtocoin futsa futsatapafo doce putsamuinia camaqui nan cunu rafu non rafuri Upa Dios onihua. Toquiri sapa fasi chainipa cushtocoin futsa futsatapafo fusti tauhuaqui fuca. Ahuun anu jaspe.

Nan jaspe tonan shara ahuun cuno oshin faca facaitsaya osian. A fuchi toquiri sapa futsa fasi chainipa cushtocoin ahuun anu zafiro.

Nan zafiro tonan sharashtacoin.

A fuchi toquiri sapa futsa fasi chainipa cushtocoin ahuun anu agata. Nan agata shonan sharashtacoin osian.

A fuchi toquiri sapa futsan chainipa cushtocoin ahuun anu esmeralda shonan sharashtacoin.

A fuchi toquiri sapa futsa chainipa cushtocoin ahuun anu onice oshin mapash sharashtacoin.



A fuchi toquiri sapa futsa chainipa cushtocoin ahuun anu cornalina oshin sharashtacoin.

A fuchi toquiri sapa futsan chainipa cushtocoin ahuun anu crisolito ahuun cuno oshin faca facaitsa cuscara sharashtacoin.

A fuchi toquiri sapa futsan chainipa cushtocoin ahuun anu berilo shonan mapash sharashtacoin.

A fuchi toquiri sapa futsan chainipa cushtocoin ahuun anu topacio chashna sharashtacoin.

A fuchi toquiri sapa futsan chainipa cushtocoin ahuun anu crisoprasa shonan yafi chashna mapash osian sharashtacoin.

A fuchi toquiri sapa futsan chainipa cushtocoin ahuun anu jacinto nanhuain ointsa mapash sharashtacoin.

A fuchi ahuun unutaquin toquiri sapa futsan chainipa cushtocoin ahuun anu amatista nanhuain ointsa sharashtacoin. Nan toquiri sapa doce sharashtacoin a fuchi cunu Upa Diosin nimainifoanni.

<sup>21</sup> Nan cunu rafu non rafuri ahuun fupotifo doce perlahuunshon Diosin ato onihua. Perla toquiri cuscara osho sharashtacoin. Nan perla fustihuunnoa fupoti fusti onihua. Perla fustihuunnoari fupoti fustiri onihua. Nansca huashosi nan doce fupotifo Upa Dios onihua. Nan Jerusalén funa ahuun faitifi oro sharashtacoin onihua. Nan oro vidrio botica cuscara cushtocoin ocu rafu oinquin non nocotiro.

<sup>22</sup> Ascan nanno Dios fu tsainti pushu yamai. Upa Dios nan ahua-mamishti huatiro yafi nocon Ifo Jesús nan chashoan facu cahuan sharashta cuscara Jerusalén funa muran imisifo. Ascacufin yorafo atofu tsainpai pushu yopacanima. <sup>23</sup> Nanscarifiai nanno fari yafi oshu yopacanima. Upan Dios yafi Jesús nan chashoan facu cahuan sharashta cuscara atofu ica. Upan Dios nanno ishon ato chashashona. Jesusrifi aton lamparina cuscara ato otashona cayacafi oinsharanonfo. <sup>24</sup> Nanhuunshon chashaino manifoti nifoanfafaitirofo. Niaifofanri nan Jerusalén funa muran iquishon ahuarafa shara man aya cuscan iquimashquin.

<sup>25</sup> Nanno yamuri yamai. Faquishpacunacama. Ascan ahuun fupotifo fupopacunacama. <sup>26</sup> Ascan Jerusalén funa muran manifoti anoafo iquicaquin ahuarafa shara aya cuscan amuranri iquimashcani. Aqui fasi unimacani finacoinshcani. <sup>27</sup> Ascan ahuarashta chaca amuran iquitiroma. Nan shinanchacamisifo non chaca huamisifo non paramisifori iquitirofoma. Tsoa Jesús nan chashoan facu cahuan sharashta cuscara ahuun libro muran ahuun anu cunuano nanno afu ipatiro. Nanfosi Jerusalén funa muran iquitirofo Jesús fu ipasharashcaquin.

## 22

<sup>1-2</sup> Ascan uhuun namapan ointsa Diosin ahuun oinmati afu ica futsan Dios icanomain ahua cuscaraquin ua isma. Upa Dios yafi Jesús nan chashoan facu cahuan sharashta cuscara tsoa anoashu unu tsosi cristal shafacaficoïn ointsa afain. Icafo nushmancayan unu afain. Nanno icafoan nan unu tsosi shara ayapaiyaitian ayatiro. Nannoashu nipanaca. Nannori fai nushmancayan ica. Unu ocama rafu nii shocoa. Nan nii ahuun fimi piipaiyaitian pitiro. Nanscarifiai Dios no fu ipacoïainno non ahuunoashu nipasharashquin. Nan nii oshutifi fimimisi. Ahuun pui tsasipacunacama ahuun shachoco funa shara ipanaca. Ahuunoashu manifoti non Dioshuunoashu muma funa shara ipanaca.

<sup>3</sup> Nanno Jerusalén funa Upa Diosin yafi Jesús no fu iishquin. Non aton yoracoinshon non ato noicoishquin. Non aton oinmati cuscara iishquin. Ato fanainsharashocun ato yoisharapacunaca. Ascan nocon mai shuni ano chaca futsa futsatapafo ipaoni cuscacai nan Jerusalén funa ascarama. Ahuashta chaca amuran itiroma. <sup>4</sup> Nannoa nocon Ifoan fuso oinfafaincani. Aton fumananqui ahuun anu nutamana. <sup>5</sup> Nocon Ifon Diosin ari icafo ato shafahuashoan. Ascan afanancai lamparina yafi fari yopatirofoma. Anocai afanan yamuima. Nanscashi afu niaifo patashari ipanacafo.

*Jesús oti chaima*

<sup>6</sup> Ascatan Diospan oinmati afu nai muran icaton afanan ua yoia, — Nocon Ifon Diosin ahuun tsain yoimisifo aton nomuran tapimamisi ahuara ahuuscaranai cuscan aton yorafo tapimashcani. Nanscarifiai natianri ahuun oinmati afu ica futsa nichian ahuara ahuuscaran arish-cashquiain cuscan ahuun icoindra huafoti tapimashquin. Nan un mia yoiai cuscan iconcoin. Nantifi uhuun tsain man icoindra huatiroan, — ishon ua yoia.

<sup>7</sup> Yoiquin asca huatan nocon Ifo Jesús yoia isca huaquin, —Un nai murannoashu mai ano matoqui nocoriscashquin. Man min oian inon pacoai cuscan nanfo min cunushotiro. Tsoan nanfo icoindra huafain cachiquiri huayamashu unimacoin iishquiran, —ishon Jesús ua yoia. <sup>8</sup> Uquian, Juan, un nanfo nicafain oian un nan Diospan oinmati afu nai muran icaton un anaman nofuomupacua nan uhuun ifocoin-cun ismashquin. <sup>9</sup> Un asca huafiaiton ua yoia isca huaquin, —Asca huayamahuu. Urifi mia cuscara. Min non Jesús icoindra huafo non ahuun tsain yoimisifo non nantifi nan min rama cunua cuscan icoindra huafo urifi mato cuscara nocon Ifon Diosin ahuun oinmati. Ascan Upa Diosin fustisi min Ifo huatiro. Nan fusti min anaman nofuomupacuc-ahuashotiro, —ua huaa.

<sup>10</sup> Ascatan afanan ua yoia isca huaquin, —Ahuuscaran arishcashquiain cuscan min rama cunua samamashta iishquin. Ascan min cunua cuscan onuyamahuu. Nantifi yorafo tapimahuun. <sup>11</sup> Ascan Jesús nocoaitian nan nicacasmamisifo fasi chaca finacoishquicani. Yora chacacoin huamisifori mimacoin chacacoin iishquin. Nan Diosin yoia cuscan huamisifori mimacoin Diosin yoia cuscan aashcani. Nan Jesús cuscara shara imisifoanri mimacoin huaquin aton Ifo tanasharashcani, —ishon Diospan oinmatinin nan afu imisifo futsan ua yoia.

<sup>12</sup> Ascashon Jesús afanan yoia isca huaquin, —Ua nicasharacahuun. Un matoqui samamashta nocoriscái. Nocoshon un mato yoia cuscan man huacun un mato inansharashquin. Nan shara huamisifo un ato shara huafain nan chaca huamisifo un ato onaintimacoinshquin. <sup>13</sup> Ahuarafo onihuataima un iyopaoni. Unfin ipamisiquin. Un ipashquin. Un unupacunacama. Ahuutiamain maton mai cuyoicai urus fustifin un yoitiro.

<sup>14</sup> Jerusalén funa muran iquishon nan nii ahuun fimi pipaiquin pitiro nipashquin. Nanscarifiai Upa Dios fu icaino arus fusti mato nimapacutiro. Nan ua icoindra huafo aton chaca soashona nanfo fusti uhuun Upa Diosin ato iquimatiro nofu ipanonfo. <sup>15</sup> Ascan nan yora chacacoin pashna pofu cuscara iquimayamafain shointifo ya nan shointi icoindra

huafo iquimayamafain nocofunun ahuun ahuinma chotamisi yafi ain-foanri ahuun funuma chotamamisi iquimayamafain rutumitsamisi iquimayamafain tsoan Dioscoinma noiquin ifoancun iquimayamafain nan chanimisifo nan chani noimisicai. Ascara yorafocai Jerusalén funa muran iquitirofoma.

<sup>16</sup> Unquian, Jesús, uhuun oinmati nan unfu icaton miqui nichian un mia yoia cuscan ua icoinra huafo ichananti anori min ato tapimanon. Unquian David ahuun funa. Un fishi uhuapa shafainoshta oinmisi cuscara. Nan fishi oinquin non tapitiro samamashta shafariscatiro. Nanscarifiai un otichaima tapicanashu itisharatirofo Jerusalén funa muran ufu ipanacaforan, —ishon Jesús yoia.

<sup>17</sup> Ascano Diospan Yoshin Shara yafi Jesús ahuun yorafoanri nantifi yorafoqui isca huacani, —Jesusqui fucahuun, —yoiafoan. Tsoan nica-coiainton yoiqui isca huatiro, —Jesusqui fucahuun, —huatiro. Tsoa nomicoin unu yopai unu ano catiro ayatan ahuun nomi shatutiro. Nanscarifiai tsoan ahuun chaca shatupai Jesusqui otiro Upan Dios fu ipashquin. Ahuara inantamarocon Jesús icoinra huashu afu nipatiro.

<sup>18</sup> Unquian, Juan, ahuuscaran arishcashquiain cuscan un mato cunushona. Un mato cunushonai cuscan cayacaficoin. Tsoan nan tsain nica natian un mato yoipacuai cuscan. Ua nicasharacahuun. Un mato cunushona cuscan tsoan afanan tsain futsa shinanfain cunucun nan libro muran omitsiscapanacafohuunoa cunua cuscan iconcoin Upa Diosin nantifi nanfo omitsiscamashquin. <sup>19</sup> Ascantari ahuuscaran arish-cashquiain cuscan un cunua tsoan nan tsain atirifi soacun Upa Diosinri ahuun anu soashquin nan ahuun libro murannoa. Ascacufin nan Jerusalén funa shara muran iquipacunonfoma. Un nan cunua cuscan nan Upan Diosin ahuarashta shara yoiyoni cuscan aya ipanaca.

<sup>20</sup> Jesús yoia cuscan nannori un mato cunushona. Nanton yoiqui isca huaa, —Icon. Un matoqui samamashta nocoriscairan, —ishon yoia. Ascaran inon. Ifon Jesús nocoqui oriscahuu. <sup>21</sup> Mancai Diospan yorafo. Ahuara ahuuscarafiaino nocon Ifon Jesús matohuun noishon maton nomuran mato fupuashoin man shara inon. Nanscasi ipanon. Amen. Nanti.

Juan